

**XTIDXCOOB DIOS NI BIÄDNÄ
DAD JESUCRIST**

**EL NUEVO TESTAMENTO
DE NUESTRO SEÑOR JESUCRISTO**

en el zapoteco de Mitla



La Liga Bíblica

Las Sagradas Escrituras para Todos

El Nuevo Testamento
en el zapoteco de Mitla
La Liga Bíblica 1M primera edición 1981 [zaw]
La Liga Bíblica versión electrónica 2009

Publicado por

© La Liga Bíblica 1981

Se permite copiar, distribuir y comunicar públicamente esta obra bajo las siguientes condiciones:

- ▶ Reconocimiento. Reconozca a la Liga Bíblica los derechos que tiene en la impresión o distribución de esta obra, deslindándola de responsabilidad alguna por cualquier uso que se le de a la presente publicación.
- ▶ No comercial. No puede utilizar esta obra para fines lucrativos.
- ▶ Sin obras modificadas. No se puede alterar, transformar o generar una obra a partir de ésta.

Índice

San Mateo	1
San Marcos	57
San Lucas	91
San Juan	151
Hechos	193
Romanos	252
1 Corintios	276
2 Corintios	299
Gálatas	314
Efesios.....	322
Filipenses	330
Colosenses.....	336
1 Tesalonicenses	342
2 Tesalonicenses	347
1 Timoteo	350
2 Timoteo	356
Tito	361
Filemón.....	364
Hebreos.....	366
Santiago	383
1 Pedro	389
2 Pedro	396
1 Juan.....	400
2 Juan.....	407
3 Juan.....	408
Judas.....	410
Apocalipsis.....	412

Guijtz Ni Bacuaa Mateo

Retoxpengoldoo Jesucrist

(Lc. 3:23-38)

1 Guijtz ni rusule' laj retoxpengoldoo xten Jesucrist xi'n toDavid, xi'n toAbraham.

²Abraham gujc xtdad Isaac, Isaac gujc xtdad Jacob, Jacob gujc xtdad Judá con rebejtzni. ³Judá con Tamar gujc xcuzajn Fares con Zara. Fares gujc xtdad Esrom, Esrom gujc xtdad Aram. ⁴Aram gujc xtdad Aminadab. Aminadab gujc xtdad Naasón. Naasón gujc xtdad Salmón. ⁵Salmón con Rahab gujc xcuzajn Booz. Booz con Rut gujc xcuzajn Obed. Obed gujc xtdad Isaí. ⁶Isaí gujc xtdad reii David. David con nani gujc cháäl Urías gujc xcuzajn Salomón.

⁷Salomón gujc xtdad Roboam. Roboam gujc xtdad Abías. Abías gujc xtdad Asa. ⁸Asa gujc xtdad Josafat. Josafat gujc xtdad Joram. Joram gujc xtdad Uzías. ⁹Uzías gujc xtdad Jotam. Jotam gujc xtdad Acáz. Acáz gujc xtdad Ezequías. ¹⁰Ezequías gujc xtdad Manasés. Manasés gujc xtdad Amón. Amón gujc xtdad Josías. ¹¹Josías gujc xtdad Jeconías con rebetzni cheni huij reben Israel pres lo guedx Babilonia.

¹²Che gudejd huij rebejnğa pres Babilonia, dxejc guyu' xi'n Jeconías, Salatiel. Salatiel gujc xtdad Zorobabel. ¹³Zorobabel gujc xtdad Abiud. Abiud gujc xtdad Eliaquim. Eliaquim gujc xtdad Azor. ¹⁴Azor gujc xtdad Sadoc. Sadoc gujc xtdad Aquim. Aquim gujc xtdad Eliud. ¹⁵Eliud gujc xtdad Eleazar. Eleazar gujc xtdad Matán. Matán gujc xtdad Jacob. ¹⁶Jacob gujc xtdad José cháäl Marii nani gujc xnan Jesús ni birilaj Crist.

¹⁷Ni'cni gujc tzudaj xfamiļ reni agudejd gubi'reni lo guedxliujre che gubajnlı toAbram cheni gubajnliza torei David. Tzudajza rexagdoo najc reni gudejd cheni gubajnlı toDavid cheni huijli reben Israel pres Babilonia. Stzudaj rexagdoo najc reni gudejd cheni biriilireni pres Babilonia che gojlli Crist.

Cheni gojl Jesucrist

(Lc. 2:1-7)

¹⁸Scree gujc cheni gojl Jesucrist. Abia'n xnanni, Marii, diidx guchnaani José ni gac cháälni. Per ansde xca' sa'reni, Marii agac nuxi'nni sa'csi biääd Sprit Dxan xten Dios lojni. ¹⁹José com najcni te bensa'c, di rlajzni nuro'nni Marii

nez loj rebejn te niacbeereni, ni'c bejnii xhigab Guronxhiga'tzni Marii. ²⁰Xhigabga cayujnni cheni baluiloj te xangl Dios lojni, lo bacad räjpnii lojni:

—José xajg toDavid, na'c guidxejblu xca'lu Marii gacni chäällu sa'csi xi'nni nani chu najc xten Sprit Dxan xten Dios. ²¹Che gaal xi'nni cuälajluni Jesús sa'csi laani guslaani rexpejnii lo rextoljreni.

²²Guiraa redee gujc si'c te guzojb diidx ni gunii tej ni bacuaa xtidx Dios. Räjpnii:

²³Suu te dxapxteeb bäz, sajl te xingaanni nani guirilaj: Emanuel, (lajni säloj Dios nabajn con nuure).

²⁴Che gubajn José lo bacad, bejnii si'cni räjpn xangl Dad lojni. Cua'ni Marii gujc chäällni. ²⁵Luxh dini niembeeni si'c chäällni dxejli cheni gudejd gojl xingangalojni ni gulälajni Jesús.

Che biädhuui reben nanduxh ni laa remagos lojni

2 Cheni gojl Jesús nen guedx Belén xten guedx Judea, najc Herodes reii xten guedx Judea. Dxejc bidzujn reben najn ni najc remagos, siädreni nejz cadro rliejn gubijdx, bidzujnreni guedx Jerusalén. ²Rniabdiidxreni:

—¿Con reii xten reben Israel nani golgaj, ä? Nurnu abihuini xpajlni laadxlinu, ni'cni siopdonnuni.

³Che biejn diajg reii Herodes diidxga, guyuduxhni yärsia' näjza guiraa reben Jerusalén. ⁴Dxejcti batie'ni guiraa rebixhojzro ni rnibee loj rebixhojz, näjza guiraa

renani ruluui xleii Moisés lo rebejn te gunabdiidxni lojreni:

—¿Caro gaal Crist?

⁵Laareni räjpnii:

—Nen guedx Belén xten guedx Judea sa'csi si'c gunii niguii ni bacuaa xtidx Dios che räjpnii:

⁶Luj guedx Belén xten guedx Judea, dilu gajc maazru huin loj reguedxro xten guedx Judea sa'csi nen guejdxre guirii tej nani guinibee, te ni ga'p rexpenä Israel.

⁷Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni. ⁸Dxejcti baxhalnireni guedx Belén, räjpnii lojreni:

—Colchäj ro'c, colnabdiidxsa'c xcuent biuuxga te che abidxältuni jädniitu loä te näjza narä chaganäni.

⁹Che biejn diajgreni xtidx reii, sä'tireni. Bajl nani bahuiireni lagajc lajdxreni lahtis nijdni lojreni. Che bidzujnliireni cadro yu' bázga, dxejcru guzobdxii bajlga.

¹⁰Che bahuii remagos loj bajlga, rbalazduxhrene. ¹¹Si'c bidzujnreni. Che biu'reni nen yu', bahuiireni lo bázga con xnanni Marii. Dxejcti bazuxhijbreni, gojnreni bázga, baxhalreni rexcäl'nasa'creni bazalajzreni oor, näjza yaal näjza yalnejh. ¹²Che agojl guibi'reni, gunixcälreni, räjpn Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

Che siini Egipto

¹³Che sii remagos lajdxreni, biäd te xangl Dios baluilojni lo José lo bacad, räjpnii:

—Huistie, cua' biuxe're nájza xnanni, huinäreni Egipto. Ro'c gulájz che guiniáli lojlu. Siguuil Herodes biuxe're sa'csi rlajzni ju'tnini.

¹⁴Dxejc huistiegajc José, cua'ni biuxe're nájza xnanni, lagajc yáälga biriireni, siireni nez Egipto. ¹⁵Ro'c guyu'reni cheni gujtli Herodes. Guiraa dee guzajc te guzobj diidx ni bacuaa niguii ni gunii xtidx Dios che rájpmi: “Egiptoli guredxá xi'ná.”

Che guinibee Herodes gujt rebiuxbáz

¹⁶Che gucbee Herodes abasguee remagosni, bidxechduxhni. Gunibeeni guet guiraa rebiuxniguii ni yu' tio'p ijz nájza rebiuxe' ni yu' guxiiru dxej, guideb neñ guedx Belén nájza reguejdx ni re' gabiga, si'cti redxej ni rájpmi remagos lojni. ¹⁷Dxejc guzobj diidx ni bacuaa Jeremías ni gunii xtidx Dios che rájpmi:

¹⁸Biejn xse' bejn neñ guedx Ramá, te yälhuinduxh, te yälrbedxdij, yälrbedxnen: laa Raquel ni roon yejc rexi'nni. Naaddini jiäjł lajzni sa'csi agujt rexi'nni.

¹⁹Cheni gujt Herodes, dxejc lo te bacal huiluiloj xangl Dios loj José neñ Egipto. ²⁰Rájpmi:

—Huistie, cua' biuxe're nájza xnanni, gubisac nez Israel sa'csi agujt renani rlajz ju't biuxe're.

²¹Dxejcti huistie José, cua'ni biuxe' nájza xnanni. Gubi'reni Israel. ²²Luxh che biejn diajgni rnibee Arquelao guejdx Judea lacuaa Herodes, xtadni, bidxejbni nuini ro'c. Dxejc gunisac Dios lojni loj te bacal, ni'c huijni lo reguejdx

xten Galilee. ²³Dxejc biädlájzni nen guejdx ni laa Nazare't te si'c guzobj diidx ni bacuaa niguii ni gunii xtidx Dios cheni rájpmi: “Sirilajni nazaren.”

Juan Bautist basule' xtidx Dios loj rebejn

(Mr. 1:1-8; Lc. 3:1-9, 15-17; Jn.1 :19-28)

3 Neñ redxejga biääd Juan Bautist lo reyubijdx xten guedx Judea, ro'c cagulijdxni, ²cayájpmi:

—Colgusiechljaztu rextojłtu sa'csi xcälrnibee Dios abidzungajxhni.

³Juan najc nani basá't Isaías, te niguii ni gunii xtidx Dios, cheni bacuaani:

Riejn xse' te ni rbedxa' nez lo reyubijdx:

“Colguslii xnezyuj Dad, colguslii xnezyulajzni.”

⁴Najcw Juan xquichlajd cameii. Naliib te duguijd xque'ni. Rajwni guxha't nájza dzujn xten baseerguijxh. ⁵Riääd reben guedx Jerusalén náj guiraa reben Judea nájza rebejn ni tre' gajxh nez ro' gueu Jordán, riädcuadiajgreni xtiidxni. ⁶Che ruxhobdojlreni xtojłreni, rutiobnis Juanreni ro' gueu Jordán.

⁷Che bahuiini siääd xhidajl reben guidoo ni najc refarisee nájza ni najc resaducee, rlajzreni gutiobnisnireni, rájpmi lojreni:

—La'tu benguidxduxh, najctu si'c bäl. ¿Chu balijdxtu guxuñtu loj xcälrdxe'ch Dios ni siääd?

⁸Colguibansa'c si'cni nungäjł te fiipac rebejn guliipac abasiechljaztu.

⁹Na'c litis guntu xhigab naatu: “iNi nurnu najcnu rexagdoo toAbram!”

Rniliä lojtu, sajc xca' Dios reguijre gunni gacreni rexi'n toAbram.

¹⁰Asoj**b** guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni. ¹¹Narä guliicani rustiobnisä con nis si'c te seen cheni abasiechlajztu, abaxhobdojltu. Niluxh nani siääd detzä sutiobnisni la'tu con Sprit Dxan xten Dios näjza con guiboo. Rnibeeruni loä. Bensacduxhni. Nicla xcura'chni digacdi chanää. ¹²Aca'ni xhi cojn gusiani triuu xtenni te chuchee triuuga neṅ ngodx xtenni. Dxejcti guixhtriuuga, suze'cni guijxhga lo guiboo ni rejc par tejpas.

Che guobnis Jesús

(Mr. 1:9-11; Lc. 3:21-22)

¹³Dxejc birii Jesús nez Galilee, bidzujṅni ro' gueu Jordán cadro yu' Juan te gutiobnis Juanni. ¹⁴Niluxh naaddi Juan gutiobnis Jesús. Räj**p** Juan lojni:

—Luj nanab gutiobnislu narä, niluxh naj alga luj siäädlu loä te gutiobnisälu.

¹⁵Dxejc räj**p** Jesús lojni:

—Basaan gacni si'c naj, sa'csi nanab gusoobnu guiraa ni r**l**ajz Dios gac.

Dxejctiru batiobnis Juan Jesús.

¹⁶Cheni gulujx guobnis Jesús, birigajcni lo nis. Dxejc bixal xhaguibaa, bahuiini siädyäjt Sprit Dxan xten Dios si'c te palom, biäjtni lojni. ¹⁷Dxejc xhaguibaali biejn diajgreni te xse' ni räj**p**:

—Dee najc xi'nä ni sanälazä. Laani rbanälazä.

Che huij Jesús lo reyubijdz

(Mr. 1:12-13; Lc. 4:1-13)

4 Dxejc bejn Sprit Dxan xten Dios huij Jesús nez lo

reyubijdz te nejzga nuhual**l** bendxab Jesús.

²Che gulujx bacua'n Jesús tiuu gubijdx, tiuu guxhijṅ, gulaanni.

³Sas biääd bendxab lojni, räj**p**ni:

—Palga guliilu Xi'n Dioslu, gunibee gac reguijre yätxtiil.

⁴Badzu' Jesús diidxre lojni, räj**p**ni:

—Loj reguijtz xten Dios caj scree:

“Xhet ganaxdi yät**l**xtiil guibajṅ rebejṅ; sibajṅzani con guiraa diidx nani rnii Dios.”

⁵Dxejcti huinä bendxab Jesús guedx Jerusalén. Gulä'pnini jiaa yejc xques guidoro. Dxejcro räj**p** bendxab lojni:

⁶—Palga Xi'n Dios luj, bitiäjs lo yujli, sa'csi scree caj loj rexquijtz Dios:

Sinibee Dios rexanglni ga'preni luj;

siliäsreni luj con naareni didi gacnaj ni'lu lo reguijga.

⁷Badzu' Jesús diidxre lojni, räj**p**ni:

—Caj loj rexquijtz Dios: “Na'c faḷlu Dad ni najc Xtioslu.”

⁸Stee huält huinä bendxab Jesús yejc te danro. Dxejcti baluiini lojni guiraa reguejdx, reguedxro ni tre' lo guedxliuj naj guiraa xcäl**n**asa'ceni.

⁹Dxejcti räj**p**ni loj Jesús:

—Guiraa redee sunidxä lojlu palga guzuxhijblu nez loä te gan**l**u narä.

¹⁰Dxejcti räj**p** Jesús lojni:

—iHuij nez rec bendxab! Scree caj loj rexquijtz Dios: “Dad Xtiosl**l**u gan**l**u; loj**t**isni chulu.”

¹¹Dxejcti gubicaj bendxab loj Jesús. Dxejc biääd rexangl Dios biädhuiireni Jesús.

Gusloj Jesús cayujṅ xtzuunni

(Mr. 1:14-15; Lc. 4:14-15)

¹²Che biejn diajg Jesús yu' Juan neṅ ladzguuib, huij**n**i nez Galilee.

¹³Dxejcti gudejdni guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabulón con Neftalí. ¹⁴Si'c gujc te guzobj diidx ni bacuaa Isafas ni gunii xtidx Dios:

¹⁵Lajdx Zabulón, lajdx Neftalí, nezyuj ni rij nez ro' nisdoo, stelaad gueu Jordán, Galilee cadro rbäjz rebejn nani di gac rexpenn Israel.

¹⁶Rebejn nani rbäjz nen te yälcäjy abahuiireni te bajlga, luxh bajlga basanij xcäriejn renani nabajn lo xcälrdxejb, lo xpalaa yälgujt.

¹⁷Dxejcli gusloj cagulijdx Jesús, räjpni:

— Colgusiejchljaztu, colguxhobdojl te guibansa'tcu sa'csi abidzungajxh xcälrnibee Dios.

Che gurejdx Jesús tajp xpejnii

(Mr. 1:16-20; Lc. 5:1-11)

¹⁸Sasaj Jesús nez ro' nisdoo xten Galilee che bahuiini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bäjł, ni'c cacuaareni guijxh lo nisdoo. ¹⁹Dxejcti räjp Jesús lojreni:

— Coltanajł narä. Naj riniaaztu bäjł, niluxh narä gunä cuedxte rebejn.

²⁰Lagajc dxejc basa'nreni xquijxhreni te sanajłreni laani.

²¹Che gudejdreni ro'c, bahuiini loj stio'p niguii, Jacob con bejtzni Juan. Yu'reni nen te barcw con xtadreni, ni laa Zebedeo cayunsa'creni guijxh. Dxejc gurejdx Jesúsreni. ²²Lagajc dxejc basa'nreni

barcw näjza xtadreni te sanajłreni Jesús.

Caguluii Jesús xhidajł bejn

(Lc. 6:17-19)

²³Sasajti Jesús guideb nez región xten Galilee, caguluiini nen teja rexquidooreni. Cagusule'ni redidxcoob xten xcälrnibee Dios. Cagusiajczani guiraa yälracxhuu ni rajc rebejn guejdxga, guiraa yälgujdx. ²⁴Biejn diajg reben Siria diidx xcuent ni cayujn Jesús. Sas biädnäreni guiraa rebenracxhuu ni cayajc guiraloj yälgujdx, yälñayan; guiraa reni rajc yejcreni, guiraa reni rajc malyälgujdx, reni rajc yälguidxbej, guiraareni abixu'n tiejxhreni. Dxejcti basiajc Jesús rebejnğa. ²⁵Xhidalduxh ben Galilee huinajłni, näj reben reguedx Decápolis, näjza reben Judea näjza rebejn ni tre' stelaad gueu Jordán.

Yejc te dajn balijdx Jesucrist rebejn

5 Che bahuii Jesús loj reben xhidajł, huä'pni yejc te dajn. Dxejcti gubig rexpejnii ni gurejdxni lojni. ²Dxejc gusloj caguluii Jesús reni'c, scree räjpni:

Rebejn ni sibaalajz

(Lc. 6:20-23)

³—Sibaalajz rebejn nani nanchee rquinduxhreni xcälracnäj Dios, sa'csi laareni nungäjłreni xcälrnibee Dios.

⁴Sibaalajz rebejn nani rac-huin lajzreni xcuent rextojłreni, sa'csi sudzucaj Dios xtojłreni, susiäjłni lajzreni.

⁵Sibaalajz rebejn nani nadolajz nani rłajz guntis si'cni rnibee

Dios, sa'csi sacnäj Diosreni lo xcälınabajñreni lo guedxliujre.

⁶Sibaalajz rebejn ni nastoocanu rliaanreni, riojlreni, sa'csi rlajzreni guibańsa'ctisreni nez loj Dios, sa'csi sudeed Dios lojreni guiraa ni rniabreni.

⁷Sibaalajz rebejn nani rulaslajz sa'reni, sa'csi sulaslajzza Diosreni.

⁸Sibaalajz rebejn nani najc nayatis lastooreni rujñreni rexhigabsa'c xten Dios sa'csi suhuiireni lo Dios.

⁹Sibaalajz rebejn nani ruscuedxilajz sabejnreni, sa'csi laareni sirilajreni rexi'n Dios.

¹⁰Sibaalajz rebejn nani rusutijp lajzreni che rusacsı bejnreni sa'csi nabansa'creni nez loj Dios, sa'csi xtenreni najc xcälırnıbee Dios xhaguibaa.

¹¹Colspaalajztu che gusacsı bejntu tilnäjreni la'tu, guiniireni guiraloj didx-xhii xcuent xtidxä.

¹²Colguibaalajz, colbalajz sa'csi xhaguibaali sunidxduxh Dios xcuent xtuuntu. Sigajzca basacsıreni renıguii ni gubajn galoo ni gunii xtidx Dios.

La'tu najctu si'c sejd lo guedxliujre

(Mr. 9:50; Lc. 14:34-35)

¹³Räjpzani:

—La'tu najctu si'c sejd lo guedxliujre. Palga di sejd gac nadzuju, ¿xho gacsacni nadzuju? ¿Xhi gun bejnñ dxejc? Susälreni sejdga detz yu', suläj bejn yejçni.

¹⁴La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni.

¹⁵Digacdi xcaguij te bajl dxejcti jıäuuni neñ te caj. Maazru huen

soobni jiaa neñ te gandilieer te gusanijni loj guiraa rebejn ni tre' neñ yu'. ¹⁶Xcälınabansa'ctu najc si'c te bajl loj rebeñ guedxliuj. Suhuiireni xtzunsa'ctu dxejc siliä'preni xpala'n xtadtu ni yu' xhaguibaa.

Ruluıi Jesús xcuent leii

¹⁷Räjpzani:

—Na'c guntu xhıgab siädgudzucaä leii xten toMoısés, niclaza rediidx ni baluıi redad ni gunii xtidx Dios. Xhet siädzducaädini, narä siälä te guluiäpacni si'cni najçni. ¹⁸Rniliäpac, dxejli che ni nitloj guibaa näjza guedxliuj, nicla tej letr ni caj loj leii di nit. Sajçpac guiralii ni caj lo reguijtzga. ¹⁹Ni'cni chutis ni rlajz gusaan te diidx nani caj loj leii, mase te didxbäzni, luxh ruluıini gun bejn si'c, laani guxiduxh sajçni lajdx Dios guibaa. Niluxh renani rucuadaıaj xtidx leii, luxh rujñpacreni si'cni caj lo leii, ruluıizani leii, bensacduxh gacni lajdx Dios guibaa. ²⁰Ni'cni rniä lojtu, palga ditu gusa'cru xtzun Dios, ditu guibańsa'cru loj reni najñ xcuent xleii toMoısés, näjza loj rebeñ guidoo ni laa farisee, dipactu jiu' lajdx Dios xhaguibaa.

Ruluıi Jesús xcuent yälrdxe'ch

(Lc. 12:57-59)

²¹Räjpzani:

—Abiejnza diajgtu nani gunii rebengoldoo: “Na'c ju'tlu. Chutis te nani ju't sa'ni, sinärenini lo guxhtis te jıäuuni neñ latzguııib.” ²²Niluxh narä rniä chutis nani guidxechduxh lo sa'ni sıjni lo guxhtis. Chutis ni gunii didxnaj lo sa'ni, sıjni lo juejz.

Chutis ni gäb lo sa'ni: “bennayällajz” sidejdni loj yälguxhtis xten Dios, sijni gabijl cadro cayeje guiboduxh.

²³Che sanälu gojn guidoo te gusa'nlu ni lo bacuug, palga guinaj lajzlu yu' chu lo cadxe'chlu, ²⁴basansijc gojn xtenlu lagajc ro'c, huisiälxgaa diidx con sa'lu, dxejcti guibi'lu te gac gusa'nlu gojn xtenlu.

²⁵Palga yu' chu rdxe'ch lojlu, basquejn basiäjl diidx con laani lagajc cheni sasanäjlni lonezyuj te di gutedni luj lo juejz. Luxh juejz suteedni luj loj reguixhaj te gusaureni luj nen latzguuib.

²⁶Rniliäpac lojlu: “Dilu guirio ro'c palga dilu cue'c guiralii meel nani guiniabni lojlu.”

Rului Jesús xcuent yälrusguee sa'ni

²⁷Räjpzani:

—Abiejn diajgtu guniireni galoo: “Na'c guesnäjtu gunaa nani di gac chäältu.” ²⁸Narä rniä, chutis te nani fii loj te gunaa dxejcti guisia' lajzni gunaaga, abejnni dojl nen lastooni. ²⁹Palga balojlu ladbee rujn rujnlu dojl, gulääni basälni te laad sa'csi hueenru gunijtlu te balojlu quela chää guideb tiejxhlu gabijl. ³⁰Palga naalu ladbee rujn rujnlu dojl, batiu'ni sa'csi hueenru gunijtlu te naalu quela chää guideb tiejxhlu gabijl.

Rului Jesús xcuent yälruro'n chää bejn

(Mt. 19:9; Mr. 10:11-12; Lc. 16:18)

³¹Räjpzani:

—Abiejn diajgtu guniireni galoo: “Chutis niguii ni rajz guro'n chäälni, nanabtis gudedni te guijt z nani nrii abaro'nni chäälni.” ³²Narä rniä,

niguii nani guro'n chäälni niluxh xhet dojl di bejn chäälni, niguiiga sujn gun chäälni yälgubejxh, niluxh chutis ni guchnaa gunaaga sujnzani yälgubejxh.

Rului Jesús xcuent che ria'n diidx

³³Räjpzani:

—Abiejn diajgtu gunii rebengool: “Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios.” ³⁴Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios, ³⁵nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxlaidx reiir, ³⁶niclaza por lagajc bituiejclu, sa'csi digacdi guncheelu te guichyas niclaza te guichno, nicla tej guijch. ³⁷Nanab guiniitlslu: “Mbaj” o “Ajndi”. Palga yu' xhiru rniilu, bendxab najc ni rujn rniiluni.

Chanälajzni rebejn ni rdxe'ch lojni

(Lc. 6:29-30)

³⁸Räjpzani:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu.” ³⁹Narä rniä, na'c tilnäjl te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni. ⁴⁰Palga yu' chu rrajz tilnäjl te xca'ni xcamangwlu, badeedza näj xsa'cwl lojni. ⁴¹Palga yu' chu guinibee guulu xcargwni te kilómetro, huinani tio'p kilómetro. ⁴²Nani guiniab xhi guiniabxlia'ni lojlu, badeedni. Nani guiniablaa xhi guinablaani lojlu na'c gudxojnlu ni lojni, na'c gäblu: “Xhetini.”

⁴³Abiejn diajgtu gunii rebengool: “Colchanälajz sa'tu. Colguidxe'ch loj renani rdxe'ch lojtu.” ⁴⁴Narä rniä lojtu, colchanälajz rebejn ni rdxe'ch lojtu. Benle' yejc reni rgue lojlu. Colyejn dxunsa'c loj renani rdxe'ch lojtu. Colcuejdx, colnab loj Dios xcuent rebejn nani rdxagdijltu, rusacsíreni la'tu, ⁴⁵te si'c gactu xi'n xtadtu ni yu' xhaguibaa nani rujn rii xcubijdxni lo rebensa'c sigajcza lo reben guijdx. Rujnzani riab nisguij lo rebensa'c sigajcza lo rebenguijdx. ⁴⁶Palga la'tu chanälajztu lagajctis rebejn nani rinälajz la'tu, ¿xhi gaan guntu dxejc? Najctu lagajc si'c najc rebejn ni rutie' meel ni rajx lo gubier. ⁴⁷Palga guiniitu: “Xchan”, lagajctis loj resa'tu, ¿xhini'c rujntu ni najc hueenru lo chutis bejn? ¿La et sigajcdiza rujn rebejn nani di gumbee Dios? ⁴⁸Colyajc bensa'c si'c ni najc xtadtu ni yu' xhaguibaa.

Rulúi Jesús xho gudeedni gojn

6 Rájpzani:
—Na'c gusäbdiidx guntu dzunsa'c nez loj rebejn te fiitisreni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu. ²Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee nen reguidoo, näjza lad nezyuj. Rujnsireni si'c te ruhuii rebejn xhi rujnreni te rliä'p rebejn xpala'nreni. Narä rniä acua'reni gaan xtenreni. ³Luj che gudeedlu gojn xtenlu, na'c gacbee nicla tej xamiigwlu xhi badeedlu, ⁴te gac gojn xtenlu xhiga'tz. Dxejcti xtadlu ni cahuii nani bejnlu xhiga'tz, sacnäjni luj nez loj rebejn.

Rulúi Jesucrist xho cueedx, guiniabni lo Dios

(Lc. 11:2-4)

⁵Rájpzani:

—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchaglajzreni rniabreni lo Dios rsiuliireni nen reyu' cadre riel xtidx Dios, näjza guiraa resquiin, näjza nez ronejz te ruhuii rebejn xho rujnreni. Rniliápac, acua'reni gaan xtenreni. ⁶Naj luj cheni cueedx, guiniablu lo Dios, biu' nen xyu'lu. Basäuu ro' yu'ga, dxejcti xhiga'tz gunii loj xtadlu ni yu' xhaguibaa. Dxejcti xtadlu ni cahuii xhi rujnlu xhiga'tz, sacnäjni luj nez loj rebejn.

⁷Cheni caniitu lo Dios, na'c guinisactu balti huält rediidx nani aguniitu. Si'c rujn rebejn nani di gumbee Dios. Naarení sa'csi sanuutis rniireni xhidajl diidx balti huält, siejn diajg Dios. ⁸Na'c guntu sigajc ni rujnreni, sa'csi anajn xtadtu xhini'c rquiintu che guiniabtuni lojni. ⁹Ni'cni scree colguinii lo Dios:

Xtadnu ni yu' xhaguibaa dxan najc lajlu.

¹⁰Sujiääd xcälrnibeelu;
bejn si'cni rlajzlu lo guedxliujre sigajc rujnlu xhaguibaa.

¹¹Nadxej baniidx xcu'nnu sa' ni rdaunu guira dxej.

¹²Basiäjł lajzlu redojl xtenu si'c riäjł lajznu redojl xten rebejn ni rujn dojl loonu.

¹³Na'c gusaanlu jiaabnu xhigabguijdx,
basłaa nuure lo dojl,
sa'csi xten guejblu najc
yälrnibee, yälndip näjza
yälrdimbicha' par tejpas.

Sugacni si'c.

¹⁴Palga la'tu gusiäjł lajztu redojl ni rujn rebejn lojtu, xtadtu ni yu' xhaguibaa susiäjłza lajzni rextojłtu.

¹⁵Palga ditu gusiäjł lajztu redojl ni rujn rebejn lojtu, sigajcza xtadnu ni yu' xhaguibaa di lajzni jiäjłza rextojłtu.

Ruluii Jesús xho gucua'n bejn

¹⁶Räjpzani:

—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliä acua'reni rexgaanreni.

¹⁷Niluxh la'tu, che rucua'ntu, colcun yejctu, colquiib lojtu ¹⁸te na'c gacbee rebejn cagucua'ntu, xtadtistu suhiii cagucuanxhiga'tztu. Xtadtu ni cahuii xhi cayunxhiga'tztu suniidxni xhi xca'tu nez loj rebejn.

Yäl'nasa'c ni yu' xhaguibaa

(Lc. 12:33-34)

¹⁹Räjpzani:

—Na'c gapdajntu yäl'nasa'c lo guedxliujre cadro rajw reman o rribtiejn xhixtentu, niluxh richu' gubaan rolizj bejn te rbajnreni.

²⁰Hueenru ga'ptu xcäl'nasa'ctu xhaguibaa cadro di reman gauu, diza rehxixtentu cuibtiejn, diza regubaan jiu' te cuanreni. ²¹Sa'csi cadro yu' xcäl'nasa'ctu, ro'cza naga' lastootu.

Bianij xten tiejxhtu

(Lc. 11:34-36)

²²Räjpzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij. ²³Niluxh

palga rebalojtu di fisa'c, guideb tiejxhtu yu' lo nacäjy, ni'cni palga bajl nani yu' tiejxhtu dini gusanij, ilinacäiboo najc guidebtu!

²⁴Nicla te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Digacdi guntu xtzuum Dios palga caguuiltistu xcäl'nasa'ctu lo guedxliujre.

²⁵Ni'cni rniä lojtu, na'c chutu yärsia' por xcäl'nabajntu, xhicha gautu, xhicha yätu, niclaza naatu xhicha lajd gajcwtu. Yäl'nabajn sajcru lo yälrajw, luxh sajcru tiejxhtu lo xhajbtu. ²⁶Colhuii remane' ni rtajt xhaguibaa. Direni cue'c binij, dizareni guilia' gäjł, dizareni cuchee xhi gaureni nen yu', luxh xtadtu ni yu' xhaguibaa rudedni xhi rajwreni. ¿Laa xhet sajcdirutu loj remane'ga, ä? ²⁷¿Chu tej la'tu sa'csi ru'tu yärsia' sajc tiobrutu ste bo'c jiaaru?

²⁸¿Xhicuent runduxhtu xhigab xcuent xhajbtu? iColhuii reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni. ²⁹Narä rniä lojtu, nicla reii Salomón guideb najcwni rexhabsa'c xtenni di nisiuchee si'c rsiuchee tej reguiiga.

³⁰Palga Dios rujn rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, bejn nani guxii rililajz?

³¹Ni'cni na'c chutu yärsia' guntu xhigab: “¿Xhicha guidaunu, xhicha guidunnu, xhicha gacwnu?” ³²Sa'csi rebejn nani di gumbee Dios xhigabtisga rujnreni, caguilreni guiraa recosga. Niluxh xtadtu ni yu' xhaguibaa anajnni xhini'c rquiintu.

³³Colquixгаа yälrnibee xten Dios näjza yäl'nabansa'c si'cni rlaiz Dios dxej sica'tu guiraa ni rquiintu.

³⁴Ni'cni na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

Na'c cubeetu sa'tu

(Lc. 6:37-38, 41-42)

7 Räjpzani:
—Na'c cubeetu sa'tu te na'cza cubee Dios la'tu. ²Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutixhtu lo bejn, si'cza sutiexh Dios lojtu. ³¿Xhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu? ⁴¿Xhicuent gäblu lo sa'lu, nädonnu cuää guijxh ni yu' nen balojlu, luxh dilu fii loj yagro ni yu' nen balojlu? ⁵Ben'guijdx ni rusguee, guläxгаа yagro ni yu' balojlu te gac fisa'clu te cuäälü guijxh nani yu' baloj sa'lu.

⁶Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbälazreni cossa'c najczeni si'c cuch ni ruläj yejc xhitis xhi cos.

Col'nab, colquiiil, colgusejz rolä'

(Lc. 11:9-13; 6:31)

⁷Räjpzani:

—Col'nab lo Dios te guniidxni nani rniabtu. Colquiiilni te guidxäjltuni. Col'nii rolä', te guixalni jiu'tu.

⁸Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhalzarenini lojni.

⁹¿La yu' chu tejtu che guiniab xi'nni te yätxtiil, alga gudeedni te guij, ä? ¹⁰O palga guiniabni te la' bälj, äla sudeedni te bälj?

¹¹Palga la'tu ni najc bejn guijdx rajc rudeedtu cossa'c loj xi'ntu, aticaxh xtadtu ni yu' xhaguibaa. Laani suniidxni cossa'c loj renani guiniabni lojni.

¹²Ni'cni guira'ti cos ni rlaiztu gunnäj bejn la'tu, sigajcza col'yennäjreni, sa'csi si'c caj lo leii xten toMoisés, näjza lo diidx ni bacuaa redad ni gunii xtidx Dios.

Rolä' xten yäl'nabajn najc dää

(Lc. 13:24)

¹³Col'jiu' nez rolä' nani najc dää, sa'csi gulajg najc rolä', gulajg najcza nezyuj nani rinä bejn lo yälrunijt, luxh xhidajlreni riu' nejzga. ¹⁴Sa'csi dää najc rolä', dääza najc nezyuj nani rinä bejn nez loj yäl'nabajn, niluxh guxii najc renani rdxäl nezyujga.

Ninexhsa'c ni rcaj loj te yajg rujn gumbeeni yajgga

(Lc. 6:43-44)

¹⁵Räjpzani:

—Col'natiro rebejn nani rlaiz gusguee la'tu. Rniisireni rusule'reni xtidx Dios. Rluuisi nadolajzreni si'c te xiil, niluxh direni gac. Alga si'c loob najczeni, rutie'chreni bejn si'c re'ch xiil che riädchu' loob lojreni. ¹⁶Dzuun nani rujnreni sujn gumbeeturenini. Anajntu di uub xcaj lo reyaguejch, diza iigw xcaj lo guechbiojb. ¹⁷Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'cdi, ganax ninejxh ni di ganaxsa'c rcaj

lojni. ¹⁸Digacdi xcaj ninexhdxuudx loj te yajg ninexhsa'c. Di gacdiza xcaj te ninexhsa'c loj te yajg ni di gac yagsa'c. ¹⁹Guiraa reyajg nani di ninexhsa'c xcaj lojni, nanab guidinni te checni. ²⁰Sigajcza sajc gumbeetu bensa'c sa'csi rujnreni dzunsa'c.

Xhet guiraadi bejn jiu' lo xcälrnibee Dios

(Lc. 13:25-27)

²¹Räjpzani:

—Xhet guiraadi renani rnii, “Dad, Dad”, jiu' lo xcälrnibee Dios xhaguibaa. Ganaxtis renani rujn si'cni rlanj Xtadä ni yu' xhaguibaa. ²²Sidzujn dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläenu rebendxab, con lajzalu biennu remilagwr.” ²³Dxejc säpä lojreni: “Dina gumbeä la'tu. Colbicaj loä benlatsiaj.”

Tio'p cimient

(Lc. 6:47-49; Mr. 1:22)

²⁴Räjpzani:

—Chutis nani rucuardiajg diidx nani caniä, luxh ruzoob xtidxä, laani najc si'c te bensin nani basoob rolijzni yejc te guilaj. ²⁵Che biajb nisguuj, biäjt nis gueuu, gubi' bej, bidinreni yejc yu'ga sas di yu'ga niajb sa'csi sojbni yejc guilajga. ²⁶Nani riejn diajgni xtidxä, luxh dini guzoob xtidxä najc si'c te ben guyalajz nani basoob rolijzni lo yujxh. ²⁷Che biajb nisguuj, biäjt nis gueuu, gubi' beduxh bidinreni yec yu'ga. Dxejc ligurebä'n yu'ga. Lacti xhiroob banijt bejnga.

²⁸Che gulujx gunii Jesús rediidxga, lacti bidxeloj rebejn

rediidx ni baluiini, ²⁹sa'csi baluiini rebejn si'cpac te nani rnibee, xhet si'c ruluiidi rebejn ni najn leii.

Rusiajc Jesús te bejn ni ral tiejxhni

(Mr. 1:40-45; Lc. 5:12-16)

8 Che biäjt Jesús yec dajn, xhidajl bejn huinajlni.

²Dxejcti biääd te benracxhuu ni ral tiejxhni nez loj Jesús. Bazuxhijbni, räjpni:

—Dad, palga rlanjlu, sajc gusiajclu narä.

³Dxejcti basгаа Jesús naani, gudajnni dade'ga con naani, räjpni: —Rlazä jiajclu. Siajc tiejxhlu.

Lagajc dxejc gubicaj guejdx ni ral tiejxhni. ⁴Dxejcti räjp Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn ni gunii toMoisés gudeed bejn ni riajc, te fii rebixhojzga abiajclu.

Rusiajc Jesús te xmos capitán roman

(Lc. 7:1-10)

⁵Che biu' Jesús guedx Capernaum, bidzujn te capitán roman nani rnibee te gayuu soldaad.

Gunabduxhni lo Jesús, ⁶räjpni:

—Dad, xmosä naga' rolizä. Di gacdi guiniibni luxh cayanduxhni.

⁷Räjp Jesús:

—Do'o te gusiacaäni.

⁸Dxejcti räjp capitán lojni:

—Dad, xhet sacädi; di nungäj] jiu' guejblu rolizä. Guiniitis te diidx, siacgajc xmosä. ⁹Narä nacäza xmos rebejn ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

¹⁰Che biejn diajg Jesús si'c, bidxeloduxhni, rájpmi loj renani siádnajlmi:

—Rniliápac lojtu, nicla nen guideb reguedx Israel dina nidxälä te bejn ni rililajz si'c rililajz dade're. ¹¹Niluxh rniä, sirii xhidajl benzijt nez ladjiaa, nez ladjät, te jädcuenäjreni Abram, Isaac, Jacoob lajdx Dios xhaguibaa. ¹²Luxh reben Israel nani ni ajc xi'n Dios sijreni te laad lo yälcäjy cadro soonreni, sauya'reni läjyreni, sidejdtisreni trabajw par tejpas.

¹³Dxejcti rájp Jesús loj capitán: —Gubi' rolizlu. Sigajcni huililajzlu, sigajcza gacni.

Dxejc lagajc orga bi ajc xmosni.

Rusiajc Jesús xnansuegr Pedr

(Mr. 1:29-31; Lc. 4:38-39)

¹⁴Che bidzujn Jesús roliz Pedr, bahuiini naga' xnansuegr Pedr, cayacxhuuni, yu'ni xliaa. ¹⁵Dxejc gudajntis Jesús naani, birigajcni xliaaga. Dxejcti huistie nane'ga, gusloj cagudeedni xhi gau Jesús.

Rusiajc Jesús xhidajl ben racxhuu

(Mr. 1:32-34; Lc. 4:40-41)

¹⁶Che biu' guxhijn, biädnäreni loj Jesús xhidajl bejn ni yu' rebendxab lostooreni; con xtiidxni gunibeeni birii guiraa rebendxabga. Basiajczani guiraa reben racxhuu. ¹⁷Si'c bejnmi te guzobj diidx ni bacuaa todad Isaiás, ni gunii xtidx Dios, che rájpmi:

Lagajc laani cua'ni rexcälracxhuunu, sanázani rexcälnayannu.

Reni rlajz ninajl Jesús

(Lc. 9:57-62)

¹⁸Che bahuii Jesús tre' xhidalduxh rebejn guideb gabi

cadro suga'ni, gunibeeni tednäjni rexpejn pacni stelaad ro' nis.

¹⁹Dxejcti biäd te bennajn loj Jesús, rájpmi:

—Mastr, sisiaäza cadrotis cháalu.

²⁰Rájp Jesús lojmi:

—Rebäjz rajpreni xpiliääreni, remane' ni rutajt xhaguibaa rajpreni xpitiääzreni, niluxh narä Xi'n Dios ni gujc Niguii dina gapä cadro gaa yecä.

²¹Stee rexpejn pacni rájp lojmi:

—Dad, basaan chaxgää ladxä te chacuatzá xtdä.

²²Rájp Jesús lojmi:

—Gudanajl narä. Basaan sugucua'tz resabengutreni rebejn nani najc si'c bengut sa'csi najcreni bendojl.

Basiacdxi Jesús te beduxh

(Mr. 4:35-41; Lc. 8:22-25)

²³Che biu' Jesús nen barcw, biu'za rexpejn pacni lagajc nenga. ²⁴Dxejc huäjs te bedonduxh lo nisdoo. Lirusiääzni barcw nen nisdoo. Luxh Jesús nagayejsni. ²⁵Dxejcti huij rexpejn pacni huicuäänni, rájpreni:

—Dad, gucnäy nuure te di guetnu.

²⁶Dxejc rájp Jesús:

—¿Xhicuent rdxejbtu, bejn ni guxii rililajz?

Dxejcti huistieni, gudidxa'ni lo bej näjza lo nisdoo, te biacdxi reni.

²⁷Dxejc bidxeloduxh rexpejn pacni, rájpreni:

—¿Chuni'c najc niguiire? ¡Ahuilaa xho rucua diajg bej näjza nisdoo xtiidxni!

Rebendxab ni yu' lajdx regadarenos

(Mr. 5:1-20; Lc. 8:26-39)

²⁸Che bidzujn Jesús stelaad nisdoo cadro najc lajdx regadarenos,

tio'p bejn ni yu' bendxab lastooreni biädchaglojreni Jesús. Rebejn_{ga} riireni nen rebaa, nialazduxhrene, ni'cni rut rajcdi rdejd nezyujga.

²⁹Guredxa'reni räjpreni:

—¿Xhicuent siädchu'lu loonu luj ni najc Jesús Xi'n Dios? ¿La siäädlu ree te gusacsílu nuure luxh gad galdi xornu, ä?

³⁰Nez te laad, zijte' cadro suga'reni, cayajp bejn xhidalro cuch. ³¹Dxejcti gunab rebendxabga loj Jesús, räjpreni:

—Palga cuäálu nuure, basaan jiu'nu nen recuchre.

³²Dxejcti räjp Jesús:

—Colchäj.

Dxejcti biriireni nen lastoo redade'ga, huichu'reni nen recuchga. Dxejcti guiragajp recuchga caguxunreni, huitejbreni ro' te guilaj, biääzreni nen nisdoo, gujttireni nen nis.

³³Rebejn ni cayajp recuchga, baxunreni, huijreni lajdxreni, huiyeireni diidx guiraa ni guzajczeni näjza ni guzajc redade' ni guyu' rebendxab lastooreni.

³⁴Dxejcti guiraa rebenguejdxga huichaglojreni Jesús. Che bahuiireni lojni, gunabduxhrene lojni, jiunejzni lajdxreni.

Basiajx Jesús te bejn nani abixu'ñ tiejxhni

(Mr. 2:1-12; Lc. 5:17-26)

9 Dxejcti biu' Jesús nen barcw. Gudejdni stelaad ro' nis te bidzujñni lajdxni. ²Ro'c biädnäreni lojni te bejn nani abixu'ñ naani, ni'ni. Naga'ni lo te da'. Che bahuii Jesús lacti rililajzreni, räjpni loj benracxhuuga:

—iBaspaa lajzlu xi'nä! Agubicaj rextojllu.

³Dxejcti gaii bennajn ni ruluu xleii Moisés cayujnreni xhigab ensilaareni, caniyaj dee Dios con rextiidxni. ⁴Dxejx gucbegajc Jesús xhi xhigab cayujnreni, dxejx räjpni lojreni:

—¿Xhicuent cayujntu xhigabgujdx nen lastootu? ⁵¿Con ni najc guyasiru? Guiniä lo te bejn: “Agubicaj rextojllu”, o guiniä lo te bejn: “Huistie, guzaj.” ⁶Dec gunä te gacbeetu Xi'n Dios ni gujx Niguui rajp yälrnibee lo guedxliujre te gudzucajni dojl.

Dxejcti räjpni loj benracxhuuga: —Huistie, cua' xta'lu, huij rolizlu.

⁷Dxejcti huistie benracxhuuga, siini rolizjni. ⁸Che bahuii rebejn lojni, bidxeloduxhrene, gulä'preni xpala'n Dios, ni badeed yälrnibeega loj rebejn.

Che gurejdx Jesús Mateo

(Mr. 2:13-17; Lc. 5:27-32)

⁹Dxejcti birii Jesús cadro basiajcti benracxhuu, sä'tini. Dxejx bahuiini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejx räjp Jesús lojni:

—Gudanajl narä.

Dxejcti huisuni, sanajlñi Jesús.

¹⁰Cheni sobga' Jesús lo mex cayajwreni roliz Mateo, biädza xhidajl rebejn nani ruquijx xcuent guiraloj, ni najc rebejn ni di gac xpen Israel, gurejzarenen lo mex näj Jesús näjza reni najc rexpejn pacni. ¹¹Che bahuii reben guidoo, ni laa refarisee, xhi cayujn Jesús, räjpreni loj rexpejn pac Jesús:

—¿Xhicuent raunäj xmastrtu rebejn nani ruquijx xcuent reyuj näjza rebejn ni di gac xpen Israel?

¹²Che biejn diajg Jesús xhi guniireni, räjpni lojreni:

—Rebejn nani nadaan dini guiquiin chu gusiajcní, niluxh rebejn racxhuu ni'c rquiinreni chu gusiajcreni. ¹³Colchäj te colchaseed xhi säloj diidxre ni caj loj reguijtz: “Yäl_rulaslajz rlazä, dina rlazä guniidxtu guidxaa loä.” Sa'csi narä dina niädtedxä rebensa'c, narä siädtedxä rebendojl te gusiechlajzreni.

Gunabdiidxreni xcuent yäl_rucua'n

(Mr. 2:18-22; Lc. 5:33-39)

¹⁴Dxejcti biääd rexejnpac Juan loj Jesús räjpreni:

—Nuure con refarisee rcua'nnu xhidäl huält, ¿xhicuent di rexejnpaclu gucua'n, ä?

¹⁵Räjp Jesús lojreni:

—Che ruchnaa te bi'n, ¿xhixh rac-huin lajz regolnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

¹⁶Rut gundi remiend te ladbiejw con te la' ladcoob sa'csi sixu'n ladcoobga, sutiäjsruni ladbiejwga, sajc xhiroobru cadro biräjsga. ¹⁷Niclaza gac guida' bincoob neñ reguidbiejw, sa'csi reguidbiejw siräjnsi dxejc sixe' bin, sinijtzä reguijdgä. Ni'cni nanab guida' bincoob neñ reguidcoobza, te si'c nicla tejreni di nit.

Xindxa'p Jairo näjza gunaa nani gudajn xhajb Jesús

(Mr. 5:21-43; Lc. 8:40-56)

¹⁸La_l ni caniini rediidxga, biääd te dade' ni rnibee neñ guidoo xten

rexejñ Israel. Bazuxhibjni nez loj Jesús räjpni:

—Entis gujt xindxa'pä. Gudaa, badzuub naalu yejcní te guibansacni.

¹⁹Dxejcti huisu Jesús, sanäni Jairo. Näj rexejnpacni sanajlreni.

²⁰Luxh guyu' te gunaracxhuu nani agujc tzubitio'p ijz cayajcni yälguidxbäii. Bidzujñni nez dejtz Jesús, gudajñni ro' xhajbni, ²¹sa'csi bejñni xhigab neñ lastooni: “Palga sajc canätis ro' xhajbni, siacä.”

²²Dxejc gubiré Jesús bahuiini loj gunaaga, dxejc räjpni:

—Gulecdxilajzlu xindxa'pä.

Yäl_rililajz xtenlu abasiajclu.

Luxh lagajc dxejc bñajc gunaaga.

²³Cheni biu' Jesús roliz dade' nani rnibee neñ xquidoo rexpén Israel, bahuiini rebejn ni ro_l bizej näjza xhidajl rebejn ni cabedxa' cayoon, li te biey cayajc, dxejc ²⁴räjpni loj rebejnga:

—Colguibicaj. Nagayejstis dxa'pga, gajdñi guet.

Dxejc rebejnga alga ruxhiznäjreni Jesús. ²⁵Cheni abirii rebejn neñ yu', biu' Jesús, gunaañni naa dxape', dxejc huistie dxape'ga. ²⁶Dxejcti bire'ch diidxga guiraa neñ reguejdx ni tre' nejzga.

Basiajc Jesús tio'p lotiä'p

²⁷Che birii Jesús ro'c, huinajl tio'p bejñni nani di fii. Rbedxa'reni roonreni räjpreni:

—Balaslajz nuure, Xi'n toDavid.

²⁸Che bidzujñ Jesús cadro caya'nñi, gubigreni lojni. Dxejcti gunabdiidx Jesús lojreni, räjpni:

—¿La rililajztu sajc gunä ni rniabtu?

Redade'ga basejc diidx, räjpreni:

—Sajc gunluni, Dad.

²⁹Dxejcti gudajnni balojreni, räjpni:

—Sugacni si'cpacni rililajztu.

³⁰Lagajc dxejc bixal balojreni. Sas räjjpac Jesús lojreni:

—Arniä, na'c chayeitu diidxre, te rut gacbeedi xhi guzajctu.

³¹Cuantsi biriireni ro'c guslojreni cagutie'chreni diidx xcuent Jesús guideb gabi nen reguejdxga.

Basnii Jesús te gop

³²Che biriireni cadro biajc baloj rebejnga, biääd sgaii bejn biädnäreni te gop loj Jesús. Yu' xprit bendxab nen lastoo bejnga.

³³Che barilaagw Jesús xprit bendxab nen lastoo bengopga, guslogajcni caniini. Rdxeloduxh rebejn räjpreni:

—Gajdpacnu guihuii sa' redzuunre lajdx rexpejn Israel.

³⁴Dxejc reben guidoo ni najc refarisee, räjpreni:

—Rbääni rexpriti bendxab con yälrnibee xten bendxabro.

Rulaslajz Jesús rebejn

³⁵Gudejd Jesús guiraa reguedxro näjza reguedxbäz, basule'ni xtidx Dios nen reguidoo xten rexpejn Israel. Basääbni diidx xten xcälrnibee Dios. Basiajczani guiraloj yälracxhuu, guiraloj yälgujdx ni rajc bejn nen reguejdxga. ³⁶Che bahuini loj reben xhidajl biaduxhni rebejnga sa'csi rdebya' lajzreni, rac-huin lajzreni, najceni si'c najc rexii nani di ga'p baxtoor. ³⁷Dxejcti räjpni loj rexpejn pacni:

—Guliipac xhidalduxh ben guedxliuj di gan xtidxä, luxh guxii najc reni guluiireni; najcni si'c gäjł ni agojl guilia', niluxh ruti mos ni guilia'ni. ³⁸Colnab lo Dad nani najc xtenni guedxliujre te guxhalni rebejn ni sajc guluii reben guedxliujre, gacreni si'c mos ni rlia' gäjł.

Gule Jesús guitzubitio'p rexpejn pacni

(Mr. 3:13-19; Lc. 6:12-16)

10 Dxejcti gurejdxni guitzubitio'p rexpejn pacni, badeedni yälrnibee lojreni te gurilaagwreni rexpriti bendxab lastoo bejn näjza te gusiajcreni guiraloj yälgujdx näjza yälracxhuu.

²Laj reguitzubitio'p rexpejn ni guleni najc: Simón, ni laaza Pedr; Andrés bejtz Simón; Jacoob xi'n Zebedeo; Juan bejtz Jacoob; ³Felipe; Bartolomé; Tomás; Mateo, ni najc colectoor; Jacoob, xi'n Alfeo; Lebeo ni rniireni Tadeo; ⁴Simón, te bejn ni yu' loj recananita; Judas Iscariote, nani bateed Jesús ladzña rebejn nani rdxe'ch lojni.

Baxhal Jesús rexpejn pacni gutie'chreni diidx

(Mr. 6:7-13; Lc. 9:1-6)

⁵Guitzubitio'p rebejnre baxhal Jesús. Balijdxniren räjpni: —Na'c chäätu nez cad yu' rebejn ni di gumbee Dios. Na'c jiu'tu lajdx reben samaritan. ⁶Colchäxga lo rexpejn Israel nani agunijt nen dojl. ⁷Colchäj, colzäbdiidx lo rebejn, colye'tz lojreni xcälrnibee Dios abidzungenajxh. ⁸Colgusiajc ben racxhuu, colgusiajc tiejxh rebejn

ni ra_l guejch tiejxhrenei, colguspaj_n bengut. Colgurilaagw xp_rit bendxab lastoo rebej_n. Ligaj cua'tu yäl_rnrabee, ligajza col_yej_n dzuun.

⁹Räjpzani:

—Na'c chanätu oor, niclaza pla't, niclaza coobr ne_n xdobdäjltu, ¹⁰niclaza guijxh na'c chanätu lo nejz. Na'cza chanätu tio'p xhajbtu, nicla gura'ch, nicla baston sa'csi bej_n ni rujn dzuun nungäj_l xca'ni xhi gauni.

¹¹Räjpzani:

—Che guidzujntu xhitis te guedxro, xhitis te guedxbäz, colquii_l te be_nsa'c. Rolijz_tisni coljia'n dxejli ni jiunejz_tu guejdxga. ¹²Cheni jiu'tu ne_n yu', col_nii xtidx Dios lo rebej_nga. ¹³Palga najcreni bej_n ni numbee Dios, sujia'n yäl_rbedxilajz loj rebej_nga. Niluxh palga direni gac be_nsa'c, naaddireni xca'reni xtidx Dios, suguibi' yäl_rbedxilajzga lojtu, coljiunejz ro'c. ¹⁴Palga direni gusaan jiu'tu roliz_reni, palga di rlajz_reni gucuadiajg_reni xtiidxtu, dxej_c coljiunejz roliz_r bej_nga, o coljiunejz guejdxga, dxej_c colcuij_b guxhuj ni'tu si'c te seen gulälaz_reni xtidx Dios. ¹⁵Rniliäpac lojtu, dxej ni gun Dios xcäl_rguxhtisni, te yäl_rguxhtisroru gun Dios rebej_nga, quela yäl_rguxhtis ni guj_c reben guedx Sodoma näj Gomorra.

Yäl_rrusacsí ni siäd

¹⁶Räjpzani:

—iColhuiire! Narä suxha_lä la'tu si'c xile' nez loj reloop, ni'cni colgacnasin_duxh si'c najc te bäl, col_yajcza nadolajz si'c te palom. ¹⁷Colnatiro rebej_n sa'csi suteedreni

la'tu ladz_naa rexcuxhtisreni, siguijnzareni la'tu ne_n xquidooreni.

¹⁸Sinäzareni la'tu nez loj regubier, nez loj rereii xcuent rextid_{xä}, te gusule'tu xtid_{xä} nez lojreni näjza nez loj rebej_n nani di gumbee Dios. ¹⁹Cheni chanäreni la'tu nez loj reguxhtis, na'c guntu xhigab xho guiniitu, niclaza guntu xhigab xhicha ni'c guiniitu, sa'csi lagajc Dios suniidx diid_x guiniitu orga. ²⁰Sa'csi et la'ditu ni guinii dxej_c, Sprit xten Xtadt_u Dios ni yu' ne_n lastootu, laani guinii ne_n lastootu.

²¹Luxh rebej_n suteedreni lagajc bejtz_reni ladz_naa reni ju'treni. Redad suteedreni lagajc xi'nreni, rexi'n bej_n sidxe'chzareni lo xcuzaj_nreni te ju't bej_n xcuzaj_nreni. ²²Guiraa rebej_n guedxliuj sidxe'chreni lojtu xcuent xtid_{xä}. Nani chanuu lo xtid_{xä} dxej lultli, ni'c sujn gaan yäl_nabaj_n par tejpas. ²³Che guirinaj_rreni la'tu te gusacs_reni la'tu ne_n te guejdx, colguxun ro'c, colchäj stee guejdx. Rniliä lojtu, ditu gun gaan tedtu guiraa reguejdx xten rexepej_n Israel ansde jiiäd Xi'n Dios ni guj_c Niguii.

²⁴'Di te bej_n ni casieedgaj ben_rroru lo xmastrni, diza te mos gac ben_rroru lo xlam_ni. ²⁵Te bej_n ni casieed, rsieedruni te gacni si'c najc xmastrni, sigajcza rujn mos, riuni xtidx xlam_ni te gacni si'c najc xlam_ni. Palga rbälaj_reni Beelzebú nani rnabee bendxab, ÷xho direni cuälajza Beelzebú rexi'nni, ä?

Chuni'c nanab guidxejbni

(Lc. 12:2-9)

²⁶Räjpzani:

—Ni'cni na'c guidxejbtu rebej_n, sa'csi anajntu xheti te cos ni

niäuu lojni ni di guidzujñ dxej guixal lojni, te fii chutis bejn lojni. Xhetiza te cos xhiga'tzdi ni di guidzujñ dxej siejn diajg bejn xcuentni. ²⁷Diidx nani rniä lojtu guxhijñ, colguiniini che nianij lo guedxliuj. Rediidx nani rniä chigaj rodiajgtu, colguiniini dip, jiaali colzuj, guredxa' te jiejni. ²⁸Na'c guidxejbtu renani rugu't bejn, sa'csi direni gun gaan ju'treni xaim bejn. Colguidxejbru nani rugu't tiexh bejn näjza xaim bejn neñ gabijl.

²⁹'¿La di bejn guto' tio'p manbáz ni rutajt por te centaab, ä? Luxh racbee Xtadnu ni yu' xhaguibaa che riajb tejni lo yuj. ³⁰Näjza rexquidxejclu nagab tebgajreni. ³¹Ni'cni rniä na'c guidxejbtu; sajcrutu lo te chinaa manbáz ni rutajt.

Renani rusule' xtidx Jesucrist nez loj rebejn

(Lc. 12:8-9)

³²Räjpzani:

—Chutis renani rusule' xtidxä nez loj rebejn, narä siniäza xcuentni nez loj xtadä ni yu' xhaguibaa.

³³Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtadä ni yu' xhaguibaa.

Rlia' Jesús sa' bejn

(Lc. 12:51-53; 14:26-27)

³⁴Räjpzani:

—Na'c guntu xhigab siädnää yälrbedxilajz lo reben guedxliujre, xhet yälcuedxidi ni siädnää, yälrdxagdijl siädnää. ³⁵Narä siädnää yälrdxagdijl te bi'n con xtadni; te dxa'p con xnanni; te gulijzni

con xnansueegrni. ³⁶Ni'cni lagajc resa'tu ni yu' roliztu sidxe'chreni lojtu.

³⁷'Nani sanälajzru xtadni, xnanni, luxh narä dini chanälajz, digacdi gacni xpeñä; nani sanälajzru xingaanni o xindxapni, di gacdiza gacni xpeñä. ³⁸Nani di guu xcruzjni, nalajznu tedni trabajw, jädnajlni narä, di gacdi gacni xpeñä. ³⁹Nani guidxäl xcälñabajñni lo guedxliujre, sunitni yälñabajñ xhaguibaa. Luxh nani gunijt xcälñabajñni lo guedxliujre xcuent rextidxä, sidxälñi yälñabansa'c xhaguibaa.

Gaan nani xca'ni

(Mr. 9:41)

⁴⁰Räjpzani:

—Nani guniidx rolizjni jia'ntu, runiidxzani rolizjni jia'nä; luxh nani ruscuääz narä rolizjni, rolizjni ruscuääzzani Gueb Dios nani baxhañ narä. ⁴¹Nani guscuääz te niguii ni rnii xtidx Dios rolizjni sa'csi baxhañ Dios niguiiga, sica'za bejnga lagajc gaan ni xca' niguii ni rnii xtidx Dios. Nani guscuääz te bensa'c rolizjni sa'csi bensa'cni, sica'zani lagajc gaan ni xca' bensa'cga. ⁴²Chutis nani gudeed mase te xhijgtis nis niäluij xcuentä lo rebixue're, rniliápac lojtu, direni gunijt, sica'pacreni nani nungäjñ xca'reni.

Renani baxhañ Juan Bautist loj Jesús

(Lc. 7:18-35)

11 Che gulujx baluii Jesús rexpejn pacni xho gunreni dzuun, dxejcti biriini ro'c te saluiini, chasule'ni diidx lajdx rexpejn pacni.

²Juan yu' neñ latzguiib. Che bejn diajgni xhi cayujñ Jesús,

baxhalni tio'p xpejn pacni ³te
huinabdiidxreni:

—¿La luj ni najc Crist ni jiaäd, ä?,
o ¿la silääznu chu stee bejn?

⁴Dxejcti badzu' Jesús diidxre
räjpni:

—Colchäj, colye'tz loj Juan
recos nani riejn diajgtu, näjza
recos nani ruhuiitu. ⁵Reni di fii,
ruhuiireni; reni di sa, arsiäjreni,
reni raļ tiejxhni, abiajc tiejxhreni;
reni di jien diajg, ariejn diajgreni;
rebengut, ahuäjzreni, gubansacreni.
Dxejcti loj rebejn proob nani cabäjz
xcälracnäj Dios cagusule'reni
xtidx Dios ni ruslaa bejn nen dojl.

⁶Chicbaa renani di jieed narä.

⁷Cheni sii rebejnga gusloj Jesús
canii loj rebejn xcuent Juan:

—¿Chuni'c huihuiitu nez loj
reyubijdz? ¿La te biquii ni rusniib
bej, ä? ⁸¿Xhini'c huihuiitu? ¿Te bejn
ni sucheduxh, ä? Ni najntu rebejn
nani sucheduxh rbäjzreni rolizj
rereii. ⁹La'tu ¿xhicuent huijtu ro'c?
¿Te fiitu te niguii ni rniü xtidx Dios,
ä? O'n. Rniliä lojtu, luxh dini gac
bejntis ni rniü xtidx Dios; benrurunii.

¹⁰Laa Juan nani rusä't ni bacuaa lo
reguijtz cadre caj scree:

Narä suxhalä te niguii nani
guinii xtidxä nez lojlu;

laani susucheeni nezyuj nezlojlu.

¹¹Guliipac rniä, loj guiraa
rexingaan xten gunaa, nicla tejni
gajd guiricaj ni najc te bensacduxh
loj Dios si'c ni najc Juan Bautist.
Niluxh bejn nani najc ben huinru lo
xcälrnibee Dios xhaguibaa, bejnga
maazru sajcnii loj Juan.

¹²Cheni gucli dxej ni gusloj
rusule' Juan Bautist diidx najli,
yu'duxh reni rlaizpac jiu'reni lo

xcälrnibee Dios ni yu' xhaguibaa
con yälrdxe'ch, sas reni nadxecha'
rlajzreni cuäxuuni xcälrnibee
Dios. ¹³Guiraa reniguii ni gunni
xtidx Dios näjza xleii Moisés,
gunixgaareni recos ni churu gac,
galooli hasta che biäädli Juan
Bautist. ¹⁴Palga rlaiztu chalilajztu,
lagajc Juan najc Elías, niguii xten
Dios nani bia'n diidx jiaäd. ¹⁵Nani
sobdiajg diidx, gucuadiajgni.

¹⁶¿Xhicojn guntebloä rebejn
nani tre' naj, ä? Najcreni si'c najc
rebiuux nani rguijt nez lo guii
cadro rdo', rbejdxreni lo sa'reni,
¹⁷rniireni: “Bielnu bizej te guya'tu
luxh ditu nuya'. Dxejcti bielnu redij
ni nabaduxh luxh dizatu nioon.”
¹⁸Sa'csi che biääd Juan dini najw
dizani niä', luxh räjp rebejn najcnii
te xpejn bendxab. ¹⁹Dxejcti biälä
narä, Xi'n Dios ni gujc Niguii, rauä,
rä'ä dxejcti räjp rebejn: “Niguiire
rauxha't, rätezani bin, najcnii
xamigw rebendojl näjza reniguii
ni ruquijx xcuent reyuj ni rajx lo
gubier.” Luxh loj rebejn ni najc
xpejn Dios yuduxh xcälrajn Dios,
ni'cni baxhalni guiro'p rebejnre.

Reguejdx gualajz

(Lc. 10:13-15)

²⁰Dxejcti gusloj Jesús gudilnäjnii
rebenguejdx cadre benduxhni
remilaagwr, sa'csi naaddireni
gusiechlajzreni xtojlreni, sanuutis
nabajnreni nen dojl. Dxejcti räjpni:

²¹—iGunatiru guedx Corazín!
iGunatiro guedx Betsaida! Paru
nen guedx Tiro näjza guedx Sidón
niajc remilaagwr nani gujc guedx
lajdxtu, cadxejli nusiejch lajzreni
xtojlreni, cadxejli najcwreni nen

godx, nidäab cobdäj yejcreni. ²²Luxh rniä lojtu: che guidzujñ dxej ni gun Dios xcälguixhtisni, sidejdrutu castiigw loj rebejn ni guläjz guedx Tiro näjza guedx Sidón. ²³Luj guedx Capernaum di gunlu xhigab chäslu xhaguibaa; jiäjt neñ baa jiajblu, sa'csi paru neñ guedx Sodoma niac sa' remilaagwr nani gujc guedxladxlu, pet najli tresijc guejdxga. ²⁴Luxh rniä lojtu, dxej ni gun Dios xcälguixhtisni, trabajwduxhru tedtu loj rebejn Sodoma.

Coltaa loä, te gusilajztu

(Lc. 10:21-22)

²⁵Laa dxejcni räjp Jesús:

—Rliä'pä xpala'nlu Xtadä, Dad xten xhaguibaa näjza guedxliuj, sa'csi bacua'tzlu recosre lo rebennajn, lo rebejn ni racbee, te baluiiluni loj rebennadolajz ni najc si'c biuxbäz. ²⁶O'n. Guliini, Xtadä, sa'csi rujnlu xhigab si'c najc hueen gacni.

²⁷Guiraa recosre abaniidx Xtadä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, näjza loj renani gudeed xingaanni gumbee xtadni.

²⁸Coltaa loä guiraatu nani abadxajg, nani rsina', narä sunidxä yälrusilajz lojtu. ²⁹Colguiseed guntu dzuun si'cni ruluiätu. Colhunii xho runä, xho nacä nadolajz, dizana gacä bennayedxajz neñ lastoä, ni'cni sidxäl xaimtu yälrusilajz. ³⁰Sa'csi guyasi najc xtzunä ni ruluiätu, dizani gac naganduxh.

Rutie' rexpejn Jesús triuu dxej ni rusilajzreni

(Mr. 2:23-28; Lc. 6:1-5)

12 Che sasaj Jesús nez loj reyuj cadro naga' triuu,

luxh dxejga najc dxej ni rusilajz rexpejn Israel, calaan rexpejn pacni, guslojreni calädxa'reni doj lo triuu te cayajwrenini. ²Che bahuii reben guidoo ni laa farisee, räjpreni loj Jesús:

—Ahuii xho rujn rexpejn paclu dzuun nani di nungäjñ gunreni dxej nani rusilajz bejn.

³Luxh laani räjpni lojreni:

—¿La gajdtu goñ xhi caj loj reguijtz xcuent ni bejn toDavid che gulannäjni rexpejn, ä? ⁴Biu'reni xquidoo Dios, gudajwreni yätxtiil nani di nungäjñ gauni, nicla laani, niclaza rebejn nani sanäni, sa'csi yätxtiilga rebixhojzti rajwni. ⁵O ðla gajdtu goñ lo reguijtz xten leii cadro caj xcuent rebixhojz, ä? Laareni riu'reni neñ reguidoo dxej ni rusilajz bejn, rujnreni xtzunreni niluxh xhet dojldi rujnreni. ⁶Narä rniä lojtu, ree suga' tej nani saj cru loj guidooga. ⁷Paru niacbeetu xhi säloj dee: “Yäl rulasajz rlazä, xhet yälrejt di guidxaa”, ditu nucuaquij redee ni xhet bejndi. ⁸Sa'csi narä Xi'n Dios ni gujc Niguii rnibeä dxej ni rusilajz rebejn.

Niguii ni rxu'n naani

(Mr. 3:1-6; Lc. 6:6-11)

⁹Che birii Jesús ro'c, biu'ni te xquidobäzreni. ¹⁰Ro'c suga' te bejn ni gubijdz te naani. Luxh sa'csi caguiilreni xho gucuaquijreni Jesús, gusloj canabdiidxreni lojni, räjpreni: —¿La rusaan leii gusiajnci

benracxhuu dxej ni rusilajz bejn, ä?

¹¹Badzu! Jesús diidxre lojreni, räjpni:

—Chutejtu ni rajp te xiil niluxh palga guitejbni neñ bisie che

gal dxej ni rusilajz bejn, ÷xhixh dini cuää xiilga nen bisie, ä?

¹²Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

¹³Dxejcti räjpni loj dade'ga:

—Baslii ñaalu.

Che basliinini, dxejc biajc ñaani, gujcnii tebloj si'c najc stelaad ñaani.

¹⁴Dxejcti birii reben guidoo ni laa farisee, bachagsa'zareni te bia'nreni diidx ju'treni Jesús.

Diidx ni guniireni xcuent Jesús

¹⁵Che gucbee Jesús xhi xhigab cayujnreni, biriini ro'c. Xhidajl bejn sanajlni, dxejc basiajc Jesús guiraa rebenracxhuu. ¹⁶Dxejc räjpni lojreni:

—Na'cpac gäbreni chu najcni.

¹⁷Si'c gujc te gusojb diidx ni gunii Isafas ni gunii xtidx Dios che räjpni:

¹⁸Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.

¹⁹Dini tilnäjä bejn, dizani cuedxa'; rudza jiejni diajgni xse'ni lad nezyuj.

²⁰Dini qui'ch nicla te nijt ni cabiejc, dizani gusuii te duxiil ni cayujn guxh, dxejli che gunni gaan guinibeeni yälguxhtis.

²¹Lajtisni sustioob lastoo reben ni digac xpejn Israel.

Rucuaquijreni Jesús räjpni yälrnibee xten bendxab

(Mr. 3:19-30; Lc. 11:14-23; 12:10)

²²Dxejcti biädnäreni loj Jesús te bejn ni di fii, dizani guinii,

yu' te bendxab lastooni. Dxejcti basiajc Jesúsni, te gujc guniini, te gujca bahuiini. ²³Guiraa rebejn bidxelojreni, räjpreni:

—÷Xhaa laa Xi'n toDavidni, ä?

²⁴Che biejn diajg reben guidoo ni laa farisee rediidxga, räjpreni:

—Bejnre rbää rebendxab con yälrnibee xten Beelzebú ni rnibee loj rebendxab.

²⁵Che gucbee Jesús xhi xhigab cayujnreni, dxejc räjpni:

—Guiraa yälrnibee nani rlia' sa'ni sinitloj; te guedxro sigajc te famil nani rlia' sa'reni, nani ridiInäjä sa'reni, sinitlojreni. ²⁶Sigajca palga bendxab rbää sabendxabni, silia' sa'reni, dxejc ÷xho gac chanuu xcälrnibereeni? ²⁷Palga narä rbää rebendxab con yälrnibee xten Beelzebú, ÷chu xcälrnibee rajc rbää rexpejntu bendxab, ä? Ni'cni lagajc laareni suluiireni xhet laadi rujntu xhigab. ²⁸Palga narä rbää rebendxab con Xpirt xten Dios, guliipacni abidzujn xcälrnibee Dios lojtu.

²⁹'Bahuilaare. ÷Xho gac jiu' te bejn cuan roliiz te bendaan, xho gac cuanni xhixten bejnga, palga dini gulibxgaani bendaanga? Che abilib bejnga, sajc cuanni rexhixten bejnga.

³⁰'Nani xhet yu'di xladä, rdxe'chni loä. Nani di jiadnajl narä, rutie'chni reni siädnajl narä.

³¹'Ni'cni rniä guira'ti dojl, guira'ti yälrusguee xte bejn sajc gusiäjł lajzni xtebtis yälrnijaj Sprit Dxan xten Dios di Dios gusiäjł lajzni.

³²Chutis ni guinii xhi te diidx yälrnijaj Xi'n Dios ni gujc Niguii sajc gusiäjł lajzni, luxh chutis

ni guiniyaj Sprit Dxaan xten Dios, di Dios gusiäjl lajzni, niela lo guedxliujre, niela xaaguibaa.

Sajc gumbeetu bejn xcuent diidx ni rniireni

(Lc. 6:43-45)

³³Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni. ³⁴Sa' la'tu benguijdx ni najc si'c te bäl niälasduxh, ¿xho gac guiniitu te didxa'c?, ni ro' bejn rniitis rexhigab ni yu' neñ lastoo bejn. ³⁵Te bensa'c rniini didxa'c, sa'csi ganax xhigabsa'c yu' neñ lastooni, te benguijdx rniitisni cosguijdx sa'csi ganax xhigabguijdx yu' neñ lastooni. ³⁶Narä rniäza, guiraa redidxguijdx nani rni bejn sudeedreni cuent lo Dios cheni gunni yälguxhtis, ³⁷sa'csi lagajc rextiidxlu sujn guinii Dios najclu bensa'c, lagajc rextiidxlu sujn gunijtlu lo Dios.

Rebenguijdx rniab te milagwr si'c te seen

(Mr. 8:12; Lc. 11:29-32)

³⁸Dxejcti rebejn ni ruluii xleii toMoisés näjza reben guidoo ni laa farisee, räjpreni loj Jesús:

—Mastr, nuurnu rlanjnu guihuiinu te seen; bejn te milagwr te fiinuni.

³⁹Badzu' Jesús diidxre, räjpni:

—Rebenguijdx ni rusguee rniab te seen, niluxh xhetru seendi fiireni xseentis Jonás, dade' ni gunii xtidx Dios. ⁴⁰Sa'csi lagajc si'cni guyu' Jonás xque' te bälro choñ dxej, choñ yääl, si'cza chu

Xi'n Dios ni guj Niguii neñ lastoo guedxliuj choñ dxej, choñza yääl. ⁴¹Cheni gac yälguxhtis xten Dios pet sistie rebejn ni siääd Nínive te fiireni gac yälguxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi reben Nínive basiejch lajzreni, bia xtojlrini che basule' Jonás xtidx Dios lojreni. Luxh nani yu' lojtu naj, sacduxhruni loj Jonás. ⁴²Näjza reñ xten reben sur sistieni te fiini gac yälguxhtis rebejn ni tre' lo guedxliujre naj, niluxh näjzani säjbni abanijtreni. Sa'csi laani zitduxh biriini te biädcuadijgni reyäl najn xten Salomón, luxh nani yu' lojtu naj nanduxhruni loj Salomón.

Te spritdxuudx ni rbisac

(Lc. 11:24-26)

⁴³Räjpzani:

—Cheni rii te spritdxab neñ lastoo te bejn, ricanzajni nez lo reyubijdz, ritiilni cadro gusilajzni, per cad rdxäldini. ⁴⁴Dxejcti rujnni xhigab, naani, guibisacä cadro biriä. Cheni rbisacni ro'c, rdzujnni si'c rdzujn te bejn neñ te yu' ni naya neñni, naliobsa'cni, sucheeni, luxh rut rbäjzdi ro'c. ⁴⁵Dxejcti rijni, rixiini sgajdz sprit nani najc nadxuudxru lojni te jädlänäjrenini neñ lastoo bejnga. Dxejcti rxhinduxhru bejnga lojni gujci galoo. Sigajcza gac rebejn ni tre' lo guedxliujre naj.

Xnan Jesús con rebejtzni

(Mr. 3:31-35; Lc. 8:19-21)

⁴⁶La! ni caninäjni rebejn, bidzujn xnanni con rebejtzni, suga'reni rolä' rlanjreni guiniireni lojni. ⁴⁷Dxejcti biääd tej ni räjp loj Jesús:

—Xnanlu näjza rebejtzlu suga' rolä' rlanjreni guininäjreni luj.

⁴⁸Laani badzu'ni diidx lo bejnga räjpni:

—¿Chuni'c najc xnanä? ¿Chuni'c najc rebetzä?

⁴⁹Dxejcti basgaani naani nez loj rexejnpacni, räjpni:

—iRedee najc xnanä redeeza najc rebetzä! ⁵⁰Chutis nani rujn si'cni rnibee Xtadä ni yu' xhaguibaa ni'c najc betzä, ni'c najc bisianä, ni'cza najc xnanä.

Xcuent bejn nani rbe'c binij

(Mr. 4:1-9; Lc. 8:4-8)

13 Lagajc dxejga birii Jesús royu'ga, huicueni nez ro' nisdoo. ²Xhidalduxh bejn bire' cadro suga'ni, sas biu'ni nen te barcw, ro'c gurejni. Dxejcti rebejn gurej nez lo plaii. ³Dxejc gusloj cagului Jesús con recuent, räjpni: —Colcuadijg. Birii te dade' ni rbe'c binij te cue'cni binij. ⁴La! ni cabe'cni binij yu' binij ni bitejb gajxh nez ro' nesiuj, biääd remane' ni rutajt, sas gudajwreni binijga. ⁵Yu' binij ni bitejb nez nen reguij cadro guxii yu' yuj. Gulengajc binijga sa'csi direni nibej jäät nen yuj. ⁶Che birii gubijdx, bigolreni sa'csi xhetiza xlobaani, dxejc gubijdzni. ⁷Yu'za binij ni bitejb nen reguejch. Che guroob reguejchga, dini nusaan niroob regäjle', gubijdztreni. ⁸Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojni, yu'za ni cuaj galbitzuuni loj cade tej binij ni gurej. ⁹Nani rsobdiajg diidx gucudiajgni diidxre.

Xhi pajr najc recuent xten Jesús

(Mr. 4:10-12; Lc. 8:9-10)

¹⁰Dxejcti gubig rexejnpacni, gunabdiidx lojni, räjpreni:

—¿Xhicuent rusule'lu diidx loj rebejn con recuent?

¹¹Dxejcti badzu' Jesús diidx räjpni lojreni:

—Sacnäy Dios la'tu te gacbeetu recos xhiga'tz xten xcälrnibee Dios xhaguibaa, luxh laareni digacdi gacbeerenini. ¹²Chutis ni arajp yälracbee, sica'runi te gapruni yälracbee. Sas nani guxii rajp yälracbee, guiraa yälracbee ni räjpni sibicaj. ¹³Ni'cni rniä lojreni con recuent sa'csi mase cadxelojreni, direni fii, mase cacuadijgreni di diajgreni jiejn, xhet racbeedireni. ¹⁴Laareni najcreni si'c te soob diidx ni gunii Isaías, dade' ni gunii xtidx Dios, che räjpni:

Siejn diajgpactu, niluxh xhetliidi gacbeetu, sidxelojpacu, niluxh ditu fii.

¹⁵Sa'csi guyalajz rebejnre, lastooreni najc si'c te guij, di diajgreni jiejn, luxh niäuzä balojreni, didi fisa'creni con balojreni, didi jiejnza diajgreni, didi gacbeeza lastooreni, didi gusiejch lajzreni guibi'reni loä te gusiäcä lastooreni.

¹⁶La'tu colguibalaznäy balojtu sa'csi rhuisa'ctu, riensa'cza diajgtu. ¹⁷Rniliäpac, xhidajl redade' ni gunii xtidx Dios, näjza xhidajl bensa'c rlazduxh nuhii sa' recos ni cahuiitu, luxh direni nuhuiini, rlanjreni niejn diajgreni sa' rediidx nani cayejn diajgtu, luxh di diajgreni niejnii.

**Rusule' Jesús xcuent bejn ni rbe'c
binij**

(Mr. 4:13-20; Lc. 8:11-15)

¹⁸Colcuadiajg xhi säloj xcuent bejn nani rbe'c binij. ¹⁹Rebejn nani rucuadiajg diidx xten xcälrnibee Dios, niluxh direni gacbeeni, najcreni si'c najc binij nani bitejb nez ro' nesyuj; riääd bejdxab rudzucajni rediidx nani biu' nen lastooni. ²⁰Rebinij nani bitejb nez nen reguij, najc si'c rebejn nani rucuadiajg diidx, gustli rca'reni diidxga, ²¹luxh guxii yu' xlobaani, direni sutijp. Che rdejcreni trabajw, che rdxe'ch bejn lojreni, sa'csi rucuadiajgreni xtidx Dios, rusiejch lajzreni, rbälazni diidxga. ²²Rebinij nani gurej nen reyaguejch säloj rebejn nani rucuadiajg rextidx Dios rujnrureni te gunreni dzuun te ga'preni yäl'nasa'c ni yu' lo guedxliujre. Dxejcti rexäl'nasa'c xten guedxliujre rusgueereni. Guiraa recosre rutau lo xtidx Dios nen lastoo rebejnre, dini gusaan gac te cosechsa'c nen lastoo rebejnre. ²³Dxejc rebinij nani rtejb lo reyusa'c, ni'c najc si'c rebejn nani rucuadiajg xtidx Dios, nani racbee diidxga, nani rutie'ru sa'reni te racxhidajlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojn; yu'za bejn ni najc si'c binij ni gujc galbitzoo.

Xcuent triuu cadro guyu' cuanguejch

²⁴Dxejc bij Jesús stee cuent, räjpni:
—Xcälrnibee Dios xhaguibaa najc si'c te bejn nani gule'c

ganax triusa'c lo xyujni. ²⁵Lal nagaguejs bejnga, biääd te bejn nani rdxe'ch lajz loj xpaxhuaan binijga, biädle'cni bedz cuanguejch lo xtriuu bejnga, dxejcti sääni. ²⁶Cheni gulejn triuuga, birii doj lojni, dxejc biricaj näjza cuanguejch ro'c. ²⁷Dxejcti räjp remos lo xlamreni; “Dad, ðla et ganax triusa'c di gule'clu, ä? ðCaxh bazaj cuanguejchre?” ²⁸Räjp xlamreni: “Te bejn ni rdxechlajz loä biädle'cchani.” Dxejcti gunabdiidx rexmosni räjpreni: “ðLa rlajz guejblu cholädxanu recuanguejchga, ä?” ²⁹Dxejc räjp xlamreni: “Na'c, sa'csi che guiliäädxtu cuanguejchga, nägajcza triuu guiliäädxtu. ³⁰Colsaan tioobreni tebloj. Che guire' cose'ch, dxejc guinibea remos gutiexgaareni cuanguejch, guliibrenini gacni ters, dxejcti checni. Dxejcti sajc gutie'reni triuu chucheeni nen yu'.”

Xcuent bedz muxhtas

(Mr. 4:30-32; Lc. 13:18-19)

³¹Bijza Jesús stee cuent räjpni:
—Xcälrnibee Dios xhaguibaa najcni si'c te bedz muxhtas nani cue'c te bejn lo xyujni. ³²Gulii bejdzga najc bäze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riääd remane' ni rutajt riädyujn xpitiäazreni lo xajcw yajgga.

Xcuent levaduur

(Lc. 13:20-21)

³³Bijzani stee cuentre, räjpni:
—Xcälrnibee Dios xhaguibaa najc si'c levaduur nani rugu'ch te gunaa

lo chon mediid arin, dxejc ni'c
rusaguijni guideb cojbga.

**Xhicuent baluii Jesús ganaxtis con
cuent**

(Mr. 4:33-34)

³⁴Baluii Jesús guiraa rebejn
ganaxtis con recuent, xhetiru stee
mood nuluini, ganaxtis con cuent
guniini lojreni. ³⁵Si'c bejni te
guzojb xtidx dade' ni gunii xtidx
Dios che bacuaani lo reguijtz,
räjpni:

Suiyä diidx con recuent,
suiyä diidx xcuent recos ni
naga'tz che bencheeli Dios
guedxliuj.

**Rusule' Jesús xcuent
cuanguejch nen triuu**

³⁶Dxejcti basadiidx Jesús
rebejn, biu'tini nen yu' cadro bire'
rexpejn pacni lojni, räjpreni lojni:
—Basule' loonu xcuent cuanguejch
ni guyu' loniaa.

³⁷Räjp Jesús lojreni:
—Bejn nani rbe'c retriusa'c, najc
Xi'n Dios ni gujc Niguii; ³⁸loniaaga
najc guedxliuj; retriusa'c najc
rebejn nani najc xpejn Dios, nani
rucuadiajg xtiidxni; recuanguejchga
najc rebejn ni najc xpejn bendxab.
³⁹Bejn nani rdxe'ch lajz najc lagajc
bendxab. Cose'ch säloj che nitloj
guedxliuj; reni gutie' cose'ch
najc rexangl Dios. ⁴⁰Sigacni
guire' recuanguejch te chääni
lo guiboo te checni, sigajcza gac
che gac fis guedxliuj. ⁴¹Xi'n Dios
ni gujc Niguii suxhal rexanglni
te jäädgutie'reni, te jäädlääreni lo
xcälrnibeeni guiraa renani rujn
riajb bejn nen dojl, näjza reni rujn

cosguijdx. ⁴²Susälreni rebejn ga
nen te or cadro cayecduxh. Ro'c
sonduxhreni, sauya'reni läjyreni.
⁴³Dxejcti rebensa'c sidimbicha'reni
si'c gubijdx lo xcälrnibee Xtadreni.
Palga sobdiajgtu, colgucuadiagsa'c.

Te cossacduxh ni naga'tz

⁴⁴Räjpzani:
—Si'cza xcälrnibee Dios xhaguibaa
najc si'c te cossacduxh ni naga'tz
lo te yuj loniaa. Bidxäl te dade'ni,
luxh bacuatzsacnini. Dxejcti
rbalajzni, huijni, huito'ni guiraa
xhixtenni te räjpni meel siini yujga.

Perl nani sacduxh

⁴⁵Räjpzani:
—Xcälrnibee Dios xhaguibaa najcza
si'c najc te dad rapduxh nani caguuii
perlsa'c te siini. ⁴⁶Che bidxäl ni
te perlsa'c, tejni sacduxh, bato'ni
guiraa xhixtenni te gusiini perлга.

Guijxh ni rniaaz bäjl

⁴⁷Räjpzani:
—Xcälrnibee Dios xhaguibaa najcza
si'c te guiexh ni rusäl bejn lo nis te
rniaazreni guiraloj cuaa bäjl. ⁴⁸Cheni
agudxajni, rbäärenini nez ro' nisdoo,
te ro'c rbereni loj rebäjl. Rebäjl ni
najc hueen rucheeni nen te dixim;
nani di gac hueen rusälrenini te laad.
⁴⁹Si'cza gac che gac fis guedxliuj;
sirii rexangl Dios te sudzucajreni
rebenguijdx lo rebensa'c. ⁵⁰Dxejcti
susälreni rebenguijdx nen te or
cadro cayecduxh; ro'c sonduxhreni,
sautya'reni läjyreni.

Te ben rajp

⁵¹Dxejcti gunabdiidx Jesús lojreni,
räjpni:

—¿La racbeetu guiraa ni caniä lojtu, ä?

Dxejcti räjpreni:

—O', racbeenuni Dad.

⁵²Dxejcti räjpni lojreni:

—Cheni rsieed te bejn nani najn leii xcuent yäl̄r̄nibee xten Dios xhaguibaa, najcni si'c te lam nani rajc rbää lo rexcäl̄nasa'cni recos ni nacoob, näjza recos bieju.

Jesús lo guedx Nazare't

(Mr. 6:1-6; Lc. 4:16-30)

⁵³Che guluju basule'ni recuente, biriini ro'c, sääni. ⁵⁴Huijni lagajc lajdxni. Ro'c gusloj caguluuini neñ xquidobäzreni ro'c. Dxejcti rdxeloduxh reben ro'c, räjpreni:

—¿Caro bisieedni reyäl̄najnre? ¿Xho rajc rujnni remilagwr? ⁵⁵¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacoob, José, Simón con Judas. ⁵⁶Luxh rebisiajnri rbäzreni lo guejdxre. ¿Cacharo bisieedni guiraa nani caguluuini?

⁵⁷Dxejcti cayujnreni xhigab chugan la guliini, dxejc räjp Jesús lojreni:

—Guiraa rebejn rinälajz te niguii nani rni xtidx Dios, biädla reben lajdxpacni direni jiu xtiidxni.

⁵⁸Ni'c dini niujn xhidal milagwr ro'c sa'csi direni chalilajz xtiidxni.

Che gujt Juan Bautist

(Mr. 6:14-29; Lc. 9:7-9)

14 Lagajc neñ redxejga Herodes, ni laaza tetrarca, biejn diajnri diidx xcuent ni cayujn Jesús. ²Dxejc räjpni lo rexmosni:

—Dee najc Juan Bautist. Pet agubansacni lo rebeñgut, ni'cni

rajpni yäl̄r̄nibee te rujnni remilagwr.

³Si'c gunii Herodes sa'csi laani basäuuni Juan neñ latzguuib. Niluxh gunibeeni biliibni con caden neñ latzguuib xcuent Herodías, ni gujc chääł bejtzni Felipe. ⁴Bidxe'chni sa'csi räjp Juan lo Herodes:

—Et laadi rujnlu rbäznäjlu chääł bejtzlu.

⁵Rlajz Herodes nugu'tni Juan, luxh rdxejbni rebeñguejdx, sa'csi guiraareni rniireni Juan najc te niguii ni rni xtidx Dios. ⁶Dxejc che gojl laj Herodes gujc lanij, birii xindx'a'p Herodías te baya'ni nez loj regolnejdx. Luxh sa'csi bidxaglazduxh Herodes baya'ni, ⁷räjpni loj gunaaga:

—Gunab xhitis ni rlajzlu, sa'csi gudix lazä gunidxä ni guiniabtislu.

⁸Dxejcti gunaaga, abalijdx xnannini, räjpni lo Herodes:

—Loj te platón baniidx bitiuuejc Juan Bautist.

⁹Diidxga benhuin lastoo rei Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga. ¹⁰Dxejcti gunibeeni biru' yejc Juan Bautist neñ latzguuib. ¹¹Sas biädnäreni yejcnii lo te platón, badeedrenini loj gunaaga. Dxejcti gunaaga badeednini lo xnanni.

¹²Dxejcti bidzujn rexpejn Juan sanäreni togoolga te huicua'tzrenini. Dxejcru huisa'nreni diidx loj Jesús.

Bayaan Jesús gaii mił bejn

(Mr. 6:30-44; Lc. 9:10-17; Jn. 6 :1-14)

¹³Che biejn diajg Jesús xhi guzajc Juan, xtebni huä'pni neñ

te barcw huijni stee laad nez lo reybijdz. Che gucbee rebejn caro sääni, huinajlreni Jesús lo yuj. Guiraa nen reguejdxga biriireni.

¹⁴Che birii Jesús nen barcw, bahuiini loj xhidalduxh bejn, dxejc balazlajznireni, basiajnci rebejn nani racxhuu. ¹⁵Cheni acayu' guxhijn, gubig rexpejn pacni lojni räjpreni:

—Rut rbäjzdi nez lo reybijdzre, niluxh agudxey naj. Basadiidx rebejn te jiireni nez rerench te chasiireni xhi gaureni.

¹⁶Räjp Jesús:

—Xhicuent jiireni. La'tu colgudeed xhi gaureni.

¹⁷Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjł rajpnu.

¹⁸Laani räjpni:

—Coltanäni ree.

¹⁹Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjł, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejn pacni. Dxejcti rexpejn pacni gudisrenini loj reben xhidajł.

²⁰Guiraareni gudajw, gudxaj xque'reni. Dxejcti batie'reni yätxtilbiujy nani bia'n. Si'cti tzubitio'p dxijm gudxajni. ²¹Renani gudajw najcreni si'cti gaii mil niguii, xhet näjdi regunaa niclaza rebuiux bigab.

Gusaj Jesús lo nisdoo

(Mr. 6:45-52; Jn. 6:16-21)

²²Sas gunibee Jesús biu' rexpejn pacni nen barcw te ganidreni tedreni stee lad nis lałni

casadiidxni rebejn. ²³Che gulujx basadiidxni rebejn, huä'p Jesús yecdajn te xtebni guninäjni Dios Xtadni. Che gojł guxhijn, ro'c sugaxteb Jesús. ²⁴Luxh barcw galäi lo nis sasaj. Cagusnibduxh reol barcw, liriääzni lo nis sa'csi cabi' beduxh cadre sääreni.

²⁵Rsildooru gubig Jesús, bidzujnini lojreni, siädsajni lo nisdoo. ²⁶Che bahuii rexpejn pacni siädsajni lo nisdoo, bidxebreni, räjpreni:

—Colhuii te fantasmni — guredxa'reni sa'csi bidxebduxh'reni.

²⁷Dxejc gunii Jesús lojreni, räjpni: —Na'c guidxejbtu, laa naräni; colsutijp lastootu.

²⁸Dxejcti gunii Pedr lojni, räjpni: —Dad, palga lujni, gunibee jiälä lojlu nez lo nisre.

²⁹Räjp Jesús:

—Gudaa pues.

Dxejcti birii Pedr nen barcw gusajni lo nis te sääni nez loj Jesús.

³⁰Che bahuii Pedr beduxh ni cabi', bidxebni, dxejc gusloj cayääzni nen nisdoo. Guredxa'ni, räjpni:

—Dad, igulää narä!

³¹Lagajc dxejc gunaaz Jesús naani, räjpni loj Pedr:

—Guxii rajplu yälirilajz. ¿Xhicuent guctio'p lajzlu?

³²Che huä'preni nen barcw, guläzgjajc bej. ³³Dxejcti renani sää nen barcw bazuxhijbreni nez loj Jesús räjpreni:

—Guliipacni najclu Xi'n Dios.

Basiajc Jesús reben racxhuu guedx

Genesare't

(Mr. 6:53-56)

³⁴Che gudejdreni lo nis, bidzujnreni nez lo reuyj xten

Genesare't. ³⁵Che biembee reben ro'cni, batie'chreni diidx guideb gabi lajdxreni. Dxejcti biädnäreni guiraa reben racxhuu lojni. ³⁶Gunabduxhreni gusaanni canreni ro' xhajtisni. Dxejcti guiraa renani gudajn xhajnbi, biajcreni.

Nani ruxhin bejn

(Mr. 7:1-23)

15 Dxejcti gubig gaii rebejn nani ruluii leii näjza rebejn guidoo ni laa farisee. Siäädreni guedx Jerusalén, räjpreni loj Jesús:

²—¿Xhicuent di rexpejnpaclu jiu xcostrumbr rebengool? ¿Xhicuent direni gusoob yälrdiib naareni che rajwreni?

³Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostumbrtu. ⁴Dios gunibeeni xho guntu che räjpni: “Gojp xpala'n xtadlu, xnanlu”, näjza “Nani guiniyaj lo xtadni o loj xnanni, suguetni.” ⁵Luxh la'tu rniitu sajc gäb chutis bejn loj xtadni o loj xnanni: “Digacdi gacnäätu sa'csi guiraa ni rapä abadedäni lo Dios.” ⁶Luxh chutis ni guinii si'c, xhetru nanabdi gacnäjni xtadni o xnani. Si'c ni cabälaztu rextidx Dios te gac chanuutu rexcostumbrtu. ⁷iBejn ni rusguee najctu! Laaca gunii Isaías, bejn nani gunii xtidx Dios xcuenttu cheni räjpni:

⁸Rebenguejdxre con ro'reni rliä'preni xpala'nä niluxh lastooreni zijt suga' nez loä.

⁹Xlia'si rajjnreni narä, sa'csi ruluiireni si'c xtidxä reyälrnibee xten reben guedxliuj.

¹⁰Dxejcti gurejdxni rebejn, räjpni lojreni:

—Colcuadiajg, colyacbee. ¹¹Nani riu' ro' bejn di guxhin bejnga, sanga nani rii ro' bejnga ni'cni ruxhin bejnga.

¹²Dxejcti rexpejnpacni gubig lojni, räjpreni:

—¿La najnlu bidxe'ch rebejn farisee che biejn diajgreni diidx ni guniilu?

¹³Dxejc laani räjpni:

—Xhitis yajg nani di Xtadä ni yu' xhaguibaa nusuj siliädxa'ni guideb xlobaani. ¹⁴Colgusaanreni; lotiä'preni, ruluiireni nezyuj lo salotiä'preni. Luxh palga te ben lotiä'p guluii canejz chää stee lotiä'p, guiro'preni sitejbreni nen te gueed.

¹⁵Räjp Pedr loj Jesús:

—Basule' cuentre loonu.

¹⁶Räjp Jesús:

—¿La näjza la'tu ditu gacbee, ä?

¹⁷¿La ditu gacbee guiraa ni rajw bejn ru' xque'ni, dxejcti che rdejndi xque'ni, abigo'nni? ¹⁸Niluxh diidx nani rii ro' bejn, nen lastoo bejn riini; dee ni ruxhin bejn. ¹⁹Sa'csi nen lastoo bejn rii rexhigabguijdx xten rebejn ni rugu't sa'ni; xten rebejn ni rusguee gunaa; xten rebejn ni rusguee chää sa'ni; xten rebejn ni rbajn; xten rebejn ni rni didxxhii lo sa'ni; xtenza rebejn ni rutijl sa'ni. ²⁰Laa sa' recosre ni ruxhin bejn. Che dini gusoob recostumbr xte yälrdiib naani, di ni'c guxhin bejn.

Te gunazit nani huililajz xtidx Jesús

(Mr. 7:24-30)

²¹Biriiti Jesús ro'c, sääni nez región xten Tiro näjza Sidón.

²²Nejzga rbäjz te gunaa cananee, cabedxa'ni biäädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej bendxab lastooni, niluxh cagusacsíduhxnini.

²³Xhet räjpdi Jesús lojni. Dxejcti biädna**bd**uxh rexpejnpacni lojni, räjpreni:

—Barilaagw gunaare, didi rbedxa'ni siädna**lj**ni luj.

²⁴Dxejcti räjp Jesús lojni:

—Dios baxha**l** narä lojtis xpen Israel nani agunij**t** ne**n** do**lj**.

²⁵Dxejcti gubig gunaaga, bazuxhijbni nez loj Jesús, räjpni:

—Dad, gucnäj narä.

²⁶Dxejc räjp Jesús lojni:

—Di gac hueen xca' bejn xcuxtiil xexi'nni gusa**l**nini lo rebä'cw.

²⁷Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtejb lo mex xten xpaxhuaanni.

²⁸Dxejcti räjp Jesús lojni:

—Nane', lacti guroob najc xca**l**rililajzlu. Sugac si'cni r**l**ajzlu.

Lagajc dxejc biajc xindxa'pni.

Basiajc Jesús xhidal ben** racxhuu**

²⁹Birii Jesús ro'c gudejdni nez ro' nisdoo ni laa Galilee. Huäpgajcni yejc te dajn, ro'c gurej**ni**. ³⁰Xhidajl bejn bidzuj**n** cad sobga'ni. Siädna**re**ni rebe**n** ni rajc ni'ni, rebe**n** ni najc lotiä'p, rebe**n** gop, rebe**n** ni xheti naani, näjza xhid**al**ro be**n** racxhuu, bidzunnä**j**renini nez loj Jesús. Dxejcti basiajcnireni. ³¹Ni'cni lacti bidxeloduxh rebe**n** xhidajlga che bahuiireni r**ni**i regop, riajc reni xheti naani, rsiaj reni rajc ni'ni, ruhuii relotiä'p, dxejc r**li**ä'preni xpala'n Xtios rexpe**n** Israel.

Badeed Jesús xhi gudajw tajp mil** bejn**

(Mr. 8:1-10)

³²Gurejdx Jesús rexpejnpacni räjpni lojreni:

—Riaá rebej**n**re sa'csi agujc cho**n** dxej yunä**j**reni narä luxh xhet ca'direni gaureni. Di r**l**azä guxha**l**äreni jiireni roliz**z**reni palga gajdreni gau didi guidxaj**g**reni lo nezuyj.

³³Dxejcti räjp rexpejnpacni lojni:

—¿Xho guidxäl**nu** xhi gau rebe**n** xhidaj**l**re nez lo reyubij**z**re cadro rut rbä**j**zdi, ä?

³⁴Räjp Jesús lojreni:

—¿Bal yät**xt**iil ca'tu?

Räjpreni:

—Gajdz**t**isni, näjza gaii bäl**b**äze'.

³⁵Sas gunibee Jesús cue rebej**n** lo yuj. ³⁶Dxejc cua' Jesús guigajdz yät**xt**iilga näjza rebä**jl**, badeedni xquix**t**ios lo Dios dxejc gula'ni reyät**xt**iilga näjza rebä**jl**ga badeed**n**ireni loj rexpejnpacni.

Dxejcti laareni gudisreni yät**xt**iilga con rebä**jl**ga lo rebej**n** xhidaj**l**ga.

³⁷Guiraareni gudajw, gudxaj xque'reni. Che gulujx gudajwreni, batie'reni reyät**xt**iil ni bia'nga, gudxaj gajdz dxij**m**ni. ³⁸Renani gudajwga najc si'cti tajp mi**l** bejn, niluxh xhet näjdi regunaa nic**l**aza rebuiux bigab. ³⁹Dxejcti basadiid**x** Jesús rebej**n**, biu'tini ne**n** barcw te gudejdni lo nisdoo nez región xten Magdala.

Reben** guidoo ni laa farisee näjza saducee r**n**iabreni te milagwr si'c te seen**

(Mr. 8:11-13; Lc. 12:54-56)

16

Refarisee näjza resaducee bidzuj**n**reni

lo Jesús, gunabreni gunni te milagwr, gudeedni te seen ni rien̄ xhaguibaali. Niluxh cagusguesireni, sa'csi rlajzreni guiga' Jesús. ²Dxejc badzu' Jesús diidxre räjpni lojreni:

—Che rajl gudxej, rniitu: “Saru gac te dxej guixee sa'csi naxniaa xhaguibaa.” ³Che rajl rsil rniitu: “Etladi gac te dxej nadxej sa'csi naxniaa xhaguibaa niluxh tre' za.” Xhoxh numbeetu xhi säloj reseen ni rien̄ xhaguibaa, luxh ditu gumbee xhi säloj reseen xcuent redxejre, nalajznu recos ni cayajc. ⁴Reben̄ guijdxre, reben̄ gualajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

Levaduur xten reфарisee

(Mr. 8:14-21)

⁵Che gudejd rexpejn̄pacni stelaad nisdoo biäl-lajzreni ninäreni yätxtiil. ⁶Dxejcti räjp Jesús lojreni: —Bacuadiajg, col̄nati levaduur xten reфарisee näjza resaducee.

⁷Dxejcti bejnreni xhigab nen̄ lastooreni: “Si'c caniini sa'csi dinu niopnä yätxtiil.” ⁸Luxh gucbee Jesús xhigabga, dxejc räjpni lojreni:

—¿Xhicuent rujntu xhigab xhet yätxtiildi ca'tu, ä? iHuinuxh najc xcäl̄rililajztu! ⁹¿La gajdte gacbee? ¿La diza lajztu guinaj che gudisä gaii yätxtiil gudajw gaii m̄l̄ bejn̄, ä? ¿Bal dxijm̄ni batie'tu, ä? ¹⁰¿La diza lajztu guizaj che gudisä gajdz yätxtiil gudajw tap m̄l̄ bejn̄, ä? ¿Bal dxijm̄ni batie'tu? ¹¹¿Xhicuent ditu gacbee et yätxtiildi cagusä'tä

cheni caniä lojtu col̄nati levaduur xten reфарisee näjza resaducee?

¹²Dxejcr̄u gucbeer̄eni dini niäjp: “Col̄nati levaduur xten yätxtiil.” Laani caniini: “Col̄naáti yäl̄ruluii xten reфарisee näjza resaducee.”

Bicäjp Pedr Jesús najc Cristpac

(Mr. 8:27-30; Lc. 9:18-21)

¹³Che bidzujn̄ Jesús regiön xten Cesarea xten guedx Filipino, gunabdiidx Jesús loj rexpejn̄pacni, räjpni:

—¿Chu naj rebejn̄ nacä narä Xi'n Dios ni gujc Niguii?

¹⁴Laareni räjpreni:

—Yu'reni naj luj najclu Juan Bautist; yu'zaren̄i rnīi luj najclu Elías, peta sgaiireni rnīi luj najclu Jeremías o stee niguii ni rnīi xtidx Dios.

¹⁵Dxejcti räjpni lojreni:

—La'tu, ¿chuni'c rniitu nacä?

¹⁶Dxejc räjp Simón Pedr:

—Luj najclu Crist, Xi'n Dios nani nabajn̄.

¹⁷Badzu' Jesús diidxre, räjpni:

—Chicbaalu, Simón Pedr, xi'n Jonás, sa'csi xhet bejn̄di baluii dee lojlu, Xtadätis ni yu' xhaguibaa baluiinini lojlu. ¹⁸Narä rniä lojlu, luj najclu Pedr, nani säloj: “Te guij.” Sa'csi sibäxtiejl̄u guidxagsa'za renani rililajz xtidxä, niluxh che guetreni, direni nitloj. ¹⁹Narä gunidxä yäl̄r̄nibee lojlu te gulijdxlu rebejn̄ nani ahuililajz xtidxä. Xhitis ni gusaanlu gunreni, o xhitis ni dilu gusaanlu gunreni, susoob Dios xtiidxlu.

²⁰Dxejcti gunibee Jesús rutlojdi gäb rexpejn̄pacni laani najc Guejb Crist.

Gunii Jesús xho guetni*(Mr. 8:31–9:1; Lc. 9:22–27)*

²¹Lagajc dxejc gusloj cagusule' Jesús diidx lo rexpejn_{pacni}, guniini lojreni xho nanab_{pac} cháani guedx Jerusalén te ro'c tedni trabajwduxh ladz_{naa} rebengool xten guidoo, ladz_{naa} rebixhojz, näjza rebejn ni najn xleii Moisés. Guniizani sugu'trenini, niluxh ni riojn dxej sibansacni lo rebengut.

²²Dxejcti huinä Pedr Jesús te laad, gusloj cadi_{ln}äjnini, räjpni:

—iGacnäj Dioslu, Dad!

iGurniälojlu gaclu si'c!

²³Dxejc gubiré Jesús, räjpni lo Pedr:

—iGubicaj loä bendxab! Na'c rusiejytislu loä. Luj dilu gun xhigab xten Dios, alga xhigab xten rebenguedxliuj rujnlu.

²⁴Dxejcti räjp Jesús loj rexpejn_{pacni}:

—Palga yu' chu tejtu rla_z guirinajl narä, sucuälazni lagajc laani, suguuni xcrujzni, nalajznu tedni trabajw, sujiäd_{najl}ni narä. ²⁵Sa'csi nani rla_z gunni gaan xcäl_{nabaj}ni, sunijtnini. Luxh nani runijt xcäl_{nabaj}ni por narä, sidxäl_{ni} xcäl_{nabaj}ni par tejpas. ²⁶Sa'csi éxhi gaan gun te bejn palga ga'pni guideb guedxliuj, luxh nit xaimni lo Dios, ä? o éla yu' xhi gudeed bejn te siini xaimni? ²⁷Sa'csi narä Xi'n Dios ni gujc Niguii siälä lo yäl_{rdimbicha}' xten Xta_{dä} con rexangl_{ni}, dxejcti siguixä tebgaj bejn si'ctis ni gujc xtzuunni. ²⁸Rniliä_{pac} lojtu, loj reni tre' ree naj, yu'reni di guet dxejli ni fixgaareni jiälä narä Xi'n Dios ni gujc Niguii lo xcäl_{rnibeä}.

Chuni'c najc guroob*(Mr. 9:2–13; Lc. 9:28–36)*

17 Che gudeed xho'p dxej, huinä Jesús Pedr, Jacoob, con Juan betz Jacoob, xtebreni huijreni jiaa yejc te dajn. ²Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajn_{ni} gujc nolbäj si'c te bajl. ³Dxejc bahuigajcreni loj Moisés näjza loj Elías, cayujyreni diidx con Jesús. ⁴Dxejcti räjp Pedr loj Jesús: —Dad, ihuenduxh suga'nu ree! Palga rla_zzlu, saj_z jiennu chon yuguijxh, tejni gac xten guejblu, steeni gac xten Moisés, steeni gac xten Elías.

⁵La_{lni} canii Pedr, biäjt te za ni rdimbicha' guideb gabireni; nen zaga biejn te xse' ni räjp:

—Dee najc xi'nä ni sanälazä, ruspaduxhni lazä, colcuadiajg xtiidxni.

⁶Che biejn diajg rexpejn_{pac} Jesús diidxga, bazuxhijbreni, basajbreni lojreni lo yuj, bidxebduxh_{reni}.

⁷Dxejcti gubig Jesús lojreni, batzuubni _{naani} yejcreni, räjpni: —Colchasulii, na'c rdxejbtu.

⁸Che guläs lojreni, lojtis Jesús bahuiireni, rutru suganäjdini.

⁹Cheni sayäjtreni yejc dajnga, gunibee Jesús lojreni, räjpni:

—Rutlojdi gäbtu xhini'c bahuiitu dxejli ni guibansacä narä Xi'n Dios ni gujc Niguii lo rebengut.

¹⁰Dxejcti gunabdiidx rexpejn_{pacni} lojni:

—éXhicuent rnii rebejn ni najn xleii Moisés ganid Elías nanab jiääd, ä?

¹¹Badzu' Jesús diidxre, räjpni:

—Guliini sädxgaa Elías, laani gunsa'cni guira'ti, ¹²niluxh narä rniä lojtu, abiääd Elías, di rebejn nienbeeni, luxh bennäjrenini si'ctis ni rlanjreni, basacsíduxhrenini. Sigajcza gunnäjreni narä Xi'n Dios ni gujc Niguii, susacsíduxhrenei narä.

¹³Dxejcti gucbee rexpejnpacni caniini xcuent Juan Bautist.

Jesús basiajc te biuux ni guyu' xpej bendxab

(Mr. 9:14-29; Lc. 9:37-43)

¹⁴Cheni bidzujñreni cadro tre' xhidajl bejn, gubig te bejn lojni bazuxhijbni, dxejc räjpni:

¹⁵—Dad, balaslajz xinä sa'csi laani cayacxhuuni, rajcni yälguidxbej, rusacsíduxh yälguijdxgani, yu' huält rtejbni lo guiboo yu' huält rtejbni lo nis. ¹⁶Biädnääni loj rexpejnpaclu, luxh di nijajcni nusajcnenini.

¹⁷Jesús badzu' diidxre lojreni räjpni:

—Benguijdx, bejn ni di chalilajz, ¿gucli yu'ä lojtu? ¿Cati gac gunä huant la'tu? ¡Cołtanä biuuxga ree!

¹⁸Dxejcti gudiñäj Jesús bendxab ni yu' lastoo biuuxga, gunibeeni biriini, lagajc dxejc biajc biuuxga.

¹⁹Dxejc guninäj rexpejnpacni Jesús te laad, gunabdiidxreni räjpreni:

—¿Xhicuent di nijajcni nibäanu bendxab nen lastoo biuuxga?

²⁰Jesús räjp lojreni:

—Sa'csi la'tu guxiduxh rililajztu. Rniliä lojtu, paru najc yälrililajz xtentu si'cti te bejdz muxhtas, sajz gäbtu loj dajn rec: “Gubicaj ro'c, gudejd stelaad”, luxh sibicaj

dajnga. Palga rililajzpacktu, xhetliidi yu' ni di gacdi guntu. ²¹Niluxh sa' bendxabre, dini guirii palga ditu guiniabduxh lo Dios, gucua'nzatu.

Jesús rusule' stehuält xho guetni

(Mr. 9:30-32; Lc. 9:43-45)

²²Lałni sasajreni nez región xten Galilee, räjp Jesús:

—Suteedreni narä Xi'n Dios ni gujc Niguii ladznaa rebendojl te gusacsíreni narä. ²³Niluxh sugu'treni narä, dxejc ni riojn dxej sibansacä lo rebengut.

Che biejn diajgreni diidxga, guchuinduxh lajzreni.

Gudijxni impuest xten guidoo

²⁴Che bidzujñ Jesús näjza rexpejnpacni guedx Capernaum, biääd rebejn ni rusquijx xcuent guidoo lo Pedr, gunabdiidxreni lojni, räjpreni:

—¿La di xmastrtu quiix impuest xten guidoo?

²⁵Räjp Pedr:

—Rguijxnini.

Che biu' Pedr nen yu', ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebejn ni rnibee lo guedxliujre? ¿Chuni'c rguijx reimpuest, recuyo't? ¿Reben lajdxreni o rebenzajt?

²⁶Badzu' Pedr diidxre räjpni:

—Rebenzajt.

Räjp Jesús:

—Ni'cni di rexi'nreni quiixni.

²⁷Luxh te di guidxe'chreni, huij ro' nisdoo, bacuaa ansuel, guläa bäjli ni guiniazxaalu. Ro' bäjga sidxällu te melpla't ni sajl te chatijxlu impuest xcuentä näjza xcuentlu.

¿Chuni'c sajcru lajdx Dios
xhaguibaa?

(Mr. 9:33-37; Lc. 9:46-48)

18 Laa dxejnci gubig
rexpejn̄pac Jesús lojni te
gunabdiidxreni:

—¿Chuni'c sajcru lajdx Dios
xhaguibaa?

²Dxejcti gurejdx Jesús te biuxbáz,
bazujnini nez galáiiireni, ³dxejc
rájpn̄i:

—Rniliápac lojtu, palga ditu
gusiechlajztu, palga ditu gac
nadolajz si'c te biuxbáz, ditu jiu'
lajdx Dios xhaguibaa. ⁴Ni'cni
chutis bejn̄ nani gac nadolajz si'c
biuxe're, laani gac ni sajcru lajdx
Dios xhaguibaa. ⁵Chutis ni riu te
sa' biuxe're, sa'csi rinälajzni narä,
lagajc narä riuni.

Riezwg jiajbni nen̄ dojl̄

(Mr. 9:42-48; Lc. 17:1-2)

⁶Rájpn̄zani:

—Chutis ni gudzucaj lo xnezyuä
te sa' biuxe're ni ahuililajzni
xtidxä, maazru huen niliib te guij
xten molin dojb yejn̄ni, chatejbni
loj nisdoo, palga gunni jiajb tej
reni'c lo dojl̄. ⁷Proobza guedxliuj
sa'csi yuduxh xhigabguijdx lojni.
Sa'csi nanabpac chu xhigabguijdx.
Gunatiro, bejn̄ ni ruzobloj
rexhigabguijdxre, ni rujn̄ riajbza lo
dojl̄ reni rililajz xtidxä, ni najc si'c
biuxe're.

⁸Palga ni'lu o ñaalu gun jiajblu
lo dojl̄, batiu'ni. Hueenru jiu'lu
lo xcäl̄nabajn̄ Dios nitiujnglu o
ñatiujnglu lacuaa jiilu con guiro'p
ni'lu o guiro'p ñaalu lo balduxh ni
rejc par tejpas. ⁹Palga te balojlu

rujn̄ riajblu lo dojl̄, gulääni.
Hueenru jiu'lu lo xcäl̄rnibee Dios
najclu lotiä'p lacuaa chu guiro'p
baloj chazäl̄reni luj lo balduxh ni
rejc par tejpas.

Xcuent xiil ni gunijt

(Lc. 15:3-7)

¹⁰Rájpn̄za Jesús lojreni:

—Col̄natiro, andi cuälaztu rebejn̄
ni najc si'c biuxbázre ni sasaj lo
xnez Dios, sa'csi rexangl Dios ni
cahuiireni, guiraatis dxej yu'reni
loj Dios. ¹¹Sa'csi Xi'n Dios ni gujc
Niguii biääd te gusläani rebejn̄ nani
agunijt nen̄ dojl̄.

¹²Rájpn̄zani:

—¿Xho rhuiitu? Palga rajp te bejn̄
te gayuu xiil, dxejc nit tejni, ¿laa
dini gusaan stabitzubigaaga ni yu'
nen̄ gurajl te chatiilni xile' ni gunijt,
ä? ¹³Luxh palga guidxäl̄ni xile'ga,
rniliä lojtu, sibalazduxhruni xcuent
xile'ga luxh guxiiru guibanäj
lajzni xcuent rexiil nani di ninijt.
¹⁴Sigajcza Xtadnu ni yu' xhaguibaa
di rlajz nit lo Dios nicla tej reni
ahuililajz xtiidxni, ni najc si'c
biuxbázre.

Xho gunnäjlu bejtzlu

(Lc. 17:3)

¹⁵Rájpn̄zani:

—Palga gun bejtzlu te cosguijdx
lojlu, guninäjni xtebtislu, gojs lojni
xhi dojl̄ bejn̄ni lojlu. Palga saru
gucuadiajgni xtiidxlu, abiäj̄l̄ lajztu.
¹⁶Palga naaddini gucuadiajgni,
dini jiu xtiidxlu, dxejc huiinä stee o
stio'p bejn̄ chaninäjluni, te guiraa
ni guiniitu jiejn̄ diajg rebejn̄ga,
te arajplu tio'p o chon̄ testiigw.
¹⁷Palga di bejtzlu gucuadiajg xtidx

rebejn̄ga, luxh dizani jiu xtiidxreni, nen̄ guidoo huile'c xquejlu loj rebejn̄ ni ricuadiajg xtidx Dios. Palga dizani jiu reben̄ guidoo, sugacni nez lojlu si'c te beņgũjdx ni di gumbee xtidx Dios o si'c rebejn̄ nani rusquijx loj rebejn̄ nani ruto'.

¹⁸Ni'cni rniliápac lojtu, guiraa yálguxhtis xten bejn̄ ni di gusiechlajz xtojlr̄eni ni guntu lo guedxliuj, si'c jia'nni xhaguibaa; guiraa redojl̄ nani gusiájl̄ lajztu lo guedxliuj sa'csi basiechlajz bendojl̄ga, si'cza jia'nni xhaguibaa.

¹⁹Sigajcza rniá lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtaďa ni yu' xhaguibaa suniidxni ni rniabtu lojni. ²⁰Sa'csi cadrotis nadxagsa' tio'p o chon̄ bejn̄ sa'csi rinálajzreni nará, anasuga'á galáii rebejn̄ga.

²¹Dxejcti gubig Pedr loj Jesús, gunabdiidxni:

—Dad, ¿palga gunijt betzá loá, bal huált nanab gusiájl̄ lazá? ¿La sajl̄ gajdzli huált, á?

²²Badzu' Jesús diidxre lojni rájpn̄i:

—Dina guiniá gajdztis huált, rniá gayon̄bidzuo huált, nalajznu si'ctiza huált basiájl̄ lajzlu.

Xcuent tio'p bejn̄ ni nazääb meel

²³Xcäl̄rnibee Dios xhaguibaa najc si'c te reii ni rlajz gunni cuent lac nazääb rexmosni lojni.

²⁴Agusloj cayujnni xcuentni chela bidzun̄nájreni te mos ni nazääb balti mil lojni. ²⁵Luxh mosre xhet rajpdini te quixni rexti'nni, ni'c gunibee reii guido'ni si'c sclav,

nájza cháäl̄ni, nájza rexi'nni, nágajcza guiralii xhixtenni, te gaxh xti'nni. ²⁶Dxejcti mosga bazuxhijbni loj xlam̄ni, gunabduxhni lojni, rájpn̄i: “Gulázsijc tiop-chon̄ dxej, Dad, te gac quixá xti'ná.”

²⁷Dxejcti lam̄ga balazlajzni xmosni, badzucajni guiraa ni nazääb mosga lojni, baslaanini. ²⁸Cheni birii mosga rolijz xlam̄ni, bidxaagni stee samosni ni nazääb bale'si beex lojni. Gunaaznini, baxhiya'ni yejnni, dxejc rájpn̄i: “Gudijxga ni nazääblu loá.” ²⁹Dxejcti ste mosga bazuxhijbni lojni, rájpn̄i: “Gulázsijc. Siguixáca guiraa ni nazábá lojlu.”

³⁰Luxh steega naaddini, alga huisäugacni samosni nen̄ latzguiib te bejn̄ni gaan gudijxni guiraa ni nazääbni. ³¹Cheni bahuii sgaii mos xhini'c bejn̄ni, gucnaduxhlajzreni, huiye'tzreni lo xlam̄reni xhi huiyejnni. ³²Dxejcti gurejdx xlam̄reni mosga, rájpn̄i lojni: “iMos guijdx! Nará badzucáa di'n ni nazääblu loá, sa'csi gunabduxhlu loá. ³³Si'cza niunnájlu sa'lu, nulazlajzluni sigajc ni balazlazálu.”

³⁴Sas lacti bidxechduxh lam̄ga, gunibeeni biáuuni te gudijxni guiragajc ni nazääbni lo xlam̄ni.

³⁵Baluux Jesús cuentga, rájpn̄i: —Sigajcza gunnáj Xtaďa ni yu' xhaguibaa guiraa rebejn̄ ni di gusiájl̄lajzpac guiraa redojl̄ ni rujn resa'ni lojni.

Jesús ruluii xcuent yálrur̄o'n sa'ni

(Mr. 10:1-12; Lc. 16:18)

19 Che gulujx gunii Jesús recuentre, biunejn̄ni Galilee, huijni lo región xten Judea, stelaad gueu Jordán.

²Xhidajl bejn birinajlni, ro'c basiajnci rebenracxhuu, ³dxejc gubig refarisee lojni, rlaizreni gusgueesireni Jesús ni'c räjpreni lojni:

—¿La sajc guro'n te niguii chäälni che rlaiztisni, ä?

⁴Badzu' Jesús diidxre lojreni, räjpni:

—¿La gajdtu goj lo reguijtz nani bacuaa toMoisés cadro caj xho benchee Dios bejn galooli: “Niguii näjza gunaa bencheenireni”?

⁵Guniiza Moisés: “Ni'cni gusaan niguii xtadni con xnanni te xca'ni chäälni, dxejc dirureni gac tio'p, tejtis bejn najcreni.” ⁶Ni'cni dirureni gac tio'p, anajcreni tejtis bejn, digacdi guilia' rebejn lo sa'ni nani abachagsa' Dios lo sa'ni.

⁷Dxejcti gunabdiidxreni lojni, räjpreni:

—¿Xhicuent gunibee Moisés gudeed niguii te guijtz lo chäälni te si'c gac guro'nni gunaaga, ä?

⁸Räjp Jesús lojreni:

—Sa'csi najc lastootu si'c te guij, ni'c basaan toMoisés baro'n niguii chäälni, niluxh galodoo et si'cti gujnci. ⁹Luxh rniä lojtu, niguii nani gusaan chäälni, luxh xhet dojlđi bennäj chäälni stee niguii, dxejcti guchnaani ste'ca gunaa, rujnni dojl. Sigajcza niguii ni guchnaa gunaaga ni abaro'n chäälnini, rujnza niguiiga dojl.

¹⁰Dxejc räjp rexpejnpacni lojni:

—Palga si'c najc xcuent niguii con chäälni, hueenru na'c guchnaani.

¹¹Jesús räjp lojreni:

—Xhet guiraadi bejn rajc gacbee rediidxre, rebejntis ni rudeed Dios te xcäriensa'c ni'ctis racbee. ¹²Yu'

xhicuent digacdi guchnaa niguii: yu'reni digacdi guchnaa sa'csi si'c gojlreni; yu'reni digacdi guchnaa sa'csi baxhiñ sabejnreni; yu'zaren digacdi guchnaareni sa'csi rlaizreni gunreni xtuuntis Dios. Nani rajc racbeeni rediidxre, sugacbeenireni.

Biädnäreni rebiuux loj Jesús

(Mr. 10:13-16; Lc. 18:15-17)

¹³Dxejcti biädnäreni rebiuux' loj Jesús te gudzuubni naani yejcreni, guiniabni lo Dios xcuentreni. Luxh rexpejnpacni gudilnäj rebejn ni siädnä rebiuux'ga. ¹⁴Dxejc räjp Jesús lojreni:

—Colgusaan guibig rebiuux' loä, na'c gudxojturen, sa'csi xcälrnibee Dios xhaguibaa najc xten reni nadolajz si'c najc rebiuux're.

¹⁵Che gulujx badzuubni naani yejc rebiuux', biunejzni ro'c.

Te beñ ni rajp guninäj Jesús

(Mr. 10:17-31; Lc. 18:18-30)

¹⁶Dxejc biääd te bi'n lo Jesús, gunabdiidxni lojni; räjpni:

—Mastr sa'c, ¿xhini'c nanab gunä te xca'ä yäl nabajñ lo Dios par tejpas?

¹⁷Dxejc räjp Jesús lojni:

—¿Xhicuent rniilu mastr sa'c narä? Diostis najc sa'c. Per par rlaizlu xca'lu yäl nabajñ lo Dios, bazoob rextidx Dios ni caj lo xleii Moisés.

¹⁸Dxejcti räjp bi'nga lojni:

—¿Xhi rediidxga?

Dxejc räjp Jesús lojni:

—Na'c ju'tlu, na'c guesnäjl bejn nani di gac chäällu, na'c cuanlu, na'c guiliäslu didxxhii xcuent bejn.

¹⁹Bazoob xtidx xtradlu con xnanlu, huiñälajz sa'lu si'cni sanälajzlu lagajc luj.

²⁰Dxejcti räjp bi'nga lojni:

—Guiraa rediidxre runä che nacáli biuux. ¿Xhiruxni'c riäädx gunä?

²¹Dxejc räjp Jesús lojni:

—Palga rlajzlu gaclu beñsa'c lo Dios, huij, bato' guiraa ni rajplu, dxejc gudisni lo rebenproof, dxejc xhaguibaa sapduxhlu xhixtenlu. Dxejcti gudaä te jiädnajlly narä.

²²Cheni biejn diajg bi'nga rediidxre, guc-huinuxh lajzni sa'csi rajpni xhidalduxh xhixtenni.

²³Sas Jesús räjp loj rexpejnpacni:

—Rniliápac lojtu, naganduxh jiu' te beñ rajp loj xcälrnibee Dios. ²⁴Rnisacä lojtu, guyasiru ted te cameii nen baloj te guux; naganduxhru jiu' te bejn ni rajp lo xcälrnibee Dios.

²⁵Che biejn diajg rexpejnpacni rediidxre, bidxeloduxhreni, dxejc canabdiidx loj sa'reni:

—¿Chuni'c sajc jiu' lo xcälrnibee Dios?

²⁶Dxejc bahuidzu'tz Jesús lojreni, räjpni:

—Naganduxh gun rebejn dee, Diostis sajc gun guiraloj.

²⁷Dxejcti Pedr räjp lojni:

—Nuurnu basa'nnu guiraa xhixtennu te siopnalnulu. ¿Xhini'c jia'pnu ro'c?

²⁸Jesús räjp lojreni:

—Rniliápac lojtu, la'tu ni biädnajlly narä, che guscobä guiraa recos cheni cueä narä, Xi'n Dios ni gujc Niguii, lo yagxhil cadre guinibeä lo guiraa reben guedxliuj, la'tu ni siädnajlly narä sibejzatu lo tzubitio'p yagxhil te

guinibeetu loj guitzubitio'p guejdx xten rexpejn Israel. ²⁹Luxh guiraa rebejn ni basa'n rolizjni o rebejtzni, o rebisiajnni, o xtadni, o xnanni, o chäälni, o xi'nni, o rexhujni, te siädnajlly narä, rebejnnga sajc te gayuu huält locni gojpni, nägajc ga'preni xcäl'nabajn Dios par tejpas.

³⁰Rebejn nani rchalo najcreni benroru lo sa'reni nez loj Dios, reni'c gac bejn ni guxii sajc nez loj Dios. Rebejn nadolajz ni di guchalo sajcrureni lo sa'reni, reni'c sajcrureni nez loj Dios.

Xcuent reni rujn dzuun

20 Räjpzani:

—Xcälrnibee Dios najc si'c te bejn ni najc baxhuaan xten te renchro. Rsildooru biriini te satiilni mos gun dzuun lo xyujni, lo reyaguub. ²Che bidxälni gaii mos, bachaagni diidx. Bia'nreni diidx quiixnireni te denaar tebdxej cade tej remosga. Dxejc baxhalnireni loj xyujni sayujnreni dzuun.

³Birisacni, satiilni sgaii mos si'cti rcagaa, rsil. Bidxaagni sgaii bejn ni xhet cayujndi, suga'sireni nez lo guii. ⁴Räjpni lojreni: “Näzja la'tu colchayujn dzuun lo xyuä. Narä siguixä si'cni riäjly xca'tu.” Sä'ti rebejnnga lo dzuun. ⁵Birisac dade' si'cti läiidxej, birisaczani si'cti rcachon gudxej. Bidxaagni sgaii bejn, sigajcza räjpni loj rebejnnga. ⁶Dxejc si'cti rcagaii birisacni, huijni lo guii. Ro'c bidxälni sgaii bejn ni xhet cayujndireni, suga'sireni nez lo guii. Dxejc räjpni lojreni: “¿Xhicuent suga'tu ree guideb dxej xhet cayujnditu?” ⁷Dxejc räjpreni lojni: “Sa'csi rut siädtildinu te

choyennu dzuun.” Dxejcti räjpni lojreni: “Näjza la'tu colchayejn dzuun lo xyuä. Narä siguixsa'cätu.”⁸ Che biu' guxhijn, räjp lam lo mos ni rnibee remos: “Gurejdx remos te quiixlureni. Gudix-xгаа reni biu' gudxejru lo dzuun. Lult gudijx reni biu' ganid lo dzuun.”⁹ Dxejdx ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujn dzuun guideb dxej.¹⁰ Cheni biu' reni biu' lo dzuun rsildoo, bejnreni xhigab sica'rureni meel, per sigajcza laareni cua'reni te denaar cade tejreni.¹¹ Che cua'reni xcuentreni gusloj cadxe'chreni lo baxhuaan xten dzuunga.¹² Räjpreni: “Redee ni biu' lult lo dzuun pet teb ortis bejnreni dzuun, luxh gudijxlureni sigajcni gudijxlu nuurnu, luxh biennu dzuun guideb dxej, luxh biennu dzuun lo yäl'nanlaa.”¹³ Dxejdx räjp lamga lo tejreni: “Xamigwä, xhet cosguijdxdi cayunä lojlu. ¿La xhet bia'ndinu diidx te denaar quixälu tebdxej? ¹⁴Huij, cua' xmeellu. Narä rlazä quixä bejnre ni biu' lult sigajc ni gudixä lojlu.¹⁵ ¿La di gacdi gunä si'ctis ni rlazä con xmelä? ¿O rdexchlajzlu loä sa'csi nacä hueen, ä?”¹⁶ Ni'cni reni biääd lult sajcreni tebloj con reni biääd ganid, luxh reni biääd ganid sajcreni tebloj con reni biääd lult.

Gunisac Jesús xho guetni

(Mr. 10:32-34; Lc. 18:31-34)

¹⁷ Che sasaj Jesús lo nezyuj sääni Jerusalén, huinäni rexpejn'pacni te laad te räjpni lojreni:

¹⁸ —La'tu ruhuiitu sosaanu nez guedx Jerusalén. Ro'c narä, Xi'n

Dios ni gujc Niguii, siabä ladz'naa reni rnibee lo rebixhojz, näjza lo rebejn ni najn leii. Laareni sinibeereni guetä.¹⁹ Suteedreni narä ladz'naa rebenzijt te cubeereni narä quiinreni narä, dxej gucuaareni narä lo cruuz. Luxh ni riojn dxej, sibansacä loj rebengut.

Ni gunab xnan Jacoob näjza Juan

(Mr. 10:35-45)

²⁰ Dxejcti gubig xnan Jacoob näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús.²¹ Gunabdiidx Jesús lojni:

—¿Xhini'c r'rajzlu?

Räjp gunaaga lojni:

—Che jiu'lu lo xcäl'rnibeelu, gunibelaa cue tej rexi'nä xladbeelu, steeni cue xladbä'jgwlu.

²² Dxejdx räjp Jesús:

—iDitu gan xhini'c rniabtu! ¿La sajc tedtu yäl'rsacsí sa'ni tedä? ¿La sajc tedtu trabajwduxh sa' ni nanab tedä?

Dxejdx räjpreni:

—Sajc tednuni.

²³ Dxejcti räjp Jesús lojreni:

—Guliipacni. Sidedxgaatu trabajw, sidedxgaazatu yäl'rsacsí. Et narädi cueä reni cue xladbä'gwä o xladbeä. Xtadä ni yu' xhaguibaa alaguleni rebejn'ga.

²⁴ Che biejn diajg stzuu rexpejn'pac Jesús, bidxe'chreni loj guiro'p rexi'n nane'ga.²⁵ Dxejdx gurejdx Jesús reni, räjpni:

—La'tu najntu xho rujn regubier ni rnibee lo rebenzijt, rnibeereni rebejn'ga si'c xlamreni. Luxh reni najc rebenro lojreni runnäjreni rebejn'ga si'ctis ni r'rajzreni.

²⁶Et si'cni gunditu la'tu loj rebejn. Chutis rlaiz gac beŋro lojtu, nanab gunni dzuun gacnäjni guiraliitu si'c te mos. ²⁷Luxh chutis tejtü ni rlaiz guiliä'p xpala'nni, nanab gacni si'c xmos lo guiraliitu. ²⁸Sigajcza biääd Xi'n Dios ni gujc Niguii. Dini niniab mos chu lojni, alga laani najc xmos bejn, badeedzani lagajc yäl'nabajn xtenti te gudijxni baslaani xhidal bejn ni yu' lo dojl.

Jesús rusiajc tio'p lotiä'p

(Mr. 10:46-52; Lc. 18:35-43)

²⁹Che gojl guiriireni guedx Jericó, xhidalduxh bejn sanajlni. ³⁰Dxejcti sobga' tio'p bejn ni di fii cuä' nez yuj. Che biejn diajgteni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

³¹Gudiñäj rebejnreni, te gusäuren i ro'reni. Luxh laaren i dipru guredxa'reni:

—iDad, Xi'n toDavid, balazlajz nuurnu!

³²Dxejc guzudxi Jesús, gurejdxni reni di fii, räjpni lojreni:

—¿Xhini'c rlaiztu gunä?

³³Räjpreni lojni:

—Dad, rlaaznu guixal balojnu te gac fiinu.

³⁴Dxejc balazlajz Jesúsreni, gudajnni balojreni. Sas biacgajc balojreni, gujc bahuiireni, sanajltireni Jesús.

Biu' Jesús guedx Jerusalén

(Mr. 11:1-11; Lc. 19:28-40; Jn.12 :12-19)

21 Cheni Siäddzungajxhreni guedx Jerusalén, bidzujnreni te guedxbáz ni laa Betfagé, cuä' dajn ni laa Oliib.

Baxhal Jesús tio'p xpejnpacni, ²räjpni lojreni:

—Colchäj loj guedxbázre ni tre' nez lojtu. Ro'c guidxältu te burgunaa caduu näjza teburhuin. Colguxhecn i, coltanäni löä. ³Palga yu' chu naa: “¿Xhini'c rujntu?” colye'tz lojni: “Dad caquiinnini terate'. Suxhalgajcni.”

⁴Luxh guiraa dee gujc te guzojb diidx ni gunii dade' nani bacuaa xtidx Dios agujc xchero, che räjpni:

⁵Colye'tz loj reni rbäjz guedx Sión, bahuii xreilu siääd lojlu, nadolajzni bijbni te burbáz, te burbáz, xi'n man ni rujn dzuun, ni ruu cargw.

⁶Dxejcti huij rexpejnpacni, bejnreni si'c gunibee Jesús gunreni. ⁷Biädnäreni burga näjza burbáz xi'nni. Gudixhreni xhajbreni detz burbázga, dxejc gubijb Jesús burbázga. ⁸Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaiireni batiu' balajc te gudixhreni rebalajc lo nez yuj cadro ted Jesús. ⁹Rebejn ni nijd, näjza reni siääd dejtzn i gusloj cabedxa'reni, räjpreni:

—iXchej guibajn Xi'n toDavid! iChicbaa ni siääd xcuent Gueb Dios! Rliä'pnu xpala'n Guejblu Dios.

¹⁰Cheni biu' Jesús nen guedx Jerusalén, guiraa reben guejdxga gusloj camojm, yu'reni canabdiidxreni loj sa'reni:

—¿Chucha najc bejnre?

¹¹Yu'zaren i räjp:

—Dee najc Jesús, niguii ni rusule' xtidx Dios. Guedx Nazare't xten Galilee siäädni.

Basia Jesús guidoro

(Mr. 11:15-19; Lc. 19:45-48; Jn.2 :13-22)

¹²Dxejc biu' Jesús nen guidoro xten Dios, gulääni guiraa rebejn

ni caguto' näjza rebejn ni casii. Barexhätni remex xten reni ruchaa meel xten rebejn, näjza reyagxhil xten reni ruto' repalom. ¹³Dxejc räjpni lojreni:

—Loj reguijtz ni bacuaa rebengaloo caj: “Sirilaj xquidoä yu' xten yälrbexdx, yälrniab loj Dios.” Niluxh la'tu abejntuni xpiliää gubaan.

¹⁴Lagajc nen guidooga, gubig loj Jesús gaii bejn ni di fii näjza gaii bejn ni rsiacoj, luxh basiajcnireni.

¹⁵Cheni bahuui reni rnibee loj rebixhojz, näjza reni najn leii remilagwr ni bejn Jesús, luxh biejnza diajgreni xho cabedxa' rebiuxe' caniireni: “Rliä'pnu xpala'nlu Xi'n toreii David”, bidxe'ch rebixhojzga. ¹⁶Dxejc räjpreni loj Jesús:

—¿La riejn diajglu xhi caniireni, ä?

Badzu' Jesús diidxre lojreni räjpni:

—O'n, riejn diagäni. ¿La gadtu goḷ lo reguijtz ni bacuaa te dade' ni gunii xtidx Dios? Ro'c caj xcuent redee, cadro caj rediidxre:

Abejnlu goḷ rebiuux näjza rebäznite' dij ni rliäpsa'cpac xpala'n Dios.

¹⁷Dxejcti basaan Jesúsreni, biunejnzi ro'c sääni guedxe' ni laa Betania, ro'c gudejndi yääl.

Te yag iigw ni gubijdz

(Mr. 11:12-14, 20-26)

¹⁸Cheni bara yääl, rsilru gubisac Jesús guedx Jerusalén. Laḷ ni sääni, gusloj calaanni. ¹⁹Bahuuii loj te yag iigw cuä' nezuj. Gubigni gajxh ni' yajgga, per xhet ninejxhdi

bidxälni, ganaxhtis balajg caj lo yajgga. Dxejc räjp Jesús lo yajg iigwga:

—iNuncru xcaj nicla tej ninejxh lojlu!

Dxejcti gubidzgajc yajgga.

²⁰Cheni bahuui rexpejn pacni, bidxeloduxhrenei, gunabdiidxreni loj Jesús:

—¿Xhi cuent gubidzgajc yajgga?

²¹Räjp Jesús lojreni:

—Rniliäpac lojtu, palga chalilajzfactu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni. ²²Guiraa ni guiniabtu loj Dios, palga chalilajzfactu, suniidxnini.

Xcälrnibee Jesús

(Mr. 11:27-33; Lc. 20:1-8)

²³Dxejcti biu' Jesús nen guidoro, dxejc laḷ ni caguluiini rebejn gubig reni rnibee loj rebixhojz näjza rebengool, gunabdiidxreni lojreni:

—¿Xhi yälrnibee rajplu ni'cni rajc rujnlu recosre? ¿Chuni'c baniidx yälrnibeere lojlu?

²⁴Badzu' Jesús diidxre lojreni räjpni:

—Sigajcza narä gunä te yälgunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx yälrnibee te runä recosre. ²⁵¿Chuni'c gunibee gutiobnis Juan ni rutiobnis? ¿La Dios o la beḅ guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuent ditu nililajz xtiidxni? ²⁶Palga jie'tznu bejn guedxliuj gunibeeni, dxejc sixa't rebejn yejcnu sa'csi guiraareni

rililajzreni Juan najc te Dade' ni gunii xtidx Dios. ²⁷Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yälrnibee te runä guiraa recosre.

Te dade' ni guyu' tio'p xi'nni

²⁸Jesús räjp lojreni:

—Guidon xho guichalootu diidxre.

Te dade' guyu' tio'p xi'nni. Räjpni loj xingangaloini: “Xi'nä, nadxej chayujnlu dzuun cadre care' uub.”

²⁹Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujnni xtzun xtadni.

³⁰Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij. ³¹Loj guiro'preni, ðchuni'c bejn si'cni rlanj xtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliäpac lojtu, reni ruquijx guiraloj, näjza regunabdxab ganidreni jiu'reni lojtu loj xcälrnibee Dios, ³²sa'csi Juan ni rutiobnis biädluini la'tu xho guibajntu, luxh ditu nililajz xtiidxni. Biädla reni ruquijx guiraloj, näjza regunadxab huililazduxhreni xtiidxni. Niluxh la'tu bahuiitu guiraa recosga, ditu nusiechljaz te nililajztu xtiidxni.

Xcuent remosgüijdx

(Mr. 12:1-12; Lc. 20:9-19)

³³'iColcuadiajg stee cuentre!
Guyu' te dade' ni najc baxhuaan

xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcnite tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn ni rujn dzuun, sä'tini te bjaizijtro. ³⁴Che agojl guire' cose'ch baxhaļ baxhuaanga gaii xmosni loj xyujni te chaxiireni cose'ch ni riäjl xca' baxhuaanga. ³⁵Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni. ³⁶Dxejc baxhaļsac baxhuaanga sgaii mos. Niluxh reni biannäj yujga sigajcza bennäjreni remosga.

³⁷Dxejcti bejn baxhuaanga xhigab: “Maazru huen guxhaļä xi'nä; sucuadiajgrureni xtiidxni.”

³⁸Cheni bahuiireni lo xi'n baxhuaan xten yujga, bejnreni xhigab: “Deeni jiannäj yujre; do'lo guigu'tnuni te jiannäanu yujre.”

³⁹Dxejcti gunaazrenini, guläärenini te laad, dxejc bagu'trenini.

⁴⁰Dxejc gunabdiidx Jesús räjpni: —Che jääd baxhuaan xten yujga, ðxhi gunnäjni rebejn nani biannäj xyujni?

⁴¹Dxejc räjpreni loj Jesús: —Dini gulazljaz rebengüijdxga, sugu'tnireni, sudedlaani xyujni loj ste'ca bejn nani gudeed cose'ch ni riäjl xca'ni che gaļ guire' cose'chga.

⁴²Dxejcti räjp Jesús lojreni: —ðLa gajdtu goļ lo reguijtz nani bacuaa dade' nani gunii xtidx Dios galoo? Rediidxre caj ro'c: Guij nani gulälaz reni runchee yu', cua' Dios lagajc güijga gudixhnini squiin yu',

sajcruni loj guiraa reguij.
Dee bejn Gueb Dios, luxh
rdxeloduxhnu dzunrore ni
bejn.

⁴³Ni'cni rniä lojtu, sibicaj
xcäl_rnibee Dios lojtu, sidejdni loj
rebejn nani gudeed ni riäj_l xca'
xcäl_rnibee Dios, nalajznu renani
chalilajzpac xtiid_xni. ⁴⁴Luxh xcuent
guijga: nani jiajb lo guijga, silia'ni,
per nani guitejb guijga yej_cni, li
siujyni, gacni däj.

⁴⁵Che biejn diajg reni rnibee lo
rebixhojz näjza refarisee recuent ni
canii Jesús, gucbeereni cagusä'tni
lagajc laareni. ⁴⁶Rlajzreni
niniaazrenini, per bidxebreni
rebejn sa'csi salilajz rebejn najc
Jesús bejn ni rnii xtid_x Dios.

Xcuent yäl_ruchnaa

22 Guslosac canii Jesús lojreni
con recuent, räjpni:

²—Xcäl_rnibee Dios najc si'c te
reii ni bejn te sa' te guchnaa xi'nni.
³Baxha_lni rexmosni te saxiireni
regolnejdx chääreni sa', niluxh
rebejn_re di rlajzdireni. ⁴Dxejc
baxha_l_sacni rexmosni, räjpni:
“Col_ye'tz loj reni abido_n, agujc
comiid. iAbagutä balti gonsa'c,
gonguro! Anacchee guira'ti yäl_rajw.
Col_taa.” ⁵Niluxh reni abidonga di
niu xtiid_xreni. Tejni sahuui rexyujni,
steeni säa lo rexnegosni, ⁶dxejcti
sgaii reni niajc biooz gunaazreni
rexmos_reii, basacsíreni remosga,
sas bagu'trenini. ⁷Che biejn diajg
reiiga, bidxe'chduxhni, baxha_lni
rexsoldaadni te sagu'treni guiraa
rebenguijdxga, te saze'czareni
guejdx cadre rbäjzreni. ⁸Dxejcti
räjpni loj rexmosni: “Guiraa dee

anacchee, di nungäj_l jiäädru
reni abido_n. ⁹Col_chäj, pues, lo
resquiin lo nezyuj, col_cuejdx chutis
bejn ni guidxaagtistu.” ¹⁰Birii
rexmosni, sääreni lo nezyuj. Dxejc
bachagsa'reni guiraatis bejn ni
bidxaagreni, reni najc benguijdx
sigajc reni najc bejhueen te gudxaj
rolijz reiiga.

¹¹Dxejc biu' reii biädhuiini loj
rebiooz. Bahuiini loj te bejn ni sobga'
ro'c, luxh xhet xhablanijdini najcwni.
¹²Dxejc räjp reii lojni: “Xamigwä,
¿xho bejnlu biu'lu ree luxh xhet
xhablanijdilu najcwlu?” Dxitis sobga'
bejn_ga, xhet rniidini. ¹³Dxejc räjp
reii loj rexmosni: “Col_guliib ni'ni
näjza naani, colsäl_ni detzyu' cadre
nacäjy te ro'c gonduxhni chubejli
reläjyni.” ¹⁴Sa'csi xhidajl najc reni
bidon_luxh guxii najc reni bibee.

La sajc quiixni impuest

(Mr. 12:13-17; Lc. 20:20-26)

¹⁵Dxejcti sii refarisee, bia'nreni
diid_x siguiilreni xho gunijt Jesús te
diid_x te guiga'ni. ¹⁶Ni'c baxha_lreni
gaii xpejnreni näjza gaii bejn ni
nadxaag Herodes te räjpreni loj
Jesús:

—Mastr, anajnnu rniilu ganax
did_xlii, ruluiizalu xtiid_xpac Dios,
luxh dilu jiu xhi rnii rebejn, sa'csi
dilu cue bejn ni sajcru lo stee bejn.
¹⁷Gunii loonu, pues: ¿La laaca najc
quiixnu impuest lo César ni rnibee
loonu o et laadi?

¹⁸Dxejc gucbee Jesús xhet laadi
xhigab cayujnreni nen_l lastooreni,
dxejc räjpni lojreni:

—iBenguijdx! ¿Xhicuent rlajztu
guquiiltu narä? ¹⁹Col_guluii te meel
löä.

Dxejc badeedreni te meel ni laa denario. ²⁰Che bahuii Jesús loj meelga, gunabdiidxni lojreni, räjpnj:

—¿Chuni'c caj lo meelre?

²¹Dxejc räjpreni:

—Loj César.

Dxejc räjpn Jesús lojreni:

—Colgudeed lo César ni riäjł xca' César, colgudeedza lo Dios ni riäjł xca' Dios.

²²Che biejn diajgreni rediidxre, bidxeloduxhreni. Dxejc basaanrenini, sä'tireni.

Canabdiidxreni xho gac che guibansac rebejn

(Mr. 12:18-27; Lc. 20:27-40)

²³Lagajc dxejga bidzujn gaii reni laa saducee, reni di chalilajz sibansac bejn loj rebengut. Gubigreni loj Jesús, gunabdiidxreni, ²⁴räjpreni:

—Mastr, si'c naj toMoisés, palga yu' te bejn ni abachnaa, luxh ruti xi'nni che guetni, riäjł guchnaa bejtzni biuudga te chu xi'nreni xcuent bejtzni. ²⁵Mbaj. Loonu yu' gajdz niguii ni najc bejtz sa'reni. Betzgoolga bachnaa, dxejc gujtni, luxh di xi'nni niu'. Basa'nni chääłni lo bejtzni. ²⁶Sigajcza gusajc ni ro'p bejtzni; sigajcza gusajc ni riojn bejtzni. Si'c huinuu gujc che basa'li guigajdz bejtzga. ²⁷Sas che gujt guiraareni, nájza gunaaga gujt. ²⁸Che guibansac rebejnğa lo rebengut, ¿chu tej lo rebjtzga gac chääłpac gunaaga, ni guiraareni bachnaareni gunaaga?

²⁹Dxejcti badzu' Jesús diidxre lojreni, räjpnj:

—Et laadi rujntu xhigab sa'csi ditu gacbee xtidx Dios ni claza xcuent

xcälrnibee Dios. ³⁰Ni che guibajn rebengut, diru yälruhnaa chu, diruza bejn gudeed rexindxa'preni guchnaa. Dxejc sajcreni si'c rexangl Dios ni yu' xhaguibaa. ³¹Dxejc xcuent yälrbansac loj rebengut, ¿la gajdtu goł reguijtz ni bacuaa toMoisés che räjpn Dios xcuent rextadgoolonu: ³²“Narä nacä Xtios Abram, Xtios Isaac, nájza Xtios Jacob”, ä? Dios di gac Xtios bengut, Xtioſtis rebejn ni nabajn najcni.

³³Che biejn diajg rebejn xtidx Jesús, bidxeloduxhreni diidx ni ruluini.

Diidx ni maazru saj

(Mr. 12:28-34)

³⁴Che gucbee refarisee basäu Jesús ro' resaducee, bidojpreni, bachaagreni diidx. ³⁵Dxejc tejreni nani najn leii, rłajzni guquiilni Jesús ni'c gunabdiidxni lojni räjpnj:

³⁶—Mastr, ¿xhi diidx ni gunibee Dios sajcru lojreni caj lo leii?

³⁷Räjpn Jesús lojreni:

—Nani rnii scree: “Huinälajz Dad Xtioslu guideb lastoolu, guideb xaimlu, nájza guidebgajc xcäriejnlu.” ³⁸Diidxre ni gunibee Dios najc ni sajcru, luxh ganidni siäädni loj rextidx Dios. ³⁹Ni ro'pğa sigajcza najcni: “Huinälajz resa'lu sigajc ni sanälajzlu lagajc luj.” ⁴⁰Guio'p remandamientre nanab te guzoob bejn guiraa rediidx ni bacuaa toMoisés nájza ni bacuaa redade' nani gunii xtidx Dios.

¿Chu xi'n najc Crist?

(Mr. 12:35-37; Lc. 20:41-44)

⁴¹Lałni tre' refarisee, gunabdiidx Jesús lojreni, räjpnj:

⁴²—¿Xhi rujntu xhigab xcuent Crist? ¿Chu xi'n najcni?

Räjpreni lojni:

—Laani najc xajg toDavid.

⁴³Räjp Jesús lojreni:

—¿Xhicuent räjp David “Xtadä” lojni che basanij Sprit Dxan xten Dios lastooni? Ni'c bacuaa toDavid rediidxre:

⁴⁴Dad Dios räjp lo Xtadä,
gurej xladbeä laḷ ni gudzugä
guiraa reni rdxe'ch lojlu
ladzni'lu.

⁴⁵Palga lagajc David rnii: “Dad” lojni, ¿xho mood najcni xi'nni?

⁴⁶Dxejc rut gujcdi badzu' nicla te diidx lojni, luxh dxejluga rutru gojpd i xhi diidx niniabdiidxruren i lojni.

Rucuaquij Jesús refarisee näjza rebejn nani najn lei i

(Mr. 12:38-40; Lc. 11:37-54; 20:45-47)

23 Dxejc räjp Jesús loj reben xhidaalga näjza loj rexejnpacni:

²—Rebejn ni najn lei i näjza refarisee rajp yäl najn te gusule'reni xlei i Moisés. ³Ni'cni colguzoob guiraa rextiidxreni, na'c guntu sa' recos ni rujnreni, sa'csi laareni rniireni xhini'c guntu, dxejcti lagajc laareni direni gun ni rnibeereni guntu. ⁴Rnibeereni gun rebejn cos naganduxh ni najc si'c te cargw naduxh ni di gac guu bejn, per laareni nicla con te bicuenaareni direni gusniibni. ⁵Guiraa recos ni rujnreni, rujnrenini te fiitis rebejn. Rchaglajzreni rcaj lo cuajzsreni näjza roxhajgwreni recaje' cadro yu' tla' guijtz ni caj xtidx Dios lojni. Rustioolzaren i xi' xhajbreni. ⁶Rlajzreni ganidreni tedreni lo mex che gal te lanij; rlajzreni cuereni

lo rebancw ni suga' delant nen reguidobäz. ⁷Sigajcza rlajzreni guchagro' bejn naareni nez lo guui, guiniiza rebejn “Mastr” lojreni.

⁸Na'c gusaantu guinii rebejn “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu. ⁹Na'c guiniitu “Xtadä” loj te bejn guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa. ¹⁰Na'cza gusaantu guiniireni lojtu “Mastr” sa'csi yu' tejtis Mastr, ni'c najc Crist. ¹¹Ni yu' si'c mos lojtu ni'c najc benroru loj resa'ni. ¹²Sa'csi chutis ni rchaloni najcni benro lo sa'ni, ni'c sustuiyä lojni, chutis ni najc nadolajz loj Dios, ni'c sunäni benro lo sa'ni.

¹³iProobzatu remastr xten lei i näjzatu refarisee, najctu benguijdx! Sa'csi rudxoju jiu' rebejn loj xcäl rniibee Dios. Lagajc la'tu ditu jiu' luxh dizatu gusaan jiu' rebejn ni rlajz jiu'!

¹⁴iProobzatu remastr xten lei i näjzatu refarisee, najctu benguijdx! Sa'csi rudzucajtu roliz renanbiuud laḷsi cabedx canabduxhtu lo Dios, naatu gusgueetu bejn si'c. Sa'csi rujntu scree, siabduxh fis xten Dios yejctu.

¹⁵iProobzatu remastr xten lei i näjzatu refarisee, najctu benguijdx! Zijt rijtu lo renezyuj näjza lo nisdoo te guntu gaan guchaa mase tejtis bejn xmoodni te gan ni Dios si'c rajntuni. Luxh che ahuililajz bejnga xtiidxtu, rujntuni tio'p huält maazru te xi'n gabijl loj ni najctu.

¹⁶iProobzatu, najctu si'c lotiä'p, rlajztu guluiitu nezyuj! La'tu ni rnii palga te bejn guiniliipac

xtiidxni guzä'tni guidoro, xhet sajcdi xtiidxni. Palga guiniliipacni guzä'tni oor ni yu' nen guidoo, dxejc sii rniliini dxejc nungäj̄l guzoobni xtiidxni. ¹⁷iBen nayääl, benlotiä'p! ¿Xhini'c sajcru? ¿La oor la guidoro ni rundxan oorga? ¹⁸Rniizatu: “Palga te bejn guiniliipacni guzä'tni lo bacuug ni yu' nen guidoro, di xcuentdi xtiidxni. Luxh palga yu' chu guiniliipac guzä'tni gojn ni dzuub lo bacuug, dxejc sii rniliipacni dxejc nungäj̄l gusoobni xtiidxni.” ¹⁹iBen nayääl, ben lotiä'p! ¿Xhini'c sajcru? ¿La gojn o la bacuug nani rundxan gojnga, ä? ²⁰Nani ruzä't lo bacuug che rniliipacni, et ganaxdi lo bacuug ruzä'tni, näjza guiraa ni tre' lo bacuug ruzä'tni. ²¹Ni ruzä't guidoro che rniliipacni, et ganaxdi guidoro ruzä'tni, näjza Dios ni rbäjzza nen guidoro ruzä'tni. ²²Sigajcza ni ruzä't guibaa che rniliipacni caguzä'tzani yagxhillo xten Dios näjza lagajc Dios ni sobga' ro'c.

²³iProobzatu remastr xten leii näjzatu refarisee, najctu benguijdx! Bedzxtiil, anis näjza comin ni rajptu, rudeedtu lo Dios tej tantga yejc cade te tzuu, niluxh ditu jiu ni sajcru lo xtidx Dios, cadro caj xcuent yäl̄nabanya, yäl̄rulazlajz, näjza yäl̄rililajz. Deeza ni riäjlpac guntu lāl ni cayujnzatu steega. ²⁴iLa'tu, lotiä'p ni rlanj guluii nezyuj! Riutu rediidx ni guxii saj, niluxh rediidx ni sacduxh ditu jiuni, najctu si'c bejn ni rbää te rex lo xpła'tni dxejcru räjmni te camei.

²⁵iProobzatu remastr xten leii näjzatu refarisee, najctu benguijdx!

Rusiatu detz bas näjza pla't luxh nenni najc-dxuudx. Sigajcza la'tu riuduxhtu recostumbr, luxh lastootu guidxa yäl̄gubaa näjza yäl̄rdxe'chlajz. ²⁶Farisee ni najc lotiä'p: gudibxgaa nen bas näjza nen pla't, dxejc näj dejtzni saj naya.

²⁷iProobzatu remastr xten leii näjzatu refarisee, najctu benguijdx!, sa'csi najctu si'c rebaa ni nacchesa'c; nolbäjreni, saru rluuini, luxh nenreni guidxa dzujt xte bengut näjza bäl̄yudx. ²⁸Sigajcza najctu la'tu. Saru rujn lojtu, rchalo rebejn najctu bensa'c, niluxh lastootu guidxa yäl̄rusguee näjza yäl̄guyalajz.

²⁹iProobzatu remastr xten leii näjza refarisee, najctu benguijdx! Runcheetu xpaä redade' ni gunii xtidx Dios galoo, rusucheezatu ro' xpaä rebejn ni gujc bensa'c, ³⁰dxejc rniitu: “Paru nibajnnu nen redxej ni gubajn retoxtdagoldoonu dinu niacnäy reni bagu't redade' ni gunii xtidx Dios.” ³¹Lagajc con rediidxre rcäjptu najctu rexajg renani bagu't redade' nani gunii xtidx Dios.

³²iColguscuääz guntu sa' recos ni guläxtiej retoxtdagoldootu!

³³iLa'tu ni najc si'c bäl̄, la'tu ni najc si'c te bitiääz guidxa bäl̄nialajz! ¿Xho guntu te na'c chäätu gabijl par tejpas? ³⁴Ni'cni, guxhalä rexpenä ni guinii xtidxä, näjza bennajn, näjza mastr. Luxh yu'reni sugu'ttu sucuaatureni lo crujz; yu'zarenii siguijntu nen reguidobäz, sirinajltureni guejdx por guejdx. ³⁵Si'cza yejctu jiajb xtiejn guiraa rebenadolajz ni bagu't bejn xchejli toAbel ni gujc

nadolajz, xchejliza Zacarías, xi'n Berequías, ni bagu'ttu nen guidoro gajxh lo bacuug. ³⁶Rniliápac lojtu, dojl xten guiraa recosga siajb yejc rebejn ni tre' lo guedxliuj naj.

Jesús biin xcuent guedx Jerusalén

(Lc. 13:34-35)

³⁷Räjpza Jesús:

—iJerusalén, Jerusalén! Xpejnlu rugu't redade' ni rni xtidx Dios, rucuaazareni guij yejc rebejn ni ruxhał Dios te gusule'reni xtiidxni lojtu. iBalti huált rlazä nutie'ä la'tu si'cni rutie' guidco'c rexquidbäzni nen xhigani, per ditu nicäjb!

³⁸Colhuii xho jianxteb xquidootu cuälazrenini. ³⁹Rnixgaä lojtu, naj dirutu fii loä, dxejli che guiniitu: “Benle' Dios nani siääd xcuentni.”

Jesús räjp sibijł guidoro

(Mr. 13:1-2; Lc. 21:5-6)

24 Birii Jesús nen guidoro te asiini, dxejc gubig rexejnpacni lojni, gusloj caguluiireni reyuduxhga lojni.

²Dxejc räjp Jesús lojreni:

—¿La ruhuiitu guiraa reyu're? Rniliápac nicla tej guij di jia'n yejc sa'ni ree; guiragajc reyu're sibijł.

Cos ni guluiloj gac fis

(Mr. 13:3-23; Lc. 21:7-24; 17:22-24)

³Dxejcti huijreni yejc te dajn ni laa Oliib. Che gurej Jesús ro'c, biääd rexejnpacni lojni te xhiga'tz gunabdiidxreni lojni:

—Rlaaznu guiniilu loonu gac gac guiraa recosre. ¿Xhi seen guluiloj ameer jiäädlu näjza che ameer nitloj guedxliuj?

⁴Dxejc räjp Jesús lojreni:

—iColnatiro te rut gusgueedi la'tu! ⁵Sa'csi su' xhidajł reni jiääd, naareni: “Narä nacä Crist”, luxh susgueerene xhidajł bejn. ⁶Siejn diajgtu xcuent cadro cayajc guer, näjza xcuent cadro rlazj chu guer, na'c guidxejbtu sa'csi si'c nungäjł gac, niluxh gajd galđi nitloj guedxliuj. ⁷Sa'csi siäjs te naciön sidiłnäjni stee naciön; te yälrnibee sujn guer con stee yälrnibee, luxh su' gubijn, su' yälguijdx, su'za xuduxh xhidajł lajt. ⁸Luxh guiraa redee cuäxtiejtis retrabajwduxh ni churu chu.

⁹Dxejc gutedreni la'tu ladznaa rebendojl te gusacsireni la'tu, te gugu'tzareni la'tu, luxh guiraa rebejn sidxe'ch lojtu sa'csi sanälajztu narä. ¹⁰Nen redxejga, xhidajłreni sibälaz xcärlirilajzreni, sidxe'ch lo sa'reni, suto' sa'reni lo sa'reni. ¹¹Dxejc siricaj xhidajł bejn ni rusguee, gäbreni xcuent Dios rniireni, luxh susgueerene xhidajł bejn. ¹²Sa'csi lacti suduxh yällatsiaj lo guedxliuj, diru bejn chanälajz sa'ni. ¹³Dxejcti bejn ni chasanäj xnezyujtis Dios, ni'c sun gaan xca'ni yäl nabajł par tejpas. ¹⁴Luxh sisiule' xtidx Dios guideb lo guedxliuj te gacbee guiraa reben guedxliuj xtiidxni; dxejcru jiääd fis xten Dios.

¹⁵Cheni fiitu asobga' te benguidxduxh nen yu' ni najc dxan nen guidoro, si'cni gunixgaa toDaniel ni gunii xtidx Dios gacni, bejn ni goł dee sugacbeeni nani rolni, ¹⁶dxejc renani rbäjz lo guedx Judea, suguxunreni gucuatzlojreni nen dajn. ¹⁷Bejn ni niä'p yejc xyu'ni dxejga di galđi jiajtni te chalääni xhixtenni nen xyu'ni; ¹⁸bejn

nani cayujn dzuun lo niaa, na'c guibi'ni niclaza chaxhiini xhajbni. ¹⁹iProobza regunaa ni nuxi'n, näjza reni cagusiä' báz neñ redxejga! ²⁰Colnabduxh loj Dios xhet neñdi redxej ni cayacnalduxhdi nanab guxunditu, niclaza dxej che rusilajz bejn. ²¹Sa'csi su' trabajwduxh neñ redxejga, sa' ni gajd bejn fii dxejli ni guzobloj guedxliuj, luxh che tedni, diru guibi' chuni. ²²Luxh palga di Dios gutiu' yejc redxejga, nicla tej bejn di laa. Luxh suti' Dios yejc redxejga sa'csi rinälajzni reni aguleni.

²³Neñ redxejga palga yu' chu naa lojtu: “Colhuui, aree Crist”, o “Colhuui ani arec”, na'c chalilajztuni. ²⁴Siääd xhidajl niguii ni rusguee, gäbreni najcreni crist; sidzujnza rebejn ni rusguee ni gäb xtiidxpac Dios rusule'reni; luxh sujnreni remilagwr sujnzareni senro, parsi gusgueereni, susgueduxhreni rebejn, niluxh rlazreni gusgueezareni rebejn ni agule Dios, ni rililajz xtiidxni. ²⁵Agunixgää lojtu xhini'c gac. ²⁶Ni'cni palga naareni lojtu: “Bahuii, a crist yu' nez lo reyubijdz”, na'c chäätu; o palga naareni: “A crist suga' neñ yu're”, na'c chalilajztureni. ²⁷Sa'csi si'cni guideb xhaguibaa rien che rdinya' ladjiaa näjza ladjiätli, si'cza suhuiitu loä, Xi'n Dios ni gujc Niguii, cheni jiälsacä lo guedxliuj. ²⁸Ni najntu cadro naga' te mangut, ro'c re' regolbetz.

Cheni jiädsac Xi'n Dios ni gujc Niguii
(Mr. 13:24-37; Lc. 21:25-33; 17:26-30, 34-36)

²⁹Räjpzani:

—Cuantsi ted guiraa retrabajwduxh, sicäjy lo gubijdx,

diruza bäii gusanij, sitejbza rebajl ni yu' xhaguibaa, sinibduxhza guideb xhaguibaa. ³⁰Dxejcti suhuiireni xhaguibaa seen xten Xi'n Dios ni gujc Niguii, luxh guiraa rebejn ni rbäjz neñ guiraa reguejdx lo guedxliujre, sonduxhreni suhuiireni siääd Xi'n Niguii lo reza xhaguibaali. Siäädni con yälrnibee näjza yälrdimbichaduxh. ³¹Dxejc suxhañni rexanglni con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiin guedxliuj, guideb lo guedxliuj näjza xhaguibaa.

³²iColguisied ni ruluui yajg iigw! Che naren renaani che cabääni be'n, asiääd bäi curex, ³³sigajcza cheni fiitu cayajc guiraa recosre, sacbeetu asiädgajxh fis, rolä'li abidzujnni. ³⁴Rniliäpac lojtu, guiraa redee sajca lañ ni nabajn gaii rebejn ni suga' ree naj. ³⁵Guibaa näjza guedxliuj sinitloj, niluxh xtidxä di nitloj.

³⁶Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

³⁷Sigajcni gujc neñ redxej che gubajn toNoé, si'cza gac che jiälä Xi'n Dios ni gujc Niguii.

³⁸Neñ redxe galoo, cheni gajd nisguiduxhga jiajb, rebejn ni nabajn dxejc cayajwreni, cayä'reni, caguchnaareni, cagudeedza bejn xindxa'preni guchnaa, dxejli cheni biu' Noé neñ barcwro. ³⁹Direni niacbee xtiidxni; cheni biäädli nisguiduxh ni sanä guiraareni dxejcru gubeereni. Sigajcza gacni che jiälsacä narä Xi'n Dios ni gujc Niguii. ⁴⁰Neñ redxejga palga cayujn tio'p bejn dzuun lo niaa tejni guibee, steeni sia'n. ⁴¹Palga cayo't

tio'p gunaa xobniil, tejni guibee, steeni sia'n.

⁴²Ni'cni col̄susiṅ, sa'csi ditu gan xhi dxej jiaäd Dad xtentu.

⁴³Col̄ganchee, paru niacbee baxhwaan xten yu' cor̄ yääl niääd gubaan ni siädlan rolijzni, nisiusiṅni dxejc, dini nusaan niu'ni rolijzni te cuanni. ⁴⁴Ni'cni col̄susiṅza la'tu, sa'csi siääd Xi'n Dios ni gujc Niguui lagajc or̄ ni ditu gun xhigab jiaädni.

Xcuent te mossac näjza te mosguijdx

(Lc. 12:41-48)

⁴⁵ʔChuni'c najc mossac ni ruzoob diidx, ni basannäj xlam̄ni rebejn ni yu' rolijzni te gudeedni xhi gaureni ä? ⁴⁶Chicbaa mos ni saru cayujn xtuunni che guidzujn xlam̄ni. ⁴⁷Rniliäpac lojtu, lam̄ga susa'nni sa' mosga te fiini guiraa xhixtenni. ⁴⁸Dxejc palga mosga di gusoob xtidx xlam̄ni, gunni xhigab: “Sacladuxh guibi' xlam̄ä”, ⁴⁹dxejc guisloj cagusacsini resamosni, guislojni gaunäjni, yänäjni rebengu. ⁵⁰Dxejc sidzujn xlam̄ni dxej che dini gun xhigab jiaädni, luxh or̄ ni dini gan guidzujni. ⁵¹Dxejc siguinduxhni mosguijdxga, surilaagwnini te guidxagsa'ni sabenguijdxni, dxejc sonduxhni, chubejli reläjyni.

Xcuent tzuu gunaa

25 Räjpa Jesús:
—Pues xcälr̄nibee Dios najc si'c tzuu gunaxa'p nani cua' xcandilse'treni te huijreni te sa'.
²Gaii regunaaga nasiṅ, sgaiireni nayääl. ³Reni nayäälga sanäreni xcandilreni, niluxh direni nica'

sijl se't. ⁴Niluxh reni nasinga sanäreni sijl se't te guze'creni neṅ xcandilreni. ⁵Sa'csi bi'nga di nidzujungaj, gunaaz bacal̄ regunadxa'pga, gudiejstireni. ⁶Dxejc si'cti garol yääl, biejn te xse' ni räjp: “Bi'n asiääd, col̄chäj, col̄chachaglojni.” ⁷Guiraa regunaare huistieguxunreni, dxejc bensa'creni xcandilreni, te cuaguijreni. ⁸Dxejc guigaii regunayääl räjpreni loj reni nasiṅ: “Col̄gunidxlaa te bo'c se't gusanijnu xcandilnu, sa'csi arlajzni jiuini.” ⁹Dxejcti regunanasin̄ räjp lojreni: “Digacdini, dxejc dini gal̄ nicla par nuurnu nicla par la'tu. Col̄chäj cadro ruto'reni se't col̄chazii xse'ttu.” ¹⁰Laṅni sasii guigaii regunaa-nayäälga se't, bidzujn bi'n. Regunaa-sin̄ ni cabäjz bi'n biunäjrenini lo sa', biäuuti ro lä'. ¹¹Cheni bidzujn regunanayäälga, räjpreni: “Dad, Dad, baxhal ro lä'.” ¹²Dxejc räjpni lojreni: “Rniliäpac lojtu, dina gumbeäü.” ¹³Dxejc Jesús räjp lojreni: —Col̄susiṅza, sa'csi ditu gan nicla xhi dxej nicla xhi or̄ siääd Xi'n Dios ni gujc Niguui.

Xcuent lam̄ ni badeed meel

¹⁴Xcälr̄nibee Dios xhaguibaa najc si'c te bejn ni agojl guiri chääni zijt te biał. Gurejdxni rexmosni, badeedni meel lojreni.

¹⁵Lo tejni badeedni si'cti gaii miṅ meel, lo steeni badeedni si'cti tio'p miṅ, dxejc steeni cua' te miṅ. Loj tejgani badeedni si'cti ni rujnni xhigab sajc gunnäjreni dzuun, dxejcti biriini xpiajni. ¹⁶Ni cua' gaii miṅ meel bejn te dzunro, bejnni

gaan sgaii miḷ meel. ¹⁷Sigajcza ni cua' tio'p miḷ meel, bejnni gaan stio'p miḷ. ¹⁸Dxejcti ni cua' te miḷ meel, huicua'tzni xmeel xlamni nen te guede ni gudäänni lo yuj.

¹⁹Gudejdti balti bäii, dxejc gubi' xlam remosga, bejnni cuent loj guiraareni. ²⁰Che bidzujñ ni cua' gaii miḷ meel, bidzunnäjni sgaii miḷ meel ni bejnni gaan, räjpni loj xlamni: “Dad, baniidx guejblu gaii miḷ loä. Aree sgaii miḷ meel ni benä gaan.” ²¹Räjp xlamni lojni dxejc: “Hueenca, mos hueen najclu, rusoobzalu xtidxä. Sa'csi gujclu bensa'c con te cos bäz, naj sunidxä guinibeelu xhiroobru. Biu' loä, bibalaznäj narä.” ²²Che bidzujñni ni cua' tio'p miḷ meelga, räjpni loj xlamni: “Baniidx guejblu tio'p miḷ meel loä, aree stio'p miḷ meel ni benä gaan.” ²³Räjp xlamni lojni: “Mbaj. Mos hueen najclu rusoobzalu diidx. Sa'csi gujclu bensa'c con te cosbäz, naj sunidxä guinibeelu xhiroobru. Biu' loä, bibalaznäj narä.” ²⁴Che bidzujñ mos ni cua' te miḷ meel, räjpni lo xlamni: “Dad, ananä najclu te bejn ni di gulazlajz; rca'lu cose'ch cadre dilu nibe'c binij, rutojpszalu cadre dilu nutie'ch binij. ²⁵Ni'cni bidxebä, huicua'tzä xmeellu nen yuj. Niluxh axh aree xmeellu.” ²⁶Dxejc räjp xlamni lojni: “iMos guijdx, mos ploj! Najnlu rca'ä cose'ch cadre dina nibe'cä binij, rutopä cadre dina nutie'chä binij. ²⁷Riäjñ nisa'nlu xmelä nen te bancw te che nibi'ä nicasacä xmelä con xi'nni ni niujni gaan.” ²⁸Dxejc räjpni loj reni suga' ro'c: “Colgudzucaj te miḷ meel ni ca'ni colgudeedni loj ni rajp tzuu miḷ

meel. ²⁹Sa'csi loj ni rajp sudedäru, niluxh ni xhet rajpdi sudzucaä tudxe'n nani rajpni.” ³⁰Dxejc räjpni: “Colca' mosre ni xhet sajcdi, colguzälñi lo yälñacäy, cadre chu yälñronduxh, näjza yälñrajw reläjy bejn.”

Yälñuxhtis xten reguejdx

³¹Che jädsc Xi'n Dios ni gujc Niguii con yälñrdimbicha' xtenni, siädñäni rexangl Dios. Dxejc sibejni lo tron ni rdimbicha' xtenni te guinibeeni. ³²Dxejc sidoy nez lojni guiraa reben guedxliuj. Dxejc sibeni lojreni, silia'ni sa'reni si'c rujn te baxtoor cheni rbeni rexiil loj redxib, te rlia'reni loj sa'reni. ³³Suzujni rexiil xladbeeni dxejc redxib xladbäygwni. ³⁴Dxejc säjb rei loj reni suga' xladbeeni: “Coltaa, la'tu ni benle' Xtaä. Coljiu' lo yälñrñibee ni guc-chee cheni guzoblojli guedxliuj. ³⁵Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te benzijt, la'tu banidxlaatu cadre bia'nä. ³⁶Che xheti xhabä, la'tu baniidxni, che gucxhuä, la'tu biädhuiitu narä, che guyu'ä nen latzguiib, biädhuiitu narä.” ³⁷Dxejc sinii reni suga' xladbeeni, säjbreni: “Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojllu, baniidxnu xhi gu'lu? ³⁸¿Guc bahuiinu najclu si'c te benzijt, baniidxnu cadre bianlaalu, o biäädx xhajblu, baniidxnu xhi gojtu? ³⁹O ¿guc bahuiinu cayacxhuulu, o yu'lu nen latzguiib, biophuiinu lojlu?” ⁴⁰Dxejc reiiga säjb lojreni: “Rniliäpac lojtu, xhitis xhi bejntu loj te rexpenä ni rñii

xtidxä mase proobreni, lagajc loä bejntu recosga.”

⁴¹Dxejc säjpszani loj reni suga' ladbäjgwni: “Colguibicaj loä, benguijdx, colchäj lo balduxh ni cayejc par tejpas ni cayejc par bendxab ni rnibee näjza rexpəndxabni. ⁴²Sa'csi gulanä, luxh ditu nuniidx xhi niauä; biolä, per ditu nuniidx xhi niä'ä; ⁴³cuanzaä si'c te benzijt, luxh ditu nunidxlaa cadro nia'nä, biädxza xhabä, niluxh ditu nuniidx xhi niacwä; gucxhuä, guyu'äza nen latzguiib, niluxh ditu niädhuui loä.” ⁴⁴Dxejc laareni säjbreni: “Dad, çguc bihuiinu calaanlu, o cayojllu, o canzajlu si'c te benzijt, o cayäädx xhajblu, o cayacxhuulu, o yu'lu nen latzguiib, luxh dinu niacnäjlu?” ⁴⁵Dxejc säjb reiiga lojreni: “Rniliápac lojtu, loj xhitis ni ditu niacnäj rebejn ni rililajz xtidxä, mase proobreni naräni ditu niacnäj.” ⁴⁶Dxejcti sij rebejnre lo yälrusacsí par tejpas, per rebejn ni nadolajz, ni agule Dios, sijreni lo xcälnabajn Dios par tejpas.

Bejnreni xhigab xho guiniaazreni

Jesús

(Mr. 14:1-2; Lc. 22:1-2; Jn.11 :45-53)

26 Che gulujx gunii Jesús rediidxre, räjpni loj rexpəjpacni:

²—Anajntu stio'p dxejtis cayäädx gac lanij ni laa pascw. Luxh suteedreni narä, Xi'n Niguui ladznaa reni gucaa narä lo cruzj.

³Dxejc bidojp rebejn ni rnibee rebixhojz, näjza remastr xten leii, näjza rebəngool lo rexpəjn Israel. Lo xle' Caifás, ni rnibee

loj rebixhojz, bidojpreni. ⁴Ro'c bachaagreni diidx xho guiniaazreni Jesús con yälrusguee, te ju'trenini.

⁵Luxh räjpreni lo sa'reni:

—Na'c jiennuni nen redxe lanij, te di gun rebejn bieiduxh.

Te gunaa ni biädnä perfum

(Mr. 14:3-9; Jn.12 :1-8)

⁶Che yu' Jesús guedx Betania, rolizj Simón te bejn ni basiajnci che rał tiejxhni, ⁷ro'c gubig te gunaa lojni, ca'ni te vasguij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús. ⁸Che bahuii rexpəjpacni xhi cayujnni, bidxe'chreni, gusloj cayäjpreni:

—çXhicuent casälxlia'ni perfumga? ⁹Perfumre niajc nido'ni, nirii xhidajl meel lojni te niacnäjni rebenproob.

¹⁰Biejn diajg Jesús xhi caniireni, dxejc räjpni lojreni:

—çXhicuent cadxe'chnäjtu gunaare? Ni te coshueen najc dee nani bejnni loä. ¹¹Ni guirasi dxej su' rebejn ni xhet rajpdi lojtu, peta narä guxii dxej su'ä lojtu. ¹²Nani bejn gunaare che bachajni perfumre guideb lagaa tiexhä, najcni par guzucheeni narä te guiga'tzä. ¹³Rniliápac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäj gunaare narä, te guinaj lajzreni gunaare.

Judas bato' Jesús

(Mr. 14:10-11; Lc. 22:3-6)

¹⁴Dxejc lo retzubitio'p rexpəpac Jesús birii tej ni laa Judas Iscariote, huininäjni rebejn ni rnibee loj rebixhojz, ¹⁵räjpni:

—¿Lac guniidxtu loä te gutedä Jesús ladznaatu?

Dxejc badeedreni galbitzuo melpla't lojni. ¹⁶Dxjecli caguiil Judas xho gutedni Jesús lojreni.

Lult xchej xten Jesús

(Mr. 14:12-25; Lc. 22:7-23; Jn.13 :21-30; 1Co. 11:23-26)

¹⁷Primer dxej lanij, dxej ni rajwreni yätxtiil ni di saguij, gubig rexpejn̄pacni loj Jesús, räjpreni lojni:

—¿Caro rlajzlu chozucheenu te gaulu xchej xten lanipascw?

¹⁸Dxejc räjpni lojreni:

—Colchäj lo guejdx rolizj te dade', colye'tz lojni: “Si'c naj Dad mastr: Asiäddzungajxh xorni, ni'cni rolizjlu gaunäjni rexpejn̄pacni xchej lanipascw.”

¹⁹Bejnti rexpejn̄pacni si'cni gunibee Jesús gac, bazucheereni xchej xten pascw.

²⁰Che biu' guxhijñ, sobga' Jesús lo mex con retzubitio'p xpejn̄pacni.

²¹Laḷ ni cayajwreni räjpni lojreni:

—Rniliä lojtu, yu' tejtü ni guto' narä.

²²Dxejc guc-huinduxh lajzreni, räjpreni lojni:

—Dad, ¿andi naräni?

²³Dxejcti räjp Jesús lojreni:

—Ni gaunäj narä nen tejtis pla't, laa ni'cni guto' narä. ²⁴Xi'n Dios ni gujc Niguii sajc si'ctis ni caj loj guijtzt xten Dios, per gunatiro bejn̄ ni guto'ni. Huenru na'c niajl bejnga.

²⁵Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

²⁶Laḷ ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejn̄pacni, räjpni: —Coltajw; dee najc si'c tiexhä.

²⁷Dxejc guläsni te vas, badeedni xquixtios lo Dios, dxejcti badeednini loj rexpejn̄pacni, räjpni: —Guiraatu colyä', ²⁸sa'csi dee najc si'c xtienä; ni'cni riannäá la'tu te didxcoob, luxh rejnre sixe'ni xcuent xhidajl bejn̄ te gušlaanireni nen̄ dojl. ²⁹Luxh rniä lojtu, diruna yä'ä nis nani rii yejc uub, dxejl̄ni yänäsacätu lo xcäl̄rnibee Dios, Xtaḷä.

Räjp Jesús sibälaz Pedroni

(Mr. 14:26-31; Lc. 22:31-34; Jn.13 :36-38)

³⁰Che gulujx bil̄reni te dij, biriireni, sääreni lo dajn ni laa Oliib. ³¹Dxejc räjp Jesús lojreni: —Guiragajctu sactio'p lajztu xcuentä, susa'ntu narä naguxhijñ sa'csi lo reguijtz xten Dios caj scree: “Sugu'treni baxtoor dxejc sire'ch rexiil.” ³²Dxejc cheni guibansacä lo rebengut, ganidä cha'ä región Galilee, dxejcti jiadnajltu narä.

³³Dxejc räjp Pedr loj Jesús:

—Masque guiraareni cuälazlu, narä dina cuälazälu.

³⁴Dxejc räjp Jesús lojni:

—Rniliäpac lojlu, lagajc guxhijñre, nicla gajd guidgäi cuedxa', luxh luj alagulälazlu narä choñ huält.

³⁵Räjp Pedr loj Jesús:

—Masque riäj̄l guetnäälü, dina cuälazälu.

Dxejc sigajcza gunii guiraa rexpejn̄pacni.

**Gurejdx-gunab Jesús loj Dios nen
Getsemaní**

(Mr. 14:32-42; Lc. 22:39-46)

³⁶Dxejcti bidzujñ Jesús nájza
rexpejn̄pacni te lajt ni laa
Getsemaní, rájpn̄i lojreni:
—Colcuésijc ree laj̄ ni cuedx-
guiniabä lo Dios.

³⁷Dxejc sanäni Pedr nájza
guir̄o'p xi'n Zebedeo, luxh gusloj
cayachuinduxh lajzni, cayu'zani
yärsiaduxh. ³⁸Dxejc rájpn̄i lojreni:
—Te yälhuinduxh yu' lastoä;
astooceanu agoj̄l guetä. Coljia'n ree,
coltie'ch bacal̄ lojtu.

³⁹Dxejc guzaj Jesús stla',
guzxhijbni dxejc basajb lojni lo
yujli, gusloj cabedx-canabni lo Dios:
—Xtadä, palga sajcn̄i, basanlaa
tedcaj trabajwduxhre ni tedä, te
na'c tedäni. Xhet si'cdi ni rlazä
gacni; si'cpacni rlazzlu gac, si'c
gacni.

⁴⁰Dxejcti gubi'ni cadro suga'
guichon̄ rexpejn̄pacni, che
bidzujñni ro'c, nagayejsreni. Rájpn̄i
lo Pedr:

—¿La di niajcdi nutie'chtu bacal̄
lojtu nicla tebor, ä? ⁴¹Colguibajñ,
colnab lo Dios te na'c jiajbtu nen̄
doj̄l. Guliipacni, lastootu nadip,
niluxh tiejxhtu rdxajg.

⁴²Gubi' Jesús stehuält, gurejdx-
gunabni loj Dios, rájpn̄i:
—Xtadä, palga digacdi tedcaj tedä
trabajwre, sugacni si'ctis ni rlazzlu
gacni.

⁴³Dxejc gubisacni, bidxäl̄ni
rexpejn̄pacni, nagayejsreni
sa'csi yuduxh bacal̄ lojreni.

⁴⁴Basaannireni, dxejc säsacni,
gurejdx-gunabni lo Dios ni riojn̄

huält, gunisacni lagajc rediidx ni
guniini galoo. ⁴⁵Dxejc huijni cadro
suga' rexpejn̄pacni, rájpn̄i lojreni:
—iNaj sii, colgüejs, colgusilajz!
Abidzujñ or ni gutedreni Xi'n Dios
ni gujc Niguii ladznaa rebendoj̄l.
⁴⁶iColchastie, colcho', colhuii!
Asiääd nani guted narä ladznaa
rebendoj̄l.

Gunaazreni Jesús sanärenini pres

(Mr. 14:43-50; Lc. 22:47-53; Jn.18 :2-11)

⁴⁷Lañni canii Jesús bidzujñ Judas,
nani najc tej retzubitio'p xpejn̄pacni.
Bidzunnäjni xhidalduxh bejn̄ ni
ca' espaad, ni ca' garo't, najcreni
xpejn̄ reni rnibee rebixhojz, nájza
xpejn̄ rebengool xten rexpejn̄
Israel. ⁴⁸Judas, ni bato' Jesús,
abadedxgaani te seen lojreni rájpn̄i:
—Nani guchagro'ä, ni'c najc laani;
colguiniazgajcni.

⁴⁹Dxejc gubigni loj Jesús, rájpn̄i:
—Xchan, Dad Mastr.

Dxejc bachagro'ni lojni. ⁵⁰Jesús
räjp lojni:

—Xamigwä, ¿xhi siääd̄lu?

Dxejcti gubig rebejn̄ lojni,
gunaazrenini.

⁵¹Per tej reni suganäj Jesús
gulääni te spaad, batiu'ni diajg
te mos xten rebixhojz ni rnibee.

⁵²Dxejc rájp Jesús lojni:

—Guluchee xspaadlu loj
xse'ni. Guiraa reni rucuanäj con
spaad, lagajc con spaad guetreni.

⁵³¿La ditu gan sajca guiniabä
lo Xtadä, luxh laani suxhalgajcni
gayon̄bitzubitio'p miñ xanglni
gacnäj narä? ⁵⁴Dxejc xho gac soob
diidx ni caj lo reguijtz xten Dios
ni rnixgaa riäj̄l gac guiraa recosre
lagajc si'cni cayajcni.

⁵⁵Dxejc räjp Jesús loj rebejn xhidajlga:

—¿La siädnätu spaad näjza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiätu nen guidoro, luxh ditu niniaaz narä.

⁵⁶Niluxh guiraa recosre cayajc te soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexejnpacni basanxtebreni Jesús, baxunreni lojni.

Jesús nez loj rebixhojz

(Mr. 14:53-65; Lc. 22:54-55, 63-71; Jn.18 :12-14, 19-24)

⁵⁷Reni gunaaz Jesús huinänini nez loj Caifás, ni rnibee loj guiraa rebixhojz, bidzujnreni cadro abidojg guiraa rebejn nani ruluii leii näjza rebengool xten xpejn Israel. ⁵⁸Dxejcti zit-zijt biädnajl Pedr rebejnnga, bidzujnlireni lole' xten bixhojz ni rnibeega. Ro'c biu'ni, gurenäjni rexquixhajn bixhojzga te ro'c bia'nni te fiini xhini'c gac.

⁵⁹Reni rnibee rebixhojz, näjza rebengool con guiraa reni rajp yälrnibee gusloj caguiilreni xhitis te diidx, masque xhet guliidini, te gucuaquijreni Jesús te guinibeereni guetni. ⁶⁰Niluxh xhet bidxäldireni, luxh gubig xhidajl bejn, guniireni xhidajl didx-xhii xcuent Jesús. Dxejcti bidzujn tio'p dade' ni gunii didx-xhii, ⁶¹räjpreni:

—Niguiire gunii scree: “Narä sajc gutzulä guidoro xten Dios, sajca gunchesacäni nen chon dxej.”

⁶²Dxejc gusulii dade' ni rnibee lo rebixhojz, räjpni loj Jesús:

—¿Xhicient xhet rniidilu, ä? ¿Xhini'c canii reniguiire cagucuaquijreni luj?

⁶³Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajn. Gunii don, ¿la luj najc Crist, Xi'n Dios?

⁶⁴Jesús räjp lojni:

—Lagajc guejblu naj si'c. Niluxh empac rniä lojtu, desde najli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jlälä lo reza ni tre' xhaguibaa.

⁶⁵Dxejc batiäjs dade' ni rnibee loj rebixhojz xhajnbi, räjpni:

—iNiguiire aguniyajni Dios con xtiidxni! ¿Xhiru testiigw rquiinnu? Abiejn diajgtu didxyaj xtenni.

⁶⁶¿Xhi rchalotu?

Dxejc basejcreni diidx:

—iAbiga'ni! Riäj] guetni.

⁶⁷Dxejc batiobxhejnreni lojni, gudijnrenini. Yu'reni gudajp lojni, ⁶⁸räjpreni lojni:

—Palga najclu Crist, gunii chuni'c gudijnlu.

Di Pedr nicäjp numbeeni Jesús

(Mr. 14:66-72; Lc. 22:56-62; Jn.18 :15-18, 25-27)

⁶⁹La] ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanäjlu Jesús, ni siääd nez Galilee.

⁷⁰Per di Pedr nicäjp nez loj guiraareni, räjpni:

—Dina ganä xhini'c caniilu löä.

⁷¹Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siääd Nazare't.

⁷²Dxejc basguee Pedr stehuält, räjpni:

—Rniliápac dina gumbeä dade'ga.

⁷³Che gojl sterate', gubig reni suga' ro'c loj Pedr, räjpreni:

—Guliini; näjza luj najclu te xpejn; huenliisi riejn diidx ni rniilu.

⁷⁴Dxejcti guslojni cagueni, caguzä'tni Dios, räjpni:

—Dipacna gumbeä niguiiga.

Guniitisni si'c, chela guredxa' te guidgäi. ⁷⁵Dxejcrü banalajz Pedr rediidx ni gunii Jesús lojni che räjpni: “Che gajdli guidgäi cuedxa', chon huält alaguniilu dilu gumbee narä.” Dxejc birii Pedr ro'c, gusloj cayonduxhni.

Batedreni Jesús loj Pila't

(Mr. 15:1; Lc. 23:1-2; Jn.18 :28-32)

27 Che bianij lo guedxliuj, guiraa reni najc rebixhojz ni rnibee näjza rebengool xten rexpejn Israel bia'nreni diidx xho gunreni ju'treni Jesús. ²Baliibrenini, guläärenini ro'c, huisa'nrenini loj Poncio Pila't, ni najc gubernadoor.

Xho gujt Judas

³Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzuu meel pla't loj rebixhojz ni rnibee näjza loj rebengool. ⁴Räjpni:

—Banitduxhä lo Dios sa'csi bato'ä te bejn ni xhet bejndi.

Dxejc räjpreni lojni:

—Xhixh gunnu. Ni'c najc xcuentlu; lujti najn.

⁵Dxejc bacuaa Judas meelga lo yuj nen guidoro, biriitini ro'c. Sas huijni, baliibni te duu guejn, gojlni lo te yajg, ro'cti gujtni.

⁶Rebixhojz ni rnibee batojpreni meelga, räjpreni:

—Di gac di guizälnu meelre nen caj gojn sa'csi najcni xcuent xtiejn te bejn.

⁷Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzijt. ⁸Ni'cni najli rniireni yujga: “Yurejn”. ⁹Si'c gusojb diidx ni gunii Jeremías, dade' ni gunii xtidx Dios galoo che räjpni: “Cua'reni galbitzuu melpla'tga si'cti basoob rexi'n Israel sajc bejn. ¹⁰Con meelga guziireni yuj lo bejn ni runchee guejs, sigacni gunibee xtadnu Dios.”

Gusuj Jesús nez loj Pila't

(Mr. 15:2-5; Lc. 23:3-5; Jn.18 :33-38)

¹¹Bidzunnäjreni Jesús loj Pila't ni najc gubernadoor. Dxejc gunabdiidxni, räjpni lo Jesús: —¿La luj najc reii xten rexpejn Israel, ä?

Räjp Jesús lojni:

—Najcni si'cni najlu.

¹²Lałni cabe'c rebixhojz ni rnibee näjza rebengool rexquej Jesús xhetliidi guniidi Jesús. ¹³Dxejc räjp Pila't lojni:

—¿La di diajglu jiejn guiraa rediidx ni caniireni cagucuaquijreni luj, ä?

¹⁴Per xhetliidi diidxdi basejc Jesús, nicla xcuent tejsi diidx ni

bacuaquijrenini. Ni'cni bidxeloduxh gubernadoorga.

Gunibeereni guet Jesús

(Mr. 15:6-20; Lc. 23:13-25; Jn.18 :38–19:16)

¹⁵Neñ redxe lanij räjpreni costumbr ruslaa Pila't tej beñ ni cue rebeñ loj reni yu' neñ latzguuib.

¹⁶Neñ redxejga guyu' te beñ ni sääb xtiidxni ni laa Barrabás.

¹⁷Cheni tre' guiraareni ro'c, gunabdiidx Pila't lojreni:

—¿Chuni'c rlanjtu guslaá, la suslaä Barrabás o Jesús ni laa Crist?

¹⁸Sa'csi najn Pila't rdxe'chlajzreni lo Jesús, ni'c bateedrenini lojni.

¹⁹Lañ ni sobga' Pila't lo yajgxhiil cadro rujnni yälguxhtis, baxhal cháälni diidx lojni, räjpni:

—Xhet gundilu dade'ga ni xhet bejndi, sa'csi nuchej nadxuudx gunixcalä xcentni.

²⁰Niluxh rebixhojz ni rnibee näjza rebengool baquuilreni rebeñ te gunabreni laa Barrabás, näjza te guet Jesús. ²¹Dxejcti gunii gubernadoor stehuält, räjpni lojreni:

—¿Chu tej loj guiro'preni rlanjtu guslaá?

Dxejc guredxa'reni, räjpreni:

—iBarrabás!

²²Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo cruzj.

²³Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—iBacuaani lo cruzj!

²⁴Che bahuui Pila't xlia'si caniini, alga gusloj rebeñ cayujn te

bieiduxh, cua'ni nis, gudiibni naani nez lojreni, räjpni:

—Dina xcaquiä xtiejn bejnre ni xhet bejndi. La'tu colhuii xho guntu. Xcuenttitu najcni.

²⁵Dxejc guiraa rebeñga badzu' diidxre, räjpreni:

—Suxcaquijnu xtiejnni, nuurnu näjza rexi'nnu.

²⁶Dxejc baslaa Pila't Barrabás, dxejc gunibeeni gudijnreni Jesús dxejc bateednini ladznäa rebeñ te gucuaarenini lo cruzj.

²⁷Dxejc huinä resoldaad xten gubernadoor Jesús lo pretoor, yu' cadro rujnni yälguxhtis, ro'c batojpreni guiraa resa'reni. ²⁸Dxejc gulääreni xhajnbi, bashuajcwrenini te lad xniaa. ²⁹Dxejc bencheereni te coron guejch, basälrenini yejcnini, basälreni te yabixijl naani, xladbeeni, sas bazuxhijbreni nez lojni guslogajc caguxhisnäjrenini, räjpreni:

—iCollä'p xpala'n reii xten rexpejn Israel!

³⁰Sas batiobxhejnreni lojni, cua'reni yabixijlga te ni'c batiäjlni yejcnini. ³¹Che gulujx baxhiznäjrenini, gulääreni lad xniaa ni najcwni. Dxejc bashuacwsacrenini lagajc xhajnbi, sanätirenini te xcajni lo cruzj.

Bacuaareni Jesús lo cruzj

(Mr. 15:21-32; Lc. 23:26-43; Jn.19 :17-27)

³²Cheni sariireni, bidxaagreni te beñ ni siääd guedx Cirene, laani Simón, basguureni dade'ga xcruzj Jesús.

³³Che bidzujnreni te lajt ni laa Gólgota, nani säloj: dan Calabeer, ³⁴ro'c badeedreni bin nu'ch cuanlaa

te gu' Jesús. Te bocbäztisni gu'ni, dxejc naaddiruni niä'nini.

³⁵Cheni abacuaareni Jesús lo crujz, gudzujt resoldaad yejc xhajbni, te si'c gudisreni xhajb Jesús cua'reni, te si'c guzobj diidx xten te dade' ni gunii xtidx Dios. ³⁶Gurejtireni ro'c, gusloj canäjreni Jesús. ³⁷Yejc crujzga bacuaareni te guijtz con letro. Lo guijtzga rcaj xhini'c najc xtojł nani cayejt. Lo guijtzga caj: “Dee najc Jesús reii xten rexpejn Israel.”

³⁸Näjza tio'p gubaan cuaj lo stio'p crujz con laani. Tejni cuaj lo te crujz xladbee Jesús, steeni cuaj xladbäjgwni. ³⁹Luxh renani sadejd nejzga guniyajreni Jesús, cagusniibreni yejcreni, ⁴⁰cayäjpreni lojni:

—iJa'ä! Luj ni nutiexhlu guidoo, luxh chontis dxej niunchesacluni; palga gulii najclu Xi'n Dios, biäjł loj crujzga.

⁴¹Näjza rebixhojz ni rnibee, naj remastr xten leii, baxhiznäjrenini räjpreni loj sa'reni:

⁴²—Basłaani xhidajł bejn, xhoxh di gacdi gusłaani lagajc laani. Palga najcni reii xten rexpejn Israel, sujiäjłtni lo crujz nanaj te chalilajznu xtiidxni. ⁴³Huinälajzni Dios, naj sugusłaa Diosni palga sanälajz Diosni; ni najni: “Narä nacä Xi'n Dios.”

⁴⁴Regubaan ni caj lo recrujz sigajcza guniyajreni Jesús.

Che gujt Jesús

(Mr. 15:33-41; Lc. 23:44-49; Jn.19 :28-30)

⁴⁵Dxejcti bicäjy guideb guedxliuj läidxej hasta rcachon gudxej.

⁴⁶Si'cti rcachon gudxej guredxa' Jesús dipduxh, räjpnı:

—Elı, Elı, çlama sabacatani? —dee säloj: Xtiozä, Xtiozä, çxhicuent gulälazlu narä?

⁴⁷Yu' reni suga' ro'c, che biejn diajgreni räjpnı si'c, räjprenı:

—Cabejdx Dade're Elıas.

⁴⁸Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binagrğa ro' Jesús.

⁴⁹Dxejc reni tre' ro'c räjpnı:

—Basaan; guidon la siäd Elıas te gusłaanini.

⁵⁰Dxejc guredxaduxh Jesús stehuält, basłaatini xpırtıni. ⁵¹Lagajc orga biräsya' ladro ni zääb nen guidoro, gujcnı tio'p la' jiaali hasta lo yuj. Gujc te xuro, sas gusuj bej reguiro. ⁵²Dxejc gubicaj reguij ni niäuu ro' rebaa, luxh gubansac xhidajł xpejn Dios ni gujt aguc xchej. ⁵³Dxejcti, che huäjs Jesús lo rebengut, biriireni nen baa, baluilojreni lo xhidajł bejn ni rbäjz guedx Jerusalén.

⁵⁴Dxejc capitán xten resoldaad näjza resoldaad ni canäj Jesús, che bahuiireni xuduxh näjza guiraa recos ni gujc ro'c, bidxejbreni, räjprenı:

—Guliipacni najc dade're Xi'n Dios.

⁵⁵Zıjtru tre' xhidajł regunaa ni biädnał Jesús che biriini nez Galilee te bahuiirenini. Cadxelojtisreni guiraa ni cayajc ro'c. ⁵⁶Tej regunaaga najc Marii Magdalen, steeni najc Marii xnan Jacoob näjza José, steeni najc xnan rexi'n Zebedeo.

Huica'tzreni Jesús

(Mr. 15:42-47; Lc. 23:50-56; Jn.19 :38-42)

⁵⁷Che gojł gudxej, bidzujł te benrajpnı ni siäd guedx Arimatea; laani José. Näjza dade'ga najc tej reni birinał Jesús. ⁵⁸Huij dade'ga

loj Pila't, gunabni tiejxh Jesús. Dxejc gunibee Pila't gudeedrenini lojni. ⁵⁹Cua'ti José tiejxh Jesús, batejbnini nen te bariadya, ⁶⁰huitixhnini nen xpaapacni. Nacoob baaga, gojnni bidäänni cuä' te guilaj. Dxejc basäuni ro' baaga con guiro, dxejcti siini. ⁶¹Sobga'za Marii Magdalen nájza stee Marii nez loj baa, bahuiireni biga'tzni.

**Xhi räjp resoldaad ni
cuanäj xpaä Jesús**

⁶²Che gudejd dxej xten ni gulec-cheereni lanij, bara yääl bidojp rebixhojz ni rnibee nájza rebejn ni laa refarisee, bidzujnreni loj Pila't, ⁶³räjpreni lojni:

—Dad, banaj laaznu xhi räjp bejn ni rusgueere. Räjpreni: “Che ted chon dxej sibansacni loj rebengut.”

⁶⁴Ni'c baxha chu chacanäj ro' baaga dxejli guisa' chon dxej, te di chää rexpejn pacni chaläärenini tiejxhni, dxejc gäbreni loj rebejn: “Agubansacni loj rebengut.” Yälrusgueega sajc cuentroru loj ni gujc ganid.

⁶⁵Räjp Pila't lojreni:

—La'tu rajptu te cuaa soldaad; colchäj, basäutzut'z ro' baaga si'ctis ni sajc guntu.

⁶⁶Dxejcti sääreni, basäutzut'zreni ro' baaga; con resoldaad bacuaareni te seii lojni te rut faldini. Dxejc basa'nreni resoldaad canäj ro'c.

Sibansac Jesús loj rebengut

(Mr. 16:1-8; Lc. 24:1-12; Jn. 20 :1-10)

28 Che gudejd sabd, dxej ni ruzilajz rexpejn Israel, che gusloj cayänij lo guedxliuj te jiu' stee xmaan, bidzujn Marii

Magdalen nájza stee Mariiga, siädhuiireni lo baa. ²Luxh alagujc te xuro ni basniib lo yuj, sa'csi biääd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga. ³Rdimbichaduxhni si'c najc che rdinya', luxh xhajbni najc nolbäj si'c najc yejc ni riajib. ⁴Che bahuii resoldaadni, bichebduxhreni, sädiidxreni, gujcreni si'c bengut. ⁵Dxejc räjp guixhajg xte Diosga loj regunaa:

—Na'c guidxejbtu. Ananä caguiiltu Jesús ni cuaj lo cruzj.

⁶Rutini ree sa'csi agubansacni sigajc ni najni. Coltahuii cadro gojtnei. ⁷Colguxun, colchaye'tz loj rexpejn pacni agubansacni loj rebengut. Luxh naj agunijdni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

⁸Dxejcti rusquenduxh regunaaga, biriireni ro' baaga. Cadxejbreni, cabalazduxhzareni sanäreni diidx loj rexpejn pac Jesús. ⁹Chela bidxaagreni Jesús lo nejz, räjpreni: “Xchan”, lojreni. Sas gubigreni loj Jesús, bazuxhijbreni, gudääzreni guenni'ni, gojnrenini. ¹⁰Dxejc räjpreni lojreni:

—Na'c guidxejbtu. Colchanä diidx loj rexpenä, chääreni región Galilee, sa'csi ro'c suhuiireni löä.

Rediidx ni räjp resoldaad

¹¹La'ni sää regunaaga, bidzujn gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga. ¹²Dxejc rebixhojz ni rnibee bachagsa'zareni

con rebengool te bia'nreni diidx gudeedreni xhiroob meel lo resoldaad, ¹³räjpreni lojreni:

—Scree colye'tz lo rebejn: “Laḷ ni nagayesnu, canäjnu ro' baa, biääd rexpejnḡpac Jesús guläxhiga'tzreni tiejxhni.” ¹⁴Palga jientiajg gubernadoor dee, siohuinuni te di yu' xhi gunni la'tu.

¹⁵Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpen Israel. Najli canisijcreni si'c.

Baxhaḷ Jesús rexpejnḡpacni

(Mr. 16:14-18; Lc. 24:36-49; Jn.20 :19-23)

¹⁶Dxejcti sää retzubiteeb xpejnḡpac Jesús lo región Galilee,

lo dajn cadro bia'n Jesús diidx guidxaagnireni. ¹⁷Cheni bahuiireni loj Jesús, bazuxhijbreni, gojnrenini, per yu' reni ractio'p lajzreni. ¹⁸Dxejc gubig Jesús lojreni, guninäjnireni, räjpni:

—Arapä guiraa yälrnibee xhaguibaa näjza lo guedxliuj.

¹⁹Ni'cni, colchäj, guideb guedxliuj colchagajn bejn gac xpenä, colgutiobnisreni, con laj Gueb Dios, näj laj Xi'n Dios näjza laj Sprit Dxaan xten Dios. ²⁰Colguluiireni gusoobreni guiraa rediidx ni guinibeä. Luxh lagajc narä suganää la'tu guiraa redxej, dxejli che nitloj guedxliuj. Sugacni si'c.

Diidx Xcuent Jesucrist Nani Bacuaa San Marcw

Baluu Juan ni rutiobnis

(Mt. 3:1-12; Lc. 3:1-9, 15-17; Jn.1 :19-28)

1 Scree gusloj diidx xcuent Jesucrist, Xi'n Dios. ²Si'cni bacuaa toIsaías, ni gunii xtidx Dios, che räjp Dios:

Bahuii gan, guxha_lä ni chanä xtidxä,
ganidni chääni lojlu te guzucheeni xnezyujlu.

³Riejn xse' ni rbedxa' nez loj reyubijdz:

“Colyunsac xnezyuj Dad, colslui rexnezyulajzni.”

⁴Biricaj Juan ni rutiobnis nez loj reyubijdzga. Rägajcni nanabpac gusiechlajzreni, tiobnisgajczeni, te jia xtoj_lreni. ⁵Riädcuadiajg xhidajl reni rbäjz Judea, näjza reni rbäjz guedx Jerusalén. Dxejcti cheni ruxhobdoj_lreni lo Dios, rustiobnis Juanreni nen_l gueu Jordán.

⁶Xhajt Juan nacchee con guichlajd cameii, xsindoorni nacchee con guijd, niluxh gudajwni guxha't näjza dzunbäserguijxh.

⁷Caguluiini rebejn, rägajcni:

—Detzä siääd tej nani sajcru loä, nani nicla di nungäj_l surloä, cuää xcura'chni. ⁸Narä abatiobnisä la'tu

con nis, biädla laani guxha_lni Sprit Dxa_n xten Dios te cuääzni nen_l lastootu. Si'c gustiobnis nani jiiäd detzä la'tu.

Batiobnis Juan Jesús

(Mt. 3:13-17; Lc. 3:21-22)

⁹Dxejc, nen_l redxejga, birii Jesús guedx Nasare't ni yu' Galilee. Dxejcru batiobnis Juan Jesús nen_l gueu Jordán. ¹⁰Che birii Jesús nen_l nis, bahuiini bixal guibaa. siädyajt Sprit Dxa_n xten Dios yejcti si'c te palom. ¹¹Dxejcti guibaali biejn xse' te ni räjp: —Luj najclu xi'nä ni sanälazä; rbanälazduxhälu.

Bateed bendxab prueb Jesús

(Mt. 4:1-11; Lc. 4:1-13)

¹²Sas baxha_l Sprit Dxa_n xten Dios Jesús lo reyubijdz. ¹³Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxab nani rnibee, nani laa Satanás, xho niujnni te nusoo Jesús xtiidxni. Dxejcru biääd reangl xten Dios, biädhuiireneni.

Gusloj Jesús xtzuumni

(Mt. 4:12-17; Lc. 4:14-15)

¹⁴Basälreni Juan nen_l latzguiib. Dxejcti huij Jesús nez Galilee,

huiluini xtidx Dios. ¹⁵Dxejc räjp Jesús:

—Abidzujñ dxej, luxh yälñibee xten Dios abidzujñ gajxh. Colšiejch lajztu, colchalilajz xtidx Dios.

Gurejdx Jesús tajp bejn ni rniaaz bäjl

(Mt. 4:18-22; Lc. 5:1-11)

¹⁶Sasajti Jesús nez ro' nis xten Galilee, che bahuiini lo Simón näjza loj Andrés bejtz Simón. Cazälreni xquijxhreni lo nis, sa'csi rniaazreni bäjl. ¹⁷Dxejc räjp Jesús lojreni:

—Coltanajl narä, te gunä cueddxtu bejn lacuaa ni guiniaaztu bäjl.

¹⁸Lagajc dxejc basa'nreni rexquijxhreni, sanätirenini.

¹⁹Dxejc gusaj Jesús sche'n, sas bahuiini loj Jacobo näj Juan, rexi'n Zebedeo. Cayunsa'creni xquijxhreni nen xcanuureni. ²⁰Guredxgajcni guiro'preni, dxejcti laareni basa'nreni xtadreni Zebedeo nen canuu, näjza rexmosni, sanätireni Jesús.

Te bejn nani guyu' bendxab nen lastooni

(Lc. 4:31-37)

²¹Bidzujñtiren guedx Capernaum. Dxejcru sabd, dxej ni rusilajz rexpen Israel, biu' Jesús nen guidobäz xten rexpen Israel. Dxejcti baluii Jesús rebejn ni tre' ro'c. ²²Bidxelojni rebejn xtiidxni, sa'csi caguluiinireni si'cpac te ni rnibee, xhet si'cdi remastr xten leiidi. ²³Nen xquidobäzreni yu' te bejn yu' te bendxab nen lastooni. Bendxabga guredxa', räjpni:

²⁴—Jesús, ni siäd Nazare't, ÷xhicuent riu'lu loonu? ÷La siädgunitlojlu nuunu? Narä

numbeälu, luxh nanä luj najclu bendxan ni siäd lo Dios.

²⁵Dxejcti guididxa' Jesús lo bendxabga, räjpni lojni: —Basäuu ro'lu, birii nen lastoo niguiire.

²⁶Sas bendxabga batienguij niguiiga, luxh cabedxa'ni biriini nen lastoo niguiiga. ²⁷Bidxejcti guiraareni, canabdiidx loj sa'reni: —÷Xhi dee? ÷Xhi dzuun nacoobre ruluiini? Niguiire rnibeeni näj rebendxab, luxh ruzoobreni xtiidxni.

²⁸Di niaclaa gucbee rebejn guideb nez Galilee xhi rujn Jesús.

Basiajc Jesús xnan suegr Pedr

(Mt. 8:14-15; Lc. 4:38-39)

²⁹Che biriireni xquidobäz rexpejn Israel, huinä Jesús Jacobo näj Juan roliz Simón näjza Andrés.

³⁰Luxh xnan suegr Simón naga', yu'ni xliaa. Dxejc räjpreni lo Jesús: —Cayacxhuuni.

³¹Dxejcti gubig Jesús lojni, gunaazni naani, guläsnini; lagajc dxejc biriini xliaa. Dxejc gusloj cayunireni.

Xhidajl benracxhuu basiajc Jesús che huääz gubijdx

(Mt. 8:16-17; Lc. 4:40-41)

³²Che huääz gubijdx, luxh abiu' guxhijn, biädnäreni guiraa rebenracxhuu loj Jesús, näjza renani yu' bendxab nen lastooni.

³³Luxh guideb guejdxga bidojp ro' yu'ga. ³⁴Basiajc Jesús xhidajl renani rajc garen-garen yälguijdx. Niluxh gulääzani xhidajl bendxab, niluxh dini nusaan ninii rebendxabga, sa'csi najnreni chu najcni.

Baluu Jesús nez Galilee

(Lc. 4:42-44)

³⁵Che bara yääl, cäjyru bistie Jesús, biriini sääni te laad cadro ruti bejn. Ro'c cabejdx-canabni loj Dios. ³⁶Dxejcti Simón näj resa'ni huitiilreni Jesús. ³⁷Che bidxälrenini, räjpreni lojni:

—Guiraa rebejn caguillu.

³⁸Dxejc räjp Jesús lojreni:

—Colcho' reguejdx ni yu' gajxh, te gusuleä xtidx Dios ro'c. Par ni'cpac biälä.

³⁹Dxejcru cuansaj Jesús guideb nez Galilee, caguluiini xtidx Dios nen reguidobäz xten rexpejn Israel. Gunibeezani birii rebendxab nen lastoo xhidajl rebejn.

Basiajc Jesús te bejn ni ral tiejxhni

(Mt. 8:1-4; Lc. 5:12-16)

⁴⁰Gubig te bejracxhuu ni ral tiejxhni loj Jesús, bazuxhijbni. Dxejcti räjpni lojni:

—Narä nanä sajc gusajclu narä palga rlanjlu.

⁴¹Balasaj Jesús bejracxhuuga, gunaazni naani, räpgajcni:

—Rläzä jiajclu. Biajc naj.

⁴²Cheni guniini scree, biacgajc bejracxhuuga. ⁴³Dxejcti gulunejz Jesús bejnga. Per räpxgaani lojni:

⁴⁴—Ahuiire, rutlojdi guiniilu dee. Huilui tiejxhlu lo bixhojz. Badedgajc lo Dios nani räjp toMoisés gudeed bejn lo Dios si'c te seen, te gacbee rebejn abiajclu.

⁴⁵Dxejc sää bejnga. Sas gusloj cayujyni diidx lo rebejn xcuent guiraa nani gujcn. Ni'cni diru niajcdi niu' Jesús nicla tej guejdx. Cansajni te laad cadro ruti

bejn. Niluxh guiranejz rii rebejn, siädhuiireni Jesús.

Basiajc Jesús te bejn ni di guniib

(Mt. 9:1-8; Lc. 5:17-26)

2 Che agudejd balti dxej, biusac Jesús nen guedx Capernaum. Dxejcti biejn diajg rebejn arbäjn. ²Bidopgajc xhidalduxh bejn. Gudxaj nen yu'. Nicla rolä' di niajl nisiujreni. Dxejcti cagului Jesús xtidx Dios lo rebejn. ³Dxejcti bidzujn tajp bejn, nuureni te bejn ni digacti guiniib; siädnärenini lo Jesús. ⁴Luxh di niajcdi nidzujnreni cadro suga' Jesús, sa'csi yu' xhidajl bejn ro'c. Ni'c baxhalreni yejc yu' nejz cadro sujni. Dxejcru cadro baxhalreni basiäjtreni da' ni naga' bejracxhuuga lojni. ⁵Che bahuii Jesús rililajzreni, dxejc räjpni loj bejracxhuuga:

—Xi'nä, agubica j rextojllu.

⁶Sas gaii bejn ni ruluii leii ni sobga' ro'c bejnreni xhigab nen lastooreni, naareni: ⁷“¿Xhicuent rni niguiire scree? Caniyajni Dios; rut rajcdi rudzucaj dojl. iDioctis rajc rudzucaj dojl!” ⁸Dxejcti gucbegajc Jesús xhi xhigab cayujnreni. Dxejc räjpni lojreni:

—¿Xhicuent rujntu xhigab si'c nen lastootu? ⁹¿La guyasiru gäbni loj bejracxhuure: “Agubica j rextojllu”, o la gäbni: “Huistie, cua' xta'lu, gusaj?” ¹⁰Baj naj, te gantu rajc rudzucaj Xi'n Dios, nani gujc Niguii, dojl lo guedxliujre, cania loj bejracxhuure:

¹¹—Lojlu rniä, iHuistie, cua' xta'lu, huij rolizlu!

¹²Lagajc dxejc huistie bejracxhuuga, guläzni xta'ni,

hiriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni:

—Gajdpacnu guihuii sa' dzuunre.

Gurejdx Jesús Leví

(Mt. 9:9-13; Lc. 5:27-32)

¹³Dxejcrú gubisac Jesús ro' nis xten Galilee, luxh che bidojpx guiraa rebejn lojni, baluini xtidx Dios lojreni. ¹⁴Sasaj Jesús che bidxaagni Leví, xi'n Alfeo. Sobga'ni cadro rusquijxni rebejn. Dxejc räjp Jesús lojni:

—Gudanajl narä.

Sas huisuni, sanajltini Jesús.

¹⁵Dxejc sobga' Jesús cayajwni rolizj Leví. Luxh sobganäj Jesús xhidajl reni rusquijx, näjza rebendojl ni di chasanäj leii, näjza rexpejnpacni, lo mex. Xhidajlreni tre', luxh sanajlreni Jesús.

¹⁶Dxejcrú rebejn ni ruluu leii näj refarisee, che bahuiireni cayaunäjni renani rusquijx näjza rebendojl, räjpreni loj rexpejnpac Jesús:

—¿Xhicuent rbenäj xmastrtu reni rusquijx näj rebendojl, luxh raunäjnireni, ränäjnireni?

¹⁷Che biejn diajg Jesús xhi caniireni, räjpni lojreni:

—Renani nadip nadaan di guiquiin doctoor, per reni racxhuu rquuin doctoor. Dina niädtedxä rebensa'c, biädtedxä rebendojl, te gusiech lajzreni.

Gunabdiidxreni loj Jesús xcuent yälrucua'n

(Mt. 9:14-17; Lc. 5:33-39)

¹⁸Cagucua'n rexpejn Juan näj rexpejn refarisee, renani najc rebenguidoo loj guedx Israel.

Dxejc biääd gaii bejn loj Jesús, gunabdiidxreni lojni räjpreni:

—¿Xhicuent cagucua'n rexpejn Juan näj rexpejn refarisee luxh rexpejnpacku di gucua'n?

¹⁹Dxejcti räjp Jesús lojreni:

—¿La rucua'n rebejn ni rdon chää cadro ru' yälrucuanaa che meer suga' bi'n? Che meer suga' bi'n lojreni, direni gucua'n. ²⁰Per sidzujn dxej sibicaj bi'n lojreni, dxejc sii sucua'nreni.

²¹Rut rucuaadi tla' ladcoob loj tla' ladyux, sa'csi ladcoob rxu'nni luxh rutiäjzni ladyuxga, dxejc xhiroobruni räjs. ²²Rutza rusäl di bin ni gajd guilaj nen guidyux ni abigaa. Sa'csi bin ni gajd guilajga sutiäjzni guijdga che guilajni, luxh sinijt binga näjza guijdga. Ni'cni nanab gusäl ni bincoob nen guidcoobza.

Batojpx rebejn ni rinajl Jesús triuu sabd

(Mt. 12:1-8; Lc. 6:1-5)

²³Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejnpacni caläädx doj lo triuu. ²⁴Dxejc räjp refarisee, renani najc benguidoo loj guedx Israel, loj Jesús:

—Arniä, ¿xhicuent rujn rexpejnpacku dzuun ni di guchaag gunni nen dxej ni rusilajznu, ä?

²⁵Dxejcti räjp Jesús lojreni:

—¿La gajdte gól nani bejn toDavid te huält, laani näj resa'ni, ä? Che biäädx xhi gauureni, gulaanreni. ²⁶Biu' David nen xyu' Dios cheni guyu' toAbiatar loj Dios. Abiatar sajcrú loj rebixhojz ni guyu' nen xquidoo rexpejn Israel. Dxejc

gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojzti rajc rajw yätxtiilga.

²⁷Räjpza Jesús lojreni:

—Dios bejn dxe sabd sa'csi najjni naquiinpac gusilajz bejn. Dini niujn sabd te gapda bejn. ²⁸Ni'cni narä, Xi'n Dios ni gujc Niguii, näjza sabd rnibeä.

Niguii ni nabijdz te naani

(Mt. 12:9-14; Lc. 6:6-11)

3 Biu' Jesús stehuält nen xquidobäz rexpejn Israel. Ro'c yu' te niguii nani nabijdz te naani.

²Niluxh ro'c cagula'tz rebejn Jesús don la susiajcn niguuiga sabd, dxej ni rusilajz rexpejn Israel, sa'csi rlanjreni cue'creni xquejni loj nani rnibee rexpen Israel. ³Dxejc räjp Jesús lo niguii nani nabijdz naani:

—Huistie, guzuj galäiire.

⁴Dxejcti gunabdidxgajcni loj gaii rebejnga, räjpni:

—¿La laaca gunni dzunza'c, o la dzunguijdx, sabd, ä? ¿La suslaani yäl'nabajn, o la sugu'tni?

Luxh laareni biacdxireni. ⁵Dxejc nadxe'ch bahuii Jesús lojreni, luxh guc-huin lajzni, sa'csi guc najd lajzreni. Dxejc räjp Jesús loj niguiiga:

—Baslii naalu.

Dxejcti basliini naani. Biajctini.

⁶Dxejcru biunejz refarisee.

Guslogajczeni caguchaagreni diidx con reni nadxaag Herodes, te don xho ju'treni Jesús.

Xhidajl bejn bire' ro' nis

⁷Jesús näjza rexpejnpacni sääreni ro' nis, luxh xhidajl bejn

Galilee birinajlni. ⁸Che gojnreni redzunro ni rujn Jesús, xhidajlreni biääd. Yu'reni birii Judea, yu'reni birii guedx Jerusalén, yu'reni birii Idumea, yu'zarenen birii nejz stelaad gueu Jordán, biriizarenen nez guedx Tiro, näj nez guedx Sidón, biädhuiireni loj Jesús.

⁹Ni'cni räjp Jesús loj rexpejnpacni quiilreni te canuu, te na'c gutää rebenxhidaalgani. ¹⁰Abasiajc Jesús xhidajl benracxhuu, ni'cni guiraasi benracxhuu caxa't lojni, te canrenini te jiajcreni. ¹¹Niluxh che rhuii rebenxhab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

¹²Dxejcti Jesús gudidxa' lojreni te na'c niäjbrene chu najcni.

Gule Jesús tzubitiop bejn loj reni rinajlni

(Mt. 10:1-4; Lc. 6:12-16)

¹³Birii Jesús sääni lo te dajne' cadro gurejdxni renani rlanjzni cueni. Gubigtireni lojni. ¹⁴Dxejcti guleni tzubitiop'reni te sanäjreni laani, te guxhajnireni chaluiireni xtidx Dios; ¹⁵te ga'preni yäl'rnibee te gusiajcreni benracxhuu, te cuääzarenen rebenxhab.

¹⁶Retzubitio'p bejn ni gule Jesús najc: Simón, ni gulälajzani Pedr.

¹⁷Dxejcti Jacoob con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii. ¹⁸Näj Andrés, Felipe, Bartolomé, Mateo, Tomás, Jacoob xi'n Alfeo, Tadeo, Simón, ni di guidxejb rnigajc, ¹⁹näj Judas Iscariot, ni bato' Jesús loj reni rdxechlajz lojni. Sä'tireni rolizj te dade'.

Yälrniyaj loj Sprit Dxián xte Dios*(Mt. 12:22-32; Lc. 11:14-23; 12:10)*

²⁰Dxejc bidopsac rebenxhidaalga; nicla niajc niaunäj Jesús rexpejnpacni. ²¹Che biejn diajg resa' Jesús dee, biädxhiirenini, sa'csi naareni, yejcní cayajc.

²²Rebejn ni rulúii leii ni birii guedx Jerusalén bidzujnza lo Jesús, dxejc räjpreni:

—Beelzebú, nani rnibee rebenxhab, yu' nen lastoo niguiire. Niluxh nani rnibee rebenxhab rudeed yälrnibee lo Jesús te cuääni benxhab.

²³Dxejc gurejdx Jesús rebejnğa, bijyni te cuent ni rulúii lojreni, räjpni:

—¿Xho gurilaagw benxhab lagajc sabenxhabni? ²⁴Palga rebejn xten te yälrnibee la'reni, luxh tilnäjä te cuaani ste cuaaga, di yälrnibeega chu xchej. ²⁵Palga te famiḷ rdilnäjä lagajc sa'ni, di famiḷga chu xchej. ²⁶Palga benxhab nani rnibee tilnäjä lagajc laani, di xcälrnibeeni chu xchej, sa'csi ni'c gun luuxni.

²⁷Rut gacdi jiu' rolizj te niguidaán, cuanni xhixhtenni, palga dini gulibxgaani, si'ctis sajc cuanni xhixhtenni.

²⁸Rniliápac lojtu guiraa dojl näjza yälrniyaj xten rebejn sajc jia. ²⁹Nani guiniyaj Sprit Dxián xten Dios, digacdi guibicaj rextojḷni, anuutisni xtojḷni par tejpas.

³⁰Räjpni si'c sa'csi caniireni yu' benxhab nen lastooni.

Xnan con rebetzhuin Jesús*(Mt. 12:46-50; Lc. 8:19-21)*

³¹Dxejcru bidzujn xnan Jesús, näj rebetzhuinni. Direni niu',

baxhaltisreni chu huitejdxni.

³²Rebejn ni sobga' gabi Jesús räjpreni lojni:

—Xnanlu näj rebejtzlu suga' ro lä', caguiilreni luj.

³³Dxejcti räjp Jesús lojreni:

—¿Chu reni'c najc xnanä näj rebetzä?

³⁴Bahuigajcni loj renani sobga' gabini, dxejc räjpni lojreni:

—Redee najc xnanä, rebetzä.

³⁵Chutis ni rujn ni rlajz Dios, ni'c najc betzä, bisianä, näjza xnanä.

Xcuent niguii ni sale'c binij*(Mt. 13:1-23; Lc. 8:4-15)*

4 Suga' Jesús ro' nis guslosac caguluiini xtidx Dios, luxh bidojp xhidajl bejn cadro suga'ni. Xhidalduxh najcreni, ni'cni biu' Jesús nen te canuu ni suga' ro' nisga. Dxejcti gurejni nenga, biääd guiraa bejn bia'ntireni ro' nis. ²Dxejc baluiinireni guiraloj, ganax cuent ni rulúii guniini. Che caguluiini, räjpni lojreni:

³—Gucuadaijgtu dee. Guyu' te niguii. Biriini sale'cni binij. ⁴Che guslojni cabe'cni, yu' lajt biajb binijga cuä' nezyuj. Sas biääd reman xhaguibaa, gudajwreni binijga. ⁵Stee lajt biajb binijga nen guij cadro xheti xhidajl yuj. Binijga gulengajcni, sa'csi xheti xhidajl yuj ro'c. ⁶Dxejc, sa'csi lo jiaa yu' xlobaani, che birii gubijdx, bigolḷni, gubijdzitini. ⁷Stee lajt biajb binijga nen yaguejch. Dxejcti biroob reyaguejchga, luxh bejnreni balaa loj binijga, ni'cni gujcní ganax bilii. ⁸Per stee lajtga biajb binij lo yusa'c. Gulejn reyäljga, guroobreni, gucsa'ceni. Yu'reni cuaj galbitzuo

xob, yu'reni cuaj gayojn xob, yu'zareni cuaj tegayuu xob.

⁹Dxejc räjpni lojreni:

—Chutis ni rlanj guisieed, sucuadiajgni.

¹⁰Che asii xhidajl bejn, rebejn nani suga' gajxh cadro suganäj Jesús guitzubitio'p xpejn pacni gunabdiidx lo Jesús xhi säloj cuentre. ¹¹Dxejc räjp Jesús:

—Dios abejn gacbeetu te gantu xho najc yälxhiga'tz xten xcälrnibee Dios nani najc xhiga'tz najli. Niluxh lo ste'ca bejn con cuenttis rniä guiraa recosre, ¹²te mase cahuiireni direni gumbee, te mase cayiejn diajgreni, direni gacbee. Scree gacni, te na'c gusiejch lajzreni, te na'c guibicaj xtojlni.

¹³Räjpzani lojreni:

—¿La ditu gacbee cuentre? ¿Xhocha gacbeetu xhidajlru cuent?

¹⁴Niguiire nani sale'c binij najc si'c te nani ruluii xtidx Dios. ¹⁵Yu' bejn ni najc si'c binij ni biajb cuä' nezyuj: riejn diajgreni xtidx Dios nani ruluii bejn. Dxejc che jiejn diajgreni xtidx Dios, riääd Satanás rbägajcni xtidx Dios ni yu' nen lastooreni. ¹⁶Yu'za rebejn ni najc si'c binij ni biajb nen reguij, renani che jiejn diajgreni xtidx Dios, rbaa lajzreni rca'reni diidxga. ¹⁷Niluxh direni nisiudzu'tz, sa'csi guxii huilii lajzreni. Che rdejdreri trabajw o che rusacsj bejnreni xcuent xtidx Dios, rusaanreni xtidx Dios. ¹⁸Yu'zareni najc si'c binij ni biajb nen yaguejch, riejn diajgreni xtidx Dios, ¹⁹dxejc che ru'rurenii yärsia' xcuent recos guedxliujre, rsia' lajzreni ga'preni meel, rlanjreni ga'prurenii guiraloj recos, dxejc riu'

redee nen lastooreni, rusäuuni lo xtidx Dios, xlia'si biejn diajgreni xtidx Dios. ²⁰Yu'za bejn ni riejn diajgreni xtidx Dios, rlii lajzreni diidxga, xhet xlia'ti biejn diajgreni xtidx Dios. Najcreni si'c binij ni biajb loj yusa'c. Yu' rebejn ni najc si'c nani cuaj galbitzuu xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

Xhet yuchetzu'tzdi ni di guidzujn dxej sisäbdiidx

(Lc. 8:16-18)

²¹Räjpza Jesús lojreni:

—¿La riädnätu te bajl te suuni dejtz te alm, o nen te loon, ä? ¿La xhet nanabdi suuni jiaa te guzanijni, ä? ²²Xhet yuchetzu'tzdi ni di guidzujn dxej sisäbdiidx. Xhetiza xhicos naga'tztis. Naga'tzni naj, niluxh sidzujn dxej sule'ni. ²³Pal yu' chu rlanj guisieed, sucuadiajgni.

²⁴Räjpza Jesús lojreni:

—Colyunxgaa xhigab rediidx ni riejn diajgtu. Nani rusältu loj xhigabtu, ni'cza guniidx Dios xca'tu, luxh sisiojbru yejc ni xca'tu. ²⁵Renani rajp che'n yäl'najn, lojreni sudeedru Dios yäl'najn. Luxh renani xhetru rusäldi loj xhigabreni, sudzucaj Dios yäl'najn nani rajpreni.

Xcuent binij ni roob

²⁶Guniiza Jesús lojreni:

—Yälrnibee xten Dios najc si'c rsiajc te niguii che rbe'cni binij lo yuj, ²⁷dxejc yäl riguesni, rdxee ristieni, dxejcti rliejn binijga, luxh di niguiiga gan xho roobni. ²⁸Acanajn yujga rajc binij lojni. Galoo rii cuane'ga, sas rii doj lojni. Dxejcru rdxaj bejdz'e' nen

dojga. ²⁹Dxejcti che aguyajl bedze'ga, ruxhalni chu rituuigni, sa'csi abidzujn dxej ni guidojpmi.

Xcuent bedz muxhtas

(Mt. 13:31-32; Lc. 13:18-19)

³⁰Räjpza Jesús:

—¿Xhini'c najc si'c najc xcälrnibee Dios? ¿Xhi te cuent guiniinu te guiluiununi? ³¹Si'c te bedz muxhtas ni rbej loyuj, si'c najcni. Bedz muxhtas najcni bedz bāze'ru loj guiralii bedze' ni yu' loj guedxliuj. ³²Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiääzni nen xpałani.

Si'c baluui Jesús ganax con cuent

(Mt. 13:34-35)

³³Si'c ruluii Jesús rebejn xtidx Dios guiniini xhidal cuent sa' redee, si'ctis ni rajc racbeereni. ³⁴Con recuent ni ruluiitis gunii Jesús lojreni. Niluxh lo rexpejnpacni basule'ni guiraa recuente.

Rusiacdxi Jesús bej näj nisdoo

(Mt. 8:23-27; Lc. 8:22-25)

³⁵Lagajc gudxejga räjpni loj rexpejnpacni:
—Colcho', chonnu stelaad nis xten Galilee.

³⁶Basa'ntireni rebejn, sanätireni Jesús nen canuu cadro sobgajcni. Dxejcti sgaii canuu sanajlni.

³⁷Chela gubi' te beduxh, gusloj cayu' nis nen canuuga. Cadxaj canuuga nis. ³⁸Nagayejs Jesús dejt canuuga, nagayejsni. Bacuäänreni Jesús, räpgajczeni lojni:

—Dad mastr, ėla dilu jiu siääznu nen nis, ä?

³⁹Dxejc huistie Jesús, gudidxa'ni lo bejga, räjpzani lo nis:

—Guredxi.

Gulāzgajc bej, biacdxi. ⁴⁰Räjp Jesús loj rexpejnpacni:

—¿Xhicuent cadxebduxhtu? ¿La ditu chalilajz xtidxä, ä?

⁴¹Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoobreni xtiidxni?

Nigui Gadara ni yu' bendxab nen lastooni

(Mt. 8:28-34; Lc. 8:26-39)

5 Bidzujntireni stelaad ro' nisga, lo yuj xten Gadara. ²Si'ctis ni birii Jesús nen canuu, biādgajc te niguii lojni ni birii nen rebiliää cadro rga'tz bengut. Yu' bendxab nen lastoo niguiiga. ³Rbājzni nen rebiliääga luxh rut rajcdi rucuaduuni, nicla con cadenguiib. ⁴Xhidajl huält agacbacuaduureni ni', naa niguiiga con cadenguiib, luxh litis batiuugni recadenguiibga, rut rajcdi rusiacdxi. ⁵Si'ctis canzajni, dxej, yääl. Rbedxa'ni nen redajn, nen rebiliää, luxh cagutiugni tiejxhni con reguij. ⁶Che bahuiini loj Jesús zijtru, baxunni huichaglojni Jesús, bazuxhijbni lojni. ⁷Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsılu narä.

⁸Sa'csi agac cayāj b Jesús lojni:
—Luj, bendxab, birii nen lastoo niguiiga.

⁹Dxejcti gunabdiidx Jesús räjpni:
—¿Chu laalu?

Dxejc räjpni:
—Narä laä Legiön, nani säloj xhidalro, sa'csi xhidajl najcnu.

¹⁰Sanuutis canabni lo Jesús na'c guxhałni rebendxabga ste'ca guejdx.

¹¹Ro'c tre' xhidalduxh cuch cuä' dane'ga, cayajwreni. ¹²Dxejc gunab rebendxabga loj Jesús, räjpreni: —Baxhał nuure loj recuchre te jiu'nu neñ lastooreni.

¹³Dxejcti basaan Jesúsreni. Biriiti rebendxabga neñ niguiiga, dxejc biu'reni neñ lastoo recuchga. Yu' si'cti tiop mił cuch ro'c. Baxun recuchga, dxejc birolreni ro' guilaj, bitejbreni neñ nis, gujttireni neñ nisga.

¹⁴Renani cayajp recuchga baxunreni, huiyeireni diidxga neñ guejdx, näjza loniaa. Dxejc biääd bejn biädhuui nani gujc ro'c. ¹⁵Che bidzujnreni cadre suga' Jesús, bahuiireni loj niguii nani guyu' rebendxabga neñ lastooni. Sobga'ni ro'c, najcwni xhajnbi luxh nasa'c yejcni. Niguiire najc nani guyu' bendxab ni laa Legión neñ lastooni. Bidxejbtı rebejn nani bahuii lojni.

¹⁶Dxejcru rebejn ni bahuii xhi gujc ro', huiyeireni diidx xho guzajc niguiire nani guyu' bendxab neñni galoo, näjza nani guzajc recuch.

¹⁷Dxejc gosloj canabreni loj Jesús jıunejzı.

¹⁸Che biu' Jesús neñ canuu, niguii nani guyu' bendxab neñ lastooni gunabni loj Jesús, räjpni:

—Huinä narä.

¹⁹Per di Jesús nusaan nijni. Räjp Jesús lojni:

—Huij rolıjzlu, lo resa'lu. Huiyeii diidx lojreni xho bennäj Dadlu, näjza xho balaslajzıni luj.

²⁰Sä'ti niguiiga, gosloj cayujyni diidx neñ reguejdx xten Decápolis xho bennäj Jesúsni. Guiraa rebejn bidxeloj.

Xindxa'p Jairo näjza gunaa ni bahuał xhajn Jesús

(Mt. 9:18-26; Lc. 8:40-56)

²¹Che bidzunıac Jesús stelaad ro' nisga neñ canuu, bidzujn xhidalduxh bejn cadre suga'ni. Bia'nti Jesús ro' nisga. ²²Dxejcru biääd te niguii nani laa Jairo, ni rnıbee neñ xquidobäz rexpenı Israel. Che bahuiini loj Jesús, bazuxhıjbnı lojni. ²³Canabpacni lojni, räjpni: —Xindxapä'ä acayejt. Gudaa, guzujlu naalu yejcni, te jıajcni, te guıbajnnı.

²⁴Sanäti Jesús bejnıga. Xhidajl bejn sanajłni, luxh cagutäärenini. ²⁵Loj rebenxhıdaalga yu' te gunaa ni agujc tzubıtıo'p ıjz racxhuuni yälıguidxbäıi. ²⁶Agudedduxbıni trabajw, abahuii xhidajl doctoorni. Xlia'si abanıjtnı guiraa nanı rajpni, luxh xhet racnäjdıni, alga rxuuruni. ²⁷Sa'csi biejn diajgnı xhıni'c canıi rebejn xcuent Jesús, gubıg gunaaıga nez dejtz Jesús, guıdeb neñ rebejn, bahuałni xhajn Jesús. ²⁸Cayujnnı xhıgab, naanı: “Palga narä falä xhajnbtısni, sıacä.” ²⁹Lagajc dxejc guläjz caxe'xtiejnnı, gucbeeza tiejxhıni abırii xcälracxhuuni. ³⁰Gucbegajc Jesús yu' chu abasıajcni. Gubıregajcni neñ rebenxhıdaalga, räjpni:

—¿Chuni'c bahuał xhabä?

³¹Dxejcru räjp rexpejnıpacni lojni: —Rhuiılu benxhıdaal cagutäälü, luxh naalu: “¿Chuni'c bahuał xhabä?”

³²Sas cahuii Jesús nez ree, nez rec, te fiini loj nanı bahuałni.

³³Dxejc bidxejb gunaaıre, racejsni, sa'csi gucbeeni xhıni'c gujcni. Dxejc

biäädni, bazuxhijbni loj Jesús, räbliini loj Jesús guira'ti ni bejn.

³⁴Dxejc räjp Jesús lojni:

—Xindxa'pä, abiajclu sa'csi huililajzlu. Gulecdxi lajzlu, huij rolizlu, abiajc xcälracxhuulu.

³⁵Canisijc Jesús si'c che bidzujn renani birii rolizj dade' ni rnibee nen xquidobáz rexpejn Israel.

Räjpreni:

—Agujt xindxape'lu. ¿Xhicuent rusieedrulu Dad mastr?

³⁶Dxejc che biejn diajg Jesús nani caniireni, räjpni lo dade'ga:

—Na'c guidxejblu. Bililajztis.

³⁷Luxh dini nusaanru nij chu ninäni, Pedrtis näj Jacoob näjza Juan bejtzni. ³⁸Che bidzujnni rolizj dade'ga, bahui Jesús bieju ni cayujn rebejn ni rbedxa' roon.

³⁹Biu'tini räjpni:

—¿Xhicuent rujntu si'c? Gajd dxape're guet. Nagayejssini.

⁴⁰Alga baxhiznäjrenini. Dxejc gunibee Jesús birii guiraa rebejn^{ga}. Dxejcti huinäni xcuzajⁿ dxape'ga con renani sanäni. Biu'reni cadro naga' dxape're. ⁴¹Gunaazni naa dxape'ga, dxejc räjpni:

—Talita cumi —nani säloj con xtiidxnu: Dxape', lojlu rniä, huistie.

⁴²Dxejcti huistiegajc dxape'. Tzubitio'p ijz yu' dxape'ga. Bidxeloduxh rebejn ni bahui guläs Jesús dxape'ga. ⁴³Dxejc balijdx Jesús reni te rut lojdi chaye'tzreni xhini'c gujc. Gunibegajcni gudeedreni xhi gauu dxape'ga.

Che guyu' Jesús Nazare't

(Mt. 13:53-58; Lc. 4:16-30)

6 Dxejcru birii Jesús ro'c, huijni lajdxni, sanäzani

rexpejn^{pacni}. ²Che bidzujn sabd, dxej nani rusilajz rexpejn Israel, gusloj caguluiini nen xquidobáz rexpejn Israel. Bidxeloj xhidajl bejn nani biejn diajg rextiidxni, räjpreni:

—¿Caro bisieed niguiire guiraa recosre? ¿Xhi yälⁿaj^{nre} cua'ni ni'c rajc rujni rextzunduxh Dios con naani? ³¿La xhet laadi carpinteer, xi'n Marii, bejtz Jacoob, näj José, näj Judas, näjza Simón dee, ä? ¿La xhet reedi rbäjz rebisianhuinni?

Luxh bidxechlajzreni lojni. ⁴Dxejc räjp Jesús lojreni:

—Catis rinälajzreni te ni rni xtidx Dios. Lajdxtisni, lagajc loj resa'ni, rolizjtisni, ro'c rut rinälajzdini.

⁵Luxh di niajcdi niujn Jesús xhidajl milaagwr ro'c. Tiopchontis benracxhuu basiaj^{cni}, bazujni naani yejcreni. ⁶Bidxelo Jesús sa'csi di lajzreni nilii. Caguluiitini nen guiraa reguejdx^{e'} ni ria'n gajxh nejzga.

Baxhał Jesús tzubitio'p bejn ni rinajlni chaluiireni xtidx Dios

(Mt. 10:5-15; Lc. 9:1-6)

⁷Dxejcru gurejdxni guitzubitio'p xpejn^{pacni}. Gusloj caguxhałni tiopgajreni; badeedzani yäl^{rn}ibee lojreni te guinibereeni loj rebendxab. ⁸Gunibeeni xhet chanädireni lo nejz, ganaxhtis te yajg te sanäjreni. Di nungäjł chanäreni nicla bisiuud, nicla yätxtiil, niclaza meel nen dobdäjł. ⁹Nungäjłza xcaj gura'ch ni'reni, nägajc ga'preni tejtis gamangw, xhet tio'pdini. ¹⁰Dxejcti räjpni lojreni:

—Cadrotis jiu'tu nen te guejdx, col^{jia}'n nen tejtis yu' guiraa redxej

ni chutu guejdxga. ¹¹Palga yu' te guejdx cadro direni gusaan jiu'tu luxh di rlazjzeni cuadiajgzeni diidx ni sanātu, colr̄ii guejdxga, colcuijb guxhuj ni'tu si'c te seen te gacbeereni xhet laadi bejnreni. Rniliápac lojtu, guxiiru trabajw ted reben̄ Sodoma náj reben̄ Gomorra quela rebejn̄ ni yu' guejdx cadro direni gusaan jiu'tu.

¹²Dxejc biriireni, sääreni. Cayäbgajczeni nanabpac gusiejch lajz rebejn̄. ¹³Gulääzaren̄i xhidajl ben̄dxab dxejcti gudääbreni se't yejc xhidajl ben̄racxhuu, luxh biajczeni.

Xcälgujt Juan ni rutiobnis

(Mt. 14:1-12; Lc. 9:7-9)

¹⁴Herodes najc nani rnibee dxejc. Biejn diajgni xpala'n Jesús, sa'csi guiralii rebejn̄ calá'p xpala'n̄ni. Dxejc räjp Herodes:

—Juan nani rutiobnis ahuäjs loj rebengut, ni'c rajc rujnni remilagwre.

¹⁵Sgaa bejn̄ räjp:

—Laa Elías ni gunii xtidx Diosni.

Sgaaireni räjp:

—Laa te bejn̄ ni rnii xtidx Dios, o sa' te rebejn̄ ni gunii xtidx Dios agujc xchero.

¹⁶Che biejn diajg Herodes si'c, räjpni:

—Laa Juan dee, nani gunibeä biru' yejcn̄i, luxh náj agubansacni loj rebengut.

¹⁷Sa'csi lagajc Herodes gunibeä biga' Juan, dxejc bacuaduurenini con cadenguuib nen̄ latzguuib, xcälnasa'c Herodías. Herodías gujc chääł Lib, bejtz Herodes, dxejc cua' Herodes gunaaga si'c chääłni.

¹⁸Räjp Juan loj Herodes:

—Xhet laadi rbäznäjlu chääł bejtzlu.

¹⁹Ni'cni rdxechlajz Herodías loj Juan, luxh rlazjni ju'tnini, luxh di niajcdini ²⁰sa'csi rdxejb Herodes Juan, sa'csi najnni bensa'c, ben̄dxan najc Juan, ni'cni dini nusaan niujn Herodías latsiajni. Mase dini gacbesa'c ni rnii Juan, rucuaadiagsa'cni xtiidxni. ²¹Niluxh guyu' xmood Herodías. Che gojl laj Herodes, bayaanni rexpejn̄ni ni rnibee, nájza rebejn̄ nani sajz nez región Galilee. ²²Dxejcti biu' xinxda'p Herodías cadro cayajwreni, baya'ni nez lojreni. Bidxaglazduxh Herodes nájza rexpioozni baya' gunaaga, xinxda'p Herodías. Dxejc räjp Herodes lo gunaaga:

—Gunab ni rlazjzisl̄u loä, narä sunidxäni.

²³Dxejcru räplīi Herodes lojni:

—Sunidxä xhitis ni guiniabl̄u.

Mase gala' yuj ni rnibeä.

²⁴Biriitini nen̄ yu', huiye'tzni loj xnanni, räjpni:

—¿Xhini'c guiniabä lojni?

Dxejc räjp xnanni lojni:

—Gunab yejc Juan ni rutiobnis lojni.

²⁵Huigajcni loj reii, sas gunabni lojni, räjpni:

—Rlazä gunidxgajclu loä yejc Juan ni rutiobnis. Nen̄ te pla't baniidx yejcn̄i.

²⁶Dxejcti guc-huinduxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganäjni lo xmexni, ni'c dipac rlazjni nudxojnni nani gunab gunaaga lojni. ²⁷Baxhalgajc reii te soldaad ni rcanäj ro'c, baxhaln̄ni, te chaxiini yejc Juan. ²⁸Ni'c huij,

dxejcti bagu'tni Juan neṅ latzguiib, biädnätini yejc Juan neṅ te pla't. Badeedtinini loj gunaaga. Dxejcti gunaaga badeednini loj xnanni.

²⁹Che biejn diajg rexpejnṅpac Juan si'c, biädläsreni togoolga. Dxejcti bacua'tzrenini neṅ te baa.

Bayaan Jesús gaii mil bejn

(Mt. 14:13-21; Lc. 9:10-17; Jn.6 :1-14)

³⁰Che gubi' renani baxhaḷ Jesús, bijreni diidx guiraa ni bejnreni näjza ni baluiireni. ³¹Dxejc räjp Jesús lojreni:

—Colṭaa, xtebnu chonnu cadro rut rbäjzdi, guisilaznu tudxe'n.

Räjp Jesús si'c sa'csi yu' xhidajl bejn ni sää, ni siääd, nicla gal gauureni. ³²Dxejcti sääreni neṅ te canuu cadro rut rbäjzdi. ³³Bahuii xhidajl bejn sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzujṅreni loj Jesús näjza rexpejnṅpacni, dxejcti bidojpreni lojni. ³⁴Birii Jesús neṅ canuu, bahuiini loj beṅxhidaalga. Dxejc balazlajznireni, sa'csi najcreni si'c rexiil ni ruti baxtoor xtenreni. Dxejc gusloj caguluiinireni guiraloj. ³⁵Che gojḷ gudxej, gubig rexpejnṅpacni lojni, räjpreni:

—Rut rbäjzdi ree, luxh agudxej ṅaj. ³⁶Baxhaḷ rebejn te chääreni lo reguejdx, näjza reṅench, te chasiireni yätxtiil gauureni sa'csi xheti xhi gauureni ree.

³⁷Dxejc räjp Jesús lojreni:

—La'tu colḷeed xhi gauureni.

Dxejc räjpreni loj Jesús:

—¿Xhixh sajl tiop gayuu meel yätxtiil chosiinu gauu guiraa rebeṅxhidajlre?

³⁸Dxejcti räjp Jesús lojreni:
—¿Bal yätxtiil rajptu? Colchahuii.
Che gojnreni balni dxejc räjpreni:
—Gaii yätxtiil, näjza tiop bäjḷ.

³⁹Dxejcru gunibee Jesús räjpreni loj guiraa rebejn:

—Colcuej xcua-xcuaatu loj guixhaya'.

⁴⁰Sas gurej xcua-xcuaareni. Yu' lajt gurej tegayuureni, yu' lajt gurej garol gayuureni. ⁴¹Dxejcti cua' Jesús guigaii yätxtiilga näjza guiro'p bäjḷga, bahuiini xhaguibaa, badeedni xquixhtios loj Dios. Dxejcti gula'ni yätxtiil näjza guiro'p bäjḷ, badeednini loj rexpejnṅpacni te badeedrenini loj guiraa rebeṅxhidaalga. ⁴²Dxejc gudajw guiraareni, gudxaj xque'reni. ⁴³Dxejcru batojpreni tzubitiop dxijm guidxadoo yätxtiil näjza bäjḷ ni bia'n. ⁴⁴Luxh loj guiraa rebejn ni gudajw yu' si'cti gaii mil niguii.

Guzaj Jesús loj nis

(Mt. 14:22-27; Jn.6 :16-21)

⁴⁵Gunibee Jesús jiu' rexpejnṅpacni neṅ canuu, chägajcreni Betsaida, ni tre' dejtz nis stelaad, laḷni cagusadiidxni rebejn. ⁴⁶Che gulujx basadiidxnireni, sääni neṅ redane', sanabni lo Dios. ⁴⁷Cheni acayu' guxhijṅ, yu' rexpejnṅpacni neṅ canuu galäii nis laḷ ni suga' Jesús xtebni ro' nis. ⁴⁸Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzreni stehuält. Dxejcru che acara yääl, gusaj Jesús loj nis, huijni cadro sasajreni, rlaizni ninijdni lojreni. ⁴⁹Dxejc che bahuiireni sasaj Jesús loj nis, naareni pet te beṅmalni,

ni'c guredxa'reni. ⁵⁰Guiraareni bahuiireni lojni, bidxebduxhrene. Sas gunigajcni lojreni, räjpni: —Colsutijp lajztu. Laa naräni. Na'c guidxejbtu.

⁵¹Dxejcti huä'p Jesús nen canuu cadro yu'reni. Lagajc dxejc biacdx bej, luxh laareni bidxeloduxhrene, ⁵²sa'csi direni niacbee xhini'c bennäj Jesús reyätxtiil. Guc najd lajzreni, ni'c direni niacbee.

Basiajc Jesús rebenracxhuu nen guedx Genesare't

(Mt. 14:34-36)

⁵³Gudejdreni lo nis, bidzujreni lo yuj xten Genesare't. Ro'c bacuaduureni canuu ro' nis. ⁵⁴Che biriireni nen canuu, biembegajc rebejn Jesús, ⁵⁵dxejcti birii rebejn guideb nejzga. Guslojti siädnäreni benracxhuu loj Jesús, naga' rebenracxhuuga lo da'. Cadrotis riejn diajgreni yu' Jesús riädnäreni rebenracxhuu. ⁵⁶Niluxh cadrotis rij Jesús, nen reguedxbäz, nen reguedxro, näjza loj rerench, rguixhrene rebenracxhuu cadro rajc guii. Dxejcti rniabreni loj Jesús te gac caanreni xhajbni, niluxh biajc guiralii renani gudajñ xhajb Jesús.

Nani runijt lastoo bejn

(Mt. 15:1-20)

7 Dxejcti refarisee, renani najc benguidoo loj guedx Israel, näjza gatii rebejn ni ruluii leii, renani birii Jerusalén, bidojpreni loj Jesús. ²Bahuiireni cayajw gatii rexejnpac Jesús, luxh canii rebejn nacdxuudx naareni (dee säloj direni quiib naareni si'ctis ni rdiib naa reben lajdxrene). Ni'cni guniyajreni

rexejnpac Jesús. ³(Guiraa rebejn xten Israel, näjza refarisee, sasanäj nani baluii rebengool ni yu' guedx Israelrene. Direni gauu palga direni quiib naareni balti huält. ⁴Che rbi'reni rijreni lo guii, rguibsa'creni naareni, lojreni, ni'reni, dxejcti rajc rajwreni. Niluxh guyu' xhidajl costumbr ni sasanäjruene, luxh yu' mood rguibreni rextrastreni näjza rexplooreni, näjza rextrastguiibreni, näjza rexloonreni.) ⁵Dxejc gunabdiidx refarisee näjza rebejn ni ruluii leii loj Jesús, räjpreni:

—¿Xhicuent di rexejnpaclu gun si'cni baluii rebengool, niluxh rajwreni guideb nacdxuudx naareni?

⁶Dxejcti gunii Jesús lojreni räjpni: —iBen guijdx! Laaca gunii Isaías xcuenttu che guniini xtidx Dios. Scree cajni loj guijtz:

Guejdxre sanälajz narä con rextiidxni,

niluxh lastooreni zitro suga' loä.

⁷Xlia'si ruzuxhijbreni, sa'csi direni chanälajz narä.

Ruluiireni si'c xtiidxpac Dios nani rnii rebejn.

⁸Rusa'ntu xleii Dios, sasanädzu'tztu costumbr nani baluii rebengool. Rdibsa'c rexploortu, rextrasttu, luxh rujnzatu xhidajlru cos sa' redee.

⁹Räjpza Jesús lojreni:

—Rusa'ntu xtidx Dios te risanäjtu recostumbr xtenttu. ¹⁰Sa'csi räjp Moisés: “Huinälajz xtadlu con xnanlu.” Räjpzani: “Suju'tpacti nani gudzubde yejc xtadni o yejc xnanni.”

¹¹Niluxh la'tu rniitu sajc gäb bejn loj xtadni o loj xnanni: “Dina gapä xhi cojn gacnäälü” (nani säloj, abadedä

guira'ti loj Dios). ¹²La'tu ditu gusaan gunru bejn por xtadni nicla por xnanni. ¹³Si'c rbälaztu xtidx Dios, te sasanäjtu recostumbr nani ruluiitu, luxh xhidajl cos sa' dee rujntu.

¹⁴Gurejdx Jesús guiraa rebejn, dxejc räjpni loj guiraareni:

—Colcuadiajg, colyacbee xtidxä.

¹⁵Rexhicos yälrajw ni rajw bejn, dini gunijt bejnga, rediidx ni rii nen lastoo bejn, näjza recos ni rujn bejn, ni'c runijt bejnga. ¹⁶Pal yu' chu rrajz guisheed, sucuadiajg.

¹⁷Dxejcti gula'reni loj rebenxhidaal, biu'reni nen yu'. Dxejc gunabdiidx rexpejnpacni loj Jesús xhi säloj cuent ni guniini.

¹⁸Basejc Jesús diidx lojreni, räjpni: —¿La näjza la'tu xheti xcäriejntu? ¿La di'tu gacbee xhitis yälrajw nani riu' nen bejn digacdi gunijtni lastoo bejn, ä? ¹⁹Sa'csi dini jiu' nen lastooni; riu'ni xque'ni, rdejdtini.

Si'c guniini te baluiini guira'ti xhicos najc naya. ²⁰Dxejc räjpni:

—Rediidx ni rii nen lastoo bejn, näjza recos ni rujn bejn, ni'c sii runijt lastoo bejn. ²¹Sa'csi nen lastoo rebejn rii rexhigabgujdx, näjza yälresnäjä chääl sa'ni, yälresnäjä ni xhet najcdi chääl, yälrugut sa'ni, ²²yälgubaan, yälrlajzni ga'pni xhixhten bejn, yällatsiaj, yälrusgueeni, yäl xheti xtujy lojni, yälrdxechlajz, yälrudzubde sa'ni, yälnayechlajzni, yälguyalajz. ²³Guiraa reyällatsiajre nen lastoo bejn riireni, luxh reni'csi runijt bejn.

Tej guna Sirofenicia ni bililajz xtidx Jesús

(Mt. 15:21-28)

²⁴Dxejc biriini ro'c, sääni nez guedx Tiro näjza nez Sidón. Ro'c

bia'nni nen te yu' sa'csi di rrajzni niacbee rebejn caro yu'ni, niluxh di niajcdi niuxhiga'tztisni. ²⁵Biengajc diajg te gunaa ro'c yu' Jesús.

Xindxape' gunaaga yu' bendxab nen lastooni. Bidzujn gunaaga, bazuxhijbni lo Jesús. ²⁶Gunaaga rnii griegw, najcni bejn Sirofenicia. Gunabni lojni guinibeeni guirii bendxabga nen lastoo xi'nni.

²⁷Dxejc räjp Jesús lojni:

—Basaan gauxgaa rebieuux, sa'csi xhet laati gudzucajni xcuxtiil rebieuux te gudeednini loj rebä'cw.

²⁸Dxejc gunii gunaaga, räjpni loj Jesús:

—Yo, Dad. Näjza rebäcue' ni suga' nen mex rajw nani rtejb ro' rebieuux.

²⁹Dxejcti räjp Jesús lojni:

—Laaca rniliilu. Huij rolizlu. Abirii bendxab nen lastoo xindxape'lu.

³⁰Luxh che bidzujn gunaare rolizjni, a dxape' naga' lo da'. Gucbegajc gunaaga abirii bendxab nen lastoo dxape'ga.

Basiajc Jesús te bengop

³¹Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujntini ro' nis xten Galilee.

³²Biädnä gaii bejn te niguii ni nacua't diajg lo Jesús. Digacdiza guinisa'c niguiiga. Biäd nabreni lo Jesús nusujni naani yejc niguiiga.

³³Dxejcti badzucajnini loj rebejn. Baquitzgajcni rebicuenaani nen diajg, dxejcru batiobxhejn, gudajntini lujdxni. ³⁴Bahuiini xhaguibaa, bazaa lajzni, dxejc räjpni:

—iEfata! —nani säloj bixal.

³⁵Dxejcru bixalgajc rediajgni, gubangajc lujdxni, gunisa'cni.
³⁶Dxejcti gunibee Jesús rutlojdi gäbreni, per che räjpni lojreni si'c, laareni batie'chrureni diidxga.
³⁷Rdxeloduxhreni, räjpreni:
 —Guira'ti laaca rujnni; ruxhalni diajg rediagcua't, luxh rusniini regop.

Bayaan Jesús tajp mil bejn

(Mt. 15:32-39)

8 Nen redxejga bidojpxhidralo bejn, luxh xheti xhigauureni. Dxejg gurejdx Jesús rexpejnpacni ni rinajlni, räjpni lojreni:

²—Rulazlazä rebejnre, sa'csi naj rajc chon dxej tre'reni loä, luxh xhet yu'di gauureni. ³Niluxh palga guxhaläreni rolizjzreni, xliajzreni, sidxajgreni lo nejz; sa'csi yu' renani zijtru siäädreni.

⁴Dxejcru räjp rexpejnpacni lojni:
 —¿Caro chaca'nu yätxtiil te cha xque! rebejnre ree, cadro rut rbäzdi?

⁵Sas gunabdiidx Jesús lojreni:

—¿Bal yätxtiil rajptu?

Dxejcru räjpreni:

—Gajdztisni.

⁶Gunibee Jesús gurej rebenxhidaalga loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejg badeednini loj rexpejnpacni te guteedrenini loj rebenxhidaal. Bateedtireni yätxtiilga lo rebenxhidaalga.
⁷Rajpzareni gaii bälbäz, dxejcti badesac Jesús xquixhtios lo Dios, gunibeeni bateedzareni rebälbäzre loj rebenxhidaalga. ⁸Dxejg gudajwreni, gudxaj xque'reni. Dxejg

batojpx rexpejnpac Jesús gajdz dxijm reyätxtiil näj rebäjl dxuc ni bia'n. ⁹Niluxh renani gudajwga najcreni si'cti tajp mil bejn. Dxejcti basadiidxnireni. ¹⁰Biunägajc Jesús rexpejnpacni nen canuu, biäädreni nez Dalmanuta.

Gunab refarisee te senro loj Jesús

(Mt. 16:1-4; Lc. 12:54-56)

¹¹Biääd refarisee, renani najc rebenguidoo loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajg gun. Cagula'tzsireni, don xhi gunni.
¹²Dxejcti bazaa lajz Jesús nen lastooni, räjpni:

—¿Xhicuent rlanj rebejn ni nabajn naj fii gac resenro xten Dios? Rniliäpac lojtu, di rebejn ni nabajn naj fii nicla tej sen xhaguibaali.

¹³Dxejcti basa'nnireni ro'c, biusacni nen canuu, sä'tini stelaad nisga.

Levaduor xten refarisee

(Mt. 16:5-12)

¹⁴Biallajzreni nica'reni yätxtiil, luxh xhetliidi sanädireni. Tejts yätxtiil nuureni nen canuu. ¹⁵Cagulijdx Jesús rexpejnpacni, räjpni lojreni:
 —Colsusin, colnati levaduor xten refarisee, colnatiza levaduor xten Herodes. (Nalajznu, xtiidxreni najc si'c levaduor.)

¹⁶Dxejcti cayeinäj sa'reni diidx xcuent nani gunii Jesús lojreni, dxejg räjpreni:

—Sa'csi dinu jia'p yätxtiil, ni'c rniini scree.

¹⁷Che gucbee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdtu fii, la gajdtu gacbee? ¿La laltis nacnajd lastootu? ¹⁸ ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj? ¹⁹ Che guḷa'a guigaii yätxtiil te gudajw gaii mil niguii, ¿bal dxijm yätxtil biujy batojptu?

Sas räjpreni lojni:

—Tzubitio'pni.

²⁰—Che guḷa'a guigajdz yätxtiil te gudajw tajp mil bejn, ¿bal dxijm yätxtil biujy batojptu?

Sas räjpreni:

—Gajdzni.

²¹Dxejc räjpni lojreni:

—¿La gajdtu gacbesa'c xhi benä?

Basiajc Jesús te lotiä'p Betsaida

²²Bidzunnäj Jesús rexpejn'pacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejnga. ²³Dxejc gunaazni naa lotiä'pga, guläänini nen guejdx. Che batiobxhejnini nen rebalojni, basugajcni naani yejc baloj lotiä'pga, gunabdidxgajc Jesús:

—¿La yu' xhi rhuiilu, ä?

²⁴Luxh che bahuii bejnga räjpni:

—Rhuiä sasaj rebejn, luxh si'c yajg rhuiä lojreni.

²⁵Basusac Jesús naani yejc rebaloj bejnga. Dxejc bejn Jesús bahuii bejnga. Biajctini, zijtru gujc bahuisa'cni lo guiraa rebejn. ²⁶Dxejcti baxhaḷ Jesúsni rolizjni, räjpni:

—Basquejn, huijga rolizlu, na'c jiu'lu nen guejdx, na'c gäblu xhi gujclu lo rebejn ni yu' nen guejdx.

Basule' Pedr Jesús najc Crist

(Mt. 16:13-20; Lc. 9:18-21)

²⁷Birinäj Jesús rexpejn'pacni lo reguejdx ni ria'n nez Cesarea xten Filipino. Laḷni sasajreni lo nejz räjp Jesús loj rexpejn'pacni:

—¿Chuni'c rnii rebejn nacä narä?

²⁸Sas räjpreni lojni:

—Yu'reni rnii najclu Juan ni batiobnis, yu'zareni rnii najclu Elías, yu'zareni rnii najclu te rebejn ni gunii xtidx Dios.

²⁹Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni lojni:

—Luj najclu Crist.

³⁰Dxejcti räjp Jesús lojreni:

—Rutlojdi gäbtu chu nacä.

Gunii Jesús xho guetni

(Mt. 16:21-28; Lc. 9:22-27)

³¹Dxejcti gusloj Jesús caguluiini rexpejn'pacni, räjpni:

—Narä nacä Xi'n Dios, ni gujc Niguii. Nanabpac tedä trabajwduxh. Sibälaz rebengool ni najc guxhtis nen guedx Israel narä, näjza renani rnibee loj rebixhojz, näjza rebejn ni ruluu leii: sugu'treni narä, luxh ni riojn dxej guibansacä lo rebengut.

³²Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

³³Dxejc batzuré loj Jesús, bahuiini loj rexpejn'pacni. Dxejc gudilnäjni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.

³⁴Dxejc gurejdxni rebenxhidaal con reni najc xpejn_upacni, räjpni lojreni:

—Palga yu' chu rlanj gac xpenäpac, sucuääz gunni ni rsia' lajzni gunni, sutedni trabajw si'c tej ni caj lo crujz, sujiädna_ulni narä. ³⁵Sa'csi nani rlanj gus_ulaa xcäl_unabaj_unni, sunijtni xcäl_unabaj_unni. Luxh nani runijt xcäl_unabaj_unni xcäl_una_u'c narä, xcäl_una_u'c xtidxä, siliaapac xcäl_unabaj_unni. ³⁶Xlia' ga'p bejn guiraloj lo guedxliujre palga nitni lo Dios par tejpas. ³⁷Xhet gacdi gudeed bejn te guiban_unäj_uni Dios. ³⁸Nani guituinäj narä con rextidxä naj, cheni najc rebejn ben_udoj_ul, narä, Xi'n Dios nani gujc Niguii, situinäázani che jiädnäá reangl xten Dios che jiälää lo xcäl_urdimbicha' Xta_udä.

9 Dxejc räjp Jesús lojreni: —Rniliäpac lojtu, yu'reni suga' ree nani di guet fixgaareni abiääd xcäl_urnibee Dios.

Gubixhlo Jesús garenca

(Mt. 17:1-13; Lc. 9:28-36)

²Che gudejd xho'p dxej, Jesús cua' Pedr, näj Jacoob, näjza Juan, laatisreni huinäni yejc te danro. Ro'c gubixhlojni garenca lojreni.

³Gusloj rdimbicha' rexhajn_uni, gujc xhajn_uni nolbäj. Rut rajcti rusquijtz lajd lo guedxliujre si'c biquijtz xhajn_uni. ⁴Dxejc baluiiloj Elías näjza Moisés lojreni, cayuinäjreni Jesús diidx. ⁵Sas räjp Pedr loj Jesús:

—Dad, laaca dxunnu ree. Naj jiennu chon yuguixa', tejni xtenlu, steeni xten Moisés, steeni xten Elías.

⁶Si'c guniini sa'csi nicla niacbeeni xhini'c guiniini, sa'csi

cadxebduxh_ureni. ⁷Dxejc biääd te za bejn balaa yejcreni. Neñ zaga biejn xse' te ni räjp:

—Dee najc xi'nä nani sanälazä, colcuadiajg xtiidxni.

⁸Che batzuré lojreni, bahuiireni rutru suganäjti Jesús, xtebtis Jesús suga'.

⁹Che siädjiäjtreni dajnga, gunibee Jesús rut lojdi guiniireni xcuent ni bahuiireni, guiban_uxgaasi Xi'n Dios nani gujc Niguii lo rebengut.

¹⁰Basälcheereni rediidxre neñ lastooreni. Dxej_ucr_u canabdiidx lo sa'reni xhicha säloj guiban_usacni lo rebengut. ¹¹Sas gunabdiidxreni lojni, räjpreni:

—¿Xhicuent rnii remastr xten leii naquiinpac jiädx_uga Elías?

¹²Dxejcti bazej_ucni diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Naj a', ¿xhicuent caj lo guijtz xcuent Xi'n Dios ni gujc Niguii, sidejdni trabajwduxh, rutza jiudini? ¹³Luxh narä rniä lojtu, abiääd Elías, luxh bennäjrenini si'ctis ni rlanjreni, si'cpac ni caj loj guijtz ni rusule' xcuentni.

Basiajc Jesús te biuux ni guyu' ben_udxab neñ lastooni

(Mt. 17:14-21; Lc. 9:37-43)

¹⁴Che asiädreni cadro tre' sgaii rexpejn_upac Jesús, bahuiireni loj xhidalro bejn ni tre' lojreni, luxh cayeinäj rebejn ni ruluui leiireni.

¹⁵Che bahuii guiraa rebejn loj Jesús, bidxeloduxh_ureni, baxun_ureni, huiye'tzreni xchan lojni. ¹⁶Dxejc gunabdiidx Jesús lojreni:

—¿Xhini'c rusieinäjtu laareni?

¹⁷Sas gunii tej reni yu' lo beṅxhidaalga, räjpni:

—Dad, ree siädnää xi'nä lojlu, yu' beṅxab neṅ lastooni, nani rujn najcni gop. ¹⁸Cheni rniaaznini, rutienta'ni xi'nä, luxh riduxh bitzun ro'ni, näjza rauya'ni ro'ni, luxh cabijdzni. Aräpä loj rexejṅpacu cuääreni beṅxabga, niluxh di niajcdi nibäärenini.

¹⁹Dxejcti gunii Jesús lojreni, räjpni:

—La'tu, bejṅ ni di chalilajz, ¿gucli chu'ä lojtu te chalilajztu? ¿Gucli gusieedtu narä? iCoṭtanäni loä!

²⁰Dxejc biädnäreni biuuxga lojni. Che bahuii beṅxab lo Jesús, basnijni bi'nga, basälta'tinini lo yuj. Sädiidxni, luxh carii bitzun ro'ni.

²¹Gunabdiidx Jesús loj xtadni:

—¿Gucli rajcni si'c?

Dxejc räjp dade'ga:

—Che gujclini biuxbäz. ²²Balti huält rusälṅnini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäṅ nuunu.

²³Sas räjp Jesús lojni:

—¿Xhicuent rniabdiidxlu la sajc gacnäälü? Xhitis sajc gac par nani rililajz.

²⁴Guredxa' xtad bi'nga, räjpni:

—iRililazä! Gucnäṅ narä te chaliiru lazä.

²⁵Che bahuii Jesús bixa't xhidajl bejṅ lojni, gudidxa'ni lo beṅxabga räjpni lojni:

—Beṅxab ni rujn gop, narä canibeä, birii neṅ lastoo bi'nga. Na'cru chulu neṅ lastooni.

²⁶Dxejcru guredxa' beṅxabga, luxh basnibzejsni bi'nga, dxejcru biriini neṅ lastooni. Astoo te

beṅgut bia'n bi'nga ro'c. Xhidajl rebejṅ räjp:

—Agujtṅni.

²⁷Dxejc gunaaz Jesús ṅaa bi'nga guläsnini. Guzuliiti bi'nga. ²⁸Dxejcti che abiu' Jesús neṅ yu', gunabdiidx rexejṅpacni lojni:

—¿Xhicuent di niajcdi nibäänu beṅxabga?

²⁹Dxejc räjp Jesús lojreni:

—Di gacdi cuäätu sa' beṅxabre palga ditu cuedx-guinab lo Dios, palga ditu gucuaṅxgaa.

Gunisac Jesús xho guetni

(Mt. 17:22-23; Lc. 9:43-45)

³⁰Dxejc biriireni ro'c, gudejdreni Galilee. Luxh di rlajz Jesús niacbee rebejṅ sadejdreni nejzga, ³¹sa'csi caguluini rexejṅpacni. Cayäjpni lojreni: “Xi'n Dios ni gujc Niguii sidejdni ladzṅaa rebejṅ, niluxh sugu'trenini. Che guiza' choṅ dxej gujtṅni, sibajṅni stehuält.” ³²Niluxh laareni direni niacbee xhini'c guniini, bidxejzbareni niniabdiidxreni lojni.

¿Chuni'c sajrcu?

(Mt. 18:1-5; Lc. 9:46-48)

³³Bidzujṅtirenini Capernaum. Che biu'ni neṅ yu' räjpni lojreni:

—¿Xhini'c cagusieyitu lo nejz?

³⁴Dxejc xhet guniitireni, sa'csi laareni cagusieinäj sa'reni lo nejz don chuni'c sajrcu lojreni. ³⁵Sas gurej Jesús, dxejc gurejdxni guitzubitio'p xpejṅpacni, räjpni lojreni:

—Palga yu' chu rlajz gasajrcu lojtu, sugacxgaani si'c te nani xhet sajcti, sugunzani xtzuun chutis.

³⁶Dxejcti cua'ni tej biuxbäz, huinänini galäiireni. Dxejc gudääzni biuxbäzga, räjpni lojreni:

³⁷—Chutis ni gacnäj te rebiuxe're sa'csi rinälajzni narä, sacnäjni narä, luxh nani gacnäj narä, xhet narätis gacnäjntini, näjza xtaďä nani baxhal narä racnäjni.

Nani di guiniyaj nuunu, xladnu yu'ni

(Lc. 9:49-50; Mt.10 :42)

³⁸Dxejcti gunii Juan räjpni lojni:

—Bahuiinu lo te bejn ni rbää bendxab con xcälrnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

³⁹Dxejc räjp Jesús lojni:

—Na'c gudxojntu gunni si'c sa'csi bejn nani rujn milagwr con xcälrnibee laä digacdi guiniyagajcni narä. ⁴⁰Nani di guidxagdijl nuunu, xlaadnu yu'ni. ⁴¹Rniliäpac lojtu, chutis ni guniidx te bas nis lojtu sa'csi najctu xpejnpac Crist, siguijx Diosni xcuent nani bejnni.

Nani rujn jiajb bejn lo dojl

(Mt. 18:6-9; Lc. 17:1-2)

⁴²'Chutis ni gusiu' tej rebiuxe' ni rililajz narä nen dojl, sugal te guimolin yejnni dxejcti gucuaarenini lo nisdoo. ⁴³Palga tej naalu gun gunlu dojl, batiu'ni: hueenru natiujnglu chaläjzlu cadro yu' Dios quela sojb guiro'p naalu gusalreni luj gabijl, loj bajl ni di jiuii, ⁴⁴cadro diza xpisiujgreni guet, diza bajl jiuii. ⁴⁵Luxh palga tej ni'lu gun gunlu dojl, batiu'ni: hueenru nitiujnglu chaläjzlu cadro yu' Dios quela sojb guiro'p ni'lu luxh chäalu gabijl, lo bajl ni di jiuii, ⁴⁶cadro di xpisiujgreni guet, diza bajl jiuii. ⁴⁷Luxh palga tej balojlu gun gunlu dojl, gulääni: hueenru chäalu cadro

rnibee Dios natiä'p lojlu quela sojb guiro'p balojlu chäalu gabijl, ⁴⁸cadro di xpisiujgreni guet, diza bajl jiuii.

⁴⁹'Si'cni rloj sejd yejc xhi cos yälrajw, si'cza guiloj bajl yejc guiraareni. Guilojza sejd lo guira'ti ni rdeed bejn lo Dios. ⁵⁰Hueen najc sejd, luxh palga agudejd yäl'nadzij yejcni, čxho guntu te gacsacni nadzij? Colyajc nadzij la'tu, colguibannäsa'c sa'tu.

Baluu Jesús xcuent rälu'ro'n sa'ni

(Mt. 19:1-12; Lc. 16:18)

10 Dxejcru birii Jesús ro'c huijni nez Judea näjza nez ro' gueu Jordán stelaad. Ro'c bidojpxhidajl bejn lojni stehuält, sas guslosacni caguluiinireni si'ctis ni ruluiinireni. ²Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni: —čLa laaca gun niguii gusaan chääl'ni, ä?

³Dxejc laani bazejcni diidx, räjpni lojreni:

—čXhini'c gunibee Moisés guntu?

⁴Dxejcru räjpreni:

—Moisés basaan gudeedni te guitz gusaan chääl'ni che guro'nnini.

⁵Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. ⁶Niluxh che birixtiej ben guedxliuj, “niguii con gunaa benchee Diosreni.” ⁷“Ni'cni te niguii siriini loj xtaďni, loj xnanni te cuäznäjni chääl'ni. ⁸Niluxh renani gujc tiop bejn sajcreni si'c tejsi bejn”, dirureni gac tiop bejn, si'c tejsi bejn gacreni. ⁹Na'c gudzucaj bejn lo sa bejnni nani abachaag Dios lo sa'ni.

¹⁰Che biu'reni neṅ yu' gunabdidxsac rexpejnṅpacni lojni xcuent rediidxre. ¹¹Dxejc räjpni lojreni:

—Chutis niguii ni gusaan chäälni, sas guchṅaani ste'cani, rujnni dojl. ¹²Niluxh palga gunaa guro'n chäälni sas guchṅaani ste'ca niguii, rujnzani dojl.

Gunab Jesús gunle' Dios yejc rebiuxbáz

(Mt. 19:13-15; Lc. 18:15-17)

¹³Biädñaza rebejn biuxbáz lojni te gutzuub Jesús ṅaani yejcreni, sas gudidxa' rexpejnṅpacni lojreni.

¹⁴Che bahuii Jesús xhi cayujn rexpejnṅpacni, bidxe'chni räjpni lojreni:

—Colsaan jiääd rebiuxbáz loä. Na'c gudxojntureni, sa'csi xcälṛnibee Dios najc xten reni najc nadolajz si'c najc biuxbáz.

¹⁵Rniliäpac lojtu, chutis ni rlajz jiu' lo xcälṛnibee Dios nanab guzobdiajgreni xtidx Dios si'c ruzobdiajg rebiuxe' xtidx xtadreni. Palga dini gun si'c, dini jiu' lo xcälṛnibee Dios.

¹⁶Dxejcti gudäáz Jesús rebiuxbáz, bazujzani ṅaani yejcreni, gunab Jesús gunle' Dios yejcreni.

Te bi'n ni rapduxh guninäj Jesús

(Mt. 19:16-30; Lc. 18:18-30)

¹⁷Che birii Jesús loj xnejzni, rurux te niguii biääd lojni, bazuxhijbni. Dxejcti gunabdiidx niguiiga lojni räjpni:

—Dad, beṅsa'c, ¿xhini'c gunä te xca'ä yälṅabajṅ par tejpas?

¹⁸Sas räjp Jesús lojni:

—¿Xhicuent rniilu loä beṅsa'c? Tejtisni najc beṅsa'c; Diostis najc beṅsa'c. ¹⁹Najnlu xhini'c gunibee Dios gunni: “Na'c guesnäjlu chääḷ sa'lu, na'c ju'tlu, na'c cuanlu, na'c gusgueelu chutis, na'c cuäälü yejc xhixten sa'lu, huinälajz xtadlu, xnanlu.”

²⁰Dxejc räjp niguiiga lojni:

—Dad, guiraa redee cayunä cheni gucäli bi'n.

²¹Che bahuii Jesús lojni, huinälajznini, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcuentni loj rebejn nani diga'p, dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

²²Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

²³Dxejc bahuii Jesús guideb gabi lojreni, räjpni loj rexpejnṅpacni: —Naganduxh jiu' rebejn nani yu'duxh xhixtenni lo xcälṛnibee Dios.

²⁴Dxejc bidxelo rexpejnṅpacni che biejn diajgreni rextiidxni. Dxejc räjp Jesús lojreni stehuält:

—iAitu xi'nä!, lacti naganduxh gusaan renani sanälajz xhixtenni gunibee Diosreni. ²⁵Guyasiru ted te cameii ni' te guux quela gusaan te bejn ni yuduxh xhixtenni gunibee Diosni.

²⁶Dxejc bidxeloduxhreni, räjpreni lojni:

—¿Chuxhni'c sajc laa lo dojl?

²⁷Dxejc bahuii Jesús lojreni, räjpni:

—Bejn digacdi guslaa sabejn̄ni,
Dioſtis rajc ruſlaa bejn̄ lo dojl,
sa'csi Dios rac rujn̄ guira'ti.

²⁸Sas gusloj Pedr cayäjp lojni:

—Naj nuure ahuilälaznu guira'ti te
siopnajl̄nu luj.

²⁹Dxejc räjp Jeſús:

—Rniliäpac lojtu, chutis
nani cuälaz rolizni, rebejt̄zni,
rebiaj̄jni, xtadni, xnanni,
chääl̄ni, rexi'n̄ni, rexyuj̄ni,
xcäl̄nasa'c narä, näjza xcäl̄nasa'c
xtid̄x Dios, ³⁰sica'ni lo gued̄xliuj̄re
te gayuu huält̄ xhidaj̄lru. Sica'ni
rolizni, rebejt̄zni, rebiaj̄jni,
xnanni, rexi'n̄ni, rexyuj̄ni.
Sisiunaj̄lrenini naj, dxejc
xhaguibaa sica'ni yäl̄nabaj̄n par
tejpas. ³¹Xhidaj̄l rebejn̄ nani sajc
lo gued̄xliuj̄re xhet sajc̄direni
xhaguibaa; niluxh rebejn̄ nani xhet
sajc̄di lo gued̄xliuj̄re, xhaguibaaru
gasaj̄creni.

Gunisac Jeſús diid̄x xho guetni

(Mt. 20:17-19; Lc. 18:31-34)

³²Dxejcru sasaj Jeſús, nijd̄ni lo
rexpejn̄pacni sääreni Jerusalén,
luxh cadxeloj̄reni. Cadxejbza rebejn̄
nani sanaj̄lreni. Dxejcti guļāsac
Jeſús rexpejn̄pacni lo rebejn̄, gusloj
cayäjp̄ni loj̄reni guira'ti nani sacni.

³³Räjp̄ Jeſús:

—Sionnu Jerusalén, luxh narä,
Xi'n Dios nani gujc Niguii, sidedä
ladz̄naa rebixhoj̄z nani rnibee
näjza rebejn̄ ni ruluii leii. Luxh
sinibeereni guetä. Suteedreni narä
lo reben̄zijt̄ nani digac xpejn̄ Israel.
³⁴Suxhisnäj̄reni narä, siguijn̄reni
narä, sutiobxhejn̄zaren̄i loä, dxejcru
sugut̄treni narä. Che riojn̄ dxej
sibaṅsacä.

Gunab Jacoob näjza Juan te yäl̄nasa'c

(Mt. 20:20-28)

³⁵Dxejcti gubig Jacoob näjza Juan,
rexi'n̄ Zebedeo, räjp̄reni lojni:

—Dad, rlaaznu gunlaalu nani
guiniabnu lojlu.

³⁶Dxejc räjp̄ Jeſús loj̄reni:

—¿Xhini'c rlaiztu gunä xcuent
la'tu?

³⁷Räjp̄reni:

—Cue tejnu cuä'lu ladbee, xteenu
cue cuä'lu ladbäj̄gw che acanibeelu.

³⁸Dxejc räjp̄ Jeſús loj̄reni:

—Ditu gan xhini'c rniabtu. ¿Xhixh
sajc yätu nani yä'ä? ¿Xhixh sajca
guirobnistu si'cni guirobnisä?
Nalaj̄znu, xhixh sajc tedtu trabaj̄w
nani tedä narä.

³⁹Sas räjp̄reni lojni:

—Sajc tednuni.

Dxejc räjp̄ Jeſús loj̄reni:

—Guliini sajc yätu nani yä'ä, luxh
guirobnistu si'cni guirobnisä narä.

⁴⁰Te cue tejt̄u ladbee xtenä steetu
cue xladbägwä, xhet xtenä dini te
gunid̄xäni. Rebejn̄ nani agule Dios,
reni'c cue xladbeä, xladbägwä.

⁴¹Luxh che biejn̄ diaj̄g stzuureni
bidxe'chreni loj̄ Jacoob näjza loj̄
Juan. ⁴²Sas gurej̄dx Jeſúsreni,
räjp̄ni loj̄reni:

—La'tu najntu renani rnibee lo
rebejn̄ nani digac xpejn̄ Israel,
rdxaglaiz gasaj̄crueni lo rebejn̄.
Luxh rebejn̄ ni saj̄c rnibeduxh̄reni
lo rebejn̄. ⁴³Xhet si'c̄di guntu la'tu.
Chutis nani rlaiz gasaj̄cru lojtu,
riäj̄l gacni mos lojtu. ⁴⁴Luxh chutis
la'tu nani rlaiz gasaj̄cru, riäj̄l gacni
xmos guiraatu. ⁴⁵Di Xi'n Dios
ni gujc Niguii niäd, te ga'ptisni

mos, biäädzani te quiixni con xcäl'nabajñni te laa xhidajl bejn lo dojl.

Basiajc Jesús Bartimeo, ni natiä'p lojni

(Mt. 20:29-34; Lc. 18:35-43)

⁴⁶Dxejcti biäädreni Jericó. Che birii Jesús ro' guedx Jericó con rexpeljpacni näjza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn. ⁴⁷Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlajz narä.

⁴⁸Xhidajlreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlajz narä.

⁴⁹Dxejc guzudxi Jesús, gunibegajcni gucrejdx niguiiga. Gurejdxreni lotiä'pga, räjpreni lojni:

—Basutijp lajzlu, gusulii, luj cabejdxni.

⁵⁰Sas ro'ca xhablajzni gudixhni, huisuliini, biäädtini lo Jesús.

⁵¹Dxejc räjp Jesús lojni:

—Naja', çxhini'c rlanjlu gunä?

Dxejc räjp lotiä'pga loj Jesús:

—Dad, rlazä gunlu fiä.

⁵²Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuiini.

Sanajltini Jesús lo nejz.

Biu' Jesús Jerusalén

(Mt. 21:1-11; Lc. 19:28-40; Jn.12 :12-19)

11 Cheni sadzujñreni gajxh Jerusalén, gudejdreni nen reguedx Betfagé näjza nen guedx Betania nez cuä' dajne' ni laa dan

Oliib. Baxhal Jesús tiop xpejnpacni, ²räjpni lojreni:

—Colchäj guedxe' ni ria'n nez lojtu. Che guidzujntu ro' guejdxga, sidxäلتu te bure' ni caduu. Gajd bejn cuibni. Colxhecní, coltanägajcni. ³Palga yu' chu naa lojtu: “¿Xhicuent rujntu si'c?” Colye'tztis: “Dad caquiinni.” Dxejc suxhalgajcni bure'ga ree.

⁴Säätireni ro'c. Dxejru ronejz bidxälreni te bure' caduu ro' te lä'. Dxejcti baxhecrenini. ⁵Gaii bejn ni tre' ro'c räjp lojreni:

—¿Xhicuent caguxhectuni?

⁶Dxejc räjpreni loj rebejnga si'cni räjp Jesús lojreni gäbreni. Basangajc rebejnga sanäreni bure'ga. ⁷Dxejru biädnäreni bure'ga loj Jesús.

Badzuubreni xhablajzreni dejt bure'ga. Gubijbti Jesús bure'ga. ⁸Xhidajlza bejn gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

⁹Rebejn ni nijd lojni näj reni sanajl dejtzni guredxa'reni, räjpreni:

—iColguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni. ¹⁰Coldeed xquixhtiooz loj Dios sa'csi agubiré xcäl'rnibee toxtadnu David.

iColguiliä'p xpala'n Dios ni yu' jiaro!

¹¹Dxejcti biu' Jesús nen guedx Jerusalén. Biu'zani nen guidoro. Che bahuii Jesús guira'ti ni cayajc nenga, sanäni guitzubitio'p xpejnpacni, sääreni Betania sa'csi agudxej.

Batzubde Jesús yejc te yagiigw ni xhet cajdi lojni

(Mt. 21:18-19)

¹²Che bara yääl, biunejzreni Betania. Dxejcti gusloj calaan Jesús,

¹³bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. ¹⁴Sas gunii Jesús räjpni loj yag iigwga: —Rutru gauudi ninejxh ni rcaj lojlu par tejpas.

Biejnza diajg rexpejnpacni.

Gulää Jesús renani ruto' näj renani rsii nen guidoo

(Mt. 21:12-17; Lc. 19:45-48; Jn.2 :13-22)

¹⁵Dxejcti bidzujnreni guedx Jerusalén. Biu' Jesús nen guidoro. Gusloj cabääni renani ruto' näj renani rsii nen guideoga. Niluxh batiejxhni rexmex renani ruchaa meel, näjza reyagxhil xten renani ruto' paloom. ¹⁶Diruni nusaan nidednäjnreni xhicos nez nen guideoga. ¹⁷Dxejc caguluiinireni, räpgajcni lojnreni:

—¿La et screedi caj loj guiitz?

“Xyu'ä sirilaj yu' cadro rninab guiraa rebenguedxliuj lo Dios.” La'tu abejntuni si'c xpiliää gubaan.

¹⁸Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn rdxejoj rextidx Jesús. ¹⁹Che biu' guxhijn, birii Jesús guejdxga.

Gubijdz yagiigw ni bidzubde

(Mt. 21:20-22)

²⁰Che bara yääl gudejdreni, bahuiireni agubijdz guideb yagiigw, näj rexlobaani. ²¹Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcnii, agubijdzni.

²²Dxejcti gunii Jesús räjpni lojni: —Colchalilajz Dios. ²³Rniliápac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini. ²⁴Ni'cni rniä lojtu, xhitis nani guiniabtu lo Dios che rninäjtni, colchalilajz xca'tuni, dxejc sica'tuni. ²⁵Luxh che guiniabtu Dios, palga yu' chu loj rdxechlajztu, colsiäjla lajztu, te näjza Xtadtu nani yu' xhaguibaa gusiäjla rextojltu. ²⁶Palga ditu gusiäjla lajztu con resa'tu, diza Xtadtu nani yu' xhaguibaa gusiäjla lajzni rextojltu.

Yälrnibee xten Jesús

(Mt. 21:23-27; Lc. 20:1-8)

²⁷Sas bidzunsacreni guedx Jerusalén. La_l ni sasaj Jesús nen guidoro, rebixhojz nani rnibee, näjza rebejn ni ruluii leii, näjza reguxhtis gubig lojni. ²⁸Räjpreni lojni:

—¿Xhi yälrnibee rajplu, ni'c rujnlu redzuunre? ¿Chu baniidx yälrnibee rujnlu redzuunre?

²⁹Dxejc räjp Jesús lojnreni:

—Guiniabdidxäza lojtu.

Coltzu'ni loä, dxejcti guiniäza xhi yälrnibeere rapä ni'c runä redzuunre. ³⁰¿Chu baxhal Juan ni batiobnis? ¿La Dios o la rebejn? Colnii loä naj.

³¹Dxejcti gunii loj sa'reni, räjpreni:

—Palga jie'tznu “Dios”, naani “¿xhicuent ditu nililajz xtiidxni?”

³²Diza niacti niäjbreni “rebejn” sa'csi rdxejbreni rebenxhidaal, sa'csi guiraa rebejn huililajz Juan gujc te bejn ni guniipac xtidx Dios.

³³Dxejcti guniireni, räjpreni loj Jexús:

—Dinu guidon.

Sas räjp Jesús lojreni:

—Dizana guiniä xhi yälrnibeere rapä runä redzuunre.

Te xcuent rebenguixd ni rbäzlaa

(Mt. 21:33-46; Lc. 20:9-19)

12 Dxejcti gusloj caguseed Jesús rebejn con recuent ni rului, räjpni:

—Yu' te bejn bazuj yaguub loj xyujni, bejnzani bazaani, dxejcru gudäänni te lajt cadro jä't uubga. Dxejcti bejnni te yu' jiaa, te ro'c cue nani ga'p lo xyujni.

'Badedlaatinini loj gaii bejn, sä'tini zijt. ²Che bidzujn xpäii uub, baxhal baxhuaan uubga te xmosni loj rebejn ni rbäzlaa ro'c, te xca'ni uub nani riäjł xca' bejnga. ³Dxejc rebejn ni rbäzlaa ro'c gunaazreni mosga, gudijnrenini, luxh bazejcrenini siini ganaxni.

⁴Dxejcru baxhal baxhuaanga stee mos lojreni. Niluxh laareni bacuaareni guijni, gudilguixdreni yejc mosga, xho rniajni gubi'ni. ⁵Dxejc baxhal bejnga stee mos, dxejc bagu'trenini. Baxhalni xhidajlrurenini. Gaii gudilguixdreni, sgaiini bagu'treni.

⁶'Yu'za tejtis xi'nni, luxh sanälajznini. Por lult näjza xi'nni baxhalni, naani: "Siucareni xi'nä."

⁷Dxejc rebejn nani rbäzlaa ro'c räjp loj sa'reni: "Dee najc laa ni jiannäj ree. Coltaa, guigu'tnuni, te xca'nu yujre." ⁸Sas gunaazrenini, bagu'trenini. Guläätirenini lo yujga.

⁹¿Xhicha gun baxhuaan yaguubga rebejnre? Siädni luxh sugu'tni rebejnre, dxejcti gudeedni yujga loj ste'ca bejn.

¹⁰¿La gajdtu goł guijt ni rnii scree?

Guij nani guläcaj renani

runchee yu',

ni'c agujc mastr ni guzuj galoo.

¹¹Dad xtenu bejn scree, cos sacduxhni nezlojnu.

¹²Dxejc rlajz reguxhtis nani bacuadiajg cuentre niniaaz Jesús, sa'csi gubeereni laareni cacuaa Jesús diidxre. Sa'csi bidxejbreni rebexhidaal, ni'c basa'nrenini, sä'tireni.

Diidx xcuent reimpuest

(Mt. 22:15-22; Lc. 20:20-26)

¹³Dxejcti baxhalreni gaii xpejn refarisee näjza gaii xpejn Herodes loj Jesús te gula'tzreni don xho gac guiniaazreni Jesús. ¹⁴Dxejcti biädreni, räjpreni lojni:

—Dad, nadonnu luj najclu te bejn ni rnii. Par luj guiraasi bejn sajc tebloj, sa'csi dilu fii la sajc bejn o la xhet sajcđi bejn. Luj ruluiipaclu xhini'c rlajz Dios gun bejn. ¿La laaca quiix bejn reimpuest lo xcubieer César o la xhet laadi? ¿La guidiixnu o la dinu guidiix?

¹⁵Dxejcti laani gubegajcni rujnsireni si'cni rniabdiidxreni. Räjpni lojreni:

—¿Xhicuent runnäjtü narä scree? Coltanä te meelga loä, te fiä lojni.

¹⁶Badeedtireni te meel lojni, dxejc räjpni lojreni:

—¿Chu yejc caj lojni, chu laj caj lojni?

Dxejc räjpreni:

—Xten César.

¹⁷Dxejc räjp Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejn̄ga con xtiidxni.

Yäl̄rniabdiidx xcuent yäl̄rbansacni lo rebengut

(Mt. 22:23-33; Lc. 20:27-40)

¹⁸Sas biädhuii resaducee loj Jesús. Resaducee najc rebejn̄ nani rnii di rebengut guibansac. Dxejc gunabdiidxreni lojni, räjpreni:

¹⁹—Dad, xleii Moisés ruluii loonu, palga guet te niguii luxh gusa'n̄ni chäälni ruti xi'n̄ni, nanabpac xca' bejtzni chäälni, te chu xi'n̄ni con laani lacua niu' xi'n̄n tobejtzni.

²⁰Guyu' gajdz niguii, bejtz najcreni. Sas cua' niguigalooa chäälni.

Che gujtni ruti xi'n̄ni. ²¹Dxejcti

cua' ni rojpga gunaaga. Che gujtni, rut gajc̄di xi'n̄ni. Si'cza gusajc ni riojn̄ga. ²²Si'cza guläznäj gunaaga guigajdzreni. Per nicla

tej reni di xi'n̄reni niu'. Dxejcti gujtz̄a gunaaga. ²³Guigajdzreni guläznäjreni gunaare. Cheni guibansacreni lo rebengut, ¿chu chäǟl gacni?

²⁴Dxejc bazejc Jesús diidx lojreni, räjpni:

—Et laadi rniitu, sa'csi ditu gumbesa'c rextidx Dios nani bacuaa reniguii lo guijtz, dizatu gumbee yäl̄rnibee xten Dios. ²⁵Che guibansacreni loj rebengut, direni guch̄naa, rutza gudeed̄tiren̄i te guch̄naaren̄i. Niluxh sajcreni si'c najc rexangl Dios nani yu' xhaguibaa. ²⁶Palga canabdiidxtu la r̄bansac rebengut, ¿la di lajztu guisaj biltu guijtz ni bacuaa Moisés? Moisés bacuaa nani gunii Dios lojni nen̄ bajl, räjpni: “Narä nacä Xtios Abraham, Xtios Isaac, Xtios Jacob.” ²⁷Palga Dios najc Xtios rebejn̄re,

direni gac bengut, nabannäreni Dios. Et laadi najc xhigabtu.

Yäl̄rnibee ni sajrcu

(Mt. 22:34-40)

²⁸Dxejrcu bidzuj̄n tej rebejn̄ ni najn leii, biejn̄ diajgni xhi caniireni, biejn̄za diajgni laaca gunii Jesús lojreni.

Dxejcti gunabdiidxni loj Jesús:

—¿Xhi mandamient sajrcu lo guiraaren̄i?

²⁹Dxejc räjp Jesús lojni:

—Mandamient nani sajrcu loj guiraaren̄i najc dee: “Bacuadiajg luj, guejdx xten Israel, Dad Xtiosnu, Dad tejtis najcni. ³⁰Chanälajzlu Dad Xtioslu guideb lastoolu, näj xaimlu, näj guideb xcäriejn̄lu, näjza guideb xcäl̄nadiplajzlu.” ³¹Sigajcza najc mandamient ni rojpga: “Huinälajz sabejn̄lu si'ctis sanälajzlu lagajc luj.” Redee najc remandamient nani sajrcu loj guiraaren̄i.

³²Dxejcti räjp bejn̄ga ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani.

³³Luxh sacduxh chanälajz bejn̄ Dios guideb lastooni, näj xcäriejn̄ni, näjza xaimni, näj guideb xcäl̄nadiplajzni, luxh chanälajzni resabejn̄ni sigajc laani. Redee sajrcu loj ni rujn̄ bejn̄ che rudedreni gojn̄ lo Dios.

³⁴Che bahuui Jesús laaca guniini, räjpni lojni:

—Guxii cayääd̄x te jiu'lu loj xcäl̄rnibee Dios.

Sas rutru biajxhdi gunabdiidx loj Jesús.

Chu xi'n̄ najc Crist

(Mt. 22:41-46; Lc. 20:41-44)

³⁵Che caguseed̄ Jesús nen̄ guidoro, räjpni:

—¿Xho mood rnii rebejn ni najn leii Crist najc xi'n David? ³⁶Sprit Dxan xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

³⁷Palga lagajc David räjp: “Dad, xtenä”, che guniini xcuent Crist, ¿xhoxh najc Crist xi'n David?

Rebenxhidaal nani yu' guejdxga bacuadiagsa'creni xtiidxni.

Gule'c Jesús xquej remastr xten leii

(Mt. 23:1-36; Lc. 11:37-54; 20:45-47)

³⁸La_lni caguseedni rebejn, räjpni lojreni:

—Col_susin, na'c gu'chtu loj rebejn ni ruluii leii. Laareni rlajz sanäj reladsiool xtenreni. Rdxag_lajzreni rnii bejn lojreni nez lo reguii.

³⁹R_lajzaren_i cuer_eni cadro rbej renani sajcr_u nen reguidoo näjza cadro ru' relanij. ⁴⁰Rudzuc_{aj}zaren_i xhixten reb_iuud, rniizaren_i xhidalduxh diid_x che ro_lreni le', te rusäuuren_i loj rebejn. Castigwroru gac redee.

Gojn xten te biud prob

(Lc. 21:1-4)

⁴¹Dxejcti gurej Jesús cuä' caj cadro rusäl bejn gojn. Cahuiini cagusäl rebejn meel nen cajga. Xhidajl reni rajp cagusäl xhidajl meel nenga. ⁴²Che biäd te biud prob, basäl_{ni} tiop melbäs ni saj_c si'cti tej centaab. ⁴³Dxejcr_u gurejdx Jesús rexpejn_{pac}ni, räjpni lojreni:

—Rniliäpac lojtu, biud probre basäl xhidajlru lo guiraa renani basäl nen cajre, ⁴⁴sa'csi guiraaren_i abasäl che'nsi xhixtenreni. Luxh

gunaare basäl guiraa nani rajpni. Ni'ctis najc nani gaunäjni.

Gunii Jesús sibijl guidoo

(Mt. 24:1-2; Lc. 21:5-6)

13 Cheni sariireni nen guidoro, räjp tej rexpejn_{pac}ni lojni:

—Dad, bahuii lacti reguij, lacti reyu'.

²Dxejcti räjp Jesús lojni:

—¿La rhuiilu loj reyu're? Ni_{cl}a tej guij diija'n dzuub yejc sa'ni, guiraliireni sire'ch.

Recos ni gac che ameer nitloj guedxliuj

(Mt. 24:3-28; Lc. 21:7-24; 17:22-24)

³Dxejc sobga' Jesús yejc dajne' ni laa dan Oliib, cahuiini nez ro' guidooga. Che sugaxhtebreni, gunabdiidx Pedr näj Jacoob näjza Juan näjza Andrés lojni, räjpreni:

⁴—Gunii loonu, ¿guc gac dee?

¿Xhi guihuiinu te gacbeenu asiäddzungajxh soob guiraa rediidxre?

⁵Dxejcti gusloj gunii Jesús lojreni, räjpni:

—Col_huii, te rut gusgueedi la'tu, ⁶sa'csi xhidalduxh bejn jääd con laä, gäbreni: “Narä nacä Crist”, luxh rniisireni si'c, susguezaren_i xhidajl bejn.

⁷Che jiejn diajgtu yu' guer näj yäl_nadxeeb xten guer, na'c guidx_ejb_{tu}. Nanab_{pac} gacni; et dxejcdi nitloj guedxliuj.

⁸Säjs naciön yejc sanacion_{ni}, näj yäl_{rn}ibee yejc sayäl_{rn}ibeeni. Xhidajl lajt saj_c xu, siliaanza bejn, luxh säjs rebejn yejc sa'ni. Redee najc ni guisloj guidx_ejb, gachuinza lajzni.

⁹Dxejc la'tu col̄susin sa'csi suteedreni la'tu ladznaa reguxhtis, siguijnzareni la'tu nen̄ reguidoo. Sacrejdxtu lo regubieer nājza loj rereii xcāl̄nasa'c narā, te si'c gac guiniitu xtidxā lojreni.

¹⁰Nanabpac guirechxgaa xtidx Dios loj guiraa reben̄ guedxliuj. ¹¹Che guiniaazreni la'tu, che chanāreni la'tu loj reguxhtis, na'c gunxgaatu xhigab xhi diidx guiniitu. Col̄nii nani jīājttis yejctu dxejc, sa'csi xhet la'ditu ni guinii, Sprit Dxan xten Dios ni guinii. ¹²Luxh suto' bejn̄ lagajc bejtzni te guet bejtzni. Suto'za dad lagajc xi'n̄ni. Sājs rebuiux yejc rexcusajnni te guet reguzajnga. ¹³Sidxechlajz guiraa rebejn̄ lojtu sa'csi najctu xpenā; nani ted guiraa retrabajwre, ni'c gudeed Dios xcāl̄nabajnni.

¹⁴Che fiitu loj nani najc yālr̄dxechlajz, nani najc yālr̄runitloj, nani gunii Daniel ni gunii xtidx Dios. Che fiitu nani suga' cadro di nunyāj̄l̄ suuni, dxejcti suguxun̄ renani yu' nez Judea chāāreni nez nen̄ redajn. (Nani gōl̄ guijtzre sugabeenini.) ¹⁵Bejn̄ nani suga' yejc yu' na'c jīājtni jiu'ni nen̄ te yu' xca'ni gaii xhixtēni. ¹⁶Nani yu' loj nīaa, di gal̄ jīāj̄t te xca'ni xhablajzni. ¹⁷¡Aii! Xhiza nalas chu regunaa ni nuu bāz, luxh renani rusiā' xi'n̄ni, nen̄ redxejga. ¹⁸Col̄nab loj Dios na'c sactu scree nen̄ rebāinajl̄. ¹⁹Nen̄ redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni. ²⁰Paru di Dad gusia'tz redxejga, nicla tej bejn̄ di laa. Susia'tzni redxejga sa'csi sanāljazni rexpejn̄ni nani aguleni.

²¹Dxejc palga yu' chu naa lojtu: “Col̄huii, aree Crist”, o “Col̄huiire, ani suga' rec”, na'c chalilajztuni.

²²Sa'csi su' bejn̄ nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueerēni, te palga sajcn̄i, rlajzreni gusgueelireni renani agule Dios. ²³Ni'cni la'tu col̄susin; agunixgā lojtu guira'ti ni gac.

Xho gac che jīād̄d Xi'n Dios ni gujc Niguii

(Mt. 24:29-35, 42-44; Lc. 21:25-36)

²⁴Neñ redxejga, cheni luux retrabajwduxhga, sicājy lo gubijdx, luxh diru bāii gusanij. ²⁵Sitejb rebal̄xhaguibaa, sinibsejs recos nani nasnāj rebal̄xhaguibaa.

²⁶Dxejcti suhuii rebejn̄ loā, Xi'n Dios nani gujc Niguii, siälā nen̄ reza guideb yālr̄n̄beduxh xtenā, nājza xcāl̄dimbicha'ā. ²⁷Dxejcti guxhal̄gacā rexanglā jīād̄tojpreni renani guleā guideb lo guedxliuj, cat nalooli guedxliuj nājza cadro nalooli guibaa.

²⁸Col̄guisieed nani ruluii yagiigw. Cheni rii rebāte' lojni luxh che rcaj balajg lojni, acaxhnajntu bāii gusguij asadzungajxh. ²⁹Sigajcza, che fiitu acayajc recosre, sabeetu asiäd̄gaxhā, ameer guidzunā. ³⁰Rniliāpac lojtu, rebejn̄ ni nabajn̄ dxejc, direni nitloj, fixgaareni gac recosga. ³¹Sinitloj guibaa nājza guedxliuj, rextidxā di nitloj.

³²Naj, rut najndi guc gac recosga, nicla rexangl Dios ni yu' xhaguibaa, niclaza narā Xi'n Dios, Xtadātis najn.

³³Col̄huii, col̄susin, col̄nab loj Dios, sa'csi ditu gan guc guidzujn̄

redxejga. ³⁴Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susin nani canäj rolä'. ³⁵Si'cza colsusin, sa'csi ditu gan guc jiaäd baxhuaan yu'ga, la jiaädni gudxej, o la jiaädni garol yääl, o la cäy, o la jiaädni rsil. ³⁶Colsusin, te di guiga'tu nagayejstu che guidzujñni. ³⁷Rediidx nani rniä lojtu, loj guiraa rebejn rniäni: colsusin.

Ruchaagreni diidx te guiniaazreni Jesús

(Mt. 26:1-5; Lc. 22:1-2; Jn.11 :45-53)

14 Riäädx tiop dxej guidzujñ lanij, dxej ni ruzaa lajzreni gulaareni ladznaa reEgipto. Nen redxejga rajwreni yätxtiil nani di saguij. Rebixhojz nani rnibee nen guidoo xten rexpejn Israel näj rebejn ni ruluii leii rlaizreni niniaazreni Jesús con yälrusguee, te nugu'trenini. ²Dxejcti räjpreni lo sa'reni: —Na'c jiennu scree nen redxelani, te na'c gun benguejdx biey.

Te gunaa ni basäl se't yejc Jesús Betania

(Mt. 26:6-13; Jn.12 :1-8)

³Yu' Jesús Betania, rolijz Simón, nani guyu' guejch ni ral tiejxhni. Che sobga'ni lo mex, biääd te gunaa ca' te bo'tguij yu' setnard nenni. Rlianexhduxhni, sacduxhni. Dxejc gudi'chni yejn bo'tguijga, te basälni se'tga yejc Jesús. ⁴Yu'za gaiireni ro'c ni bidxe'ch, räjp loj sa'reni: —¿Xhicuent banijtni setnejxhga? ⁵Paru nido' se'tga, nijni si'cti chon gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

⁶Dxejc räjp Jesús lojreni: —Colsaanni, ¿xhicuent rudxoijntu nani cayujn gunaare? Cos sacduxh dee bennäjni narä. ⁷Guideb ni guibajntu, su' rebejn nani xhet rajpdi lojtu, luxh che rlaiztu sajc gacnäjtireni. Narä et xchejdi chu'ä lojtu. ⁸Gunaare abejnni nani gujctis bejn. Abaslanexhxaani tiexhä, te chää tiexhä nen baa. ⁹Rniliápac lojtu, cadrotis guidzujñ xtidx Dios, guideb lo guedxliuj, siniizareni xcuent nani bejn gunaare, te guinaj lajzreni gunaare.

Rlaiz Judas guto' Jesús

(Mt. 26:14-16; Lc. 22:3-6)

¹⁰Dxejcti huij Judas Iscariot, nani najc tej retzubitio'p xpejñpac Jesús, loj rebixhojz nani rnibee te guto'ni Jesús lojreni. ¹¹Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguuil Judas xho guto'ni Jesús.

Gudauxchej Dad con rexpejñpacni

(Mt. 26:17-29; Lc. 22:7-23; Jn.13 :21-30; 1Co. 11:23-26)

¹²Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gulaareni ladznaa reEgipto. Räjp rexpejñpacni loj Jesús: —¿Caro rlaizzlu chosucheenu te gauulu nadxej, dxelani? ¹³Dxejc baxhalni tiop rexpejñpacni, räjpni lojreni: —Colchäj nen guejdx, ro'c guidxaagtu te niguii ni nuu te re' nis. Colchanajl niguiiga. ¹⁴Cadro jiu'ni colye'tz loj bejn ni najc

rolizjni ro'c: "Naj Dad mastr, ¿con yu' cadre ria'n rebiooz, cadre gaunäjni rexpejnpacni nadxej, dxelanij?" ¹⁵Dxejcti guluiini lojtu te yu' ni sojb jiaaliga yejc sa'ni, ni asuchexгаа nenni. Coljujn xhi guidaunu ro'c.

¹⁶Sas huij rexpejnpacni, bidzujnreni nen guejdxga. Bidxälreni te yu' si'cni räjp Jesús lojreni. Ro'c bejnreni xhi gudajwreni dxelanij.

¹⁷Che huääz gubijdx, bidzunnäj Jesús guitzubitio'p xpejnpacni.

¹⁸Lałni sobga'reni lo mex cayajwreni, räjp Jesús lojreni: —Rniliápac lojtu, tej la'tu ni cayaunää, suto'ni narä.

¹⁹Dxejcti gusloj cayac-huin lajzreni, räjp tebgajreni lo Jesús: —¿La naräni?

Räpgajc steeni:

—¿La naräni?

²⁰Dxejcti guniini, räjpni lojreni: —La tej retzubitio'p, tej ni cayajw loj xpla'tä. ²¹Sa'csi narä Xi'n Dios nani gujc Niguii, sia'ä, si'cpacni caj loj xtiidx Dios, per xhiza nalajz niguii ni guto' narä. Huentejti na'c niagl niguiire.

²²Lałni cayajwreni, cua' Jesús yätxtiil, badeedzani xquixhtiooz loj Dios dxejc gula'nini, badeednini lojreni. Dxejcti räjpni:

—Colca' yätxtiilre. Dee najc si'c tiexhä.

²³Cuagajcni te bas. Che abadeedni xquixhtiooz loj Dios, badeednini lojreni, gu' guiraareni nen basga.

²⁴Dxejcti räjp Jesús lojreni:

—Dee najc si'c xtienä ni ruluii diidx ni biä'nnu, nani guixe' xcuent xhidajl rebejn. ²⁵Rniliápac lojtu,

diruna yä'ä bin nani rii yejc uub, dxejli yä'äni stehuält loj xcälrnibee Dios.

Gunii Jesús sinii Pedr dini gumbeeni

(Mt. 26:30-35; Lc. 22:31-34; Jn.13 :36-38)

²⁶Che gulujx bilreni te dij xten Dios, biriireni, sääreni nez dajne' ni laa dan Oliib. ²⁷Dxejcru räjp Jesús lojreni:

—Guiraatu sibälaztu narä naguxhijn, sa'csi si'c cajni lo guijtzc: "Sugu'tä baxhtoor luxh suxun rexiil."

²⁸Che guibañsacä loj rebengut, ganidä cha'a Galilee, dxejcti jäädädu.

²⁹Dxejc räjp Pedr loj Jesús:

—Palga guiraareni cuälazlu, narä dina cuälazälu.

³⁰Dxejc räjp Jesús lojni:

—Rniliápac lojlu, lagajc guxhijnre, nicla gajd guidgaii cuedxa' tiop huält, luj aguniilu choñ huält dilu gumbee narä.

³¹Luxh laani sanuutis xtiidxni, räjpni:

—Cadro guetlu setäza, dina guiniä dina gumbeälu.

Luxh guiraa rexpejnpacni gunii si'c.

Gunab Jesús loj Dios che yu'ni

Getsemaní

(Mt. 26:36-46; Lc. 22:39-46)

³²Dxejcti bidzujnreni te lajt cadre laa Getsemaní. Dxejc räjpni loj rexpejnpacni:

—Colcujc ree lałni chanabä lo Dios.

³³Dxejcru sanäni Pedr näj Jacoob näjza Juan. Dxejc gusloj cayac-huinduxh lajzni, luxh cayu'ni yälrsiaduxh. ³⁴Dxejc räjpni lojreni:

—Cayac-huinduxh lazä, an sugu'tni narä. Coljia'n ree, coltie'ch bacal.

³⁵Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc.

³⁶Räjpni:

—Abba, xtaä, luj rajc rujnlu guira'ti: badzucaj retrabajwre loä. Xhet si'cni rlazädi narä, bejn si'cni rlanjzlu luj.

³⁷Dxejc biäädni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacał? ³⁸Coltie'ch bacał, colnab lo Dios, te na'c guntu dojl. Lastootu rlanj gutie'chtu bacał, luxh tiejxhtu abadxajc.

³⁹Huij Jesús stehuält, binabni loj Dios, guniini lagajc rediidx ni guniini galoo. ⁴⁰Dxejcti biädsacni cadro tre'reni, gunazsacnireni nagayejsreni, sa'csi yuduxh bacał lojreni. Luxh direni nidxäl xhi niniireni lojni. ⁴¹Ni riojn huält biäädni, dxejc räjpni lojreni:

—Agojl colguejs, colsilajz, agujc, abidzujn or ni ted Xi'n Dios ni gujc Niguii ladznaa rebendojl. ⁴²Colchastie, colcho'. Asiäddzungajxh ni guto' narä.

Gunaazreni Jesús

(Mt. 26:47-56; Lc. 22:47-53; Jn.18 :2-11)

⁴³Canisijcni scree, che bidzujn Judas, ni najc te retzubitio'p xpejnpacni, siädnäni xhidajl bejn. Ca'reni spaad, ca'reni yajg biriireni lo rebixhojz nani rnibee, näjza rebejn ni ruluii leii, näjza rebengool nani najc guxhtis. ⁴⁴Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

⁴⁵Che bidzujn Judas, gubigni loj Jesús, räjpni lojni:

—Dad, Dad.

Sas bachagro'nini. ⁴⁶Dxejrcu gunaazreni Jesús ro'c.

⁴⁷Dxejc tej reni suga' ro'c, gulää xspaadni, gudilguijdxni xmos bixhojz nani sajrcu, batiu'ni diajgni.

⁴⁸Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaam?

⁴⁹Guiraa dxej guyu'ä lojtu nen guidoo, caguluiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

⁵⁰Dxejrcu rexpejnpacni gulälazrenini, baxuntireni.

Bi'n nani baxun

⁵¹Sanajlza te bi'n Jesús, nadejbni ganaxhtis te bariaad. Si'c gunaazrenini. ⁵²Dxejcti baxunni, libasa'nni bariaadga, sä'tini xhabäälni.

Suga' Jesús loj reguxhtis

(Mt. 26:57-68; Lc. 22:54-55, 63-71; Jn.18 :12-14, 19-24)

⁵³Dxejc biädnäreni Jesús loj bixhojz ni sajrcu. Bidojp rebixhojz nani rnibee, näj rebengool ni najc guxhtis, näjza rebejn ni ruluii leii.

⁵⁴Luxh Pedr zijt zijt sanajlni Jesús. Che bidzujntini lo xle' bixhojz ni sajrcu, gurenäjni rebejn nani rajp ro'c, cagucha' lajzni lo bajl.

⁵⁵Rebixhojz nani rnibee, näjza guiraa rebengool ni najc guxhtis, caguiilreni xhi tej xquej Jesús nidxälreni, te nugu'treni Jesús, xhet bidxälireni. ⁵⁶Xhidajl bejn gunii didxxhii, räjpreni et laadi rujn Jesús, niluxh di xtiidxreni nile', sa'csi

garen garen guniireni. ⁵⁷Dxejc huisulii gaii bejn ni guniireni stee didxxhii xcuent Jesús, räjpreni:

⁵⁸—Nuunu biejn diaagnu guniini: “Sutiexhä xyu' Dios ni guc-chee con naa rebejn, luxh chontis dxej guncheä steeni, ni nac-chee et con naadi rebejn.”

⁵⁹Nicla si'c di xtiidxreni nile', sa'csi garen garenza guniireni.

⁶⁰Dxejcti huisulii bixhojz ni sajcru galäii guiraa rebejn, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

⁶¹Laani niäuuutis ro'ni, xhet guniidini. Dxejcti gunabdixsac bixhojz ni sajcru lojni, räjpni:

—¿La luj ni najc Crist, xi'n Dios nani rliä'p bejn xpala'nni, ä?

⁶²Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguii, sobga'ä xladbee Dios ni rnibee, siäläza nen reza ni tre' xhaguibaa.

⁶³Dxejcru bixhojz ni sajcruga, batiäjsni tla' xhajnbi, räjpni:

—¿Xhi jienrunu guidiilnu diidx xcuentni? ⁶⁴Abiejn diajgtu xho guniyajni Dios. Naja', ¿xhi najtu?

Dxejcti guiraareni räjp nungäjlpac guetni.

⁶⁵Dxejc yu' reni gusloj cagutiobxhejn lojni, luxh basäuureni lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

Gunii Pedr dini gumbee Jesús

(Mt. 26:69-75; Lc. 22:56-62;

Jn.18 :15-18, 25-29)

⁶⁶Dxejc suga' Pedr lo yuj, nez lo le'ga, che biääd te xcriaad bixhojz

ni sajcru. ⁶⁷Luxh bahuiini cagucha' lajz Pedr, cadxelojni lojni. Dxejcti räjpni:

—Näj luj nadxaaglu Jesús ni siääd Nazare't.

⁶⁸Dxejc Pedr basgueeni, räjpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgaii. ⁶⁹Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

⁷⁰Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi ben Galileelu, luxh guyasi riejn rniilu si'c rni reben Galilee.

⁷¹Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniiitu.

⁷²Dxejcti barojp huält guredxa' guidgaii. Dxejc banalajz Pedr nani räjp Jesús lojni: “Che gajdli guidgaii cuedxa' tiop huält, luj gacla chon huält aräjplu dilu gumbee narä.”

Dxejc guslojni cayoonni.

Suga' Jesús loj Pila't

(Mt. 27:1-2, 11-14; Lc. 23:1-5; Jn.18 :28-38)

15 Che bara yääl bidxaag sa' rebixhojz ni rnibee, näj rebengool ni najc guxhtis, näjza rebejn ni ruluii leii, näjza guralii reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't. ²Dxejc gunabdiidx Pila't loj Jesús räjpni:

—¿La luj ni najc reii xten rexpelj Israel, ä?

Räjp Jesús lojni:

—Si'cni guniilu, si'c najcni.

³Dxejc gusloj rebixhojz nani rnibee cabe'c rexquej Jesús.

⁴Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

⁵Bidxeloj Pila't sa'csi nicla si'c xhetru guniidi Jesús.

Gunibeereni guet Jesús

(Mt. 27:15-31; Lc. 23:13-25; Jn.18 :38-19:16)

⁶Dxelanijpac ruslaa Pila't tej rebejn ni yu' latzgüib. Ruslaani chutis te ni rniab rebejn. ⁷Lo rebejn ni yu' latzgüib nadxaag te nigüii ni laa Barrabás. Bagu'tni te bejn che nu'chni lo te cuaa bejn ni gudilnäj gubieer. ⁸Dxejc bidojp xhidajl bejn loj Pila't, gunabreni lojni gunni si'ctis rujnni casob lanij. ⁹Dxejc gunabdiidx Pila't lojreni, räjpni:

—¿La rlanjtu guslaá reii xten rexpelj Israel, ä?

¹⁰Sa'csi gucbegajcni rdexchlajz rebixhojz loj Jesús, ni'c bateedrenini lojni. ¹¹Ni'cni baquiiilza rebixhojz ni rnibee rebenxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

¹²Dxejc räjp Pila't lojreni stehuält: —¿Xhini'c rlanjtu gunnäá nani rniitu reii xten rexpelj Israel?

¹³Dxej cru guredxa'reni:

—iBacuaani lo cruja!

¹⁴Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rueni:

—iBacuaani lo cruja!

¹⁵Baslaati Pila't Barrabás, sa'csi rlanjzi nuspaani lajz rebenxhidaal.

Che gulujx gunibee Pila't, bia Jesús. Bateedti Pila't Jesús loj rexsoldaadni, te xcaini loj cruja.

¹⁶Dxejc huinä rexsoldaadni Jesús nen Pretoor, yu' cadro rujnreni yälguxhtis, ro'c batojpreni guiraa resa'reni. ¹⁷Dxejcti bashuajcwreni Jesús te lad moraad, bencheereni te coron guejch basälreni yejcn. ¹⁸Guslogajc caguxhi näjrenini, caniiireni lojni:

—iColguiliä'p xpala'n reii xten rexpelj Israel!

¹⁹Batiäjlnreni te yabixhijl yejcn, batiobxhejnreni lojni, luxh guzuxhijbreni te rajnrenini.

²⁰Che gulujx basacsireni Jesús, gulääreni lad moraad ni najcwni, sas bashuajcwrenini xhajbpani. Gulägajczeni Jesús te cuaarenini lo cruja.

Bacuaareni Jesús loj cruja

(Mt. 27:32-44; Lc. 23:26-43; Jn.19 :17-27)

²¹Te nigüii ni laa Simón, ni siääd Cirene, sadejd ro'c, bazajni lo nejz. Nigüiire najc xtad Alejandro näjza Rufo. Che sadejdni nejzga, la fuerz basguurenini xcruja Jesús.

²²Dxejcti huinäreni Jesús cadro laa Gólgota, nani säloj: dan Calabeer. ²³Ro'c badeedreni lo Jesús bin nani nu'ch mir lojni, dxejc laani naaddini niä'ni binga. ²⁴Che gulujxti bacuaareni Jesús loj cruja, gudzujtreni yejc rexpelj, te don xhini'c xca' tejjarenini.

²⁵Agujc choñ or gulejn gubijdx che bacuaareni Jesús lo cruja.

²⁶Letreer cadro bacuaareni xtojlni scree bejnrenini: “Reii xten rexpelj Israel.” ²⁷Bacuaazareni lo stiop cruja tiop gubaan, tejni xladbee

Jesús, xtee xladbäjägwini. ²⁸Dxejc guzobj diidx ni caj loj guijtz nani nrii: “Loj rebenguijdx bigabni.”

²⁹Luxh renani sadejd nejzga guniyajreni Jesús, cagusniibreni yejcreni, räjpreni lojni:

—iJaa! Luj nutiejxhlu guidoo luxh chontis dxej niunchesacluni. ³⁰Naj baslaa lagajc luj, biäjt loj cruizga.

³¹Näjza rebixhojz ni rnibee, näj rebejn ni ruluu leii, baxhiznärenini, räjp loj sa'reni:

—Ste'ca bejn ruslaani, xoxh digacdi guslaani lagajc laani. ³²Naj sujiäjt Cristre, reii xten rexpejn Israel, lo cruiz te guihuiinu, te chalilaaznu.

Näj regubaan ni caj lo cruiz guniyajzarenini Jesús.

Xcälgujt Jesús

(Mt. 27:45-56; Lc. 23:44-49; Jn.19 :28-30)

³³Che goj ländxey, bicäy si'cti chon or. ³⁴Che gudejd chon orga, guredxa' Jesús dipro, räjpni con xtiidxni:

—Eloi, Eloi, ðlama sabactani? — dee säloj: Xtiozä, Xtiozä, ðxhicuent gulälazlu narä?

³⁵Biejn diajg gaii bejn ni suga' ro'c räjpni si'c, dxejc räjpreni:

—Colcuadijg, Elías cabejdxni.

³⁶Sas baxun tejni, bahuajdxni te sponj loj binagr. Dxejcru basäl'nini yejc te yabixhijl, badeednini loj Jesús te yänini, räbgajcni:

—Colgusaan guihuiinu don la siädläjd Elíasni loj cruiz.

³⁷Dxejcru guredxaduxh Jesús, gujttini. ³⁸Dxejc lajd ni najl nen guidoro biräjsni, gujcn tiop la', jiaali lo yujli. ³⁹Suga' capitán nani rnibee te gayuu soldaad nez

loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

⁴⁰Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee. ⁴¹Che guyu' Jesús Galilee birinajl regunaare Jesús, luxh bahuiirenini. Yu'za xhidajlru regunaa ni biädnajl Jesús che biädni Jerusalén.

Biga'tz Jesús

(Mt. 27:57-61; Lc. 23:50-56; Jn.19 :38-42)

⁴²Biu' gudxhijl, luxh najcni dxe bispr che rusucheereni par sabd, dxej ni rusilajz rexpejn Israel.

⁴³Biäd José ni siäd Arimatea, najcni te rebejn ni saj loj reguxhtis.

Näjza laani cabäjnzi xcälrnibee Dios. Guideb yäl'nabajn gunabni tiexh Jesús lo Pila't. ⁴⁴Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús. ⁴⁵Che räjp capitángi lojni agujt Jesús, dxejc badeed Pila't tiexh Jesús loj José. ⁴⁶Agusii José te bariaad, luxh che gulätni Jesús lo cruiz, batejbnini nen bariaadga. Dxejc gudixhni Jesús nen te biliää ni caj cuä' te guilaj, dxejcru batzugini te guiro ro' biliääga. ⁴⁷Bahuii Marii Magdalen näj Marii xnan José cadre biga'tz Jesús.

Huäjz Jesús loj rebengut

(Mt. 28:1-10; Lc. 24:1-12; Jn.20 :1-10)

16 Che gudejd sabd, dxej ni rusilajz rexpejn Israel,

Marii Magdalen nāj Marii xnan
Jacob nājza Salomee gusii setnejxh
te chatääbreni se'tga tiexh Jesús.

²Che biu' xmaan, rsildooru, che
calejn gubijdx, biäädreni ro' xpaani.

³Cayäjp loj sa'reni:

—¿Chu gudzucaj guiroga ro'
xpaani te jiu'nu?

⁴Che gudixhlojreni, bahuiireni
alagubicaaj guijga, luxh najcni
te guiroduxh. ⁵Che biu'reni neñ
biliääga, bahuiireni lo te bi'n sobga'
ladbee neñ biliääga. Najcw bi'nga
te ladnol ni najc siool. Dxejc bidxejb
regunaaga. ⁶Dxejcti räjp bi'nga
lojreni:

—Na'c guidxejbtu. Caguiiltu Jesús
ni siääd Nazare't, nani cuaj lo cruzj.
Rutiruni ree. Agubajñni lo rebengut,
coltahuii cadro gudixhreni
tiejxhni. ⁷Colchäj, colchaye'tz lo
rexpejnpacni, loj Pedr, ganidla
Jesús guidzujñ Galilee, dxejcti
guidzujñtu. Ro'c fiitu lojni, si'cni
guniini lojtu.

⁸Biriitireni ro' biliääga,
racesjlireni sa'csi cadxejbreni.
Rut lojdi guniidireni sa'csi
cadebduxhreni.

Baluiloj Jesús loj Marii Magdalen

(Jn. 20:11-18)

⁹Gubajñ Jesús loj rebengut
rsildooru che biu' xmaan. Baluilojni
galoo loj Marii Magdalen, nani
agacgulääni gajdz beñdxab neñ
lastooni. ¹⁰Dxejcti huij Marii
Magdalen, huiye'tzni loj renani
cuansanäj Jesús, renani cayac-
huin lajzni, cayoonreni. ¹¹Che
biejn diajgreni ahuäzsc Jesús lo
rebengut, luxh Marii abahuii lojni,
di lajzreni nilii.

Baluiloj Jesús loj tiop xpejnpacni

(Lc. 24:13-35)

¹²Ste'ca najc Jesús baluilojni loj
tio'p renani sasaj sääreni lo nejz.

¹³Dxejcti gubi'reni, huiye'tzreni loj
sgaiiga, luxh nicla xtidx reni'c di
lajzreni nilii.

Baxhal Jesús repost

(Mt. 28:16-20; Lc. 24:36-49; Jn.20 :19-23)

¹⁴Lult baluilojni loj
guitzubiteebreni che sobga'reni lo
mex. Gudidxa' Jesús lojreni, sa'csi
di lajzreni nilii luxh guyaa lajzreni.
Di lajzreni nilii xtidx renani bahuii
loj Jesús che gubangajcni loj
rebengut. ¹⁵Räjp Jesús lojreni:

—Colchäj guideb lo guedxliuj,
colnii xtidx Dios lo guiraa
rebejn. ¹⁶Nani chalilajz luxh
tiobnisni, siliaani loj dojl; biäda
nani di lajzni chalii sinijtñi lo
dojl. ¹⁷Niluxh remilagwre jiannäj
renani chalilajz: sibääreni beñdxab
xcuentä; siniireni ste'ca diidx;
¹⁸guiniaazreni bäl con ñaareni;
masque yäreni xhicos ni rugu't bejn,
xhet gacdireni; susujreni ñaareni
yejc rebenracxhuu luxh sijac
rebenracxhuu.

Huä'p Jesús xhaguibaa

(Lc. 24:50-53)

¹⁹Gulujxti gunii Dad Jesús
si'c lojreni. Dxejc huäjsni sääni
xhaguibaa. Ro'c huicueni cuä'
Dios ladbee. ²⁰Dxejcti laareni
bire'chreni, guniireni xtidx Dios
guiranejz. Lagajc Dadga gucnäjreni,
bejnñi milagwr te gucbee bejn
laapac xtidx Dios ni caniireni.
Sugacni si'c.

Rediidx Nani Bacuaa Lucas

Xcuent Jesucrist

Xhicuent bacuaa Lucas rediidxre

1 Xhidajl bejn abacuaa lo guiitz xcuent guiraa redzuun ni gujc nez loonu te cuäxnejzreni redzuunga ²si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu. ³Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo, ⁴te gacbesa'c guejblu ni najc didxlii xcuent guiraa rediidx ni abisieed guejblu.

**Te xangl Dios gunii xho
gaal Juan ni rutiobnis**

⁵Cheni gujc Herodes reii xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdoe bixhoz Aarón. ⁶Guירו'preni najcreni nadolajz nez loj Dios, rusoobreni xtidx Dios näjza xleii Dios, ni'c digacdi gucuaquij bejnreni xcuent nicla

tej dojl. ⁷Luxh ruti xi'nreni, sa'csi chäälni digacdi chu xi'nni. Luxh guירו'preni anajcreni bengool.

⁸Te dxej, laj ni cayujn Zacarías dzuun nen guidoro si'c bixhojz nez loj Dios, ⁹dxejc con daad bibee chuni'c jiu' nen yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni. ¹⁰Laaj ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios. ¹¹Dxejcti baluiloj te xangl Dios lo Zacarías, suliini ladbee lo dxan cadro cayejc guxhyaal. ¹²Che bahuii Zacarías lo xangl Dios, di jien xhi gunni, lacti bidxebduxhni. ¹³Sas xangl Dios räjp lojni:

—Na'c guidxejblu, Zacaríi, sa'csi Dios abiejn diajgni xtidxlu, luxh su' te xi'n chääl, Elisabe't; cuälajluni Juan. ¹⁴Sibalazduxhlu, siroob lastoolu; xhidajl bejn sibalajz sa'csi gaalni, ¹⁵sa'csi benro gac xi'nlu nez loj Dios. Dini yä bin, nicla maxcaal. Sibäjz Sprit Dhan xten Dios nen lastooni cheni gaallini. ¹⁶Sujnni gusiechlajz xhidajl rexpejn Israel, guibi'reni lo Gueb Dios. ¹⁷Juanre sinijdni loj Dad, sujni lagajc xhigab,

sajpni lagajc yälrnibee ni gojp profe't Elías, te che jiejn diajgrenti xtiidxni susiechljajz redad, susiäjlzareni diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jiädsucheeni lastoo rebejn te chalilajzreni xtidx Dad ni jiaäd.

¹⁸Gunabdiidx Zacaríi loj anglga, räjpni:

—¿Xho mood gacbeä guliilu?

Sa'csi anacä bengol, sigajcza chälä.

¹⁹Dxejcti räjp anglga lojni:

—Narä nacä Gabriel, runä dzuun lo Dios. Laani baxhalni narä te guininää luj, jiädnaä didxhueenre lojlu. ²⁰Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisaclu. Rextidxä siojbe che guidzujn dxej che riäjł gacni.

²¹Lałni cayajc dee, cadxeloj rebejn ni suga' nez ro' yudxan cabäjzreni guiríi Zacaríi sa'csi cayaclaani nen yudxan. ²²Che biríi Zacaríi, di niajcdiru niniini loj rebejn; dxej gubeereni yu' xhi cosro bahuiini nen yudxan xten guidoo. Dxej con seen guninäjni rebejnğa, sa'csi xheti xse'ni te niniini.

²³Che gulujx bejnni dzuun nen guidoro, gubi'ni rolizjni. ²⁴Che gudejd redxey dxejcti bazejn nuu Elisabe't, chäälni, báz, gaii bäii diruni niri rolizjni. Bejnni xhigab, räjpni: ²⁵“Si'c bejn Dad Dios narä naj, gucnäjni narä te diru bejn cuälaz narä sa'csi ruti xi'nä.”

Biäddeed te xangl Dios diidx lo Marii gaal Jesús

²⁶Che gudejd xho'p bäii, baxhal Dios xanglni Gabriel lo te guedx

Galilee ni laa Nazare't, ²⁷te chahuiini te dxapxteeb ni laa Marii. Agojt xtiidxni te guchnaani te dade' ni laa José. Dade're najc xagdoo torei David. ²⁸Biu' anglre cadro sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäjlju. Abenle' Dioslu loj guiraa regunaa.

²⁹Luxh che bahuiini lo xangl Dios bidxelojni lo rextiidxni, rujnni xhigab: “¿Xhicuent caniini si'c loä?”

³⁰Dxej räjp xangl Dios lojni:

—Na'c guidxeyblu, Marii; agule Dios luj. ³¹Bacuadiajg diidx. Suulu báz, su' te xi'nlu. Che gaalni guirilajni Jesús. ³²Laani sajcní te bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujn gacni reii sigajc ni gujx toxtadgoldooni David, ³³te tejpas guinibeeni loj rexi'n Israel, luxh dipac xcälrnibeeni nitloj.

³⁴Dxej gunabdiidx Marii lo xangl Dios, räjpni:

—¿Xho mood gac dee? Ni dxapxteeb narä, gajd narä gumbleä niguii.

³⁵Badzu' xangl Dios diidxre lojni, räjpni:

—Sprit Dxan xten Dios siääd lojlu, xcälrnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajcní te bendxan, sibälaj bejnni Xi'n Dios. ³⁶Näjza sa'lu Elisabe't su' te xi'nni luxh anajcni te bengool; ni'cni gunaa nani najreni digacdi chu xi'nni agujc xho'p bäii nuuni báz. ³⁷Xheti te cos ni naganduxhtej nez loj Dios —räjp Xangl Dios.

³⁸Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä.

Dxejcti biunejz angl xten Dios lojni, sä'tini.

Bihuii Marii lo Elisabe't

³⁹Nen redxejga, basquejn Marii sääni lo te guejdx ni tre' nen redajn xten Judea. ⁴⁰Biu'ni rolijz Zacarí, guniini xtidxbee loj Elisabe't.

⁴¹Che biejn diajg Elisabe't guniini, biniib xi'nni xque'ni, gudxaj Sprit Dxan xten Dios lastoo Elisabe't.

⁴²Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu. ⁴³¿Chu narä te siädhuii xnän Xtioozä narä? ⁴⁴Biejntis diagä xtiidxlu, bibalazgajc xi'nä, biniibni xque'ä. ⁴⁵Sibaa lajzlu, luj ni huililajz sisiojbpac nani gunii Xtadnu Dios.

⁴⁶Dxejc räjp Marii:

Xaimä rliä'p xpala'n Xtadnu Dios.

⁴⁷Rbalazduxhza lastoä xcuent Dios ni ruslaa narä lo dojl.

⁴⁸Sa'csi agule Dios narä, nacä te mos gunaa ni xhet sajcdi, luxh najli siniie rebejn näjza reni churu chu lo guedxliuj, chicbaani loj guiraa regunaa.

⁴⁹Sa'csi Gueb Dios ni rajp guiraa yäl'rnibee abejn xhidajl cosro loä, dxanduxh najc lajni.

⁵⁰Dini cuääz gulasajzni guiraa rebejn ni riu xtiidxni, reni rajjni.

⁵¹Xhidajl cosnagaj abejnni con lagajc naani,

abatie'chni renani rustioob lastooreni rliä'p lagajc xpala'nreni.

⁵²Abasajbni reni rnibee, per rebennadolajz bejnni gacreni benro.

⁵³Bachajni xque' reni calaan, badeedni ganax cossa'c, niluxh badzu'ni rebejn ni yu' xhixtenreni xhet badeed dini lojreni.

⁵⁴Gucnäjni nación xten xpejn Israel, ni najc xmos Dios. Di lajzni niäl nulasajznireni

⁵⁵sa'csi si'c bia'nni diidx con retoxtadgoldoonu, sinuu gulazlajzni toAbram näjza rexagdooni par tejpas.

⁵⁶Dxejc bia'n Marii rolijz Elisabe't si'cti chon bäii, dxejc gubisacni rolijzni.

Che gojl Juan ni rutiobnis

⁵⁷Che baza' xpäi Elisabe't, dxejc gojl xpäzni te báz niguiini. ⁵⁸Dxejc bidzujñ rexpisiñni näjza resa'ni biädhuiireni guiro'preni che gucbeereni lacti hueen gujc Dios con laani. Bibalaznäjrenini. ⁵⁹Che gudejd xhujñ dxej, huinäreni bäre'ga chuni bee. Rlajz rebejn nirilaj bäre'ga si'c laa xtadni, Zacarí. ⁶⁰Niluxh xnanni räjp: —Na'c, guirilajpacni Juan.

⁶¹—¿Xhicuent? —räjpreni—. Ruti xfamilu ni laa si'c.

⁶²Dxejcti gunabdiidxreni con seen lo xtad bäre'ga te gacbeereni xho rlajzni guirilaj bäre'ga. ⁶³Xtadni gunab te la' guijt, dxejc bacuaani: “Lajni najc Juan.” Dxejc guiraareni bidxeloreni. ⁶⁴Luxh lagajc dxejc gujc gunii Zacarí stehuält, dxejc

guslojni calä'pni xpala'n Dios.

⁶⁵Bidxeloduxh rexpisñreni xhini'c gujc ro'c. Luxh bire'ch diidx xcuent recosre guideb nen redajn xten Judea. ⁶⁶Guiraa reni biejn diajg rediidxga gusloj cayujñreni xhigab, dxejc gunabdiidxreni loj sa'reni: —¿Chuchani'c gac biuxe'ga? Si'c guniireni sa'csi huenliisi abenle' Diosni.

Dij ni bił Zacarí

⁶⁷Dxejcti biäd Sprit Dxan xten Dios nen lastoo xtadni Zacarí, gusloj caniini rediidx ni badeed Dios lojni, räjpni:

⁶⁸Guiliä'pnu xpala'n Dios, Xtios rexpejn Israel, sa'csi abiädhuiini loonu, ni najcnu rexpejn, te siädguslaani nuurnu nen dojl.

⁶⁹Abaxhalni loonu te bejn ni rajp yälrusladuxh bejn nen dojl. Najcni te rexagdoos toxmosni David.

⁷⁰Lagajc si'cni badeed Dios gunii redade' ni bacuaa xtiidxni lo guijtż galoo:

⁷¹Suslaani nuurnu loj reni rdxe'ch loonu, näjza ladznaa rebejn ni gulälaz nurnu.

⁷²Te gulaslajzni retoxtadgoldoonu, te soob diidx ni bia'nni con rebejnga.

⁷³Scree bia'nni diidx con toxtadgoldoonu, Abram:

⁷⁴Suslaani nuurnu ladznaa rebejn ni rdxe'ch loonu, te na'c guidxebnu chunu lojni gusoobnu xtiidxni,

⁷⁵con yäl nabansa'c näjza yälğuxhtis guiraa redxej ni guibajñnu.

⁷⁶Luxh luj, bäze', sirilajlu dade' nani rnii xtidx Gueb Dios ni yu' xhaguibaa,

sa'csi sinijdlu lo Dad te gusucheelu rexnezyulajzni,

⁷⁷te gunlu gacbee rexpejn ni xho gac laani lo dojl, te gac guibicaj xtojñreni.

⁷⁸Sa'csi Dios sanälajz bejn, näjza rulaslajzni bejn ni'cni xhaguibaali suxhalni xi'nni te jädñäni te dxecoob,

⁷⁹te gusanijni lo rebejn ni nabajn lo yälxcäjy xten dojl, näjza rebejn ni nabajn lo xpala yälğujt, te guluiini xho sänu lo xnez yälrbecdxilajz.

⁸⁰Dxejc gunis biuxe'ga, guyuduxh xcäriejn ni xcuent recos xten Dios. Gubajñni nez loj reyubijdz cheni bidzujñli dxej che baluilojni loj rexpejn Israel, che gusloj cagusule'ni xtidx Dios.

Che gojl Jesús

(Mt. 1:18-25)

2 Nen redxejga, gunibee Augusto César xcaj laj rebejn guideb guedxliuj lo xquijtżni. ²Ni'c nacobguc yälbigabre cheni najc Cirenio gobernadoos xten Siria. ³Guiraa rebejn nanab chääreni lagajc lajdxreni te ro'c guigabreni. ⁴Ni'cni birii José guedx Nazare't Galilee, te huijni Judea, lo guedx Belén, cadro gojl toDavid, sa'csi najc José xagdoos toDavid. ⁵Huinäni Marii, nani guchnaani, huijreni guedx Belén te ro'c guigabreni. Luxh nuu Marii bäz. ⁶Lalsi yu'reni guedx Belén, bidzujñ dxej ni gaal xi'n Marii. ⁷Ro'c gojl xi'n galooni,

dxejc batejbnini te xzuudni. Dxejc gudixhnini cadro rusälreni guijxh rajw reguidxaa sa'csi xhetiru yu' xcalaareni jia'nreni.

Rexangl Dios näjza rebaxtoor

⁸Gajxh guejdxga guyu' gaii baxtoor cayajpreni xhiilreni lo niaa guxhijñ. ⁹Chela baluiloj te xangl Dios, luxh bianij guideb gabireni con yälrdimbicha' xten Dios, dxejc bidxebduxhrene. ¹⁰Sas anglga räjp lojreni:

—Na'c guidxajt, narä siädnääd lojtu te didxsa'c ni suspalajz guiraa beñ guedxliuj. ¹¹Nadxej gojl neñ guejdx xten toDavid, tej ni gusläa bejn neñ dojl, laani najc Crist ni najc Dad. ¹²Dee najc te seen lojtu, sidxäلتu bäze'ga nadejbni neñ te xzuudni, naga'ni cadro rusälreni guijxh rajw reguidxaa.

¹³Lagajc dxejc guideb gabi anglga baluiloj naclejn xangl Dios, gulä'preni xpala'n Dios, räjpreni:

¹⁴Collä'p xpala'n Dios ni yu' xhaguibaali.

Suchu yälrbecdxilajz lo reben guedxliuj ni balazlajzni.

¹⁵Che gubi' rexangl Dios xhaguibaa, gusloj rebaxtoor canii loj sa'reni:

—Colcho' guedx Belén colchohuii ni guzajc ro'c ni gunii Xtadnu Dios loonu.

¹⁶Rusquenduxhrene sääreni, dxejc bidxälreni Marii näjza José näjza bäze' ni naga' neñ cadro rusälreni guijxh rajw reguidxaa.

¹⁷Cheni bahuiireni loj rebejnğa, bijreni diidx xhi räjp rexangl Dios lojreni xcuent bäze'ga. ¹⁸Niluxh guiraa reni biejn diajg rediidxre

bidxeloduxhrene xtidx rebaxtoorga.

¹⁹Niluxh Marii gulucheeni guiraa rediidx ni biejn diajgni neñ lastooni, rujntisni xhigab xcuent rediidxga.

²⁰Dxejcti rebaxtoorga gubisacreni cayolreni, calä'pzareni xpala'n Dios xcuent guiraa rediidx ni biejn diajgreni näjza ni bahuiireni sa'csi guiraani gujc si'cni räjpreni lojreni.

Cheni huinäreni Jesús chuni bee

²¹Che gudejd xhujñ dxej, huinäreni bäze'ga chuni bee, dxejc gulälajrenini Jesús, lagajc laj ni räjp xangl Dios loj Marii guirilajni galooli guuni bäzga.

²²Che basa' redxej ni gac naya te nan si'cni gunibee toMoisés loj xquijtzni, huinäjreni bäze'ga guedx Jerusalén, neñ guidoro gunabreni gacnäy Diosni par tejpas. ²³Bejnreni scree sa'csi caj lo guijtz xten Dios: “Guiraa rexingangaloo xten bejn guilia'tu lo sa'reni te gunreni xtzunä”, räjp Dios. ²⁴Bidzujñreni ro'c ca'reni te gojn si'cni rnibee rexquijtz Dios: “Tio'p gugue! o tio'p palombäz.”

²⁵Neñ redxejga, neñ guedx Jerusalén rbäjz te dade' ni laa Simeón. Najcni te beñsacduxh, randuxhni Dios, cabäjzni jiäd te bejn ni gusläa rexepejn Israel. Rbäjz Sprit Dxan xten Dios neñ lastoo Simeón. ²⁶Sprit Dxan abejn gacbeeni dini guet ansde fiini loj Crist ni guxhal Dios. ²⁷Dxejcti räjp Sprit Dxan xten Dios lojni chääni guidoro. Lañni yu'ni neñ guidoo, bidzujñ José con Marii, biädnäreni bäz Jesús, te gunnäjreni Jesús nani rnibee xtidx Dios gunreni. ²⁸Dxejc gudääz Simeón bäze'ga, gusloj calä'pni xpala'n Dios, räjpni:

²⁹ Dad, asajc gusaanlu guetä con
yälrbédxilajz,
sa'csi abasooblu nani bia'n diidx
gunnäjlü xmoslu.

³⁰ Sa'csi abahuiloä nani siädgusläa
nuurnu neñ dojl,

³¹ ni abasujlu nez loj guiraa reben
guedxliuj.

³² Laani najc bianij ni susanij loj
rebejn ni di gac xpejn Israel,
näjza nani gac xpala'n rexpejnlu
guedx Israel, lajdxlu.

³³ Bidxeloj José näjza xnan Jesús
rediidx ni canii Simeón xcuent
bäze'ga. ³⁴ Dxejc benle' Simeón
yejcreni, dxejc räjpni lo Marii xnan
Jesús:

—Bahuii gan; bäze're biääd te
loj rexpejn Israel chu reni sibälaz
xtiidxni, te chuza reni sililajz
xtiidxni. Laani gacni te seen nani
sibälaz bejn, ³⁵ te si'c jienloj xhi
xhigab rujn cade tej rexpejn Israel
neñ lastooreni. Dxejcti par luj sajcn
asdoö chääz te spaad lastoolu, sa'csi
gac-huinduxh lastoolu.

³⁶ Suga'za te nane' ni laa Ana
ro'c, rniini xtidx Dios xcuent recos
ni churu gac. Najcni xindxa'p
Faniel, ni najc fami_l xten Aser.
Anajcni bengolduxh. Bachñaani che
najcni dxaphuin, luxh gajdzis iiz
gulänäjni chäälni che bia'nni biuud.

³⁷ Najcni te gunabiüud ni yu' tajbitajp
iiz. Diruni guirii guidoro, ro'ctis
yu'ni dxej, yääl te yu'tisni lo Dios
con yälrucua'n näjza yälrbédx-rniab
lo Dios. ³⁸ Che gubigni lojreni lagajc
dxejc, badeedni xquixtios lo Dios
sa'csi abidzujn tej ni gusläa rebejn
lo dojl. Dxejc gusloj canii diidx
xcuent báz Jesús loj guiraa renani
cabäjz yälrusläa xten Jerusalén.

Che gubi'reni guedx Nazare't

³⁹ Che gulujx bejn xcuzajnni
guiraa recos ni caj lo xquijt Dios
gunreni, gubisacreni Galilee, lo
guedx Nazare't, lajdxreni. ⁴⁰ Gunís
biuxe'ga, guc nadaanni, guc
nasinruzani sa'csi cayacnäj Diosni.

Che biu' Jesús guidoro

⁴¹ Casob iiz rij rexcezajn Jesús
guedx Jerusalén te rinäreni te
gojn xten lanij pascw. ⁴² Che basa'
Jesús tzubitio'p iiz, huij guiraareni
guedx Jerusalén si'c najc costumbr
gac lanijga. ⁴³ Che gulujx lanijga,
gubisacreni. Bia'n Jesús guedx
Jerusalén, luxh nicla xnanni
ni claza José direni niacbee bia'nni.
⁴⁴ Bejnreni xhigab pet siädsanäjni
rebensa'ni. Si'c guzajreni tebdxej,
dxejc gudiilrenini loj resa'reni,
näjza loj reni rumbeereni, ⁴⁵ direni
nidxälmi. Dxejc gubisacreni guedx
Jerusalén te huitiilrenini ro'c.

⁴⁶ Chon dxej gudiilrenini dxejc
bidxälrenini neñ guidoro, sobga'ni
nez galäii rebejn ni najn leii,
cacuadiajgni xtiidxreni, cayujnzani
yälgunabdiidx lojreni. ⁴⁷ Luxh
guiraareni cacuadiajg xtiidxni,
cadxeloduxhreni yäl'najxn xtenni,
näjza rediidx ni cagudzu'ni lojreni.
⁴⁸ Che bahuii rexcezajnni lojni,
bidxelojreni. Dxejc räjp xnanni
lojni:

—Xi'nä, ¿xhicuent bennäjlu
nuurnu scree? Narä näjza xtaclu
cayunduxhnu xhigab caguiilnu luj
nezree, nezre'c.

⁴⁹ Dxejcti räjp Jesús lojreni:
—¿Xhicuent caguiiltu narä? ¿La
ditu gan riäj_l gunä xtzun Xtaclä, ä?

⁵⁰Luxh laareni direni niacbee rediidx ni guniini lojreni.

⁵¹Dxejcti gubinäjñireni guedx Nazare't, sanuuni rusoobni xtiidxreni. Luxh Marii gulucheetisni guiraa recosre nen lastooni. ⁵²Duurtis gunís Jesús, caroobruza xcälñajñni. Sanälajz Diosni, sanälajzza guiraa rebejñni.

Yälrusule' Juan ni rutiobnis

(Mt. 3:1-12; Mr. 1:1-8; Jn.1 :19-28)

3 Nen redxej cheni agujc tzuun ijz najc Tiberio César reii, Poncio Pila't najc gobernadoor xten Judea; Herodes najc gobernadoor xten Galilee; Felipe, bejtz Herodes najc gobernadoor xten Iturea näjza Traconite; Lisancias najc gobernadoor xten Abilinia. ²Lagajc nen redxejga Anás näjza Caifás najc rebixhojzro xten guidoro guedx Jerusalén. Nen redxejga biääd xtidx Dios lo Juan, xi'n Zacaríi cheni rbäjzñi nez lo reyubijdz. ³Ni'c cuanzaj Juan guideb nez reyuj xten gueu Jordán, ro'c basule'ni xcuent yälrusiechljajz, yälrobnis ni nanab gunreni te gudzucaj Dios xtojñreni. ⁴Si'cni caj lo xquijtz Isaías, dade' ni gunii xtidx Dios, cadro räjpni:

Riejn xse' te ni rbedxa' nez loj reyubijdz:

“Colyunsac' xnezyuj Dad, colslíi rexnezyulajzñi.”

⁵Guiraa cadro sojb gueed sidxe'ni, guiraa relom sibicajreni, guiraa renezyuj ni xhet naliidi, siliireni, guiraa renezyudxuudx, saccsa'creni.

⁶Dxejcti guiralii bejn suhüi loj nani guxhal Dios.

⁷Che bahuü Juan siääd xhidalduxh bejn te guirobnisreni, räjpni lojreni:

—iLa'tu benguijdx ni najc si'c bälñialajz! ¿Chuni'c balijdxtu guxuntu loj xcälrdxe'ch Dios ni siädgajxh, ä? ⁸Colguchaa xmoodtu te si'c fii bejn guliini abasiechljajztu. Na'c cuentis rniitu lagajc nen lastootu “Abram najc xtdnu”, sa'csi narä rniä lojtu, sajc xca' Dios reguijre te con laareni guncheeni bejn gac rexagdoos toAbram. ⁹Aguibyajg naga' cuä' xlobaa reyajg; ni'cni guiraa reyajg nani di ninexhsa'c xcaj lojni, sidinreni te checreni.

¹⁰Dxejcti gunabdiidx rebejn lojni, räjpreni:

—¿Xhini'c nanab jiennu?

¹¹Dxejc badzu' Juan diidxre räjpni: —Ni rajp tio'p xhajbni, sugudeedni tejni lo bejn ni xhet rajpdi. Sigajcza gun reni rajp xhi gaureni, quisrenini loj ni xheti xhi gauni.

¹²Näjza gaii bejn nani rusquijx xcuent reimpuet bidzujñ lojni te guirobnisreni, dxejc gunabdiidxreni lo Juan räjpreni:

—Dad, mastr, ¿xhini'c nanab jiennu?

¹³Räjp Juan lojreni:

—Na'c gusquijxtu bejn maazdi ni nungäjñ quixreni.

¹⁴Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejc räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guniidxreni meel lojtu; colbalaznäj nani rujntu gaan.

¹⁵Cadxeloy rebejn, cayujnreni xhigabduxh, naareni, “pet Juan najc Crist ni jiaäd.” ¹⁶Dxejc badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siääd tej ni sajru loä, nani nicla gac surloä, cuää xcura'chni. Laani sutiobnisni con Sprit Dxan xten Dios te cuääzni nen lastootu näjza con guiboo, sa'csi rajpruni yälrnibee loä. ¹⁷Aca'ni pal te gusiani triuu te cuääni triusa'c lo guijxh te cucheeni triuu nen ngodx xtenni, dxejcti reguixhtriuuga suze'cnini lo bajl ni rejc par tejpas.

¹⁸Rediidxre näjza xhidajl yälrlulijdx gunii Juan te basule'ni redidxcoob loj rebejn. ¹⁹Näjza lo Herodes ni najc gobernadoor basule' Juan diidx, gudiñäjnini sa'csi xhet laadi cayujni, sa'csi rbäznäjni Herodías, chääl bejtzni Felipe, näjza xcuent sgaii dojl ni bejnini. ²⁰Di Herodes niu xtidx Juan, alga bejnini stee dojl, basäl'ni Juan nen latzguiib.

Che gurobnis Jesús

(Mt. 3:13-17; Mr. 1:9-11)

²¹Che batiobnis Juan rebejn, näjza Jesús birobnis. Cheni cabedxcanabni lo Dios, bixal xhaguibaa, ²²dxejc biäjt Sprit Dxan xten Dios si'c te palom, bidzujñni cadro suga' Jesús. Dxejc xhaguibaali biejn xse' te ni räjp:

—Luj, najclu xi'nä ni sanälazä. Rbanälazduxhä luj.

Resa' Jesús

(Mt. 1:1-17)

²³Yu' Jesús galbitzoo ijj che gusloj cayujni dzuun ni badeed

Dios gunni. Rchalo rebejn najcni xi'n José, xi'n Elí. ²⁴Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José. ²⁵José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai. ²⁶Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá. ²⁷Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri. ²⁸Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er. ²⁹Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat. ³⁰Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim. ³¹Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán. ³²Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón. ³³Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá. ³⁴Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor. ³⁵Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala.

³⁶Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec. ³⁷Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán. ³⁸Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

Che biricaj beṇḁxab loj Jesús

(Mt. 4:1-11; Mr. 1:12-13)

4 Jesús, sa'csi rbäjz Sprit Dxan xten Dios lastooni, biunejzni gueu Jordán, dxejc huinā Sprit Dxan xten Diosni lo reyubijdz. ²Ro'c bia'nni tiuu gubijdx, tiuu guxhijñ. Ro'c bidzujñ beṇḁxab ni rnibee te rłajzni gunni gusoob Jesús xtiidxni. Luxh calaan Jesús, sa'csi gajdni gau guiraa neṇ redxejga. ³Dxejc rājṇ beṇḁxab lojni: —Palga guliilu Xi'n Dioslu, gunibee gac reguijre yätxtiil. ⁴Badzu' Jesús diidx lojni rājṇni: —Acaj loj reguijtz xcuent Dios: “Xhet ganaxdi yätxtiil gun sajc guibajñ bejñ, nājza guiraa diidx nani rñi Dios sujñ guibajñ bejñ.” ⁵Dxejcti huinā beṇḁxab Jesús jiaa yejc te dajñ. Teratbäztis baluilojni guiraa reguedxro ni tre' lo guedxliuj. ⁶Dxejc rājṇ beṇḁxab lojni: —Narā sunidxā guiraa yälṇnibee nājza reyälṇnasa'c ni yu' loj reguejdxga sa'csi xtenā guiraareni, luxh sajc gudedāni lo chutis ni rłazā. ⁷Palga luj suzuxhijblu loā, guiliä'plu xpala'nā, guiraani sajc xtenlu.

⁸Dxejc Jesús badzu' diidx, rājṇni lojni:

—Acaj loj xquijtz Dios: “Dad Xtiostislu gaṇlu, luxh lojtisni chulu gunlu dzuun.”

⁹Dxejcti huinā beṇḁxabni lo guedx Jerusalén, huinānini jiaa yejc xques guidoro. Dxejc rājṇ beṇḁxab lojni:

—Palga guliilu najclu Xi'n Dios, gutiäjs lo yuj ¹⁰sa'csi si'c caj loj rexquijtz Dios:

Suxhaḷ Dios rexanglñi te

ga'preni luj,

¹¹guiniaazreni luj didi jiajblu lo guij.

¹²Badzu' Jesús diidx lojni, rājṇni:

—Cajza lo rexquijtz Dios: “Na'c fallu Dad ni najc Xtioozlu.”

¹³Che baluux beṇḁxab rextiidxni, gubicajni lo Jesús sa'csi dini niujñ gaan nusoob Jesús xtiidxni. Gulājzni guidzujñ stee dxej te gusacsíruni Jesús.

Gusloj Jesús cayujñ xtzuunni

(Mt. 4:12-17; Mr. 1:14-15)

¹⁴Dxejc gubi' Jesús lo rexyuj Galilee rājṇni yälṇnibee xten Sprit Dxan. Bire'ch diidx xcuentni guiraa neṇ reguejdx ni tre' nejzga. ¹⁵Ruluini neṇ reguidobāz luxh guiraa rebejñ rliä'p xpala'nni.

Jesús guyu' guedx Nazare't

(Mt. 13:53-58; Mr. 6:1-6)

¹⁶Dxejcti huij Jesús guedx Nazare't cadro gulaani. Che gojl dxej ni rusilajz rexpejñ Israel, biu'ni neṇ guidobāz sigajc ni rujñpacni, dxejc huisuliini te biḷni ¹⁷reguijtz xten Dios. Badeedreni lojni guijtz

ni bacuaa Isaiás; cheni baxhalni guijtzga, bidxälni cadro rnii scree:

¹⁸ Sprit Dxiän xten Dios suganäj narä,

sa'csi agule Dios narä te gusule'ä xtidxcoobni lo rebenproof.

Baxhalni narä te gusiäcä lastoo renani di lastooreni cuedxi, te gusule'ä yälrusläa lo rebejn ni yu' lo dojl,

te gusiäcä baloj reben lotiä'p, te guslää reben ni cadejd trabajw,

¹⁹ te gusule'ä abiu' ijzsa'c che rulaslajz Dios rebejn.

²⁰ Dxejc basäu Jesús reguijtzga, badeednini loj bejn ni cayacnäjn nen guidooga, dxejc gurejni.

Sa'csi guiraa rebejn ni sobga' nen guidooga cahuidzu'tzreni lojni,

²¹ gusloj guniini, räjpni lojreni:

—Lagajc nadxex guzojb rediidx ni caj lo reguijtzre nez loj guiraatu.

²² Guiraareni sarü guniireni

xcuent Jesús, bedxeloduxhäreni redixsaruduxh ni guniini lojreni.

Gunabdiidxreni loj sa'reni, räjpreni:

—¿La et xi'ndi José dade're, ä?

²³ Dxejc räjp Jesús lojreni:

—Siniipactu rediidxre loä:

“Doctoore, basiajc lagajc luj”;

siniizatu loä: “Recos ni biejn

diajgnu bejnlu nez guedx

Capernaum, lagajc recosga bejn nez ree cadro najc lajdxlu.”

²⁴ Dxejc huinuu xtiidxni, räjpni lojreni:

—Rniliäpac lojtu, nicla tej redade' ni rnii xtidx Dios, di reben lajdxreni jiu xtiidxni. ²⁵ Luxh rniliä lojtu, che gubajñ Elías lo guedxliuj, guyu' xhidajl gunabiuid guedx

Israel che di nisguij niajb choñ ijz garol, dxejc guyu' yälrianduxh guideb guejdxga. ²⁶ Luxh di Dios nuxhal Elías roliz nicla tej regunabiuid ni guläjz guedx Israel, alga baxhalnini lo benzijt, roliz te gunabiuid ni rbäjz Sarepta, gajxh guedx Sidón. ²⁷ Sigajcza che gubajñ Eliseo lo guedxliuj, guyu' xhidajl beñ racxhuu ni ral tiejxhreni guedx Israel, luxh dini nusiajc nicla tejreni, alga basiajcni dade' ni laa Naamán, ni siääd te guedxzijt ni laa Siria.

²⁸ Che biejn diajg reni sobga' nen guidoorextidx Jesús, bidxcheduxhäreni, ²⁹ huisuliireni, gulääreneni nen guejdxga. Dxejc huinääreneni yejc dajn cadro tre' guejdxga cadro yu' te balaro, te ro'c rälzreni nustejbrenini. ³⁰ Dxejc Jesús sigaj gudejdni galäiireni, sä'tini ste'ca lajt.

Guläa Jesús bendxab lastoo te dade'

(Mr. 1:21-28)

³¹ Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebejn che gojl dxejc ni rusilajz rexpejn Israel. ³² Bidxeloduxhäreni xtiidxni sa'csi rusule'ni si'c te bennajn, si'c te ni rnibee.

³³ Nen guidooga suga' te dade' ni rbäjz te bendxab nen lastooni. Guredxa'ni ³⁴ räjpni:

—iAii! iBasaan nurnu! ¿Xhicuent riädchu'lu loonu Jesús ni siääd Nasare't? ¿La siäädlu te gunitlojlu nuurnu, ä? Narä numbeälu, nanä najclu Xin Dxiän Dios.

³⁵ Gudidxa' Jesús lo bendxabga, räjpni lojni:

—Basäu ro'lu, birii lastoo niguiire.

Dxejcti bendxabre basäl niguiiga lo yuj nez loj guiraareni, dxejc biriini nen lastoo dade'ga, per xhet bejndini dade'ga. ³⁶Bidxeloduxh rebejn̄ga, dxejc gosloj caniireni lo sa'reni, räjpreni:

—¿Xhi diidx najc redee? Bahuii xho rnibee dade're rebendxab con yälrnibee, luxh rusoo rebendxab xtiidxni, riireni lastoo bejn̄.

³⁷Dxejc gusääb xtidx Jesús lo guiraa reguejdx ni tre' guideb gabi guejdxga.

Rusiajc Jesús xnan xueerg Pedr

(Mt. 8:14-15; Mr. 1:29-31)

³⁸Birii Jesús guidobäz, huijni rolizj Simón. Dxejc naga' xnan sueerg Simón, cayacxhuuni, yu'ni xliaduxh. Sas gunabduxhrene lojni te gusajcnini.

³⁹Gubig Jesús loj nane'ga, gudidxa'ni xliaaga, luxh lagajc orga biriini xliaa. Dxejc huistiegajcni, gosloj cayujnni mandaad, cahuiinireni.

Rusiajc Jesús xhidajl yälracxhuu

(Mt. 8:16-17; Mr. 1:32-34)

⁴⁰La_l ni cayääz gubijdx, guiraa reni rajp benracxhuu ni rajc garen garen yälracxhuu biädnäreni rebejn̄ga lo Jesús. Dxejc laani batzuubni naani yejc teygareni, dxejc biajc rebenracxhuuga.

⁴¹Loj rebenracxhuuga, yu'reni birii rebendxab nen lastooreni, rbedxa'reni räjpreni:

—Luj najclu Xi'n Dios.

Luxh Jesús gudilnäjni rebendxab, dini nusaa niniireni sa'csi laareni najnreni najcni Crist ni cabäjzreni.

Rusule' Jesús xtidx Dios

(Mr. 1:35-39)

⁴²Che bianij, biriini lo guejdx, huijni te lajt cadro rut rbäjzdi.

Niluxh gudiil rebejn̄ni, dxejc bidzujn̄reni cadro suga'ni. Rlajzreni nuscuääzrenini te di nuiini. ⁴³Dxejc Jesús räjp lojreni:

—Nanab cha'a chasule'ä rextidx xcuent xcälrnibee Dios xhidajlruza guejdx, ni'cni baxhalpac Dios narä.

⁴⁴Dxejc si'ctis cuanzaj Jesús basule'ni xtidx Dios nen guiraa reguidobäz nen reguejdx xten Galilee.

Che gunaazreni xhidajl bäj

(Mt. 4:18-22; Mr. 1:16-20)

5 Cheni suga' Jesús ro' nis ni laa Genesare't, gubig xhidajl bejn̄ lojni te jiejn diajgreni xtidx Dios.

²Dxejc bahuii Jesús tio'p barcw ni suga' ro' nisga, rud yu'di nenreni sa'csi rebejn̄ ni rniaaz bäj abiriireni nen rebarcw te caguiibre ni xquijxhrene ro' nisga. ³Dxejc biu' Jesús nen te barcw ni najc xten Simón, dxejc gunab Jesús chää barcwga lo nis te la', te guibicajni ro' yuj. Dxejc gurej Jesús nen barcwga, ro'cli goslojni caguluuini rebejn̄. ⁴Che gulujx xtiidxni, räjpni loj Simón:

—Huinä barcw cadro jättru, colcuaa xquijxhtu lo nis te guiniaaztu bäj.

⁵Räjp Simón lojni:

—Mastr, guideb yääl biennu dzuun, luxh dinu niniiaz nicla tej bäj, niluxh naj agunibeelu gusälsacnu guijx lo nis.

⁶Cheni basälreni xquijxhrene lo nis, gunaazreni xhidalduxh bäj, dxejc goslojli caräjs xquijxhrene. ⁷Dxejc bejn̄reni seen loj resa'reni ni yu' nen stee barcwga te jädyacnäjn̄reni.

Bidzujntireni, bachajreni guiro'p barcw. Gudxaduxh rebarcw, ameer niääzreni nen nis. ⁸Che bahuii Simón Pedr recosre, bazuxhijbni nez loj Jesús, dxejc räjpni:

—Gubicaj loä Dad, sa'csi narä nacä te bendojl.

⁹Si'c gunii Simón sa'csi bidxejb laani näjza guiraa rebejn ni yunäjni sa'csi gunaazreni xhidalduxh bäjl.

¹⁰Näjza Jacoob näjza Juan, rexi'n Zebedeo, ni runnäj Simón dzuun, näjzaren bidxejbreni. Per Jesús räjp lo Simón:

—Na'c guidxejblu, najli guisloj cuedxlu bejn lacuaa ni guiniaazlu bäjl.

¹¹Dxejc, che bidzunnäjreni rebarcw ro' nis, basa'nreni guiraa xhixtenreni, te sanajlreni Jesús.

Basiajc Jesús te bejn ni ral tiejxhni

(Mt. 8:1-4; Mr. 1:40-45)

¹²Cheni guyu' Jesús tej reguejdx, bidzujn te bejn lojni ni rajc lepra te yälguidxduxh ni ral tiejxhni. Che bahuiini loj Jesús, bazuxhijbni, basajbni lojni lo yuj, räjpni lojni:

—Dad, palga rlaizlu, sajc gusiajclu narä.

¹³Dxejc batzuub Jesús naani yejcn räjpni lojni:

—Rlazä jiajclu. Susiacälu.

Che guniini rediidxre, biacgajc ben racxhuuga. ¹⁴Dxejcti gunibee Jesús lojni rut lojdi gäbni xhi guzajcni. Räjpni lojni:

—Huijtis lo bixhojz te fiini lojlu, huisa'nza gojn xcuent ni biajclu si'cni rnibee xleii Moisés, te filoj rebejn abiajclu.

¹⁵Luxh xpala'n Jesús sanuutis cayä'pruni, guixe-guixee care'ch

diidx xcuentni. Rdojpza xhidalduxh bejn te gucuadajgreni xtidx Jesús näjza te gusiajcn yälracxhuu xtenreni. ¹⁶Yu'za huält riunejz Jesús rijni relajt cadro ruti rebejn, te ro'c rbedx-rniabni lo Xtadni Dios.

Basiajc Jesús te bejn ni digacdi guiniib

(Mt. 9:1-8; Mr. 2:1-12)

¹⁷Te dxej lałni caguluuini rebejn, nejzga sobga' gaii farisee näjza gaii bejn ni ruluii leii garen-garen reguejdx, siäädreni guideb nez reguejdx xten Galilee, näjza región Judea, näjza guedx Jerusalén. Dxejc huenliisi rluijoj suganäj xcälrnibee Dios Jesús te rajc russiajcn rebenracxhuu. ¹⁸Dxejc bidzujn gaii dade' nuuren lo te lonbäz te bejn ni di gacdi guiniib, rlaizreni gusu'renini nen yu' te quixhrenini nez loj Jesús. ¹⁹Niluxh direni nidxäl canejz niu'reni sa'csi nadäduxh ro'c sa'csi tre' xhidajl rebejn. Dxejc huäpnäjrenini yejc yu'ga, badzucajreni gaii tej, dxejc basajbreni xloon benracxhuuga yejcli yu'ga te gujc bidzujnni nez loj Jesús. ²⁰Che bahuii Jesús yälrlilajz xtenreni, räjpni loj benracxhuuga:

—Dade', agubicaj xtojllu.

²¹Dxejc rebejn ni ruluii leii näjza refarisee gusloj cayujnreni xhigab, naaren: “¿Chucha niguiire ni caniyajni Dios con rextiidxni? Ruti te bejn ni sajc gudzucaj xtoj rebejn, Diostis rudzucaj dojl.”

²²Dxejc gucbee Jesús xhi xhigab cayujnreni, ni'c räjpni lojreni:

—¿Xhicuent rujntu xhigab si'c nen lastootu? ²³¿Xhini'c najc guyasiru guiniini: “Agubicaj rextojllu”, o

guiniini: “Huistie, guzaj”, ä? ²⁴Mbaj naj, suluiä nez lojtu Xi'n Dios ni gujc Xi'n Niguii rajp yälrnibee, yäl'nadip lo guedxliujre te gudzucajni xtoj l rebejn.

Dxejc räjpni lo bejnga ni digacdi guiniib:

—Lojlu rniä, ihuistie, guläs xloonlu, huij rolizlu!

²⁵Lagajc dxejc nez lojreni huistiegajc bejn ni digacdi guiniib, guläsni xloonna cadro naga'ni, dxejc siini rolizni, calä'pni xpala'n Dios.

²⁶Guiraareni rdxeloduxhrenei recosga, dxejc guslojreni calä'preni xpala'n Dios, rdxejblireni räjpreni: —Abihuiinu cosro, cos ni guidxeloj bejn nadxej.

Rbejdx Jesús Leví

(Mt. 9:9-13; Mr. 2:13-17)

²⁷Che gudejd gulujx recosre, birii Jesús ro'c. Dxejc bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjp Jesús lojni:

—Gudanajl narä.

²⁸Dxejc huisu Leví, basa'nni guiraa recosga, dxejc sanajlni Jesús.

²⁹Dxejc bejn Leví te lanij rolizni par Jesús. Biääd xhidajl bejn ni rusquijx xcuent impuest näjza sgaai bejn; sobganäjnireni lo mex.

³⁰Dxejcti refarisee näjza rebejn ni ruluui leii guslojreni cayeinäjreni rexpejn pac Jesús, räjpreni:

—¿Xhicuent raunäjtu, ränäjtu rebejn ni rusquijx impuest näjza rebendojl, ä?

³¹Dxejc badzu' Jesús diidxre, räjpni lojreni:

—Rebejn ni nadaan di guiquiin te doctoor, ganaxtis rebejn nani

racxhuu rquiinreni te doctoor. ³²Dina niädtedxä rebensa'c, narä biädtedxä rebendojl te gusiechlajzreni.

Gunabdiidxreni loj Jesús xcuent yälrucua'n

(Mt. 9:14-17; Mr. 2:18-22)

³³Dxejc gunabdiidx rebejn ga loj Jesús, räjpreni:

—¿Xhicuent lacti rucua'n rexpejn Juan näjza rexpen refarisee, lacti rbedx-rniabreni loj Dios; niluxh rexpejn pacu alga rajwreni, rä'reni?

³⁴Badzu' Jesús diidxre lojreni, räjpni:

—¿La sajc gucua'n rebejn ni yu' lo te sa' la'ni yunäjreni bi'n, ä? ³⁵Niluxh sidzujn dxej cheni sibicaj bi'n lojreni, dxejc sii sucua'nreni.

³⁶Guniiza Jesús cuentre lojreni, räjpni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxejc xhiroobruni guiräjs, luxh diza ladcoob guchaag lo ladyujxh. ³⁷Di gacdi gusäl'ni bincoob nen te guidbiejw sa'csi bincoobga sutiäsyani guidbiejwga dxejc sixe' binga, sixijnzä guidbiejwga. ³⁸Ni'cni nanab gusäl'ni bincoob nen guidcoob si'c sigucheeza guiro'preni. ³⁹Luxh nicla tej bejn ni agu' bin ni yu' agujc xchej rrajz yä bincoob, sa'csi säjbn: “Bin ni yu' agujc xchej najc huenru.”

Rutie' rexpejn Jesús triuu dxej nani rusilajzreni

(Mt. 12:1-8; Mr. 2:23-28)

6 Te dxej ni rusilajz rexpejn Israel sasaj Jesús näjza rexpejn pacni nez loj reyuj cadro naga' triuu. Dxejc, sa'csi calaanreni gusloj caläädxreni

doj lo triuu te cayajwrenini. ²Dxejc gunabdiidx gatii refarisee ni najc beṅguidoo, räjpreni lojreni:

—¿Xhicuent rujntu dzuun ni di nungäjł guntu che rajł dxej ni rusilajznu?

³Dxejc räjp Jesús lojreni:

—¿La gajdtu goł loj reguijtz xhi bejn toDavid cheni calannäjni rebejn nani sanäni, ä? ⁴Biu'ni neṅ xquidoo Dios, gudajwni yätxtiil nani di nungäjł gau bejn sa'csi xtebtis rebixhojz rajc rajwni, luxh badeedni yätxtiilga gudajw resa'ni.

⁵Räjpza Jesús lojreni:

—Sigajcza narä, Xi'n Dios ni gujc Niguii, rnibeä dxej ni rusilajztu.

Niguii ni nabijdz naani

(Mt. 12:9-14; Mr. 3:1-6)

⁶Che gojł stee dxej ni rusilajz rexepejn Israel, biu'ni neṅ te guidobäz, dxejc guslojni caguluiini rebejn.

Lagajc ro'c sobga' te dade' ni nabijdz naani ladbee. ⁷Dxejc remastr xten leii näjza refarisee cagula'tzreni te don la susiajcnı bejnga dxej ni rusilajzreni, sa'csi caguilreni xho gucuaquijreni Jesús. ⁸Niluxh laani najnni xhi xhigab cayujnreni, dxejc guniini lo dade' ni nabijdz naani, räjpni:

—iHuisulii! iGudaa nez galäiire!

Dxejc huisulii bejnga, gubigni lojni. ⁹Dxejc räjp Jesús lojreni:

—Rlazä guiniabdidxä lojtu dee: ¿Xhini'c najc huen gunni che rajł dxej ni rusilajznu? ¿La te dzunsa'c o la te dzunguijdx? ¿La gacnäjnu bejn laa xcäl nabajnni o la gudzucajnu yäl nabajnni, ä?

¹⁰Che gulujx bahuii Jesús loj guiraa rebejn ni tre' guideb gabini, räjpni loj bejn ni nabijdz naani:

—iBaslii naalu!

Dxejc bejnı si'c, luxh biacgajc naani. ¹¹Dxejc bidxechduxh rebejn ni tre' ro'c, gusloj canabdiidxreni lo sa'reni xhi gunnäjreni Jesús.

Gule Jesús guitzubitio'p rexepejn pacni

(Mt. 10:1-4; Mr. 3:13-19)

¹²Neṅ redxejga, huij Jesús loj te dajn te huininäjni Xtadni Dios. Ro'c gudejdni yäl cabedx-canabni lo Dios. ¹³Che bianij lo yuj, gurejdxni rexepejnı. Ro'c guleni tzubitio'preni te gacreni xpejn pacni. Gulälajnireni reapost. ¹⁴Renani guleni najc Simón ni gulälajni Pedr; Andrés, bejtz Simón; Jacoob; Juan; Felipe; Bartolomé; ¹⁵Mateo; Tomás; Jacoob xi'n Alfeo; Simón ni nagab loj rexepejn cananista; ¹⁶Judas, bejtz Jacoob; näjza Judas Iscariote ni guto' Jesús loj rebixhojz.

Ruluii Jesús xhidajł bejn

(Mt. 4:23-25)

¹⁷Che biätinäj Jesúsreni yejc dajnga, guzudxireni yejc te danbäz sa'csi suga' xhidajł bejn ro'c. Siädreni guiraa nez reguedx Judea, näjza guedx Jerusalén näjza reguejdx ni tre' gajxh nisdoo Tiro con Sidón. Rebejnga bidzujnreni te gucuaadjgreni xtidx Jesús, te gusiajczanireni xcäl racxhuureni. ¹⁸Guiraa ni rdejdz trabajw yu' bejndxab neṅ lastooreni näjza reni'c bıajc. ¹⁹Guiraa rebejn rıajz caan Jesús, sa'csi rusiajcnı guiraareni con xcäl rıibeeni.

Balıjdx Jesús rebejn

(Mt. 5:1-12)

²⁰Dxejc bahuii Jesús loj rexepejn pacni räjpni lojreni:

—Chicbaatu, bejn nani xheti xhixtentu, sa'csi xtentu najc cadro rnibee Dios xhaguibaa.

²¹'Chicbaatu, bejn nani calaan naj, sa'csi suniidx Dios lojtu nani rniabtu.

'Chicbaatu, bejn nani roon naj sa'csi susiäjł Dios lajztu dxejcru suxhijztu.

²²'Chicbaatu, bejn nani rdxechlajz bejn lojtu, rbääreni la'tu te laad, rniyajreni la'tu, luxh rbälazreni lajtu si'c te cos guiidx sa'csi rililajztu xtidx Xi'n Dios ni gujc Niguii. ²³Colguibalajz nen redxejga, na'c gac-huin lastootu sa'csi sunidxdxh Dios xhi xtentu xhaguibaa. Sigajcza basacsi retoxtadgoldooreni rebejn nani gunii xtidx Dios galoo.

²⁴'Probe'zatu, la'tu benrajp, sa'csi agojptu xcäl'nasa'ctu, xcäl'rbalajztu lo guedxliujre.

²⁵'Probe'tu nani rajp guiraloj xhixtentu naj, sa'csi sidejdtu yälrliaan.

'Proobzatu ni ruxhijztu naj, sa'csi sonduxhtu sidejdtu yälhuinduxh, yälñalas.

²⁶'Probe'tu palga rliä'p rebejn xpala'ntu naj, sa'csi si'c bejn retoxtadgoldooreni rebejn ni gunii didx-xhii lacuaa niniireni xtiidxpac Dios.

Chanälajzni rebejn nani rdxe'ch lojni

(Mt. 5:38-48; 7:12)

²⁷Räjpzani:

—La'tu ni cacuadiajgtu rextidxä rniä diidxre lojtu: colchanälajz rebejn ni rdxe'ch lojtu, colyujn dzunsa'c loj rebejn ni rdxechlajz lojtu. ²⁸Benle' yejc rebejn ni rgube

la'tu. Gunab lo Dios xcuent rebejn ni rcuaquij la'tu. ²⁹Palga yu' chu rlajz quiin te laad lojlu, badeedza stelaad quiinni. Palga yu' chu gudzucaj xhablojiaalu, badeedza näj xcamangwlu xca'ni. ³⁰Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniabsacluni lojni. ³¹Sigajc ni rlajzlu gunnäj bejn la'tu, si'cza la'tu colyennäj bejn.

³²'Palga la'tu sanälajztistu rebejn nani sanälajz la'tu, xlia'sini, sa'csi sigajcza rujn rebendojl. ³³Palga guntu hueen lojtis rebejn ni rujn hueen lojtu, xhet laadi cayujntu, sa'csi sigajcza rujn rebejn ni nabajn nen dojl. ³⁴Palga gudedlaatu lojtis reni rujntu xhigab gunidxsacni lojtu, íxhi cos hueen rchalotu rujntu? Ni rebendojl rudedlaazareni loj rebejn ni najnreni siguixsac ni nasääbreni. ³⁵La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajn xhaguibaa. Sa'csi si'cza najc Dios huenduxh loj reni di gudeed xquixtios lojni, näjza loj rebendojl. ³⁶Colgulaslajz resa'tu si'c rulaslajz Xtadnu Dios guiraa rebejn.

Colgulaslajz sa'tu

(Mt. 7:1-5)

³⁷Räjpzani:

—Na'c guntu yälguixhtis nani rujn bejn, naatu xhet laadi rujjni; te na'cza gun Dios yälguixhtis rextojltu. Na'c gucuaquijtu bejn te sigajcza di Dios gucuaquij la'tu.

Colgusiäjł-lajz dojl ni rujn sa'tu, te si'cza gusiäjł-lajz Dios rextojltu.

³⁸Colgudeed loj bejn ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, sibeitjy ni yu' nenni, cupe'tlini gusälreni nen xpolstu. Dios suniidx lojtu lagajc con mediid ni rudeedu loj rebejn.

³⁹Guniiza Jesús stee cuent räjpni: —¿La sajc guluii te bejn lotiä'p nez uyj lo stee bejn lotiä'p, ä? ¿La di guiro'preni guitejb nen te gueed, ä? ⁴⁰Te bejn ni casieed di gacdi guisieedruni loj ni najn xmastrni. Te bejn, che agulujx bisieedni, sajcnj si'cni najc mastr xtenni.

⁴¹¿Xhicuent cahuiilu guixhe' ni yu' baloj bejtzlu, luxh dilu fii yagro ni yu' balojlu? ⁴²O, ¿xho mood gäblu lo bejtzlu: “Guidon cuää guixhe' ni yu' balojlu”; luxh dilu gacbee yu' te yagro balojlu, ä? iBenguijdx! Guläxgaa yagro ni yu' balojlu, dxajc sajc fisa'clu te cuäálu guixhbäz ni yu' baloj bejtzlu.

Ninexhsa'c ni rcaj loj te yajg sujn gumbeeni yajg

(Mt. 7:17-20; 12:34-35)

⁴³Räjpzani:

—Xheti te yagsa'c ni rudeed ninejx ni xhet sajcdi, xhetiza te yajg ni xhet sajcdi ni rudeed ninexhsa'c.

⁴⁴Sa'csi tebgaj reyajg rusenlojni xhi yajgni xcuent ninejx ni rcaj lojni. Di bejn gutie' iigw lo reyaguejch, diza bejn gutiu' uub lo te yag balagrejch.

⁴⁵Rebensa'c rni didxsa'c, sa'csi xhigabsa'c yu' nen lastooni. Niluxh rebenguijdx rni ganax didxguijdx sa'csi xhigabguijdx yu' nen lastooni, sa'csi ro'ni rni nani yu' nen lastooni.

Tio'p bejn ni benchee tio'p yu'

(Mt. 7:24-27)

⁴⁶Räjpzani:

—¿Xhicuent rniitu loä: “Dad, Dad,” luxh ditu gun nani rniä guntu?

⁴⁷Guiniä lojtu chuni'c najc si'c bejn ni riääd loä, rucua diajgni xtidxä luxh rusoobni xtidxä. ⁴⁸Najcni si'c te bejn ni benchee rolijzni, ganid gudäänni jäät, dxajcni bejnni cimient yejc te guilaj. Cheni biäjt nisro ro' gueuu, bidijn nisro cuä' yu'ga, luxh nicla nusniibnini, sa'csi yu'ga sobgadzu'tz yejc te guilaj. ⁴⁹Niluxh reni rcua diajg xtidxä, dxajc direni guzoob xtidxä, najcneni si'c te bejn ni bejn xyu'ni loj yujxh, dini niujn cimient xten yu'ga. Dxajcni biäjt nisro, bidijnni cuä' yu'ga, dxajc li gurebä'n yu'ga, gunitlojtini.

Basiajc Jesús xmos te bejn roman ni rnibee

(Mt. 8:5-13)

7 Che gulujx gunii Jesús loj rebejn, huijni te guejdx ni laa Capernaum. ²Ro'c yu' te bejn roman ni rnibee, yu' te mos lojni, luxh sanälazduxhni mosga. Cayacxhuduxh mosga, ameerli guetni. ³Che biejn diajg capitán cagusä'treni Jesús, baxhalgajcni gaii bengool lo rexpejn Israel te chagajreni Jesús jäädni te gusiajcnj xmos dade'ga. ⁴Che gubigreni loj Jesús, gusloj gunabduxhreni lojni, räjpreni lojni: —Dade're najc bensä'c, nungäjł gacnäjluni ⁵sa'csi sanälajzni lajdx rexpejn Israel, luxh lagajc laani gunibee guc-chee xquidobäznu.

⁶Dxejcti huinä Jesúsreni. Cheni siäddzungenajxhrenei royu', baxhaļ capitánga gaii xamiigwne, gäbreni loj Jesús:

—Si'c naj capitán: “Di rlazä gutalä xtzuunlu. ¿Chu narä te jiu'lu rolizä? Xhet sacädi. ⁷Ni'c dina niapä baloor te lagajc narä niädganä guejblu, sa'csi rajplu yälrnibeduxh niluxh narä rut nacädi. Ni'cni gunibeetis jiajc xmosä, luxh laani siacgajcni. ⁸Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riädäni; che gäpä loj xmosä: Bejn dee, rungajcni.”

⁹Che biejn diajg Jesús rediidxre, bidxeloduxhni, gubiréni loj rebejn ni siädnaļni, räjpni lojreni:

—Rniliäpac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

¹⁰Che gubi' rebejn ni huij loj Jesús roliz capitán, bahuiireni abiajc xmosni.

Baspanšac Jesús xi'n te gunabiuid

¹¹Neñ redxejga, huij Jesús te guejdx ni laa Naín. Huinäni rexejnpacni näjza xhidajl bejn ni sanajlni. ¹²Che bidzujñni gajx ro' guejdxga, bahuiini sacua'tzreni te beñgut, te bi'n ni najc xtebtis xi'n te gunabiuid. Xhidalduxh bejn sacua'tzni. ¹³Che bahui Jesús loj gunabiuidga, biani nane'ga, räjpni lojni:

—iNa'c roonlu!

¹⁴Dxejc gubig Jesús lo rebejn ni sanä beñgutga, dxejc guzudxi reni nuu beñgutga. Dxejc räjp Jesús loj beñgutga:

—iBi'n!, narä rniä lojlu; iHuistie!

¹⁵Dxejc huistie beñgutga, sobga'ni guslojni caniini. Dxejc badeed Jesúsni lo xnanni. ¹⁶Che bahuiireni xhini'c gujc, bidxejbreni, bidxeloduxhrenei, guslojreni calä'preni xpala'n Dios, räjpreni: —Te niguisacduxh ni rnii xtidx Dios abidzujñ nez loonu.

Caniizareni:

—Lagajc Guejb Dios abiädhuii rexpejñni.

¹⁷Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

Xpejn Juan ni rutiobnis huinabdiidx loj Jesús

(Mt. 11:2-19)

¹⁸Rexpejñpac Juan ni rutiobnis bij rediidxga lojni che yu'ni latzguiib.

¹⁹Dxejc baxhaļni gaiireni lo Jesús te sanabdiidxreni: “¿La guliipac najclu Crist ni jääd o sibäjznu chu stee bejn, ä?” ²⁰Dxejcti gubig rexpejn Juan loj Jesús, räjpreni:

—Juan ni rutiobnis baxhaļ nuurnu te guiniabdiidxnu lojlu: “¿La ļuj najc Crist ni jääd o la sibäjznu chu stee bejn?”

²¹Lagajc dxejc che bidzujñreni, basiajc Jesús xhidajl bejn ni rajc garen-garen yälguijdx, ni yu'za rebendxab lastooreni, basiajczani baloj ni di fii. ²²Dxejcti badzu' Jesús diidxre, räjpni:

—Colçhaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; rebeñcoj rsiasa'c; rebeñ ni ral guejdx tiejxhni, abiajc tiejxhni; rediagcua't riensac diajgreni; rebegñgut, agubansacreni; luxh loj

rebenproob nani cabäjz xcälracnäjä
Dios riejn diajgreni rsiule' xtidx
Dios xcuent xho laa bejn lo doj.

²³Chicbaa nani rumbee narä, nani di cuälaz narä.”

²⁴Cheni sii rexpejn Juan, gusloj
Jesús caniini xcuent Juan loj rebejn,
räjpni:

—¿Chuni'c huihuiitu nez lo
reyubijdz? ¿La te nijt ni rusniib bej,
ä? ²⁵¿Xhini'c huihuiitu? ¿Te bejn ni
suceduxh, ä? La'tu najntu rebejn
ni suceduxh näjza reni nabaŋsa'c,
rolijz rereji yu'reni. ²⁶¿Chuxhni'c
biriitu huihuiitu? ¿Te nigui ni rnii
xtidx Dios, ä? O'n, rniliä lojtu, luxh
te ni sacduxhru loj guiraa reniguii
ni rnii xtidx Dios. ²⁷Juan najc
niguii ni ruzä't rexquijtz Dios cadre
caj scree:

Narä guxhalä te niguii nani
guinii xtidxä,
te nidni lojlu, te laani
guzucheeni xnezyujlu nez
lojlu.

²⁸Rniliäpac, loj guiraa rexingaan
regunaa, nicla tejni gajd guiricaj ni
najc te bensacduxhru nez loj Dios
si'c najc Juan ni rutiobnis. Niluxh
nani guxiiru sajc lo xcälrnibee Dios
ni jiiääd, sajcruni loj Juan.

²⁹Che biejn diajg rebejn näjza
reni rusquijx impuest rextiidxni
xcuent Juan, gucbeereni rujn Dios
yäl_guxhtissa'c, sa'csi abatiobnis
Juanreni. ³⁰Niluxh refarisee näjza
rebejn ni ruluii leii gulälazreni nani
niujn Dios par laareni, sa'csi direni
nicäjb nutiobnis Juanreni. ³¹Räjpza
Jesús lojreni:

—¿Xhocha guiniä najc rebejn
nani tre' naj? ³²Najcreni si'c
rebiuxbäz nani rguijt nez lo guii

cadro rdo', rbedxa'reni loj sa'reni,
rniireni: “Bielnu te bizej te guya'tu,
niluxh ditu nuya'. Bielzanu te dij
ni nabaduxh dxejcti dizatu nioon.”

³³Sa'csi che biääd Juan, dini
niauxha't, dizani niä' bin, luxh
räjptu: “Yu' bendxab lastooni.”

³⁴Dxejcti biälä narä, Xi'n Dios ni
gujc Niguii, rauä, rä'ä. Dxejc räjptu:
“Bahuilaare, dade're rauxha't,
rä'zani, najcni xamiigw rebendoj
näjza rebejn ni rusquijx reimpuest
xten gubier.” ³⁵Ni'cni xcälnajn Dios
huenliisi rienloj loj dzuun ni rujn
rebejn ni najn.

Jesús huij roliz Simón ni najc farisee

³⁶Dxejc tej refarisee gunii loj
Jesús, räjpni:

—Jiäädlu rolizä te guidaunu.

Dxejc huij Jesús rolizjni, ro'c
gurejni lo mex. ³⁷Rbäjz te
gunagubejxh lo guejdxga. Che biejn
diajgni satajw Jesús roliz fariseega,
bidzunnäjni te bo't guidxa se't
nejxh, luxh bo'tga najc si'c onix,
botsa'cni. ³⁸Che biu' gunaaga,
bidzujjni lo ni' Jesús, guslojni
cayoonni. Con nisbee caguiibni
ni' Jesús, dxejc caguspjdzni ni'ni
con xquidxejcti. Dxejc bachagro'ni
ni'ni bazaazani setnejxhga ni' Jesús.

³⁹Che bahuii farisee ni gurejdx
Jesús rolizjni, recosre, bejn
xhigab: “Palga gulii najc niguiire
Xi'n Dios, sacbeeni chu najc näjza
xho najc gunaare ni cagajn ni'ni,
sacbeezani najcni te gunadoduxh.”
⁴⁰Dxejc gunii Jesús loj fariseega,
räjpni:

—Simón, yu' xhi rlazä guiniä lojlu.

Dxejc räjp fariseega lojni:

—Guniini, Dad maestr.

⁴¹Dxejc räjp Jesús lojni:

—Tio'p bejn nazääb meel lo te bejn ni rudedlaa meel. Tej reni nazääb si'cti gaiigayuu meel. Steeni nazääb si'cti tiubitzuu meel. ⁴²Cheni di niajcdi niguijxreni xti'nreni, basiäl lajzni xti'n guiro'preni. Naj gunii loä, çchu tejreni sianälajzru dade'ga, ä?

⁴³Badzu' Simón diidxre lojni, räjpni:

—Rchaloä bejn ni nazääbru lojni.

Dxejc räjp Jesús:

—Laaca rniilu.

⁴⁴Dxejc gubiré Jesús, bahuini loj gunaaga. Dxejc räjpni loj Simón:

—iBahuii loj gunaare! Che biu'ä rolizlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidxejçni.

⁴⁵Dilu nuchagro' narä, luxh laani cheli biu'ä ree, gajdni cuääz guchagro'ni ni'ä. ⁴⁶Dilu nusäl se't yecä, niluxh laani basälni se't ni rlianexhduxh ni'ä. ⁴⁷Ni'cni rniä lojlu, dojl xten gunaare, luxh xhidalduxh najçreni, abadzucaj Dios redojlga sa'csi huenliisi sanälajzni Dios. Luxh rebejn ni rudzucaj Dios guxii xtojlreni, guxiiza sanälajzreni Dios.

⁴⁸Dxejcti räjpni loj gunaaga:

—Agubicaj rextojllu.

⁴⁹Dxejc rebejn ni sobga' lo mex con laani, che biejn diajçreni rediidxre, gusloj canii lo sa'reni, räjpreni:

—çChuchani'c najc niguiire, ni'cni rudzucajlini xtojl bejn, ä?

⁵⁰Räjp Jesús loj gunaaga:

—Agulaalu lo xtojllu sa'csi ahuililajzlu; huij naj, bascuexi lajzlu.

Regunaa ni gucnäj Jesús

8 Dxejcti gusloj huij Jesús guiraa reguejdx näjza rerench, cagusule'ni xtidx Dios, caguluini xcuent xcälrnibee Dios loj rebejn. Sanäni rexpejnpacni ²näjza gaii gunaa ni abasiajçni, agulääni rebendxab lastooreni, näjza basiajçni xcälguijdxreni. Tejni laa Marii ni laaza Magdalen, ni gulää Jesús gajdz bendxab nen lastooni. ³Stee gunaa laa Xuan, ni najc chääł Chuza, ni ruhuii xhixten Herodes. Stee gunaa laa Susan. Guyu'za sgaii gunaa. Guiraa reni'c rudeed lagajc xhixtenreni te rio' recos ni rquiinreni.

Xcuent bejn ni rbe'c binij

(Mt. 13:1-9; Mr. 4:1-9)

⁴Dxejcti bire' xhidajl bejn lojni ni birii xhidajl reguejdx. Lojreni gunii Jesús con te cuent ni ruluui, räjpni:

⁵—Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn baläjreni yejc binijga, biäädzä remane' ni rutajt xhaguibaa, gudajwrenini.

⁶Yu'za lajt bitejb binijga nen reguij cadro xheti xhidajl yuj. Che gulejn binijga, gubidzgajçni sa'csi xheti xcojp ro'c. ⁷Yu'za lajt bitejbni nez nen reyaguejch. Che gulejnni, di reyaguejch nusaan niroob gäjłga.

⁸Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj tejga binij ni gule'c dade'ga.

Che guluix guniini scree, dxejc guniini dip räjpni:

—Palga sajç gucuadijçtu rediidxga, colcuadiagsa'cni.

Xhicuent gunii Jesús recuent*(Mt. 13:10-17; Mr. 4:10-12)*

⁹Dxejcti gunabdiidx rexejnpacni lojni räjpreni:

—¿Xhi säloj cuentre?

¹⁰Dxejc räjpni lojreni:

—Lojtu ni najc rexejñä

suniidx Dios yälñajn te gacbeetu reyälxhiga'tz xten xcälñibeeni. Loj chutis stee bejn, siniä recuent lojreni te mase cadxeløjreni, direni fisa'c, luxh mase cacuadiajgreni, direni gacbesa'c.

Rusule' Jesús xcuent ni rbe'c binij*(Mt. 13:18-23; Mr. 4:13-20)*

¹¹Räjpzani:

—Scree säloj cuentre, rebinij najc si'c xtidx Dios. ¹²Binij ni biajb lo nezyuj najc si'c rebejn ni rucuadiajg xtidx Dios. Dxejc riääd beñdxab, riäddzucajni rediidxga lastooreni te na'c chalilajzreni xtidx Dios, te na'cza laareni lo dojl. ¹³Binij ni biajb neñ reguij najc si'c rebejn ni rucuadiajg xtidx Dios, rbaalajzreni; per sa'csi xheti xlobaareni, nälajznu, direni gandzu'tz xtidx Dios, rililajzreni te bo'c, per che rsacsí rebejnreni, rbälazreni xtidx Dios.

¹⁴Binij ni biajb neñ reyaguejch najc si'c rebejn ni rucuadiajg xtidx Dios, per lal ni sanuureni xnejzreni, rijia'nreni lo recos guedxliuj, lo yälñasa'c ni ruhuiireni, näjza rujnreni si'ctis ni rlanj tiejxhreni. Reni'c rujn runijtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios. ¹⁵Binij ni rijab lo reyusa'c najc si'c rebejn nani rucuadiajg xtidx Dios, ni rililajz diidxga

guideb te lastoya ni najc hueen. Randzu'tzreni xtidx Dios, dxejc rudeedreni te yälñasa'c, nälajznu ruzoobreni xtidx Dios, rujnreni xtzunsa'c Dios.

Xhet yu'di ni naga'tz par tejpas*(Mr. 4:21-25)*

¹⁶Räjpzani:

—Ruti te bejn ni rucuaguij te bajl dxejc rusäuni te caj yejc bajlga, dizani gusujnini dejtz te loon. Alga rusoobnini neñ candilieer loj te mex te guzanijni guideb neñ yu'ga te reni jiu' fiireni lo bajlga. ¹⁷Xhet yu'di ni yuchetzu'tzdi ni di guidzujñ dxej guiluiini; xhet yu'diza ni naga'tz naj ni di guidzujñ dxej gacbee bejnñi.

¹⁸Ni'cni colcuadiagsa'c diidx; sa'csi guiraa rebejn ni rajp yälracbee, sajprureni yälñajn. Luxh reni di ninuu nucuadiajg xtidx Dios, lojni sibicaj näj ni abacuadiajgni, ni rchaloni najjni.

Xnan Jesús con rebejtzni*(Mt. 12:46-50; Mr. 3:31-35)*

¹⁹Dxejc bidzujñ xnan Jesús näjza rebejtzni cadro suga'ni, niluxh di niajcdi nibigreni lojni sa'csi tre' xhidalduxh bejn ro'c. ²⁰Dxejcti huisa'n te bejn diidx loj Jesús, räjpni: —Xnan guejblu näjza rebejtz guejblu suga' rolä', luxh rlanjreni fiireni lo guejblu.

²¹Badzu' Jesús diidxre lojreni, räjpni: —Xnanä näjza rebetzä najc rebejn ni rucuadiajg, ni ruzoobza xtidx Dios.

Basiacdxí Jesús te beduxh*(Mt. 8:23-27; Mr. 4:35-41)*

²²Te dxej biu' Jesús näjza rexejnpacni neñ te barcw. Dxejc räjpni lojreni:

—Colcho' stelaad ro' nisre.

Basyu'reni barcw lo nis, sä'tireni.

²³Cheni sadejdreni galäii nisga, gudiejs Jesús neñ barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis neñ barcw, ameerli jääz barcwga lo nis. ²⁴Dxejcti huicuäänreni Jesús, räjpreni lojni:

—iMastr! iMastr! iCayääznu lo nis!

Che gubajñni, huistieni, dxejc gudidxa'ni lo bejga näjza lo nis ni cayäsjaa. Dxejc guläjz bejga, guredxiza nisga. ²⁵Dxejc räjpni lojreni:

—¿Con xcälirililajztu, ä?

Per laareni bidxebreni, canabdiidxreni lo sa'reni:

—¿Chuni'c najc niguiire te rnibeeni bej näjza nis, luxh rusobdiajg bej näjza nis xtiidxni?

**Te beñ Gadara ni guyu' rexsprit
beñdxab lastooni**

(Mt. 8:28-34; Mr. 5:1-20)

²⁶Bidzujñtireni lo yuj xten Gadara ni tre' stelaad ro' nis nez loj reyuj xten Galilee. ²⁷Cheni biäjt Jesús neñ barcw baläjni lo yuj, gubig te bejn ni siääd guejdxga lojni. Agujc xchej yu' rebendxab neñ lastooni. Dini gacw xhajnbi, dizani cuääz neñ yu', alga rbäjzni cadro yu' rebaa. ²⁸Che bahuiini loj Jesús bazuxhijbni nez lojni, guredxa'ni räjpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsílu nuurnu.

²⁹Guniini rediidxre sa'csi canibee Jesús guirii rebendxabga neñ lastoo

bejnre. Agujc xchero cazob rniaaz rebendxabga bejnnga ruliib rebejn ni'ni, ñaani con cadenguuib te guilibdzu'tzni, te xhet gundini bejn. Niluxh laani rutiugya'ni recaden, dxejc rebendxabga rinärenini nez lo reyubijdz. ³⁰Jesús gunabdiidx lojni, räjpni:

—¿Chu laalu?

Dxejc badzu'ni diidxre loj Jesús räjpni:

—Legión najc laä.

Si'c guniini sa'csi xhidalduxh najc rebendxab ni yu' neñ lastooni.

³¹Dxejc gunabduxhrene loj Jesús na'c guxhalsacnireni cadro biriireni.

³²Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebendxabga loj Jesús te gusaanni jiu'reni neñ recuchga. Che cuäjz Jesús, ³³birii rebendxabga neñ lastoo dade'ga, biugajcreni neñ recuchga. Che biu'reni neñ recuch, baxun recuchga bitejbreni ro' te bala', dxejc białjbreni lo nis, ro'cti gujtreni.

³⁴Baxun reni cayajp recuchga che bahuiireni xhini'c gujc ro'c, huisa'nreni diidx lo rebenguejdxga näjza lo reben rench. ³⁵Dxejc biädhuui rebejn xhini'c gujc ro'c. Che bidzujñreni cadro suga' Jesús, bahuiireni loj bejn ni birii bendxab lastooni. Sobga'ni cuä' ni' Jesús, najcwni xhajnbi, luxh xhetru rajcdi yejcn; dxejc bidxebduxh rebejnnga. ³⁶Sas reni bahuiloj xho gujcn, bijreni diidx xho basiajc Jesús bejn ni guyu' rebendxabre lastooni. ³⁷Dxejc guiraa reben Gadara näjza reguejdx ni tre' nejzga, gunabreni jiunejz Jesús ro'c sa'csi cadxebduxhrene. Ni'cni biu' Jesús

neñ barcw te gubisacni neĵ cadro siäädni. ³⁸Dade' ni birii rebeñdxab lastooni gunabni lo Jesús gusaanni chanajlnini, niluxh Jesús gunibee jia'nni, räjpni lojni:

³⁹—Gubi' rolijzlu te güilu diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

Xindxa'p Jairo näjza te gunaa ni gudajn xhajn Jesús

(Mt. 9:18-26; Mr. 5:21-43)

⁴⁰Che gubi' Jesús stelaad nis, bibalajz rebejn gubi'ni, sa'csi cabäzpacreni guibisacni. ⁴¹Dxejc bidzujñ te bejn ni laa Jairo, ni rnibee te guidobäz, bazuxhijbni nez loj Jesús, gunabni chanänini rolijzni ⁴²sa'csi yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. Lałsi sää Jesús rolijzni, birinajl xhidalduxh bejnñi, catäälirenini.

⁴³Loj rebejnğa nadxaag te gunaa ni agujc tzubito'p ijz cayacxhuuni, cayajcni yälguidxbäii. Xlia'si abanijtni guiraa xhixtenni cua' renani rujñ remeed. ⁴⁴Gubig gunaaga dejtz Jesús te gudajnni ro' xhajnbi. Lagajc dxejc biacgajcni.

⁴⁵Dxejcti gunabdiidx Jesús räjpni: —¿Chuni'c najc ni gudajn narä, ä? Guiraa rebejn räjp:

—Dinu gan.

Räjpza Pedr:

—Mastr, ni yu'lu galäii reben xhidajl, luxh cagutäälireni luj. ¿Xhicuent rniabdiidxlu: “¿Chu gudajn narä?”

⁴⁶Räjppac Jesús lojni:

—Yu' chu gudajn narä, sa'csi gucbeä yu' chu basiajc xcälrnibeä.

⁴⁷Che gucbee gunaaga anajn Jesús gudajnni xhajnbi, bidxejbni, racejslini gubigni loj Jesús, bazuxhijbni lojni. nez loj guiraa rebejn räjpni xhicuent gudajnni xhajnbi näjza xho biacgajcni.

⁴⁸Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

⁴⁹Lałni canii Jesús si'c bidzujñ te bejn ni siääd rolijz Jairo, ni rnibee te guidobäz. Räjpni loj Jairo:

—Agujt xindxa'plu. Na'cru gutajllu xtzuun Dad Mastr.

⁵⁰Che biejn diajg Jesús rediidxga, räjpni loj Jairo:

—Na'c guidxejblu. Huililajztis te jiac xindxa'plu.

⁵¹Che bidzujñreni rolijzni, xtebtis Pedr, Jacob, Juan näjza xcuzajn dxape'ga biunäjni neñ yu'ga. Peta rebejn ni siädnajlni bia'nreni rolä'.

⁵²Cayonduxh guiraa rebejn ni sobga' neñ yu'. Dxejc Jesús räjp lojreni:

—Na'c roontu, gajd dxape're guet, nagayejstisni.

⁵³Alga baxhiznäjrenini, sa'csi anajnreni agujt dxape'ga.

⁵⁴Dxejcti gunaaž Jesús ñaa dxape'ga, dip guniini, räjpni lojni:

—iDxape', huistie!

⁵⁵Dxejc gubansac dxape'ga, huistiegajcni. Dxejc gunibee Jesús gudeedreni xhi gauni.

⁵⁶Bidxeloduxh rexuzajnni. Per gunibee Jesús na'c güireni diidx xhini'c gujc ro'c.

**Ruxhal Jesús guitzubitio'p
rexpejnpacni**

(Mt. 10:5-15; Mr. 6:7-13)

9 Batie' Jesús guitzubitio'p rexpejnpacni te badeedni yälrnibee lojreni te cuääreni rebenḁxab lastoo rebejn, näjza te gusiajcreni rebenḁracxhuu. ²Baxhalnireni te gusule'reni diidx xcuent xcälrnibee Dios näjza te gusiajcreni rebenḁracxhuu. ³Dxejc räjpni lojreni:

—Xhet chanäditu lo nejz, nicla baston, nicla bols, nicla yätxtiil, nicla meel; na'cza chanätu tio'p xhajbtu; tejtisni chanätu. ⁴Chutis rolizj bejn cadro guidzujntu, ro'c coljia'n cheni guiriilitu lo guejdxga. ⁵Palga direni gusaan jiu'tu rolizjreni, che jiunejztu lo guejdxga, colcuijb guxhuj ni'tu si'c te seen direni nililajz xtiidxtu.

⁶Dxejc biriireni sääreni garen-garen reguejdx, cagusule'reni xtidx Dios, cagusiajczareni rebenḁracxhuu cadrotis rdzujnreni.

Xho gujt Juan ni rutiobnis

(Mt. 14:1-12; Mr. 6:14-29)

⁷Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni xhigab, sa'csi yu' reni canii laa Juan ni agubansac lo rebengut. ⁸Sgaiireni canii abaluiloj Elías. Yu'zareni canii pet laa stee niguii ni gunii xtidx Dios galoo ni agubansac. ⁹Per räjp Herodes:

—Lagajc narä gunibeä biru' yejc Juan ni rutiobnis, čchuchani'c najc niguiire ni riejn diagä xhidajl didxro xcuentni?

Dxejc rlaizpac Herodes fii lojni.

Bayaan Jesús gaii miḁ bejn

(Mt. 14:13-21; Mr. 6:30-44; Jn.6 :1-14)

¹⁰Che gubi' rexpejnpacni, bijreni diidx loj Jesús xhini'c bejnreni. Sas huinä Jesúsreni te lajt cadro ruti bejn, gajxh te guejdx ni laa Betsaida. ¹¹Che gucbee rebejn caro sääreni, huinajlrenini bidxälrenini. Che siädreni lojni huichaglojnireni, sas gusloj cagusule'ni lojreni xcuent xcälrnibee Dios. Basiajczani rebejn ni cayacxhuu.

¹²Che gusloj cayääz gubijdx, gubig rexpejnpacni loj Jesús, räjpreni lojni:

—Gojs loj rebejnre, agojl jiireni te chatiilreni xhi gaureni, näjza cadro tedreni guxhijñ lo rerench, nen reguedxbäz, sa'csi ree xhet yu'di.

¹³Dxejcti räjp Jesús loj rexpejnpacni:

—iLa'tu colgudeed xhi gaureni!

Dxejc räjpreni lojni:

—Xhet rajpdinu, gaiitis yätxtiil näjza tio'p bäjl. Ni'ctis yu' palga dinu chasiiru xhi gau reben xhidajlre.

¹⁴Luxh najc rebejnnga si'cti gaii miḁ niguii. Dxejc räjp Jesús loj rexpejnpacni:

—Colyejtz lojreni cuereni xcua-xcuaareni, si'cti tiuubituzagajreni te cuaa.

¹⁵Si'c bejnrenini, sas gurej guiraa rebejnnga si'c. ¹⁶Dxejc cua' Jesús gaii yätxtiilga näjza tio'p bäjlga, gulänsi lojni xhaguibaa, badeedni xquixtios lo Dios xcuent yälrajwga. Che gulujx badeedni xquixtios gula'ni reyätxtiilga näjza rebäjlga, dxejc sanuutis badeednini loj

rexpejn̄pacni te gudisrenini loj rebejn̄ga. ¹⁷Guiraa reben̄ xhidaalga gudajw, gudxaj xque'reni. Dxejcti batojpreni ni bia'n bachajreni tzubitio'p dxijm̄ yätxtilbiujy näjza bälbiujy ni bia'n.

Gunii Pedr Jesús najc Crist

(Mt. 16:13-19; Mr. 8:27-29)

¹⁸Te dxej laḷni cabedx-canab Jesús lo Dios, xtebni näjza rexpejn̄pacni, gunabdiidxni lojreni, räjpni:

—¿Chuni'c rnii rebejn̄ nacä?

¹⁹Dxejc räjpreni lojni:

—Yu'reni rnii najclu Juan ni rutiobnis; yu'zarenii rnii najclu Elías; sgaiireni rnii najclu stee niguii ni gunii xtidx Dios galoo ni agubansac.

²⁰Dxejc gunabdiidxni lojreni, räjpni:

—¿La'tu a? ¿Chuni'c rniitu nacä?

Dxejc räjp Pedr lojni:

—Luj najclu Crist Xi'n Dios ni cabäaznu.

Jesús rnixгаа xho guetni

(Mt. 16:20-28; Mr. 8:30-9:1)

²¹Dxejc gunibee Jesús lojreni, räjpni:

—Na'c gäbtu si'c lo rebejn̄.

²²Räjpzani lojreni:

—Nanab ted Xi'n Niguii trabajwduxh; rebengool xten guidoo, näjza rebixhojz, näjza rebejn̄ ni ruluii xleii Moisés sibälazreni narä, naareni dina gacä Crist ni cabäaznu. Sugu'treni narä Xi'n Dios ni gujc Niguii, niluxh sibansacä ni riojn̄ dxej.

²³Dxejc räjpni loj guiraareni:

—Palga chu tejtu rlanj guirinajl narä, nanab jiallajzni xhixtenni,

te guixe-guixee guntisni nani gudedä gunni. ²⁴Sa'csi nani rlanj guiniadzdu'tzni xcäl̄nabaj̄ni, sunijtni yäl̄nabaj̄n lo Dios; luxh nani runijt xcäl̄nabaj̄ni xcuent xtidxä, sica'ni yäl̄nabaj̄n par tejpas.

²⁵Sa'csi ¿xhi gaan gun te bejn̄ palga xca'ni guideb guedxliuj, luxh gunijtni xcäl̄nabaj̄ni lo Dios?

²⁶Niluxh nani guituinäj narä näjza xtidxä, sigajcza narä, Xi'n Dios ni gujc Niguii, situinäázani cheni jiallä si'c reii guideb yäl̄rdimbicha' xten Xtadä näjza rexanglni. ²⁷Guliipac rniä lojtu, yu' gaii reni suga' ree, ni di guet, suhuixgaareni xcäl̄rnibee Dios.

Bachaa xho rluijoj Jesús

(Mt. 17:1-8; Mr. 9:2-8)

²⁸Gudejdti xhuj̄n dxej gunii Jesús diidxre, dxejcru huinä Jesús Pedr näjza Jacoob näjza Juan, huijreni jiaa yejc te dajn te guredx-gunabni loj Dios. ²⁹Laḷni cabedx-canab Jesús lo Dios, bidxaa xho ruluii lojni; dxejc xhajibni gujc nolbäj, rdimbicha'lini. ³⁰Biricajza tio'p dade' caninäjrenini.

Redade'ga najc toMoisés näjza Elías. ³¹Rdimbicha'za redade'ga. Caninäjreni Jesús xcuent xho guetni guedx Jerusalén. ³²Luxh Pedr näjza resa'ni guyuduxh bacal̄ lojreni; che bire'ch bacal̄ lojreni bahuiireni lo yäl̄rdimbicha' xten Jesús näjza loj guiro'p redade' ni caninäjni.

³³Cheni agojl jiunejz redade'ga loj Jesús, räjp Pedr loj Jesús:

—Dad, Mastr, huenduxh suga'nu ree. Basaan jiencheenu choḷ yue', tejni par luj, tejni par Moisés, steeni par Elías.

Luxh di Pedr gaan xhini'c caniini. ³⁴La_lni caniini si'c, bire' te za gusloj cayäjt yejcreni, dxejc bidxejbreni che biu'reni ne_n zaga.

³⁵Dxejcti biejn diajgreni ne_n zaga te xse' te ni gunii, räjpni:

—Dee najc Xi'nä ni sanälazä, colcuadiajg xtiidxni.

³⁶Che gulujx guniini rediidxga, bahuiireni sugaxteb Jesús. Dxejc niäutis ro'reni ne_n redxejga, rut lojdi bijreni diidx xcuent ni bahuiireni ro'c.

**Basiajc Jesús te biuux ni guyu'
be_ndxab lastooni**

(Mt. 17:14-21; Mr. 9:14-29)

³⁷Barayääl cheni biäjtreni yejc dajnga, xhidalduxh bejn cabäz Jesús. ³⁸Dxejcti te dade' ni nadxaag rebejn_ga guredxa'ni, räjpni loj Jesús:

—Mastr, balaslajz narä, gudahuii xi'nä, sa'csi xtebtisni najcni xinganä. ³⁹Luxh be_ndxab rniaazni, sas ruscuedxa'nini, rajcni si'c yälguidxbej, rbääni bitzun ro'ni, rusacsíduxhnini, luxh dini gusaanni. ⁴⁰Agunabä loj rexpejn_gpaclu nibääreni be_ndxabga, luxh di niajcdini.

⁴¹Dxejc badzu' Jesús diidxre, räjpni:

—iBejn ni di chalilajz, be_nguijdx! ¿Gucli chunäätu, gucli gunä huant la'tu? iGudanä xi'nlu ree!

⁴²Dxejc che cabig biuuxga lojni, basälta' be_ndxabga biuuxga lo yuj, sas gusloj cayajcni si'c yälguidxbeduxh. Dxejc guidixa' Jesús loj be_ndxabga, basiacgajcni biuuxga, dxejc badeednini lo xtadni.

⁴³Guiraa rebejn bidxeloduxh yäl_rnibeduxh xten Dios.

Rnii Jesús stehuält xho guetni

(Mt. 17:22-23; Mr. 9:30-32)

La_lni cadxeloj rebejn lo recos ni bejn Jesús, räjpni loj rexpejn_gpacni:

⁴⁴—Colcuadiajgsa'c rediidxre, na'cza jäällajztureni, sa'csi sutedreni narä Xi'n Dios ni gujc Niguii ladz_naa rebejn.

⁴⁵Niluxh di rexpejn_gpacni niacbee xhi säloj rextiidxni, sa'csi Dios bacua'tznini lojreni te di niacbeer_erenini. Bidxejbzareni niniabdiidxreni loj Jesús xhi säloj rediidxga.

Chuni'c sajcru

(Mt. 18:1-5; Mr. 9:33-37)

⁴⁶Guslojza rexpejn Jesús canabdiidx lo sa'reni:

—¿Chuchani'c sajcru loonu?

⁴⁷Per gucbee Jesús xhi xhigab cayujnreni. Dxejc cua'ni te biuxbäz, bazujnini cuä'ni, ⁴⁸räjpni lojreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtadä ni baxha_l narä. Ni najc maazru nadolajz lojtu, ni'c najc ni sajcru.

**Nani di guiniyaj nuurnu, xladnu
yu'ni**

(Mr. 9:38-40)

⁴⁹Dxejc räjp Juan loj Jesús:

—Mastr, bihuiinu loj te bejn ni rbää rexpe_ndxab ne_n lastoo bejn con xcäl_rnibee lajlu. Dxejc rie'tznu lojni na'cru gunni si'c, sa'csi dini sanäj nuurnu.

⁵⁰Dxejc räjp Jesús lojreni:

—Na'c gudxojtuni, sa'csi nani di guiniyaj nuurnu, xlaadnu yu'ni.

Jesús gudidxa' loj Jacoob näjza Juan

⁵¹Che siäddzujn redxej ni chää

Jesús xhaguibaa, bejnni xhigab chääpacni guedx Jerusalén.

⁵²Baxhałni gaii bejn gunijd lojni chääreni te guejdx xten Samaria te satiilreni cadro jia'nreni ro'c.

⁵³Luxh rebejn samaritan di rlajzreni gudedlaareni te lajt cadro jia'nreni, sa'csi najnreni chääreni guedx Jerusalén. ⁵⁴Che biejn diajg Jacoob näj Juan, tio'p xpejnpacni, si'c, sas räjpreni loj Jesús:

—Dad, ¿La rlajzlu guinibeenu jiajt guiboo xhaguibaali te guze'cni guiraa rebenguejdxga si'cni bejn Elías?

⁵⁵Dxejc bahuii Jesús lojreni, gudidxa'ni lojreni, räjpni:

—Ditu gaan chuni'c rnibee lastootu. ⁵⁶Sa'csi narä Xi'n Dios ni gujc Niguii dina niälä te gudzucaä xcälınabajn rebejn. Narä biälä te guslaäreni lo dojl.

Dxejcti huijreni garenca guejdx.

Reni rlajz nirinajl Jesús

(Mt. 8:19-22)

⁵⁷Lałni sääreni lo nezyuj, biääd te bejn gunii loj Jesús, räjpni:

—Dad, narä rlazä jiadnalä guejblu cadrotis chää guejblu.

⁵⁸Dxejc badzu' Jesús diidxre lojni, räjpni:

—Rebäjz rajp xpiliääreni, remane' ni rutajt rajp xpitiääreni, niluxh narä Xi'n Dios ni gujc Niguii, dina gapä nicla te lajt cadro guscugä yecä.

⁵⁹Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tzxcaä xtadä, dxejcru jiadnalä guejblu.

⁶⁰Dxejc räjp Jesús lojni:

—Basaan suchacua'tz rebejn ni najc si'c bengut, resabengutreni. Per luj, huij, huisule' diidx xcuent xcälrnibee Dios.

⁶¹Dxejc räjp steeni lojni:

—Dad, rlazä jiadnalälu, niluxh basanxgaa chasadidxä resa'a ni tre'rolizä.

⁶²Dxejc räjp Jesús lojni:

—Nani ruzuj naani yejc garaad, dxejc rudzuré lojni ruhuiini nez dejtzni di gacdi gunni dzuun lo xcälrnibee Dios.

Ruxhał Jesús regayonbitzuu

10 Che gulujx reni'c, gule Jesús gayonbitzuu bejn, baxhałnireni tio'pgajreni te basnijdnireni lojni loj reguejdx cadro nanab tedni. ²Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuaan xten cose'ch te

guxhałni xhidajlru bejn ni gun dzuun gutie' xcose'chni. ³Colchäj la'tu; colhuii xho ruxhałä la'tu

si'c xiil galäi recuyo't sa'csi sunnäjreni la'tu si'ctisni rlajzreni.

⁴Na'c chanätu ngodx, niclaza guijxh, niclaza xcura'chtu, luxh na'c sudxitu guininäjt bejn lo nejz. ⁵Cheni jiu'tu roliz te bejn, ganiddoo colye'tz: “Sucedxilajz reni rbäjz ree.” ⁶Palga najcni te bejn ni rdxaglaiz yälrbecdxilajz sia'n xcälrbecdxilajz ro'c, luxh palga dini gac, sibi' xcälrbecdxilajz

lojtu. ⁷Coljia'n lagajc rolijz bejn cadro guidzujntu. Ro'c coltajw, colyá'za xhitis ni guniidxreni, sa'csi nani rujn dzuun, riájl xca'ni xcuent dzuunga. Coljia'n tejtis lajt dxejtis ni chutu lo guejdxga. ⁸Xhitis te guejdx ni jiu'tu, palga jiu'reni la'tu, colgajw xhitis ni guniidxreni lojtu. ⁹Colgusajc rebenracxhuu ni yu' ro'c, colye'tz lojreni: "Abidzujngajxh xcälrnibee Dios." ¹⁰Palga jiu'tu te guejdx cadro di rlajzreni gucuadijgreni xtiidxtu, colrii lo nezyuj, ro'c colye'tz lojreni: ¹¹"Guxhuj xten lajdxtu ni rcaj ni'nu, rudzu'nuni nez lojtu si'c te seen sa'csi ditu nililajz xtiidxnu. Colgacbee dee, abidzungajxh xcälrnibee Dios lojtu." ¹²Ni'cni rniliápac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

Reguejdx ni di niu xtidx Jesucrist

(Mt. 11:20-24)

¹³Räjpzani:

—iProbe'tu ben guedx Corazín!
iProbe'zatu ben guedx Betsaida!
Paru nuhuiu rebenzajt ni gubajñ guedx Tiro näjza Sidón remilaagwr ni benä nez lojtu, pet gucli nusiechljazreni, najcwreni ladnagas, nibejzaren lo cobdäj si'c te seen abasiechljazreni. ¹⁴Che gun Dios fis rextojl rebejn guedxliuj, guxiiru gac xfis Dios lo rebenzajt ni gubajñ guedx Tiro näjza Sidón. Fisroru gun Dios reguedx Corazín näjza Betsaida. ¹⁵Luxh luj guedx Capernaum, rchalolu siäjslu xhaguibaa, alga siajblu gabijlli, cadro gaclu fisro xten Dios.

¹⁶Rajpzani lo rexpejn pacni:
—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtiidx ni baxhaļ narä ni dini jiu.

Rbi' regayonbitzoo

¹⁷Che gubi' regayonbitzoo bejn nani baxhaļ Jesús, rbaduxh lajzreni, räjpreni:

—Dad, näjza rebenđxab rusobdiajg xtiidxnu che rusä'tnu lajlu.

¹⁸Räjp Jesús lojreni:

—O'n. Ni'cni narä bahuiä che gunijt xcälrnibee benđxab, bitejbni xhaguibaa si'c bianij xten guzii. ¹⁹Colgacbee. Narä runidxä yälrnibee lojtu te guläjtu yejc bäl näjza yejc naxejb; runidxäza yälrnibee te guntu gaan lo xcälrnibee benđxab. Xhetliidi gun daan la'tu. ²⁰Na'c guibalajztistu sa'csi rusobdiajg rebenđxab xtiidxtu; colguibalajzru sa'csi acuaj lajtu lo xquijtz Dios xhaguibaa.

Bibalajz Jesús

(Mt. 11:25-27; 13:16-17)

²¹Lagajc dxejc bibalaznäj Jesús Sprit Dxan xten Dios, dxejc räjpni lo Dios:

—Rliä'pä xpala'nlu Xtadä ni rnibee xhaguibaa näjza guedxliuj, sa'csi bacua'tzlu xnezyujlu lo reben nanduxh, per baluiilu xnezyujlu loj rebejn ni najc nadolajz si'c te biuxbäz. O'n, Xtadä, sa'csi si'c rlajzlu gunlu.

²²Guiraa recosre abaniidxlu loä Xtadä. Dadtis najn chuni'c najc Xi'nni, rutru najndi chu najcni. Rutza najndi chuni'c najc Guejblu

Xtadä, xtebtis narä ni najc Xi'nlu,
con rebejn ni rlazä gumbee luj.

²³Dxejc bahuii Jesús loj
rexpejnpacni, räjpni lojtisreni:

—Chicbaa la'tu näjza renani
ruhuii guiraa nani cahuilojtu.

²⁴Sa'csi rniliä lojtu, balti redade' ni
gunii xtidx Dios galoo, baltiza rereii
rlajz nuhuiireni guiraa ni cahuilojtu,
niluxh direni nuhuiini. Rlajzreni
niejn diajgreni rediidxre ni cayejn
diajgtu, luxh di diajgreni niejnni.

Xcuent te beñhuen ni siääd Samaria

²⁵Dxejc huisulii te mastr xten leii,
huininäjni Jesús, rlajzni nuxhiidni
Jesús lo xtiidxni, gunabdiidxni
lojni:

—Dad, Mastr, ÷xhini'c nanab gunä
te guibannää Dios par tejpas?

²⁶Sas räjp Jesús lojni:

—÷Xhini'c caj lo guijtz xten leii?

÷Xho rolluni?

²⁷Dxejc badzu'ni diidxre, räjpni:

—Chanälajzlu Dad, Xtioslu guideb
lastoolu, guideb xaimlu, guideb
xtijplu, näjza guideb xcäriejnlu.
Huinälajzza resa'lu si'ctis ni
sanälajzlu lagajc luj.

²⁸Dxejc räjp Jesús lojni:

—O'n, laaca rudzu'lu diidx. Palga
gunlu si'c, sajplu yäl nabajre.

²⁹Per mastr xten leii, rlajzni
nidedbiani ni'cni gunabdiidxni loj
Jesús räjpni:

—÷Chuni'c najc resa'ä?

³⁰Dxejc räjp Jesús lojni:

—Te beñ laadxnu birii guedx
Jerusalén, sääni guedx Jericó.
Dxejc lo nezyuj biricaj gaii gubaan,
gulajreni guiraa xhixteni,
näjli xhajbni ni najcwni. Sas
gudijreneni, basa'nreneni ro'c,

guxii cayäädx nugu'trenini.

³¹Gudejd te bixhojz ni siääd
laadxnu, sazaj lagajc nezyujga,
cheni bahuiini lojni, alga gudejdni
stee laad, sä'tini. ³²Gudejdza te
levita, bejn ni rujnza dzuun neñ
guidoo. Che bidzujñni cadro naga'
bejnga, gudejdni stelaad, sä'tini.

³³Dxejcti te beñ Samaria, lañni
sääni biaj, gudejdni nezyujga,
bidzujñni cadro naga' bejnga.
Che bahuiini lojni, balaslajznini.

³⁴Gubigni loj bejnga, basälni se't
näjza bin loj bejn ni nadxälguijdx,
dxejc batejbnini te la' lajd. Dxejc
bascuijbnini dejtz lagajc xmanni,
huinänini cadro rudedlaareni
yu', ro'c cuanäjnini. ³⁵Che bara
yää, gulääni tio'p meel badeedni
lo baxhuaan yu'ga. Dxejc räjpni:
“Cuanälaa bejnre; palga gunijtrulu,
siguixätini lojlu che guibi'ä.”

Sä'tini.

³⁶Dxejc räjp Jesús lo mastr xten
leii:

—÷Chu tej lo guidxon rebejnnga
najc si'c sa' xten dade' ni biajb
ladznaa gubaan?

³⁷Dxejc räjpni loj Jesús:

—Ni balaslajz bejnnga.

Dxejc räjp Jesús lojni:

—Huij te sigajcza chayejnlu.

Bidzujñ Jesús rolijz Mart näjza Marii

³⁸Lañni huinuu xnezyujni,
bidzujñni te guejdx. Ro'c bidxaagni
te gunaa ni laa Mart ni huinänini
rolijzni. ³⁹Yu' te bäjl Mart ni laa
Marii, luxh laani gurejni cuä' ni'
Jesús te cacuadijgnini xtiidxni.

⁴⁰Mart cagusquejñni cayujñni
xhi gaurenini. Sas gubigni loj Jesús,
räjpni lojni:

—¿La dilu jiu rusanxteb bälä narä te xtebä cayunä remandaad? iGojs lojni gacnäjni narä!

⁴¹Dxejc räjp Jesús lojni:

—Mart, Mart, cayuduxhlu yärsia!, riulu xhidajl cos, ⁴²luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

Ruluii Jesús xho guiniabni lo Dios

(Mt. 6:9-15; 7:7-11)

11 Te huält cabedx-canab Jesús loj Xtdani Dios, suga'ni te lajt. Che gulujx cabedx-canabni, gunii te xpejn̄pacni lojni, räjpni:

—Dad, baluii nurnu xho cuedx-guiniabnu lo Dios, si'c baluii Juan ni batiobnis rexpejn̄pacni.

²Dxejc räjp Jesús lojreni:

—Che cuedx-guiniabtu lo Dios, scree col̄nii:

Xtdanu ni yu' xhaguibaa, suchä'p xpala'nlu, sujiääd xcäl̄rnibeelu.

Sugac si'ctisni rlaizlu gac lo guedxliuj si'cpac rajcni xhaguibaa.

³Guira dxej baniidx xcu'nnu si'ctis ni rquinnuni.

⁴Basiäj̄l lajzlu redojl̄ xtennu si'cni riäj̄l lajznu redojl̄ ni rujn rebejn̄ loonu.

Na'c gusaanlu jiajbnu lo xcäl̄rnibee bend̄xab.

Bas̄laa nuurnu lo dojl̄.

⁵Dxejc räjpza Jesús lojreni:

—Paru tejtü yu' te xamiigwni, luxh guidzuj̄nni rolizni garol yääl, gäbni: “Xamigwä, banidxlaa choñ̄ yätxtiil, ⁶sa'csi bidzuj̄n te xamigwä rolizä ni bazaj biaj, luxh xhet ra'pädi te gudedä xhi gauni.”

⁷Xhixh sinii ni naga' neñ̄ xyu'ni, gäbni: “Na'c riädtie'chlu bacaļ̄ loä. Niäu rolä' luxh rexi'nä naga' cuä'ä, digacdi chästieä te gunidxä xhi gunidxä lojlu.” ⁸Rniliä lojtu, mase dini chastie te gudeednini sa'csi najcni xamiigwni, sistieni, sudeedni nani rquiintisni te na'cru gutie'chni bacaļ̄ni. ⁹Sigajcza rniä lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxältuni. Palga chasejztu rolä', suxhalreni rolä' lojtu. ¹⁰Sa'csi chutis ni rniab, rca'ni nani rniabni; chutis ni rguiil xhi cos, rdxäl̄nini; nani rusejz rolä', suxhalzarenii lojni.

¹¹Paru tejtü ni najc dad, jääd te xi'ntu guiniabni te yätxtiil lojtu, ¿la sudeedtu te guij, ä? O palga guiniabni te bäjl̄, ¿la sudeedtu te bäl̄, ä? ¹²O palga guiniabni te tzutbejt, ¿la sudeedtu te naxejb, ä? ¹³Palga la'tu, ni najc bend̄dojl̄, rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxan xtenni loj renani rniabni lojni.

Rucuaquijreni Jesús, rniireni rajpni yäl̄rnibee xten bend̄xab

(Mt. 12:22-30; Mr. 3:19-27)

¹⁴Guläa Jesús te bend̄xabgop lastoo te bejn̄. Che birii bend̄xabga lastoo bejn̄ga, guslogajc canii bejn̄ga, dxejc bidxeloduxh reben̄ xhidaalga. ¹⁵Dxejc yu' reni räjp: —Niguiire rbää reben̄xab con yäl̄rnibee xten Beelzebú ni rnibee loj reben̄xab.

¹⁶Sgaiireni rlaiz guquiilrenini, ni'c canabreni gunni te seen ni siääd xhaguibaali. ¹⁷Niluxh laani gucbeeni xhi xhigab cayuj̄nreni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnäj te cuaani stee cuaaga, di gacłaa sinijt gubierga lo guedxliuj. Palga te famił rdilnäj lagajc sa'ni, di gacłaa sinitloj famiłga. ¹⁸Palga guiliä' sa' rebendxab, čxho mood chanuu xcälrnibeereni? Dee rniä sa'csi la'tu rniitu narä rbää rebendxab con lagajc yälrnibee xten Beelzebú. ¹⁹Palga si'c najcni, čchuni'c rudeed yälrnibee loj rexpejntu te rbääreni bendxab? Lagajc laareni ruluu xhet laadi rujntu xhigab. ²⁰Palga narä rbää rebendxab con xcälrnibee Dios, ni'cni ruluiloj abidzujn xcälrnibee Dios lojtu.

²¹Cheni suga' te bendaan, ca'ni guuib, canäjni rolizni, rutliidi ruhualdi rehxixtenni. ²²Niluxh che jiiäd stee ni nadipru lo bendaanga, rudxagdijlnini, rujnni gaanni, dxejc rudzucajni xquiibni ni badeed yälbendaan lojni, dxejc sajc chanäni guiraa rehxixtenni. ²³Reni xhet yu'di xladä, rdxe'chreni loä. Ni di gutopnäj narä, rutie'chni.

²⁴Räjpzani:

—Cheni rii te bendxab nen lastoo te bejn, ricansajni nez lo reyubijdz, caguilni cadro gusilajzni. Che cad rdxäldini, rujnni xhigab, naani: “Guibisacä rolizä cadro biriä.”

²⁵Cheni guibi'ni, rdxälni lastoo bejnga si'c te yu' ni entis gulujx bilioobni, suchesa'cni. ²⁶Dxejcti rixiini sgajdz bendxab ni rujnru latsiaj lojni. Dxejc riu'reni nen lastoo bejnga, dxejc nalasru ria'n bejnga loj ni gujcni galoo.

Chicbaa renani riu xtidx Dios

²⁷Lał ni canii Jesús rediidxre, te nane' ni yu' lo reben xhidaalga dipli guniini, räjpni:

—iChicbaa nan ni biädñalu guedxliuj! Chicbaaza nani basłaa luj.

²⁸Luxh laani räjpni:

—Xhet si'cdi najcni; chicbaaru rebejn ni rucua diajg xtidx Dios, ni ruzoobza xtiidxni.

Rebenguidx rniab te milagwr si'c te seen

(Mt. 12:38-42; Mr. 8:12)

²⁹Sanuutis cadojp rebejn gabi Jesús, dxejc guslojni caniini, räjpni: —Rebejn ni yu' naj benguidxduxhreni, rniabzarenite milaagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni. ³⁰Lagajc si'c ni gujc Jonás te seen loj rebejn guedx Nínive, si'cza narä, Xi'n Dios ni gujc Niguii, gacä te seen lo rebejn ni nabajn naj. ³¹Cheni guidzujn dxejc ni gac fis sistie te nane' ni gujc rein lo reyuj ni tre' ladbäjgw, sucuaquijni rebejn ni tre' guedxliuj naj sa'csi laani biriini zitduxh te bacua diajgpacni yälñajn xten Salomón. Ree suga' galäiitu tej ni sacduxhru lo Salomón, ³²luxh ditu chalilajz xtiidxni. Rebejn ni guläjz guedx Nínive sisiunäj rebejn ni nabajn naj nen redxej ni gac fis. Dxejc sucuaquijreni rebejn ni nabajn naj sa'csi laareni, che huinäli Jonás xtidx Dios lojreni, basiechljazreni, basa'nreni xtojłreni. Ni suga' lojtu naj sajcruni lo Jonás, niluxh ditu jiu xtiidxni.

Ni rusanij xcäriejn bejn

(Mt. 5:15; 6:22-23)

³³Räjpzani:

—Rut rucuaguijdi te bajl, te gusujnini te lat xhiga'tz, niclaza nen̄ te caj. Susujni bajlga jiaa te rajc ruhuisa'c chutis ni riu' nen̄ yu'. ³⁴Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacäy. ³⁵Gunatiro te di gac xpianijlu yäl̄nacäy. ³⁶Palga guideb xcäriejnlu yu' bianijtis, xheti te lajt nacäy, sajc fisa'clu guira'ti, si'c najc che rusanij te bajl nen̄ yu'.

Rucuaquij Jesús refarisee näjza rebejn ni najn leii

(Mt. 23:1-36; Mr. 12:38-40; Lc. 20:45-47)

³⁷Che gulujx gunii Jesús, biädgaj̄n te farisee Jesús chääni rol̄ijz̄ni te chatajw̄ni. Sä'tireni. Che biu' Jesús, gurejni lo mex. ³⁸Bidxeloj fariseega sa'csi dini niguiib naani si'cpac caj lo xleii Moisés gunreni te gaureni, sa'csi rujnreni xhigab si'c racnayareni lo Dios. ³⁹Dxejcti räjp Jesús lojni:

—La'tu ni najc refarisee, rguibtu nez dejt̄z te bas näjza te pla't, niluxh la'tu guidxa lastootu yäl̄gubaan näjza yäl̄latsiaj. ⁴⁰iBen̄ nadduxh! ¿La ditu gacbee? Nani benchee dejt̄z̄ni, bencheeza nen̄ni. ⁴¹Col̄yajc nadolajz, col̄yacnäj rebejn con ni rniitu, dxejc guiraa recos saj̄c naya par la'tu.

⁴²'iProbe'zatu, beñ farisee! Rudeedtu lo Dios tej lo tejga tzuu ni rajptu: rudeedtu bedzxtiil̄ näjza ruud, näj guiraa recuane' ni rajptu lo le', niluxh ditu jiu xcäl̄guxhtis Dios näjza xcäl̄rinälajz Dios. Dee nanab guntu ganid, luxh na'cza

gusaantu guntu ni alacayujntu par Dios.

⁴³'iProobza la'tu rebeñ farisee! Rchagljaztu rbejtu lo reyagxhil xten rebejn̄ ni saj̄c nen̄ reguidobäz; rchagljaztu saru rnii rebejn̄ “xchan Dad” lojtu che rijtu lo guii.

⁴⁴'iProbe'zatu! La'tu najct̄u si'c rebaa ni di guzeñ, rsiaj rebejn̄ yejc cadro naga'reni luxh direni gan.

⁴⁵Dxejcti badzu' tej rebejn̄ ni ruluii leii diidxre lojni, räjpni:

—Dad mastr, che rniilu rediidxre, rniyajlu nuurnu.

⁴⁶Dxejc räjp Jesús lojreni:

—iProbe'za la'tu rebejn̄ ni ruluii leii! Sa'csi rnibeetu gun rebejn̄ recos naganduxh ni najc si'c te cargw naduxh ni di gacdi guu bejn̄. Luxh la'tu di rljaztu fal̄tuni nicla con te bicuenaabäztu.

⁴⁷'iProobzatu! Sa'csi runcheetu xpāa redade' ni gunii xtidx Dios galoo, luxh najct̄u rexajg renani bagu't redade'ga. ⁴⁸Ni'cni najnpact̄u xhi gusajc̄reni, rchagljaz̄zatu redzuun ni bejn̄ retoxtadgoldootu; si'cza gunnäjtu narä sa'csi laareni bagu'treni redade'ga, dxejc la'tu runcheetu xpaareni.

⁴⁹Ni'cni gunii Dios, sa'csi yuduxh xcäl̄naj̄ni, räjpni: “Suxhal̄ä reniguii ni guinii xtidxä näjza reapost, luxh sugu'treni gaiireni, susacsízareni sgaiireni.” ⁵⁰Loj rebejn̄ ni nabaj̄n̄ naj̄ siniab Dios gudeedreni cuent̄ xuent̄ xtiejn̄ guiraa redade' ni gunii xtidx Dios ni bagu'treni cheni guc-cheeli guedxliuj. ⁵¹Guislojni xtiejn̄ toAbel, näjza xtiejn̄li Zacarías ni bagu'treni galäii nez lodxan nen̄ guidoro. Ni'cni rniä lojtu, siniab Dios cuent̄

xten xcälgujt guiraareni loj rebejn ni nabajn naj.

⁵²'iProbe'za la'tu, rebejn ni ruluui leii! Sa'csi rniitu la'tistu rajptu yäl'najn, luxh di rlajztu chalilajztu xtidx Dios, dizatu gusaan chalilajz rebejn ni rlajz chalilajz xtidx Dios.

⁵³Cheni räjp Jesús rediidxre, bidxe'ch rebejn ni ruluui leii näjza referisee lojni. Dxejc guslojreni canabdiidxreni xhidalduxh diidx, ⁵⁴te cagula'tzreni don la sajc guiga'ni lo xhitis te diidx ni guiniini.

Jesús ruluui xcuent levaduur

12 La₁ ni caniini, bidojp xhidajl mi₁ bejn ro'c, calaro'li sa'reni. Dxejc gusloj canixгаа Jesús loj rexpejn₁pacni, räjpni lojreni:

—Col₁nati levaduur xten referisee, rusgueerene rniitisreni xhidajl diidx luxh direni gunni. ²Sa'csi xheti xhi niäu lojni ni di guxal lojni luxh xheti xhi naga'tz ni di jienloj. ³Ni'cni guiraa ni guniitu lo nacäy, sienni lo bianij xten dxej. Luxh ni gunii xhiga'tztu nen₁ reyu' ni niäudzu'tz, sibedxa'renini rediidxga yejcli reyu'.

Chuni'c nanab guidxejbtu

(Mt. 10:28-31)

⁴Räjpzani:

—Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni. ⁵Guiniä lojtu chuni'c nanab guidxejbtu. Colguidxejb nani che abadzucajni yäl'nabajn rajpni yäl'rnibee gusäl₁ni la'tu gabijl

lo bajl ni cayejc par tejpas. Ni'csii colguidxejb.

⁶'Anajntu sajc jio' gaii mane' tio'p melbäz, luxh di Dios jiällajz nicla tej remane'ga. ⁷Rexquidxejctu abigab tebgajni. Na'c guidxejbtu; la'tu sajcrutu loj xhidajl remane'ga.

Reni riembee Jesús nez loj rebejn

(Mt. 10:32-33; 12:32; 10:19-20)

⁸Räjpzani:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguui sicäpä najcni xpenä nez loj rexangl Dios.

⁹Luxh reni di guicäjp rililajzni xtidxä nez loj rebejn, sigajcza sunnäáni nez loj rexangl Dios xhaguibaa.

¹⁰'Chutis ni guinii te didxnaj xcuentä, susiäjllajz Dios laani. Niluxh chutis ni guiniyaj Sprit Dxaan xten Dios, di Dios gusiäjllajz xtoj₁ni.

¹¹'Cheni chanäreni la'tu nez loj reben₁ guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu, ¹²sa'csi che guidzuj₁n or ni guiniitu, Sprit Dxaan xten Dios suluini xhini'c guiniitu.

Reyäl'nasa'c rusajb bejn nen₁ dojl

¹³Te niguii ni nadxaag rebejn xhidaalga räjpni loj Jesús:

—Dad, Mastr, gojs lo betzä guiniidxni gala' xhixtenä ni basa'n toxtadnu loonu.

¹⁴Dxejc räjp Jesús lojni:

—Dade', čchuni'c gule narä gunä yäl'guxhtis o gacä abogaad lojlu, ä?

¹⁵Dxejc räjsac Jesús lojreni:

—Col₁natiro, colgantz₁'u te di rlajztistu ga'ptu yäl'nasa'ctis sa'csi

xcäl**n**abaj**n** bej**n** dini gac yäl**r**ajptis xhidajl xhi cos.

¹⁶Dxejcti bij Jesús te cuent, räjpni lojreni:

—Guyu' te be**n** rapduxh. Racduxh cose'ch lo rexcälj**n**i. ¹⁷Dxejcti gusloj bejn**n**i xhigab: “¿Xhocha gunä?”

Dina gapä cadro cucheä recose'ch.” ¹⁸Sas bejn**n**i xhigab: “Ananä xhini'c gunä. Gudzulä rey**u**' cadro rgucheä recose'ch, te gustiobä rey**u**'ga, te ro'c cucheä guiraa recose'ch näjza rehxixtenä.” ¹⁹Dxejcti siniä lo lastoä: “Lastoä, agulucheelu xhidajl xhi cos, sajlni xhidajl ijz. Basilajz naj, gudajw, gu', bibalajz.” ²⁰Dxejc räjp Dios lojni: “iBe**n** najd! Lagajc guxhij**n**re siniabä xaimlu. ¿Dxejca'? ¿Chu xca' guiraa recos ni gulucheelu?” ²¹Si'c sisiajc guiraa rebej**n** ni rguiiltis xcäl**n**asa'creni lo guedxliujre, niluxh xhet rajpdireni loj Dios.

Rcanäj Dios rexi'nni

(Mt. 6:25-34)

²²Che goj**l** stera't, räjp Jesús loj rexpelj**n**pacni:

—Ni'cni rniä lojtu, na'c rujntu xhigab xcuent xho guibaj**n**tu o xhini'c gautu te guibaj**n**tu, niclaza xcuent lajd ni gacwtu. ²³Yäl**n**abaj**n** sajcruni lo yäl**r**ajw; tiejxhni sajcruni lo lajd ni rajcw bej**n**. ²⁴iCol**h**uii rebaloo! Direni cue'c binij, dizareni gutoj**p** cose'ch, dizareni ga'p nicla yu' nicla te cadro chuchee cose'ch, per rudeed Dios xhi rajwreni. ¿La xhet sajcdirutu loj rebalooga, ä?

²⁵Luxh ¿Chu tejt**u** palga runduxhni xhigab saj**c** tioobruni sgarol metr?

²⁶Palga di gacdi guntu nicla te cosbäz, ¿xhicuent ru'tu yärsia' xcuent xhi stee cos?

²⁷iCol**h**uii xho rga' reguino'ch! Direni gun dzuun, dizareni gun lajd lo dzujb, luxh rniä lojtu, nicla rei**i** Salomón con guiraa xcäl**n**asa'cni, dini nisiuchee si'c rsiuchee reguiiga. ²⁸Palga rusuchee Dios recuaan ni rga' lo niaa, ni rial nadxey, luxh guixee-huijdx, che agubijdzni, rej**c**ni lo däj, aticaxh Dios suniidx xhi gacw la'tu, ibej**n** nani guxii rililajz! ²⁹Ni'cni rniä na'c runtejtu xhigab xho quiiltu xhini'c gautu, xhini'cza yätu, na'c chutistu yärsia'. ³⁰Si'tcis rujn rebenguedxliuj guideb xti**j**preni rguilreni rehxicosre. Niluxh xtadt**u** ni yu' xhaguibaa anaj**n**i xhini'c rquiintu. ³¹La'tu colquiiltis xcäl**r**ni**bee** Dios, dxejcti laani suniidxzani guiraa recos ni rquiintu.

Yäl**n**asa'c ni yu' xhaguibaa

(Mt. 6:19-21)

³²Räjpzani:

—La'tu ni najc rexilä'ä, na'c guidxeybtu, sa'csi rbaali lajz Dios, aguleni la'tu te la'tu guntu yäl**g**uxhtis lo xcäl**r**ni**bee**ni. ³³Colguto' xhixtentu, col**g**udeedni loj rebej**n** ni caquinduxhni, te si'c guntu te bols ni di jiu**j**xh, te chu yäl**n**asa'c n**e**nni xhaguibaa cadro di gubaan jiu' niclaza xcabäj rehxicos. ³⁴Sa'csi cadro rajptu xcäl**n**asa'ctu, ro'cza yu' lastootu.

Nanab susi**n**tu

³⁵Räjpzani:

—iCol**s**us**i**n! iCol**h**ualguij rebajl! ³⁶Col**y**ujn si'c remos ni cabäjz guibi' xlam**r**eni ni säa te sa', te cheni guibi'ni guxh**al**gajcreni rolä'. ³⁷Chicbaa remos ni susi**n** che

guibi' xlamreni. Rniliápac lojtu, lagajc xlamreni sajcwni xhajibni sibe'cni rexmosni lo mex, dxejc lagajc laani sudeedni xhi gaureni. ³⁸Mase guidzujñni garol yáäl, mase guidzujñni cájyru, palga guidxälni arexmosni susin, ichicbaa remosga! ³⁹Colyacbeepac, paru gacbee baxhuaan xten yu' xhi or guidzujñ gubaan rolizni, dini gusaan guxhalreni rolizni te cuanreni xhixtenni. ⁴⁰Nájza la'tu colsusin, sa'csi or ni ditu gun xhigab jáädni, sidzujñ Xi'n Dios ni gujc Niguii.

Te mos guijdx

(Mt. 24:45-51)

⁴¹Dxejc gunabdiidx Pedr lojni, rájpmi:
—Dad, ðla lootisnu rujylo cuentre o la najcni par guiraa rebejn?
⁴²Dxejc rájp Jesús lojreni:
—¿Chuni'c najc mos hueen, mos nasin, ni rusannäj xlamni guiraa rexmosni te gudeedni xhi gaureni che gal oor, ä? ⁴³Chicbaa mosga palga laaca cayujñni che guibi' xlamni. ⁴⁴Rniliápac lojtu, lamga sudeed guiraa rehxixtenni te xcanäj mosgani. ⁴⁵Per palga gun mosga xhigab nen lastooni: “Saclaa guibi' xlamä”, sas guislojni gusacsíni resamosni, gunaa sigajc niguii, dxejc guisloj gauni, yäni, soozni; ⁴⁶sibi' xlamni te dxej ni xhet cabäzjdinini, or ni dini gun xhigab guidzujñni. Dxejc sii sudeedni te castigwro lojni, sutiäjlni te duu dejtzní dxejc sinibeeni jiini, guidxaagni rebejn ni di gusobdiajg diidx.
⁴⁷Mosga ni najn xhini'c rlanj xlamni gac, luxh dini susin, dizani

guzoob xtiidxni, sutiälduxhreni duu dejtzní. ⁴⁸Niluxh mos ni di gan xhi rlanj xlamni gac, ni'c rujñni redzuun ni di xlamni guidxagljajc gac, guxiiru castiigw gacni. Reni rca' xhidajl, xhidajlza riäjł gudeedreni; loj reni rca' yälrnibeduxh, xhiroobza siniabni lojni.

Rlia' Jesús bejn lo sa'ni

(Mt. 10:34-36)

⁴⁹Rájpmi Jesús:
—Nará biälä te gucuaguiä guedxliujre; imalaii alagusloj cayejñni! ⁵⁰Niluxh nanab tedä te yälrobnis ni säloj te trabajwduxh, ni'c cayuduxhä yärsia' cheni chale'lini. ⁵¹¿La rujntu xhigab biälä te jáädnaä yälrbedxi loj guedxliuj, ä? Rniä lojtu, dini gac si'c. Alga biälä te guilia'ä bejn lo sa'reni. ⁵²Silia' sa' te famil; loj gaiireni, sidxe'ch choñreni loj tio'preni, luxh tio'preni sidxe'chza lo choñreni. ⁵³Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nansuegr sidxe'chni lo xculizni, luxh gulijzga sidxe'ch lo xnansuegrni.

Reseen xten retiemp

(Mt. 16:1-4; Mr. 8:11-13)

⁵⁴Caniiza Jesús lo reben xhidajlga, rájpmi:
—Cheni rhuiitu rájs reza nez lad jiät, rniitu: “Siajb nisguij.” Luxh riabni. ⁵⁵Che rbi' bej nez lad danbägw, rniitu: “Sacnalaa nadxej”, luxh si'c rajcni. ⁵⁶iBejn ni rusguee! La'tu racbeetu xhi säloj reseem ni

rien lo guedxliuj näjza xhaguibaa, ÷xhicuent ditu gan xhi säloj retiempi ni dxunnu naj, ä?

Basiäjł diidx con rebejn ni rdxe'ch loju

(Mt. 5:25-26)

⁵⁷Räjpzani:

—÷Xhicuent ditu quiil lagajc la'tu xhini'c najc hueen, xhini'c najc laaca te guntuni? ⁵⁸Sa'csi palga yu' chuni'c chale'c xquejlu lo guxhtis, lałni sanäni luj ro jusgaad, basiäjł diidx con laani lo nejz, te na'c chanäni luj lo reguxhtis, sa'csi dxejc reguxhtis suteedreni luj lo reguixhajc te gusaureni luj nen latzguiib. ⁵⁹Luxh rniä lojlu, dilu guirii ro'c hasta gusa'lu quiixlu guiraa lojreni.

Colgusiejch lajztu te di guettu

13 Lagajc dxejc, gubig gaii reni huisa'nreni diidx loj Jesús xcuent gaii ben Galilee ni bagu't Pila't nen guidoo, bagu'chni xtiejnreni con xtiejn reman ni siädnäreni si'c gojn lo Dios. ²Sas räjp Jesús lojreni:

—÷La rujntu xhigab si'c gusajc reben Galileega sa'csi najcrureni bendojł lo rebejn lajdxreni? ³Narä rniä, dini gac si'c. Palga di'tu gusiechlajz sigajcza sejt guiragajctu. ⁴O xcuent guitzunbichon rebejn nani gujt che gubixh te or ni laa Siloé yejcreni, ÷La rujntu xhigab najcrureni ben dojl lo rebejn ni rbäjz guedx Jerusalén, ä? ⁵Narä rniä, dini gac si'c. Palga di'tu gusiechlajz, sigajcza sejt guiragajctu.

Xcuent te yag iigw

⁶Dxejcti gusloj bij Jesús te cuent ni ruluiini lojreni, räjpni:

—Te dade' gojp te yagiigw ni basujni lo xyujni. Sas huihuiini don la caj ninejxh lojni. Luxh xhet ninejxhdi bidxälni. ⁷Dxejc räjpni loj bejn ni canäj xyujni, agujc chon ijz siädtilä ninejxh lo yajgre, luxh xhetini. Batin yajgre. iXlia'si sujni lo yuj! ⁸Luxh xmosni räjp lojni: “Dad, basaanni steb ijz, gusläá yuj ni'ni, gusälä abonni. ⁹Palga xcay ninejxh lojni steb ijz, laaca, palga dini xcay, dxejc guitinnuni.”

Rusiajc Jesús te gunaa

¹⁰Te dxej ni rusilajz rexpejn Israel cagului Jesús nen te guidobáz.

¹¹Ro'c suga' te nane' ni agujc tzunbichon ijz racxhuuni. Bendxab caguscoodni, niluxh di gacdi suliiini. ¹²Che bahuii Jesús lojni, gurejdxnini, dxejc räjp Jesús lojni: —Gunaa, abasaan yälguidxga luj.

¹³Che basujni naani yejcti, lagajc dxejc gujc gusulii nane'ga. Dxejc guslojni calä'pni xpala'n Dios. ¹⁴Luxh dade' ni rnibee guidobáz bidxe'chni sa'csi basiajc Jesús nane'ga che najcni dxej ni rusilajzreni, ni'c gusloj cayäjpni loj rebejn:

—Xho'p dxej sajz gun bejn dzuun; nen redxejga sajz jiäädte te jiajctu, per na'c jiäädte dxej ni rusilajz rexpejn Israel.

¹⁵Dxejc badzu' Jesús diidxre, räjpni lojni:

—iBen rusguee! ÷La di chutis tejtü guxhec xconni o xpurni te chanänini yäni nis, mase najcni dxej ni rusilajz bejn, ä? ¹⁶Luxh nane're najc te xagdoo toAbram, nani numbee Dios, ni agujc tzunbichon ijz baliib bendxabni, ÷la

digacdi guixecni lo xcälguijdxni mase najcni dxej ni rusilajz bejn, ä?

¹⁷Che gunii Jesús rediidxre, bianxtujy rebejn ni rdxe'ch loj Jesús, luxh reben xhidaalga cabalazduxhrene sa'csi cayujn Dios redzunro nez lojreni.

Xcuent bedz muxhtas

(Mt. 13:31-32; Mr. 4:30-32)

¹⁸Ni'cni räjp Jesús lojreni:
—¿Xhocha najc xcälrnibee Dios?
¿Xhicha cojn guiniä najcni tebloj?
¹⁹Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riääd remane! ni rutajt siädyunchee xpitiääzni loj rexhajcwni.

Xcuent cojb ni rusaguij

(Mt. 13:33)

²⁰Guniiza Jesús stehuält te gacbeerene xho guire'ch rextidx Dios. Räjpni lojreni:
—¿Xhicha cojn guntebloä xcälrnibee Dios?
²¹Najcni si'c levaduur ni rugu'ch te gunaa lo choñ mediid arin, luxh rusaguijni guiraa cojbga.

Dää rolä' cadre jiu'ni xhaguibaa

(Mt. 7:13-14, 21-23)

²²Huinuu Jesús xnejzni sääni guedx Jerusalén. Lałni sadejdni reguejdx näjza rerench caguluuini rebejn. ²³Dxejc gunabdiidx te bejn lojni, räjpni:

—Dad, äla guxii najc rebejn ni calaa loj rextojłreni, ä?

Dxejc räjpni lojreni:

²⁴—Dää rolä' cadre jiu' bejn xhaguibaa. Ni'cni coltip lajztu te jiu'tu ro'c, sa'csi xhidajł bejn rłajz

jiu'reni ro'c, niluxh direni gun gaan. ²⁵Cheni abasäu baxhwaan xten yu' rolä', dxejc la'tu ni suga' detz yu' guisloj gusejstu rolä', guiniitu: “Dad, baxhal-laa rolä!”, dxejc laani sudzu'ni diidx, siniini: “Dina ganä caro siäädttu.” ²⁶Dxejc guislojtu guiniitu: “Bidxunnäanu, bidaunäanu, bidunnäanu luj, baseedlu nuurnu lo xnezyuunu.” ²⁷Dxejc siniini lojtu: “Rniliä lojtu, dipacnä gumbeä la'tu. Coljij guiraa, benłatsiaj.” ²⁸Dxejcti sonduxhtu, chubejłi läjytu che fiitu abiu' toAbram, con toIsaac, con toJacoob, näjza guiraa redade! ni gunii xtidx Dios, suga'reni lo xcälrnibee Dios xhaguibaa, luxh la'tu di gacdi jiu'tu. ²⁹Dxejga sidzujn xhidajł benzijttu ni siääd ladjiaa, ladjiät, ladbäjgw, näjza ladbee, te jiu'reni lo xcälrnibee Dios xhaguibaa, ro'c sibejzareni lo mex. ³⁰Luxh yu' reni rujntu xhigab guxii sajcreni naj, sacduxhrene dxejc. Yu'za reni rchalottu sacduxh naj, xhet sajcdireni dxejc.

Jesús biin xcuent guedx Jerusalén

(Mt. 23:37-39)

³¹Lagajc dxejga, bidzujn gaii refarisee, räjpreni lojni:
—Huij, biunejz ree, sa'csi Herodes rłajz ju'tlu.

³²Dxejc laani badzu'ni diidxre lojreni, räjpni:

—Gojz lo bäjzga, ben rusguee: “iBahuii! cabää rebendxab lastoo rebejn, cagusiaca rebejn ni racxhuu nadxej näjza guixee, luxh huijdxli guluxä xtzunä.” ³³Niluxh mase si'c gacni nanab chanuä xnezyuä nadxej näjza guixee, huijdx, sa'csi

di gacdi guet te dade' ni rni
xtidx Dios ste'ca guejdx, guejdx
Jerusalén saje guetni.

³⁴iProbe'tu, la'tu beñ Jerusalén!
Rugu'ttu redade' ni riädni xtidx
Dios lojtu, rucuaazatu guij yej
rebeñ ni ruxhañ Dios lojtu. Balti
huält rlazä nuchagä sa'tu si'c
ruchagsa' te guidco'c rexquidbäzni
lajd xhigani, niluxh ditu nicäjp.
³⁵Bahuii xho bianxteb xquidootu.
Ni'cni arnixgä lojtu, dirutu fii löä
cheni guidzujñli dxej ni guiniitu
loä: “Chicbaa ni siädä xcuent Dios.”

Rusiajc Jesús te beñ ni guidxa guij

14 Che gojl te dxej ni rusilajz
rexepeñ Israel, huitajw
Jesús roliz tej ni rnibee loj
refarisee. Cagula'tz gaii refarisee,
guidon xhini'c gun Jesús, ²sa'csi
nez loj Jesús suga' te dade' ni
guidxa guij tiejxhni. ³Dxej
gunabdiidx Jesús lo rebeñ ni ruluii
leii näjza lo refarisee, räjpni lojreni:
—¿La saje gusijajcni te beñracxhuu
dxej ni rusilajz beñ o la di gacdini?

⁴Per laareni dxitis suga'reni, niäutis
ro'reni. Dxej cua' Jesús beñracxhuuga,
basiajcni, gunibeezani biunejzni.

⁵Dxej räjpni loj refarisee:

—Chu la'tu ni rajp te bur o te gon,
palga jiajbni nen te bisie, ¿la ditu
chalägajcni mase najcni dxej ni
rusilajz beñ, ä?

⁶Dxej di niajcni nudzu'reni diidx
lojni.

Reni bidon chää sa'

⁷Cheni bahuii Jesús xho rchagljaz
rebeñ rbereni latsa'c te cuereni cuä'
rebeñro, bijni te cuent ni ruluii
lojreni, räjpni:

⁸—Cheni guidontu chäätu te sa',
na'c guntu te cuetu cuä' rebeñro, te
di guidzujñ te beñroru lojlu, ⁹dxej
jiäd beñ ni cayujñ lanj, naani
lojlu: “Badeed cue dade're ro'c.”
Dxej situjylilu chacuelu ste'ca
lajt lo le'li. ¹⁰Maazru hueen, cheni
guidonlu chäälü te sa', huicue lo
mex ni zuj lo le' te che guidzujñ
beñ ni cayujñ lanj, naani lojlu:
“Xamigwä, gudaä cuelu nen yu'
cadro rbej rebeñro.” Si'c sä'p
xpala'nlu nez loj guiraa rebeñ
ni sobganäjlu lo mex. ¹¹Sa'csi ni
rlajz chä'p xpala'nni nez loj rebeñ,
sianxtujyni nez lojreni. Luxh beñ
ni najc nadolajz, sä'p xpala'nni nez
loj guiraa rebeñ.

¹²Räjpzani loj beñ ni cagudeed
xhi gaureni:

—Cheni gunlu te lanj o guteedlu
beñ lo xmexlu, na'c cuedxtislu
rexamigwlu con rebejtzlu, con
resa'lu, niclaza rexpisñlu ni
najc ri'cw, sa'csi laareni sigajcza
sibejdxreni luj che gunreni te lanj,
luxh si'c agudijxreni ni badeedlu
lojreni. ¹³Che gunlu te lanj, alga
gurejdx rebeñproob, rebeñcoj, näjza
rebeñlotiä'p, ¹⁴dxejcti sibaa lajzlu
sa'csi laareni di gacdi gunidxsacreni
ni badeedlu lojreni; luxh si'c
siguixsac Dios ni bejñlu che gal dxej
ni guibansac rebeñ loj rebengut.

Xcuent te laniro

¹⁵Che bieñ diajg tej reni sobga' lo
mex, räjpni loj Jesús:

—Chicbaa rebeñ ni gau yätxtiil
cadro rnibee Dios.

¹⁶Dxej räjp Jesús lojni:

—Guyu' te dade' ni beñ te laniro
rolizjñi. Gunibeeni bidon xhidajl

bejn te jiädtaunäjrenini. ¹⁷Che bidzujn or ni gaureni, baxhal dade'ga te xmosni chatejdxni rebejn ni abidon, räjpni lojreni: “Colchäj, asuchee lo mex.” ¹⁸Dxejc guiragajcreni gusloj cayäjb di gacdi chääreni. Tejni räjp: “Entis gusiä te la' yuj, luxh naj nanab chahuiä xho najcni. Goslaa di gacdi jiälä.” ¹⁹Steeni räjp: “Gusiä gaii nejs gon, luxh nanab chahuiä xho rujnreni dzuun. Goslaa di gacdi jiälä.” ²⁰Steeni räjp: “Entis bachnaä ni'cni di gacdi jiälä.” ²¹Che gubi' mosga, badeedni diidx lo xlamni xhi räjp rebejnga lojni. Dxejc bidxechduxh lamga, räjpni lo xmosni: “Basquejn huij ladnezyuj näjza ladnezyuj däa, gudanä rebenproob, rebencoj, rebenlotiä'p, rebennatiujnc.” ²²Si'c bejn mosga. Che gubi'ni räjpni lo xlamni: “Dad, abenä si'c ni gunibeelu, luxh lajtru yagxhiil.” ²³Dxejc räjp lamga lo xmosni: “Huij lo renezyuj ni sii loj reguedxziyt, gudanäj rebejn ni guidxaaglu nejzga, te cha bejn rolizä. ²⁴Rniliä lojtu, nicla tej reni bidon ganid di gau xhuej nani benä.”

Ni nanab gunni te chanajlni Crist

²⁵La_l sasaj Jesús lo nejz, xhidalduxh bejn sanajlni. Dxejc gubiréni, gusloj cayäjpni lojreni: ²⁶—Palga yu' chu tej ni jiääd loä, ni di cuälaz xtadni, xnanni, chäälni, rexi'nni, rebejtzni, näjza rebisajnni, nägajcza xcälnabajnni, di gacdi gacni te rexpänä. ²⁷Palga yu' chutis tej ni di rlanj tedni trabajw te jiädnajlni narä, di gacdi gacni te rexpänäpac. ²⁸Chu tejtü ni rlanj gun te yuro, ni di gunxgaa

xhigab lacti meel chanä yu'ga, te guidon la sajc guluuxnini. ²⁹Didi cheni abejnni recimient, di gacdi guluuxnini, dxejc guiraa reni fii lojni suxhiznäjärenini, ³⁰säjpreni: “iBahuilaa! Bejnre gusloj bencheeni te yu' per di niajcdi nuluuxnini.” ³¹¿Chu te reii ni gun xhigab chachagdijlni stee reii, ni di gunxgaa xhigab don laa sajc gunni gaan con tzuu mi_l soldaad loj stee reii ni siääd con gaj_l mi_l soldaad, ä? ³²Palga di gacdi gucuanäjnni, che gacbeeni zijtli siääd stee reiiga, suxhalni te xpejnni chanab yälrbedxi lojni. ³³Ni'cni palga chutis tejtü di gusaan rexhixtenni te jiädnajlni narä, di gacdi gacni te rexpänäpac.

Che diru sejd gac nadzujy

(Mt. 5:13; Mr. 9:50)

³⁴Räjpzani:

—Huen najc sejd. Per cheni diruni gac nadzujy, ¿xho gacru gac nadzujyni? ³⁵Xhetru sajcdini, nicla te chääni loj yuj, niclaza te chääni lo abon. Gusältis bejn sejdga. Reni rlanj gucudiajg xtidxä, sucuadiagsa'creni.

Xcuent xiil ni gunijt

(Mt. 18:10-14)

15 Guiraa reni rusquijx impuest näjza rebendoj_l cabigreni loj Jesús, te cuadiajgreni rextiidxni. ²Refarisee näjza rebejn ni ruluui leii gusloj camojmreni, räjpreni:

—Bejnre rusaan rbig rebendoj_l lojni, luxh raunäjzanireni.

³Dxejcti bij Jesús cuent ni ruluiire lojreni, räjpni:

⁴—Chutejtu ni rajp tegayuu xiil, palga chanijtni tejni, ðla dini gusaan stapbitzuubigaa rexiilni lo niaa te chatiilni xile' ni gunijt, hasta guidxällinini, ä? ⁵Luxh che guidxältni sibaðuxh lajzni, dxejc sutzuubnini ro xhajcwni. ⁶Che guidzujñni rolizjni sutojpmi rexamiigwni näjza rexpisijnni te gäbni lojreni: “Colguibalaznäj narä sa'csi abidxälä xile' ni gunijt.” ⁷Rniä lojtu, sigajcza su'ru yälrbalajz xhaguibaa xcuent tejtis bejn ni guibig lo Dios ni gusiechlajz xtojlni quela xcuent tapbitzubigaa bejn ni di guiquin gusiechlazreni xtojlni.

Xcuent meel ni gunijt

⁸Räjpzani:

—Sigajcza te gunaa ni rajp tzuu meel, palga chasältni tejni, ðla dini gusanij te bajl te guloobni nen yu' hasta guidxältni, ä? ⁹Luxh che guidxältni, sutojpmi rexamiigwni näjza rexpisijnni, säjpmi lojreni: “Colguibalaznäj narä sa'csi abidxälä meel ni gunijt.” ¹⁰Rniäza lojtu, sigajcza sibalajz rexangl Dios xhaguibaa xcuent te bendojl ni rusiechlajzni.

Te bejn ni baxun te xi'nni

¹¹Dxejc bijza Jesús cuentre lojreni:

—Guyu' te dade' ni yu' tio'p xingaanni. ¹²Dxejc xi'nni ni najc huinruga, räjpni lo xtadni: “Dad, baniidx yälñasa'c nani nungäjäl xca'a.” Sas badeed xtadni xerensni. ¹³Di niaclaa, balsi dxej gudejd, chela bato' xinhuinni guiraa xhixtenni, dxejc sääni, bidzujñni te guedxizjt. Ro'c banijtni guiraa xmeelni lo recosguijdx. ¹⁴Che

abanijtni guiraa xhixtenni, biääd te gubinduxh guedxizjtga cadro yu'ni. Sas guslojzani calaanni. ¹⁵Dxejc huitiilni dzuun lo te benguejdxga. Baxhal bejngani te huigajpmi cuch lo xyuj dade'ga. ¹⁶Luxh calanduxhni bejnmi xhigab malaii sajç gauni recuaan ni najc si'c lia ni cayajw recuch, niluxh rut badeeddi xhi niäjwni. ¹⁷Laļ ni cadejdni trabajwga, bianij xcäriejnmi bejnmi xhigab, naani: “Balti rexmos xtadä rausa'c, ria'nru xhi gaureni. Luxh narä ree calanduxhä, ameerli guetä. ¹⁸Guibi'älis ladxä, rolizjt xtadä, gäpä lojni, Dad, banitä lo Dios näjza lojlu. ¹⁹Diru nungäjäl guirilää xi'nlu. Cua' narä si'c te xmoslu.” ²⁰Dxejc gunazgajçni nejç te gubi'ni rolizjt xtadni.

'Cheni zijtru siäädni, bahuii xtadni lojni. Dxejc balaslaiznini, ruxunlini, huichaglojnini, sas gudäänzini, bachagro'ni lojni. ²¹Dxejc räjp xi'nni lojni: “Dad, abanitä lo Dios näjza lojlu. Diru nungäjäl guirilää xi'nlu.” ²²Per räjp xtadni loj rexmosni: “Coltanä te ladsa'c, colshuajçwnini xi'nä, colgusäl te niil bicueñaani, xcajza te gura'ch ni'ni. ²³Coltanä te biser ni guro' colgu'tni. iColsqeajn te guidaunu, jienu te lanij! ²⁴Sa'csi xi'näre abenä xhigab gujtni, luxh naj si'cni agubañsacni, gunijtni niluxh naj abidxäjlni.” Dxejc guslojreni bejnreni te lanij.

²⁵Laļ ni cayajç dee, xingangalooni cayujn dzuun lo niaa. Che gubi'ni, siädzungajxhni rolizjni, che biejn diajgni cayel rolizjni, caguya'zarenä. ²⁶Dxejcti gurejdxni te mos, gunabdiidxni

lojni xhi cayajc royu'. ²⁷Dxejc räjp mosga lojni: "Gubisac bejtzlu, luxh xtadlu gunibee gujt te biser guro' te gac lanij sa'csi nadaanni gubi'ni." ²⁸Dxejc bidxe'ch xingangalooni. Naadtini jiu'ni rolizjni. Che gucbee xtadni naadtini jiu'ni, bihüi xtadnini te gunabni jiu'gani. ²⁹Dxejc räjpni lo xtadni: "iBahuilaaare! Agujc xchej cayunä dzuun lojlu, luxh rusobdiagä guiraa xtiidxlu, per nicla tej huält gajdlu guniidx nicla te dxibe' loä te gunä te lanij con rexamigwä. ³⁰Luxh naj ni abidzujn xi'n lure, ni banijt xmeellu con regunadxab, xhoxh bagu'tlu te biser guro' te cayujnlu xlanijni." ³¹Dxejc räjp xtadni lojni: "Xi'nä, sugagajclu loä, luxh guiraa ni rapä najc xtenlu. ³²Niluxh naj riäjlpac jienu lanij, guibalaaznu, sa'csi bejtzlu ni benä xhigab agujt, agubi'ni naj, najcni si'cni gubansacni; gunijtni, naj abidxäjlni."

Xcuent te ni rnibee loj remos

16 Dxejc cayujyza Jesús stee cuent loj rexpejn pacni, räjpni:

—Guyu' te benräjp ni guyu' lojni te ni rnibee loj rexmosni. Dxejc biäd reni badeedreni diidx lojni, räjpreni: "Bejn ni rnibee loj rexmoslu xhetlaadi cayujni cagunijtni rexhixtenlu." ²Dxejcti gurejdx xlamnini, räjpni lojni: "Xhi dee ni riejn diagä caniiireni xcuentlu, ä? Naj guniidxlu loä cuent xte xtzuunlu, sa'csi dirulu chanuu guinibeelu lo rexmosä." ³Dxejc bejnga bejn xhigab: "Xhichani'c gunä naj ni gudzucaj xlamä

dzuun loä? Dina ga'pä yälrstijp te gunä dzuun lo niaa, luxh situjyä chanabä gojn. ⁴Ananä xhini'c gunä te che dirunä ga'pä dzuun, sibejdx rexamigwä narä rolizjni." ⁵Dxejcti gurejdxni tebgajreni rebejn ni nazäab lo xlamni, dxejc räjpni loj ni bidzunxgaa: "¿Lac nazääblu lo xlamä?" ⁶Dxejc räjpni: "Nazäbä si'c te gayuu baril se't." Dxejc räjpni lojni: "Basquejn, cua' guijtzre, bacuaa tiubitzuutis baril nazääblu lojni." ⁷Dxejc gunabdiidxni loj steeni, räjpni: "¿Luj a'? ¿Lac nazääblu lo xlamä?" Dxejc räjpni lojni: "Te gayuu dximro triuu." Dxejc räjpzani: "Aree xquijtzlu; bacuaa tajtis dximro." ⁸Bidxeloj xlamni, gulä'pni xpala'n benguijdxga ni gunibee sa'csi bisinni bejnni recosga. Dxejc räjpza Jesús, rebejn ni di gumbee xtidx Dios nadxällajzrueni lo rextzuunreni con sa'reni loj rebejn ni arumbee xtidx Dios.

⁹Rniä lojtu, colquuil rexamiigwtu con reyäl'nasa'c ni räjpnu loj guedxliujre, te che abaraj xhixtentu, sica' Diostu xhaguibaa cadro yu' rolizjtu par tejpas.

¹⁰Renani runsa'c dzuun lo te dzunbäz, sajca gunsa'cni dzuun lo te dzunro, luxh reni di gacdi gunsa'c dzuun lo te dzunbäz, di gacdiza gunsa'creni dzuun lo te dzunro. ¹¹Ni'cni palga xhetlaadi cuaräl'näjtu reyäl'nasa'c xten guedxliuj, ixho guniidx Dios reyäl'nasa'c xtenni lojtu! ¹²Palga xhetlaadi cuaräl'näjtu xhixten bejn, ¿chu guniidx lojtu ni gac xtenpactu, ä?

¹³Nicla tej mos di gacdi gunni dzuun lo tio'p lam, sa'csi sidxe'chni

lo tejni, steeni sinälajzni o susobdiajgpačni xtidx tejni, sibälazni steeni. Di gacdi gun bejn xtzun Dios laĵ ni sanälajztisni xcäl'nasa'cni.

¹⁴Mbaj naj, refarisee, sa'csi rchaglazduxhrene meel, cacuadiagdzu'tzreni xtiidxni, dxejc caguxhisnäjreni Jesús. ¹⁵Dxejcti räjp Jesús lojreni:

—La'tu najctu bejn ni ruhuii rebejn lojtu, naareni beñsacduxhtu, niluxh acanaĵn Dios xhi xhigab rujntu nen lastootu. Sa'csi guiraa ni rchalojtu najc yäl'nasacduxh, guiraa ni'c rbixhlajz Diosni.

Xleii Moisés con xcäl'rnibee Dios

¹⁶Räjpzani:

—Dxejli ni biääd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biääd Juan gusloj rsule' didxa'c xcuent xcäl'rnibee Dios, ni'cni xhidajl bejn cagusutijp lajzni te jiu'reni loj yäl'rnibeeġa.

¹⁷Per guyasiru nitloj xhaguibaa näjza guedxliuġ quela di jialoġ guiralii rediidx ni bacuaa Moisés; nicla tej diidxġa di nitloj.

Ruluii Jesús xcuent ruo'n sa' bejn

(Mt. 19:1-12; Mr. 10:1-12)

¹⁸Räjpzani:

—Palga guo'n te bejn chääl'ni, dxejc guchnaani stee gunaa, rujnni doġl, luxh nani ruchnaa te gunaa ni abaro'n chääl'nini, niguiiġa rujnzani doġl.

Te beñrajp näjza Lázaro

¹⁹Räjpzani:

—Guyu' te beñrajp ni rchaglaġz rajcwni ganax reladsacduxh,

luxh guixe-guixee rujnni laniro.

²⁰Guyu'za te beñproob ni laa Lázaro ni rniab goġn, ricueni ro xlä' beñrajpġa, yu' guejdx ni rgaadz tiejxhni. ²¹Rlaġzni maläii xho gunni gauni nani rtejb loj xmex beñrajpġa, luxh direni gusaan. Dxejc rebä'cw siääd rilejp loj reguejdx ni rgaadz ni guidxa tiejxhni. ²²Guyu'ti te dxej guġt beñproobġa, biädläs rexangl Dios xaimni, huinärenini cadro yu' Abram xhaguibaa.

Dxejcti näjza beñrajpġa guġt, huicua'tztirenini. ²³Che yu'ni gabijl cadro rij guiraa rebendoġl, ro'c cadejdni trabajwduxh. Dxejcti guläsni loġni, bahuiini zitduxh cadro suganaġ Abram Lázaro.

²⁴Dxejcti guredxaduxh beñrajpġa, räjpni lo Abram: “iXtadä Abram! Balazlaġz narä, baxhaġ Lázaro guhuajdxni yejc bicuenaani nis te gusiäl'yujni ludxä, sa'csi ree cadedä trabajwduxh lo guiboo.”

²⁵Luxh räjp Abram loġni: “Xi'nä, basaa laġzlu che gubajnlulu lo guedxliuġ goġplu guira'ti xhixtenlu, luxh sigajcza Lázaro gudejdni trabajwduxh. Per naj ree casilajzni, naj luġ cadejdulu trabajwduxh.

²⁶Luxh di gacdi jääd Lázaro ro'c, sa'csi yu' te baladuxh ni rlia' sa'nu, te mase rlaġz bejn guirii ree te tedreni loġlu ro'c, di gacdini. Di gacdiza ted reni yu' ro'c te jäädreni loonu.” ²⁷Dxejcti räjp beñrajpġa loġni: “Rniabduxhä loġlu, xtadä, baxhallaa Lázaro chääni rolizj xtadä, ²⁸sa'csi ro'c yu' gaii betzä, te chalijdxni laareni, te gusiechlajzreni, te di näjza laareni jäädreni ree cadro rdejġ bejn trabajwduxh.” ²⁹Dxejc räjp Abram

lojni: “Arajpreni guijt_z cadro caj xleii Moisés nájza xtid_x redade' ni gunii xtid_x Dios, sugusobdiajg_{re}ni rediid_xga.” ³⁰Luxh benrajp_{ga} badzu' diid_xre, rájp_{ni} lojni: “Gulii dad Abram, per palga chäs te bejn loj rebengut, chanii lojreni, dxejc sii pet susiechlajz_{re}ni.” ³¹Dxejc rájp Abram lojni: “Palga direni gusobdiajg xtid_x to Moisés nájza xtid_x redade' ni gunii xtid_x Dios, dizareni chalilajz xtid_x te bejn ni guibansac loj rebengut.”

Riesgw jiajbni lo dojl

(Mt. 18:6-7, 21-22; Mr. 9:42)

17 Ráj_p Jesús loj rexp_ejn_pacni: —Siääd_{pac} recos ni gun jiajb bejn lo dojl. Proobza bejn ni rujn riajb bejn lo dojl. ²Maaz guliibni te guij xten molin guejn_{ni}, gusäl bejn_{ni} lo nisdoo cadro jiätro quela gunni jiajb rexi'nä ni ahuililajz xtid_x. ³iCol_susinj! 'Palga gun bejtzlu dojl lojlu, balijdxni. Palga gusiechlajz_{ni}, basiäj_l diid_x con laani. ⁴Masque gajdz huält neñ teb dxej gunni dojl lojlu, palga jiädniini lojlu gajdz huält, naani: “Xhet laadi benä, basiäj_l lajzlu”, basiäj_l lajz con laani.

Bastioob xcäl_rirililaaznu

⁵Gunii rexp_ejn_pacni lo Jesús, rájp_{re}ni: —Dad, baniid_xru yä_rirililajz loonu. ⁶Dxejc rájp Jesús lojreni: —Palga rajp_{tu} yä_rirililajz, mase najcni si'cti te bedzbäz xten muxhtas, saj_c gäbtu lo yagro rec: “Biliäd_xa' ro'c, guzuj galäii nisdoo”, susobdiajg yajgga xtiid_xtu.

Ni riäj_l gun te mos

⁷Ráj_pzani: —¿Chu tejt_u ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: “Biu'ga, gurej lo mex te gaulu?” ⁸Dini gäb si'c. Niluxh säj_pni lojni: “Bachaa xhajblu. Bejn xhi gauä, gudanäni loä. Che luux gauä, yäl'ä, dxejc saj_c gauzalu, yäzalu.” ⁹Dini gudeed xquixtios lo mosga sa'csi ruj_{nni} recos ni gunibeeni sa'csi si'c riäj_l gunni. ¹⁰Sigajc_{za} la'tu, che luux guntu guiraa redzuun ni guniä guntu, riäj_l guiniitu lo Dios: “Najcnu mos ni xhet saj_cdi, nani riäj_l jiennu, ni'ttis biennu.”

Basiaj_c Jesús tzuu bejn ni ra_l tiejxh_{re}ni

¹¹La_l ni sasaj Jesús nez gued_x Jerusalén, gudejd_{ni} loj región Samaria nájza región Galilee. ¹²Che biu'ni tej reguejdx_{ga}, huichagloj Jesús tzuu bejn ni rajc te yäl_guijdx ni ra_l tiejxh_{re}ni, niluxh zijtru guzuj_{re}ni. ¹³Dxejc rbedxa'reni rájp_{re}ni: —Jesús, Dad, Mastr, balaslajz nuurnu. ¹⁴Che bahuii Jesús lojreni, rájp_{ni} lojreni: —Colchäj, te fii rebixhojz abiajct_u. La_l ni sääreni, bia tiejxh_{re}ni. ¹⁵Dxejc tejreni, che bahuiini abiaj_cni, gubiguxu_{nni}, cabedxa'ni calä'pni xpala'n Dios. ¹⁶Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejn_{re} najc te ben_zij_t, te ben Samaria. ¹⁷Dxejcti rájp Jesús lojni:

—¿La et tzuudi najc reni biajc, ä?
¿Con sgaareni? ¹⁸¿La rutru gubi'di
loä te guiliä'preni xpala'n Dios,
xtebtis benzijtre, ä?

¹⁹Dxejc räjp Jesús loj bejnre:
—iHuisulii, huij! Abiajclu sa'csi
huililajzlu.

Xho guidzujñ xcäl̄rnibee Dios

(Mt. 24:23-28, 36-41)

²⁰Dxejc, sa'csi agunabdiidx
refarisee loj Jesús guc guidzujñ
xcäl̄rnibee Dios, badzu'ni diidxre,
räjpni lojreni:

—Di xcäl̄rnibee Dios guidzujñ con
seen ni sajc fiitu. ²¹Diza bejn naa:
“Bahuii, aniree”, o “Anirec”, sa'csi
abidzujñ xcäl̄rnibee Dios lojtu.

²²Dxejc räjp Jesús lo
rexpejnpacni:

—Sidzujñ dxej rlanjzatu fiitu te
dxej sa' ni chu che jiädsac Xi'n
Dios ni gujc Niguii, luxh ditu fiini.

²³Luxh siniireni lojtu: “Aniree”, o
“Anirec”, per na'c chäätu, na'cza
chanajltu reni rihuii. ²⁴Sa'csi
sigajc ni rien che rdinya' te laad
xhaguibaa hasta stelaad xhaguibaa,
si'cza gac che jiälä narä, Xi'n
Dios ni gujc Niguii, che gal̄ dxej
guibi'ä. ²⁵Luxh ganiddoo sidedä
trabajwduxh, sa'csi sibälaz reben
guedxliuj ni tre' naj narä. ²⁶Si'cni
gujc nen redxey cheni gubajñ
toNoé, si'cza gac nen redxey che
jiälä narä, Xi'n Dios ni gujc Niguii.
²⁷Nen redxey ni gubajñ toNoé
gudajwreni, gu'reni, bachñaareni,
badeedzareni xindxa'preni guchña
bejn, bidzujñli dxej cheni biu'
toNoé nen barcwro ni bencheeni.
Dxejc biääd nisguiduxh, gujt
guiraa reben dojl, guzääbreni lo

nis. ²⁸Sigajcza gujc nen redxey ni
gubajñ toLo't: gudajwreni, gu'reni,
gusiireni, bato'reni, gule'creni binij,
bencheezareni rolizjreni. ²⁹Niluxh
cheni birii Lo't lo guedx Sodoma,
biajb guiboo xhaguibaali, näjza
te däj ni rudxuui, gunitlojti guiraa
rebejn dojl, huejcreni. ³⁰Sigajcza
gac nen redxey cheni jiälä narä, Xi'n
Dios ni gujc Niguii.

³¹Dxejga, palga yu' chu niä'p
yejc yu', diru gal̄di jiäjtmi te
chalääni rexhixtenni ni yuchee
nen yu'; palga yu' chu suga' nezjiät,
di gal̄diruni guibi'ni rolizjni.

³²Colgusnaj lajztu xhi gujc chää
toLo't. ³³Ni rlanj ga'p xcäl̄nabajñni
lo guedxliujre, sunijtnini, nani
guniñt xcäl̄nabajñni lo guedxliujre
xcuent rextidxä, xcäl̄nabajñni rajpni
xhaguibaa.

³⁴Rniä lojtu, guxhijnga ni jiälä lo
tio'p reni naga' lo te da', chää tejni,
steeni jia'n. ³⁵Lo tio'p gunaa ni
cayo't, chää tejni, steeni jia'n. ³⁶Lo
tio'p bejn ni yu' lo niaa, chää tejni,
steeni jia'n.

³⁷Che biejn diajgreni rediidxre,
gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c
rdojp regolbetz.

Xcuent te gunabiuud con te juejz

18 Bijza Jesús te cuent
ni ruluii lojreni, te
guisieedreni xho riagl cuedx-
guiniabreni lo Dios lacuaa gac-huin
lajzreni, ²räjpni lojreni:

—Te guejdx guyu' te juejz ni di
chalilajz xtidx Dios, dizani jiu
rebejn. ³Lagajc guejdxga guyu' te

gunabiuud. Guixe-guixee rijni lo juejz, rniabni lojni gunni yäl̄guxhtis lo bejn̄ ni rdxe'ch lojni. ⁴Balti dxej naadti juejzga gun yäl̄guxhtisga. Dxejcti bejn̄ni xhigab, naani: “Mase dina guidxebä Dios, dizana jiuä rebejn̄, ⁵sa'csi gunabiuudre sanuutisni siädni loä, abasiedliini narä, gunälis yäl̄guxhtis xten gunaaga, te di chanuutis riädgusieedni narä.”

⁶Dxejc räjp Jesús lojreni:

—Riejn diajgtu xtidx juezguijdxga, ⁷Naj ÷xho di Dios, ni najc hueen, gucua diajg xtidx rexi'n̄ni ni rbedx-rniab lojni dxej-yäl̄? Di gaclaa gunni yäl̄guxhtis xcuent reni aguleni. ⁸Ni'cni rniä lojtu, sungajcni yäl̄guxhtis par laareni. Luxh che guibi' Xi'n Dios ni gujc Niguii, ÷la sidxäl̄ni bejn̄ ni rililajz xtiidxni lo guedxliuj?

Xcuent te farisee con te ni rusquijx impuest

⁹Bij Jesús stee cuent ni ruluii loj rebejn̄ ni rluiisi najc bensa'c, ni rchalo xhet sajcdi resabejn̄reni. Räjpni:

¹⁰—Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest. ¹¹Sulii fariseega laḷ ni canabni lo Dios, räjpni: “Dad, Dios, runidxä xquixtios lojlu sa'csi dina gacä si'c najc rebejn̄ ni najc gubaa, ni najc bejn̄ nadiplajz, ni najc bejn̄re ni rusquijx impuest. ¹²Rucua'nä tio'p huält nen̄ te xmaan, luxh rudedä te tzuu lo te beex loj guiraa ni runä gaan.”

¹³Niluxh bejn̄ ni rusquijx impuest,

zijtru suga'ni, dini guiliäs lojni xhaguibaa. Catiäl̄naatisni lastooni, caniini lo Dios, räjpni: “Dad, Dios, ibalaslajz narä, nacä te beḅojl!” ¹⁴Rniliäpac lojtu, ni rusquijx impuest rbaali lajzni gubi'ni rolizni sa'csi badzucaj Dios rextojḷni, niluxh di Dios nudzucaj rextojḷ bejn̄ farisee. Sa'csi guiraa rebejn̄ ni rlajz guiliä'p lagajc xpala'n̄ni, susanxtiujy Diosreni, dxejc reni di rlajz guiliä'p lagajc xpala'n̄reni, siliä'p Dios xpala'n̄reni.

Benle' Jesús yejc rebiuxbäz

(Mt. 19:13-15; Mr. 10:13-16)

¹⁵Yu'reni siädniä rexpuixbäzreni loj Jesús te guzujni naani yejcreni. Che bahuii rexpejn̄pacni si'c, gusloj cadil̄diidxreni con rebejn̄ te na'c jiädniäreni rebiuxe'. ¹⁶Dxejc gurejdx Jesúsreni, räjpni lojreni:

—Colgusaan jiäd rebiuxe' loä, na'c gudxojn̄tureni, sa'csi xcäl̄rnibee Dios najc xten reni najc nadolajz si'c rebiuxbäze're. ¹⁷Rniliäpac lojtu, chutis ni rlajz jiu' lo xcäl̄rnibee Dios nanab gusobdiajgreni xtidx Dios si'c rusobdiajg rebiuxe' xtidx xtadreni. Palga dini gun si'c, dini jiu' lo xcäl̄rnibee Dios.

Te bi'n ni rajp xhidajl xhixtenni

(Mt. 19:16-30; Mr. 10:17-31)

¹⁸Te bi'n ni rnibee gunabdiidx loj Jesús, räjpni:

—Dad, mastrsa'c, ÷xhini'c nanab gunä te xca'ä yäl̄nabajḷ par tejpas?

¹⁹Dxejc räjp Jesús lojni: —÷Xhicuent rniilu narä: “Mastrsa'c”? Rutru najcdi bensa'c, xtebtis Dios. ²⁰Anajnl̄u xho najc

remandamient ni caj lo xleii Moisés:
 “Na'c guesnäjlü gunaa ni di gac
 chäällu; na'c ju'tlu bejn; na'c cuanlu,
 na'c guiniilu didx-xhii xcuent
 bejn; bazoob xtidx xtaclu, xnanlu,
 bahuiizareni.”

²¹Dxejc räjp bi'nga lojni:

—Guiraa remandamientre rusobä
 cheni gucäli biuux.

²²Che biejn diajg Jesús xtiidxni,
 räjpni lojni:

—Tejtis cayäädx gunlu. Bato'
 guiraa rehxixtenlu, gudisni loj
 rebejn ni xhet rajpdi dxejc sajplu
 xcäl'nasa'clu xhaguibaa. Dxejc
 gudanajl narä.

²³Che biejn diajg bi'nga rediidxre,
 guc-huinuxh lajzni, sa'csi najcni
 te bejn ni rapduxh. ²⁴Dxejc
 rdxelojtis Jesús lojni, guc-huinza
 lajzni räjpni:

—Naganduxh jiu' rebenrajp lo
 xcäl'rnibee Dios. ²⁵Guyasiru ted
 te cameii ni' te guux lo ni jiu'
 rebenrajp lo xcäl'rnibee Dios.

²⁶Reni biejn diajgni rediidxre,
 räjpreni:

—¿Chuxhni'c sajc laa lo dojl,
 palga si'c najcni?

²⁷Dxejc räjp Jesús lojreni:

—Guira'ti ni di gacdi gun rebejn,
 guyasi rajc rujn Diosni.

²⁸Dxejc räjp Pedr lojni:

—Dad, nuurnu abasa'nnu guiraa
 rehxixtennu te siopnalnu luj.

²⁹Dxejc badzu' Jesús diidxre lojni,
 räjpni:

—Rniliápac lojtu, chutis ni gusaan
 rolizjni näjza rexcuzajzni, rebejtzni,
 chäälni, xi'nni xcuent xcäl'rnibee
 Dios, ³⁰sica'ni xhiroobru lo
 guedxliujre, luxh sica'ni yäl'nabajn
 par tejpas.

Rusule' Jesús stehuält xho guetni

(Mt. 20:17-19; Mr. 10:32-34)

³¹Gurejdx Jesús rexpejnpacni te
 laad, te räjpni lojreni:

—Naj chonnu guedx Jerusalén
 cadro nanab soob rediidx nani
 bacuaa dade' ni gunii xtidx Dios
 galooli xcuent Xi'n Dios ni gujc
 Niguii. ³²Sutedrenini ladzṇaa
 rebenzajt, suxhiznäjrenini,
 susacsírenini, sutiobxhejnliireni
 lojni, ³³luxh che luux quinenini,
 dxejc sugu'trenini, luxh ni riojn
 dxej sibansacni loj rebengut.

³⁴Dxejc laareni direni niacbee
 rediidxre, dizareni gan xhini'c
 caniini, sa'csi najcreni diidx ni di
 gacdi gacbeereni.

Rusiajc Jesús te beṇ lotiä'p

(Mt. 20:29-34; Mr. 10:46-52)

³⁵Cheni sadzujṇ Jesús te guejdx
 ni laa Jericó, sobga' te beṇ lotiä'p
 ro' nezyuj, canabni gojn. ³⁶Che
 biejn diajgni cadejd xhidajl bejn lo
 nezyujga, gunabdiidx beṇ lotiä'pga
 xhini'c cayajc. ³⁷Dxejc räjpreni:
 —Jesús ni siääd Nazare't cadejdni
 nezga.

³⁸Dxejc guredxa'ni räjpni:

—iJesús, xi'n toDavid, balaslajz
 narä!

³⁹Rebejn ni nijd lojreni
 gudiṇnäjreni beṇ lotiä'pga te jäü
 ro'ni, niluxh laani dipru guredxa'ni,
 räjpni:

—iXi'n toDavid, balaslajz narä!

⁴⁰Dxejc guzudxi Jesús ro'c,
 gunibeeni jäädnäreni bejnga lojni.
 Che bidzujṇni lojni, gunabdiidx
 Jesús lojni, räjpni:

⁴¹—¿Xhini'c rlaizlu gunnäá luj?

Badzu' ben lotiä'pga diidxre,
räjpni:

—Dad, rlazä jien loä.

⁴²Dxejc räjp Jesús lojni:
—iSujien balojlu! Abiajclu sa'csi
huililajzlu.

⁴³Lagajc dxej, biengajc lojni,
calä'pni xpala'n Dios, huinajlni
Jesús. Luxh guiraa rebejn ni bahuii
xhi guzajcni, gulä'pzareni xpala'n
Dios.

Huij Jesús rolizj te bejn ni laa Zaqueo

19 Dxejc biu' Jesús guedx
Jericó, sadejdzani guejdxga.
²Ro'c rbäjz te benrapduxh, ni laa
Zaqueo, ni rnibee lo reni rusquijx
xcuent impuest. ³Rlazj Zaqueo fiini
loj Jesús te gumbeenini, per digacdi
fiini lojni sa'csi najcni te benxhate',
luxh xhidajl bejn siädsaj guideb gabi
Jesús. ⁴Ni'c baxunni gunijdni lojreni,
huä'pni lo te yajgro ni suga' gajxh
nez cadro ted Jesús te si'c sajç fiini
loj Jesús. ⁵Che gudejd Jesús nejzga,
guläsni lojni jiaa, bahuiini cadro
sobga' bejnre. Dxejc räjpni lojni:

—Zaqueo, basquejn biäjt ro'c,
lagajc nadxej rlazä çajia'nä rolijzlu.

⁶Dxejcti biätguxun Zaqueo lo
yajgga, rbalazduxhni huinäni Jesús
rolizjni. ⁷Che bahuii guiraa rebejn
xhi gujc, gusloj camojmreni, direni
jiulajz, räjpreni:

—Jesús sajia'n rolizj te bendojl.

⁸Dxejcti huisulii Zaqueo, räjpni
loj Jesús:

—Bahuilaa, Dad, gala' xhixtenä
gudedä loj rebenproof; luxh palga
yu' chu loj cua'ä xhixtenni con
yälrusguee, sudzu'ä lojni tajp huält
si'cti ni cua'ä.

⁹Räjp Jesús lojni:

—Lagajc nadxej gubicaj xtojllu
näjza xtojł reni rbäjz rolijzlu, sa'csi
guliipac najclu te xagdo toAbram.
¹⁰Pues Xi'n Dios ni gujc Niguii
biädtiil rebendojl te guslaani
rebejnğa ni gunijt nen dojl.

Xcuent tzuu meel

¹¹Lał ni cagucua diajgreni xtidx
Jesús, bijzani te cuent ni ruluii,
sa'csi asiäddzujngajxhreni guedx
Jerusalén, luxh laareni rujnreni
xhigab sisloj guinibee Jesús si'ctisni
guidzujnni guejdxga. ¹²Dxejc räjpni
lojreni:

—Guyu' te bejn, benrajpni, huijni
te guejdx zijtro te gacni reii, dxejc
guibisacni. ¹³Che gajdni guirii,
gurejdxni tzuu xmosni, te badeedni
lo tebgajreni te melpla't ni sacduxh,
räjpni lojreni: “Cołyujn dzuun con
meelre che guibisacäli.” Sä'tini.
¹⁴Per reben lajdxni dipacreni
guichaglazj bejnğa, ni'c baxhałreni
gäii bejn te saye'tzreni: “Di
rlajzdinu gacni xreiinu.” ¹⁵Luxh
empac gujçni reii, dxejc gubisacni
lajdxni. Che bidzujnni gurejdxni
rexmosni ni badeedni meel cua'reni,
te gacbeeni lac bejn tejjareni
gaan. ¹⁶Ni bidzujn ganid räjpni
lojni: “Dad, xmeellu bejn gaan
stzuu meel.” ¹⁷Dxejc räjp reii lojni:
“Huenca, luj najclu te mossac',
sa'csi laaca bejnlu dzuun lo te
dzunbäz, naj sunidxä guinibeelu
loj tzuu guejdx.” ¹⁸Bidzujn stee
mos lojni, räjpni: “Dad, xmeellu
bejn gaan gäii meel.” ¹⁹Dxejcti
räjpni lojni: “Luj guinibeelu loj
gäii guejdx.” ²⁰Bidzujnti stee mos
lojni, räjpni: “Dad, aree xmeellu,

guluchedzu'tzäni nen te baii
²¹sa'csi bidxebä guebju, sa'csi najc
 guebju te ben nadiplajz, rutojp
 guebju cadro di guebju nuzuj,
 luxh rliäs guebju cose'ch cadro di
 guebju nibe'c.” ²²Dxejcti räjp reii
 lojni: “iMosguijdx! lagajc ro'lu birii
 diidx ni gunälu yälguختis. Palga
 najnlu nacä te ben nadiplajz, najnlu
 rutopä cadro dina nusuä, najnlu
 rliäsä cose'ch cadro dina nibe'cä,
²³¿xhicuent dilu nisa'n xmelä nen
 te bancw te che nibi'ä nica'a xmelä
 nägajc xi'n meelga?” ²⁴Dxejc räjpni
 loj reni suga' ro'c: “Colgudzucaj
 meelga lojni, colgudeedni loj ni
 rajp tzuu meel.” ²⁵Laareni räjpreni:
 “Dad, per laani arajpni tzuu meel.”
²⁶Dxejc badzu' reii diidxre lojreni,
 räjpni: “Ni'cni rniä, reni rajp,
 sica'rureni, niluxh reni di ga'p
 lojreni sibicaj guiraa recosbäz ni
 rajpreni. ²⁷Luxh xcuent reni rdxe'ch
 loä, ni di rlajz niacä reii lojreni,
 coltanäreni ree, colgugu'treni nez
 loä.”

Che biu' Jesús guedx Jerusalén

(Mt. 21:1-11; Mr. 11:1-11; Jn.12 :12-19)

²⁸Che gulujx guniini guiraa
 rediidxre, huinuuni xnejzni, sääni
 nez lo guejdx Jerusalén. ²⁹Che
 asadzungajxhni reguejdx ni laa
 Betfagé näjza Betania, gajxh lo
 dajn ni laa Oliib, baxhałni tio'p
 rexejnpacni, ³⁰räjpni lojreni:
 —Colchäj lo guejdx' ni suga' lad
 rec. Che guidzujntu, guidxältu
 caduu te bur huin ni gajd bejn
 cuib. Colguxhecni, coltanäni ree.
³¹Palga yu' chu guiniabdiidx lojtu:
 “¿Xhicuent caguxhectuni?” colye'tz
 lojni: “Dad caquiinnini.”

³²Sä'ti rexejnpacni nani
 baxhałni, bidxälreni manga
 sigajctisni räjp Jesús. ³³Cheni
 caguxhecreni bure'ga, rexpaxhwaan
 bure'ga räjp lojreni:

—¿Xhicuent caguxhectu bure'ga,
 ä?

³⁴Dxejc badzu'reni diidxre,
 räjpreni:

—Sa'csi caquiin Dadni.

³⁵Sas huinäreni bure'ga loj Jesús,
 gudixhrenei xhajbreni dejtzni, te
 gubijb Jesúsni. ³⁶Guideb cadro
 gudejd Jesús gudixhrenei xhajbreni
 lo nezyuj cadro tedni. ³⁷Cheni
 ameer guidzujnni bajaad xten
 dan Oliib, gusloj cabaa lajz guiraa
 rebejn, rbedxa'lireni calä'preni
 xpala'n Dios sa'csi bahuiireni
 guiraa remilagwr ni bejnni.

³⁸Räjpreni:

Chicbaa reii ni siääd xcuent
 Xtadnu Dios te guinibeeni
 loonu.

Sucuedxilajz guiraa reni yu'
 guibaa, chä'p xpala'n Dios
 xhaguibaali.

³⁹Dxejc gaii refarisee ni suga'
 galäii rebejn, räjpreni loj Jesús:
 —Mastr, guididxa' lo rebejn ni
 siädnałlu te na'cru guiniireni si'c.

⁴⁰Dxejc Jesús räjp lojreni:
 —Rniliä lojtu, palga redee gusäu
 ro'reni, sibedxa' reguijre.

⁴¹Che bidzujnni gajxh, che
 bahuiini guedx Jerusalén, biin
 Jesús xcuent guejdxga, ⁴²räjpni:
 —iMaläii gacbeelu, masque
 nen redxjre, xhini'c sajc guniidx
 yälrbedxilajz lojlu! Per naj naga'tzni,
 luxh digacdi fiilu lojni. ⁴³Sidzujn
 dxejga lojlu, cheni jääd reni rdxe'ch
 lojlu sujnreni si'c te guralyuj guideb

gabilu, nez lojlu sigajc nez dejtzu sisijreni. ⁴⁴Susälta'reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biäd Dios biädhuiilu.

Rusia Jesús nen guidoro

(Mt. 21:12-17; Mr. 11:15-19; Jn. 2 :13-22)

⁴⁵Dxejcti biu' Jesús nen guidoro, guslojni cabääni rebejn ni caguto' näjza reni casii. ⁴⁶Dxejc räjpni lojreni:

—Loj rexquijtz Dios caj rediidxre: “Rolizä sajz te yu' cadro jädnabtu lo Dios”, niluxh la'tu abejntuni si'c te biliää xte gubaan.

⁴⁷Guixe-guixee caguluii Jesús nen guidoro, luxh reni rnibee loj rebixhojz näjza rebejn ni ruluii leii, näjza rebengool xte guejdxga caguuilreni mood te ju'trenini, ⁴⁸luxh direni nidxäjł xho niujnrenini sa'csi guiraa rebejn cacuadiagdzu'tzreni xtiidxni.

Xcälrnibee Jesús

(Mt. 21:23-27; Mr. 11:27-33)

20 Te dxej suga' Jesús nen guidoro, caguluiini rebejn, cagusule'zani diidx xcuent xho guibicaj xtojreni, che bidzujn reni rnibee loj rebixhojz näjza rebejn ni ruluii leii näjza rebengool, ²räjpreni lojni:

—¿Xhi yälrnibee rujnlu recosre?
¿Chu baniidx yälrnibeega lojlu?

³Dxejcti räjp Jesús lojreni:

—Narä sigajcza gunä te yälgunabdiidx lojtu, colgudzu' diidxre loä, ⁴¿chuni'c baxhal Juan te gutiobnisni rebejn? ¿La Dios o la rebejn, ä?

⁵Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhalni, dxejc naani loonu: “¿Xhixhcuent ditu ninilajz xtiidxni?” ⁶Palga jie'tznu: “Rebejn baxhalni”, guiraa rebejn sucuaa guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

⁷Dxejz badzu'reni diidxre, räjpreni:

—Dinu guidon chuni'c baxhal Juan te biädtiobnisni.

⁸Dxejz räjp Jesús lojreni:

—Dizana guiniä xhi yälrnibee rapä te runä recosre.

Xcuent remosguijdz

(Mt. 21:33-44; Mr. 12:1-11)

⁹Dxejz gusloj canii Jesús loj rebejn, bijni cuentre lojreni, räjpni:

—Guyu' te bejn bazuj yaguub lo xyujni. Dxejz badedlaanini lo gaii bejn chääreni meed, sä'tnini zijt, gucladuxhni ro'c. ¹⁰Che bidzujn dxej ni guidojz cose'ch, baxhalni te xmosni sanab cose'ch ni riäjł xca'ni. Per laareni gudijnreni mosga, xhetliidi badeedreni chanäni lo xpaxhuaan yujga.

¹¹Dxejcti baxhalni stee mos lojreni. Dxejz sigajcza gudilnäjnrenini, gudijnrenini, luxh xhetza badeedireni lojni, ganaxni gubi'ni lo xlamni. ¹²Dxejcti baxhalni ni riojn mos lojreni, per sigajcza gudinduxhrenini, barilaagwrenini.

¹³Dxejz bejn baxhuaanga xhigab, naani: “¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni.” ¹⁴Dxejz che bahuii reni go'n-meed lo xi'nni,

dxejc räjpreni lo sa'reni: “Laa deeni gac xteni reyujre. Do'o guigu'tnuni te nuurnu xca'nu yujre gacni xtennu.” ¹⁵Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, räjpni:

—¿Xhichani'c gunnäj xpaxhuaan yujga reben̄ guijdxre, ä? ¹⁶Sidzujñni, sugu'tni guiraa reni cayujn dzunmeed lo yujga, dxejc sudeedni yujga lo garenca bejn̄.

Che biejn diajgreni rediidxre, räjpreni:

—iNa'c gusaan Dios gacni si'c!

¹⁷Bahuii Jesús lojreni, dxejc räjpni:

—¿Xhixhni'c caj lo guijtz ni bacuaa redade' ni gunii xtidx Dios galoo? Ro'c cajni:

Guij nani guläcaj renani runchee yu',

ni'c agujc guisa'c ni guzuj galoo.

¹⁸Chutis ni jiajb yejc guijga, sianduxhni, per nani jiajb guijga yejcn̄i siujpacni, li däj gacni.

Xcuent reimpuest

(Mt. 21:45-46; 22:15-22; Mr. 12:12-17)

¹⁹Reni rnibee loj rebixhojz, näjza reni ruluii leii rlajzreni guiniaazreni Jesús lagajc orga, sa'csi gucbeereni lojreni gunii Jesús cuentre, luxh xhet bejndireni sa'csi rdxejbreni rebejn̄. ²⁰Dxejc cagula'tztisrenini, baxhala'reni gaii bejn̄ te gunsireni si'c ni najcreni bendxan, te gucuadijgreni xtiidxni don gaxäjssi guiga'ni lo te diidx te guteedrenini lo yälguxhtis, yälrnibee xte gubernadoor. ²¹Dxejc gunabdiidxreni lojni, räjpreni:

—Dad, Mastr, nadonnu laaca nii guejblu, laaca ruluii guejblu,

luxh di guejblu fixgaa la yu' chu najc bejn̄, ruluisa'c guejblu xnez lo Dios. ²²Gunilaa loonu, ¿la laaca guidiixnu reimpuest loj xcubieer César o la xhet laadini, ä?

²³Sas gucbegajc Jesús cayujnsireni yälgunabdiidxga, dxejc räjpni lojreni:

—¿Xhicuent runnäjtu narä scree?

²⁴Baluii loä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

²⁵Dxejc räjpni lojreni:

—Coldeed lo César nani najc xten César; coldeedza lo Dios nani najc xten Dios.

²⁶Luxh direni niujn gaan niga'ni loj nicla te diidx ni guniini nez loj rebejn̄. Rdxelojtisreni lo rextiidxni, biäuti ro'reni, guzudxireni.

Rniabdiidxreni xcuent yälrbansac lo rebengut

(Mt. 22:23-33; Mr. 12:18-27)

²⁷Dxejc huij gaii resaduceos huihuiireni loj Jesús. Di resaduceos chalilajz rbansac bejn̄ lo rebengut. Ni'cni gunabdiidxreni loj Jesús, ²⁸räjpreni:

—Dad, Mastr, basa'n Moisés guijtz loonu, lojga caj: “Palga guet te bejn̄, gusaanni chääl̄ni ruti xi'nni, nanabpac xca' bejtzni gunaaga te chu xi'nni con laani xcuent tobejtzni.” ²⁹Guyu' gajdz niguii, bejtz najcreni. Sas cua' niguigalooaga chääl̄ni. Che gujtni ruti xi'nni. ³⁰Dxejcti cua' ni rojppa gunaaga. Che gujtni, rutiza xi'nni. ³¹Sigajcza guzajc ni riojnga. Si'cza guläsnäj gunaaga guigajdzreni. Guiraaren̄i gujt, nicla tejreni di

xi'nreni niu! ³²Dxejcti nāj gunaaga gujt. ³³Guigajdzreni guläsnäjreni gunaare, ni'cni, che guibansacreni lo rebengut, ¿chu cháäl gacni, ä?

³⁴Dxejc räjp Jesús lojreni:

—Lo guedxliujre ruchnaa rebejn, ruedeazreni xindxa'preni ruchnaa.

³⁵Niluxh rebejn ni agule Dios te cháäreni xhaguibaa, nājza te guibansacreni loj rebengut, di reni'c guchnaa, dizareni gudeed xindxa'preni guchnaa, ³⁶sa'csi diru gac guetreni, anajcreni si'c najc rexangl Dios. Laareni najc xi'n Dios sa'csi abaspansac Diosreni.

³⁷Moisésli basule' xcuent ni rbansac reben loj rebengut che bacuaani diidx xcuent yajg ni gurebajl. Ro'c gurejdxni Dios räjpni: “Xtios Abram, Xtios Isaac, nājza Xtios Jacobo”, ni'cni nabajnpacreni lo Dios.

³⁸Sa'csi di Dios gac Xtios rebengut; najcni Xtios rebejn ni nabajnpacreni par tejpas, sa'csi par laani guiraa rebejn nabajnpacreni.

³⁹Dxejc gaii reni ruluii leii badzu'reni diidxre, räjpreni lojni:

—Mastr, laaca guniilu.

⁴⁰Sa'csi dirureni niajx niniabdiidxrureni lojni.

Chu xi'n najc Crist

(Mt. 22:41-46; Mr. 12:35-37)

⁴¹Dxejcti räjp Jesús lojreni:

—¿Xho mood rniireni Crist najc xi'n toDavid, ä? ⁴²Ni lagajc toDavid bacuaa lo reguijtz ni laa reSalmo:

Dad Dios räjp lo Xtadä:

⁴³“Gurej xladbeä cheni guidzujnli dxej ni gudzugä guiraa ni rdxe'ch lojlu te gacbeereni luj rnibeelu guira'ti.”

⁴⁴¿Xho mood gacni xi'nni palga rnii toDavid lojni “Dad”?

Rucuaquij Jesús reni ruluii leii

(Mt. 23:1-36; Mr. 12:38-40; Lc. 11:37-54)

⁴⁵Guiraa rebejn cagucuaadiajg che räjp Jesús loj rexpejnpacni:

⁴⁶—Colyajp cuidaad reni ruluii leii, sa'csi rdxagljazreni rajcwreni lajd siool, rlajzreni saru guinii guiraa rebejn “xchan” lojreni, rlajzreni jiu bejnreni nez loguii, rlajzreni cuereni lo reyagxhilsa'c nen reguidobäz, nājza cadro rajc lanij. ⁴⁷Rudzucajzareni rexhixten regunabiuud, dxejc rolreni rele' siolduxh che rniabreni lo Dios te fii rebejn, te naa bejn najcreni bendxan, luxh lojreni suxhal Dios te castigwroru.

Gojn xten te gunabiuud

(Mr. 12:41-44)

21 Nen guidoro bahuii Jesús cagusäl rebenrajp gojn nen te guijn cadro rdojp gojn.

²Bahuiizani lo te gunabiuud, lacti proobni. Basälni xcojnni nen guijnga, tio'ptis melbäz basälni.

³Dxejc räjp Jesús:

—Rniliäpac lojtu, gunabiuud proobga basälruni loj guiraa reni casäl gojn, ⁴sa'csi guiraa reded ni cagusäl xcojnni casälreni tudxe'nsi xmeelreni, niluxh gunaare loj xcälproobni, basälni guiragajc ni rajpni te jio' xhi gauni.

Räjp Jesús sibijl guidoro

(Mt. 24:1-2; Mr. 13:1-2)

⁵Yu' reni cayujy diidx xcuent guidoro, räjpreni:

—Lacti sacruduxh rienni sa'csi guisa'c naccheeni, suchenäjzani xhidajl recossa'c ni badeed bejn si'c gojn.

Dxejc gunii Jesús lojreni, räjpni:

⁶—Sidzujn dxej sibijl guiralii ni cahuiitu, nicla tej guij di jia'n yejc sa'ni, guiragajcni sibijl.

Reseen ni chu che nitloj guedxliuj

(Mt. 24:3-28; Mr. 13:3-23)

⁷Dxejc gunabdiidx rexpejn pacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

⁸Räjp Jesús lojreni:

—iColsusin te na'c gusgueereni la'tu! Sa'csi xhidajl reni jiaäd sinii: “Narä nacä Crist”, o “Asiädgajxh redxej che jiaädni”, per na'c chalilajztu xtiidxreni, na'cza chanajltureni. ⁹Luxh che jiejn diajgtu cayajc guer cadijnäy sa' bejn, na'c guidxejbtu, sa'csi ganid recosga gac, luxh gad galdi nitloj guedxliuj.

¹⁰Dxejc sanuu cayäjpni lojreni:

—Säjs te nación, sucuanäj stee nación, näjza te ladx bejn sucuanäj stee lajdx bejn. ¹¹Sajcza xuro, su' gubijn, su'za yälgujidx nez ree nez rec. Luxh xhaguibaali sien guiraloj ni ruchejb näjza seenro.

¹²Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo reben guidobäz, susälzaren i la'tu nen latzguiib, sinäzaren i la'tu nez loj reii näjza gubernadoor sa'csi rinälajztu xtidxä. ¹³Luxh guiraa dee sajctu te gac gusule'tu xtidxä lojreni. ¹⁴Na'c gunxgaatu xhigab nen lastootu xhini'c guiniitu

lojreni, ¹⁵sa'csi narä sunidxä diidx guiniitu, sunidxäza yälnajn lojtu te digac gudzu'reni diidx lojtu niclaza gacdi guiniyajreni xtiidxtu. ¹⁶Näjza rex cuzajntu sibire lojtu, suto'reni la'tu, sigajcza rebejtztu, resa'tu, rexamiigwtu, luxh yu'tu sugu'treni. ¹⁷Guiraa rebejn guedxliuj sibälaz la'tu sa'csi rinälajztu xtidxä.

¹⁸Niluxh ni'cla tej xquidxejctu di nitloj. ¹⁹Luxh palga sutijptis lajztu, sajptu yäl nabajn par tejpas.

²⁰Che fiitu tre' xhidajl soldaad guideb gabi guedx Jerusalén colyacbee abidzujn dxej ni guibijlni. ²¹Dxejc reni yu' guedx Judea, nanab guxunreni chacuatzlojreni nen redajn; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga, ²²sa'csi nen redxejga sujn Dios fis lo guejdxga te soob rediidx ni caj lo reguijtz xten Dios. ²³Probe'za regunaa ni nuu báz nen redxejga, näjza regunaa ni ca' báz, sa'csi su' yälhuinduxh lo guedxliuj, näjza fis ni gun Dios loj rebejnga. ²⁴Yu'reni guet lo guer, yu'zaren i chää pres, sijreni balti guedxzijt. Dxejc rebenzijt sinibee guedx Jerusalén che guiza'li redxej ni gusaan Dios guinibee rebejn ni di gac xpejn Israel.

Cheni jiaäd Xi'n Niguii

(Mt. 24:29-35, 42-44; Mr. 13:24-37)

²⁵Räjpzani:

—Dxejc su' seen lo gubijdx näjza lo bäii, näjza loj rebajle' ni yu' xhaguibaa. Luxh lo renacion guedxliuj su' rebejn yärsia', di jien xhi gunreni, sidxebduxhreni sa'csi siejn diajgreni chubeduxh lo nisdoo,

säsduxh nis ni räjs lo nisdoo. ²⁶Sitiol rebejn xcuent yälrdxebduxh che gunreni xhigab xhicharuni'c gac lo guedxliuj, sa'csi näj guideb guibaa sinibsejs. ²⁷Dxejcti suhuiireni lo Xi'n Dios ni gujc Niguii, siäädni lo te za guideb xcäl'rnibeeni, näjza yälrdimbichaduxh. ²⁸Che guisloj gac recosre, colsutijp lajztu, colguiliäs yejctu, colguibalajz sa'csi asadzujn dxej gusilajztu.

²⁹Guniizani stee cuent lojreni, räjpni: —iColhuii lo yagiigw näjza lo guiraa reyaj! ³⁰Che fiitu acabääni be'n, colyabee lagajc la'tu, abidzungajxh bäii nisguij. ³¹Sigajcza che fiitu agusloj cayajc recosre, colyabee asiäddzujn xcäl'rnibee Dios.

³²Rniliäpac lojtu, guiraa recosre sajc ansde guet rebejn ni yu' naj.

³³Guibaa näjza guedxliuj sinitloj, rextidxä dini nitloj.

³⁴iColsusin lagajc la'tu! Na'c gusaantu cha lajztu yälrausa'c, yälrä', yälga'ptu xhixtentu, dxejc ditu gacbee che bidzujn dxejga. ³⁵Sa'csi si'c sidzujn dxejga loj guiraa reben guedxliuj.

³⁶Colsusin, colbejdx, colguiniabtis lo Dios, te gac laatu lo guira'ti ni gac, gacza suutu nez loj Xi'n Dios ni gujc Niguii.

³⁷Rdxee ruluui Jesús nen guidoro dxejc guxhijn sajjia'nni yejc dan Oliib.

³⁸Rsilru ristie rebejn te rdzujnreni lo Jesús nen guidoro casob rsil, te gucuadijgreni rextiidxni.

Ria'nreni diidx xho guiniaazreni Jesús

(Mt. 26:1-5, ddd14 -16; Mr. 14:1-2, ddd10 -11; Jn.11 :45-53)

22 Siäddzungajxh dxe lanij che rajwreni yätxtiil ni di

säguij, laaza lanijga pascw. ²Dxejc reni rnibee loj rebixhojz näjza rebejn ni ruluui lei caguiilreni xho gunreni te ju'treni Jesús, sa'csi rdxejbreni rebenguejdx.

³Dxejc biu' bendxab lastoo Judas ni laaza Iscariote, ni najc tej retzubitio'p xpejn'pacni. ⁴Dee huininäjni dade' ni rnibee loj rebixhojz näjza loj reni rnibee rexcuxhtis guidoo. Guninäj Judasreni xho gunni te guteedni Jesús ladzñaareni. ⁵Dxejc bibalajzreni, bia'nreni diidx gudeedreni meel lojni. ⁶Cuäjbt� Judas, dxejcnj guslojni caguiilni xho gunni guteedni Jesús ladzñaareni che rut bejndi suga'.

Xchej xten Dad Jesús

(Mt. 26:17-29; Mr. 14:12-25; Jn.13 :21-30; 1Co. 11:23-26)

⁷Bidzujn dxe lanij che rajwreni yätxtiil ni di säguij, che rugu'tzarenj te xiil si'c ni caj lo xleii to Moisés. ⁸Dxejc baxhał Jesús Pedr näjza Juan, räjpni lojreni:

—Colchayejn xchej xten pascw te guidaununi.

⁹Dxejc laareni gunabdiidxreni lojni, räjpreni:

—¿Caro rlajzlu choyennuni?

¹⁰Räjp Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Colchanajlni, coljiu' roliz bejn cadro jiu'ni laani. ¹¹Dxejc colye'tz lo bejn ni najc rolizni ro'c: “Si'c naj Dad Mastr: ¿Con yu' cadro sajc gauxchenää rexpənä naj pascw?” ¹²Dxejc guluuini lojtu te yu' ni sojb jiaa yejc stee yu'. Asuchexгаа yu'ga. Ro'c colyejcn xhi guidaunu.

¹³Sä'tireni. Si'ctis ni räjp Jesús lojreni, si'cpac bidxälreni. Dxejc bejnreni xchej xte lanij pascw gaureni.

¹⁴Che bidzujñ or, gurenäj Jesús rexpejñpacni lo mex. ¹⁵Dxejc räjpni lojreni:

—Guyuduxhä gaan gaunääpactu xchej xten pascw ansde tedä trabajwduxh. ¹⁶Sa'csi rniä lojtu, diruna gaunää la'tu pascw cheni guidzujñli dxej ni gacni lo xcälrnibee Dios.

¹⁷Dxejc cua'ni te co'p, badeedni xquixtios lo Dios, räjpni:

—Co'lyä' dee, colgudeedni lo sa'tu. ¹⁸Sa'csi rniä lojtu, diruna yä'ä nis ni rii yejc uub stehuält cheni guidzujñli xcälrnibee Dios.

¹⁹Dxejcti cua'ni yätxtiil, badeedni xquixtios loj Dios, gula'nini, gudisnini lojreni, räjpni:

—Dee najc si'c tiexhä ni gudedä ju'treni xcuenttu. Co'lyejñ screeza te guinalajztu narä.

²⁰Si'cza bennäjni co'p che gulujx gudajwreni, räjpni lojreni:

—Ni yu' neñ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn ni aguleni.

²¹'Per bahuilaare, bejn ni guto' narä sobganäj narä lo mexre.

²²Guliipacni, Xi'n Dios ni gujc Niguii sinuu tedni loj nezyuj ni abaluu Dios lojni. Luxh proobza bejn ni guto' narä.

²³Dxejc gusloj canabdiidxreni lo sa'reni, ÷chuchani'c gunni?

Cayejyreni chuni'c najc beñroru

²⁴Sas gusloj cayejyreni, don chuni'c guibee gac beñro lojreni.

²⁵Dxejcti räjp Jesús lojreni:

—Rereii ni rnibee lajdx bejn ni digac xpejn Israel, rnibeereni lojreni astoo xtenpacreni najc reguejdxga. Luxh rebenguejdxga rniilacti hueen najc rereiiiga. ²⁶Per la'tu na'c gactu si'c. Nani najc bengoolru lojtu, ni'c riäjñ gacni si'c najc ni huinru lojtu. Luxh nani rnibee riäjñ gacni si'c mos. ²⁷¿Chuni'c sajcru lo bejn? ¿La bejn ni rbej lo mex te gauni o la ni ruteed xhi gaureni lo mex? ¿La xhet sajcdiru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

²⁸'La'tu najctu ni gusunäj narä guideb ni gudedä retrabajw ni gudedä. ²⁹Ni'cni narä runidxä yälrnibee lojtu sigajc ni baniidx xtad yälrnibee loä, ³⁰te gautu, yätu lo xmexä xhaguibaa, te cuezatu lo yagxhil cadro guntu yälguixhtis loj rexpejn guitzubitio'p rexagdoos Israel.

Räpxгаа Jesús di Pedr guicäjñ numbeeni

(Mt. 26:31-35; Mr. 14:27-31; Jn.13 :36-38)

³¹Räjp Jesús loj Simón:

—Simón, Simón, agunab bendxab ni laa Satanás luj te gusniibni luj si'c rusniib bejn xob te jiani. ³²Narä agunabä lo Dios xcuentlu te na'c jäädx xcälrililajzlu. Luxh luj che gusiejch lajzlu, guibi'lu, bastioob lastoo resa'lu.

³³Räjp Simón lojni:

—Dad, narä sirinalälu; mase gusäureni luj latzguuib, näjza narä siäunäälu; mase ju'treni luj, näjza narä setnäälü.

³⁴Dxejcti räjp Jesús loj Simón:

—Pedr, rniä lojlu, nicla gajd guidgaii cuedxa' nadxej niluxh luj alaräjplu choṅli huält, dipaclu gumbee narä.

Nanab soob rediidx ni bacuaareni xcuent Jesús

³⁵Dxejc gunabdiidx Jesús lojreni räjpni:

—Che ganaxtu baxhaḷä la'tu, xhet bolsdi sanätu, nicla carteerdi, niclaza stee gura'chdi, ḷla yu' xhi biquiintu, xhi biäädx lojtu, ä?

Dxejc räjpreni:

—Xheti.

³⁶Dxejc räjpni lojreni:

—Luxh naj rniä lojtu, ni rajp bols, suchanänini; sigajcza carteer. Luxh ni di ga'p espaad, guto'ni xchamarni te siini tejni. ³⁷Sa'csi rniä lojtu, sisiojb rediidx ni caj lo requijtz Dios xcuentä, cadre caj: “Bigabnäjni rebeṅ latsiaj.” Guiraa ni caj lo reguijtz xten Dios xcuentä nanab soobpacni.

³⁸Dxejc räjpreni lojni:

—Dad, aree tio'p espaad.

Dxejc räjpni lojreni:

—Sajl reni'c.

Rbedx-rniab Jesús loj Dios

(Mt. 26:36-46; Mr. 14:32-42)

³⁹Dxejcti birii Jesús, si'cni rujnpacni, sääni nez dajn ni laa Oliib. Dxejc sanajl rexpejnpacni.

⁴⁰Che bidzujṅreni ro'c, räjpni lojreni:

—Colcuejdx, colṅab lo Dios te na'c jiajbtu lo dojl.

⁴¹Dxejc gubicaj Jesús lojreni, huijni te lajt zite' cadre suga'reni, si'cti cadre rdzujṅ te guij che

rucuaanini. Ro'c bazuxhijbni, gurejdx-gunabni lo Dios, ⁴²räjpni:

—Xtadä, palga rlajzlu, basḷaa narä loj trabajwduxhre. Niluxh na'c gacni si'c ni rlazä narä. Bejn si'cni rlajzlu gunlu.

⁴³Dxejc biricaj te xangl Dios lojni te badeedni yälrutiplajzni. ⁴⁴Laḷni cadejdni trabajwduxh, cayac-huinuxh lajzni, cabedx-canabruni lo Dios. Guzunislini gusloj catejb lo yuj biniduxh si'c rejn lojni.

⁴⁵Cheni huisuni, guluix gurejdx-gunabni lo Dios, huijni cadre suga' rexpejnpacni. Ro'c bidxälnireni nagayejs guiraareni sa'csi cayac-huin lajzreni. ⁴⁶Dxejc räjpni lojreni:

—ḷXhicuent nagajejstu?
iColchastie! iColṅab lo Dios te na'c jiajbtu lo dojl!

Che gunaazreni Jesús

(Mt. 26:47-56; Mr. 14:43-50; Jn.18 :2-11)

⁴⁷Laḷ ni canii Jesús lojreni, bidzujṅ xhidajl bejn. Tej rexpejnpacni ni laa Judas, nijdni nez loj rebejṅga. Dxejcti gubigni loj Jesús, te bachagro'ni loj Jesús.

⁴⁸Dxejc räjp Jesús lojni:

—Judas, ḷla con te yälruchagro' ruteedlu Xi'n Dios ni gujc Niguii ladzṅaa rebejṅre, ä?

⁴⁹Che bahuii reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ḷla sixa'tnu yejcreni con spaad, ä?

⁵⁰Sas tej rexpejṅ Jesús gudilṅnäj te mos xten ni rnibee loj rebixhojz, batiu'ni diajgni ladbee. ⁵¹Dxejc räjp Jesús lojreni:

—iAgujc! iColgusaanreni!

Dxejc gudajñ Jesús diajg mosga, basiajcnini. ⁵²Gunigajc Jesús loj reni rnibee loj rebixhojz nájza reni najc guixhajg xten guidoo nájza rebengool, guiraa reni siädxiinini, rájpní:

—¿La siädñätu spaad nájza garo't, astoocanu siädxiitu te gubaan, ä?

⁵³Cheni suga'a lojtu guixe-guixee nen guidoo, ditu nuhuañ narä. Per dee najc xortu, luxh arnibee yäñnacäjy la'tu.

Di Pedr guicäjñ numbeeni Jesús

(Mt. 26:57-58, 69-75; Mr. 14:53-54, 66-72; Jn.18 :12-18, 25-27)

⁵⁴Dxejcti gunaazreni Jesús huinäreni rolíjz bixhojz ni rnibee lo guiraa rebixhojz. Siädñäj Pedrni zit-zíjt. ⁵⁵Che bidzujñreni gule'creni guiboo galäii lole' xten bixhojzga, gurejreni guideb gabi, te bidxa' lajzreni. Náj Pedr nadxaag lojreni gurej ro'c. ⁵⁶Dxejc te gunaa ni rujñ dzuun ro'c, che bahuiini sobga' Pedr ro'c, rdxelojtisni lojni, rájpní:

—Náj niguiire guyunäj Jesús.

⁵⁷Dxejc basuni' Pedr rájpní:

—Nan, dina gumbeäni.

⁵⁸Che gojl stera't, che bahuii stee bejñ lojni, rájpní lojni:

—Náj luj najclu te rexpejñni.

Per Pedr rájñ lojni:

—Gurniälojlu, Dad, dina gacä xpejñni.

⁵⁹Che gudejd si'cti teb or, rájñ stee bejñ lojni:

—Gullipacni, náj bejñre guyunäjni, sa'csi laani najczani te beñ Galilee.

⁶⁰Dxejc rájñ Pedr lojni:

—Gurniälojlu Dad, dipacna ganä xhini'c caniilu löä.

Lañni canii Pedr rediidxre, guredxa' te guidgäii, ⁶¹luxh

gubiréza Jesús, bahuidzu'tzni lo Pedr, dxejc banalajz Pedr nani gunii Jesús lojni, rájpní: “Che gajd guidgäii cuedxa', abazuni'lu choñ huält, rájplu dilu gumbee najrä.” ⁶²Dxejcti guc-huin lajz Pedr, biriini ro'c, rಂಡuxhni.

Rniyajreni Jesús

(Mt. 26:67-68; Mr. 14:65)

⁶³Rebejñ ni canäj Jesús, gusloj caguxhisnäjreni, caguijnzarenini.

⁶⁴Dxejc basäureni lojni, gudajpreni lojni, rájpreni lojni:

—iGunii chuni'c gudijñlu!

⁶⁵Luxh guiraloj cayäjbreni lojni, caniyaduxhreni.

Bidzujñreni Jesús nez loj rebixhojz

(Mt. 26:59-66; Mr. 14:55-64; Jn.18 :19-24)

⁶⁶Che bara yääl, bidojñ rebengool ni rnibee, nájza reni rnibee loj rebixhojz, nájza rebejñ ni ruluii leii, huinäreni Jesús te suuni nez lojreni nen yu' cadro rujñreni yälguxhtis. Dxejcti rájpreni lojni:

⁶⁷—Palga luj najclu Crist, bicäjpní loonu.

Dxejc badzu' Jesús diidxre lojreni, rájpní:

—Palga guicäpäni, ditu

chalilajz. ⁶⁸Luxh palga gunä te yälgunabdiidx lojtu xcuent Crist, ditu gudzu' diidxga löä. ⁶⁹Per najli sibej Xi'n Dios ni gujc Niguii xladbee Gueb Dios ni yu' xhaguibaa.

⁷⁰Dxejc gunabdiidx guiraareni lojni, rájpreni:

—Mbaj pues, ¿la luj najclu Xi'n Dios, ä?

Dxejc badzu' Jesús diidxre lojreni rájpní:

—Nacäni, si'cni najtu la'tu.

⁷¹Dxejc räjpreni lo sa'reni:

—¿Xhirucxhamaaz rlaiztu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

Jesús nez loj Pila't

(Mt. 27:1-2, 11-14; Mr. 15:1-5; Jn.18 :28-38)

23 Dxejc huisu guiraareni, huinäreni Jesús nez loj Pila't. ²Ro'c guslojreni cabe'creni xquejni, räjpreni:

—Bidxälnu bejnre cayujnni biey lo rexpejnnu. Räjpzani xhet nanabdi quiixnu impuest lo reii César. Caniizani laani najcni Crist, nalajznu najczani reii.

³Dxejc gunabdiidx Pila't lojni, räjpni:

—¿La luj ni najc reii xten rexpejn Israel, ä?

Sas badzu! Jesús diidxre räjpni:

—Najcni lagajc si'c ni guniilu.

⁴Dxejc räjp Pila't loj reni rnibee loj rebixhojz näjza loj guiraa rebejn:

—Dina guidxälä nicla tej dojl xten bejnre.

⁵Niluxh laareni sanuutis caniireni, dipru caniireni, räjpreni:

—Guiraa reben Judea cayu' yärsia' xcuent xcälruuiini. Guslojni guedx Galilee, luxh reeli sanuu caguluiinini.

Jesús nez loj Herodes

⁶Che biejn diajg Pila't rediidxre, gunabdiidxni: “¿La Galilee siäd bejnga?” ⁷Cheni räjpreni ro'c siädäni, baxhalnini loj Herodes ni najc gubernadoor xten Galilee, sa'csi nen redxejga yu' Herodes guedx Jerusalén. ⁸Che bahuii

Herodes loj Jesús, bibalajzni sa'csi agujc xchej rlaizni fiini lojni, sa'csi abiejn diagni diidx xcuent ni cayujnni. Luxh rlaizni fiini gunni te milaagwr. ⁹Xhidajl yälgunabdiidx bejn Herodes, luxh xhet guniidi Jesús. ¹⁰Ro'c suga'za reni rnibee loj rebixhojz näjza rebejn ni ruluii leii, cabecduxhrureni xquejni. ¹¹Dxejc gulälaz Herodes näj rexsoldaadni Jesús, baxhiznäjrenini, ni'c bashuajcwrenini te ladsa'c sa' ni rajcw reii, dxejcti baxhalsacrenini loj Pila't. ¹²Lagajc dxejga, Pila't näjza Herodes gujcreni amiigw, luxh galoo bidxe'ch lo sa'reni.

Gunibeereni guet Jesús

(Mt. 27:15-26; Mr. 15:6-15; Jn.18 :39-19:16)

¹³Dxejc gurejdx Pila't reni rnibee loj bixhojz, näjza rebengool ni najc guxhtis, näjza rebenguejdx. ¹⁴Dxejc räjpni lojreni:

—La'tu biädänu bejnre loä, najtu caguquilni rebejn gunreni biey, luxh narä agunabdiidxä guiraloj lojni nez lojtu, luxh abahuiitu dina nidxälä nicla tej dojl ni cagucuaquijtuni. ¹⁵Niclaza Herodes di nidxäl nicla tej dojl, ni'cni baxhalsacnini loonu, luxh abahuiitu xhet dojldi bejnne te guetni.

¹⁶Ni'cni quinäni, dxjecti guslääni.

¹⁷Najc costumbr rusläa Pila't te bejn ni yu' nen latzguiib casob rajc lanijre. ¹⁸Per guiraareni guredxa'reni si'c tejsi bejn, räjpreni: —iBagu't bejnre, basläa Barrabás!

¹⁹Barrabás najc ni basälreni latzguiib sa'csi batojpni te cuaa bejn ni bacuanäj resoldaad xten Rom, näjza sa'csi yu' chu bagu'tni. ²⁰Rlajzpac Pila't gusläani Jesús, ni'c

gunisacni lojreni, ²¹niluxh rebejn dipru guredxa'reni, räjpreni:

—iBacuaani lo cruju, bacuaani lo cruju!

²²Riojn gunisac Pila't lojreni, räjpni:

—¿Xhi dolduxh bejni? Xhetlidi dojl rdxälä bejni te guetni. Ni'cni siguinäni dxejc suslääni.

²³Luxh laareni sanuutis guredxa'reni, gunabreni xcajni lo cruju. Luxh sa'csi guredxa'tisreni, bejntireni gaan gujc si'c ni räljzreni.

²⁴Dxejc cuäjb Pila't gunibeeni gac si'c ni gunabreni. ²⁵Dxejc baslaani bejn ni yu' latzguiib sa'csi bejni bieju, bagu'tzani bejn, dxejc badeedni Jesús lojreni te gunnäjrenini si'ctis ni räljzreni.

Che cuaj Jesús lo cruju

(Mt. 27:32-44; Mr. 15:21-32; Jn.19 :17-27)

²⁶Cheni sanäreni Jesús xcaj lo cruju, gunaazreni te bejn ni laa Simón ni siääd guedx Cirene; basaj bejnga lo niaa. Dxejc basguurenini cruju, siädnajltni dejtz Jesús.

²⁷Siädnajlza xhidalduxh bejn, näjza xhidajl gunaa ni cayonduxh, cabedxa'reni sa'csi cayac-huinduxh lajzreni xcuent Jesús. ²⁸Dxejc gubiré Jesús, räjpni lojreni:

—Gunaa Jerusalén, na'c roontu xcuentä, colyoon lagajc xcuenttu näjza xcuent rexi'ntu. ²⁹Sa'csi sidzujn dxejc gäbreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiä' báz.” ³⁰Dxejc guisloj rebejn gäb loj redajn: “Coljiajb yejcnu”, säjzbazreni loj relom: “Colgucua'tz nuurnu.” ³¹Palga scree runnäjreni narä ni nacä si'c te yagnaga,

aticaxh gunnäjreni la'tu ni najc si'c te yagbijdz.

³²Sanäzreni tio'p benguijdx xcajzreni loj recruju, guetnäjreni Jesús. ³³Che bidzujnreni te lajt ni laa Calabeer, ro'c bacuaarenini Jesús lo te cruju, bacuaazreni guiro'p rebenguijdxga lo stio'p cruju, tejni xladbee, steeni xladbägwini.

³⁴Cheni cagucuaa rebejn reni lo cruju, gunii Jesús, räjpni:

—Xtadä, badzucuj xtoj l rebejnre, sa'csi direni gan xhini'c cayujnreni.

Dxejc gudzujt resoldaad daad yejc xhajnbi, te gudisreni xhajnbi cua'renini. ³⁵Suga' rebejn ro'c cadxelojtisreni. Näjza reguxhtis caguxhisnäjreni laani, cayäjpreni:

—Balti bejn baslaani, naj suguslaani lagajc laani palga guliini laani najcni Crist ni gule Dios.

³⁶Näjza resoldaad caguxhisnäjni, gubigreni lojni te badeedreni bin-nii yäni. ³⁷Dxejc räjpreni lojni:

—Palga gulii najclu reii xten rexpejn Israel, basläa lagajc luj.

³⁸Luxh bacuaarenini gäii diidx loj te baräjd ni cuaj yejc cruju. Con didx griegw, con didx latín, näjza didx hebreo, bacuaarenini scree: “Dee najc Reii xten rexpen Israel.”

³⁹Te reben guijdx ni najl lo te cruju ni caj cuä'ni caniyajni Jesús, räjpni lojni:

—Palga luj najclu Crist, basläa lagajc luj nägajcza nuurnu.

⁴⁰Per benguijdx ni najl lo cruju stelaadga gudidxa'ni loj stee benguijdx ni caniyaj Crist, räjpni: —¿La dilu guidxejb Dios? iNi cayajczalu tejsi castiigw! ⁴¹Per nuurnu cayajcnu castiigw ni riäj l gacnu te guidiixnu redojl ni biennu. Luxh laani xhet dojl di bejni.

⁴²Dxejc räjpni loj Jesús:
—Bazalajzlu narä che guidzujñlu lo xcälñibeelu.

⁴³Dxejc badzu' Jesús diidxre, räjpni lojni:
—Rniliápac lojlu, lagajc nadxej chunäjlu narä xhaguibaa.

Che gujt Jesús

(Mt. 27:45-56; Mr. 15:33-41; Jn.19 :28-30)

⁴⁴Agojl si'cti läidxej. Dxejc bicäjy guideb guedxliuj, si'c bianxcäjy si'cti rcachonti. ⁴⁵Bicäjy lo gubijdx, luxh ladró ni najl neñ yudxanro xten guidoro, biräjsni gucni tio'p la'.

⁴⁶Dxejcti guredxa' Jesús, räjpni:
—Xtadä, ladzñaalu rutedä xaimä. Che guniini si'c, gujttini.

⁴⁷Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni:

—Guliipacni, xhet dojldi bejn bejnre.

⁴⁸Guiraa rebejn ni suga' ro'c ni bahuii guiraa ni guzajc ro'c, gubi'reni rolizjzreni, cayääzreni lagajc lastooreni. ⁴⁹Luxh guiraa reni rumbee Jesús, näjza regunaa ni biädñajlñi che biriilini Galilee, zijtru bia'nreni cahuiireni guiraa recos ni cayajcre.

Che biga'tz Jesús

(Mt. 27:57-61; Mr. 15:42-47; Jn.19 :38-42)

⁵⁰Guyu' te bejn ni laa José, lacti huen najcni, luxh laaca rujñni guira'ti. Siädñi guedx Arimatea, región Judea. Nadxaagzani loj reni rnibee neñ guidoro xten rexpejn Israel. ⁵¹Cabäjzza José jiädñ yälñibeel xten Dios, ni'cni dini nidxaglajz nani bejn resa'ni. ⁵²Dxejcti huijni lo Pila't, gunabni

teijxh Jesús. ⁵³Che gulätñini lo crujz, batejbnini neñ te bariaad, dxejcti bacua'tznini neñ te baa ni guc-chee cuä' te guilaj. Nacoob baaga, nicla tej bejn gajd guiga'tz ro'c. ⁵⁴Dxejga najc dxej ni rusucheereni guira'ti, luxh agojl jiu' dxej ni rusilajzreni.

⁵⁵Regunaa ni guzanäj Jesús che biriilini Galilee huihuiireni robaaga te bahuiireni xho gudixhreni togoolga neñ baa. ⁵⁶Che gubi'reni rolizjzreni bencheereni recuaan ni rlianexhduxh näj te ni najc si'c te saj ni rlianexhduxh ni ruzaarení retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

Che gubansac Jesús lo rebengut

(Mt. 28:1-10; Mr. 16:1-8; Jn.20 :1-10)

24 Dxej ni gusloj xmaanga, rsildooru huinä regunaaga robaa recuaan ni rlianejxh ni bencheereni. ²Che bidzujñreni, bahuiireni agubicaj guij ni rusäu ro' baa. ³Dxejc che biu'reni neñ baaga, direni nidxäl tiejxh Jesús. ⁴Lañ ni cadxelojreni, di jien xhi gunreni, biricaj tio'p dade' gusuj cuä'reni. Rdimbichaduxh xhajbreni. ⁵Bidxebduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädñiiltu te bejn ni nabajñ lo rebengut, ä? ⁶Rutini ree. Agubansacni. Colgusnaj lajztu rediidx ni guniini cheni guyusijcni Galilee, ⁷che najni lojtu: “Riäjñ jiajb Xi'n Dios ni gujc Niguui ladzña rebendojñ, xcajzani lo crujz, dxej ni riojñ dxejga sibansacni loj rebengut.”

⁸Dxejc banaj lajz regunaa xtidx Jesús, ⁹biriireni robaa, gubitireni te bijreni diidx lo retzubiteeb rexejnpacni najza loj rebejn ni yunäjreni. ¹⁰Reni huisa'n diidx loj rexejnpac Jesús najc redee: Marii Magdalen, najza Xuan, najza Marii nnan Jacob, najza sgaii gunaa. ¹¹Niluxh rexejnpacni bejn xhigab didxnayäälni, direni nililajz xtidx regunaaga.

¹²Dxejc huisu Pedr, ruxunlini huijni ro' baa. Che gudixhlojni, bahuiini nen baaga, ganaxtis bariaad dzuub te laad. Dxejc gubi'ni rolizni, rdxelojtisni xcuent ni gujc.

Ni guzajc lo nezyuj ni sii guedx Emaús

(Mr. 16:12-13)

¹³Lagajc dxejga, tio'p rexejnpacni sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén. ¹⁴La_l ni sasajreni lo nezyujga, cayujyreni diidx xcuent reni gujc ro'c. ¹⁵La_l ni caniireni gubig Jesús lojreni, gusloj sasanäjnireni. ¹⁶Luxh mase cahuiireni lojni, yu' xhi badxojn niembeerreni. ¹⁷Dxejc gunabdiidx Jesús lojreni, räjpni:

—¿Xhini'c ruyjtu la_l ni sasajtu, ä? ¿Xhicuent cayac-huin lajztu?

¹⁸Tejreni ni laa Cleofas badzu' diidxre, räjpni:

—Guiraasi bejn najn xhi gujc nen guedx Jerusalén. ¿La lujtis bia'nlu nen guejdxga ni di gan xhi gujc ro'c, ä?

¹⁹Dxejcti räjp Jesús lojreni:

—¿Xhini'c gujc ro'c?

Dxejc räjpreni lojni:

—Recos xcuent Jesús ni siääd guedx Nazare't, ni gujc te niguii

ni gunii xtidx Dios, räjpni yäl̄rnibeduxh xten Dios loj redzuun ni rujnni najza loj rediidx ni rniini, nez loj Dios najza nez loj rebejn.

²⁰Najza xho bejn reni rnibee loj rebixhojz najza rexcuxhtisnu, bateedrenini ladzṅaa reni gunibee guetni, dxejc bacuaarenini lo cruju.

²¹Niluxh nuurnu cabääznu laani gacni nani nusṅaa rexejn Israel ladzṅaa rebenzajt. Naj agujc choṅ dxej ni gujc recosre. ²²Luxh yu' gaii gunaa ni nadxaag loonu ni baschelojreni nuurnu. Barsil, che huijreni robaa xtenti, ²³direni nidxäl tiejxhni. Biäds'a'nreni diidx loonu najreni bahuiireni lo tio'p xangl Dios ni räjp lojreni, agubansac Jesús lo rebengut.

²⁴Dxejcti huihuii gaii sa'nu robaa, bahuiizareni najcni si'ctis ni naj regunaaga loonu, niluxh direni nuhuii loj Jesús.

²⁵Dxejc räjp Jesús lojreni:

—iLacti nayääl tre' xcäriejntu! Lacti nen rililajztu xtidx redade' ni gunii xtidx Dios xcuent Crist.

²⁶¿La di nungäj_l tedxgaa Crist retrabajwduxhre dxejcti jiu'ni lo xcäl̄rdimbicha' Dios, ä?

²⁷Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäjni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

²⁸Che bidzujnreni guejdx cadro sääreni, bejn Jesús si'cni chanuuni chääni lo nezyuj. ²⁹Dxejc laareni bascuääzrenini te jiannäjnireni, räjpreni lojni:

—Biannäj nuurnu, sa'csi acayajc gudxej, agojl jiu' guxhijn.

Dxejcti biu' Jesús te jiannäjnireni.

³⁰Cheni sobganäjnireni lo mex, cua'ni yätxtiil, benle'nini, dxejc gula'nini, gudisnini lojreni.

³¹Lagajc dxejc, baxhal Dios balojreni, biembeereni Jesús, dxejc laani gunitlojni lojreni. ³²Dxejcti räjpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

³³Dxejc dirureni nibäjz ro'c, alga gunasgajcreni nez, gubi'reni guedx Jerusalén. Ro'c bidxälreni abidojɔp xpejnɔpac Jesús näjza sgaii bejn. ³⁴Dxejcti bijreni diidx loj guiro'preni bidzujɔn, räjpreni:

—Guliipac gubansac Jesucrist, luxh baluilojni loj Simón.

³⁵Dxejc guiro'p reni bidzujɔn bijzarenen diidx ni gusajcreni lo nezyuj, näj xho biembeezarenen Jesús che gula'ni yätxtiil.

Baluiloj Jesús loj rexpejnɔpacni

(Mt. 28:16-20; Mr. 16:14-18; Jn.20 :19-23)

³⁶Canisi'creni rediidxre chela baluiloj lagajc Jesús galäiireni, guniini xchan lojreni, räjpreni:

—iColɔcuedxɔ lajztu!

³⁷Per laareni rdxelojreni bidxejbreni, naareni cahuiireni lo te sprit. ³⁸Dxejc räjɔp Jesús lojreni:

—¿Xhicuent cadxejbtu? ¿Xhicuent rac tio'p lastootu? ³⁹iColɔhuii reñaä, näjza reni'ä! Lagajc naräni. Colɔcajn narä te fiipactu laa naräni, sa'csi anajntu di te sprit ga'p bäälniclaza tzujt si'c rapä narä.

⁴⁰Che guniini rediidxga, baluigajcni reñaani näjza reni'ni. ⁴¹Laɔl ni cadxelojreni, di gacdi chalilajzreni, sa'csi cabaduxh lajzreni, räjpreni lojreni:

—¿La yu' xhi rajptu gauä ree, ä?

⁴²Dxejc badeedreni te la' bälbigue', näjza te la' seer ni yu' tzujɔn. ⁴³Ni'c cua'ni gudajwnini nez lojreni. ⁴⁴Dxejc räjpreni lojreni:

—Dee najc xtidxä ni rniä lojtu cheni yusicä lojtu, rniä riäjɔl soob guiraa rediidx xcuentä ni caj lo xleii Moisés, näjza lo rexquijtz redade' ni gunii xtidx Dios näjza ni caj lo rexquitz Salmos.

⁴⁵Dxejcti basanijni xcäriejnreni te gucbeereni xhi säloj rediidx ni caj lo rexquijtz Dios xcuentni. ⁴⁶Dxejc räjpreni lojreni:

—Scree caj lo reguijtz: Nanab guet Crist, dxejc ni riojɔn dxej, guibansacni loj rebengut.

⁴⁷Sire'chza diidx xcuent xho ruslaa Crist rebejn nen dojl che rusiejchreni lajzreni, che rililajzreni xtiidxni. Guedx Jerusalén guislojni, dxejc sire'ch diidx guideb guedxliuj.

⁴⁸La'tu najctu testiigw guiraa recosre. ⁴⁹Narä suxhalä Sprit Dxan xten Dios lojtu, ni'c colɔja'n guedx Jerusalén cheni jiädläjzlini nen lastootu, guniidxni yälɔnribee ni siäd xhaguibaali.

Huäjz Jesús xhaguibaa

(Mr. 16:19-20)

⁵⁰Dxejc huinä Jesúsreni stelaad guedx Jerusalén gajxh lo te guejdx ni laa Betania. Ro'c guläsni naani, benle'ni yejcreni. ⁵¹Laɔl ni cayujɔnni si'c, gubicajni lojreni, huäjzni xhaguibaa. ⁵²Peta laareni gulujɔx gojnrenini, dxejc cabalazduxhreni gubi'reni guedx Jerusalén. ⁵³Ro'c guixe-guixee guyu'reni nen guidoro, calä'preni xpala'n Dios. Sugacni si'c.

Redidxhuen Xten Jesucrist Ni Bacuaa San Juan

Xtidx Dios najc te Niguui

1 Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios. ²Che gajd gac-cheeli guedxliuj, yunäjni Dios. ³Xcuent laani benchee Dios guedxliuj näjza guira'ti ni yu' lojni. Guiraa recos ni yu' di gacdi niu'reni paru rutini. ⁴Laani gojy yäl_lnabaj_n. Yäl_lnabaj_nga najc bianij xten rebej_n. ⁵Luxh bianijga rdimbicha' nez lo yäl_lcäy, niluxh yäl_lcäyga di niajcdi nusuiinini.

⁶Guyu' te niguii birilaj Juan, ni baxha_l Dios. ⁷Laani biädädni te basule'ni diidx. Biädsule'ni diidx xcuent bianij te nililajz guiraa rebej_n diidx xcuent bianij. ⁸Laani dini gac bianij, laani biädsule'ni diidx xcuent bianij. ⁹Laa bianijpacga ni rusanij lastoo guiraa rebej_n, luxh naj abiädädni lo guedxliujre.

¹⁰Nani najc Diidxga guyu' lo guedxliujre, xcuent laazani guc-chee guedxliujre, luxh di reben_n guedxliujre nililajz chu najni najcni. ¹¹Biädädni loj rexpen Israel, niluxh rexpej_nni direni

nicäjb niu'ni lojreni. ¹²Dxejc loj guiraa reni cuäjb guyu'ni lojreni, loj renani huililajz xtiidxni, loj reni'c badeedni yäl_lrnibee gacreni xi'n Dios. ¹³Laa reni'c ni di gac si'c xi'n be_n guedxliuj, ni gojl sa'csi rlajz te biniet chu xi'n_ni, dee najcpacreni Xi'n Dios sa'csi sudeedni yäl_lnabaj_n par tejpas lojreni.

¹⁴Diidxga gujc te be_n guedxliuj. Guläjzni lo guedxliujre, bahuilojzanu xcäl_lrdimbicha'ni, si'c yäl_lrdimbicha' xten xingan xteb xtadni, laani najcpacni nani sanälajz nuurnu, nani rnii didxlii loonu. ¹⁵Juan gunii xcuent Jesús. Guredxa'ni, räjpni: —Laa dee ni rniä, nani siädä detzä sajcruni loä, sa'csi laani ganidni nabaj_nni loä.

¹⁶Sa'csi guiraanu cua'nu xcäl_lnasacduxhni, yäl_lracnäj detz yäl_lracnäj. ¹⁷Leii xten Dios biädäni toMoisés, niluxh yäl_lracnäj näjza redidxlii biädäni Jesucrist. ¹⁸Rut chu tejdi abahuii lo Dios, xinxtebni ni yunäjpac Dios, laani basule'ni diidx xcuent Dios loonu.

**Juan ni rutiobnis gunii chuni'c najc
Jesucrist**

(Mt. 3:11-12; Mr. 1:7-8; Lc. 3:15-17)

¹⁹Dee najc diidx nani gunii Juan ni rutiobnis che baxhaḷ rexpejn Israel rebixhojz nájza rexpejn guidoo ni laa levitas, biriireni guedx Jerusalén te sanabdiidxreni lo Juan, rájpreni lojni:

—¿Luj chu najclu?

²⁰Dxejcti bicájpnj lojreni, xhet bacua'tzdini lojreni, rájpnj:

—Et narádi nacä Crist ni jáäd.

²¹Dxejcti gunabdiidxreni lojni, rájpreni:

—¿Chuxhni'c najclu? ¿La lujni najc Elías?

Rájpnj:

—Dina gacäni.

Rájpreni:

—¿La najclu te dade' ni gunii xtidx Dios ni cabääznu jáäd?

Dxejc rájpnj:

—Dina gacäni.

²²Rájpreni:

—¿Chuxhni'c najclu? Te chonänu diidx loj reni baxhaḷ nuure. ¿Xhi rniilu, chuxhni'c najclu?

²³Rájpn Juan:

—Narä nacä nani rbedxa' nez lo reyubijdz si'c ni gunii Isaías, ni gunii xtidx Dios scree: “Colyensa'c xnezyuj Dad.”

²⁴Rebejn ni baxhaḷ redee najc reni rniireni “farisee”. ²⁵Dxejc gunabdiidxreni stee, rájpreni lo Juan:

—¿Xhicuent rutiobnislu palga dilu gac Crist ni jáäd niclaza Elías niclaza stee niguii ni rni xtidx Dios ni cabääznu jáäd, ä?

²⁶Dxejcti rájpn Juan lojreni:

—Narä rutiobnisä con nis, niluxh galäiitu yu' tej nani ditu gumbee.

²⁷Laa dee ni siääd detzä niluxh di nungäjḷ nicla surloä cuää xcura'chni, sa'csi sajcruni loä.

²⁸Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

Jesús najc Xile' xten Dios

²⁹Che bara yääl, bahuii Juan siääd Jesús lojni. Dxejc rájpnj:

—iColhuii! Aree Xile' xten Dios nani rudzucay xtojḷ rebenḷ guedxliuj.

³⁰Lagajc xcuent dee ni rniä cheni guniä lojtu: “Detzä siääd te niguii ni sajcru loä, sa'csi ganidli narä agac nabajpni.” ³¹Luxh dina niembeäni, per biädtiobnisä con nis te guluiä lo rexpejn Israel chu najcni.

³²Guniiza Juan stee diidx xcuentni, rájpnj:

—Narä bahuiä biäjt Sprit Dxaan xten Dios xhaguibaa si'c te palom guzudxini yejcnj. ³³Dina niembeäni, per nani baxhaḷ narä gutiobnisä con nis, laani najni loä: “Cheni fiilu jäjst Sprit Dxaan xten Dios xhaguibaa si'c te palom, sudxini yejc te bejn, laanini najc ni gutiobnis con Sprit Dxaan xten Dios.” ³⁴Narä abahuiä lojni, ni'cni rniilä: “Dee ni najc Xi'n Dios.”

Reni gujc xpejn Jesús ganiddoo

³⁵Che bara stee yääl, sugasac Juan ro'c, suganäjni tio'p rexpejpnj.

³⁶Bahuiini lo Jesús che sasajni, dxejc gunii Juan, rájpnj:

—iColhuii! iLaa dee ni najc Xiil xten Dios!

³⁷Biejn diajg guiro'p rexpejn_{pac} Juan diidxga, dxejc sanajlreni Jesús. ³⁸Che gubiré Jesús bahuiini siädnajlreni, dxejc räjpni:

—¿Xhi caguuiltu?

Räjp rebejn_{ga}:

—Mastr, ¿caro rbäjzlu?

³⁹Badzu' Jesús diidxre, räjpni:

—Coltaa, te fiitu.

Dxejcti huijreni te bahuiireni caro rbäjzni ro'c. Biannäjrenini ro'c sa'csi agojl si'cti rcatajp gudxej.

⁴⁰Tej reni biejn diajgni xtidx Juan laa Andrés, bejtz Simón Pedr dxejc huinäjlni Jesús. ⁴¹Ganiddoo huitiilni bejtzni, dxejc räjpni lojni:

—Abidxälnu Mesías nani sälojza Crist ni cabääznu jiaäd.

⁴²Sas huinänini loj Jesús. Che bahuii Jesús lojni, räjpni:

—Luj najclu Simón xi'n Jonás; sirilajlu Cefas nani sälojza Pedr.

Gurejdx Jesús Felipe näjza Natanael

⁴³Bara yäälga rlajz Jesús chää nez Galilee. Dxejc bidxaagni Felipe, räjpni lojni:

—Gudanajl narä.

⁴⁴Felipe siääd guedx Betsaida, guedxro ni najcza lajdx Andrés näjza Pedr. ⁴⁵Felipe bidxaag Natanael räjpni lojni:

—Abidxälnu bejn nani bacuaa toMoisés xcuentni lo reguijtz xten leii agujc xchej, nani bazä'tza reniguii ni gunii xtidx Dios, Jesús xi'n José ni siääd Nazare't.

⁴⁶Räjp Natanael:

—¿La sajc guirii te bensa'c guedx Nazare't, ä?

Räjp Felipe lojni:

—Gudaa, te fiilu.

⁴⁷Che bahuii Jesús siääd Natanael nez lojni, räjpni:

—Colhuii te bejn Israelpac nani dipacni gusguee.

⁴⁸Räjp Natanael:

—¿Xho numbeelu narä?

Badzu' Jesús diidxre lojni räjpni:

—Che gajd Felipe cueedx luj, che suga'lilu ni' te yagiigw, bahuiä lojlu.

⁴⁹Badzu' Natanael diidxre, räjpni: —Mastr, luj najc Xi'n Dios, luj najc Reii xten rexpejn Israel.

⁵⁰Räjp Jesús lojni:

—Sa'csi rniä lojlu, “bahuiä suga'lu ni' yagiigw”, ¿ni'c rililajzlu, ä? Xhidajl cosroru suhuiilu.

⁵¹Dxejcti räjpzani:

—Rniliápac lojtu, suhuiitu guixal xhaguibaa, näjza rä'p riäjt rexangl Dios yejc Xi'n Dios ni gujc Niguii.

Te sa' ni guyu' guedx Caná xten Galilee

2 Che gudejd chon dxej, guyu' te sa' guedx Caná xten Galilee. Ro'c guyu' xnan Jesús.

²Huijza Jesús näjza rexpejn_{pac}ni, sa'csi bidonreni chääreni lo sa'ga.

³Gubijdz bin. Dxejc räjp xnan Jesús lojni:

—Dirureni ga'p bin.

⁴Dxejc badzu' Jesús diidxre räjpni:

—¿Xhicuent rniilu si'c loä, xnanä? Gajd xhorä guidzujn.

⁵Niluxh räjp xnanni loj remos ni tre' ro'c:

—Colyejn guira'ti si'ctis ni guiniini lojtu.

⁶Suga' xho'p guesguij nani rdxaj nis te rdiib naa rexpejn Israel te racnayareni te si'c guisa' xleii toMoisés. Nejn teja guesguijga ru'

si'cti te gayuu litr nis. ⁷Räjp Jesús loj remos:

—Colguchaj reguesguijre nis.

Dxejcti bachadoo rebejn̄gani.

⁸Dxejcti räjp Jesús lojreni:

—Colca' che'n̄ni n̄aj te colchanäni lo nani cahuii cayajc sa're.

Dxejc huinä remosga che'n bin lojni. ⁹Che gu' dade'ga che'n nis ni gubixhloj bin (luxh dini gan caro siäädni, remostis ni gulä'p nis, ni'ctis najn). Dxejcti gurejdx dade'ga bi'n. ¹⁰Dxejcti räjpni:

—Guiraa rebejn̄ rudeedreni binsa'c räxgaa rebejn̄, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre n̄ajli.

¹¹Seenre najc ganiddoo ni gusloj bejn Jesús; bejnnini nen guedx Caná xten Galilee. Seenga bazäbdiidx yäl̄rnibee xtenni luxh ni'cni huililajz rexpejn̄pacni xtiidxni.

¹²Che gudejd sa'ga, huijni guedx Capernaum con xnanni, rebejtni nájza rexpejn̄pacni. Ro'c bia'nreni tio'p-chon̄ dxej.

Basia Jesucrist guidoro

(Mt. 21:12-13; Mr. 11:15-18; Lc. 19:45-46)

¹³Sa'csi abidzungajxh lanij pascw xten rexpejn̄ Israel cheni rnalajzreni guxhijn̄ ni gudejd guixhajg xten yäl̄gujt nen̄ Egipto, ni'c sää Jesús guedx Jerusalén.

¹⁴Nen̄ guidoro bidxäl̄ni xhidajl bejn̄ nani ruto' gon, xiil, palom nájza reni sobga' caguchaa melzijt.

¹⁵Dxejc bejn̄ni te chico't con gaii duu, gulääni regon con rexiil nen̄ guidoo. Batie'chni xcoobr rebejn̄ nani ruchaa melzijt, barexh-xhätni

rexmexreni. ¹⁶Räjpzani loj reni caguto' repalom:

—Colcuää redee, na'c rujntu rolizj xtadä si'c te guii cadro rdo' guiraloj.

¹⁷Dxejcti banajlajz rexpejn̄pacni xhi caj lo reguijtz ni bacuaa redade' ni gunii xtidx Dios: “Gucnaj lazä xcuent ni runnäjreni rolizjzlu.”

¹⁸Dxejcti gunabdiidx reni najc xpejn̄ Israel lojni, räjpreni:

—¿Xhi seen guluiilu loonu n̄aj te fiinu arajplu yäl̄rnibee te abejnlu recosre?

¹⁹Badzu' Jesús diidxre räjpni:

—Colgutzujl guidoore, luxh narä nen̄ chontis dxej sunchesacäni.

²⁰Räjp rexpejn̄ Israel lojni:

—Tiubixho'p ijz guclaa ni guc-chee guidoore, ¿xhixh sajc gunchesacluni nen̄ chontis dxej, ä?

²¹Niluxh laani caniini xcuent guidoo ni najc lagajc tiejxhni.

²²Ni'cni cheni gubañsacni loj rebengut, banajlajz rexpejn̄pacni rediidxre ni guniini, dxejc huililajzreni nani caj lo rexquijtz Dios nájza rediidx ni gunii Jesús.

Numbee Jesús guiraa rebejn̄

²³Cheni guyu' Jesús guedx Jerusalén cadro cayajc lanij pascw, la_l ni cayajc lanijga, xhidajl rebejn̄ huililajz xtiidxni, bahuiizareni remilagwr ni bejn̄ni. ²⁴Luxh di Jesús nililajz xtidx rebejn̄ga, sa'csi arumbeeni xho najc rebejn̄. ²⁵Niluxh dini niquiin chu gäb lojni xho najc bejn̄, sa'csi lagajc laani anancheeni xho najc lastoo teja bejn̄.

Jesús con Nicodem̄

3 Guyu' te niguii lo rexpejn̄ refarisee ni laa Nicodem̄,

najcni te beŋroru loj reni rnibee
 rexepejn Israel. ²Te guxhijn
 biädxhiga'tzni nez loj Jesús, räjpni
 lojni:

—Mastr, nadonnu lo Dios siäädlu
 si'c te ni ruluii, sa'csi rut rajcni rujn
 sa' remilagwr nani rujnlu palga di
 Dios sunäjni.

³Dxejcti räjp Jesús lojni:

—Rniliápac lojlu, nani di gaal
 stehuält, di gacdi fiini xcälrnibee
 Dios xhaguibaa.

⁴Dxejcti räjp Nicodem lojni:

—¿Xho gac gaal te bejn stehuält
 niluxh anajcni bengool? ¿Xhixh
 sajc chusacni xque' xnanni stehuält
 te galsacni, ä?

⁵Badzu' Jesús diidre räjpni:

—Rniliápac lojlu, nani di gaal
 con nis, näjza con Sprit Dxan xten
 Dios, di gacdi jiu'ni lo xcälrnibee
 Dios xhaguibaa. ⁶Nani rajl xi'n
 bejn guedxliujre, ni'c najctisni
 bejn guedxliuj, luxh nani rajl
 por Sprit Dxan xten Dios, Spritza
 najcni. ⁷Na'c rdxelojlu sa'csi rniä:
 “Nanabpac gaallu stehuält.” ⁸Rbi'
 bej cadrotis rlajzni; riejn diajglu
 rubejni niluxh dilu gan caro siäädni,
 dizalu gan caro sääni. Si'cza
 rebejn guedxliuj direni gan xho
 rajl rexepejn Dios stehuält con Sprit
 Dxan xten Dios.

⁹Badzu' Nicodem diidre, räjpni:

—¿Xho mood sajc gac recosre?

¹⁰Räjp Jesús lojni:

—¿La najclu te mastr xten rexepejn
 Israel luxh dilu gan recosre, ä?

¹¹Rniliápac lojlu, aguniinu xcuent
 recos ni nadonnu, abasule'nu
 recos ni abahuiloonu, niluxh la'tu
 ditu nililajz xtiidxnu. ¹²Palga ditu
 chalilajz xtiidxnu che guniinu

xcuent recos guedxliuj nani rniinu:
 ¿Xho chalilajztu xtiidxnu palga
 guiniinu xcuent recos xhaguibaa?

¹³Rut chutejdi ahuá'p xhaguibaa,
 xtebtis nani biäj't xhaguibaa, lagajc
 Xi'n Dios ni gujc Niguii. ¹⁴Lagajc si'cni
 gulásjiaa toMoisés bäl guuib lo yajg
 nen reyubijdz, sigajcza nanab chäs Xi'n
 Dios ni gujc Niguii jiaa; ¹⁵te guiraa
 renani chalilajz xtiidxni direni nit lo
 Dios, sica'reni yäl'nabajn par tejpas.

Xho huinälajz Dios reben guedxliuj

¹⁶Sa'csi huinälazduxh Dios rebejn
 guedxliuj, ni'cni badeedni biääd
 Xinxtebni lo guedxliuj, te guiraa
 renani chalilajz xtiidxni direni nit
 lo Dios, sa'csi sajpreni yäl'nabajn
 par tejpas. ¹⁷Sa'csi di Dios nuxhal
 xi'n'ni te gusnijtni rebejn guedxliuj,
 alga baxhálnini te laa rebejn nen
 xtojlréni xcuentni.

¹⁸Nani chalilajz xtiidxni näjza
 chalilajz najcni chu najni najcni dini
 nit, luxh nani di chalilajz xtiidxni
 agunijtni sa'csi dini nililajz xtidx
 Xinxteb Dios. ¹⁹Ni'cni dee najc
 yäl'nij'tga: abiääd bianijga loj guedxliuj,
 biädna Xi'n Diosni, niluxh rebejn
 guedxliuj bidxaglajzrueni yäl'nacäyj
 cadro tre'reni, gulälazreni bianijga
 sa'csi xhet laadi najc xtzunreni.
²⁰Guiraa reni rujn dzunguijdx, rbälaz
 bianijga, dizareni guibig loj bianijga,
 didi guluiloj bianijga rextzunguijdxreni.
²¹Luxh reni rusoo didxlii, rbigreni
 loj bianijga, te bianijga ruluiloj najc
 rextzunreni redzunsac'c xten Dios.

**Rnisac Juan ni rutiobnis
 xcuent Jesús**

²²Dxejcti biääd Jesús näjza
 rexepejn'pacni nez lo reuyj xten

Judea. Ro'c geyunäjnireni, batiobnisza rexpejn̄pacni rebejn̄. ²³Juan ni Rutiobnis cagutiobniszani bejn̄ te lajt ni laa Enón ni tre' gajxh Salim, sa'csi ro'c yu' sijn̄ nis. Ro'c sää rebejn̄ lojni te cagutiobnisnireni. ²⁴Dxejc gajdreni gusäu Juan nen̄ latzguuib.

²⁵Dxejcti gusloj rexpejn̄ Juan cayujy diidx con gaii xpejn̄ Israel xcuent yälr̄diib naareni ni najc xcostumbr rexpejn̄ Israel. ²⁶Dxejc biäädreni lo Juan, räjpreni:

—Mastr, dade' nani geyunäjlu stelaad gueue Jordán, nani basule'lu xcuentni, adade'ga cagutiobnis, luxh guiraa rebejn̄ asää lojni.

²⁷Dxejc badzu' Juan diidxre, räjpni lojreni:

—Nicla tej bejn̄ digacdi ga'p te xhi cos palga di Dios gudeedni lojni.

²⁸Lagajc la'tu nancheetu guniliä: “Dina gacä Crist ni cabäjztu jiääd.” Guniäza: “Narä nacä nani biädnijd lojni.” ²⁹Che rajc sa', nani sobganäj dxa'p, ni'c najc bi'n ni gac chääl̄ni, luxh xamigw bi'n nani suga' ro'c, riejn̄ diajgni rniini, rbalazduxhni sa'csi riejn̄ diajgni xse' bi'n. Sigajcza abibaduxh lazä xcuentni. ³⁰Nanab gacni laani ben̄roru, bensajcru, biädla narä riäj̄l gacä ben̄huinru, ni guxiiru sajc lojni.

Nani siääd Xhaguibaa

³¹Nani siääd jiaali, ni'c rnibee guiralii, niluxh nani najc ben̄ guedxliuj ni'c rnii xcuent recos guedxliuj. Nani siääd xhaguibaa ni'c rnibee guiralii. ³²Nani bahuiini, nani biejn̄ diajgni, ni'c rusule'ni niluxh guxii rililajzreni xtiidxni. ³³Nani rililajz diidx ni rusule'ni,

bejn̄ga ruluiloj guliipac najc xtidx Dios. ³⁴Nani baxhaḷ Dios, ni'c rnii xtidx Dios sa'csi che rudeed Dios Sprit xtenni, dini gudeed guxiini. ³⁵Dad Dios sanälajzni xingaanni, abadeedzani guiraliiti chu ladznaani. ³⁶Nani rililajz xtidx xingaanni arajp yäl̄nabajn̄ par tejpas, luxh ni di chalilajz xtidx xi'nni, dini fii yäl̄nabajn̄, siääd xcälr̄dx'e'ch Dios yejcn̄i, sujn̄ Dios castiigwni.

Rdxaag Jesús te gunaa Samaria

4 Che gucbee Jesús abiejn̄ diajg refarisee xhidajlru bejn̄ sanajl Jesús luxh guxiiru sanajlreni Juan, luxh cagutiobnisreni, ²(niluxh xhet Jesúsdi cagutiobnis. Rexpejn̄ni ni catiobnis), dxejc ³biriini Judea gubisacni nez Galilee.

⁴Laḷ ni sasajni, nanab tedni nez Samaria. ⁵Ni'c bidzuj̄ni te guedxro xten Samaria ni laa Sicar, gajxh nejk loj te la' yuj ni badeed toJacoob lo xi'nni toJosé. ⁶Ro'c sojk te bisie ni rniireni “xpisie Jacoob”. Sa'csi abadxajg Jesús siädsajni, gurejni ro bisiega. Agojl läidxej. ⁷Bidzuj̄n̄ te gunaa siädlä'pni nis, dxejc räjp Jesús lojni:

—Baniidx che'n nis yä'ä.

⁸Sa'csi rexpejn̄pacni asääreni guejdxga sasiireni xhi gaureni.

⁹Räjp̄ti guna samaritanga lo Jesús: —¿Xho mood rniablu nis loä, luj ni najc te ben̄ Israel luxh narä nacä gunaa samaritang?

(Sa'csi di rexpejn̄ Israel chanä sa'reni rebejn̄ Samaria.) ¹⁰Räjp̄ Jesús lojni:

—Paru najnlu xhini'c najc yälr̄ulaslajz xten Dios, paru

numbeelu chuni'c canab nis lojlu, luj siniablu lojni te laani guniidxni nisnabajn lojlu.

¹¹Räjpti gunaaga lojni:

—Dad, xhet ca'dilu te guiliä'plu nis, luxh bisiere najc jätduxh.

¿Caxh chaca'lu nisnabajnga, ä?

¹²¿La benrorulu lo toxtadgoldoonu Jacob ni basa'n bisiere cadro huä'p nis gu'ni, gu'za rexi'nni, näjza rexquidxaani, ä?

¹³Badzu' Jesús diidxre lojni, räjpni:

—Guiraa reni rä' nis bisiere, siojlreni stehuält. ¹⁴Luxh nani yä nis nani gudedä, diruni jiojl, sa'csi nis nani gudedä nen lastooni sajcnisi'c te bisie nani rdatis nisni te gudeedni yäl'nabajn par tejpas.

¹⁵Dxejcti räjp gunaaga lojni:

—Dad, baniidx nisga yä'ä, te na'cru jiolä, te na'cruza guibi'ä jäädlä'pä nis ree.

¹⁶Räjp Jesús:

—Huij, huitejdx chäálu gudanäni ree.

¹⁷Räjp gunaa loj Jesús:

—Ruti chälä.

Räjp Jesús lojni:

—Laaca guniilu, ¹⁸sa'csi aguyu' gaiili chäällu. Luxh nani rbäznäjlu naj dini gac chäällu; guliica najlu.

¹⁹Che biejn diajg gunaaga si'c, räjpni:

—Dad, rchaloä najclu te niguii ni rnii xtidx Dios. ²⁰Retoxtagdoonu gojnreni Dios lo dajnre, luxh la'tu rniitu guedx Jerusalén najc cadro nanab ganni Dios.

²¹Räjp Jesús lojni:

—Gunaa, huililajz xtidxä, sidzujn or cheni nicla lo dajnre, niclaza guedx Jerusalén ditu chagajn Dad

Dios. ²²La'tu rajntu Dios nani ditu gumbee, nuunu rajnnu Dios nani rumbeenu; sa'csi yälrusläa bejn lo dojl siäd xcuente rexpejn Israel. ²³Niluxh sidzujn or, luxh alabidzujni, che reni guliipac rajn Dad, reni'c nen lastooreni, lo xcäriejnreni sajnreni Dios. Sa'csi sa' bejnre rguiil Dad Dios te ganrenini. ²⁴Dios najc te Sprit. Reni rajn Dios nanab ganrenini nen lastooreni, lo xcäriejnreni, guideb xtijpreni sa'csi rumbeerenini.

²⁵Räjp gunaa lojni:

—Ananä siäd Mesías ni laaza Crist. Cheni jäädni, laani susule'ni gurialiiti loonu.

²⁶Räjp Jesús lojni:

—Narä ni caniä lojlu, nacä laani.

²⁷Dxejc bidzujn rexpejnpacni, bidxelorenini sa'csi gunii Jesús lo gunaaga, niluxh rut gunabdiidxdixhi rlanjni, niclaza rut gunabdiidxdixhini'c caninäjni gunaaga. ²⁸Dxejcti basa'n gunaaga xtie'ni, sä'tini guedxroga. Dxejcti räjpni loj rebejn:

²⁹—Coltaa, fiitu te niguii ni gunii loä guira'ti nani abenä. ¿La et laadi dee Crist ni cabääznu jääd, ä?

³⁰Dxejc birii rebejnguejdxga, bidzujntireni lojni. ³¹Reni najc rexpejnpacni canabduxhreni gau Jesús, räjpreni:

—Mastr, gudajw.

³²Laani räjpni:

—Narä rapä xhi gauä nani ditu gumbee.

³³Dxejcti räjp rexpejnpacni lo sa'reni: —¿Xhaa yu' chu abiädnä xhi gudajwni, ä?

³⁴Räjp Jesús:

—Yälrajw xtenä najc gunä si'cni rlanj nani baxha narä, näj guluxä

xtzuunni. ³⁵La'tu rniitu riäädx tajp bäi te guire' cose'ch. Narä rniä colguiliäs lojtu, colfisa'c loniaa, abiquijtze regäj, agoj, guire' cose'ch.

³⁶Nani rujn dzuun rutie' cose'ch rca'ni xcuentni, luxh ni caca'ni najc par yalnabajn par tejpas, te tejsi guibalaznäj nani gule'c binij näj nani batie' cose'ch. ³⁷Sa'csi gulii najc diidx nani rni bejn, rniireni: “Tejni rbe'c binij, ste'cani rutie'ni.”

³⁸Narä abaxhajä la'tu gutie'tu cose'ch nani ditu nibe'c; ste'ca najc nani bejn dzuun gule'cni binij, dxejc la'tu jiu'tu gutie'tu cose'ch loj xtzuunni.

³⁹Xhidajl reben Samaria huililajz xtidx Jesús xcuent rediidx ni räjp gunaaga lojreni che räjpni: “Guniini loä guiralii nani abenä.” ⁴⁰Ni'cni, che biääd reben guedx Samaria lojni gunabreni loj Jesús jia'nni lajdxreni. Dxejc bia'nni ro'c tio'p dxej. ⁴¹Dxejc xhidajlrureni huililajz xtiidxni ni guniini lojpacreni.

⁴²Dxejcti räjpreni loj gunaaga:

—Dirunu chalilajz ganaxtis xcuent diidx ni guniilu loonu, sa'csi lagajc nuure abiejn diajgnu xtiidxni, ni'c nancheenu dee najcpac ni rusläa rebejn guedxliuj loj dojl. Laani najc Crist ni cabäaznu jiääd.

Basiajc Jesús xi'n te bejn ni rujn xtzuum gubier

⁴³Che gudejd tio'p dxej, biriini guedx Samaria, huinuuni xnezyujni nez Galilee. ⁴⁴Sa'csi lagajc Jesús gunii, räjpni: Te bejn nani rni xtidx Dios di reben lajdxpacni chanälajz xtiidxni. ⁴⁵Che bidzujnni rexyuj Galilee, reben Galilee huichaglojrenini sa'csi näj laareni

huijreni lanij pascw guedx Jerusalén, ro'c bahuiireni guiraa redzuun nani bejn.

⁴⁶Gubisacni, bidzujnni guedx Caná xten Galilee cadro bejn bidxaa nis gujcti bin. Dxejcti guyu' te dade' nani rujn xtzuum rei. Guedx Capernaum naga' te xi'nni cayacxhuu. ⁴⁷Che biejn diajg dade'ga abirii Jesús Judea, abidzujnni nez Galilee, huijni lo Jesús, gunabduxhni lojni chääni te gusajcni xi'nni nani naga' cuentro, ameerli guetni. ⁴⁸Dxejcti räjp Jesús lojni:

—Paru ditu fii reseem, remilagwr, ditu chalilajz chuni'c nacä narä.

⁴⁹Dade' ni rujn xtzuum rei, gunii lojni, räjpni:

—Do'o Dad, te di guet xi'nä.

⁵⁰Räjp Jesús lojni:

—Huij. Di xi'nlu guet.

Huililajz dade'ga, sä'tini. ⁵¹Che gubi'ni rolijzni, birii rexmosni, huichaglojni, badeedreni diidx nabajn xi'nni.

⁵²Dxejcti gunabdiidxni:

—¿Corti gusloj cayajcni?

Räjpreni lojni:

—Naii si'cti rcatej gudxej biriini xliaa.

⁵³Dxejcti gucbee dade'ga lagajc orga ni räjp Jesús lojni: “Di xi'nlu guet.” Dxejc dade'ga näjza guiraa rebejn ni yu' rolijzni huililajzreni Jesús najc ni cabäjzreni jiääd.

⁵⁴Dee barojp seen ni bejn Jesús cheni biriini Judea, biu'ni Galilee.

Bejn Betesda nani naxu'n

5 Che gujcti recosre, guyu' te lanij xten rexpejn Israel, dxejc huij Jesús guedx Jerusalén.

²Guedx Jerusalén, gajxh ro' puert ni laa xten rexiil, yu' te guipilro nis; xtidx hebreo laani Betesda. Cuä' guipilroga caj gaii cordoor. ³Ro'c naga' xhidajl bejn racxhuu, yu' bejn ni di fii, beñcoj, näj bejn nani bixu'n tiejxhni. Cabäjzreni guiniib nisga ⁴sa'csi gucti-guc riääd te xangl Dios rusniib nisga. Dxejc bejn nani gun gaan chachu' lo nis ganiddoo che guiniibni, riajcni lo xhitis yälgujidx ni rajcni. ⁵Ro'c guyu' te beñ racxhuu nani agujc galbitzubixhujñ ijz cayacxhuuni. ⁶Cheni bahuii Jesús naga'ni, badeedzani cuent lacti xchero raxchuuni, räjpni lojni:

—¿La rlaizlu jiajclu?

⁷—Dad —räjp beñ racxhuuga lojni—, dina gapä chu gusal narä neñ nis cheni rniib nisre. Cheni rlaizä chachu'ä lo nis, stee bejn rujn gaan narä, ganidni richu'ni lo nisga.

⁸Räjp Jesús lojni:

—Huistie, guläs xta'lu, guzaj, huij.

⁹Lagajc dxejc biajc bejnga, guläsni xta'ni, gusloj gusajni. Niluxh dxejga najc dxej nani rusilajz rexpejn Israel, ¹⁰ni'c räjp rexpejn Israel lo bejn ni biajcgä:

—Nadxej najc dxej ni rusilajz bejn. Di gacdi guulu xta'lu.

¹¹Laani räjpni:

—Nani basiajc narä, laani naj loä: “Guläs xta'lu, gusaj.”

¹²Dxejc gunabdiidxreni lojni:

—¿Chuni'c naj lojlu “Guläs xta'lu, gusaj”?

¹³Dxejcti beñ racxhuu ni biajcgä dini gaan, sa'csi gunitloj Jesús, biriini ro'c lañ ni tre' xhidajl bejn lajtgä. ¹⁴Che bidxaagni Jesús stehuält neñ guidoro, räjp Jesús lojni:

—Ahuii, ñaj ni abiajclu, na'c gunlu dojl stehuält, didi sajclu xhi stee ni najc cuentroru.

¹⁵Sä'ti bejnga, huiye'tzni

loj rexpejn Israel laa Jesús ni basiajcní. ¹⁶Ni'cni gusloj rexpejn Israel carinajlreni Jesús, rlaizreni guiga'ni te ju'trenini, sa'csi rujnni redzuunga dxej ni rusilajzreni.

¹⁷Luxh räjp Jesús lojreni:

—Xtadä Dios ñajli cayujnni dzuun, ni'cni näjza narä cayunä dzuun.

¹⁸Ni'cni rlaizru rexpejn Israel ju'tni, xhet ganaxdi sa'csi rujnni dzuun dxej ni rusilajzreni, per näjza sa'csi räjpni Dios najc Xtadni, rniizani tebloj najcni con Dios.

Yälrnibee xten Xi'n Dios

¹⁹Badzu' Jesús diidxre räjpni lojreni:

—Rniliä, rniliápac lojtu. Di gacdi gun Xi'n Dios dzuun xtebni, palga dini fixgaa rujn Xtadni dzuunga, sa'csi guira'tis dzuun ni rujn Xtadni, dzuunga rujnza Xi'nni sigajc rujn Xtadni. ²⁰Sa'csi rinälajz Dad xi'nni, ruluini lo xi'nni guiraa redzuun nani rujnni, luxh dzunroruza suluini lojni gunni, te guidxelojtu. ²¹Sigajc ni rliäs Dios rebengut, rudeedni yälñabajn lojreni, sigajcza sudeed xi'nni yälñabajn lo renani rlaiztisini. ²²Nicla Dad di gun yälguxhtis, alga badeedni guiralií yälguxhtis gun Xi'nni, ²³te guiraa bejn guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtadni ni baxhalñi biäädni.

²⁴Rniliä, rniliápac lojtu, nani rucudiajg xtidxä, ni chalilajzani

nani baxhaḷ narä, ni'c rajpni yäl_nabajḅ par tejpas; niluxh dini ted lo yäl_guxhtis, alga abiriini lo yäl_gujt, agudej_dni lo yäl_nabajḅ. ²⁵Rniliä, rniliä_pac, sidzujḅ or, luxh alabidzujḅni, cheni siejn diajg rebengut xse' Xi'n Dios, luxh reni riejn diajgni diid_xga sibansacreni lo rebengut. ²⁶Si'cni rajp Dad Dios yäl_nabajḅ lagajcsi laani, sigajcza badeedni lo Xi'n_ni ga'pni yäl_nabajḅ lagajcsi laazani. ²⁷Badeedzani lojni yäl_rnibee te gunni yäl_guxhtis, sa'csi najcni Xi'n Dios ni gujc Niguii. ²⁸Na'c rd_xelojtu rediid_xre, sa'csi sidzujḅ or cheni guiraa reni yu' neḅ baa siejn diajg_reni xse'ni ²⁹siriizareni neḅ baa. Reni bejn dzunsa'c siriireni te guibansacreni loj yäl_nabansa'c, niluxh reni bejn dzunguij_dx, siriireni te guibansacreni te tedreni lo xcäl_guxhtis Dios.

Nani ruluiloj yäl_rnibee ni rajp Jesús

³⁰Xhet rajc_di runä lagajcsi narä. Sigajc ni riejn dia_gä, sigajcza runä yäl_guxhtis. Luxh yäl_guxhtis ni runä laaca najcni sa'csi dina quilä gunä nani rlazätis, rguilätis gunä si'c ni r_lajz Dad nani baxhaḷ narä. ³¹Palga narätis rniä diid_x lagajc xcuentä, xhet saj_cd_i diid_xga. ³²Yu' stee nani rniliä diid_x xcuentä, luxh nancheä diid_x ni rniini xcuentä sacduxhni, guliipacni. ³³La'tu abaxhaḷ_tu chu huij loj Juan, huinabdiid_xreni lojni “chu najc bejḅga”, niluxh badzu'ni diid_x lojreni guniini diid_x guliipac xcuent chu nacä. ³⁴Narä dina jiuä diid_x nani rnii rebejḅ xcuentä luxh canisacä rediid_xre te laatu lo xtoj_ttu. ³⁵Juan gujc si'c te bajl

ni ralguij, basanijzani. Luxh la'tu huihuiituni bibalajztu lo xpianijni balsi dxej. ³⁶Luxh narä rapä xhi ruluilojru chu nacä lo diid_x ni gunii Juan; sa'csi lagajc dzuun nani baniid_x Xtadä gunä, lagajc redzuun ni runä, huenliisi ruluilojreni Xtadä Dios baxhaḷ narä. ³⁷Xtadä ni baxhaḷ narä lojtu agunilii chu nacä. Gajdpactu jiejn diajg xse'ni, gajdzatu fii lojni. ³⁸Dizatu ga'p xtiid_xni neḅ lastootu, sa'csi di lajztu chalii xtiid_x nani baxhaḷ narä. ³⁹La'tu roḷ_duxhtu reguijtz xten Dios sa'csi rchalotu si'c sidxäl_tu yäl_nabajḅ par tejpas, luxh lagajc reguijtzga rusule' chu narä. ⁴⁰Naadditu jiiä_dtu loä te ga'ptu yäl_nabajḅ par tejpas.

⁴¹Narä dina quilä chu bejḅ guiliä'p xpala'nä nez loä. ⁴²Luxh narä anumbeä_tu, ananä ditu chanälajz Dios neḅ lastootu. ⁴³Narä biälä xcuent Xtadä, luxh ditu gucuadiajg xtid_xä; paru jiiä_d chu stee bejḅ xcuentcni, ni'c sii sucuadiajg_tu xtiid_xni. ⁴⁴Xho gac chalilajz_tu, ni rliä'p_tu xpala'n lagajc sa'tu. Ditu quii_l xho gac guiliä'p Gueb Dios xpala'ntu. ⁴⁵Di naatu pet narä ni chale'cä xquejtu lo Xtadä. ToMoisés ni chale'c xquejtu, luxh rujntu xhigab lagajc xleini gacnäj la'tu. ⁴⁶Paru la'tu nililajz_pactu xtid_x toMoisés, dxejc niliiza lajztu xtid_xä sa'csi xcuentä bacuaa toMoisés lo reguijtz. ⁴⁷Palga ditu chalilajz nani bacuaani lo reguijtz, çxho chalilajz_tu rediid_x nani caniä lojtu, ä?

Bayaan Jesús gaii miḷ niguii

(Mt. 14:13-21; Mr. 6:30-44; Lc. 9:10-17)

6 Che gulu_jx gujc recosre, dxejc sää Jesús stelaad

nezro' nisdoo xten Galilee, nani rniizareni nisdoo xten Tiberias. ²Sanajl xhidajl bejn̄ni sa'csi rhuiireni remilagwr ni rujn̄ni lo reben̄racxhuu. ³Dxejcti huä'p Jesús yejc te dajn, ro'c gurenäjni rexpelj̄npacni. ⁴Niluxh ameer gac lanij pascw xten rexpelj̄n Israel, cheni rudeedreni xquixhtios lo Dios xcuent dxej ni biriireni Egipto. ⁵Cheni guläs Jesús lojni, bahuiini siääd xhidalduxh bejn̄, siäädreni nez lojni, dxejcti räjpni loj Felipe: —¿Caro guisiinu yätxtiil te gau rebejn̄re?

⁶Dxejc räjpzani si'c te don xhi xhigab gun Felipe, luxh laani anajn̄ni xho gunni. ⁷Räjp Felipe lojni: —Di tio'p gayuu beex yätxtiil gal te gauren̄i tlagaj.

⁸Tej rexpelj̄npacni ni laa Andrés, bejtz Simón Pedr, räjp lojni:

⁹—Ree suga' te biuux ca' gaii yätxtiil con tio'p bäjl, ÷xhixh sajl ni'c gau reben̄ xhidajlre?

¹⁰Dxejcti räjp Jesús:

—Colyejtz loj rebejn̄re cuereni.

Yuduxh guixa' ro'c. Dxejcti gurej reniguii. Si'cti gaii mīl najc reniguii.

¹¹Dxejcti cua' Jesús yätxtiilga, badeedni xquixhtios lo Dios, gudisni yätxtiilga lo rexpelj̄npacni. Dxejcti rexpelj̄npacni gudisrenini loj rebejn̄ nani sobga'. Sigajcza gudisreni rebäjl si'ctisni rlajzreni gauren̄i. ¹²Che gulujx gudajwreni, gudxaj xque'reni, dxejcti räjp Jesús loj rexpelj̄npacni:

—Colgutie' guiraa reyätxtilbiujy nani bia'n te xhet nitdi.

¹³Batie'tireni reyätxtilbiujy, guläsreni tzubitio'p dxijm̄

yätxtilbiujy nani bia'n lo gaii yätxtiilga nani gula' gudajwreni.

¹⁴Che bahuii rebejn̄ga reseem, remilagwr nani bejn̄ Jesús, dxejc räjpreni:

—Guluiipacni, laa dee ni najc niguii ni rnii xtidx Dios nani cabääznu jiääd lo guedxliuj.

¹⁵Sas che gucbee Jesús cayujnreni xhigab jiädnaazrenini te niujnreni gacni reii te guinibeeni lojreni, biriini ro'c, xtebni gubisacni nen̄ dajn.

Gusaj Jesús lo nisdoo

(Mt. 14:22-27; Mr. 6:45-52)

¹⁶Che gojl guxhij̄n, bidzuj̄n rexpelj̄npacni lo nisdoo. ¹⁷Biu'reni nen̄ te barcw te tedreni lo nisdoo nez guedx Capernaum. Abicäyj lo yuj niluxh gajd Jesús guibi' lojreni te chääni. ¹⁸Gusloj cayäjs nisdoo xcuent te beduxh nani cabi'. ¹⁹Ni'cni che gusajreni si'cti gaii o xho'p kilómetro, bahuiireni siäädzungajxh Jesús lo barcw, lo nisdoo siäadsajni. Bidxebduxhreni.

²⁰Luxh laani räjpni lojreni:

—Naräni. Na'c guidxeljbtu.

²¹Dxejrcu caüjbreni biu'ni nen̄ barcw. Dxejcti bidzungajcreni stelaad lo yuj cadro sääreni.

Caguiil rebejn̄ Jesús

²²Che bara yääl, rebejn̄ nani bia'n stelaad ro' nisdoo, bahuiireni asanä rexpelj̄npacni barcwbäz nani suga' ro'c, niluxh di Jesús nij, xtebsireni sääreni. ²³Luxh bidzungajc sgaii barcw nani birii guedx Tiberias, te lajt ni tre' gajx cadro gudajwreni yätxtiil che gulujx badeed Jesús xquixhtios lo Dad. ²⁴Che bahuii

rebejn ruti Jesús ro'c, ni claza
 rexepejni, biu'reni neñ rebarcw,
 sääreni guedx Capernaum satiilreni
 Jesús.

Jesús najc yätxtiil xten yälñabajn

²⁵Che bidxälreni Jesús stelaad ro'
 nisdoo, räjpreni lojni:

—Mastr, ¿guc bidzujñlu ree?

²⁶Badzu' Jesús diidxre, räjpni
 lojreni:

—Rniliá, rniliápac lojtu, caguiiltu
 narä sa'csi gudajwtu, gudxaj
 xque'tu, et sa'csi bahuiiditu
 remilagwr nani benä. ²⁷Na'c
 guntu dzuun ganax par yälrajw
 nani rnitloj. Cołyejn dzuun par
 yälrajw nani di nitloj, ni runiidx
 yälñabajn par tejpas. Yälrajwre
 suniidx Xi'n Niguii, sa'csi loj rebejn
 baluii Xtadni, Diospac, laani najc
 Xi'npacni.

²⁸Dxejcti räjpreni:

—¿Xhini'c jiennu te gac jienpacnu
 dzuun ni rłajz Dios?

²⁹Räjp Jesús lojreni:

—Dee najc ni rłajz Dios guntu:
 chalilajztu xtidx narä, nani
 baxhañni.

³⁰Räjpreni lojni:

—¿Xhi seen gunlu te guihuiinu
 xcälñrni beelu te cholilajznu xtiidxlu?
 ¿Xhi dzuun rujñlu? ³¹Retoxtdadnu
 gudajwreni yätxtiil ni laa mana
 loj reyubijdz si'cni caj loj reguijtz:
 “Badeedni yätxtiil ni biajb
 xhaguibaa gudajwreni.”

³²Räjpza Jesús:

—Rniliá, rniliápac lojtu, xhet
 toMoisésdi ni badeed yätxtiil ni
 biajb xhaguibaa. Xtadä ni suniidx
 yätxtiil nani siäädpac xhaguibaa.

³³Sa'csi yätxtiil xten Dios najc bejn

ni siääd xhaguibaa, niluxh laani
 rudeedni yälñabajn par tejpas loj
 reben guedxliuj.

³⁴Räjpreni:

—Dad, baniidx yätxtiilga loonu.

³⁵Dxejcti räjp Jesús lojreni:

—Narä nacä yätxtiil xten yälñabajn
 nani riäjł jiaäd; chutis ni jiaäd loä
 diruni guiliaan, niluxh chutis ni
 rililajz xtidxä diruni jiojł par tejpas.

³⁶Aguniä lojtu, la'tu ditu chalilajz,
 luxh abahuiitu loä. ³⁷Guiraa
 renani abaniidx Xtadä loä, siäädni
 loä, niluxh chutis ni jiaäd loä
 dina cuälazäni. ³⁸Sa'csi narä siälä
 xhaguibaali te gunä si'c ni rłajz
 Xtadä, xhet si'cdi ni rłazädi. ³⁹Dee
 najc ni rłajz Xtadä nani baxhañ narä:
 na'c nit ni claz tejpas renani
 baniidxni loä, te guspansacä
 guiragajczeni che gal dxej
 lult ni riäjł jiaäd. ⁴⁰Scree
 rłajz nani baxhañ narä: guiraa
 renani fii lo Xi'n Dios, näj
 chalilajzreni xtiidxni, xca'reni
 yälñabajn par tejpas niluxh
 narä suspansacäreni che gal
 dxej lult ni riäjł jiaäd.

⁴¹Rediidxre bejn gusloj casiejy
 rexepejn Israel xcuent Jesús sa'csi
 räjpni: “Narä nacä yätxtiil ni
 biäjł xhaguibaa.” ⁴²Dxejcti räjpreni:

—¿La et Jesúsdi, xi'n José dee, ä?
 Nuure numbeenu xtadni, xnanni,
 ¿xhoxh rniini xhaguibaa biäjłni?

⁴³Dxejc räjp Jesús lojreni:

—Na'c rusieinäj sa'tu. ⁴⁴Rut rajcdi
 riääd loä palga di Xtadä ni baxhañ
 narä jiaädni loä, te guspansacäni
 che gal dxej lult ni riäjł jiaäd. ⁴⁵Loj
 reguijtz ni bacuaa redade' ni gunii
 xtidx Dios caj scree: “Suluii Dios
 guiraareni.” Ni'cni guiraa reni
 rucuadijg xtidx Xtadä, reni rsieed
 lojni, reni'c ni jiaäd loä.

⁴⁶Dinä guiniä yu' chu abahuii lo Dios; tejtis ni abahuii lojni: nani baxhaļ Dios, ni'ctis abahuii lojni. ⁴⁷Rniliä lojtu che rniä: nani chalilajz xtidxä, ni'c rajp yälñabajñ par tejpas. ⁴⁸Narä nacä yätxtiil nani rudeed yälñabajñ. ⁴⁹Retoxtadtu gudajw mana ni bastejb Dios lo reyubijdz, dxejcti gujtzareni. ⁵⁰Dee najc yätxtiil ni siääd xhaguibaa, te chutis ni gau yätxtiilga dini guet. ⁵¹Narä nacä yätxtiilbajñ ni siääd xhaguibaa. Palga yu' chu gau yätxtiilre, sibajñni par tejpas. Yätxtiil nani runidxä narä te xca' reben guedxliuj yälñabajñ najc lagajc bältiexhä.

⁵²Dxejcti gosloj casiey rexpejn Israel räjpreni:

—¿Xho gac guniidx dee bältiejxhni guidaunu, ä?

⁵³Räjp Jesús:

—Rniliä, rniliäpac lojtu, palga ditu gau bältiejxh Xi'n Dios ni gujc Niguii, palga dizatu yä xtiejñni, digacdi ga'ptu yälñabajñ. ⁵⁴Nani gau bältiexhä, nani yäza xtienä, ni'c rajp yälñabajñ par tejpas, niluxh suspansacäni che gal redxej lult. ⁵⁵Sa'csi bältiexhä najc te yälrausa'cpac, xtienä najcza te yälräsa'cpac. ⁵⁶Nani gau bältiexhä, nani yäza xtienä, ni'c yu'pac con narä, luxh narä yu'äza con laani. ⁵⁷Xtadä ni baxhaļ narä rajp yälñabajñ par tejpas. Narä nabanä xcuent laani. Sigajcza nani rajw narä, sibajñzani xcuent narä. ⁵⁸Dee najc yätxtiil nani biääd xhaguibaali; dini gac si'c mana ni gudajw xtadtu dxejc empac gujtreni, sa'csi nani gau yätxtiilre sibajñni par tejpas.

⁵⁹Recosre baluii Jesús neñ te guidobäz laļ ni guyu'ni guedx Capernaum.

Diidx xten yälñabajñ par tejpas

⁶⁰Che biejn diajgreni si'c, xhidajl rexpejn pacni räjp:

—Naganduxh najc rextiidxni.

¿Chu laa nani gac cuadiajñi?

⁶¹Dxejcti gucbee Jesús cagusieyreni xcuent rediidxga, dxejc gunabdiidxni räjpni: —¿La rusieed rediidxre la'tu, ä? ⁶²¿Xhicha guntu paru fiitu chä'p Xi'n Dios ni gujc Niguii cadro guyu'ni galoo? ⁶³Sprit xten Dios najc ni rudeed yälñabajñ; bältiejxhni xhet rujndini gaan. Rediidx nani guniä lojtu najc didxlii xcuent recos xten Sprit, luxh rediidxga rudeed yälñabajñ par tejpas. ⁶⁴Luxh laļtis yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, guteedni laani ladzñaa reben dojl. ⁶⁵Dxejcti räjpni:

—Ni'cni rniä lojtu, nicla tej rut sajcdi jiääd loä palga di Xtadä jiädñani loä.

⁶⁶Lagajc dxejc gosloj cabicaj xhidajl rebejn ni agujc xchej gusanäj Jesús, dirureni nisianäj Jesús. ⁶⁷Dxejcti räjp Jesús loj guidzubitio'p rexpejn pacni:

—¿La nägajcza la'tu rļajztu jiitu, ä?

⁶⁸Badzu' Simón Pedr diidxre, räjpni:

—Dad, ¿chuloj chonnu? Luj rajplu diidx ni rudeed yälñabajñ par tejpas. ⁶⁹Nuure abiolilaaznu,

anajnnu najclu Crist Xi'n Dios nani nabajñ.

⁷⁰Badzu' Jesús diidxre, räjpni:
—¿La et lagajc narädi guleä
guitzubitio'ptu? Luxh tejtu najc
bendxab.

⁷¹Diidxga guniini xcuent Judas
Iscariote, xi'n Simón, sa'csi Judas
najc ni guto'ni mase nadxaagni lo
guitzubitio'p rexpejn̄pac Jesús.

Di rebejtz Jesús chalilajz

7 Che gujcti recosre, cansaj
Jesús nez reyuj xten Galilee,
di rlanjzi jia'n̄ni nez reguedx Judea
sa'csi rlanjz reben̄ ro'c ju'tni. ²Luxh
ameer gal̄ lanij xten cose'ch xten
guidoguijd, te relanij xten rexpejn̄
Israel. ³Ni'c räjp rebejtz Jesús lojni:
—Na'c jia'n̄lu ree. Huij Judea te
näjza rexpejn̄pacu fii redzunro nani
rujnlu. ⁴Sa'csi rut rujndi xtzunni
xhiga'tz palga rlanjzi gacbee bejn̄
xhi dzuun rujñni, te gumbec bejn̄ni.
Palga rujnpacu redzuunre, baluiini
lo guiraa reben̄ guedxliuj.

⁵Guniireni si'c lojni sa'csi nicla
rebejtzni di chalilajz xtiidxni.

⁶Dxejcti räjp Jesús lojreni:

—Gajd xhorä guidzujñ, niluxh par
la'tu xhitis or̄ najc hueen. ⁷Di gacdi
guidxe'ch reben̄ guedxliuj lojtu,
luxh rdxe'chreni loä sa'csi narä
rniliä xcuentreni: dzunguijdx najc
xtzuunreni. ⁸La'tu colchäj lanij;
narä dina cha'a lanijga sa'csi gajd
xhorä gal̄.

⁹Che gulujx guniini si'c lojreni
bia'ntini nez Galilee.

Huij Jesús lanij xten retabernaculos

¹⁰Dxejcti che asää rebejtzni lanij,
dxejc näjza laani sääni lanij, luxh

dini nusäbdiidx, si'c xhiga'tz sääni.

¹¹Dxejcti caguuil rexpejn̄ Israelni lo
lanijga, räjpreni:

—¿Concha niguiiga?

¹²Lo rebejn̄ xhidaalga yu' xhidajl
bejn̄ ni cagusiejyreni xcuentni.

Yu'reni räjp: “Hueen najcni”, per
sgaiireni räjp: “Dini gac hueen.

Cagusgueeni rebenguejdx.”

¹³Nicla tejreni xhet
casäbdiidxdireni xhini'c caniireni.
Direni guinii dip sa'csi rdxejbreni
rexpejn̄ Israel nani rnibee.

¹⁴Agurojl lanij, che biu' Jesús nen̄
guidoro. Dxejcti gusloj caguluiini.

¹⁵Dxejcti rdxeloj rexpejn̄ Israel nani
rnibee, räjpreni:

—¿Xho najn dee guiraloj, niluxh
dini nisieed xleii toMoisés?

¹⁶Badzu' Jesús diidxre, räjpni:

—Yäl̄ruluii nani caluiyä et
xtenädini, xten nani baxhal̄
naräni. ¹⁷Palga yu' chu rlanjz gun
nani rlanjz Dios, sacbeeni la xten
Dios najc reyäl̄ruluii xtenä, o la
lagajcsi narä rbää diidx ni caguluiä.

¹⁸Nani rusule'ni diidx nani lagajc
laani rbääni, ni'c rniini diidxga te
guiliä'p rebejn̄ xpala'n̄ni, luxh nani
rguiil chä'p xpala'n̄ nani baxhal̄ni,
ni'c ni rniidxlii, xheti yäl̄rusguee
nen̄ lastooni. ¹⁹¿La di toMoises
nuniidx leii lojtu, ä? Niluxh
nicla tejtü di gusoob xtidx leiiga.

¿Xhicuent rlanjztu ju'ttu narä, pes?

²⁰Badzu' reben̄ xhidajlga diidxre,
räjpreni:

—iXp̄rit bendxab yu' lastoolu!
¿Chuni'c rlanjz ju'tlu?

²¹Badzu' Jesús diidxre lojreni,
räjpni:

—Tejtis dzuun benä con xcäl̄rnibeä,
dxejc guiraatu cadxelojtu sa'csi

benäni dxej ni rusilajztu. ²²Ni'cni baniidx toMoisés lojtu yälru'tu bee, luxh etlaadini guläxtejnini, agac guläxtej retoxtadgoldootuni. La'tu rusäl'tu bee rebiiux mase najcni dxej nani rusilajztu. ²³Mbaj pes, palga rajc rusäl'tu bee bejn te dxej nani rusilajztu didi nit xleii Moisés, ÷xhicuent rdxe'chtu loä sa'csi basiacäpac te bejn te dxej nani rusilajztu, ä? ²⁴Na'c rujntu yälguختis si'ctis ni rlaiztu. Colyejn yälguختis con yälguختis xten Dios.

Rusule' Jesús casiäädni

²⁵Dxejcti gusloj gaii bejn Jerusalén cayujn yälgunabdiidx, räjpreni:

—÷La etlaadi dee ni caguiilreni te ju'trenini, ä? ²⁶Ani asuga', caniini nez loj guiraa rebenguejdx, niluxh rut rudxoindini. ÷Xhaa ahuililajz reguxhtis, regubier laani najcpacni Crist, ä? ²⁷Niluxh nuure nadoncheenu caro siääd niguiire, niluxh che jiääd Crist, rut gacbeedi caro siäädni.

²⁸Caguluii Jesús nen guidoo che biejn diajgni rediidxre, dxejc dipduxh guniini, räjpni:

—La'tu numbeetu narä, najntu caro siälä; luxh dina niälä lagajcsi narä; nani baxhał narä guliipac nabajñni, luxh la'tu ditu gumbeeni. ²⁹Luxh narä numbeäni, sa'csi lojni biriä, laani baxhałzani narä.

³⁰Dxejc rlaizreni niniaazrenini, niluxh rut gunaazdini, sa'csi gajd xhorni gal. ³¹Xhidajl bejn lo reben xhidajlga huililajz xtiidxni, dxejcti räjpreni:

—Cheni jiääd Crist, ÷xhixh sujnruni milagwr loj nani rujn dee, ä?

Ruxhał refarisee guixhajg guiniaaz Jesús te jiäuni

³²Che biejn diajg refarisee xhi canii rebejn xcuent Jesús, laareni näjza rebixhojz nani rnibee lo rebixhojz baxhałreni guixhajg te guiniaazreni Jesús te jiäuuni. ³³Sas räjp Jesús lojreni:

—Bale'si dxej su'ä lojtu, dxejcti guibi'ä loj nani baxhał narä.

³⁴Siguiiltu narä, niluxh ditu guidxäl narä, sa'csi cadro cha'ä digacdi jiääd'tu.

³⁵Ni'c gunii rexpejn Israel lo sa'reni; räjpreni:

—÷Cacharo chääni ni'c di gacdi guidxäl'nuni? ÷Xhaa sijni loj rexpejn Israel nani nare'ch nez lajdx regriegos te guluini regriegos?

³⁶÷Xhi säloj diidxre nani guniini loonu: “Siguiiltu narä, niluxh ditu guidxäl narä, sa'csi cadro cha'ä di gacdi jiääd'tu”?

Regueu nisabajn

³⁷Lult dxe lanij, ni najc dxero, gusulii Jesús dipduxh guniini, räjpni:

—Palga yu' chu cayojł, sujiäädni loä te yäni. ³⁸Nani chalilajz xtidxä si'cni caj lo rexquijtz Dios nen lastoolini siliejn nisabajn.

³⁹Rediidxre guniini xcuent Sprit Dxaan nani churu jiädłajz nen lastoo reni rililajz xtiidxni, sa'csi gajd Sprit Dxaan jiääd, sa'csi gajd Jesús guibansac lo rebengut.

Gucgala' rebejn

⁴⁰Lo reben xhidajlga yu' reni biejn diajgreni rediidxga, dxejc räjpreni:

—Guliipacni, dade're najc laapac ni siääd, si'c ni rnii xtidx Dios.

⁴¹Yu'zareni räjp:

—Dade're najc Crist ni cabäáznu.

Yu'za sgaii ni räjp:

—Gurniälojtu jääd Crist nez Galilee. ⁴²Ni loj rexquijtz Dios caj riäjlpac gac Crist te rexagdoo to'reii David, jäädzani guedx Belén, lagajc guejdx cadro siääd to'reii David.

⁴³Dxejcti gucgala' rebejn xcuent Jesús. ⁴⁴Yu'reni rlanj cháäni pres luxh rut biäjxd i gunaazni.

Di reguxhtis chalilajz biääd Crist

⁴⁵Gubi' reguixhajg xten guidoo loj rebixhojzro näjza refarisee. Dxejcti gunabdiidxreni loj reguixhajg, räjpreni:

—¿Xhicuent ditu niädnäni?

⁴⁶Badzu' reguixhajg diidxre, räjpreni:

—iGajdpac te bejn guinii si'cni rnii bejnga!

⁴⁷Dxejc räjp refarisee:

—¿La näj la'tu abasgueeni, ä?

⁴⁸¿Xhixh loj regubier o loj refarisee yu' chu tej ni ahuililajz xtiidxni, ä?

⁴⁹Reben xhidajlre ni di gan xleii toMoisés, reni'c agunijtpac.

⁵⁰Nicodem, nani huij lojni te guxhijn, najc te refarisee. Laani räjpni lojreni:

⁵¹—Lo xleiiu caj: digacdi guntu yäl_guxhtis te bejn palga gajdtu gucuadiagxgaa xtiidxni, te don xhi bejnii.

⁵²Badzu'reni diidxre räjpreni lojni:

—¿La näjza luj siäädlu Galilee, ä? Bilsa'c xhi caj lo xquijtz Dios,

suhuiilu nicla tej niguii nani rnii xtidx Dios di jääd nez Galilee.

Gunaa nani biga' carälguijxh con te niguii

⁵³Dxejc cade tejreni sii rolizreni.

8 Dxejcti huij Jesús nez dan Oliib. ²Rsilru gubi'ni, bui'ni nen guidoo. Luxh sanuutis siääd guiraa rebenguejdx lojni. Dxejc ro'c gurejni, gusloj caguluinireni. ³Dxejcti biääd refarisee näjza reben najn, biädnäreni te gunaa nani biga' carälguijxh con te niguii. Basujrenini galäii reni suga' ro'c.

⁴Räjpreni loj Jesús:

—Mastr, gunaaare biganäj te niguii carälguijxhreni, niluxh yu' cháäläni.

⁵Loj leii xten Moisés caj guicuaanu guij yejc sa' gunaaga te guetni. Luj ¿xhicha naalu?

⁶Si'c räjpreni lojni te gaxäjsi gunijtni te diidx te gac cue'creni xquejni. Niluxh Jesús basajbtisni lojni lo yuj, gusloj cagucuaani lo yuj con bicuenaani. ⁷Dxejc sanuutisreni canabdiidxreni, huisutini, räjpni:

—Nani yu' lojtu ni xhettipac xtojlni, ni'c ganiddoo sugucuaani guij yejc gunaare.

⁸Basabsac lojni lo yuj sanuutis cagucuaani con bicuenaani lo yuj.

⁹Luxh laareni che biejn diajgreni diidxga, sa'csi yu' xtojlni, gusloj biriireni tebgajreni, ganid ni najc bengolru, dxejcti ni najc huinru. Dxejcti bianxteb Jesús näjza gunaa ni suga' galäiireni. ¹⁰Dxejc gusulii Jesús, luxh sa'csi rutru lojdi bahuiini, xtebtis gunaaga, räjpni lojni:

—Guna, ¿con reni cabe'c xquejlu?
¿La rut bacuaquijdiru luj, ä?

¹¹Räjp Gunaaga:

—Nicla tejreni, Dad.

Dxejcti räjp Jesús lojni:

—Niclaza narä dina gucuaquiäru luj. Huij, na'cru gunlu dojl.

Jesús najc bianij xten guedxliuj

¹²Gunii Jesús lo rebejn stehuält, räjpni lojreni:

—Narä nacä bianij xten guedxliuj; nani jiädnajl narä dini sa lo yäl nacäjäy, sica'ni bianij ni rudeedpac yäl nabajñ.

¹³Dxejcti räjp refarisee lojni:

—Luj caniilu diidx lagajcsi xcuentlu. Xhet sajcdi sa' diidxga.

¹⁴Badzu' Jesús diidxre, räjpni lojreni:

—Masque lagajc narä rniä diidx xcuentä, sajc xtidxä, guliipacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä. ¹⁵La'tu rujntu yälguxhtis si'c najctis rexhigab xten beñ guedxliuj. Narä rut lojdi runä yälguxhtis. ¹⁶Palga gunä yälguxhtis, yälguxhtis xtenä laaca najcni, sa'csi et xtebädi runä yälguxhtis, sa'csi narä näj Xtaďä ni baxhañ narä rienñuni. ¹⁷Luxh lo xleitu caj diidxre: “Che rniä tio'p bejn tejsi diidx, didxliini, colchalilajzni.”

¹⁸Narä rniäpäc diidx lagajc xcuentä, dxejcti Xtaďä nani baxhañ narä rniäizani diidx xcuentä.

¹⁹Räjpreni loj Jesús:

—¿Caro yu' xtaďlu?

Räjp Jesús lojreni:

—Ditu gumbec nicla narä, niclaza Xtaďä; paru niembeetu narä, niembeezatu Xtaďä.

²⁰Rediidxre gunii Jesús cadro re' gojn, lañ ni caguluiini neñ guidoro niluxh rut gunaazdini sa'csi gajd xhorni guidzujñ.

Cadro cha'ä, la'tu digacdi jiäädту

²¹Gunisac Jesús lojreni, räjpni:

—Narä sia'ä, luxh la'tu siguiiltu narä, niluxh loj xtojltu sejtту. Cadro cha'ä di gacdi jiäädту.

²²Räjp rexpejn Israel loj resa'reni:

—¿Xhaa sugu'tni lagajc laani, ni'cni najni di gacdi chonnu cadro chääni?

²³Räjp Jesús lojreni:

—La'tu najctu beñ lo yuj. Narä nacä beñ ni siääd jiaa. La'tu najctu beñ guedxliujre. Luxh narä dina gacätis beñ guedxliujre. ²⁴Ni'cni guniä lojtu, sejtту lo xtojltu sa'csi palga ditu chalilajz nacä chu nacä, sejtpactu lo xtojltu.

²⁵Dxejcti räjpreni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli?

²⁶Xhidajl diidx rlazä guiniä, xhidajlza yälguxhtis rlazä gunä xcuenttu sa'csi ditu chalilajz, per nani baxhañ narä najc beñ guliipac; nani biejn diagä guniini, rediidxga rniä loj reben guedxliuj.

²⁷Luxh laareni direni niacbee la xcuent Dad Dios ni caniini. ²⁸Ni'cni räjp Jesús lojreni:

—Cheni guiliästu Xi'n Niguii jiaa, dxejc sacbeetu laa narä ni baxhañni, luxh xhetliidi runä lagajcsi xcuentä. Si'cni balui Dad narä, si'ctis rniä.

²⁹Nani baxhañ narä suganäjni narä. Gajd Dad gusanxteb narä, sa'csi runätis ganax redzuun nani rchagljajzni.

³⁰La_l ni caniini si'c, xhidajlreni huililajz xtiidxni.

Rexi'n Dios con remos xten dojl

³¹Dxejcti räjp Jesús lo rexpejn Israel nani huililajzga:

—Palga la'tu sutijptu, guzoobtu xtidxä, dxejc guliipac najctu xpenä.

³²Sumbeezatu nani najc didxgulii, niluxh didx guliiga sus_laa la'tu lo xtoj_ltu.

³³Räjpreni lojni:

—Rexagdo toAbraham najcnu, rut chu lojdi gudo'nu si'c mos. ¿Xho mood naalu “siliaatu”?

³⁴Räjp Jesús:

—Riniliä, rniliäpac lojtu, chutis ni rujn dojl najc mos xten dojl. ³⁵Nani najc mos, dini jia'n rolijz xlamni guideb guibaj_{nni}, niluxh nani najc xi'n lam_{ga}, ni'c sii sia'n rolijz xtadni guideb guibaj_{nni}. ³⁶Ni'cni, palga rus_laa xi'nni la'tu lo dojl, dxejcsii apac gu_laaatu. ³⁷Ananä najctu xagdo toAbraham, luxh la'tu r_lajztu ju'ttu narä sa'csi di xtidxä jiu' lo xcäriejntu. ³⁸Narä rniä nani abahuiä con Xta_{dä}; luxh la'tu rujntu nani biejnza diajgtu lo xtadtu.

³⁹Badzu'reni diidxre, räjpreni lojni:

—Xtadnu najc toAbraham.

Dxejc räjp Jesús lojreni:

—Palga la'tu najc_pactu xi'n toAbraham, sujntu sa' dzuun ni bejn toAbraham. ⁴⁰Luxh _naj r_lajztu ju'ttu narä, sa'csi rniliä rediidx nani baluii Dios loä. iDi toAbraham niujn si'c! ⁴¹La'tu rujntu xtzuun xtadtu.

Dxejc räjpreni lojni:

—Nuure dinu gac xi'n chälbejn_{di}; nuure tejtis xtadnu yu', laani najc Dios.

⁴²Dxejcti räjp Jesús:

—Paru guliini najc xtadtu Dios, ninälajztu narä sa'csi loj Dios biriä siälä ree. Xhet lagajcsi xcuentä siälädi; Dios baxha_l narä. ⁴³¿Xhicuent ditu gacbee rediidx ni rniä lojtu? Sa'csi di r_lajztu gucua_dajgtu rextidxä. ⁴⁴Xtadtu najc be_{nd}xab. La'tu najctu xi'nni, r_lajztu guntu nani r_lajz_tisni guntu. Xtadtu galooli najcni te ni rugu't, dini suu xlaad didx_lii, sa'csi xheti didx_lii ne_n lastooni. Che rniini didx-xhii, si'c rniini sa'csi si'c_pac najcni, sa'csi najcni be_n didx-xhii, najczani xtad didx-xhii. ⁴⁵Niluxh narä rniä didx_lii, ni'c ditu chalilajz xtidxä. ⁴⁶¿Chu tejtu saj_c guluii te dojl ni benä? Narä rniä didx_lii. ¿Xhicuent ditu chalilajz xtidxä, ä? ⁴⁷Nani najc xpejn Dios, ni'c rucua_dajg xtidx Dios. Sa'csi la'tu ditu gac xpejn Dios, ni'cni ditu gucua_dajg xtidxä.

Ansde toAbraham, agac nabaj_n Crist

⁴⁸Dxejcti badzu' rexpejn Israel diidxre, räjpreni lojni:

—Laaca rniinu luj najclu te bejn ni siääd Samaria, be_{nd}xab yu' lastoolu.

⁴⁹Räjp Jesús lojreni:

—Xhet be_{nd}xabdi yu' lastoä. Nani runätis rliä'pä xpala'n Xta_{dä}, luxh la'tu alga r_bälaztu narä. ⁵⁰Luxh narä dina quilä chu guiliä'p xpala'nä, yu' chu rguuil guiliä'p bejn xpala'nä, niluxh laani ruj_{nni} yalguxhtis.

⁵¹Rniliäpac lojtu, nani riu, nani rusoo_b xtidxä, dipacni guet.

⁵²Dxejcti räjp rexpejn Israel lojni:

—Naj agucbeepacnu yu' be_{nd}xab lastoolu. ToAbraham näjza reniguii

nani gunii xtidx Dios, guiraareni agujt. Luxh luj rniilu: “Nani riu, nani ruzoob xtidxä, dipacni guet.”

⁵³¿Xhixh sajcrulu lo toxtadnu Abraham, ä? Ni laani gujtñi, gujtza reniguii ni gunii xtidx Dios. ¿Chuxh rchalolu najclu?

⁵⁴Badzu' Jesús diidxre, räjpni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtadä, lagajcza Xtadä ni rniitu najc Xtioštu.

⁵⁵Niluxh la'tu ditu gumbeeni. Narä numbeäni. Paru guiniä dina gumbeäni, sacä te beñ didx-xhii si'c najctu la'tu. Niluxh dee, numbeäpacni, luxh riuä ni rniini, rusobä xtiidxni. ⁵⁶ToAbraham toxtadgoldootu, bibalajzni sa'csi nuhuiini dxej nani jiälä, niluxh bahuiiini dxejc bibalazduxhni.

⁵⁷Dxejcti räjp rexpejn Israel lojni:

—Nicla gajdlu chu tiubitzuu ijz, ¿xho naalu abahuiilu lo toAbraham?

⁵⁸Räjp Jesús lojreni:

—Rniliäpac lojtu, che gajdli guibajn toAbraham, agac nabanä narä.

⁵⁹Dxejcti cua'reni guij te nucuaareni yejc Jesús, per di Jesús niga', biriini neñ guidoro, gudejñi galäiireni. Sä'tini.

Basajc Jesús te bejn ni natiä'p balojni che gojllini

9 Che cadejd Jesús te lajt, bahuiini sobga' te bejn ni che gojlli bejnga agajc natiä'p balojni.

²Dxejc gunabdiidx rexpejn pacni lojni, räjpreni:

—Mastr, ¿chuni'c bejn dojl, la bejnre o la xcuzajñni, ni'c natiä'p balojni che gojlni, ä?

³Räjp Jesús:

—Nicla laani, niclaza xcuzajñni di niujñ dojl. Si'c gojlni te xcuent ni sajc bejnre suhuii bejn xho najc xtzuum Dios. ⁴Nanab gunä xtzuum nani baxhañ narä naj ni najc rdxee, sa'csi cheni guidzujñ guxhijñ rut gacdi gun dzuun. ⁵Lañni yu'ä lo rebejn guedxliuj, nacä xpianij guedxliuj.

⁶Che gulujx guniini si'c, batiobxhejnñi lo yuj, bejnñi bajñ con xhejnñi, gudääbnini con bicuenaani lo rebaloj lotiä'pga.

⁷Dxejcti räjpni:

—Huij, huitiib lojlu neñ nis ni laa Siloé. Laj nisga sälojza “baxhañni”.

Dxejcti huijñi. Huitiibni lojni. Che gubi'ni, aruhuiiini. ⁸Dxejcti rexpisñ lotiä'pga, naj renani galoo bahuiireni natiä'p lojni, räjpreni:

—¿La et laadi dee ni rbej te rutie'ni gojn, ä?

⁹Yu'reni räjp:

—Laanini.

Yu'zareni räjp:

—Et laadini, rujñsi lojni si'c.

Laani räjpni:

—Laa naräni.

¹⁰Räjpreni lojni:

—¿Xho mood arien balojlu?

¹¹Dxejcti räjp dade'ga nani gujc lotiä'p:

—Dade' ni laa Jesús bejn bajñ, gudääbnini baloä, dxejcti najñi: “Huitiib lojlu neñ te nis ni laa Siloé”, dxejcti che huitibä loä, lagajc dxejc bieñ loä.

¹²Dxejcti räjpreni lojni:

—¿Con dade'ga naj?

Räjp*t*i bejn*g*a:

—Dina ganä.

Reben farisee bejn yäl*g*unabdiid*x*
lo dad lotiä'p nani biaj*c* lojni

¹³Huinäreni nani guj*c* lotiä'p*g*a
nez loj refarisee. ¹⁴Luxh sa'csi
najcni dxej ni rusilajzreni che bejn
Jesús baj*n* ni gudääbni loj lotiä'p*g*a
te biaj*c* balojni, ¹⁵gunabdiid*xsac*
refarisee loj dade' nani biaj*c* balojni,
xho mood arien*u* balojni naj.

Laani räjp*n*i lojreni:

—Baj*n* gudääbni loä, dxej*c* gudibä
loä, naj aruhuiä.

¹⁶Dxej*c* yu' refarisee ni räjp:

—Di dade' ni bejn dee gac xpej*n*
Dios, sa'csi dini jiu dxej ni rusilajz
xpej*n* Israel.

Yu'zaren*i* räjp:

—¿Xho gac gunni sa' remilagwrga
paru najcni be*n* doj*l*?

Ni'cni gula' sa'reni, gujcreni tio'p
gala'. ¹⁷Dxej*cti* gunabdiid*xsac*reni lo
ni guj*c* lotiä'p:

—Luj a', ¿xhi rniilu xcuent nani
basiaj*c* balojlu?

Dxej*c* räjp dade'ga:

—Narä rniä najcni te bej*n* nani
rnii xtid*x* Dios.

¹⁸Luxh rexpej*n* Israel naaddireni
chalii lajzreni gujpcacni te lotiä'p
ni abien*u* balojni, dxej*cti* gurejdxreni
xcuzaj*n* dade' ni guj*c* lotiä'p*g*a.

¹⁹Dxej*cti* gunabdiid*x*reni lojreni,
räjpreni:

—¿Laa xi'ntu dee nani najtu cheni
gojllini natiä'p lojni? ¿Xhoxh arien*u*
lojni naj?

²⁰Badzu' rexcuzaj*n*i diid*x*re,
räjpreni:

—Nadonnu laa xi'nnuni, luxh che
gojlni natiä'p lojni. ²¹Niluxh dinu

guidon naj xho mood arien*u* lojni,
dizanu guidon chu basiaj*c* balojni.
Colguiniabdiid*x* lojni, anajcni
bengool, lagaj*c* laani saj*c* guiniini
xhi gusajcni.

²²Si'c gunii xcuzaj*n*i sa'csi
rdxejbreni rexpej*n* Israel, sa'csi
agac bia'nreni diid*x* sibääreni,
diruren*i* gusaan jiu' ne*n* guidoo
chutis te bej*n* ni naa Jesús najc
Crist nani abiääd. ²³Ni'cni räjp
rexcuzaj*n*i:

—Anajcni bi'n ni ayu' xcäriej*n*i.
Lojni colguiniabdiid*x*.

²⁴Dxej*cti* gured*xsac*reni nani guj*c*
lotiä'p*g*a, räjpreni lojni:

—Gulä'p xpala'n Gueb Dios. Nuure
nadonnu be*n* doj*l* najc dade'ga.

²⁵Dxej*cti* badzu' dade'ga diid*x*re,
räjpreni:

—Dina ganä la najcni be*n* doj*l* o
la dini gac. Tejtis nanä: gucä lotiä'p,
luxh naj arien*u* baloä.

²⁶Stehuält gunabdiid*x*reni,
räjpreni lojni:

—¿Xho bennäjni luj? ¿Xho bej*n*i
basiaj*c* balojlu?

²⁷Badzu' dade'ga diid*x*re, räjpreni:

—Ni aguniä guira'ti lojtu, luxh
la'tu ditu jiu xtid*x*ä. ¿Xhicuent
rlajztu guinisacäni? ¿Xhixh naj
la'tu rlajztu gactu xpej*n*pacni, ä?

²⁸Dxej*cti* gudi*n*äjreni*n*i, räjpreni:

—Luj najclu xpej*n*i, per nuure
najcnu xpej*n* toMoisés. ²⁹Anadonnu
guninäj Dios toMoisés, niluxh
dade're dinu guidon casiäädni.

³⁰Dxej*cti* räjp dade' lojreni:

—Dee najc te cos ni guidxeloj
bej*n*: la'tu ditu gan casiäädni,
iniluxh laani basiaj*c* baloä!

³¹Nadoncheenu di Dios cuadiaj*g*
xtid*x* rebe*n* doj*l*; palga yu' chu

rajn Dios, ni rusoobza xtiidxni, rucuardiajg Dios xtidx sa' bejn̄ga. ³²Che guslojli guedxliuj gajd diajgnu jiejn xcuente te bejn̄ nani rusiajc baloj te bejn̄ lotiä'p nani natiä'p lojni cheni gojllini. ³³Palga xhet lo Diosdi siääd dade're, xhet sajcdi gunni.

³⁴Badzu'reni diidxre räjpreni lojni:

—Luj, lo dojl̄pac gojllu, ÷xho jäädluuilu nuure?

Dxejcti guläärenini nen̄ guidoro, barilaagwrenini.

³⁵Biejn diajg Jesús guläärenini nen̄ guidoro, che bidxälnini, räjpni lojni:

—¿La rililajzlu xtidx ni najc Xi'n Dios ni gujc Niguii, ä?

³⁶Badzu'ni diidxre, räjpni: —¿Chuni'c najcni, Dad, te chalilazä xtiidxni?

³⁷Räjp Jesús: —Abahuuilu lojni, lagajcza laani caninäjlu naj.

³⁸Dxejcti räjpni: —Rililazä Dad.

Dxejcti bazuxhijbni te gojnnini.

³⁹Räjp Jesús: —Par yäl̄guxhtis biälä lo guedxliujre, te fii renani di lojni jien, niluxh reni rien̄ lojni sajcreni lotiä'p.

⁴⁰Refarisee nani suganäjreni, che biejn diajgreni diidxre, räjpreni: —¿Xhixh najczanu bejn̄ lotiä'p, ä?

⁴¹Räjp Jesús: —Paru najctu lotiä'p, rut gucuauquijditu xtojltu, naj sa'csi rniitu rien̄ lojtu, sicaquijtu rextojltu.

Jesús najc te baxtorsa'c

10 'Rniliä, rniliäpac lojtu, nani di jiu' ro' gurajl xte rexiil,

alga richu'ni stelaad, rä'pni cuä' gurajl, ni'c najcni te gubaan. ²Nani riu' nez ro' gurajl xten rexiil, laani najc xpaxtoorreni. ³Che guidzujn̄ baxtoor, ruxhal nani rcanäj ro lä', te jiu'ni. Rexiilga numbeereni xse' baxtoor, dxejctiru laani rbejdxni rexiilga, tebgaj xiilga yu' lajni, rinäzanireni cadro naga' guixasa'c. ⁴Che rii rexiilga nen̄ gurajl, sanä baxtoorgareni, luxh numbee rexiilga xse'ni, ni'c rsianäjreni baxtoorga. ⁵Luxh dipacreni chanä te baxtoor nani direni gumbee, ruxunreni lojni sa'csi direni gumbee xse' garenca bejn̄.

⁶Bij Jesús rediidxga lojreni, niluxh direni niacbee xhi säloj ni guniini.

⁷Dxejcti gunisac Jesús diidx lojreni; räjpni:

—Rniliä, rniliäpac lojtu, narä nacä si'c roxlä' xcurajl rexiil. ⁸Guiraa reni abiääd galoo, najcreni ganax gubaan luxh di rexiil nucuadiajg xse'ni. ⁹Narä nacä si'c rolä' xten gurajl, nani jiu' nejzga, silaani loj xtojlni, siu'ni, siriini te guidxälni guixasa'c gauni.

¹⁰'Ni najc gubaan riäädtsini te cuanni, te ju'tni, te guxhinzani, niluxh narä siälä te ga'ptu yäl̄nabansa'c, yäl̄nabajn̄ par tejpas. ¹¹Narä nacä baxtorsa'c; luxh baxtorsa'c sudeed lagajc xcäl̄nabajnni xcuente rexiilni. ¹²Niluxh te mos ni rajxh, di gac baxtoorpac, ni xhet xtendini najc rexiil, che rhuini siääd te cuyo't, ruxunni, li rbälazni rexiil. Dxejcrniaaz cuyo't rexiil, rutie'chzani rexiil. ¹³Mosga ruxun sa'csi najcni mostis, luxh dini jiu xhi rsiajc rexiil.

¹⁴'Narä nacä baxtorsa'c; numbeä reni najcpac rexilä; rexilä numbeezareni narä ¹⁵sigajc numbee Xtradä narä, sigajc numbeäza Xtradä; luxh sudedä xcäl'nabaṇä xcuent rexiilga. ¹⁶Rapäza ste cuaa xiil, ni di gac xten gurajlre; näjza laareni nanab chaxiä, te gusobdiajgreni xtidxä, te guidxagsa' guiro'p cuaareni, gacreni tejtis gurajl, tejtisza baxtoor.

¹⁷'Narä siguixäza xcäl'nabaṇä, guetä, te dxejru siliässacä xcäl'nabaṇä, guibaṇsacä, ni'cni sanälajz Xtradä narä. ¹⁸Rut sajcdi ju't narä, lagajc narä gudedä xcäl'nabaṇä, guetä. Rapä yäl'rnibee te gudedä xcäl'nabaṇä, guetä, rapäza yäl'rnibee te xcasacä xcäl'nabaṇä te guibaṇsacä, sa'csi dee najc yäl'rnibee ni baniidx Xtradä loä.

¹⁹Xcuent rediidxre gula' sa' rexpejn Israel, gujcreni tio'p gala'.

²⁰Xhidajlreni canii:

—¿Xhicuent riutuni? ¿La ditu gan te beṇdxab yu' lastooni? Yejcnı rajc. Xhigac rcuadiajgtu xtiidxni.

²¹Dxejc ste cuaareni:

—Dini gac. Di rediidxre gac xtidx te beṇdxab. ¿Xhixh sajc rusiajc beṇdxab baloj relotiä'p, ä?

Rdx'e'ch rebejn loj Jesucrist

²²Lagajc nen redxejga gujc lanij xten xquidoo rexpejn Israel guedx Jerusalén. ²³Najcni bäi najl. Biu' Jesús guidoro, sasajni nez nen cordoor ni laa xten Salomón. ²⁴Gubig rexpejn Israel guideb gabi Jesús, räjpreni lojni:

—¿Gucli gucua'tzlu loonu chu najclu? Palga luj najclu Crist ni

cabääznu jiääd, guiniliini loonu tejpas.

²⁵Dxejc badzu' Jesús diidxre, räjpni lojreni:

—Aguniä lojtu si'c, niluxh ditu nililajz. Redzuun nani runä xcuent xcäl'rnibee Xtradä, huenliisi rululojreni chuni'c nacä. ²⁶La'tu ditu chalilajz sa'csi ditu gac rexilä. ²⁷Rexilä numbee xse'ä, luxh narä numbeezareni, riäd'najlzareni narä. ²⁸Narä rudedä yäl'nabajn par tejpas loj rexilä, luxh direni nitloj par tejpas. Rutza laadi nani sajc gudzucajreni ladzṇä. ²⁹Xtradä baniidxreni loä, laani najcni guroobru, nadipru loj guiraareni. Rut laadi nani sajc gudzucajreni ladzṇaa Xtradä. ³⁰Narä näjza Xtradä najcnu tejsi.

³¹Dxejc gulässac rexpejn Israel guij, te nucuaareni yejc Jesús.

³²Dxejcti räjp Jesús lojreni:

—Xhidajl dzuun xten Xtradä abaluiä lojtu, ¿lo redzuunga, xhi tej dzuun rujn gucuaatu guij yecä?

³³Dxejcti räjp rexpejn Israel lojni:

—Xcuent redzuun ni rujnlu dinu gucuaa guijlu. Sa'csi guniyajlu, ni'c nucuaanu guij yejclu. Beṇ guedxliujlu, luxh najlu najclu tejsi con Dios.

³⁴Badzu' Jesús diidxre, räjpni lojreni:

—¿La et loj xleiiditu caj rediidxre: “Narä rniä, la'tu najc redios?”

³⁵Nancheenu digacdi guidxaa xquijtze Dios. Palga gulalajni redios rebejn nani bejn yäl'guxhtis loj rexpejn Israel, dxejc ³⁶naj xhicuent guniitu loä: “Caniyajlu Dios”, sa'csi guniä lojtu narä nacä Xi'n Dios? Ni gule Dios narä, baxhalni narä

lo guedxliujre. ³⁷Palga dina gunä redzuun xten Xtaďä, na'c chalilajztu rextidxä. ³⁸Luxh palga runnani, mascä ditu chalilajz xtidxä, colchalilajz ni ruluii reyälmilagwr nani runä, te gacbeetu par tejpas, Xtaďä yunäj narä, narä yunääza laani.

³⁹Che rļajzreni niniaazrenini stehuält, laani biriini ladzņaareni.

⁴⁰Dxejcti sääni, gubisacni nez stelaad gueu Jordán, nejzga huijia'nni, cadro gosloj batiobnis Juan. ⁴¹Xhidajl bejn bidzujn lojni ro'c, räjpreni:

—Di Juan niujn nicla tej yälmilagwr luxh guiraa rediidx ni gunii Juan xcuent dade're najc didxliipac.

⁴²Xhidalduxhreni huililajz xtiidxni ro'c.

Gujt Larz

11 Yu' te dade' ni cayacxhuu ni laa Larz. Rbäjzni guedx Betania, lajdxza rebisiajnni Marii nājza Mart. ²Mariire, bisiajn Larz, najc nane' ni basäl setnejxh ni' Jesús, batiaazani ni'ni con xquidxejcti. ³Ni'cni baxhal guiro'p bājlrē diidx loj Jesús, räjpreni lojni: —Dad, xamiigwlu nani sanälajzlu cayacxhuu.

⁴Che biejn diajg Jesús rediidxga, räjpni:

—Di yälracxhuure ju'tni, sa'csi yälracxhuure najc te gululiojni xcälrnibee Dios. Te gululiojza yälracxhuure xcälrnibee Xi'n Dios.

⁵Sanälajz Jesús Mart, bājlni, nājza Larz, ⁶che räjpreni lojni cayacxhuu Larz, bia'nni stio'p dxej cadro yu'ni. ⁷Dxejcti räjpni loj rexpejnpacni:

—Colcho', chonnu stehuält región Judea.

⁸Räjp rexpejnni lojni:

—Mastr, gajd gac xchej rļajz rexpejn Israel ni rnibee nucuaa guij yejclu te nugu'treni luj, luxh nāj rļajzlu chäsaclu ro'c.

⁹Dxejcti räjp Jesús lojreni:

—¿La xhet tzubitio'p ordi yu' lo tebdxex, ä? Palga sa bejn rdxee, dini jiajb sa'csi ruhuiini lo bianij nani yu' lo guedxliujre. ¹⁰Palga chasajni guxhijn, siliaro'ni, sa'csi xheti bianijga.

¹¹Dxejcti räjp Jesús lojreni:

—Nagayejs xamigwä Larz. Cha'a te chacuänäni.

¹²Dxejc räjp rexpejnpacni lojni:

—Dad, palga agudiesni, pet siajcti.

¹³Jesús canii lojreni agujt Larz, niluxh rexpejnpacni bejn xhigab caniini xcuent yälrejs xten bacältis.

¹⁴Ni'cni guniliipac Jesús räjpni lojreni:

—Agujt Larz. ¹⁵Rbalazä sa'csi rutinu ro'c, te chalilajztu xtidxä. Colcho' te chohuiinuni.

¹⁶Dxejcti Tomás ni rniizareni “cua'ch”, räjpni loj resa'ni:

—Colcho' te guetnāzanuni.

Jesús najc yälrbansac lo yälgujt

¹⁷Che bidzujn Jesús lo guejdxga, agujc tajp dxej biga'tz Larz. ¹⁸Guedx Betania tre' gajxh lo guedx Jerusalén, si'cti tio'p garol kilómetro. ¹⁹Xhidajl rexpejn Israel abidzujn, siädhuiireni Mart, nājza Marii, te di gac-huin lajzreni sa'csi gujt bisiajnreni. ²⁰Che gucbee Mart abidzujn Jesús, biriini huichaglojnini; niluxh Marii bia'n rolizreni. ²¹Dxejcti räjp Mart lo Jesús:

—Dad, paru suga'lu ree, di bisianä niejt. ²²Narä nanä suniidx Dios guiraa nani guiniablu lojni.

²³Jesús räjpni lojni:

—Sibaṅsac bisiajnlu.

²⁴Räjp Mart lojni:

—Acananä sibaṅsacni che guidzujṅ dxej ni guibaṅsac bejn loj rebengut dxej lult che gun Dios yälguختس.

²⁵Dxejc räjp Jesús lojni:

—Narä nacä yälruspaṅsac bejn loj rebengut, näjza yäl nabajṅ par tejpas. Nani rililajx rextidxä, masä agujtni, sibaṅsacni. ²⁶Chutis tej bejn ni nabajṅ ni chalilajx xtidxä, dini nitloj par tejpas, čriliiga lajzluni, ä?

²⁷Dxejcti räjp Mart lojni:

—Rililazäni, Dad. Ahuililazä luj najclu Crist, Xi'n Dios nani bia'n diidx guxhaḷ Dios lo guedxliujre.

Biin Jesús cuä' xpaä Larz

²⁸Che guluux gunii Mart, huitejdxni bäjlmi Marii, xhiga'tz räjpni lojni:

—Abidzujṅ Mastr. Cabejdxzani luj.

²⁹Che biejn diajg Marii rediidxga, huisugajcni, sahuüini Jesús. ³⁰Gajd Jesús jiu' guejdxga, laḷtis suga'ni cadro bidxaagni Mart. ³¹Rexpejṅ Israel nani biädcuenäj Marii, ni cahuii didi gac-huin lajzni, che bahuiireni huisu Marii, sääni, näjza laareni huirinajlreni Marii, naareni pet lo baa sayoonni.

³²Ni'cni che bidzujṅ Marii cadro suga' Jesús, bazuxhijbni lojni, räjpni:

—Dad, paru suga'lu ree, di bisianä niejt.

³³Che bahuii Jesús cayoon Marii, näjza rexpejṅ Israel ni siädnaḷ Marii, guc-huin lastooni, biääd te rsliajx lastooni. ³⁴Dxejcti räjpni lojreni:

—čCaro bacua'tztuni?

Räjpreni lojni:

—Dad, gudaä ree te fiilu.

³⁵Dxejcti biin Jesús. ³⁶Ni'cni cayäjp rexpejṅ Israel:

—Colhuii, lacti sanälajznini.

³⁷Yu'zareni räjp:

—Dade're basiajc beṅ lotiä'p. čXha di niajcdi nusiajcnini bejnre te di niejtmi, ä?

Gubaṅsac Larz

³⁸Guc-huinduxh lastoo Jesús, gubigni lo baa. Baaga najc si'c te biliää, suga' te guiro ni rusäuureni ro'ni. ³⁹Dxejcti räjp Jesús lojreni:

—Colgudzucaj guijga.

Mart, ni najc bisiajn bengutga, räjpni lojni:

—Dad, pet acaladxuudxni, sa'csi agujc tajp dxej gujtni.

⁴⁰Dxejc räjp Jesús lojni:

—čEt rniä lojlu, palga rililajztu, suhuiilu xcälrnibee Dios, ä?

⁴¹Dxejcti badzucajreni guijga.

Guläs Jesús lojni xhaguibaa, räjpni loj Xtadni:

—Xtadä, runidxä xquixtios lojlu sa'csi abiejn diajglu xtidxä. ⁴²Narä nanä guliica rucua diajglu xtidxä, luxh naj caniäni xcuent rebejṅ ni tre' ree, te chalilajzreni luj baxhaḷlu narä.

⁴³Che gulujx guniini rediidxga, guredxa'ni räjpni:

—iLarz! iGudaä ree!

⁴⁴Dxejc birii bengutga nen biliää. Naliib reñaani, reni'ni, niäuu te baii lojni. Dxejcti räjp Jesús lojreni:
—Colguslaani, colgusaan jiini.

Bachaagreni diidx xho guiniaazreni
Jesús

(Mt. 26:1-5; Mr. 14:1-2; Lc. 22:1-2)

⁴⁵Xcuent dzunrore huililajz rextidx Jesús xhidajl rexpejn Israel nani huinajl Marii, che bahuiireni xhi bejn Jesús. ⁴⁶Yu' reni huihuii loj rexpejn Israel ni laa farisee, bijreni diidx xhi bejn Jesús. ⁴⁷Dxejcti refariseega, näjza rebixhojz ni rnibee, bire'reni bidxagsa'reni lo Junt Suprem, räjpzaren:

—¿Xho jiennu? Niguiire cayujn xhidajl milagwr. ⁴⁸Palga guisaannuni si'c, guirali bejn sililajz xtiidxni, sinajlrenini. Dxejcti jääd reben roman ni rnibee, gudzucajreni xcälrnibeenu, sudzujlaren lajdxnu.

⁴⁹Dxejc Caifás, bixhojzro ni riäjł gunibeeni lo rebixhojz ijzga, räjpni lojreni:

—La'tu xhetliidi najnditu. ⁵⁰Ditu gun xhigab laaca guet tejtis bejn xcuent guideb guejdx, didi nitloj guideb lajdxnu.

⁵¹Niluxh Caifás dini ninii diidxre xcuentceni. Sa'csi ijzga rnibeeni lo rebixhojz, lagajc Dios badeed diidxga guniini. Ni'c gunixgaani guet Jesús xcuent nación xten rexpejn Israel. ⁵²Luxh xhet ganaxtis xcuent nacionga, näjza te guire' guiraa rexpejn Dios nani nare'ch loj guideb guedxliujre. ⁵³Ni'cni dxejliga bachaag rebejnga diidx te don xho gunreni gugu'treni Jesús.

⁵⁴Ni'cni diru Jesús nisij nez loj rexpejn Israel. Biriini región Judea,

huijni te lajt gajxh nez lo reyubijdz, lo te guejdx ni laa Efraín. Ro'c biannäjni rexpejnpacni.

⁵⁵Guxii dxej cayäädx guidzujn lanij ni laa pascw ni rujn rexpejn Israel. Xhidalduxh rebenguejdx huij guedx Jerusalén te gusiareni lastooreni, te gac gunreni lanij xten pascw. ⁵⁶Cansajreni caguuilreni Jesús; che yu'zaren ni en guidoro, canabdiidx lo sa'reni, räjpreni:
—¿Xhi najtu? ¿La siädni lanijre o laa dini jääd, ä?

⁵⁷Refarisee näjza rebixhojz ni rnibee loj rebixhojz, agunibeereni palga yu' chu najn caro yu' Jesús, chaye'tzni lojreni te guiniaazrenini.

Gudäáb te gunaa se't ni' Jesús

(Mt. 26:6-13; Mr. 14:3-9)

12 Che riäädx xho'p dxej gal lanij pascw, huij Jesús guedx Betania cadre rbäjz Larz nani baspansac Jesús loj rebengut. ²Ro'c bejnreni te xchej te gau Jesús. Mart bateed xchejga, näjza Larz sobganäj Jesús näjza rexpejnpacni lo mex. ³Dxejcti bidzunnäj Marii si'cti garol litr se't ni rlianexhduxh si'c nard. Sacduxh se'tga. Dxejcti gudäábni se'tga lo reni' Jesús, baspijdzni ni'ni con xquidxejni. Guideb nen yu'ga gulanejxh se'tga. ⁴Dxejcti räjp Judas Iscariot, xi'n Simón, ni najc te rexpejnpac Jesús, lagajc ni abejn xhigab guto'ni Jesús, räjpni:

⁵—¿Xhicuent di se'tre nido' chon gayuu denar te nidis meelga loj rebenproob? (Chon gayuuga najc si'cti ni xca' te niguii paru gunni dzuun tzubiteb bäii.)

⁶Guniini si'c, xhet sa'csi riadini reprob, per sa'csi laani najcni te

gubaan, luxh laani ca'ni bols cadre rucee meel, luxh rbääni meel lojga te rca'nini. ⁷Ni'cni räjp Jesús lojni:

—Na'c gudxojnlnuni;
subasälxgaanini, che gajd guidzujn dxej nani guiga'tzä. ⁸Dxej-yääl yu' rebenproob lojtu, luxh narä dina chuä lojtu xchej.

Laareni rlanjreni nugu'tzareni Larz

⁹Dxejc che gucbee xhidajl xpejn Israel yu' Jesús rolizj Larz ni gubansac lo rebengut, bidzujnreni, xhet xcuentis Jesús. Biädreni te fiizareni loj Larz nani baspansacni lo rebengut. ¹⁰Dxejcti rebixhojz ni rnibee bachaagzareni diidx te ju'tzareni Larz, ¹¹sa'csi xhidajl rexpejn Israel salilajzreni xtidx Jesús sa'csi bahuiireni gubansac Larz.

Biu' Jesús guedx Jerusalén

(Mt. 21:1-11; Mr. 11:1-11; Lc. 19:28-40)

¹²Che bara yääl, rebejn xhidajl ni bidzujn lanij biejn diajgreni asiäddzujn Jesús guedx Jerusalén, ¹³dxejcti batiu'reni naa reyagzij, biriireni nen guejdx, sachaglojrenini. Guredxa'reni, räjpreni lo Jesús:

—iColguiliä'p xpala'n Dios!
iChicbaa nani siäd xcuent Dad nani najc rei lo rexpejn Israel!

¹⁴Bidxäl Jesús te burbäz, gubijbnini, si'cni caj lo reguijtz:

¹⁵Na'c guidxejbtu, bejn ni rbäz nen guedx Sión.

iColhuii! Reii xtentu asiäd, bijbni dejtz te burbäz.

¹⁶Di rexpejn pacni niacbee recosga che gujcreni, niluxh che gubansacni loj rebengut, dxejc banaj lajzreni

recos nani caj lo guijtz xcuentni, näjza guiraa recos ni bejn rebejn lo Jesús te guozjb rediidxga.

¹⁷Reben xhidajl ni suganäjni che gurejdxni Larz te biriini nen baa che baspansacnini lo rebengut, bijzareni diidx xcuent guiraa ni bahuiireni. ¹⁸Ni'cni biädchagloj reben xhidajlgani, sa'csi abiejn diajgreni laani bejnmi milagwrre. ¹⁹Ni'cni räjp refarisee lo sa'reni:
—Aruhuiitu xhet sajcdi jiennu.
iColhuii! Empac sanajl guideb guedxliujni.

Riädtil regriegw Jesús

²⁰Yu' gaii bengriegw nadxaag lo rebejn ni biädted lanij guedx Jerusalén. ²¹Rebejnre bidzujn loj Felipe nani siäd guedx Betsaida xten Galilee, gusloj gunabreni lojni, räjpreni:

—Dad, rlaaznu guihuiinu lo Jesús.

²²Biäd Felipe, räjpni loj Andrés, dxejcti guiro'preni huiye'tzreni lo Jesús. ²³Dxejcti räjp Jesús lojreni:

—Abidzujn or ni chä'p xpala'n Xi'n Dios ni guj Niguui. ²⁴Rniliä'pac lojtu, palga di te xob binij jiajb lo yuj, nen xhurc cadre cueni, te rianxtebni, guetni, dini guiliejn. Luxh palga guetni, siliejn, rajcza te nistro lojni, rajc xhidajl xob binij. ²⁵Nani sanälajz xcäl nabajnni, sunijtnini, luxh nani rbälaz xcäl nabajnni lo guedxliujre, sica'ni yäl nabajn par tejpas.

²⁶Palga yu' chu tej ni rlanj chu loä, sujjädnajlni xnezyuä, te cadre yu'ä, ro'cza cuäz ni ru' loä. Palga yu' chu gun xtzunä, siliä'pza Xtadä xpala'nni.

Rnixgaa Jesús guetni

²⁷Räjpzani:

—Naj cayac-huin lastoä. ¿Xhichani'cza gäpä lo Xtradä? ¿La siniä: Dad, gucnäj narä te di tedä or ni siääd? Ni te tedäpac orga biälä lo guedxliujre. ²⁸Xtradä, bejn si'cni riäjł gac te guiliä'p bejn xpala'nlu.

Dxejcti xhaguibaali bejn te xse' te ni räjp:

—Agulä'pä xpala'nä, siliä'pä xpala'nä stehuält.

²⁹Ni'cni lo rebejn ni tre' ro'c, ni bejn diajgreni se'ga, yu' reni räjp:

—Lascanu gunii te guzii.

Guyu'zareni räjp:

—Te xangl Dios ni gunii lojni.

³⁰Dxejc räjp Jesús lojreni:

—Et xcuentädi gunii xse' ni gunii, xcuenttis la'tu guniini. ³¹Naj abiääd xcälğuxhtis Dios lo guedxliuj. Naj sibicaj xcälřnibee nani rnibee lo guedxliujre. ³²Naj, che guiliäsreni narä jiaa lo guedxliuj, te galä ro'c, sutie'ä guiraa bejn loä.

³³Rediidxre gunii Jesús te canixgaani xho guetni. ³⁴Räjp rebejn lojni:

—Nuure bejn diajgnu bilřeni lo leii, Crist ni jiääd sibajñ par tejpas. ¿Xho mood rniilu, nanab chäs Xi'n Dios ni gujc Niguii jiaa lo guedxliuj? ¿Chuxhni'c najc Xi'n Dios ni gujc Niguii ni ruzä'tlu?

³⁵Dxejcti räjp Jesús lojreni:

—Stera'tsi yu' bianij lojtu. Colśaj lał ni rajptu bianijga, te di guiniaaz yälxcäjy la'tu, sa'csi ni rsiaj loj nacäjy, dini gan caro chääni. ³⁶Lał ni rajptu bianij, colchalilajz bianijga te gactu rexi'n bianij.

Gunii Jesús rediidxga lojreni, dxejcti biunejzni ro'c, bicuatızlojni.

Xhicuent di rexpejn Israel nililajz xtidx Jesús

³⁷Xhidajł remilagwr bejn Jesús nez loj rexpejn Israel, niluxh direni

nililajz xtiidxni, gulälazreni nani baxhał Dios lojreni. ³⁸Ni'cni guzojz diidx nani gunii Isaías, ni gunii xtidx Dios galoro, räjpni:

Dad, ¿chuni'c huililajz xtiidxlu?

¿Chuloj baluiilu

xcälřnibeduxhlu, ä?

³⁹Ni'cni di niajcdi nililajzreni, sa'csi guniiza Isaías, räjpni:

⁴⁰Abascäjyni lojreni,
abennajdni lastooreni,
te di rebalojreni fii,
te di lastooreni gacbee,
te di gusiejch lajzreni,
te di gusiacäreni.

⁴¹Rediidxre gunii Isaías, sa'csi bahuiini xcälřrdimbicha' Jesús xhaguibaa, dxejc guniini xcuentni.

⁴²Dxejcti gaii rebejn ni rnibee huililajz xtiidxni che räjpni abaxhał Diosni, niluxh bidxejbreni reben farisee, ni'c direni nicäjp ahuililajzreni, te di gurilaagwreni laareni, gudxojnreni jiu'reni nen guidoo. ⁴³Sa'csi rdxaglaızrurenii guiliä'p rebejn xpala'nreni luxh guxiiru rlaızreni guiliä'p Dios xpala'nreni.

Xtidx Jesús sigubee rebejn

⁴⁴Dxejcti gudidxa' Jesús:

—Nani chalilajz xtidxä, et ganaxdi ni caniä rililajzni, näjza xtidx Xtradä nani baxhał narä rililajzni.

⁴⁵Nani ruhuii loä, ruhuiizani loj ni baxhał narä. ⁴⁶Narä biälä si'c bajł lo guedxliujre, te guiraa renani chalilajz xtidxä, dirurenii chu lo yälxcäjy. ⁴⁷Nani riendiajg xtidxä, luxh dini gusoob rediidxga, dina gunä yälğuxhtis lojni, sa'csi dina niälä te gunä yälğuxhtis rebenguedxliuj, biälä te guslää

reben guedxliuj lo dojl. ⁴⁸Nani rbälaz narä, ni di gusoob xtidxä, yu' chu gun yälguختis xtojlni; lagajc rediidx nani guniä gun yälguختis xtojlni che gal lult dxej. ⁴⁹Sa'csi narä dina niädniä lagajc xcuentä, lagajc Dad ni baxhal narä, lagajc laani gunibeeni xhini'c guiniä, xhini'c guluiä. ⁵⁰Luxh nancheä gunibeeni chu yäl'nabajn par tejpas. Ni'cni rediidx nani rniä, rniäreni si'cpacni gunii Xtadäni loä.

Jesús gudiibni ni' rexpejnpacni

13 Che gajd gal dxe lanij ni laa pascw, najn Jesús asiäddzungajx xorni, or ni jiunejzni lo guedxliujre te chääni lo Xtadni. Luxh sa'csi agajc sanälajzni rexpejnpacni nani yu' lo guedxliujre, sinälajznanireni par tejpas.

²Ni'cni laj ni cayauxchejreni biu' bendxab nen lastoo Judas Iscariote, xi'n Simón, te guto'ni Jesús. ³Sa'csi agucbee Jesús abateed Xtadni guira'ti ladzñaani, gucbeezani loj Dios biriini, lo Dios guibi'zani, ⁴ni'c huisu Jesús lo xchejga, gulääni xhablojiaani, gudojbni te tuäii, batejbnini xque'ni. ⁵Dxejcti cua'ni nis nen te chaa, guslojni gudiibni ni' rexpejnpacni, baspijdzni ni'reni con tuäiiga. ⁶Che bidzujn loj Simón Pedr, räjp Pedr lojni:

—Dad, ¿xhixh luj siguiiblu ni'ä?

⁷Dxejc räjp Jesús lojni:

—Nani cayunä dilu gacbeeni naj, guixee-huijdx sacbeeluni.

⁸Räjp Pedr lojni:

—iDipaclu quiib ni'ä!

Räjp Jesús lojni:

—Palga dina quibä ni'lu, digacdiru gaclu xpenä.

⁹Räjp Pedr lojni:

—Dad, na'c quiiblu ni'ätis näjza naä näjza yecä gudiib.

¹⁰Räjp Jesús lojni:

—Nani agojz di guiquiin gagsacni; ni'tisni gudiib, sa'csi naya guidebni; nayazatu, per xhet guiraaditu naya.

¹¹Sa'csi anajnni chu guto'ni, ni'cni guniini: “Xhet guiraaditu naya.”

¹²Ni'cni che gulujx gudiibni ni' rexpejnni, gotsacni xhajbni, guresacni lo mex, räjpni:

—¿La najntu xhini'c benä lojtu, ä?

¹³La'tu rniitu narä, Mastr näjza Dad. Luxh laaca rniitu sa'csi nacäni. ¹⁴Mbaj, palga narä ni nacä Dad, nacäza Mastr, gudibä ni'tu, la'tu sigajcza riäj l quibtu ni' resa'tu. ¹⁵Sa'csi abaluiä lojtu xho gacni, te chanuu guntu sigajc ni benä lojtu. ¹⁶Rniliä, rniliäpac lojtu, di te mos gac benroru lo xlamni; diza te ni rij xmandaad bejn gac benroru loj nani baxhalni. ¹⁷Palga najntu recosre, chicbaazatu palga si'c guntu.

¹⁸Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijzni. Scree najc rediidxga: “Nani rajw xcuxtilä, ni'c agubiréni, agulälazni narä.” ¹⁹Ni'cni agunixgaäni, che gajdni gac, te che gacni chalilajztu nacä chu rniä nacä. ²⁰Rniliä, rniliäpac lojtu, nani riu xtidx nani ruxhalä, riuzani xtidxä; luxh nani riu xtidxä, riuzani xtidx nani baxhal narä.

Räjp Jesús chuni'c guto'ni

(Mt. 26:20-25; Mr. 14:17-21; Lc. 22:21-23)

²¹Che gulujx gunii Jesús rediidxre, guc-huinduxh lastooni, dxejc guniliini:

—Rniliä, rniliäpac lojtu, tejtü suto' narä.

²²Dxejc gusloj cadxeloj rexpejn̄ni lo sa'reni, di jien chuchani'c cagusä'tni. ²³Tej rexpejn̄ni nani sanälajzruni sobga' cuä'ni. ²⁴Dxejcti bejn Simón Pedr seen lojni te guiniabdiidxni loj Jesús chu xcuent caniini. ²⁵Dxejc nani sobga' cuä'ni, gubigruni loj Jesús, gunabdiidxni lojni, räjpni:

—Dad, ¿chuni'c rusä'tlu?

²⁶Dxejcti räjp Jesús lojni:

—Guhuadxä te la' yätxtiil. Loj nani gudedäni, ni'c najcni.

Dxejcti bahuajdxni tla' yätxtiil, badeednini loj Judas Iscariote, xi'n Simón.

²⁷Che gulujx gudajw Judas yätxtiilga, biu' bendxab lastooni.

Dxejcti räjp Jesús lojni:

—Ni rläjzlu gunlu, bejngani.

²⁸Nicla tej reni sobga' lo mex direni niacbee xhicuent räjpni lojni si'c. ²⁹Sa'csi Judas ca' bols meel, gaiireni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj rebeñ ni xhet rajpdi. ³⁰Che gudajw Judas yätxtiilga, birigajcni, luxh abiu' guxhijn.

Didxcoob ni gunibee Jesús

³¹Dxejcti che abirii Judas lojreni, räjp Jesús lojreni:

—Naj sienloj xcäl̄rnibee Xi'n Dios ni gujc Niguui, luxh lojni sienloj xcäl̄rnibee Dios. ³²Palga suluiloj Xi'n Dios ni gujc Niguui xcäl̄rnibee Dios, dxejc suluilojza Dios xcäl̄rnibee Xi'n Dios ni gujc Niguui, luxh siojb gunnini. ³³Rexi'nä nani sanälazä, diru gac xchej chunää la'tu. La'tu siguiiltu narä, per si'cni röpä lo rexpejn̄ Israel si'cza

rniä lojtu naj: Di gacdi jiäädту cadro cha'a. ³⁴Te didxcoob rnibeä guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu. ³⁵Palga rinälajz sa'tu, si'c sacbee guiraa benguedxliuj najcpactu rexpenä.

Xhini'c gun Pedr loj Jesús

(Mt. 26:31-35; Mr. 14:27-31; Lc. 22:31-34)

³⁶Dxejcti räjp Simón Pedr loj

Jesús:

—Dad, ¿caro chäälü?

Räjp Jesús lojni:

—Cadro cha'a digacdi jiädnajlлу narä naj; niluxh sidzujñ dxej jiädлу ro'c.

³⁷Räjp Pedr lojni:

—Dad, ¿xhicuent digacdi jiälä naj? Palga rquiin guetä xcuentlu, suguetä.

³⁸Räjp Jesús lojni:

—¿La guliilu guetlu xcuentä, ä? Rniliäpac lojlu, nicla gajd guidgäi cuedxa' chon̄ huält, säjblu dilu gumbee najrä.

Jesús najc nezyuj lo Dad

14

Dxejcti räjp Jesucrist lojreni:

—Na'c chutu yärsia'. Rililajztu xtidx Dios, colchalilajzza xtidxä. ²Yu' xhidalduxh yu' cadro rbäjz Xtaä. Palga xhet si'cdi najcni, dizana niniä lojtu si'c. Sia'ä chasucheä reyu' par la'tu. ³Luxh palga chasucheä cadro cuääztu, che guluxäni, sibusacä, te chanäätu ro'c, te cadro yu'ä, ro'cza chutu. ⁴La'tu anajntu caro cha'ä, anajnzatu nezyuj ni chäätu.

⁵Dxejcti räjp Tomás loj Jesús:

—Dad, dinu guidon caro chäälü, ¿xho guidonnu nezyujga, ä?

⁶Räjp Jesús lojni:

—Narä nacä nezyuj. Narä nacä didxliipac, nacäza yäl̄nabaj̄n. Por narätis sajč chää bejn̄ cadro rbäjz Xtäädä. ⁷Palga la'tu niembeetu chuni'c nacä, niembeezatu Xtäädä. Luxh najli abiembeepactuni sa'csi acahuiitu lojni.

⁸Räjp Felipe loj Jesús:

—Dad, basaan guihuiinu loj Xtađu; ni'ctis rlaaznu.

⁹Dxejcti räjp Jesús lojni:

—Felipe, ¿la gajdlu gumbee narä, luxh lacti xchej yu'ä lojtu, ä? Nani ruhuii loä, abahuiini lo Xtäädä. ¿Xhicuent rniablu fiilu lo Xtäädä, ä? ¹⁰¿La dilu chalilajz najrä yunää Xtäädä, luxh Xtäädä yunäjzani narä, ä? Rediidx nani rniä dina guiniäni lagajc xcuentä, sa'csi Xtäädä ni yunäj narä laani rujn lagajc rextzuunni. ¹¹Colchalilajz xtidxä, che rniä narä yunää Xtäädä, luxh Xtäädä yunäj narä. O palga ditu chalilajzni sa'csi najcni xtidxä, colchalilajzni sa'csi abahuiitu rextzuun ni runä. ¹²Rniliäpac lojtu, nani chalilajz xtidxä, sajč gunni redzuun nani runä, luxh sujnni dzunroru sa'csi sia'a cadro yu' Xtäädä. ¹³Luxh guiraa ni guiniablu lo Xtäädä xcuentä, narä sunäni, te guluiloä xcäl̄rnibee Xtäädä. ¹⁴Narä sunä xhitis ni guiniabtu por laä.

Ria'n diidx guxhał Jesús Sprit Dxañ

¹⁵Räjpzani:

—Palga sanälajztu narä, susoobtu xtidxä. ¹⁶Dxejc siniabä lo Xtäädä, te guniidxni stee nani gacnäjtu te chunäjni la'tu par tejpas. ¹⁷Nalajznu, Xpřit Dxañ xten Dios, ni rnili. Di gacdi xca' reben

guedxliujni, sa'csi direni fii lojni, niclaza gumbeerenini. Niluxh la'tu numbeetuni sa'csi yunäjni la'tu, yu'ni nen̄ lastootu. ¹⁸Dina gusanbisiäbä la'tu; sibisacä jiadhuiä la'tu. ¹⁹Diru gac xchej, dxejc diru reben̄ guedxliuj fii loä, niluxh la'tu suhuiitu loä. Sa'csi nabanä, la'tu nabajnzatu. ²⁰Nen̄ redxejga, dxejc sacbeetu yunää Xtäädä, la'tu yunäjtu narä, luxh narä yunääza la'tu. ²¹Nani numbee Xtäädä, nani rusoobza xtidxä, ni'c ruluiini sanälajzpacni narä. Luxh Xtäädä sinälajzza nani sanälajz narä, näjza narä chanälazä bejnga, luxh suluiloä lagajc narä lojreni.

²²Dxejcti räjp Judas (xhet Iscariótedi) lojni:

—Dad, ¿xhini'c gunlu te guluilojlu lojtisnu, xhet näjdi loj reben̄ guedxliujdi, ä?

²³Dxejcti räjp Jesús lojni:

—Nani sanälajz narä, ni'c riu xtidxä. Ni'c chanälajz Xtäädä, dxejc jiopläznäänuni guiro'pnu Xtäädä. ²⁴Nani di chanälajz narä, dini jiu xtidxä. Luxh rediidx nani biejn̄ diajgtu, et xtidxadini; xtidx Xtäädäni ni baxhał narä.

²⁵Caniä guiraa rediidxre lojtu lałni yu'ä lojtu, ²⁶per Sprit Dxañ xten Dios nani jiadyañäjtü, nani guxhał Xtäädä xcuentä, laani suluini lojtu guira'ti, näjza susnajni lajztu guiraa rediidx nani aguniä lojtu. ²⁷Yäl̄rbecdxilajz rusa'nä lojtu, xcäl̄rbecdxilazä runidxä lojtu, et si'cdini runiidx guedxliujdi najc nani runidxä lojtu. Na'c chutu yärsia', na'cza guidxejbtu. ²⁸Abiejn̄ diajgtu ni guniä lojtu: Sia'ä luxh siälsacä lojtu. Paru ninälajzpacu

narä, sibalajztu xcuentä che guniä sia'ä lo Xtäädä, sa'csi Xtäädä najc beñroru loä. ²⁹Scree agunixgaäni lojtu, te che soobni, dxejclu chalilajztu xtidxä.

³⁰'Diruna guiniduxhä lojtu, sa'csi asiääd nani rnibee loj guedxliujre, luxh digacdi guinibeeni narä;

³¹riäj] gac recosre te gacbee reben guedxliuj sanälazä Xtäädä, rusobäza xtidx Xtäädä, runä nani guinibeeni. Colchastie, colcho' jiuenejznu ree.

Jesús najc si'c te yaguub

15 Răpzani:
—Narä nacä si'c te yaguub.

Xtäädä najc si'c nani rusuj yajgga.

²Rebejn najc si'c reñaa yajgga.

Guiraa reñaa yajgga nani xhet cajdi lojni rutiuugnini. Luxh guiraa reñaa yajgga ni caj ninejxh lojni, rusianini te xcajru ninejxh lojreni. ³La'tu anajctu beñnaya xcuent rediidx nani aguniä lojtu. ⁴Colguibannäj narä, sigajc ni nabannää la'tu.

Digacdi xcaj ninejxh lo te ñaa yajg palga agurujgni lo yaguub. Sigajcza la'tu, palga guibicajtu loä, di gacdi guntu xtzunä.

⁵Narä nacä si'c yaguub. La'tu najctu si'c reñaa yajgga. Nani riannäj narä, naräza riannääni, ni'c sajcl runduxhni xtzunä, sa'csi che guibicajni loä, xhet sajcdi gunni.

⁶Nani di chupac loä, sibicajni si'c reñaa yajg nani rdin sa'csi xhetru rajdi lojni, dxejcti rbijdzni, rusäl bejnreni lo däj te checni.

⁷Palga chupactu loä, palgaza chupac xtidxä lastootu, colnab nani rlajztistu, luxh narä sunidxäpacni.

⁸Che gunpactu xtzun Dios, dxejcl fi bejn najcpactu xpenä, siliä'p

bejn xpala'n Xtäädä, Dios. ⁹Si'cpacni sanälajz Xtäädä narä, sigajcza sanälazä la'tu. Colchanuu lo xcälrinälazä. ¹⁰Palga jiutu rextidxä, sinuutu lo xcälrinälazä, sigajc ni abasobä xtidx Xtäädä, luxh rinuä lo xcälrinälajz Xtäädä.

¹¹Rniä rediidxre lojtu te guibalaznäjtu narä, te si'c guibalazduxhpactu. ¹²Dee najc diidx ni rnibeä guntu: colchanälajz sa'tu si'cni sanälazä. ¹³Xheti te yäl-sanälajz ni guroobru lo yäl-sanälajzre, gudeed te bejn xcäl'nabajnni, guetni lacuaa resa'ni. ¹⁴La'tu najctu resa'ä palga gusoobtu diidx nani guinibeä guntu. ¹⁵Diruna cuälää “mos” la'tu, sa'csi di remos gan xhi rujn xlamreni. Luxh narä agulälää la'tu “rexamigwä”, sa'csi guira'ti rediidx ni biejn diagä lo Xtäädä aguniäza rediidxga lojtu. ¹⁶Et la'ditu gule narä, narä guleä la'tu. Guleä la'tu te guntu xtzun Xtäädä, te na'cza nitloj dzuunga. Te guira'tiza nani guiniabtu lo Xtäädä por laä, ni'cza guiniidxni lojtu. ¹⁷Dee rnibeä guntu: colchanälajz sa'tu.

Rbälaz rebejn guedxliuj

Jesús näjza rexpejnni

¹⁸Palga cuälaz reben guedxliuj la'tu, anajntu agulälazxgaareni narä. ¹⁹Paru najctu ben guedxliujre, sinälajzreni la'tu. Per ditu gac ben guedxliuj, sa'csi narä guleä la'tu te jiutu xtidx Xtäädä, ni'cni rbälaz reben guedxliuj la'tu. ²⁰Colñaj lajztu diidx nani guniä lojtu, 'di te mos gac beñroru lo xlamni'. Palga basacsíreni narä, susacsízareni la'tu. Palga rusoobreni xtidxä,

susoobzareni xtiidxtu. ²¹Guiraa recosre sunnäjreni la'tu xcentä sa'csi direni gumbee nani baxhal narä.

²²'Paru dina niädniä lojreni direni niujn dojl xten xcälr dxechlajzreni loä, per naj di gacdi guiniireni direni gacbee yu' xtojreni. ²³Nani rbälaz narä, rbälazzani Xtaä. ²⁴Palga dina niunä nez lojreni remilagwrro, sa' nani rutru rajcdi rujn, direni niajp dojlga; sa'csi abahuiireni redzuunga, ni'c agulälazreni narä, näjza Xtaä. ²⁵Bejnreni si'c te guzobj diidx nani cuaj lo guijtaz agujc xchero: "Gulälazreni narä, luxh xhetlidi benä."

²⁶'Che jiaäd nani gacnä j la'tu, laani sini xcentä, chu nacä. Laani najc Sprit ni yu' lo Xtaä, siniini didxlii. Narä suxhaläni lojtu; lo Xtaä guiriini jiaädni lojtu. ²⁷Nä jza la'tu siniitu diidx xcentä, chu nacä, sa'csi guyu'tu loä cheni gusloäli cagusule'ä diidxga.

16 'Rediidxre rnixgä lojtu, te didi yu' xhi gun jiajbtu te gunijttu lo xtidxä. ²Sidzujn dxej sibääreni la'tu dirureni gusaan jiu'tu neñ guidoro. Sidzujn or chutis ju't tejtü, suchaloni cayacnä jni Dios. ³Guiraa recosre sijnreni sa'csi direni gumbeepac Xtaä, niclaza narä. ⁴Agunixgä rediidxre lojtu, te che guidzujn orga sinaj lajztu xcent rediidx ni guiniä lojtu.

Redzuun ni rujn Sprit Dxan xten Dios

'Dina niniä rediidxre lojtu che gusloä cagusule'ä diidx, sa'csi suganää la'tu. ⁵Naj agojl guibi'ä loj

nani baxhal narä, luxh nicla tejtü di guiniabdiidx: "¿Caro chäälü?" ⁶Dxejc sa'csi aguniä recosre lojtu, ni'c cayac-huin lastootu. ⁷Luxh rniliäpac lojtu, hueenru par la'tu cha'ä. Palga dina cha'ä, di gacdi jiaäd lojtu nani racnä j. Niluxh palga cha'ä, suxhaläni lojtu. ⁸Luxh laani, che jiaädni lo guedxliujre, susanijni xcäriejn rebejn te gacbeereni xcent dojl, nä jza xcent xcäl nabannaya Dios, nä jza xcent yälguxhtis xten Dios. ⁹Guluiizani xcent dojl lojreni sa'csi direni chalilajz xtidxä. ¹⁰Guluiini xcäl nabannaya Dios lojreni sa'csi sibusacä lo Xtaä, luxh dirutu fii loä. ¹¹Guluiini xcent yälguxhtis xten Dios lojreni sa'csi abejn Dios yälguxhtis loj bendxab nani rnibee lo guedxliujre.

¹²'Yu' xhidajlru diidx rläzä guiniä lojtu, niluxh digacdi gacbeetureni naj. ¹³Che jiaäd Sprit xten didxlii xten Dios, laani susanijni xcäriejntu te gacbeetu guiraa redidxgulii, sa'csi dini guini diidx xcentcani, siniitisi ganax rediidx nani gudeed Dios lojni te guiniini. Siniizani xcent recos nani churu gac. ¹⁴Laani siliä'pni xpala'nä sa'csi sica'ni xhixtenä, suluiniini lojtu. ¹⁵Guiraa ni rajp Xtaä najc xtenä, ni'cni rniä suluiniini xhixtenä lojtu.

Xcälrac-huin lajztu sibixloj ni yälrbalajz

¹⁶'Sbale'si dxej, dxejc dirutu fii loä; dxejctiru sgaii dxej suhuisactu loä sa'csi narä sia'a lo Xtaä.

¹⁷Dxejcti räjp rexpejn pacni lo sa'reni:

—¿Xhini'c caniini loonu? Sbale'si dxej, dxejc dirutu fii loä, dxejctiru

sgaii dxej suhuisactu loä, näjza: sa'csi sia'a lo Xtaä. ¹⁸Ni'cni cayäjpreni lo sa'reni: ¿Xhi dee rniini, “sbale'si dxej”? Dinu gacbee xhini'c caniini.

¹⁹Gucbee Jesús xhini'c rlanjreni guiniabdiidxreni lojni, dxejcti räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxejc dirutu fii loä; dxejcru sbale'si dxej, suhuisactu loä. ²⁰Rniliäpac lojtu, la'tu soontu, niluxh reben guedxliujre sibalazduxhreni. Sac-huinuxh lastootu niluxh yälrac-huinre sibixhlojni yälrbalajz. ²¹Te gunaa che gaal xi'nni, rdejndi trabajw, dxejcti che aguyu' xi'nni, riäl lajzni gudejndi trabajw, dxejc arbaa lajzni gojl xi'nni te niguii lo guedxliujre. ²²Ni'cni, sigajcza rac-huin lastootu naj, dxejcti che jiädhuisacätu, dxejc sii sibalajztu nen lastootu, luxh rut gacdi gudzucajdi yälrbalajzga.

²³Neñ redxejga xhetiru xhi yälguiniabdiidxdi guntu loä. Rniliäpac lojtu, nani guiniabtu lo xtaä xcuentä, laani suniidxnini lojtu. ²⁴Naj xhet canabditu xcuentä. Colnabni, te xca'tuni, te guibalajztu.

Jesús, nani abejn gaan lo guedxliujre

²⁵Aguniä guiraloj lojtu con cuent ni ruluui, niluxh sidzujñ dxej che diruna guiniä cuent ni ruluui lojtu. Siniä didxguyasi lojtu xcuent Xtaä. ²⁶Neñ redxejga guiniabtu por laä. Luxh dizana guiniä siniabä narä loj Xtaä par la'tu, ²⁷sa'csi lagajcza Xtaä sanälajzni la'tu, sa'csi la'tu sanälajztu narä, luxh ahuililajzatu loj Dios biriä biälä lo guedxliuj.

²⁸Biriä lo Xtaä xhaguibaa, biälä lo guedxliujre, siunezäza lo guedxliujre, sibusacä lo Xtaä xhaguibaa.

²⁹Räjp rexejñpacni lojni:

—Naj sii caniilu guyasi, dini gac si'c redidx-xhiga'tz xten cuent ni ruluui. ³⁰Naj sii gucbeenu racbeelu guira'ti rexhicos, xhetru nanabdi guiniabdiidxrunu lojlu; ni'cni ahuililajznu biriilu lo Dios ni yu' xhaguibaa.

³¹Räjp Jesús lojreni:

—¿La rililajzpacku naj, ä?

³²Asiäddzungajxh teb or luxh ala bidzujñ orga, che guire'chtu, cade tejtü xnez-xnejztu, te gusanxtebtu narä, luxh dina jianxtebä sa'csi Xtaä suganäj narä. ³³Aguniä rediidxre lojtu te cuedxi lastootu lo guedxliujre xcuentä. Lo guedxliujre sidejdpactu trabajw, colgusutijp lastootu sa'csi narä abenä gaan loj guedxliujre.

**Gunab Jesús lo Dios
xcuent rexejñpacni**

17 Che gulujx guniini loj rexejñpacni rediidxga, guläsn lojni xhaguibaa, räjpni lo Dios:

—Xtaä, abidzujñ or; gulä'p xpala'n xi'nlu te guiliä'pza xi'nlu xpala'nlu, ²sigajc ni badeedlu lojni yälrnibee loj guiraa reben guedxliuj, te gac gudeedni yäl nabajñ par tejpas lo guiraa renani badeedlu lojni. ³Redee rajp yäl nabajñ par tejpas; numbeereni luj ni najc tejtis GuebDios, näjza narä Jesucrist nani baxhallo lo guedxliujre.

⁴Narä gulä'pä xpala'nlu lo guedxliujre, abaluxä dzuun nani

baniidxlu gunä ree. ⁵Naj Xtäädä, gulä'p xpala'nä con luj, con bala'n, con yälrdimbicha' ni gopä galooli che gajdli guirixtiej guedxliuj.

⁶Loj rebejn nani baniidxlu loä, ni gulelu lo reben guedxliujre, loj reni'c abasule'ä, abaluiä chu najclu. Xtenpaclu najcreni, baniidxlureni loä, luxh rapdzu'tzreni xtiidxlu.

⁷Naj agucbeereni guiraa rediidx ni guniä lojreni lojpaclu siäädni.

⁸Sa'csi rediidx nani baniidxlu loä, aguniä rediidxga lojreni, luxh ahuililajzreni rediidxga, agucbeepacreni lojlu biriä, ahuililajzreni lujpac baxhal narä.

⁹Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejnlu.

¹⁰Guiralii ni najc xtenä, najczani xtenlu. Guira'tiza ni najc xtenlu najczani xtenä. Agulä'pzareni xpala'nä.

¹¹Narä diruna jia'nä lo guedxliujre, laareni sia'nrureni lo guedxliujre. Luxh narä siälä lojlu. Xtäädä ni najc Dxanro, gucnäj renani baniidxlu loä con xtiidxlu, nani baniidxlu loä te gunreni tejsi xhigab sigajcni riennu nuru tejsi xhigab. ¹²Che guyunääreni lo guedxliujre, gucnää con xtiidxlu guiraa renani baniidxlu loä, luxh nicla tejreni di ninitloj, xtebtis nani gunijt te gusojb ni caj lo xtidx Dios.

¹³Luxh naj sibusacä lojlu. Caniä rediidxre la_l ni yu'a lo guedxliujre, sa'csi rlazä guibaa lajzreni si'c ni rbaa lazä. ¹⁴Abasule'ä xtiidxlu lojreni, luxh rebejn guedxliuj rdxe'chreni lojreni sa'csi direni gac bejn guedxliujre sigajc ni dizana

gacä bejn guedxliujre. ¹⁵Dina guiniabä cuäälureni lo guedxliujre, rniabä gudzucajlureni loj bendxab.

¹⁶Direni gac bejn guedxliuj, sigajc ni dizana gacä narä bejn guedxliuj.

¹⁷Basyareni con xtiidxlu, sa'csi xtiidxlu najc didxguliipac. ¹⁸Sigajc ni baxhallu narä lo guedxliujre,

sigajcza ruxhaläreni te chääreni guideb guedxliuj. ¹⁹Xcuentreni rudedä lagajc narä, te näj laareni gacnayareni con xtidxguliipaclu.

²⁰Dina guiniabä xcuent laatisreni, rniabäza xcuent guiraa renani

churu chalilajz xtidxä ni gusule'reni. ²¹Rlazä gun guiraareni tejsi xhigab, sigajc ni rujnlu, Xtäädä, si'c runäza; te sigajc ni yu'äza con luj, sigajcza chureni con nuurnu, te gacbee reben guedxliuj luj baxhallu narä.

²²Yälrnibee ni baniidxlu loä, lagajc yälrnibeega badedä lojreni te gunreni tejsi xhigab, si'cni riennu tejsi xhigab. ²³Narä cayunnääreni dzuun, luj cayunnäjlu narä dzuun,

te jiennu tejsi dzuun, te gacbee rebejn guedxliuj luj baxhallu narä, luxh sanälajzlureni si'cni sanälajzzalu narä.

²⁴Xtäädä, guiraa renani baniidxlu loä, rlazäza chureni cadro chuä xhaguibaa, te fiireni xcälrnibeä nani baniidxlu, sa'csi huinälajzlu narä galooli che gajdli guirixtiej guedxliujre. ²⁵Xtäädä ni rujn cossa'ctis, di rebejn guedxliuj gumbeelu, luxh narä numbeälu, luxh redee agucbeezareni luj baxhallu narä. ²⁶Aräpä lojreni chu najclu; säpäzaru lojreni te chu yäl'sanälajz sa' ni rajplu par narä nen lastooreni, te cuäzäza nen lastooreni.

Xho gunaazreni Jesús*(Mt. 26:47-56; Mr. 14:43-50; Lc. 22:47-53)*

18 Che gulujx gunii Jesús rediidxga, huinäni rexejnpacni dejtz gueu Cedrón. Ro'c yu' xhiroob yuj cadro sojb guiraloj reyajg. Ro'c biu' Jesús näjza rexejnpacni. ²Anajn Judas, nani guto' Jesús, caro rij Jesús con rexejnpacni sa'csi si'csi-si'c rdxaag sa'reni ro'c. ³Dxejcti Judas, che biääd lojni te cuaa soldad roman, näj rebixhojz ni rnibee, näjza referisee, huinätinireni ro'c, ca'reni balguejd näjza lintern, näjza spaad näjza lans. ⁴Ni'cni Jesús, sa'csi ananxgaani xhini'c sacni, gubigni lojreni, räjpni lojreni:

—¿Chu rguuiltu?

⁵Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.

Näjza Judas ni bato'ni suganäjnireni. ⁶Che gunii Jesús lojreni: “Laa naräni”, biäxhanreni, biajbreni lo yuj. ⁷Dxejcti gunabdidxsac Jesús lojreni:

—¿Chu rguuiltu?

Dxejc räjpzarenı stehuält:

—Jesús nani siääd guedx Nazare't.

⁸Räjp Jesús lojreni:

—Aguniä lojtu, laa naräni. Palga narä rguuiltu, colgusaan jii redee.

⁹Guniini rediidxga te gusojb rediidx nani guniini che räjpni: “Loj guiraa ni baniidxlu, nicla tejni di ninijt.” ¹⁰Dxejcti Simón Pedr, sa'csi ca'ni te spaad, guläänini, batiuugni diag ladbee xten xmos bixhojzroga. Laj mosga najc Malco. ¹¹Dxejcti räjp Jesús lo Pedr:

—Guluchee spaad xtenlu nen xpaguinni. ¿La dina tedä trabajwduxh nani agunibee Xtaädä tedä, ä?

Jesús nez loj bixhojzro*(Mt. 26:57-58; Mr. 14:53-54; Lc. 22:54)*

¹²Dxejcti resoldaadga näjza comandant, näjza reguxhtis ni rnibee rexejnp Israel, gunaazreni Jesús baliibrenini. ¹³Dxejcti ganid huinärenini lo Anás, sa'csi najcni xtadsuegr Caifás, luxh ijzga biäjł najc Caifás bixhojzro ni rnibee lo rebixhojz. ¹⁴Caifás najc nani balijdx rexejnp Israel nanab guet te niguii xcuent rebenguejdxga.

Cadro gunii Pedr dini gumbee Jesús*(Mt. 26:69-70; Mr. 14:66-68; Lc. 22:55-57)*

¹⁵Simón Pedr näjza stee xpejnpacni huinajł dejtz Jesús. Luxh numbee bixhojzro bejnga, biunäjzani Jesús lo xle' bixhojzro. ¹⁶Bia'nti Pedr rolä'ga. Dxejc birii xpejnpac Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga. ¹⁷Dxejcti räjp mos gunaa ni rcanäj rolä', räjpni lo Pedr:

—¿La et näjdi luj najclu te xpejnpac Jesús, ä?

Räjp Pedr loj gunaaga:

—iXho gacäni!

¹⁸Dxejcti sa'csi cayacnalduxh, caguse'creni boo te cagucha'lajzreni. Näjza Pedr suganäjreni, cagucha'lajzni ro guibooga.

Bixhojzro cayujn yälgunabdiidx lo Jesús*(Mt. 26:59-66; Mr. 14:55-64; Lc. 22:66-71)*

¹⁹Dxejcti gusloj cayujn bixhojzro yälgunabdiidx lo Jesús xcuent

chuni'c najc rexpejn pacni näjza
xcuent xhini'c ruluini.

²⁰Dxejcti räjp Jesús lojni:

—Narä xhet xhiga'tzdi guniä
rextidxä, guniäni lo guiraa
rebejn guedxliuj. Basule'a
diidx neñ rexquidobäztu näjza
neñ guidoro cadro re' guiraa
rexpejn Israel, nicla tej diidx dina
ninixhiga'tzädi. ²¹¿Xhicuent cayujnlu
yälgunabdiidxga loä? Gunabdiidx loj
renani bejn diajg xhini'c guniä lojreni.
Laareni najnreni xhini'c guniä.

²²Che gulujx gunii Jesús
rediidxre, te rexpejn bixhojzroga
huääz loj Jesús, räjpni lojni:

—¿La si'c rudzu' bejn diidx loj
bixhojzro, ä?

²³Dxejcti räjp Jesús lojni:

—Palga xhet laadi guniä, baluii
narä xhi diidxga najc xhet laadi,
niluxh palga laaca najc ni guniä,
¿xhicuent huääzlu loä?

²⁴Dxejcti guideb naliibni baxhaļ
Anásni lo bixhojzro lo ni laa Caifás.

Gunisac Pedr dini gumbee Jesús

(Mt. 26:71-75; Mr. 14:69-72; Lc. 22:58-62)

²⁵Sugasijc Pedr ro' guiboo,
cagucha'lajzni, che räjpreni lojni:

—¿La et näjdi luj najclu te
xpejnpac niguiiga, ä?

Badzu'ni diidxga räjpni:

—iXho gacäni!

²⁶Dxejcti te xmos bixhojzroga,
sa'csi sa'ni najc mos ni batiu' Pedr
diajgni, räjpni lojni:

—¿La et lujdi ni bahuiä neñ huert
con laani, ä?

²⁷Dxejcti räjp Pedr stehuält:

—Nicla gumbeäni.

Cuantis guniini si'c, guredxagajc
te guidgail.

Jesús nez loj Pila't

(Mt. 27:1-2, 11-14; Mr. 15:1-5; Lc. 23:1-5)

²⁸Dxejc birinäjreni Jesús
rolijz Caifás, huinärenini rolizj
gubernadoor cadro laaza Pretorio,
niluxh direni niu' ro'c sa'csi
ameer guiliejn gubijdx, te di
gacdxuudxreni dxejc di gacdi
gaureni lani pascw. ²⁹Ni'cni birii
Pila't lojreni räjpni lojreni:

—¿Xhi yälquij xten niguiire
siädle'ctu loä?

³⁰Dxejcti räjpreni lojni:

—Paru di niguiire niajc te beñ
latsiaj, dinu niopnäni ladzṇaa
guejblu.

³¹Räjp Pila't lojreni:

—Colchanäni, colhuii xho
gunnäjtuni yälguxhtis con lagajc
xleiitu.

Dxejc räjp rexpejn Israel lojni:

—Di xleiitu gusaan ju'tnu te bejn.

³²Guniireni si'c te guzobj diidx
nani gunii Jesús xcuent xho guetni.

³³Ni'cni biusac Pila't neñ Pretorio,
gurejdxni Jesús räjpni lojni:

—¿La luj najclu reii xten rexpejn
Israel, ä?

³⁴Dxejcti räjp Jesús lojni:

—¿La lagajc luj rniilu si'c, ä? O
¿laa yu' chureni'c naj lojlu si'c?

³⁵Dxejcti räjp Pila't lojni:

—¿Xhixh näj narä nacä te xpejn
Israel? Lagajc rebeñ lajdxlu näjza
rebixhojz bateedlu ladzṇaa. ¿Xhi
bejnlu?

³⁶Dxejcti räjp Jesús lojni:

—Xcälrnibeä dini gac yälrnibee
sa' ni yu' guedxliujre. Paru najc
xcälrnibeä te yälrnibee sa' ni yu'
guedxliujre, ala cagucuaa rexpeñä
te di tedä ladzṇaa rexpejn nani

rnibee Israel. Naj di xcälrnibea gac yälrnibee sa' ni yu' lo guedxliujre.

³⁷Ni'cni räjp Pila't lojni:

—¿Reii najclu, ä?

Räjp Jesús lojni:

—Laaca najlu nacä reii. Par ni'cpac golä, par ni'cpacza biälä lo guedxliujre, partis gusule'ä didxliipac. Guiraa renani najn didxlii, reni'c rucuadijgreni xtidxä.

³⁸Räjp Pila't lojni:

—¿Xhini'c najc didxlii?

Che guniini si'c gunisacni loj rexpejn Israel:

—Dina guidxälä nicla tej xtojł bejnre. ³⁹Niluxh la'tu rajptu te costumbr, casob lani pascw, ruslaanu te bejn ni yu' nen latzguiib. ¿Xhi najtu? ¿La rłajztu guslaä ni najc reii xten rexpejn Israel, ä?

⁴⁰Dxejcti guiragajcreni guredxa', räjpreni:

—iNa'c guslaalu niguiiga! iBasłaa Barrabás!

Niluxh Barrabás najc te gubaan.

19 Ni'cni gunibee Pila't gudijnreni Jesús con duu ni yu' guechguiib lojni. ²Bejn resoladaad te coronguejch, bazałrenini yejc Jesús. Dxejcti bahuajcwrenini te ladmoraad. ³Dxejcti gusloj gubigreni lojni, te räjpreni lojni:

—iGubajn par tejpas Reii xten rexpejn Israel!

Dxejc huääzreni lojni.

⁴Dxejcti birisac Pila't, räjpni lojreni:

—iColhuii! Acabääni nez lojtu, te gacbeetu dina guidxäl nicla tej xtojłni.

⁵Dxejcti birii Jesús nez lojreni, yu' coronguejch yejcnı, najcwzani

ladmoraadga. Dxejcti räjp Pila't lojreni:

—iColhuii! iAree niguiire!

⁶Ni'cni, che bahuii rebixhojzro najza rexquixhajgreni lojni, guredxa'reni, räjpreni:

—iColgucuaani lo crujz!

iColgucuaani lo crujz!

Räjp Pila't lojreni:

—Lagajc la'tu colchanäni te gucuaatuni lo crujz. Per narä dina guidxälä nicla tej xtojłni.

⁷Dxejcti räjp rexpejn Israel lo Pila't:

—Nuurnu rajpnu te leii, luxh xcuent leiiga, nanab guetni sa'csi najni najcni Xi'n Dios.

⁸Che biejn diajg Pila't rediidxga, bidxejbruni, ⁹bıusacni nen Pretorio, räjpni loj Jesús:

—¿Caro siäädlu?

Per xhet räjpdi Jesús lojni.

¹⁰Dxejcti räjp Pila't lojni:

—¿La dilu guinii loä? ¿La dilu gan narä rapä yälrnibee te gucuaälu lo crujz, rapäza yälrnibee te guslaälu, ä?

¹¹Räjp Jesús lojni:

—Xhetliidi yälrnibee ni ajplu loä paru dilu nica'ni xhaguibaali. Ni'cni bejn nani bato' narä lojlu rapduxhruni dojł loj ni rajplu.

¹²Ni'cni gudiil Pila't xho nuslaani Jesús, niluxh rexpejn Israel rbedxaduxhrureni, räjpreni:

—Palga luj guslaaluni, dilu gac xamiıgw reii César, sa'csi chutis ni rnii najcni reii, najcni xcontraar César.

¹³Che biejn diajg Pila't rediidxre, gulääni Jesús, dxejcti gurej Pila't lo yagxhiil cadro rujnni yälğuxhtis, cadro laa Litóstroros con didx-

griegw sälojni naga' guisa'c, con didx-hebreo laani Gabata. ¹⁴Najcni dxej vispr lani pascw, si'cti läidxej, dxejcti räjpni loj rexpejn Israel:

—Colhuiu, aree xreitu.

¹⁵Ni'cni guredxa'reni räjpreni: —iSuguetni! iSuguetni! iBacuaani lo crujz!

Dxejcti räjp Pila't lojreni:

—¿La sucuaá xreitu lo crujz, ä?

Dxejcti räjp rebixhojz ni rnibee lojni:

—Rutru reiidi rajpnu, Césartis najc xreiuu.

¹⁶Ni'cni bateed Pila't Jesús lojreni te chacuaarenini lo crujz.

Che bacuaarenini lo crujz

(Mt. 27:32-44; Mr. 15:21-32; Lc. 23:26-43)

¹⁷Dxejcti cua'reni Jesús, biriini ro'c guideb nuuni xcrujzni, cheni bidzujnlireni te lajt ni laa lajt xten Calabeer, con didx hebreo laani Gólgota. ¹⁸Ro'c bacuaarenini lo crujz. Bacuaazareni tio'p niguii lo stio'p crujz, teygani te laad cuä' Jesús. ¹⁹Dxejc bacuaa Pila't diidx ni chää yejc xcrujzni; rediidxga najc scree: “Jesús, beñ Nazare't, Reii xten rexpejn Israel.” ²⁰Xhidajl bejn bil diidx ni caj yejc xcrujzni, sa'csi lajt cadre bacuaarenini lo crujz najc gajxh ro' guejdxga, luxh didx hebreo, diidx griegw, näjza didx latin bacuaareni rediidxga. ²¹Dxejcti räjp rebixhojzro xten rexpejn Israel loj Pila't:

—Na'c nucuaalu: “Reii xten rexpejn Israelni”, laacaru nacuaalu: “Laani najni, najcni reii xten rexpejn Israel”.

²²Dxejcti räjp Pila't lojreni:

—Nani abacuaá, abacuaá. Si'c jia'nni.

²³Dxejcti resoldaad, che gulujx bacuaareni Jesús lo crujz, cua'reni rexhablojiaani bejnrenini tajp la', te cade tejreni cua'reni te la'ni. Luxh yu' stee xhajnbi ni laa tunica, nadijbn, guejnna hasta lo yuj guccheeni. ²⁴Ni'cni räjpreni lo sa'reni: —Na'c guitiäjnuni; do'o guidzujtnu te daad lojni, te don chu xten gacni.

Si'c bejnreni te gusojb xtiidx Dios cadre caj scree: “Batiäjsreni xhablojiaä; yejca xhabä ni bia'n gudzujtreni daad.”

Ni'cni bejn resoldaad recosre. ²⁵Niluxh cuä' xcrujz Jesús suga' xnanni, con bäjl xnanni, ni laa Marii chää Cleofas, näjza Marii Magdalen. ²⁶Che bahuii Jesús loj xnanni, dxejc bahuiizani loj xpejn pacni nani sanälazduxhni, räjp Jesús loj xnanni: —Nan, ibahuii, aro'c xi'nlu!

²⁷Dxejcti räjp Jesús loj xpejn pacni nani sanälazduxhni:

—iBahuii, aro'c xnanlu!

Ni'cni dxejcli sinä nani najc xpejn pacni xnan Jesús rolizj pacni.

Xho gujt Jesús

(Mt. 27:45-56; Mr. 15:33-41; Lc. 23:44-49)

²⁸Ni'cni, sa'csi najn Jesús alagujc guiraa recos ni nanab gac te soob rextidx Dios, räjpni:

—Cayolä nis.

²⁹Ro'c suga' te guejs vinagr, nenga bahuajdxreni te esponj dxejc bacuaarenini lo te yajg ni laa hisopo, guläsreni esponjga batzugrenini ro'ni. ³⁰Che gulujx gu' Jesús vinagrga, räjpni:

—Agulujxni.

Dxejcti basajb yejcn, baslaani xaimni.

Xhi bejn te soldaad lo Jesús

³¹Dxejga najc dxe vispr xte lani pascw, che ru' mandaad par laniġa. Rexepejn Israel di rlaġzreni nia'n rebejnġa lo recruġz, sa'csi dxe sabdga najc dxej ni rusilajzreni. Ni'cni gunabreni lo Pila't guxhaġni chu qui'ch ni'reni te guetreni, te jġajtreni loġ recruġz. ³²Dxejcti bidzujn resoldaad, gudi'chreni guiro'p ni' nani caj te laad, sigajcza bennajreni stee ni caj ste laadga. ³³Che gubigreni lo Jesús, bahuiireni alagujtni, direni nigui'ch ni'ni. ³⁴Tej soldaadga baqui'tzni te lans ro' xcustiini, dxejc bixe' rejn najza nis. ³⁵Lagajc narä Juan bahuiä recosga, ni'cni caniä rediidxre, luxh diidxga guliipacni. Lagajc narä nanä didxguliipac caniä, te chaliiza lajztu xcuentni. ³⁶Sa'csi si'c gujc guira'ti, te guzojb xtidx Dios cadro caj: "Nicla tej xtzujtni di guech." ³⁷Sigajcza lo stee guijtz caj diidxre: "Sidxelojreni loġ nani biguijtz te lans."

Huicua'tzreni Jesús

(Mt. 27:57-61; Mr. 15:42-47; Lc. 23:50-56)

³⁸Che gulujx recosga, dxejcti huij José, te ben Arimatea, naxhiga'tzni te xpejn Jesús, sa'csi rdxejbni rexepejn Israel, ni'c huijni loġ Pila't, gunabni loġ Pila't te laani guiliättni Jesús lo cruġz. Cuajbza Pila't, dxejc biäd José gulättni Jesús, sanätini togoolga. ³⁹Najza Nicodem biäd dxejc, nani galoo huininäj Jesús te guxhijn. Biädnäni si'cti tiuu kil te dänejxh ni najc si'c yaal ni laa mirra najza äloes. ⁴⁰Dxejcti cua'reni Jesús batejbrenini te la' lad

lino, basälzaren i däjga ni laa mirra con äloes, sa'csi si'c najc xcostumbr rexepejn Israel che rucua'tzreni te togool. ⁴¹Gajxh cadro cuaj Jesús lo cruġz, yu' te huert, nen huertga yu' te bacoob si'c te biliää, cadro nicla tej bejn gajd guiga'tz. ⁴²Sa'csi abidzujn dxej vispr lani pascw xten rexepejn Israel, luxh gajxh suga' biliääga, nenga gudixhreni Jesús; si'c biga'tztini.

Gubansac Jesús loġ rebengut

(Mt. 28:1-10; Mr. 16:1-8; Lc. 24:1-12)

20 Primer dxej xten xmaanga, cäjyru, gajd lo guedxliuj jianij che huij Marii Magdalen lo baaga. Che bidzujnni ro' baaga, bahuiini agubicaj guij ni suga' ro' baaga. ²Dxejcti ruxunni gubi'ni te huiye'tzni lo Simón Pedr najza lo stee xpejn pac Jesús ni sanälazduxhni, räjpni loġreni: —Ahuilääreni Dad nen baa, luxh dinu guidon caro sanärenini.

³Dxejc biriguxun Pedr najza stee bejnġa, huijreni nez lo baa. ⁴Ruxun guiro'preni. Niluxh stee bejnġa ruxunduxhruni loġ Pedr. Laani ganid bidzujnni lo baaga. ⁵Dxejcti guretänni te bahuiini nen ba-biliääga. Bahuiini te laad naga' relajdtis nani bidejb Jesús, luxh dini niu' nen baaga. ⁶Dxejc bidzungajc Pedr, biugajcni nen baaga, bahuiini naga' relajdga te laad. ⁷Bahuiizani lajd ni guyu' yejcti, ni'c nie'tni saru, naga'ni te laad. ⁸Dxejcti biu' stee bejnġa nani bidzujn ganid. Che bahuiini nen baaga, huililajzni gubansac Jesús. ⁹Sa'csi gajdreni gacbee ni caj lo reguijtz, cadro caj nanab guibansacni loġ

rebengut. ¹⁰Dxejc gubisac guiro'p rexpejnpacni rolizjreni.

Baluiloj Jesús loj Marii Magdalen

(Mr. 16:9-11)

¹¹Laltis suga' Marii cuä' baaga, cayoonni. Ni'cni laḷ ni cayoonni, basajb lojni te bahuiini nen̄ baaga. ¹²Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadro gojt yejc Jesús, steeni nez cadro gojt ni'ni.

¹³Dxejcti räjpreni lojni:

—Nane', ¿xhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nrenini.

¹⁴Che gulujx guniini si'c, gubiréni, dxejc bahuiini loj Jesús suga' ro'c, niluxh dini niembee Jesús. ¹⁵Dxejc räjp Jesús lojni:

—Nane', ¿xhicuent roonlu? ¿Chu rguuillu?

Marii bejn xhigab laa dade' ni rcanäj huertga, ni'c räjpni lojni:

—Dad, palga luj sanäluni, gunii caro gudixhluni te guiliäsáni te chanääni.

¹⁶Dxejcti räjp Jesús lojni:

—iMarii!

Dxejc gubiré Marii, räjpni nen̄ xtidx hebreo:

—iRaboni!

(Säloj diidxga “Mastr”.)

¹⁷Dxejcti räjp Jesús lojni:

—Na'c guiniaazlu narä sa'csi gadna cha'a lo Xtadä xhaguibaa. Huij loj rebetzä, huiye'tz lojreni, cha'a lo Xtadä, näjza Xtadtu, loj Xtiozä näjza Xtiooztu.

¹⁸Dxejcti huij Marii Magdalen, bidzujnni loj rexpejnpacni badeedni didxcoob, räjpni:

—Abahuiä lo Dad Jesús.

Räjpzani lojreni guiraa recos ni gunii Jesús lojni.

Baluiloj Jesús loj rexpejnpacni

(Mt. 28:16-20; Mr. 16:14-18; Lc. 24:36-49)

¹⁹Che gojl gudxej, najcni dumingw, primer dxej xten xmaan, abiäudzu'tz ro lä' ro' yu' cadro tre' rexpejnpacni, sa'csi rdxejbreni rexpejn Israel. Chela bidzujn Jesús, guzujni nez galäiireni, räjpni lojreni:

—Suchu yälrbedxi lastootu.

²⁰Che guniini si'c, baluigajcni reñaani lojreni näjza cuä' xcustiini. Ni'cni bibaduxhlajz rexpejnpacni che bahuiireni lo Dad Jesús.

²¹Dxejc räjp Jesús lojreni stehuält:

—Suchu yälrbedxi lastootu. Si'c ni baxhaḷ Xtadä narä, si'cza ruxhaḷä la'tu.

²²Che gulujx guniini rediidxga, balejbni yejcreni, räjpni, lojreni:

—Suguibajn Sprit Dxan xten Dios nen̄ lastootu. ²³Rextojl rebejn

nani siällajztu, sibicajreni. Rextojl rebejn nani ditu jiällajz, siannäjreni redojlga.

Tomás bahuii lo Jesús ni gubansac

²⁴Tomás, ni laaza Didimo, najcni te retzubitio'p xpejnpac Jesús. Rutini che biääd Jesús loj rexpejnpacni. ²⁵Dxejcti räjp rexpejnpacni lojni:

—Abihuiinu loj Jesús, agubansacni loj rebengut.

Dxejcti laani räjpni lojreni:

—Palga dina fiä loj reñaani cadro caj seen xten reclaab, palga dina guqui'tzä bicuenaä cadro guyu' claabga, guqui'tzäza naa

cadro bixal cuä'ni, di lazä chalii gubansacni loj rebengut.

²⁶Che gudejd xhujn dxej, tresac rexejnpacni nen yu', nadxaagza Tomás lojreni. Niäudzu'tz yu'ga, luxh chela gucbeereni abidzujn Jesús, guzujni galäiireni, räjpni lojreni:

—Suchu yälrbedxi lastootu.

²⁷Dxejcti räjpni loj Tomás:

—Baqi'tz bicuenaalu ree loj patnaä, basälza naalu cuä'äre, na'c ractio'p lajzlu, huililajzpac gubansacä loj rebengut.

²⁸Dxejcti räjp Tomás lojni:

—iXtadä, Xtioozä!

²⁹Dxejcti räjp Jesús lojni:

—Sa'csi abahuiilu loä, Tomás, huililajzlu. Chicbaa renani mase direni fii, rililajzreni xtidxä.

Xhicuent bacuaani reguijtzre

³⁰Xhidalroduxhru dzuun bejn Jesús nez loj rexejnpacni, nani di nicaj lo guijtz. ³¹Redzuunre nani bejn Jesús nani cuaj lo guijtzre cuajni te chalilajztu diidxre: Jesús najc Crist, nani cabäz rebejn jääd, Xi'n Dios. Luxh che chalilajz te bejn xtiidxni, sajpnä yäl nabajn par tejpas.

Jesús baluilojni lo gajdz xpejnpacni

21 Dxejcti baluiloj Jesús loj rexejnpacni ro' nisdoo ni laa Tiberias. Scree baluilojni lojreni.

²Nadxaag sa' rebejnre: Simón Pedr, Tomás ni laaza Didimo, näjza Natanael, nani siäd Canä xten Galilee, rexi'n Zebedeo, näjza stio'p rexejnpacni. ³Dxejcti räjp Simón Pedr loj resa'ni:

—Chanazä bäjl.

Räjpreni lojni:

—Näjza nuure chonnu.

Dxejcti sääreni, huä'preni nen te barcw. Guideb guxhijnga xhet bäjl di gunaazreni. ⁴Che acayanij loj guedxliuj, suga' Jesús ro' nisdoo, di rexejnpacni niembeeni. ⁵Ni'cni räjp Jesús lojreni:

—Rexi'nä, äla xhet bäjl di rajptu, ä?

Räjpreni lojni:

—Xhet rajpdinu.

⁶Dxejcti räjpni lojreni:

—Colgusäl xquijxhtu ladbee xten barcwga, te ro'c siniaaztuni.

Dxejcti bacuaareni guijxhga ladbee xten barcwga, dxejcti ameer diniajcdi nibääreni guijxhga ro'c sa'csi gudxadotzu'tzni bäjl. ⁷Dxejcti bejn nani sanälazduxh Jesús, räjp loj Pedr:

—Laa Dad Jesús.

Che biejn diajg Simón Pedr laa Dad Jesús, gotgajcni xhablojiaani sa'csi ladxhagjiättis najcwni sa'csi canaazni bäjl, dxejcti gutiäjsni lo nisdoo. ⁸Sgäi rexejnpacni biädnäreni rebarcwga sa'csi ameer guidzujnreni ro' nisdoo, si'cti tegayuu metrtis cayääd. Siädnäzarenä guijxh guidxa rebäjl. ⁹Che bidzujnreni ro' nisdoo, bahuiireni re' guiboo, ro'c dzuub te bäjl näjza yätxtiil cague!. ¹⁰Dxejcti räjp Jesús lojreni:

—Coltanä gaii bäjl nani entis gunaaztu.

¹¹Dxejcti huij Simón Pedr, gulääni guijxhga, guidxani bälro. Guyu' si'cti te gayuu garol con chon bäjl nen guijxhga, niluxh dini niräsyä' mase guyu' xhidalduxh bäjl nenni.

¹²Dxejcti räjp Jesús lojreni:

—Coltaa te gauxharejntu.

Nicla tej rexpejn̄pacni dini niabdiidx lojni: “¿Chu luj?” sa'csi anajnreni laa Jesúsni. ¹³Dxejcti cua' Jesús yätxtiil, badeedni lojreni, sigajcza rebäjł.

¹⁴Dee najc ni riojn̄ huält baluilojni loj rexpejn̄pacni, che gubansacni loj rebengut.

Jesús rninäj Simón Pedr

¹⁵Che gulujx gudajwreni, räj̄p Jesús loj Simón Pedr:

—Simón xi'n Jonás, ¿la sanälajzrulu narä loj chu stee, ä?

Räj̄pni lojni:

—O'n, Dad, luj najnlu sanälazä luj.

Räj̄p Jesús lojni:

—Gojp rexilä'ä.

¹⁶Räpsacni lojni ni rojp huält:

—Simón, xi'n Jonás, ¿la sanälajzlu narä, ä?

Räj̄pni lojni:

—O'n, Dad. Luj najnlu sanälazä luj.

Räj̄pni lojni:

—Gojp rexilä.

¹⁷Räpsacni lojni ni riojn̄ huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús lojni choñ huält: “¿La sanälajzlu narä?” Dxejcti räj̄p Simón lojni:

—Dad, luj najnlu guira'ti. Luj najnlu sanälazä luj.

Räj̄p Jesús lojni:

—Gojp rexilä. ¹⁸Rniliápac lojlu, che gujclu bi'nru, lagajc luj rajcwlu

xhajblu, rijlu cadrotis rlajzlu. Che anajclu bengool, susgaatislu naalu te gushuajcw ste'ca bejn̄ xhajblu, te chanäreni luj cadro di rlajzlu.

¹⁹Luxh diidxga gunii Jesús te cagusule'ni xho gugu'treni Pedr te guiliä'pni xpala'n Dios. Che gulujx guniini si'c, räj̄pni loj Pedr:

—Gudanajł narä.

²⁰Che gubiré Pedr, bahuiini loj stee xpejn̄ni, nani sanälajzru Jesús, siädnajłni dejtzeni. Lagajc bejn̄re ni gurej cuä' Jesús lo lult xchej, ni räj̄pza loj Jesús: “Dad, ¿chuni'c najc nani guto'lu?” ²¹Ni'cni, che bahuii Pedr lojni, räj̄pni loj Jesús:

—Dad, deea', ¿xhi gun dee?

²²Dxejcti räj̄p Jesús lojni:

—Palga rlazä jia'nni che guibisacäli loj guedxliujre, ¿xhixh najcni? Basaanni. Luj gudanajł narä.

²³Ni'cni bire'ch diidx lagajc loj resa'ni, di bejn̄ga guet. Di Jesús niäjb lojni dini guet, alga räj̄pni: “palga rlazä jia'nni loj guedxliujre che guibisacäli lo guedxliujre, ¿xhixh najcni?”

²⁴Luxh bejn̄ga najc narä, xpejn̄ Jesús nani bahuiioj guiraa recosre, nani bacuaazareni. Anadonnu didxliipac najc recos nani rniini.

²⁵Yu'ru xhidalduxh dzuun ni bejn̄ Jesús. Palga gucuaanu guirali redzuun ni bejn̄ Jesús, nicla lo guedxliujre di gal̄ chu reguijtz cadro xcajni.

Redzuun Rexpejn Dios

**Siäd Sprit D_{xan} xten Dios
te cuääzni nen lastootu**

1 Xamigwä Teófilo, abacuaä lojlu xcuent guiraa recos nani bejn Jesucrist näjza nani baluui Jesucrist, che guslojlini, ²hasta dxejli ni huäjsni xhaguibaa. Gunibexgaani xhini'c gun renani guleni gac xpejnpacni. Sprit D_{xan} xten Dios baluui Jesucrist xhi guiniini lojreni. ³Gudejd Jesucrist trabajwduxh, dxejcti gujtni. Dxejc gubansacni lo rebengut, baluiloj_{ni} lo rexpejnpacni. Tiuu dxej baluiloj_{ni} loj rexpejnpacni balti huält te gacbeereni agubansacni. Guniizani lojreni xcuent xcälrnibee Dios.

⁴Che gudejd tiuu dxejga, batoj_p Jesucrist rexpejnpacni, gunibeeni na'c guiriireni guedx Jerusalén, cuääzreni jiaäd Sprit D_{xan} xten Dios nani aguniipac Dios jiaäd. Räj_pni: —Dee abiejn diajgtu guniá lojtu.

⁵Juan batiobnis con nis, luxh naj guxii dxej cayäädx dxej_{cru} siäd Sprit D_{xan} xten Dios te cuääzni nen lastootu. Si'c guirobnistu —räj_pni.

Huäjs Jesucrist siini xhaguibaa

⁶Lagajc dxejc che abidoj_preni loj Jesucrist, gunabdiidxreni loj_{ni}:

—¿La naj gudedsaclu yälrnibee lo rexpejn Israel, ä?

⁷Dxejcti räj_p Jesucrist loj rexpejnpacni:

—Di riäj_l gacbeetu xcuent redxej näjza retie_m nani abasobx_{gaa} Dios con xcälrnibeeni. ⁸La'tu sica'tu yälrnibee che abiäd Sprit D_{xan} xten Dios nen lastootu. Dxejc chatie'chtu xtidxä näjza rextzunä nen guedx Jerusalén, nen guiraa reguedx Judea, nen guiraa reguedx Samaria, näjza nen guideb guedxliuj —räj_pni.

⁹Gulujxtis gunii Jesucrist rediidxga, luxh la_lni cahuii rebejn loj_{ni} huäjsni xhaguibaa, sa'csi gurejdx Diosni. Dxejc biäd te za, biu'ni nen zaga. Ro'cti diru rebejn nuhiii loj_{ni}. ¹⁰La_lni cadxelodxi rebejn xhaguibaa cadro gunitloj Jesucrist, tiop angl xten Dios ni najcw ladnol suga' gajxh cadro suga'reni. ¹¹Dxejc räj_p reangl loj rebejn:

—¿Xhi rajctu ben Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räj_preni.

Gulereni Matías ni najc apostcoob

¹²Dxejc birii rebejn yejc dajne' ni laa Dan Oliib, siireni

guedx Jerusalén. Dan Oliib suga' gajxh Jerusalén. Gusajrenini si'cni rnii leii sajc sareni dxej ni rusilajzreni. ¹³Che biu'reni Jerusalén, bidzujñreni ro' yu' cadre rbázlaareni. Yu'ga najc jiaa yejc stee yu'. Ro'c rbázlaa Pedr nájza Jacob, Juan, Andrés, Felipe, Tomás, Bartolomé, Mateo, Jacoob xi'n Alfeo, Simón nani laaza Zelote, nájza Judas bejtz Jacob. ¹⁴Ro'c yu' guiraareni nájza regunaa nájza Marii xnan Jesucrist nájza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

¹⁵Nadxagsa' te gayuu gajl bejn. Dxejcti huisulii Pedr galáiiireni, rájpnii loj rebejn:

¹⁶—Caniä lojtu, resa'ä, nanabpac soob xtidx Sprit Dxiän xten Dios ni bacuaa toDavid lo guijtz xcuent Judas, nani bato' Jesucrist loj renani gunaazni. ¹⁷Gujc Judas sa'nu, bejnzani lagajc dzuun ni biennu.

¹⁸Cua' Judas meel ni badeedreni lojni che bato'ni Jesucrist. Che gulujx bejnii dzunguijdx ni bejnii, badesacni meel lojreni. Gusiireni te la' yuj. Dxejcti lagajc Judas basäl duu guejnii, guzäbnajlñi lo bej, gujtni. Gusaguijni, dxejcti biräjs xque'ni birii guiraa reziini. ¹⁹Che biejn diajg rebejn Jerusalén si'c, gulälajreni yujre Acéldama, ni säloj yurejn. ²⁰Neñ guijtz ni laa Salmos abacuaa toDavid rediidxre:

Sujianxteb rolizjni;

na'c cuääzru bejn rolizjni;

nájza:

Suxca'za ste'ca niguii xtzuunni.

²¹Naj nanab cuenu stee niguii — rájpnii Pedr—. Nanab gacni tej ni

gusanäj nuunu guideb redxej ni guyunäj Jesucrist nuunu, ²²dxejli ni gusloj batiobnis Juan hasta dxej ni huäjs Jesucrist xhaguibaa. Te gacnä j niguiire nuunu gusule'nu diidx gubansacpac Jesucrist lo rebengut.

²³Dxej gulääreni tiop niguii lojreni, tejni laa José Barsabás ni rbälajreni Justo, steeni laa Matías. ²⁴Gurejdx, gunabreni lo Dios, rájpnii:

—Dad, Dios, ni racbee lastoo guiraa rebejn, baluii loonu con ni najc niguii ni agulelu loj guiro'p niguiire, ²⁵te jiu'ni lo dzuun nájza lo yälapost ni basa'n Judas cheni sääni garenca nejz —rájpnii.

²⁶Dxejcti gudzujtreni daad te gulereni lo guiro'preni. Che biajb daad, gulereni Matías. Dxej bigabnä j Matías stzubiteeb reapost te gujcreni tzubitio'p apost.

Biädä Sprit Dxiän xten Dios

2 Che bidzujñ dxej ni rajc lanij xten Pentecostés, tre' guiraareni tejsi lajt neñ te yu', ²chela gusloj cayubej xhaguibaa si'c te beroduxh, bachajni guideb neñ yu' cadre suga'reni. ³Dxejc bahuiireni astoo carechxteb xhidajl bale' casanij rebajlga yejc tejga reni sojb ro'c. ⁴Biu'ti Sprit Dxiän xten Dios neñ lastoo guiragajcreni. Dxej gusloj caniireni garen-garen didxsaj si'ctisni badeed Sprit Dxiän xten Dios guiniireni.

⁵Neñ redxejga, xhidajl rexpejn Israel ni sasanäjpac xtidx Dios bidzujñ guedx Jerusalén. Xhidajl lajt biriireni siädreni. ⁶Che biejn diajgreni guyubej beduxhga,

bidojpb reben_ xhidaalga, bachaag sa'reni. Rdxeloduxh reben_ xhidalga sa'csi cayejn diajgreni canii reapost xtidxsajpac cade tejreni.

⁷Cadxelojreni räjpreni:

—iBahuilaaire! ¿La et ben_

Galileedi renani canii, ä? ⁸¿Xhoxh riejn diajgnu caniireni xtiidxpacnu si'ctis ni rniinu laadxnu, ä? ⁹Najcnu ben_ nación_ Partia, ben_ nación_ Media, ben_ región_ Elam, ben_ Mesopotamia, ben_ Judea, ben_ estad_ Capadocia, ben_ región_ Ponto, näjza ben_ Asia. ¹⁰Najczanu ben_ distrit_ Frigia, ben_ estad_ Panfilia, ben_ nación_ Egipto, näjza bejn_ ni siäd stelaad Cirene, te estad_ nen_ Africa. Loj rebejn_ ni siäd Roma yu' reni najc xpejn_ Israel, yu'za reni bazuxhijb lo Dios sa'csi rililajzreni si'cni rililajz rexpejn_ Israel. ¹¹Yu'za ben_ Creta. Yu'za ben_ nación_ Arabia. Guiragajcnu riejn diajgnu caniireni xtiidxpacnu si'ctis ni rniinu laadxnu. Caniireni loonu xcuent recosroduxh ni cayujn Dios.

¹²Bidxeloduxh reben_ xhidaalga, dijiejn_ xhi xhigab gunreni. Räjpreni lo sa'reni:

—¿Xhi säloj dee?

¹³Dxejcti guyu' rebejn_ ni baxhiznajreni, räjpreni:

—Agusojz redee.

Gunii Pedr loj rebejn_

¹⁴Dxejcti gusulii Pedr näjza tzubiteeb sa'ni, guredxa'ni guniini lo reben_ xhidaalga:

—Guejbtu, rexpejn_ Israel, nani rbäjz distrit_ Judea näjza guedx Jerusalén. Colcuadiajg diidx nani guiniä. ¹⁵Xhet sojzdinu si'cni cayujntu xhigab. Rsilru naj, entis

gojl rcagaa. ¹⁶Dxejc scree gunii Joel che guniini xtidx Dios agujc xchero.

¹⁷Räjpb Dios:

Sidzujn_ dxej che guxhalä Xsprit Dxanä cuääzni nen_ lastoo guiraa rebejn_.

Rexingaantu näjza rexindxa'ptu sinii xtidxä xcuent recos ni gajd gac.

Rexi'ntu sinixcal_, rextadgoldootu suluiloj bacal_ recos nani guluiä lojreni.

¹⁸Guxhalä Xsprit Dxanä loj guiraa reni siädnajl narä.

Siniireni rediidx ni gudedä lojreni xcuent recos nani gajd gac.

¹⁹Suluiä lojtu balti senro xhaguibaa näjza lo guedxliuj. Resenro ni gac najc rejn_ con guiboo, luxh guxh sire' si'c te za.

²⁰Sicäjy loj gubijdx, sajc bäii si'c rejn_.

Sajc guiraa recosre, dxejcru sidzujn_ dxeduxh che jjiälsacä narä, Dios.

²¹Dxejc guiraa rebejn_ nani cueedx guiniab gacnäy Diosreni, reni'c siliaa lo dojl.

²²Räjpb Pedr lojreni:

—Rexpejn_ Israel, colcuadiajg xtidxä. Dios baluii Jesucrist, ben_ Nazare't, lojtu por recosro, remilagwr, reseen nani bejnni nez lojtu. Lagajc Dios badeed yäl_rnibee loj Jesucrist te bejnni redzunroga. La'tu nancheetu dee. ²³Galooli ananchee Dios xhi guntu loj Jesucrist Xi'nni. Basaanza Dios bateedtu Jesucrist ladznaa rebenguidx te bacuaareni Jesucrist lo crujz te bagu'trenini.

²⁴Baspañsac Dios Jesucrist, baslaa Diosni ladznaa yälgujt, sa'csi di niajcdi nica' yälgujtni par tejpas, sa'csi laani rnibee lo yälgujt. ²⁵Che gubansac Jesucrist, guzobj diidx ni bacuaa David lo guijtzc xcuent Jesucrist. Räjþ David lo Dios:

Guira dxej ruhuiä lojlu, Dios.

Suga'lu xladbeä cayacnäjlunä rä te di guidxejb lastoä.

²⁶Ni'cni bibalajz lastoä, guniäza lojlu lacti rbaa lazä.

Rbalazä sa'csi suhuiilu nä rä che guetä.

²⁷Dizalu gusaan jia'n xaimä nen baa.

Dizalu gusaan gudx tiejxh xi'nlu nani sanälajzlu.

²⁸Abaluiilu löä xho guibanä par tejpas.

Sibalazduxhä sa'csi guibannä luj,

si'c räjþ David xcuent Jesucrist.

²⁹Räjþ Pedr:

—Guyasi guiniä lojtu agujc xchero gujt David. Aguyutzu'tzni nen baa.

Sajc guihuiinu baa cadro biga'tz David. ³⁰Gunii David xtidx Dios.

Che nabajñli David bia'n diidx gudeed Dios te xajgni ni guirilaj Crist, luxh laani gacni rei si'cni gujc David. ³¹Sa'csi baluixgaa Dios recosre lo David, ni'c räjþ David sibansac Crist lo rebengut sa'csi di Dios gusaan jia'n xaimni nen baa, dizani gusaan gudx tiejxhni.

³²Guläs Dios Jesucrist lo rebengut.

Nuure bahuiloonuni, najcnu testiigw gubansacni lo rebengut.

³³Gurejdx Dios Jesucrist. Naj nabajñ Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist

si'cni bia'n diidx. Naj abaxhal Jesucrist Sprit Dxan lo guedxliuj. Jesucrist cayujñ guira'ti nani cahuiitu, nani cayejn diajgtu nadxej.

³⁴Di David nij xhaguibaa, sa'csi lagajc David räjþ:

Gunii Dios lo Dad nani rnibee löä: “Gurej xladbeä

³⁵che guidzujñli dxej gudzugä guiraa reni rdxe'ch lojlu te gacbeereni luj rnibeelu guira'ti.”

³⁶Rniliäpac lojtu —räjþ Pedr—. La'tu bacuaatu Jesús lo crujz. Ni'cni, colgacbee, guiraatu xpen Israel, abejñ Dios gac Jesúsre Dad nani rnibee loonu.

³⁷Che biejn diajgreni laareni bacuaareni Jesús lo crujz, guc-huinuxh lajzreni. Räjþreni lo Pedr näjza lo reapost ni suga' ro'c: —Aiilu, resa'nu, ÷xhini'c jiennu naj?

³⁸Dxejcti räjþ Pedr lojreni:

—Colgusiech lajztu, colguibrobnisza, sa'csi ni'c najc te seen rlaiztu chanajltu Jesucrist, te si'c jia xtojltu. Dxejc suniidx Dios Sprit Dxan cuääz nen lastootu.

³⁹Si'c rlaiz Dios guniidx Xsprit Dxanni lojtu näjza loj rexi'ntu, näjza lo rebejn ni rbäjz zijtru, näjza loj guiragajc rebejn nani cueedxni —si'c gunii Pedr lo rexpejn Israel.

⁴⁰Dxejrcu gunii Pedr xhidajlru diidx, balijdxni rebejn:

—Colguirii loj reben latsiaj ni re' lo guedxliuj naj, te laatu lo dojl.

⁴¹Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti chon mil bejn. ⁴²Sanuutis rusobreni diidx

ni baluui reapost, bibalazduxhreni sa'csi bidxaag sa'reni con rexpejn Jesucrist, gudaunäj sa'reni si'c gudaunäj Jesucrist rexpejnpacni, bidojpreni tejsi lajt te guniireni lo Dios.

Xho gubajñ rexpejn Jesucrist galoo

⁴³Bidxeloduxh guiraa rebejn luxh bejn reapost redzunro, remilagwr. ⁴⁴Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni. ⁴⁵Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni. ⁴⁶Guixe-guixee bidojpreni nen guidoro xten Israel. Tejsi najc rexhigabreni. Gudaunäj sa'reni rolizj cadetejreni, guiraareni bibalaznäduxh sa'reni. ⁴⁷Gulä'preni xpala'n Dios. Guiraa rebejn gunii rexpejn Jesucrist najc beñsa'c. Guixe-guixee batie' Dios xhidajlru bejn nani rililajz xtiidxni, badzucajni rextojlreni, dxejc bachaagreni lo rexpejn Jesucrist.

Biajc niguii nani racxhuu ni'ni

3 Guyu' te dxej säa Pedr näjza Juan nez loj guidoro si'cti rcachon gudxej. ²Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacru'. Ro'c rbejni rniabni gojn lojreni riu' guidoo. ³Che bahuiini agojl jiu' Pedr näjza Juan nen guidoroga, gunabni te gojn lojreni. ⁴Dxejcti bahuii Pedr näjza Juan lojni. Räjpp Pedr lojni: —iBahuii loonu!
⁵Che biejn diajg niguiiga xtidx Pedr, bahuiini lojreni sa'csi naani sudeedreni meel lojni.

⁶Räjpp Pedr lojni:

—Xhetliidi meeldi rapä, nani rapätis sunidxä lojlu. Xcuent xcälrnibee Jesucrist, beñ Nazare't, rniä lojlu: iGusulii! iGusaj! —räjppi.

⁷Dxejcti gunaaz Pedr naani, guläsnini. Biligajc ni'ni, gusutijp ni'ni. ⁸Huisuyäl'ni, gusajni. Biunäjni Pedr näjza Juan nen guidoro. Rsiajni, rtiäsni, calä'pni xpala'n Dios. ⁹Bahuii xhidajl bejn lojni nen guidoro, rsiajni, calä'pzani xpala'n Dios. ¹⁰Biembeereni laa niguii ni rbej ro' puertro xten guidoro, rniabni gojn. Guiraareni bidxeloduxhreni bahuiireni xhi gusajc niguii ni gucxhuu ni'ni.

Baluui Pedr xtidx Dios nen cordoor xten guidoro

¹¹Ro' guidoroga yu' te cordoor ni laa Cordoor xten Salomón. Ro'c suga' Pedr näjza Juan, naztzu'tz niguiiga naareni. Ruxun guiraa rebejn bidzujñ nen cordooroga. Bidxelojreni sa'csi arsiyaj niguii ni gucxhuu ni'ni. ¹²Che bahuii Pedr lo rebejn räjpni lojreni:

—¿Xhicuent rdxeloy guejbtu, rexpejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcälrnibee Jesucrist biajc ni' niguiire. ¹³Xtiooznu, ni najc Xtiooz toxtadgoldoonu Abram, toxtadgoldoonu Isaac, näjza toxtadgoldoonu Jacoob, lagajc Diosga abadeed yäl'rnibee loj Xi'nni Jesús. Niluxh la'tu bateedtuni ladznaa reguxhtis. Che rlanj Pila't ni rnibee nuslaa Jesucrist, ditu nicäjb niriini, alga guniyajtuni nez loj Pila't. ¹⁴Niluxh la'tu baro'ntu

Xi'n Dxan xten Dios nani rujn ganax dzunsa'c. Alga gunabtu birii te niguii nani bagu't bejn. ¹⁵Jesucrist rudeed yäl'nabajñ, luxh la'tu gunabtu bacuaareni Jesucrist lo crujz. Gulässac Dios Jesucrist lo rebengut. Bahuiloonu nabajñ Jesucrist, najcnu testiigw gubansac Jesucrist lo rebengut. ¹⁶Cahuiitu loj niguiire nani gucxhuu ni'ni, luxh rumbeetuni. Xcäl'rnibee Jesucrist abasiajc niguiire, sa'csi huililajzni. Sa'csi huililajznu xtidx Jesucrist, ni'c biajcni te najcni si'cni rhuiituni ñaj.

¹⁷Rexpejn Israel, narä nanä di'tu niacbee, diza rexcuxhtistu niacbee laa Xindxan xten Dios ni bacuaatu lo crujz. ¹⁸Scree gujc te guzobj xtidx Dios ni cuaj lo guijtz agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh. ¹⁹Ni'cni col'siechljajztu, col'guibi' loj Dios te guibicaj xtojltu. Dxejc susiäluyj Dios lastootu, sujnni gac nacoob guira'ti, si'cni bia'n diidx gacni. ²⁰Lojtu suxhalza Dios Jesucrist nani rnibee, nani aguleni galooli. ²¹Naj nungäjñ jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu agujc xchero. ²²Scree gunii toMoisés lo retoxtadgoldoonu, räjpni: “Xtadnu Dios suxhal te niguii sa' narä nani cueni lo resa'tu. Siniini xtidx Dios. Col'gusobdiajg guiralii diidx nani guiniini lojtu. ²³Renani di gusoob rextiidxni, sinitlojreni, direni gac rexpejn Dios.”

²⁴Räjpza Pedr:

—Sigajcza agunii guiralii reniguii nani gunii xtidx Dios. Si'c agunixgaa toSamuel, näjza guiraa reniguii ni siädnajlñi, xcuent recos ni cayajc nen redxejre. ²⁵La'tu najc xajg reniguii ni gunii xtidx Dios. La'tu biannäjtu diidx nani gunii Dios loj retoxtadgoldoonu. Bia'n diidx, räjp Dios loj toxtadgoldoonu Abram: “Jiädjiajl te xajglu ni gupalazduxh reben guedxliuj, sa'csi suslaanireni lo dojl.” ²⁶Dxejcti ganiddoo lojtu baxhañ Dios Jesucrist te guibaa lajztu che gusiejch lajztu, te na'cru guntu dojl —räjp Pedr.

Baluu Pedr näj Juan xtidx Dios loj reguxhtis

4 Lañ ni caniireni lo rebejn, ro'c bidzujñ rebixhojz xten Israel näjza nani rnibee lo resoldaad xten guidoro näjza resaduceos. ²Bidxe'chduxhrene sa'csi cagulijdxrene rebejn, cayäjpreni: —Sibansac rebejn lo rebengut sa'csi gubansac Jesucrist lo rebengut.

³Gunaaz reguxhtisreni, biäureni sa'csi agudxej luxh abiäu jusgaad. Nen latzgüiib barareni yäl.

⁴Xhidajñ reni biejn diajg xtiidxreni huililajz xtidx Dios. Si'cti gaii mil niguii huililajz xtidx Dios.

⁵Che bara yäl, bachaag sa' guiraa rebengool, renani rnibee guedx Jerusalén, näjza rebejn ni ruluii leii, ⁶näjza Anás ni rnibee guiraa rebixhojz, näjza xpagojzni ni laa Caifás, näjza Juan, näjza Alejandro, näjza guiraa reniguii ni najc sa' rebixhozro ni rnibee. ⁷Gunibeereni biäd Pedr näjza Juan gusuj galäiireni te gunabdiidxreni lojreni:

—¿Chu xcálrnibee rajptu? ¿Chu laj basá'ttu te basiajctu niguiire?

⁸Dxejcti sa'csi cayu Pedr diidx ni canii Sprit Dxan xten Dios nen lastooni, rájpmi lojreni:

—Caniä lo guejbtu, reguxhtis nájza rebengool xten rexpejn Israel, ⁹palga canabdiidxtu xhicuent gucnájnu niguii nani gucxhoo ni'ni, palga canabdiidxtu xho basiajcti niguiiga, ¹⁰gusule'nu xcuent dee te gacbeetu te gacbeza guiraa rexpejn Israel. Xtidx Jesucrist najc yálrnibeduxh. Diidxga abasiajc ni' niguiire, xhet rajcdini suga'ni nez lojtu. La'tu abacuaatu Jesucrist lo cruzj, niluxh Dios guläsi lo rebengut. ¹¹Di'tu ninälajz xtidx Jesucrist. Laani najc si'c te guij nani rbäcajtu che runcheetu te yu'. Per Dios abejn najc Jesucrist si'c guij nani maazru nacs'a'c, nani guyu' squiin xte yu'. ¹²Xtebtis Jesucrist rusläa bejn lo dojl, ruti stee bejn lo guedxliuj nani baxhał Dios te gusläani bejn lo dojl —si'c rájp Pedr.

¹³Che biejn diajgreni xtidx Pedr, bidxelojreni sa'csi di Pedr nájza Juan guidxejb, dizareni guitujy. Dxejcti rájp rebixhojz ni sajcrü lo sa'reni:

—Direni ganduxh guijtz, bejntisreni.

Dxejcti gucbeereni gusanäj redee Jesucrist, lojni bisieedreni. ¹⁴Bahuiiza rebixhojz lo niguii ni abiajc ni'ni, suganäjni guiro'preni. Ro'cti xhetru gujcdi gunii rebixhojz sa'csi laaca bejnreni. ¹⁵Dxejcti gunibee rebixhojz birii guidxojnreni telaad te bij rebixhojz diidx ensilaareni. ¹⁶Rájpmi lo sa'reni:

—¿Xhi jiennäanu reniguiire? Guiraa reben Jerusalén anajn

xcuent dzunroduxhre ni cayujnreni. Digacdi gucuatzlaaznuni. ¹⁷Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

¹⁸Huixisac rebixhojzreni. Dxejcti rájpmi lojreni:

—Na'c guluirutu xtidx Jesucrist, na'cru guiniitu xtiidxni.

¹⁹Dxejc gunii Pedr nájza Juan, rájpmi lojreni:

—¿Colguinii loonu chu xtiidx sajcrü guicuaadiaagnu? ¿Xtiidx la'tu, o xtiidx Dios? ²⁰Digacdi gusäunu ro'nu. Nanabpac gusule'nu diidx xcuent recos nani abahuiinu nájza rediidx ni abiejn diajgnu.

²¹Balidxsac rebixhojzreni te na'cru guiniireni xtidx Jesucrist. Dxejc basläa rebixhojz guiro'preni, sa'csi xhetru niacijdi niujnreni lo Pedr nájza Juan, sa'csi canii rebejn bejnreni te dzunsa'c. Xhidajl rebejn gulä'pza xpala'n Dios sa'csi bahuiireni xhini'c gujc ro'c. ²²Sa'csi niguii ni basiajcreni xcuent yálmilagwr agudejdni tiuu ijz.

Guredx-gunab rexpejn Jesucrist lo Dios

²³Che basläa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz nájza rebengool lojreni.

²⁴Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, rájpmi:

—Xtadnu Dios, nani benchee xhaguibaa nájza guedxliuj nájza nisdoo nájza guira'ti ni yu' lojreni, nenreni, ²⁵nani bejn basoob

toDavid xtidx Sprit Dxaan te bacuaani xtiidxlu, räjpni:

¿Xhicuent guyuduxh reben guedxliuj yärsia'?

¿Xhicuent bejn rexpejn Israel xhigab ni xhet sajcdi?

²⁶ Bidxagsa' rereii lo guedxliuj näjza reguxhtis xten reguejdx te gudxojnreni xtzun Dios näjza xten Dad Crist nani baxhaḷ Dios,

si'c gunii toDavid.

²⁷ 'Aguzojb diidxre, sa'csi lo guejdxre bidxagsa' Herodes näjza Poncio Pila't näjza rexpejn Israel näjza rebenzijt nani di gac xpejn Israel. Bidxehnäjreni Xi'nlu nani najc Crist ni baxhallu. ²⁸ Naj abejnreni dzunguijdx si'cni galooli guniilu gac. ²⁹ Naj Guejblu Xtiosnu, bahuu xho cagusacsäreni nuure, gucnäj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnlulu. ³⁰ Baniidx xcälrnibeelu loonu te guisajcnu rebejn, te jienzanu redzunro, remilajgwr con xcälrnibee Xi'ndxanlu Jesucrist.

³¹ Che gulujx gurejdxreni lo Dios, gusloj canibsejz yu' cadro tre'reni, cayac si'c te xu. Dxejcti biääd Sprit Dxaan xten Dios basutijpruni lastooreni. Dxejc dirureni nidxelj guniireni xtidx Dios.

Rudeedreni xhixtenreni lo sa'reni

³² Guiraa renani huililajz xtidx Dios, tejsi xhigab bejnreni. Rut chu tejdireni bejn guinibexteb xhixtenni: bachaagreni sa' rehxixtenreni te xca' guiraareni nani rquiinreni. ³³ Gucnäj Dios reapost, gusutzu'tzreni bijreni

diidx bahuilojreni loj Jesucrist che gubansacni lo rebengut. Gucnäj Dios guiraa rexpejn Jesucrist, luxh gopduxh reben guejdx respe'treni. ³⁴ Ni'cla tejreni di niääd xhixtenni sa'csi renani gojp xyujni, rolizjni, bato'renini, dxejcti biädnäreni xcuentni, ³⁵ badeedreni meelga lo reapost. Dxejcti gudis reapost meelga lo guiraa renani rquiinni. ³⁶ Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni). ³⁷ Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

Ananías näj chäälni rujn dojl

5 Guyu' stee niguii ni laa Ananías. Chäälni laa Safira. Bato'reni te la' yuj. ² Niguiire biannäjni gala' meel, dxejc sgala' meelga badeedni lo reapost si'c guiraa xcuent yujga luxh chäälni nanchee xhi cayujjni. ³ Dxejcti räjp Pedr lojni:

—Ananías, ¿xhicuent rusooblu xtidx Satanás ni rnibee lo rebendxab, ä? ¿Xhicuent rlanjlu gusgueelu Sprit Dxaan xten Dios? Biannäjlu gaii meel ni cua'lu che bato'lu te la' yuj. ⁴ Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicuent bejnlu xhigab nen lastoolu gunlu dee? Loj Dios guniilu didx-xhii, xhet loodinu.

⁵ Che biejn diajg Ananías xtidx Pedr, biejbni lo yuj, gujtni. Bidxebduxh rebejn che biejn diajgreni xhi gusajcni. ⁶ Sas gubig

gaa**i** bi'n batejbreni Ananías
ne**n** lajd. Dxejcti sanärenini
huicua'tzrenini ne**n** baa.

⁷Pet agujc cho**n** or gujtni chela
bidzuj**n** chää**l** Ananías. Dini gan
agujt chää**l**ni. ⁸Räjp Pedr loj**n**i:

—Gunii, ¿la bato'tu xyujtu si'cni
naj chää**l**lu huij**n**i, ä?

Räjp Safira loj**n**i:

—O'n, si'c huij**n**i.

⁹Dxejcti räjp Pedr loj**n**i:

—¿Xhicuent bej**n**lu tejsi
xhigabguij**d**x con chää**l**lu?
¿Xhicuent r**l**ajztu gusguetu Sprit
Dxan xten Dios? Ro lä' siää**d** renani
huicua'tz chää**l**lu. Naj näjza luj
chacua'tzreni ne**n** baa.

¹⁰Si'tcis biajb Safira, gutgajczani.
Dxejcti bidzuj**n** rebi'n, bahuiireni
agujt**n**i. Dxejcti guläsreneni,
biriireni huicuat**z**gajc**r**eneni
cuä' baa cadro biga'tz chää**l**ni.

¹¹Bidxebduxh guiraa rexpej**n**
Jesucrist, näjza guiraa rebej**n** nani
biej**n** diajg**n**i recosre.

Bejn reapost xhidajl redzunro, remilagwr

¹²Xhidajl redzunro, remilagwr
bejn reapost nez loj rebenguej**d**x.
Nadxaag sa' rexpej**n** Jesucrist,
caguchaagreni diid**x** ne**n** cordoor
ni laa Salomón. ¹³Guy**u**' xhidajl
bej**n** ni di nuchaag lo rexpej**n**
Jesucrist sa'csi bidxejbreni
guchaagreni loj**r**eni. Rebenguej**d**xga
guläpduxh**r**eni xpala'n rexpej**n**
Jesucrist. ¹⁴Ne**n** redxejga
xhidalduxh rebej**n** huililajz xtid**x**
Jesucrist, niguii sigajc gunaa.

¹⁵Dxejcti gulääreni lo nezyuj rebej**n**
nani cayacxhuu. Siäd**nä** rebej**n**
be**n**racxhuu naga' lo da', te gaxäjsi

ted xpala**a** Pedr yejcreni che ted
Pedr ro'c, te si'c jiajcreni. ¹⁶Gued**x**
Jerusalén bidzuj**n** xhidajl rebej**n**
ni siää**d** ste'ca guej**d**x. Biäd**nä**reni
rebej**n** ni cayacxhuu näjza balti
bej**n** ni yu' bend**x**ab ne**n** lastooreni.
Con xcäl**r**nibee Jesucrist basiaj**c**
reapost rebe**n** racxhuu, gulää**z**areni
rebend**x**ab ne**n** lastoo balti bej**n**.

Gudejd reapost trabajw

¹⁷Dxejcti bidxechlajz bixhoj**z**
ni rnibee, näjza reniguii ni laa
saducee, sa'csi calä'p rebenguej**d**x
xpala'n reapost sa'csi basiajcreni
rebe**n** racxhuu. ¹⁸Gunaazreni
reapost. Basäurenini ne**n** latzguii**b**.
¹⁹Niluxh yäälga, biää**d** te angl
xten Dios, baxhalni ro' latzguii**b**ga.
Dxejcti gulääni reapost ne**n**
latzguii**b**. Räjp**n**i loj**r**eni:

²⁰—Colchä**j** guidoro. Ro'c
colguinii lo rebej**n** xho gac
gui**ba**nnäjreni Dios par tejpas.

²¹Che biej**n** diajg**r**eni si'c,
rsildooru biu'reni ne**n** guidoro, ro'c
baluiireni xtid**x** Dios lo rebej**n**.

Dxej**c** bixhoj**z** nani rnibee, näjza
rebengool, bachagsa'reni gurej**d**xreni
guiraa reguxhtis xten guidoo, näjza
guiraa reguxhtis xten rexpej**n**
Israel. Dxejcti gunibeereni jääd**nä**
reguixhajg reapost nani biäu ne**n**
ladtguii**b**. ²²Che bidzuj**n** reguixhajg
latzguii**b**, bahuii reguixhajg ne**n**
latzguii**b**ga, niluxh rut yu'di ne**n**
latzguii**b**. Che gubi'reni biäd**nä**reni
diid**x**, räjp**r**eni loj reguxhtis:

²³—Che bidz**u**nnu latzguii**b**,
niäudzu'tz ro' latzguii**b** luxh
resoldaad ni cayajp ro' latzguii**b**
suga' guiro'p laad. Che baxhalnu ro'
latzguii**b**, rut yu'di ne**n** latzguii**b**.

²⁴Che biejn diajg bixhojz ni rnibee, nājza capitán nani rnibee resoldaad xten guidoro, nājza rebixhojz, ben tio'p lajzreni, rāj̄p lo sa'reni:

—¿Xhini'c gujc? ¿Xhoni gac nāj̄?
—rāj̄preni.

²⁵Dxejcti bidzuj̄n te niguii, rāj̄pni lojreni:

—Reniguii ni basäutu neñ latzguib, areni suga' neñ guidoro, luxh caguluiireni rebej̄n —rāj̄pni.

²⁶Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxejbreni nucuaareni guij yejcreni. ²⁷Che bidzunnäjreni reapost, rāj̄preni suureni nez loj reguxhtis xten Israel, sas gunii bixhojz ni rnibee, ²⁸rāj̄pni loj reapost:

—¿Et agunibeenu lojtu na'cru guiniitu xtidx Jesucrist? Xhoxh nāj̄ cagutie'chtu rediidxga lo guiraa rebej̄n neñ guedx Jerusalén. La'tu rlajztu cuaquijtu nuure bagu'tnu Jesucrist.

²⁹Dxejc rāj̄p Pedr nājza reapost lojreni:

—Nanabpac gusoobnu xtidx Dios, lacuaa gusoobnu xtidx bej̄n.

³⁰Bagu'ttu Jesucrist che bacuaatuni lo cruz. Niluxh Xtios xtradgoldoonu guläsni lo rebengut. ³¹Nāj̄ agule'c Diosni xladbeeni cadre rnibeeni, abadeedza Dios yä'rnibee loj Jesucrist te guslaani nuure, te si'c rlajzni guibicaj xtoj̄l guiraa rexpej̄n Israel nani gusiechlajzreni.

³²Bahuiloonu xhi bejn Dios. Ni'c cagusule'nu. Nadoncheenu Sprit Dxan xten Dios cayacnāj̄ nuure te gusule'nu rediidxre. Badeed Dios

Sprit Dxan xtenni lo guiraa renani susoob xtiidxni.

³³Che biejn diajg reguxhtis rediidxga, bidxechduxhrenei, rlajzreni nugu'treni reapost.

³⁴Dxejcti huisulii te niguii ni laa Gamaliel, nani najc te farisee nani ruluii leii xten Israel, rebej̄n rapduxh respe't dade'ga. Gunibee Gamaliel guirii reapost neñ yu'ga.

³⁵Dxejcti rāj̄p Gamaliel lo rebixhojz:

—Guejbtu rexpej̄n Israel, colyensa'c xhigab xhini'c rlajztu gunnäjtu reniguiire. ³⁶Colzaa lajztu gajd gac xchej guyu' tej ni laa Teudas, rāj̄pni rnibeduxhni. Dxejc huinajl tajp gayuu bej̄ni. Che bagu'trenini, bire'ch guiraa rexpej̄ni, xhetru bej̄ndireni. ³⁷Neñ ijz ni guyu' cens, biriiza Judas ni siäd Galilee. Dxejc gurejdxni xhidajl bej̄n ni huinajl̄ni. Bagu'tza bej̄ni, dxejcti bire'chza guiraa reni huinajl̄ni. ³⁸Nāj̄ rniä, colguibicaj, colgusaan reniguiire, rexpej̄n Jesús. Palga guejbcareni cayujnreni dzuunre, xtebcani sinitlojni.

³⁹Palga xtzuum Dios ni cayujnreni, digacdi guscuääznu dzuunga, sa'csi guidi'nu guidxe'ch Gueb Dios loonu.

⁴⁰Bichaglajz rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejc baslaarenini. ⁴¹Biriitireni nez loj rebixhojz. Cabaduxh lajzreni sa'csi gujc gudejdreni trabajw xcuent Jesucrist. ⁴²Guixe-guixee la'tis baluiireni xtidx Jesucrist neñ guidoro nājza rolijz bej̄n. Cagusule'reni diidx lo rexpeñ Israel:

—Jesús najc Crist nani cabääztu jiaäd.

**Gulereni reniguii ni gudeed
yätxtiil lo rexpejn Jesucrist**

6 Nen redxejga, xhidalro gujc rexpejn Jesucrist. Niluxh gusloj camojm rexpejn Jesucrist nani rnii didx griegw. Räjpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpuiudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

²Dxejcti batie' guitzubitio'p reapost guiraa rexpejn Jesucrist, räjpreni lo guiraareni:

—Et laadi guisaannu guluiinu xtidx Dios te quisnu xhi gau rebiuud. ³Ni'c nanab cuetu lo resa'tu gajtz niguii nani najntu najc beŋsa'c, nani rbäjz Sprit Dxan xten Dios nen lastooreni, nani yu' xcäriejnreni. Reniguiire quis xhi gaureni. ⁴Te si'c sajč chanuutis guiniabnu lo Dios, guiluiizanu xtidx Dios lo rebejn.

⁵Guiralii rebejnga bidxaglazreni diidxga. Dxejcti gulereni Esteban, te niguii ni rilalajzpac xtidx Dios, rbäjzza Sprit Dxan xten Dios nen lastooni. Gulezareni Felipe, Prócoro, Nicanor, Timón, Parmenas; gulezareni Nicolás nani siääd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist. ⁶Sas biädnä rexpejn Jesús guigajtz niguiiga lo reapost. Dxejcti guredxgunab reapost lo Dios xcuent reniguiiga, batzuebreni ñaareni

yejc reniguiiga si'c te seen abiu'reni lo xtzuunreni.

⁷Birechduxh xtidx Dios. Xhidajl beñ Jerusalén huililajz xtidx Dios, näjza xhidajl bixhojz.

**Gunaazreni Esteban sanärenini
lo rebixhojz nani rnibee**

⁸Gucnäduxh Dios Esteban, bejnni redzunro, remilagwr nez lo rebejn.

⁹Dxejc reben guidoo ni laa Libertadores gusloj cadilñaj Esteban. Lojreni nadxaag beñ Cirene, näjza beñ Alejandría, näjza gaii beñ Cilicia, näjza sgaii bejn ni siääd reguedx Asia.

¹⁰Reniguiire di niajcdi nuzejcreni diidx lo Esteban, sa'csi nasinduxhni, luxh cayacñaj Sprit Dxan xten Diosni.

¹¹Dxejcti baquilreni sgaii niguii ni di gac xpejn Jesús, te räjpreni:

—Biejn diaagnu caniyaj Esteban toMoisés näjza Dios.

¹²Scree gujc bache'chreni rebejn näjza rebejn ni ruluii leii näjza rebengool. Dxejcti bachagsa'reni, gunaazreni Esteban. Huinärenini lo reguxhtis xten Israel. ¹³Dxejcti biädnäreni reniguii nani baquilreni te guniireni didx-xhii. Räjpreni:

—Entis rniyaj Esteban leii xten toMoisés näjza guidodxanre.

¹⁴Abiejnza diaagnu gunii Esteban: “Jesús nazareno sutzuñ guidoro, suchaazani leii nani baniidx toMoisés loonu.”

¹⁵Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

Diidx ni basule' Esteban lo rebixhojz

7 Dxejcti räjpreni te bixhojz nani rnibee lo Esteban:

—¿La gulii si'c guniilu, ä?

²Räjp Esteban lojreni:

—Colgucua diajg rextidxä, guebtdad, näjza resa'ä. Xtioznu ni sacduxh, ni rnibee, baluiloj lo toxtadgoldoonu Abram che guläjzni Mesopotamia, che gajdni chaläjz nen guedx Harán. ³Räjp Dios loj toAbram: “Birii lajdxtu, basa'n guiraa resa'lu. Huij cadrotis guluiä lojlu” ⁴—räjp Esteban—. Dxejcti birii toAbram lajdx reCaldeos. Huiläjzni guedx Harán. Che gujt xtadni, biädnä Dios toAbram nez ree, cadro rbääznu naj. ⁵Di Dios nuzalajz nicla tla' yuj cadro suu te ni' toAbram. Niluxh räjp Dios sudeedni yujga lo rexajg toAbram, jiannäjreni yujga che guet toAbram. Niluxh nicla gajd xi'n toAbram chu dxejc. ⁶Stee huält räjp Dios lo toAbram: “Rexi'nlu, rexagdoolu, siläjzreni si'c benzijt. Ladxbejn gacreni mos, ro'c susacsí bejnreni si'cti tajp gayuu ijz.” ⁷Räjp Dios: “Narä sunä castiigw rebejn ni gusacsíreni che najcreni mos. Narä cuää rexagdoolu ro'c, te ree guzuxhijbreni loä nen guejdxre”, si'c räjp Dios ⁸—räjpza Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujn dxej, basälza toAbram beegani si'c te seenza. Sigajcza bennäj Isaac xi'nni Jacob. Sigajcza bennäj Jacob guitzubitio'p rexi'nni nani najc rexpengoldoo xpen Israel.

⁹Räjp Esteban:

—Guitzubiteb rexi'n Jacob guyu' te yälrudxojn lo bejtzreni

José. Dxejc bato'reni José lo te beñ Egipto. Dxejc Dios goptzu'tz José.

¹⁰Che gudejd José trabajwduxh, gucnäj Diosni. Badeed Dios yälñasinduxh lojni. Bejn Dios bichagljaz reii Faraón José. Badeed reii Faraón gujcn gubernadoor xten Egipto. Gunibeeza José guira'ti xhixten reiiga.

¹¹Räjpza Esteban:

—Che bidzujn dxej gujc te gubijn, guiraa nen reguedx Egipto näjza guiraa nen reguedx Canaán, trabajwduxh cadejd guiraa rebejn. Xhet guyu'di xhi niajw retoxtadgoldoonu. ¹²Che biejn diajg xtadgoldoonu Jacob yu' xhi gaureni nen reguejdx xten Egipto, ro'c baxhałni rexi'nni, bica'reni xhi gaureni te huält. ¹³Che huijreni stehuält, dxejc bazäbdiidx José lojreni laani najc bejtzreni. Biembeeza Faraón resa' José.

¹⁴Dxejcti baxhał José diidx jiääd xtadni Jacob, näjza guiraa resa'ni, cuääzreni Egipto. Najc rebejnga si'cti gayonbitzubigai bejn. ¹⁵Si'c gujc te huij Jacob guedx Egipto. Ro'c guläjzni, ro'c gujtni. Ro'c gujtza retoxtadgoldoonu. ¹⁶Dxejcti huinäreni rextzujtreni loj Siquem te biga'tzsacreni nen baa nani gusii toxtadgolnu Abram lo rexi'n Hamor nen guedx Siquem.

¹⁷Räjp Esteban:

—Che bidzungajxh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu nen guedx Egipto. ¹⁸Dxejcti guyu' te xreii Egipto ni di gan guiraa redzunsac nani bejn toxtadgoldoonu José. ¹⁹Reiiga basgueeni rexpengoldoonu,

basacsínireni, trabajwduxh bateedni rexpengoldoonu. Gunibee reiiga basälreni guiraa rebáz niguii te di laareni, te guetreni. ²⁰Neñ redxejga, gojl Moisés. Che gujc Moisés báz, te báz daani, saru rujn lojni, huinälajz Diosni. Gułaani choñ bäi rolizjni. ²¹Dxejc huisälrenini, te guzobj xtidx Faraón. Dxejc lagajc xindx'a'p Faraón bidxälni Moisés, cua'nini baslaanini si'c xi'nni. ²²Bisieed Moisés guiraa ni najn reben Egipto. Gunisa'cni diidx, bensa'cni dzuun.

²³Räjp Esteban:

—Che guyu'ni tiuu ijz, banaj lajzni resa'ni ni najc xpejn Israel, huijni cadre rbäjzreni. ²⁴Dxejc bahuiini casacsí te ben Egipto te ben sa'ni. Sas bagu'tni ben Egipto. ²⁵Bejn Moisés xhigab pet sacbee resa'ni cayacnäj Diosni te guslaani rexpeljnni. Luxh di resa'ni niacbee si'c. ²⁶Che bara yäl, bahuii Moisés cadilnäj sa'reni tiop xpen Israel. Räjp Moisés lojreni: “Colcuedxi, Dad. Lagajc sa'tu cadilnäjtu. ¿Xhicuent rdijltu?” si'c gunii Moisés, te na'cru tilnäj sa'reni. ²⁷Dxejcti nani cayunniälajzga, balanaani Moisés, räjpni loj Moisés: “¿Chu baniidx yälrnibee lojlu te jädnibeelu nuure?” ²⁸¿La rlaizlu ju'tlu narä si'c bagu'tlu ben Egipto naii?” —räjpni—. ²⁹Che biejn diajg Moisés rediidxga, baxunni, huijni zijt. Huiläzsiycni guedx Madián. Ro'c bachnaani, guyu' tiop xingaanni.

³⁰Räjpza Esteban:

—Che gudejd tiuu ijz, bidzujn te dxej cansajni nez lo reyubidz ni naga' guideb gabi dajn ni laa

Sinaí. Ro'c bahuiini te bajl nen te yaguejch. Nen bajlga baluiloj angl xten Dios lo Moisés. ³¹Bidxeloduxh Moisés che bahuiini si'c. Dxejcti gubigni te rlaizni nuhuisa'cni yajgga. Dxejc biejn diajgni gunii Dios, räjpni lo Moisés: ³²“Narä nacä Xtios rextadgoldoolu, narä nacä Dios xten Abram, näjza xten Isaac näjza xten Jacoob.” Dxejcti guceez Moisés sa'csi bidxebduxhni, diruni nuhuisa'c yajgga. ³³Dxejcti räjp Dios lojni: “Gulää xcura'chlu. Yuj cadre suga'lu najc dxan, sa'csi narä yu'ä ree. ³⁴Abahuiä xho cagusacsí reben Egipto rexpənä. Abiejn diagä xho roonreni. Naj abiälä te guslää rexpənä. Gudaa naj, suxhalälu chäálu Egipto.”

³⁵Räjp Esteban:

—Dios badeed yälrnibee lo Moisés nani baze' rextotadgoldoonu che räjpreni: “¿Chu baniidx yälrnibee lojlu te jädnibeelu nuure?” Baxhal Dios Moisés te guinibeeni xpejn Dios, gucnäjza Dios Moisés basläänni rexpeljnni nen nación Egipto si'c gunii angl xten Dios che baluilojni lo Moisés nen yaguejchga. ³⁶Gulää Moisés rebejnnga. Ganiddoo bejn Moisés redzunro, yälrdxeloj nen nación Egipto näjza ro' nisdoo ni laa niso xniaa. Tiuu ijz cuansaj rextotadgoldoonu nen yubidzroga, ro'c bejnza Moisés redzunro, remilagwr. ³⁷Lagajc Moisésre gunii xtidx Dios che räjpni loj rexpelj Israel: “Sibe Dios lo rexajgtu te niguii ni najc sigac narä. Siniini xtidx Dios. Colgusoob xtiidxni.” ³⁸Lagajc Moisés guyunäj rebejn nen yubidzro. Xangl Dios guninäj Moisés nen dajn xten Sinaí. Dxejcti

badeed Moisés rediidx ni gunibee Dios lo retoxtadgoldoonu. Laareni basa'nreni diidxga loonu.

³⁹Räjp Esteban:

—Niluxh di retoxtadgoldoonu nusoob rextidx Moisés. Di rlanjreni guinibee Moisésreni. Canaduxhlajzreni nacióñ Egipto. ⁴⁰Che sää Moisés dajn Sinaí, räjpreni loj Aarón bejtz Moisés: “Benchee banäjb gac xtiooznu, te nidreni loonu, te chanajlnureni. Chu gan con Moisésre ni baluui nezyuj che gulääni nuure guejdx reEgipto.”

⁴¹Sas bencheereni te banäjb ni najc si'c te gonbáz. Dxejcti bagu'treni guidxaa te badeedreni rejnga lo banäjb te bazuxhijbreni lojni. Bibalazduxhreni sa'csi abencheereni banäjbga. ⁴²Dxejcti gubicaj Dios loj rexpejn Israel sa'csi bejnreni si'c. Basaan Dios gojnreni gubijdx, näjza bäii, näjza rebal xhaguibaa. Gujcní si'cni caj lo guijtzi ni bejn reniguii nani bacuaa rextidx Dios. Räjp Dios:

La'tu beñ Israel, cheni cuansajtu tiuu ijz nez lo reyubijdz, ¿la par narä bagu'ttu guidxaa, ä?

¿La loä baniidxtu xtiejnreni, ä?

⁴³Xho gacni si'c, räjp Dios.

Cuansañtu te yu' najcw guiijd cadro chu te banäjb.

Nenga guyu' banäjb ni laa Moloc, nani najtu najc xtioostu. Gojn̄zatu balbäze' xten xtioostu ni laa Remfán.

Redios ni bencheetistu reni'c gojntu.

Ni'cni sibää la'tu ree guxhalä la'tu stelaad guedx Babilonia.

⁴⁴Guniiru Esteban, räjpni lojreni:

—Neñ reyubijdz gojp retoxtadgoldoonu te yu' najcwni guiijd. Gujcní xquidooreni. Ro'c guninäjreni Dios. Benchee retoxtadgoldoonu yu' najcw guiijdga si'cni guinibee Dios che baluui lo Moisés xhoni gacni. ⁴⁵Che gujt Moisés, Josué gunibee lacuaa toMoisés, huinäni retoxtadgoldoonu nacióñ Canaán. Batzujlreni yuro ni najcw guiijd te näj ni'c huinäreni Canaán. Gulää Dios rebejn ni guläjz neñ reguedx Canaán. Dxejcti bia'n retoxtadgoldoonu neñ reguejdxga. Bazuxhijbreni lo Dios neñ yuguijd ni najc xquidooreni che gojlli xtiemp reii David. ⁴⁶Huinälajz Dios David. Räjp David lo Dios: “Rlazä gunä te guidoo par guejblu, Dios xten nuure, rexpejn Israel.” ⁴⁷Dxejcti di Dios nusoob xtidx David. Alga Salomón, xi'n David, ni'c benchee xquidoro Dios. ⁴⁸Naj di Dios guiquiin te yu' nani runchee bejn. Scree bacuaa te niguii nani gunii xtidx Dios. Räjp Dios:

⁴⁹Si'c najc te yagxhilsa'c cadro rnibee reii, si'c najc xhaguibaa cadro rbeä. Si'c te bancw cadro rsiuj ni' reii, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadro gusilazä, räjp Dios.

⁵⁰¿La et naädi benchee guiraa nani ruhuiitu?, räjp Dios.

⁵¹Räjp Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäuzä diajgtu. Di'tu chanälajz xtzuum Spirit

Dxan xten Dios, dizani cuääz neñ lastootu. Si'c bejn retoxtadgoldootu, si'cza rujntu. ⁵²Basacsí retoxtadgoldootu guiralii reniguii nani gunii xtidx Dios. Nicla tejni direni niu. Bagu't retoxtadgoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huiñätuni lo guxhtis te gunibeetu gujtni. ⁵³La'tu biannäjtu leii nani gunii reangl xten Dios loj Moisés, luxh la'tu ditu nucuadajag rediidxga.

Bagu'treni Esteban

⁵⁴Che biejn diajgreni rextidx Esteban, bidxe'chduxhrenei, rauya' läjgrenei sa'csi rdx'e'chrenei lo Esteban. ⁵⁵Rbäjz Sprit Dxan xten Dios neñ lastoo Esteban, ni'cni bahuiztu'tzni xhaguibaa, ro'c bahuini yälrdimbichasejz xten Dios. Bahuiizani suga' Jesucrist xladbee Dios. ⁵⁶Räjz Esteban lojreni:

—Colhuilaa. Narä cahuiä xhaguibaa cadro yu' Dios, ruhuiäza loj Xi'n Dios nani gujc Niguii; ani suga' xladbee Dios.

⁵⁷Guredxaduxhrenei basäuzareni diajgreni. Dxejcti baxunreni bixa'treni yejc Esteban. ⁵⁸Dxejc gudobyujrenini, guläärenei Esteban neñ guejdxga. Ro'c bacuaareni guij yejc Esteban. Che cagucuaareni guij yejcti, guläyareni xhajbreni; te niguii ni laa Saulo biannäj xhajbreni. ⁵⁹La_l ni cagucuaareni guij yejcti, gunii Esteban loj Jesucrist räjpni:

—Guejblu, Dad Jesucrist, cua' narä.

⁶⁰Dxejcti białb Esteban, bazuxhijbni, guredxa'ni räjpni:

—Dad Jesucrist, na'c gudzuublu dojlre yejc rebejnre, na'c gucuaquijlureni.

Gulujxsi guniini si'c, gujtni.

Saulo basacsí rexpejn Jesucrist

8 Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh neñ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

²Reniguii nani sanälajz Dios huicua'tz Esteban. Cayonduxhrenei sa'csi riareni gujt Esteban. ³Biäädzza Saulo, guixe-guixee basacsíni rebejn nani huililajz xtidx Dios. Biu'ni rolizreni, gunaazni reniguii näjza regunaa te basäunireni neñ latzguuii.

Basule' rexpejn Jesucrist xtidx Dios nez región Samaria

⁴Che bire'ch rebejn nani huililajz xtidx Dios, basule'reni xtidx Dios nez cadrotis sääreni. ⁵Tej rebejnnga laa Felipe. Siini nez te guedx Samaria. Ro'c basule'ni xtidx Dios. Räjpni:

—Jesús najc Crist nani cabäjztu jiaäd.

⁶Ro'c bachagsa' rebejn bacuadajgrenei rextidx Felipe, bahuizareni redzunro, remilagwr nani bejn Felipe. ⁷Gaii bejn yu' bendxab neñ lastooreni. Che gunibee Felipe guirii rebendxab lastoo rebejnnga, guredxa' rebendxabga, dxejcti biriireni

nen lastoo rebejn̄ga. Yu'za xhidajl bejn̄ nani digacdiru guiniib, yu'za reni rajc ni'reni, naareni. Con xcäl̄rnibee Jesucrist basiajc Felipe guiraa rebejn̄ga. ⁸Sa'csi gujc si'c, bibalazduxh guiraa rebejn̄ nen guejdxga.

⁹Guyu' te niguii ni laa Simón nen guejdxga. Bisieedni bejn̄ni xhidajl redzuun yäl̄bidxaa, basgueeni rebenguejdxga. Bidxeloduxh rebenguejdx lojni. Räj̄pni lo rebejn̄ rutru chu stee bejn̄ ni najc maazru ben̄ro lojni. ¹⁰Luxh guiraa rebejn̄, rebiuux, rebengool, rebenraj̄p, reben̄proob bacuadiajgreni xtidx bidxaaga, räj̄preni:

—Laani raj̄pni yäl̄rnibee xten Dios.

¹¹Xchero basgueeni rebejn̄, bidxelojreni rextzunyaäl̄bidxaani. Guiraa rebejn̄ huililajz xtiidxni.

¹²Dxejcti baluii Felipe xcuent xcäl̄rnibee Dios, näjza xcuent Jesucrist. Xhidajl rebenguejdxga huililajz rediidx nani gunii Felipe. Dxejcti birobnisreni, niguii näjza gunaa. ¹³Nägajcza Simón huililajz rediidxga dxejc gurobniszani. Dxejc guyunäj Simón Felipe. Che bahuii Simón lo redzunro, remilagwr nani cayuj̄n Felipe, bidxeloduxh Simón.

¹⁴Che biejn̄ diajg reapost ni yu' guedx Jerusalén huililajz reben̄ Samaria xtidx Dios, baxhaäl̄reni Pedr näjza Juan ro'c. ¹⁵Che bidzuj̄n guiro'preni guejdxga, gunabreni lo Dios xcuent rebejn̄ ni huililajzga te gudeed Dios Sprit Dxan xtenni lojreni, ¹⁶sa'csi gajd Sprit Dxan xten Dios jädläjz nen̄ lastooreni. Che huililajzreni, gurobnistisreni te gucbee rebejn̄ chuni'c najc rexpejn̄ Jesucrist. ¹⁷Dxejc batzuub Pedr

näjza Juan naareni yejc tejga renani ahuililajz xtidx Dios, dxejc badeed Dios Sprit Dxan xtenni biädläjzni nen̄ lastooreni.

¹⁸Che bahuii Simón biädläjz Sprit Dxan xten Dios lastoo rebejn̄ ni batzuub reapost naani yejcreni, rlajz Simón nudeedni meel loj reapost, ¹⁹räj̄pni lojreni:

—Col̄guniidx yäl̄rnibee loä te si'cza gudzubä naä yejc rebejn̄, te jiu' Sprit Dxan xten Dios nen̄ lastooreni.

²⁰Dxejcti räj̄p Pedr lojni:

—iSunitloj xmeellu con luj! Xho gunlu xhigab siilu Sprit Dxan xten Dios nani rudedxlia' Dios. ²¹Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl̄ nen̄ lastoolu. ²²Basie'ch lajzlu, badzucaj rexhigab guijdx xtenlu. Guredx-gunab lo Dios, top susiäj̄l lajz Dios xtoj̄llu ni bejn̄lu nen̄ lastoolu. ²³Naj narä nanä ruguilazduxhlu, luxh runduxhlu xhigabguijdx.

²⁴Dxejcti räj̄p Simón lo guiro'preni:

—Col̄nab loj Dios xcuentä te na'c sacä si'cni caniitu.

²⁵Che gulujxti bijreni diidx xcuent ni bahuiiojreni bejn̄ Jesucrist, che gulujx basule'reni xtidx Jesucrist loj reben̄ Samaria, gubisacreni Jerusalén.

Felipe näjza te dade' ni siääd nación Etiopía

²⁶Dxejcti biääd te xangl Dios, räj̄pni lo Felipe:

—Huij lo nezuyj ni rii guedx Jerusalén, ni rij nez guedx Gaza. Nezyujga rdej̄d lo reyubijdz.

²⁷Sä'ti Felipe. Che bidzujñni lo nezyujga, bidxaagni te dade' ni siääd naciõn Etiopía. Najcni te eunuco, najczani xcuxhtis reina Candace. Laani rgucweeni guiraa xmeel reinaga. Biääd dade'ga guedx Jerusalén te sagajñni Dios. ²⁸Siädbisacni lajdxni. Sobga'ni nen te gare't saruduxh, cayolñi xtidx Isaías, nani bacuaa xtidx Dios agujc xchero. ²⁹Dxejcti räjp angl xten Dios lo Felipe:

—Gubig cuä' gare'tga, guninä j dade'ga.

³⁰Che gubig Felipe cuä' gare'tga, biejn diajñi cayol dade'ga rextidx Isaías. Dxejcti räjp Felipe lojni: —¿La racbeelu ni caj lo guijt z nani cayollu, ä?

³¹Dxejcti räjp dade'ga lojni: —¿Xho gacbeäni palga rut gusule'dini loä?

Sas räjp dade'ga lo Felipe chä'pni nen gare'tga.

³²Cadro cayol dade'ga nen guijt z ni caj xtidx Dios rñii scree:

Di xiil cuedxa' che rinä bejnñi cadro guetni;

dxitis raa xiil che ruhuajrenini.

Si'c te xiil najc niguiire,

xhet rñiidini mase

rusacsíduxhrenini.

³³Basacsíduxhrenini.

Reguxhtis ni niujñ yälguxhtisni xhet laliidi bejnreni.

Xhet si'cti nunyäjñ gunreni.

¿Xho guiniinu yu' xpejnñi?

Ni abagu'trenini. Diruni guibajñ lo guedxliuj.

³⁴Dxejcti gunabdiidx ben Etiopía, räjpni lo Felipe:

—Gunilaa loä, chuni'c ruzä't niguii nani bacuaa reguijt z re, éla

ruzä'tni lagajc laani o la ruzä'tni ste'ca bejn, ä?

³⁵Gusloj basule' Felipe rediidx nani abil dade'ga. Dxejcti basule'ni rediidx xcuent Jesucrist. ³⁶Lañ ni sääreni lo nezyuj, bidzujñreni te lajt cadro yu' nis. Dxejc räjp dade'ga lo Felipe:

—iBahuii, ree yu' nis! ¿Xhi rudxojn tiobnisä?

³⁷Dxejc räjp Felipe lojni:

—Palga rililajzlu xtidx Dios nen lastoolu, saj z tiobnislu.

Dxejc räjp dade'ga lo Felipe:

—Rililazä Jesús najc Crist Xi'n Dios.

³⁸Dxejc gunibee dade'ga gusudxi gare't, sas biäjt guiro'preni, biu'reni nen nis, ro'c batiobnis Felipe dade'ga. ³⁹Che biriireni nen nis, huinä Sprit Dxan xten Dios Felipe ste'ca lajt. Dxejc diru dade'ga nuhii lo Felipe. Sä'ti dade'ga lajdxni, cabalazduxhni. ⁴⁰Dxejcti chela gucbee Felipe abidzujñni guedx Azoto. Baluiizani xtidx Dios nen guiraa reguejdx che bidzujñlini guedx Cesarea.

Huililajz Saulo rextidx Jesucrist

(Hch. 22:6-16; 26:12-18)

9 Lañtis cagusacsí Saulo rexpejn Jesucrist. Rlajzñi ju'tni guiraareni, ni'c huijñi lo bixhoj z nani rnibee, ²gunabni gac te guijt z chanäni lo reguidoo nen guedx Damasco te palga guidxälñi reni najc xpejn Jesucrist nen reguidooga, niguii sigac gunaa, guliibnireni, jädnänireni guedx Jerusalén te jäurenireni. ³Lañ sasajñi lo nezyuj, asiäddzujñgajxhni guedx Damasco, basaniya' te bal xhaguibaa,

basanijni guideb gabi cadro siädsaj Saulo. ⁴Dxejc biajbni lo yuj, biejn diajgni te xse' bejn nani canii lojni: —Saulo, Saulo, ðxhicuent rusacsílu narä, näjza rexpəna?

⁵Räjp Saulo lojni:

—¿Chuluj Dad?

Räjpni lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuaní' yejc caru'ch.

⁶Bidxebduxh Saulo, racejsni räjpni:

—Dad, ðxhini'c rlanjlu gunä?

Dxejc räjp Jesús loj Saulo:

—Huistie, biu' guedx Damasco.

Ro'c suluii te niguii xhini'c gunlu.

⁷Rebejn ni siädna Saulo sugadxireni, bidxebbreni sa'csi biejn diajgreni te xse' bejn, luxh rut lojdi bahuiireni. ⁸Che huistie Saulo lo yuj, baxhalni lojni, niluxh di lojni jien. Dxejc gunaazreni naani, sanärenini guedx Damasco. ⁹Ro'c guyu'ni choñ dxej, natiä'p balojni, dini niä', dizani niajw.

¹⁰Guedx Damasco rbäjz te xpejn Jesucrist ni laa Ananías. Baluiloj Jesucrist loj Ananías lo te bacal, räjp Jesucrist lojni:

—Ananías.

Dxejc räjp Ananías lojni:

—Anaree Dad.

¹¹Räjp Jesucrist lojni:

—Huistie te chäálu lo nezyuj ni laa Ladbee cad rbäjz Judas. Ro'c guiniabdiidxlu con te niguii ni laa Saulo, bejn Tarso. Cabejdx, canabni loä naj. ¹²Lo bacal abahuiini siäd te niguii ni laa Ananías te gutzuubni naani yejcní te fiini stehuält.

¹³Dxejcti räjp Ananías lojni:

—Dad, abiejn diagä xho basacsí niguiiga rexpejnlu neñ guedx Jerusalén. ¹⁴Luxh rebixhojz ni rnibee abadeed guijtjz lojni te guiniaazni ree guiraa rebejn nani rbedx-rniab lojlu, chanänireni jiäureni.

¹⁵Dxejcti räjp Jesucrist lojni:

—Huij, narä aguleäni te gunni xtzunä. Suluiini xtidxä loj rebenzijt nani digac xpen Israel, näjza loj reni rnibee renacion, näjza loj rexpejn Israel. ¹⁶Narä suluiä lo Saulo trabajwduxh ni tedni te jiädnajlni narä.

¹⁷Dxejcti säa Ananías, bidzujnni ro yu' cadro rbäzlaa Saulo. Batzuubni naani yejc Saulo. Dxejcti räjp Ananías loj Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siädldu, lagajc laani baxhalni narä te fiilu stehuält, te jiädläjzta Sprit Dxan xten Dios neñ lastoolu.

¹⁸Lagajc dxejc bitejb si'c xmelbäjł yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni. ¹⁹Dxejc gudajwni, guc nadaanni stehuält. Xchej guyunäj Saulo rexpejn Jesucrist neñ guedx Damasco.

Gusloj basule' Saulo xtidx Dios neñ guedx Damasco

²⁰Dxejcti gusloj basule' Saulo xtidx Dios neñ reguidoo xten rexpejn Israel, räjpni:

—Jesucrist najc Xi'n Dios nani gujc Niguii.

²¹Che biejn diajgreni xtiidxní, bidxeloreni, räjp lo sa'reni:

—¿La xhet laadi niguiire ni rusäu rexpejn Jesucrist neñ latzguuii

guedx Jerusalén, ä? Lagajcza dee bidzujn ree te guliibni rexpejn Jesucrist te chanänireni guedx Jerusalén lo rebixhojz.

²²Dxejcti gusutzu'tz Saulo guniini xtidx Dios. Basacajnni rexpejn Israel nani rbäjz Damasco sa'csi basule'pacni Jesús najc Crist nani rnibee.

Baxun Saulo guedx Damasco

²³Che gudejd xhidajl dxej, bachagsa' rexpejn Israel te nugu'treni Saulo. ²⁴Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujn guejdxga te ju'trenini. ²⁵Dxejcti che gojl te yääl basäl rexpejn Jesucrist Saulo nen te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejtz padeerga, te si'c baxunni guejdxga.

Bidzujn Saulo guedx Jerusalén

²⁶Che bidzujn Saulo guedx Jerusalén, rlajzni nuchaagni loj reni rililajz xtidx Jesucrist, niluxh guiraareni bidxejbrenini sa'csi direni gan ahuililajzni xtidx Dios. ²⁷Dxejcti huinä Bernabéni lo reapost, bijni diidx xcuent Saulo. Räjz Bernabé lojreni:
—Baluiloj Jesucrist lo Saulo loj nezyuj. Guninä Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

²⁸Dxejc bia'n Saulo guedx Jerusalén, bidxaagni lo rexpejn Jesucrist. ²⁹Dxejcti gusutzu'tz Saulo gusloj bijni xtidx Jesucrist lo rebejn. Dxejcti gudilnäj Saulo

rexpejn Israel nani rnii didx griegw. Laareni rdxechduxhrenei, rlajzreni nugu'treni Saulo sa'csi direni nichaglajz xtidx Jesucrist. ³⁰Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

³¹Dxejc guredxi lajz guiraa renani huililajz xtidx Dios nen reguedx Judea, nen reguedx Galilee, näjza nen reguedx Samaria, sa'csi diru Saulo nusacsä rexpejn Jesucrist, luxh guc xhidajlrureni. Basoobreni xtidx Jesucrist, bisieedrureni rextiidxni, gucnäjza Sprit Dxan xten Diosreni.

Biajc Eneas

³²Che gusloj sahuui Pedr guiraa renani huililajz xtidx Dios, huihuizani rexpejn Jesucrist nani yu' guedx Lida. ³³Ro'c bidxäläni te niguii ni laa Eneas. Agujc xhujn ijz naga' niguiiga cayacxhuuni. Abixu'n tiejxhni, digacdiru guiliini.

³⁴Dxejcti räjp Pedr lo Eneas:
—Eneas, cagusiajc Jesucrist guejblu. Huistie, guläs xta'lu.

Lagajc dxejc biajcnä, huistietini.

³⁵Guiraa rebejn ni rbäjz guedx Lida, näjza reben ni rbäjz guedx Sarón, bahuiireni abiajc niguii ni cayacxhuu. Dxejc xhidajlrureni nen reguejdxga huililajz xtidx Dios.

Gubansac Dorcas

³⁶Nen guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn. ³⁷Gucxhuu gunaaga,

dxejc gujtni. Che gulujx bahuajz rebejn togoolga, huitixhrenini nen te yu' ni najc jiaa yejc sa'ni. ³⁸Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalreni tiop dade' saxii Pedr. Räjpn redade'ga loj Pedr: —Bejn huen salu chonnu Jope nanajga.

³⁹Dxejc sanägajc Pedr redade'ga. Che bidzujnreni, huinäreni Pedr nen yu' cadro naga' togunaaga. Ro'c cayonduxh guiraa regunabiuud, baluiireni lo Pedr guiraa rexbajbreni nani benchee Dorcas, ni badeed Dorcas lojreni che nabajnni. ⁴⁰Dxejcti gunibee Pedr birii guirareni nen yu'. Dxejc bazuxhijbni, guredx-gunabni loj Dios. Dxejc gubirēni bahuiini loj togoolga, räjpmi: —Tabita, huistie.

Dxejcti baxhal gunaaga balojni; che bahuiini loj Pedr, gurejni. ⁴¹Dxejc gunaaz Pedr naani, basuliinini, dxejcti gurejdx Pedr regunabiuud näjza sgaii reni najc rexpejn Jesucrist. Baluiini gunaaga lojreni te bahuilojreni agubansacni. ⁴²Gucbegajc reben guedx Jope xhini'c gujc, dxejcti xhidajl rebejnga huililajz xtidx Jesucrist. ⁴³Xchejza guyu' Pedr ro'c, guläjzmi roliz dade' ni laa Simón, nani ruscoodz guijd.

Pedr con Cornel

10 Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc benzijt, dini gac ben Israel. ²Bensacduxh najc Cornel, näjza

guiraa resa'ni, sacruduxh rusoobreni xtidx Dios. Rudeedni gojn lo reben proob xten Israel. Guixe-guixee rbejdx, rniabni lo Dios. ³Te dxej, si'cti rcachon gudxej, si'c lo bacad bahuiini loj xangl Dios, räjpmi loj Cornel:

—¿Conlu Cornel?

⁴Che bahuii Cornel xangl Dios, bidxejbni, bidxelojni, räjpmi lojni: —¿Xhini'c, Dad?

Dxejcti räjpn angl xten Dios lojni: —Che rniilu lo Dios, riejn diajg Dios xtiidxlu, che rudeedlu meel lo reben proob, ruhuii Dios ni rujnlu, ni'cni rnalajz Dios luj. ⁵Naj baxhal tiop niguii chää guedx Jope te chaxiireni Simón Pedr. ⁶Rbäjzmi roliz te dade' ni laa Simón nani ruscoodz guijd. Roliz Simón sojb gajxh ro' nisdoo. Simón Pedr gusule' xhini'c nanab gunlu.

⁷Che sii angl xten Dios, gule Cornel tiop mos xtenni näjza te xsoldaadni nani sanälajz Dios.

⁸Dxejc bij Cornel diidx lojreni xcuent ni gusajcni, dxejc baxhalni redade'ga guedx Jope.

⁹Che bara yääl, sääreni lo nezyuj. Asiäddzungajxhreni guedx Jope, pet si'cti läidxejni. Lagajc orga huä'p Pedr yecyu' te guininäjmi Guejb Dios.

¹⁰Calanduxh Pedr, rlajzmi gaumi. Lal ni cayujnreni xhi gauxhuejni, gusloj canixcalni. ¹¹Bahuiini bixal xhaguibaa, bahuiizani biäjt te bariadro nani naliib guidap xi'ni. Siädjiätchäiini gajxh nez loj Pedr. ¹²Nen bariaadga yu' guiraa reman ni yu' lo guedxliuj nani rsianäj guidap ni'ni, näjza renani rxeeb si'c bal, näjza renani rutajt. ¹³Gunii Dios lo Pedr, räjpmi lojni:

—Pedr, huisu te ju'tlu man gaulu.

¹⁴Dxejc räjp Pedr lojni:

—Na'c Dad. Nunc gauä sa' remandxuudxga, abia'a dina gauä reman nani rni xleilu najc mandxuudx.

¹⁵Gunisac Dios loj Pedr, räjpni:

—Na'cru guiniilu nacdXuudx reman nani abasia.

¹⁶Che gujc chon huält gujc si'c, huä'psac bariaadga xhaguibaa.

¹⁷La_l ni cayujn Pedr xhigab xhichani'c säloj nani bahuiini, bidzujn reniguii ni baxhal_l Cornel ro' yu'ga, sa'csi agunabdiidxreni caro rbäjz Simón nani ruscoodz guijd.

¹⁸Che bidzujnreni rolä'ga canabdiidxreni la ro'c rbäjz te dade' ni laa Simón Pedr. ¹⁹La_l ni cayujn Pedr xhigab xcuent ni bahuiini, gunii Sprit Dxan xten Dios lojni, räjpni:

—Bahuii, chon dade' caguiillu.

²⁰Biäjt yejc yu're te jinälureni. Na'c gunlu xhi stee xhigab, sa'csi lagajc narä baxhaläreni lojlu.

²¹Dxejcti biäjt Pedr jiaaga, bidzujn_{ni} cadro suga' redade'ga, räjpni lojreni:

—Narä nacä ni caguiiltu. ¿Xhi siääd_{tu}?

²²Räjp reniguiiga lo Pedr:

—Cornel, nani rnibee te gayuu soldaad, te be_{nsa}'c, te bejn_{ni} ni rajn_{ni} Dios, te bejn_{ni} ni sanälajz rexpejn_{ni} Israel, laani baxhal_l nuure lojlu, sa'csi räjp angl xten Dios lojni, jiopxiinu luj te jiejn diajgnu xtiidxlu.

²³Dxejcti gurejdx Pedr rebejn_{ga}, biu'reni nen_{ni} yu'. Ro'c bia'nreni te guxhijn. Che bara yääl, Pedr näjza sgaii ben_{ni} Jope ni najc xpejn

Jesucrist, sanä redade' ni baxhal_l Cornel.

²⁴Che bara yääl, bidzujnreni guedx Cesarea. Abatojp Cornel resa'ni näjza reexamigwni rolijzni. Cabäjzreni guidzujn_{ni} Pedr. ²⁵Che bidzujn_{ni} Pedr ro yu', huichagloj Cornelni, bazuxhijbni lo Pedr.

²⁶Dxejc gunaaz Pedr naani, guläsnini, räjpni lojni:

—Huisulii, sa'csi narä nacä te niguiitis sigajc najclu.

²⁷Cayuiireni diidx, biu'reni nen_{ni} yu'. Che biu'ni bahuii Pedr nadxagsa' rebejn_{ni} nen_{ni} yu'. ²⁸Räjp Pedr lojreni:

—Anajntu xhi caj lo leii xten rexpejn_{ni} Israel: digacdi guchaag te xpejn_{ni} Israel loj benzij_t nani digac xpejn_{ni} Israel, digacdiza jiu'ni rolijzreni. Niluxh agunii Dios loä lo te baca_l, te gacbeä digacdiru jiuä releiire. Abaluu Dios narä sajc guchagsa'ä chutis bejn_{ni}. ²⁹Ni'cni, che gurejdx_{tu} narä biälga_{cä}. Naj rniabdidxä, ¿xhicuent gurejdx_{tu} narä?

³⁰Dxejcti räjp Cornel loj Pedr:

—Gudajp dxej si'cti rcachon_{ni} gudx_{ej}, cabedx-canabä lo Dios rolizä chela baluiloj te niguii najc_w te ladnol ni rdimbicha'. ³¹Najni loä: “Cornel, che rbedx-rniablu lo Dios, riejn diajg Dios xtiidxlu, che rudeedlu meel lo reben_{ni} probb, racbee Dios, di lajzni jääl_{ni} luj.

³²Ni'cni naj_{ni} baxhal_l tiop dade' chää guedx Jope te chaxiireni Simón Pedr nani rbäzlaa rolijz Simón ni ruscoodz guijd. Rolijzni sojb gajxh ro' nisdoo. Che guidzujn_{ni}, laani gusule'ni xtidx Dios lojtu.” ³³Dxejc baxhalä chu biädxiiilu. Xquixtiostelu

biäädlu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

Basule' Pedr xtidx Dios rolijz Cornel

³⁴Dxejcti räjp Pedr lojreni:

—Naj gubeliä tebloj rinälajz Dios guiraa bejn; rebenzijt sigajc rexepejn Israel. ³⁵Niluxh rinälajz Dios chutis bejn guedxliuj nani ruzuxhijb lojni, nani rusooob rextiidxni, nani laaca nabajn. ³⁶Badeed Dios xtiidxni loj rexepejn Israel, basule' Dios biääd Jesucrist te gac chanälaaznu Dios te cuedxilajznu, sa'csi Jesucrist rnibee guideb guedxliuj. ³⁷Che gulujx baluii Juan ni rutiobnis xcuent yälrobnis, dxejc gusloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez nen reguedx Judea. ³⁸Nancheetu xho badeed Dios yälrnibee loj Jesucrist, bejn Nazare't. Badeedza Dios Sprit Dxaan xtenni te cuääzni nen lastooni. Nancheetu xho bejnri redzunro, remilagwr, basiajcni rebejn nani caguteed bendxab trabajwduxh. Redzunroga bejnri sa'csi bennäj Diosni dzuun.

³⁹Bahuiloonu guiraa redzuun ni bejn Jesucrist nen reguedx Israel näjza guedx Jerusalén. Bacuaa rexepejn Israel Jesucrist lo crujz, ro'c gujtni. ⁴⁰Dxejcti che biojn dxej, guläs Dios Jesucrist lo rebengut, gubansacni, badeed Dios yälrnibee lojni te gujc biädluiloj Jesucrist loonu. ⁴¹Di Jesucrist nululoj loj chutis bejn. Lojtis renani agule Dios gutie'ch diidx gubansac Jesucrist lo rebengut, loj reni'c baluilojni. Nuure nadxagnu loj reni gule

Dios. Bidaunänuni, bidunnäänuni che gubansacni lo rebengut.

⁴²Baxhalni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte rebenbajn näjza xte rebengut.

⁴³Galooli bacuaa renani gunii xtidx Dios lo guijtz, räjpreni: “Guiraa rebejn ni chalilajz xtidx Jesucrist sudzucay Dios xtojlreni.”

Biädlajz Sprit Dxaan xten Dios nen lastoo rebenzijt

⁴⁴Laĵ ni canii Pedr rediidxga, biädlajz Sprit Dxaan xten Dios nen lastoo renani huililajz xtiidxni.

⁴⁵Bidxeloj guiraa rexepejn Israel nani huiinä Pedr sa'csi biädlajz Sprit Dxaan xten Dios nen lastoo renani najc benzijt. ⁴⁶Gucbeereni biu' Sprit Dxaan xten Dios lastoo rebenzijt sa'csi bejn Sprit Dxaan guniireni stee didxsaj nani gajdreni guisieed, calä'pzareni xpala'n Dios. ⁴⁷Dxejcti räjp Pedr lo rexamiigwini:

—Chu laa ni gudxojn yälrobnis lo rebejnre, ni sigajc biädlajz Sprit Dxaan xten Dios nen lastoonu, abiädlajzni nen lastoo rebejnre.

⁴⁸Dxejcti gunibee Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiopchon dxej.

Basule' Pedr xho biädlajz Sprit Dxaan xten Dios lastoo rebenzijt lo rexepejn Jesucrist nen guedx Jerusalén

11 Reapost, näjza renani huililajz xtidx Jesucrist nen reguedx Judea, biejn diajgreni huililajz rebenzijt ni digac xpejn Israel xtidx Dios. ²Che bidzujn

Pedr guedx Jerusalén, rexpejn Israel nani rlajz chu guiraa rexpejn Jesucrist bee si'cni bejn toAbram, gudilnäjreni Pedr. ³Räjpreni lo Pedr:

—¿Xhicuent biu'lu rolizj benzijt nani xhet yu'di bee si'c nuure? ¿Xhicuent gudaunäjlureni, ä?

⁴Dxejcti basule' Pedr diidx xho gujc huijni loj rebenzijt:

⁵—Yu'ä guedx Jope. Cabedx-canabä lo Dios, dxejc si'c gunixcalä, bahuiä bixal xhaguibaa, siädjiäjt te bariadro, naliib guidap xi'ni. Siädjiätchäiini nez loä. ⁶Che bahuisa'cä, nenga yu' guiraloj reman ni yu' lo guedxliuj nani rsianäj guidap ni'ni, renani rbäjz neñ dajn, renani rxeeb si'c bäl, näjza renani rutajt. ⁷Dxejcti biejn diagä naj Dios loä: “Pedr, huisu. Bagu't man gaulu.” ⁸Dxejcti räpä: “Digacdini Dad. Nicla tej gadna gauä te man nani rnii leii xtenlu najc mandxuudx.” ⁹Dxejc gunisac Dios loä: “Na'cru guiniilu nacdxuudx recos nani abasia Dios.” ¹⁰Che gujc choñ huält gunii Dios si'c, huä'psac bariaadga xhaguibaa. ¹¹Lagajc orga bidzujñ choñ dade' ro yu' cadre yu'ä. Guedx Cesarea biriireni, biädxiiireni narä. ¹²Dxejc gunii Sprit Dxan xten Dios loä: “Huinä reniguiire. Na'c gun tiop lajzlu.” Dxejcti huinää xho'p beñ Jope, dade' nani rililajz xtidx Jesucrist. Che bidzujñ guedx Cesarea, biu'nu rolizj Cornel. ¹³Basule' Cornel diidx loonu xho baluiloj te angl xten Dios lojni lagajc rolizjni. Räjpre angl xten Dios lojni: “Baxhal tiop dade' chää guedx Jope te chaxiiireni Simón ni rniireni Pedr.

¹⁴Laani siniini xtidx Jesucrist te gacbeelu con resa'lu xhini'c nanab gunlu te guslaa Dios la'tu lo rextojltu.” ¹⁵Che gusloj cagusule'ä xtidx Dios lojreni, biu' Sprit Dxan xten Dios neñ lastooreni si'c biu'ni lastoonu galooli. ¹⁶Dxejcti banaj lazä rextidx Dad Jesucrist che najni: “Juan abatiobnis con nistis, biädla narä suxhalä Sprit Dxan xten Dios te cuääzni neñ lastootu.”

¹⁷Dxejc räjpre Pedr:

—Palga badeed Dios Sprit Dxan xtenni lojreni si'c baniidxni Sprit Dxan xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxan xtenlu lojreni.”

¹⁸Che biejn diajg reben Jerusalem rediidxga, biäuu ro'reni, dirureni nidiñäj Pedr. Alga gulä'preni xpala'n Dios, räjpreni:

—Näjza rebenzijt nani digac rexpejn Israel abasaan Dios gusiechlajzreni te guibanäjreni Dios par tejpas.

Rexpejn Jesucrist ni yu' guedx Antioquía

¹⁹Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näjza lo guedx Antioquía sa'csi cadejdreni trabajwduxh. Basule'reni rextidx Jesucrist lojtis rexpejn Israel. ²⁰Lojreni nadxaag gaii beñ Chipre, näjza gaii beñ Cirene. Redee bidzujñ guedx Antioquía. Ro'c gusloj caniireni lo benzijt nani rnii didx griegw. Basule'reni lo rebenzijtga guiraa xcuent Jesucrist. ²¹Gucnäjd Diosreni caniireni

xtiidxni. Xhidajl rebejn̄ga huililajz xtidx Jesucrist, basoobreni xtiidxni.

²²Che biejn diajg rexpejn̄ Jesucrist ni yu' guedx Jerusalén rililajzreni, baxhalreni Bernabé guedx Antioquía. ²³Che bidzujn̄ Bernabé guedx Antioquía, bibalazduxhni che bahuiini xho cayunnäj Dios rebejn̄ga. Dxejcti balijdx Bernabéreni: gutijp lajzreni gusoobreni xtiidxtis Jesucrist. ²⁴Beñsa'c najc Bernabé. Rililazduxhni xtidx Jesucrist. Racnäjduxh Sprit Dxan xten Diosni. Xhidajl rebejn̄ huililajz xtidx Jesucrist guejdxga.

²⁵Che birii Bernabé guejdxga, huijni guedx Tarso satiilni Saulo. ²⁶Che bidxäl̄ni Saulo, huinänini guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidalduxh bejn̄. Ganid benguejdxga gulälaj “Cristianos” renani rililajz xtidx Jesucrist.

²⁷Neñ redxejga birii gaii dade' nani rnii xtidx Dios. Guedx Jerusalén biriireni, bidzujn̄reni guedx Antioquía. ²⁸Huisulii te dade'ga ni laa Agabo. Gucnäj Sprit Dxan xten Diosni te guniini siäd te gubijn guideb guedxliuj. Luxh gujc gubijn̄ga neñ reijz ni gunibee rei Claudio ni sajcru. ²⁹Dxejcti rexpejn̄ Jesucrist ni rbäjz guedx Antioquía bejn̄ xhigab cade tejreni gudeed meel chää lo rexpejn̄ Jesucrist ni rbäjz neñ reguedx Judea.

³⁰Batojpreni meel, baxhalrenini lo rebengool ni rnibee rexpejn̄ Jesucrist ro'c. Saulo näjza Bernabé huinä meelga che huijreni Judea.

Gujt Jacoob, biäu Pedr neñ latzguiib

12 Neñ redxejga, trabajwduxh bateed rei Herodes gaii rexpejn̄ Jesucrist. ²Gunibeeni gujt Jacoob betz Juan, biru' guejni. ³Che bahuii Herodes bibalazduxh rexpejn̄ Israel sa'csi bagu'tni Jacoob, gunibeeni gunazgajcreni Pedr. Dee gujc neñ redxe lanij che rajwreni yätxtiil ni di saguij. ⁴Che gunaazreni Pedr, biäuni neñ latzguiib. Gunibee Herodes biäd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuäani Pedr te guetni nez loj rexpejn̄ Israel che ted lanij. ⁵Yu'ti Pedr neñ latzguiib, dxejcti durtis cabejdx, canab rexpejn̄ Jesucrist lo Dios xcuent Pedr.

Gulää Dios Pedr neñ latzguiib

⁶Bidzujnti dxe bispr dxej ni rlaiz Herodes nibää Pedr nez loj rexpejn̄ Israel. Yäälga nagayejs Pedr galäii tiop soldaad. Caden̄ naliib guiro'p naa Pedr. Stiop soldaad canäj ro' latzguiib. ⁷Chela baluiloj te angl xten Dios, bianij te bajl nani basanij neñ latzguiib. Dxejcti gunaazni xhajcw Pedr, basniibnini te gubajnni. Räjpn̄i lo Pedr:

—Basquejnga, huistie.

Dxejcti bixec recaden̄, bitejbreni naa Pedr. ⁸Räjpn̄ xangl Dios lo Pedr:

—Gojt xhajblu, baläj xcura'chlu.

Si'c bejn̄ Pedr, dxejc räjpn̄ xangl Dios lo Pedr:

—Gojt xhablajzlu, gudanajl narä —räjpn̄i.

⁹Biriitini latzguiib sanajlni angl xten Dios. Niluxh dini gun xhigab guliipac nani bejn xangl Dios. Bejnni xhigab pet canixcalni.

¹⁰Gudejdreni nez loj te soldaad, gudedgajcreni nezloj steeni, dxejc bidzujnreni ro' puertguiib xten latzguiib nani caj lo nezyuj ni rdejgd galäii guejdxga. Xtebca bixal puertroga, biriireni gusajreni tebzeyuj. Dxejcti te squiin gunitloj xangl Dios. Xtebtis Pedr sasaj lo nezyuj. ¹¹Dxejc si'cni gubajñ Pedr, bejnni xhigab:

—Naj sii nanä baxhal Dios te xanglni baslaa narä ladzñaa Herodes te digacdi gun rexpejn Israel nani rlajzreni gunnäjreni narä.

¹²Che gucbee Pedr xhi gusajcni, huijni rolijz Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr. ¹³Cagusejz Pedr rolä', dxejc gubig te dxa'p ni laa Rode, bacuadiajgni ro lä'. ¹⁴Che biembec Rode xse' Pedr, sa'csi bibalazduxhni, biallajzni nuxhalni ro lä'. Alga baxuñni biusacni nen yu', räjpni lojreni:

—Pedr suga' ro lä'.

¹⁵Dxejcti räjpreni lo Rode:

—Yejclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

¹⁶Dxejcti laltis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr. ¹⁷Dxejcti bazääb Pedr ñaani te na'cru jiejyreni. Dxejc bij Pedr diidx

xho baxhal Dios ro' latzguiib. Dxejc räjpni:

—Colchaye'tz lo Jacoob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

¹⁸Che bara yääl, rsildooru, bieiduxh resoldaad sa'csi direni gan xho gujc birii Pedr nen latzguiib.

¹⁹Gunibee Herodes huitiilreni Pedr, gunabdiidxzani lo resoldaad xho gujc birii Pedr, dxejc gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

Gujt Herodes

²⁰Bachechduxh reben Tiro näjza reben Sidón Herodes, ni'cni diruni gusaan guto' rebejn nez cadro rnibeeni xhi gau reben Tiro näjza reben Sidón. Ni'c biääd xhidajlreni te guiniabreni jääj lajzni, te na'cru guidxe'ch Herodes lojreni. Abenxgaareni xamiigwreni Blasto, mos ni yu' lo reii Herodes, mos ni sajrcu lo guiraa rexmos Herodes. Guninäj Blasto Herodes xcuentreni te na'cru guidxechnäj Herodes rebejnğa. ²¹Basoobtini te dxej te guininäjnirenini. Dxejga gojt Herodes xhajn reiini, gurejni lo xyacxhil reiini. Dxejcti gusloj caniini didxa'c loj rebejnğa. ²²Guredxa' rebejn räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

²³Lagajc dxejc biääd te angl xten Dios, bejnni gusloj cayacxhuu Herodes, gudajw rebisiujg Herodes,

gujtni sa'csi basaanni gunii rebejn najcni te dios, sa'csi dini niliä'p xpala'n Dios.

²⁴Xhidajl bejn biejn diajgni xtidx Dios, huililajzreni xtidx Dios.

²⁵Che gulujx badeed Bernabé näjza Saulo meel ni batojp reben Antioquía lo rebengool, biriireni guedx Jerusalén. Sanäreni Juan ni rniireni Marcw lo guedx Antioquía.

Gule Sprit Dxan xten Dios Bernabé näjza Saulo

13 Lo rexpejn Jesucrist ni rdxaag sa' guedx Antioquía guyu' gaii niguii ni gunii xtidx Dios, näjza gaii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, näj Simón ni rniireni Negr; näj Lucio, beñ Cirene; näj Manaén ni gulanäj reii Herodes gujcn si'c bejtzni; näjza Saulo. ²Bidzujñ te dxej cagucua'nreni lañ ni cabedx-canabreni lo Dios, dxejc räjp Sprit Dxan xten Dios lojreni:

— Colcue Bernabé näjza Saulo te gunreni dzuun ni rlazä gunreni.

³Che gulujx bacua'nreni, che gulujxza guredx-gunabreni lo Dios, batzuubreni naaren i yeje guiro'preni, te si'c baxhañreni Bernabé näjza Saulo te guluiireni xtidx Dios ste'ca lajt.

Guiro'preni baluui xtidx Dios lo reben Chipre

⁴Baxhañ Sprit Dxan xten Dios Saulo näjza Bernabé guedx Seleucia. Ro'c biu'reni nen barcw, sääreni nez yuj ni tre' galäi nisdoo, ni laa Chipre. ⁵Che bidzujñreni Chipre, biu'reni guedx Salamina.

Ro'c basule'reni xtidx Dios nen guiraa rexquidoo rexpejn Israel. Näj Marcw gucnäjreni. ⁶Che cuansajreni guideb yuj Chipre, bidzujñreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejn Israel. Cagusgueeni rebejn guejdxga, räjpni xtidx Dios caniini, niluxh dini gac xtidx Dios. ⁷Bidxaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé näjza Saulo, sa'csi rlazni jiejn diajgni xtidx Dios. ⁸Dxejcti Barjesús, ni laaza Elimas, bidxagdijñni guiro'preni sa'csi di rlazni chalilajz Sergio Paulo xtidx Dios. ⁹Saulo, nani laaza Pabl, bahuiztu'tz loj Barjesús. Batijp Sprit Dxan xten Dios lastoo Pabl, räjpni loj Barjesús:

¹⁰—Rusgueduxhlu rebejn, najclu benlatsiaj, benguidxduxhlu, najclu xi'n Satanás, bendxab ni rnibee. Rdxechnäjzalu guiraa recossa'c xten Dios. ¿Guc cuääz guxhiidlu xtidxlii Jesucrist te di chalilajz bejn xtidx Jesucrist? ¹¹Naj siääd xcastiigw Dios yejclu. Xhidajl dxej sicäjy lojlu, xhetliidi fiilu —räjp Pabl.

Gujcsi räjpni si'c, bicägajc lojni. Dxejctiru cuansajni caguuiini chu guiniaaz naani guluiini canejz chääni. ¹²Che bahuii Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcärluluii Dios.

Bidzujñ Pabl näjza Bernabé guedx Antioquía xten distrit Pisidia

¹³Che baluux Pabl näjza resa'ni xtzuunreni guedx Pafos, biu'reni

neñ barcw, gudejdreni lo nisdoo, sääreni guedx Perge neñ estad Panfilia. Che bidzujñreni guejdxga, gubisac Juan, ni rniireni Marcw, Jerusalén. ¹⁴Dxejcti birinäj Pabl resa'ni guedx Perge, sääreni guedx Antioquía neñ distrit Pisidia.

Dxejc te dxe sabd, dxej ni rusilajz rexepejn Israel, biu'reni neñ xquidoo rexepejn Israel, ro'c gurejreni. ¹⁵Che gulujx bil te dade' reguijtz xten Dios ni laa leii nájza reprofet', baxhał reguxhtis xten guidoo chu huigajñreni, räjpreni lo Pabl nájza Bernabé:

—La'tu sa'nu, palga rajptu te diidx ni gulijdx rebejnre, colguiniini.

¹⁶Dxejc huisulii Pabl, guläśni naani bejnni seen lo rebejn te cuadiajgreni xtiidxni. Räj p Pabl lojreni:

—Colcuadiajg, la'tu rexepejn Israel, guiraatu ni rajñ Dios.

¹⁷Galooli gule Xtios rexepejn Israel retoxtadgoldoonu. Luxh che guläjzreni naciön Egipto, bidalduxh retoxtadgoldoonu. Gucnäjduxh Diosreni bejnni remilagwr, te guläänireni guedx Egipto. ¹⁸Tiuu ijz guläjzreni lo reyubijdz. Xhidajł huält direni nusoob xtidx Dios, niluxh empac gucnäjza Diosreni.

¹⁹Guyu' gajtz naciön guläjz neñ reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu.

²⁰Dxejcti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexepejn Israel. Samuel nani gunii xtidx Dios gujc lult juejz. ²¹Dxejcti gunab rexepejn Israel te reii lo Dios te guinibee reiiga lojreni. Badeedti

Dios Saúl xi'n Cis, sa' toBenjamín. Gunibeeni tiuu ijz. ²²Che badzucaj Dios Saúl, badeedni gunibee torei David. Räj p Dios: “Agucbeä David xi'n Isaf rujn tejsi xhigab con narä. Susoobni xtidxä sujñni guralii ni rlazä gac.”

²³Räj pza Pabl:

—Galooli bia'n diidx lo rexagdoo David guxhał Dios te bejn ni gudzucaj xtojłnu, ni gusłaa nuure lo dojl. Naj aguzojb diidxga. Jesucrist najc bejnğa, rudzucajni xtojłnu, rusłaa ni nuure lo dojl. ²⁴Che gusloj cagulijdx Juan rebejn, baluini nanabpac gusiechlajz rexepejn Israel, tiobnisreni te jia xtojłreni. ²⁵Niluxh guxii riäädx guluux Juan dzuun ni badeed Dios gunni che räj pni lo rebejn: “¿Chu rujntu xhigab nacä narä? Dina gacä Crist nani bia'n diidx guxhał Dios. Colhuii, detzä siääd tej ni sacduxhru loä; nicla gac surloä te cuää xcura'chni.”

²⁶Räj pza Pabl:

—Rniä lojtu sa'ä, rexagdoo toAbram, nájza lo chutis ni rajñ Dios, loonu baxhał Dios xtiidxni ni rusule' xho rudzucaj Jesucrist xtojłnu, xho rusłaa ni nuunu lo dojl. ²⁷Rebejn Jerusalén, nájza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rołreni xtidx Diosga gasob sabd. Niluxh che bagu'treni Jesucrist, guzojb xtidx Dios ni caj lo guijtzga. ²⁸Balijdxreni Pila't ju'tni Jesucrist, luxh xhet bejndini te guetni. ²⁹Che bagujc guiraa ni caj lo guijtz xcuent Jesucrist, gulätreni Jesucrist lo cruzj, bacua'tzrenini neñ baa cuä'

te guilaj. ³⁰Dxejcti guläs Dios Jesucrist lo rebengut. ³¹Balti huält baluiloj Jesucrist lo rexamigwni nani biädnajlñi nez rexyuj Galilee, renani biädnajlzani nez guedx Jerusalén. Bahuilojreni gubansac Jesucrist lo rebengut, te naj rusule'reni diidx xcuent Jesucrist.

³²Naj siopnänu xtidx Diosre lojtu te guibalajztu. Agujc xchero bia'n Dios diidxre con retoxtadgoldoonu.

³³Guläs Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj nen Salmo ni bacuaa toDavid. Lo Salmo ni rojp räjp Dios: “Luj najclu xi'nä. Nadxey guleälu te guinibeelu.”

³⁴Räjpza Pabl:

—Dxjecru stee lajt caj xcuent ni guläs Diosni lo rebengut te nuncru guetni. Scree bacuaa te niguii, räjp Dios: “Sunidxä recossa'c lojlu si'c ni bia'nä diidx con toDavid.” ³⁵Ni'cni bacuaaza toDavid nen stee Salmo ni gunii Dios, guniini: “Dipaclu gusaan gudx tiejxh Xi'nlu nani sanälajzlu.”

³⁶Che gulujx gunibee toDavid lo retoxtadgoldoonu, si'cni badeed Dios gunni, dxjec gujtñi. Biga'tznäjñi retoxtadgoldooni. Niluxh guyujdx tiejxh toDavid. ³⁷Niluxh guläs Dios Jesucrist lo rebengut, ni'c di tiejxhni niujdx. ³⁸Ni'cni colyabee, la'tu resa'ä, Jesucristre, bejn ni cania xcuentni, laani rudzucajni rextojlñu.

³⁹Chutis ni rililajz xtidx Jesucrist ruslaa Jesucristni loj guiraa rextojlñi nani digacdi guibicaj mascä rusoobni guiralii ni caj lo leii xten toMoisés. ⁴⁰Colsusin te na'c sajctu recos ni caj lo guijtñi bacuaa te niguii nani bacuaa xtidx Dios:

⁴¹Colhuilaa, la'tu ni ruxhiznäj xtidxä colguidxeloj, colnitloj, sa'csi naj ni nabajntu sunä te dzunro, te milagwr nez lojtu, niluxh dipac lajztu chalii, mascä jiääd chu gusule'pacni lojtu.

⁴²Gulujxti xtidx Pabl, biunejz rebejn. Che birinäj Pabl Bernabé biädñi rebejnre lojreni, räjpreni: —Jiädsactu ste xmaan te gusule'rutu rediidxre loonu.

⁴³Che care'ch rebejnğa, xhidajl rexpejn Israel, näjza xhidajl rebenzijt nani rusoob xtidx Dios si'c rujñ rexpejn Israel, birinajlreni Pabl näjza Bernabé. Dxejc balijdxreni rebejn ni siädnajlreni, räjpreni lojreni chanuutis chalilajzreni didxlii xcuent Jesucrist.

⁴⁴Che gojlti stee sabd, dxcej ni rusilajz rexpejn Israel, xhidalduxh rebenguejdx bire' te gucuaadjgreni guinii Pabl xtidx Dios. ⁴⁵Che bahuii rexpejn Israel guiraa rebejn ni bire', bidxechlajzreni, gucnadareni. Dxejc gusloj cadxagdijl rexpejn Israel Pabl. Che rniini te diidx, laareni rniireni “didxxhiini”. Caniyajzareni Pabl näjza Bernabé, caguereni lojreni. ⁴⁶Luxh di Pabl niclaza Bernabé nidxejb. Gusutijptisreni, räjpreni lo rebejn:

—Nungäjñ ganid lojtu guiniinu xtidx Dios, sa'csi la'tu najctu rexpejn Israel. Niluxh ditu chalilajz xtidx Dios, lagajc la'tu caniitu digacdi guibannäjtu Dios par tejpas. Ni'c sibiré loonu, te guiniinu xtidx Dios lo rebenzijt ni digac xpejn Israel. ⁴⁷Sa'csi si'c agunibee Xtiosnu. Scree caj xtidx Dios lo guijtñi:

Suxhalātu te guluiilu rextidxä lo rebenzijt ni digac xpejn Israel, te chalilajz rebejnğa xtidxä, te laareni lo xtojłreni, cadrotis yu'reni lo guedxliuj, räjp Dios.

⁴⁸Che biejn diajg rebenzijt rediidxre, bibalazduxhrene, gulä'preni xpala'n xtidx Dios. Renani gule Dios galooli huililajz xtidx Dios. Xhidajł najcreni. ⁴⁹Bire'ch xtidx Dios guideb nez reguejdxga. ⁵⁰Dxejc rexpejn Israel balijdx regunaa ni sajcro, näjza reniguii ni sajcro nen guedx Antioquía, te bidxechnäjreni Pabl näjza Bernabé, barilaagwreni Pabl näjza Bernabé te biunejzreni guedx Antioquía. ⁵¹Dxejcti Pabl näjza Bernabé gubijb guxhuj ni'reni si'c te seen te gacbee rebejn xhet laadi bejnreni. Sät'tireni guedx Iconio. ⁵²Baspaa Dios lajz rexpejn Jesucrist guedx Antioquía xten Pisidia. Bazutijpza Sprit Dxan xten Dios lastooreni.

Guyu' Pabl näj Bernabé guedx Iconio

14 Che bidzujł Pabl näjza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel näjza lo rebenzijt. Xhidajł rebejnğa huililajz xtidx Dios. ²Niluxh sgaii rexpejn Israel nani di chalilajz xtidx Jesucrist balijdx rebenzijt te bidxechnäjreni rebejn nani huililajz xtidx Jesucrist. ³Ni'cni bia'n Pabl näjza Bernabé lo guejdxga balti dxej. Gusutzu'tz guiro'preni guniireni xtidx Jesucrist. Badeed Dios bejnreni redzunro, remilagwr xcuent

xcälřnibee Dios te bahuii bejn cayacnäj Diosreni. ⁴Guyu' tiop cuaa bejn nen guejdxga. Gala' guejdxga huililajz xtidx Dios nani gunii Pabl näjza Bernabé, ⁵dxejc sgala' guejdxga bacuadiajg xtidx rexpejn Israel. Dxejc bire' te cuaa rexpejn Israel, näjza benzijt, näjza reguxhtis, rłajzreni nidxagdijłreni reapost, rłajzarenı nucuaareni guij yejc Pabl näjza Bernabé. ⁶Dxejc gucbeereni xhi rłajzreni gunreni, ni'c baxunreni ro'c huijreni nez reguedx Licaonia, ro'c bidzujłreni guedx Listra, guedx Derbe, näjza reguejdx ni re' nejzga. ⁷Che bidzujłreni ro'c, cadrotis huijreni basule'reni xtidx Dios.

⁸Guedx Listra guyu' te niguii ni digacdi sa, che gojllini racxhuu ni'ni. ⁹Cagucuadiajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzzani sajc gusiajc Diosni. ¹⁰Dxejcti dip gunii Pabl lojni, räjpni:

—iHuisulii!

Dxejcti huisuyäl'ni, gusajni. ¹¹Che bahuii rexpejn Licaonia xhi bejn Pabl, lagajc xtiidxreni guniireni, räjpreni lo sa'reni:

—iRedios abiädłuiloj loonu si'c niguii!

¹²Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni. ¹³Dxejcti te bixhojz xten xquidoo Júpiter cua' tiop gon najł guii guejnreni. Biädñani regonga ro' xquidoo Júpiter ni suga' ro' guejdxga. Rebejn näjza bixhojz rłajzreni nugut'reni regon

te ganreni Bernabé nájza Pabl si'c rajnreni rextiosreni. ¹⁴Che biejn diajg reapost xhi cayajc, batiäjsreni tla' xhajbreni si'c te seen direni guichaglajz xhi cayujn rebejnnga. Ruxunreni bidzujnreni lo rebejn, räjpreni lo rebejn:

¹⁵—Colcuadiajg xtiidxnu.

¿Xhicuent cayujn guejbtu recosre? Ni lagajc sabejntu najcnu, lagajc beñ guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn, guzuxhijbtu lo Gueb Dios ni nabajn par tejpas, ni benchee xhaguibaa nájza guedxliuj, nájza nisdoo, nájza guiralii ni yu' lojreni, nenreni, ¹⁶Galoo basaan Diosga gun reben guedxliuj si'ctis ni rlanjreni. ¹⁷Huen najc Dios, rudeedni nisguij, rudeedni rajc xhi rajw rebejn, rdxaj xque'reni, rbaa lajzreni. Ni'cni rriembepacnu yu' Dios.

¹⁸Xhidajl diidx guniireni te cháii bejnreni gaan guredxi rebejn, sa'csi rlanjpac rebejn nugu'treni regon.

¹⁹Dxejcti bidzujñ gaii xpejn Israel siäädreni guedx Antioquía nájza guedx Iconio. Baquiilreni reben Listra te gucuaareni guij yejc Pabl. Bacuaareni guij yejc Pabl, gudobxhajxhrenini guläärenini ro' guejdxga, sa'csi naareni agujtni.

²⁰Dxejc lañ ni suga' rexpejn Jesucrist guideb gabi cadro naga' Pabl, huistieni, biusacni guejdxga. Che bara yääl, huinäni Bernabé sääreni guedx Derbe.

²¹Che bidzujnreni guejdxga, basule'reni rextidx Dios lo rebejnnga. Xhidajlreni huililajz xtidx Dios. Dxejc gubi'reni, biu'reni guedx Listra, nájza guedx Iconio, nájza

guedx Antioquía. ²²Balijdxreni rebejn nani huililajz xtidx Dios, gucnäjreni rebejnnga te batiplajz rebejnnga, räjpreni lo rexpejn Jesucrist:

—Colsnaj lajztu xtidx Dios. Susacsí rebejn la'tu, sidejdtu trabajw te jiu'tu cadro rnibee Dios.

²³Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, lañ ni guredx-gunabreni lo Dios, basadiidxreni rebejn, räjpreni: “Gacnäj Jesucrist la'tu ni huililajz xtiidxni.”

Gubisac guiro'preni guedx Antioquía xten Siria

²⁴Che gudejd Pabl nájza Bernabé distrit Pisidia, bidzujnreni estad Panfilia. ²⁵Basule'reni xtidx Dios lo reben Perge, dxejcti biriireni ro'c sääreni guedx Atalia. ²⁶Che bidzujnreni guejdxga, biu'reni nen barcw, gudejdreri lo nisdoo te bidzujnreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäj Diosreni, baxhajreni Pabl nájza Bernabé chasule'reni xtidx Dios nen guiraa reguejdx. Naj abaluux Pabl nájza Bernabé dzuunga. ²⁷Che bidzujnreni guejdxga, bachagsa' rexpejn Jesucrist. Dxejcti bijreni diidx lo rebejnnga guira'ti ni bennäj Dios laareni, nájza xho badeed Dios huililajz rebenzijt nani digac rexpen Israel. ²⁸Xchej biannäjreni rexpejn Jesucrist ro'c.

Bidxagsa'zaren nen guedx Jerusalén

15 Nen redxejga bidzujñ gaii dade' ni siääd nez Judea,

caguluiireni rexpejn Jesucrist, räjpreni lojreni:

—Palga ditu gusal̄ bee si'c gunibee toMoisés, di Dios guslaatu lo xtojltu.

²Che biejn diajg Pabl nājza Bernabé rediidxga, bidxagdijlreni redade'ga. Dxejc gule rexpejn Jesucrist Pabl nājza Bernabé nājza sgaii rexpejn Jesucrist chääreni guedx Jerusalén te guininäjreni reapost nājza rebengool te guidon xho gac xcuent beega.

³Huisunejz rexpejn Jesucrist ni najc bejn Antioquía Pabl nājza rebejn ni sanäjreni, sääreni guedx Jerusalén. Gudejdreni reguedx Fenicia, nājza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenzijz xtidx Dios. Bibalazduxh rexpejn Jesucrist che biejn diajgreni rediidxga.

⁴Che bidzujnreni guedx Jerusalén, huichagloj rexpejn Jesucristreni. Dxejcti bij Pabl nājza Bernabé diidx lo reapost, lo rebengool nani rnibee rexpejn Jesucrist, nājza lo rexpejn Jesucrist, guiraa redzunro nani cayunnäj Diosreni. ⁵Dxejc huisulii gaii refarisee ni ahuililajz xtidx Dios, räjpreni lojreni:

—Che chalilajz rebenzijz xtidx Dios, nanab churenii bee, nanabza gusoobreni leii xten toMoisés.

⁶Dxejcti bachagsa' reapost nājza rebengool nani rnibee rexpejn Jesucrist, te don xho gunreni.

⁷Huisulii Pedr, räjpnii lojreni:

—Guejbtu, resa'ä, anajntu xho bejn Dios gubalti iiz. Gule Dios narä lo guiraanu te gusule'ä xtidx Dios loj rebenzijz, te chalilajzreni xtidx Dios. ⁸Luxh Dios, nani numbechee

lastoo guiralii bejn, badeed seen huililajzpac rebenzijz xtiidxni.

Badeed Dios Sprit Dxan xtenni lojreni si'c te seen te gacbee bejn najcreni xpejnii. Sigac baniidxni Sprit Dxan xtenni loonu galoo, si'cza badeednini lo rebenzijz.

⁹Sigajc rinälajz Dios nuunu, sigajcza rinälajzni rebenzijz. Che huililajz rebenzijz xtiidxni, basia Dios lastooreni. ¹⁰Naj çhxicuent rusieedu Dios, ä? Di niajcdi nisanäj retoxtadnu releiiga, digacdiza chosanäjnu releiiga naj. Çhxicuent rlanjtu chasanäj rebenzijz releiiga? ¹¹Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenzijz lo dojl che rililajzreni xtidx Jesucrist —räjpp Pedr.

¹²Che gulujx gunii Pedr, dxitis gurej rebejn, bacuadijgreni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzijz.

¹³Che gulujx gunii guiro'preni, xhet guniidi rebejn. Jacoobtis räjpp lojreni:

—Sa'ä, colcuadijg xtidxä.

¹⁴Agunii Simón ni rniireni Pedr lojtu xho ganiddoo baxhal̄ Dios laani lo rebenzijz te gurejdx Dios rexpejnii ni nadxaag lo rebenzijz.

¹⁵Luxh si'cza caj lo guijtz. Agujc xcheroduxh bacuaa reniguii nani gunii xtidx Dios, che räjpnii:

¹⁶Sidzujn dxej ni guibisacä.

Sunä guzuxhijb guiraa rebejn nez loä si'c bazuxhijb rexpejn Israel che gubajz toDavid. Si'c gunä,

¹⁷ te jiaḍgajṅ rebejṅ narä te gacä Xtiosreni,

näzja guiraa rebenzijt nani najc rexpənä jiaḍgajṅ narä,

¹⁸ si'c räjp Dios nani galooli

baluiloj guiraa redzuunre.

¹⁹ Dxejcti räjp Jacoob lojreni:

—Dee najc xhigab ni runä.

Na'cru gusieednu rebenzijt ni cagusiechlajzreni, renani salilajz xtidx Dios. ²⁰ Gucuaanu te guijtjz, jie'tznu lo rebenzijt: Na'c gaureni xhi cos ni basuj bejṅ loj rebanäjb, sa'csi dinu chalilajz xcuent rebanäjb. Na'cza guesnäjreni bejṅ ni di gac chäälni, na'cza gaureni bääl nani gurerejn, na'cza gaureni rejn. ²¹ Dee gucuaanu te di guche'chreni xpejṅ Israel sa'csi neṅ guiraa reguejdx galooli yu' rexpeljṅ Israel nani rol leii xten toMoisés gasob sabd —räjp Jacoob.

²² Che biejn diajg reapost näzja rebengool nani rnibee, näzja guiraa rexpeljṅ Jesucrist xtidx Jacoob, bichagljazreni xtiidxni. Dxejcti gulereni tiop sa'reni chanä Pabl näzja Bernabé guedx Antioquía. Gulereni Judas ni rniireni Barsabás näzja Silas. Guiro'preni najc bejṅ ni sajru loj rexpeljṅ Jesucrist.

²³ Dxejcti bejnreni guijtjz huinäreni. Bacuaareni rediidxre:

“Nuure reapost, näzja rebengool ni rnibee, näzja rexpeljṅ xquidoo Jesucrist ruxhaṅnu xtixtios lojtu, resa'nu nani rbäzj guedx Antioquía näzja estad Siria näzja estad Cilicia. ²⁴ Rucuaanu guijtjzre sa'csi biejn diaagnu birii gaii resa'nu ree biädsieedreni la'tu con xtiidxreni, cayu'tu yärsia' sa'csi najreni lojtu nanab chutu bee si'c gunibee

toMoisés, guibajnzatu si'c rnii leii xten toMoisés. Xhet nuudinu gunibeenu jiaḍniireni si'c. ²⁵ Ni'cni bienu xhigab guxhaṅnu lojtu tiop dade' ni gulenu loj resa'nu te chanäreni Bernabé näzja Pabl, nani sanälaaznu. ²⁶ Agajc balti huält rlazjreni nugu'treni Bernabé näzja Pabl, luxh direni guidxejb gusule'reni xtidx Jesucrist. ²⁷ Naj ruxhaṅnu Judas näzja Silas lojtu. Laareni susule'za guiraa rediidxre lojtu. ²⁸ Tejsi najc xhigabnu con Sprit Dxan xten Dios. Di rlaaznu gutaalrunu leii ni chasanäjtu. Releiitis nani nanab rusoobnu rucuaanu lojtu. ²⁹ Na'c gautu xhicos ni basuj bejṅ lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bääl nani gurerejn, na'cza guesnäjt nani digac chäältu. Palga gusoobtu recosre, laaca cayujntu. Sacrü guibajntu. Sujiannäjtu Dios.”

³⁰ Dxejcti basadiidx rexpeljṅ Jesucrist Judas näzja Silas huinäreni Pabl näzja Bernabé guedx Antioquía. Che bidzujṅreni ro'c batojpreni guiraa rebejṅ nani huililajz xtidx Dios te biṅreni guijtjzga lojreni. ³¹ Che biejn diajg rexpENZIT Jesucrist diidx ni caj lo guijtjzga, bibalazduxhreni sa'csi gulecdxi diidxga lastooreni. ³² Dxejcti basule' Judas näzja Silas xtidx Dios lojreni, sa'csi rudeed Dios xtiidxni loj guiro'preni. Xhidajl diidx guniireni te balijdxreni rexpeljṅ Jesucrist. Lacti gulecdxi rediidx ni guniireni lastoo guiraa rexpeljṅ Jesucrist. ³³ Ro'c bia'nreni xchej, dxejcru cuäjb rexpeljṅ Jesucrist gubi'reni te gudeedreni xtixtios lojreni baxhaṅreni.

³⁴Dxejc Silas bejn xhigab jia'nni ro'c. ³⁵Luxh Pabl nájza Bernabé bia'n guedx Antioquía. Guiro'preni baluui, basule'reni xtidx Dios loj rebejn. Guyu'za sgaii dade' ni gucnájreni.

**Huihuisac Pabl rexpejn Jesucrist
neñ guiraa reguejdx**

³⁶Che gudejd xhidajl dxej, rájp Pabl lo Bernabé:

—Do'o guibi' lo guiraa reguejdx cadro basule'nu rextidx Dios te chohuiinu don xho yu' rexpejn Jesucrist.

³⁷Niluxh Bernabé rlanj chanäreni Juan ni laa Marcw. ³⁸Naaddi Pabl chááni, sa'csi birii Marcw lojreni che guyu'reni nez Panfilia, diruni nisianáj Pabl nájza Bernabé. ³⁹Dxejc gudildiidxreni. Gubicajtireni lo sa'reni. Ni'c saná Bernabé Marcw, biu'reni neñ barcw, sääreni Chipre ni re' galáii nisdoo. ⁴⁰Dxejcti Pabl gule Silas te sanänini. Badeed rexpejn Jesucrist xtixtios lojreni, rájpreni gacnáj Diosreni. ⁴¹Lal ni sasajreni gudejdreni guiraa reguedx Siria nájza guiraa reguedx Cilicia, ro'c gucnájreni guiraa rexpejn Jesucrist, basule'rurenit xtidx Jesucrist lojreni.

Huinä Timoteu Pabl náj Silas

16 Bidzunsac Pabl nájza Silas reguedx Derbe nájza Listra. Ro'c bidxaagreni te xpen Jesucrist ni laa Timoteu. Xnanni najc beñ Israel ni huililajx xtidx Jesucrist. Xtadni najc beñ griegw. ²Didxsa'ctis rnii rexpejn Jesucrist ni yu' Listra nájza Iconio xcuent Timoteu. ³Rlanj Pabl chanäni

Timoteu. Dxejcti basäl Pabl bee Timoteu te gujcnit si'c xpen Israel, te xhet naadi rexpejn Israel, sa'csi guiraareni nanchee xtdad Timoteu najc beñ griegw. ⁴Che bidzujnreni cade tej reguejdx, basule'reni xtidx reapost nájza rebengool nani rnibee xpen Jesucrist guedx Jeurusalén, te gusoob rexpejn Jesucrist diidx ni bacuaareni lo guijtz. ⁵Bazutijp xtidx Dios lastoo renani huililajx xtidx Jesucrist. Guixe-guixee xhidajlru bejn huililajx xtidx Dios xcuent Jesucrist.

Lo te bacal gunii te niguii lo Pabl

⁶Che gudejdreni distrit Frigia, nájza estad Galacia, di Sprit Dxan xten Dios nusaan nusule'reni xtidx Jesucrist neñ reguedx Asia. ⁷Bidzujntireni gajxh estad Misia. Dxejc rlanjreni nijreni estad Bitinia, niluxh di Sprit Dxan xten Dios nusaan nijreni ro'c. ⁸Ni'c gudejdtireni stelaad estad Misia, bidzujnreni guedx Troas. ⁹Te yääl si'c lo te bacal bahuui Pabl suga' te beñ Macedonia. Canabduxh niguiiga lo Pabl, rájpnit: —Gudaa ladxä, estad Macedonia, te gacnájlu nuunu. ¹⁰Che bara yääl ni gunixcal Pabl, gudilgajcnu te barcw te chonnu estad Macedonia, sa'csi gucbeenu Dios najc nani caguxhal nuure te guluini xtiidxni lo reben Macedonia. Narä, Lucas, ni cagucuaä rediidxre, gusanää Pabl nájza Silas.

**Che guyu' Pabl con Silas
guedx Filipos**

¹¹Biu'tinu neñ barcw ro' guedx Troas. Bidzunnu Samotracia, te yuj

ni re' neñ nisdoo. Che bara yääl bidzunu guedx Neápolis. Ro'c biriinu neñ barcw, ¹²bionnu guedx Filipos, guejdx nani sajru lo estad Macedonia. Guedx romanni. Ro'c bia'nnu tiop choñ dxej. ¹³Che gojl sabd, dxej ni rusilajz rexpejn Israel, biriinu guejdxga bionnu ro' te gueuu, sa'csi biennu xhigab ro'c jiääd rexpejn Israel te guininäjreni Dios. Ro'c gurejnu, guniinu lo renane' nani bire' ro'c. ¹⁴Lojreni nadxaag te nane' ni laa Lidia, te benzijt ni digac xpejn Israel. Guedx Tiatira siäädni. Ruto'ni ladmuraad ni sacduxh. Rajñ gunaaga Dios si'c rajñ rexpejn Israelni. Bacuadiajgni xtidx Jesucrist ni cagusule' Pabl. Gucnäj Dios nane'ga te huililajzni xtiidxni. ¹⁵Birobnisni, näjza guiraa reni rbäjz rolizjni. Dxejc guniini loonu:

—Palga ruhuiitu guliä rililazä xtidx Dios, coltaa rolizä te ro'c cuäätzu.

Lacti gunab nane'ga nuunu, ni'c huijia'nnu rolizjni.

¹⁶Te dxej cheni sionnu cadro rninäj bejn Dios, bidxaagnu te dxa'p nani yu' te bendxab neñ lastooni. Rajp rexpaxhuaanni melduxh sa'csi rusule' dxa'pga recos ni gajd gac. ¹⁷Birinajl dxa'pga Pabl näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojlnu —räjp dxape're.

¹⁸Balti dxej birinajl dxape'ga nuure, entis caniini rediidxga lo rebejn. Lacti basieed dxape'ga Pabl, ni'c gubiréni, räjpni lo bendxab ni yu' neñ lastoo dxape'ga:

—Xcuent xcälrnibee Jesucrist rniä lojlu: “Birii neñ lastoo dxape'ga.”

Lagajc dxejc birii bendxab neñ lastoo dxape'ga.

¹⁹Che bahuii rexpaxhuaan dxape'ga diru dxape'ga gun gaan melro, gunaazreni Pabl näjza Silas. Dxejcti gudobxhaxhreni guiro'preni nez roguii cadro suga' reguxhtis. ²⁰Che bidzunnäjreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujreni biey lo guejdxre.

²¹Caguluiireni garenca leii nani digacdi gusoobnu sa'csi najcnu ben roman.

²²Dxejcti bidxehnäj rebejn Pabl näjza Silas. Gunibee rejuejz gulääreni xhajn Pabl, näjza xhajn Silas, te batiäjreni baar guideb tiejxh guiro'preni. ²³Che gulujx gudinduxhreni Pabl näjza Silas, biäreni neñ latzguiib. Dxejcti räjp reguxhtis lo reguixhajc:

—Colgapdzu'tzreni, di gusaantu guiriireni.

²⁴Basäl guixhajgreni neñ latzguiib. Guyu' ni'reni neñ te baräjd ni sojb gueed te di guxunreni.

²⁵Garolyäl guninäj Pabl näjza Silas Dios, gusloj cayolreni dij ni rliä'p xpala'n Dios. Biejn diajg guiraa rebejn ni yu' neñ latzguiib cayolreni. ²⁶Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni. ²⁷Che gubajn guixhajc ni canäj latzguiib, bahuiini naxhal latzguiib, gulääni spaad xtenni, te rlajzni nugu'tni lagajc laani, sa'csi

naani abadxuñ reni niäu nen latzguiib. ²⁸Dxejc guredxa' Pabl, räjpni lo guixhajga:

—Na'c gunlu si'c. Bahuii, guiraliinu suga'nu ree.

²⁹Dxejc gunibee guixhajg biääd te bajl te biu'ni nen latzguiib. Racsejsni biäädni bazuxhijbni nez loj Pabl näjza nez loj Silas. ³⁰Dxejcti gulää guixhajgreni nen latzguiib. Gunabdiidxni räjpni lojreni:

—iColguinii, dade! ¿Xhini'c nanab gunä te gusläa Dios narä lo dojl?

³¹Räjp Pabl näjza Silas lo guixhajg:

—Huililajztis xtidx Dios xcuent Jesucrist, luj näjza guiraa reni yu' rolizjlu, te gusläa Diostu lo dojl.

³²Basule' Pabl näjza Silas rextidx Dios lojni näjza loj guiraa rebejn ni yu' rolizjni. ³³Lagajc dxejc, garol yääl, huinä guixhajgreni gudiibni dejtzeni cadro batiuug baarreni. Dxejcti batiobnisreni guixhajg näjza guiraa reni yu' rolizjni. ³⁴Dxejc huinä guixhajgreni rolizjni, ro'c badeedni xhi gudajwreni. Laani näjza guiraa reni yu' rolizjni bibalazduxhreni sa'csi huililajzreni xtidx Dios.

³⁵Che bara yääl, baxhal reguxhtis stiop guixhajg räjpni lo guixhajg nani cuanäj latzguiib:

—Basläa reniguiiga.

³⁶Dxejcti huiye'tz guixhajga lo Pabl, räjpni:

—Anaj reguxhtis gusläätu. Naj colchäj, gacnäj Dios la'tu, saru chäätu.

³⁷Niluxh räjp Pabl loj reguixhajg:

—Nuure najczanu beñ roman. Batiäjlni baar detznu nez loj

guiraa rebejn. Nicla niniabdiidxreni la yu' xhi dojl biennu. Basäureni nuure nen latzguiib. Leii xten roman di gusaan gac rebeñ roman si'c. Luxh naj rlanjreni gusläareni nuure xhiga'tz. iDinu guirii si'c! Lagajc laareni sujiädslääreni nuunu.

³⁸Che huiye'tz reguixhajg diidxga lo reguxhtis, bidxebduxhreni che biejn diajgreni beñ roman najc Pabl näjza Silas. ³⁹Dxejcti biääd reguxhtis, gulääreni Pabl näjza Silas, gunabreni jiajllajzreni. Gunabduxhreni lo Pabl näjza Silas; räjpreni:

—Coljiunejz guejdxre.

⁴⁰Che biriireni nen latzguiib, huijreni rolizj Lidia. Balijdxreni rexpejn Jesucrist, gulecdxireni lajz rexpejn Jesucrist. Dxejc biunejzreni guejdxga.

Cadxechduxh guiraa rebeñ Tesalónica

17 Che gudejdreni reguedx Anfípolis, näjza guedx Apolonia, bidzujnreni guedx Tesalónica cadro yu' te xquidoo rexpejn Israel. ²Ro'c basule' Pabl xtidx Dios si'c ni rujnpacni. Chon sabd, dxej ni rusilajz rexpejn Israel, basule'ni xtidx Dios lojreni. ³Basule' Pabl xtidx Dios ni caj lo guijtzi ni bacuaa reniguii ni gunii xtidx Dios galooli. Caj lo guijtzig: “Nanab ted Crist trabajwduxh, guetni, niluxh sibansacni lo rebengut.”

Dxejc räjp Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpni.

⁴Yu' rexpejn Israel huililajz xtidx Dios, gusanäjreni Pabl näjza Silas. Näjza xhidalduxh beñ griegw nani

rajn̄ Dios nájza xhidajl reguna griegw ni sajcru huililajz xtiidxni. ⁵Luxh yu' rexpejn̄ Israel ni di chalilajz, ni bidxechlajz. Batie'reni gaii benp̄loj, benlatsiaj, bejnreni bieje nez galáii. Biu'reni rolizj Jasón caguuilreni Pabl nájza Silas te cuäääreni guiro'preni nez lo rebejn̄. ⁶Niluxh che direni nidxäl Pabl nájza Silas, alga Jasón guläääreni nájza gaii renani rililajz xtidx Dios, sanäääreni redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujn̄reni laadxnu, ⁷luxh badeed Jasón rolizjni jia'nreni. Direni gusoob leii xten César, najreni yu' stee reii ni laa Jesús.

⁸Che biejn diajg reguxhtis nájza rebejn̄ diidxre, guyu'reni yärsia'. ⁹Cua' reguxhtis meel lo Jasón nájza lo reexamigwni. Räj̄p reguxhtis sudedsacreni meelga che jii Pabl nájza Silas, jiunejzreni lo guejdxga. Dxejcti baslaareni Jasón nájza reexamigwni.

Che guyu' Pabl con Silas guedx Berea

¹⁰Che biu' guxhijn̄, baxhalgajc rexpejn̄ Jesucrist Pabl nájza Silas ste guejdx ni laa Berea. Che bidzujn̄reni guejdxga, biugajczeni xquidoo rexpejn̄ Israel. ¹¹Hueenru najc reben̄ Berea loj reben̄ Tesalónica, sa'csi rbaali lajzreni bacuadijgzeni xtidx Pabl ni guniini xcuent Jesucrist. Guixe-guixee bil̄reni guiitz cadro caj xtidx Dios te gucbeereni la guli rextidx Pabl. ¹²Xhidajl rexpejn̄ Israel nájza xhidajl ben̄ griegw ni sajcru, gunaa sigajc niguii, huililajz xtidx Dios.

¹³Che gucbee rexpejn̄ Israel ni rbäjz guedx Tesalónica caguluii Pabl xtidx Dios guedx Berea, biäääreni guedx Berea. Che bidzujn̄reni lo guejdxga bejnreni bieje ro'c.

¹⁴Dxejcti baxhal rexpejn̄ Jesucrist Pabl, huijni ro' nisdoo. Niluxh Silas nájza Timoteu bia'n guedx Berea. ¹⁵Dxejcti rebejn̄ ni guzanäj Pabl huinänini guedx Atenas. Ro'c räj̄p Pabl lo rebejn̄ ni biädñani gudeedreni diidx lo Silas nájza Timoteu jiädgajczeni lojni. Dxejcti rebejn̄ ni sanä Pabl gubisac guedx Berea.

Guyu' Pabl guedx Atenas

¹⁶Laḷ ni guläjz Pabl guedx Atenas, guyuduxhni yärsia' sa'csi bahuiini rajn̄ guiraa rebejn̄ rebanäj̄b nani runchee lagajc bejn̄. ¹⁷Ni'c nen̄ xquidooreni gudildiidx Pabl rexpejn̄ Israel nájza reben̄ziyt ni rajn̄ Dios si'c rajn̄ rexpejn̄ Israelni. Guixe-guixee gudildiidxni chutis bejn̄ ni re' lo guii. ¹⁸Dxejcti biääad gaii bejn̄ lojni. Yu' reni roḷduxh guiitz ni bacuaa epicúreos, yu'za renani roḷduxh guiitz ni bacuaa estoicos, gudildiidxreni Pabl. Yu' reni räj̄p lo sa'reni:

—¿Xhicha guinii bejn̄re loonu? Entis naxhal ro'ni.

Yu'zaren̄i räj̄p lo sa'reni:
—Pet calä'pni xpala'n tiop dioscoob.

Si'c guniireni sa'csi biejn̄ diajgzeni bazät Pabl “Jesús” nájza “Resurreccion”, ni säloj yäl̄gubansac lo rebengut. ¹⁹Dxejcti gunaazreni Pabl sanärenini nez dajn ni laa Areópago. Ro'c yu' si'c te jusgaad. Räj̄preni lo Pabl:

—Rlaaznu gacbeenu xhi diidx ruluiilu, ²⁰sa'csi rujylu diidx nani dinu jiacbee. Ni'cni bejn huen, basule' diidxre loonu te gacbeenu xhi sälojreni —räjpreni.

²¹Reben Atenas näjza rebenzijt ni yu' ro'c rutedreni redxej rniireni didxcoob lo sa'reni, o rucuadaiajgreni didxcoob. Ni'cpac rchaglajzreni.

²²Galäii Areópago huisulii Pabl, räjpni lojreni:

—Colcuadiajg guejbtu, ben Atenas. Abahüä xho randuxhtu xhidajl banäjb. ²³Che sädsaa' lo guejdxre, bahuiä lo rexpanäjbtu. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbeä Diosga nani rajntu mase ditu gumbeeni. Susule'ä xtiidxni lojtu.

²⁴Räjp Pabl:

—Diosre benchee guedxliuj näjza guiralii ni yu' lo guedxliuj, sa'csi rnibeeni xhaguibaa näjza guedxliuj. Di Diosre cuääz lo piään niclaza nen reguidoo ni runchee bejn. ²⁵Diza Diosre guiquiin chu gacnäjni sa'csi lagajc Diosre rudeed yäl nabajñ, yäl nadaan, näjza guiralii nani rquiin reben guedxliuj.

²⁶Räjp Pabl:

—Guiralii reben guedxliuj najc rexagdoo tejsi gunaa näjza tejsi niguii. Desde galooli gunibee Diosga bal ijz chu renacion, näjza cati gunibee renacionga. ²⁷Benchee Dios guiraa reben guedxliuj te quiiireni Dios te chalilajzreni xtiidxni. Luxh suga' Dios gajxh cadetejnu, ²⁸sa'csi Dios rujñ nabajñnu lo guedxliuj, runiidxni rsiaanu lo guedxliuj, runiidxzani

rdajlru xcäl nabannu lo guedxliuj. Laaca bacuaa rexpennajntu: “Najcnu xi'n Dios, sa'csi benchee Diosnu.” ²⁹Ni'cni, sa'csi najcnu xi'n Dios, di nungäjl jiennu xhigab najc Dios si'c rebanäjb ni nac-chee pla't, o guij, o yajg si'ctis ni runchee bejn rexpanäjbtu. ³⁰Nen redxej ni di bejn niembee Dios, diza Dios niujñ castiigwreni. Niluxh naj gunibee Dios gusiechlajz guiraa rebejn, ³¹sa'csi abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc benguijdx, chuza najc bensa'c. Rnili Jesucrist rediidx ni najc guliitis. Guläs Dios Jesucrist, baspansacnini lo rebengut, te gacbeenu rajp Jesucrist yälrnibee lo guiraa recos.

³²Che biejn diajg rebejnga gubansac Jesucrist lo rebengut yu' reni baxhiznäj xtiidxni. Yu'za reni räjp:

—Sucuadaiajgrunu xcuent ni rusule'lu.

³³Dxejcti birii Pabl lojreni.

³⁴Yu'za reni huinajlni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn ni huililajz.

Guyu' Pabl guedx Corinto

18 Biriiti Pabl guedx Atenas, huijni guedx Corinto. ²Ro'c bidxaagni te dade' ni najc ben Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee reii Claudio guirii guiraa rexpeljñ Israel guedx

Roma. Birinäj Aquila Priscila chäälni. Biriireni Italia, biäädreni guedx Corinto. Bihuii Pablreni, ³sa'csi lagajc dzuun ni rujnreni rujnzani. Tejsi lajt guläjzreni te bejn jionreni tejsi dzuun. Runcheereni yuguijd. ⁴Gasob sabd, dxej ni rusilajz rexpejn Israel, basule' Pabl xtidx Dios neñ xquidoo rexpejn Israel. Rlajzni chalilajz rexpejn Israel näjza beñ griegw ni digac xpejn Israel diidx ni rniini xcuent Jesucrist.

⁵Dxejcti birii Silas näjza Timoteu Macedonia. Che bidzujnreni guedx Corinto, gusloj rusule'tis Pabl xtidx Dios guixe-guixee, guniliini lo rexpejn Israel:

—Jesús najc Crist ni runloj rexpejntu guxhal Dios.

⁶Dxejc bidxehnäj rexpejn Israelni, guniyazareni xtiidxni. Dxejcti gubijb Pabl xhajbni si'c te seen diruni jiureni, caguro'nnireni. Räjzani lo rexpejn Israel:

—Lagajc la'tu rajptu dojl nittu lo Dios. Xhet dojldi rapä narä. Aguniä xtidx Jesucrist lojtu. Naj lo rebejn nani di gac beñ Israel gusule'ä xtidx Jesucrist —räjzni.

⁷Dxejcti biriini lojreni, huijni roliz Justo, te bejn ni rajn Dios si'c rajn rexpejn Israelni. Rolizni sojb cuä' xquidoo rexpejn Israel. ⁸Crisp, ni rnibee xquidoo Israel, huililajz xtidx Jesucrist. Huililajzza guiraa reni rbäjz rolizni. Xhidajlza beñ Corinto huililajz xtidx Jesucrist, dxejcti birobnisreni. ⁹Gojl te yääl gunii Dios lo te bacal, räjpni lo Pabl:

—Na'c guidxejblu. Guniitis, na'c gusäulu ro'lu, ¹⁰sa'csi narä suganää

luj. Rut gacdi gun latsiajlu. Aguleä xhidalduxh bejn lo guejdxre te gacreni xpenä —räjp Dios.

¹¹Ni'c bia'n Pabl ro'c tebizgarol. Baluiini xtidx Dios lojreni.

¹²Che gujc Galíon gubernadoor xten Acaya, tejsi xhigab bejn rexpejn Israel bidojpreni te gunaazreni Pabl. Sanäreni Pabl jusgaad cadro yu' Galíon.

¹³Räjzreni lo Galíon:

—Niguiire cagulunii rebejn ganreni Dios garenca mood, xhet si'cti ni caj lo xleiinu —räjzreni.

¹⁴Agojl ninii Pabl, che räjp Galíon lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu. ¹⁵Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguxhtis —räjp Galíon.

¹⁶Gunibee Galíon barilaagw resoldaad rexpejn Israel. ¹⁷Dxejc gunaaz reGriegw Sóstenes nani rnibee xquidoo rexpejn Israel. Batiäjlni baar dejtz Sóstenes nez ro' jusgaad xten Galíon. Niluxh niela niu Galíonreni.

Chon huält huihuii Pabl rexpejn Jesucrist

¹⁸Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni neñ barcw te siireni nez estad Siria. Dxejc ganid gudejdreni guedx Cencrea, cadro bahuaj Pabl yejcni si'c te seen yu' xhi diidx bia'nni con Dios. ¹⁹Che bidzujnreni

guedx Éfeso, basa'n Pabl Priscila nájza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel. ²⁰Dxejcti che gunabreni jia'n Pabl ro'c xchej, naaddini jia'nni. ²¹Badeedni xtixtios, rájpmi lojreni:

—Nungäjlpac chatedä laniro guedx Jerusalén. Siälsacä ree palga gusaan Dios jiälä.

Biusacni nen barcw, biriini guedx Éfeso. ²²Che bidzujñni guedx Cesarea, biriini nen barcw, huijni guedx Jerusalén. Che bidzujñni, guniini xchan lo reapost nájza lo rexpejn Jesucrist. Dxejc huijni guedx Antioquía xten Siria. ²³Che gudejd balti dxej, biriini guejdxga, gudejdni guideb estad Galacia nájza guideb distrit Frigia. Nen cade tej reguejdxga, balijdxni rexpejn Jesucrist te gutijpru lajzreni.

Baluu Apolos xtidx Dios nen guedx Éfeso

²⁴Nen redxejga, te dade' ni laa Apolos bidzujñ guedx Éfeso. Najcni xpejn Israel, gojlni guedx Alejandría xten Egipto. Lacti rajc rnisa'cni, nanduxhzani xtidx Dios. ²⁵Nanduxhni xtidx Dios xcuent Jesucrist. Laaca basule'ni xtidx Dios, guideb xcäl nabajñni rinälajzni Dios. Niluxh xcuent Jesucrist najntisni yälrobnis xten Juan. ²⁶Nicla nidxejb Apolos gusloj caniini nen guidoo xten rexpejn Israel. Che biejn diajg Priscila nájza Aquila xtiidxni, huinärenini rolizreni. Ro'c basule'rureni xtidx Dios nani gajdni gan. ²⁷Dxejc, sa'csi abejn Apolos xhigab chääni reguejdx ni tre' nez Acaya, bacuaa rexpejn

Jesucrist guijtz lo rexpejn Jesucrist ni yu' nen reguejdxga te gacnäjreni Apolos. Gucnäduxh Apolos rebejn nani badeed Dios huililajz xtidx Dios nen reguejdxga, ²⁸sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: “Jesús najc Crist nani cayunlojtu guxhał Dios.”

Guyu' Pabl guedx Éfeso

19 Lał ni guyu' Apolos guedx Corinto, huij Pabl xhidajl reguejdx nen región Asia, dxejcti bidzujñni guedx Éfeso cadro bidxaagni gaii bejn nani huililajz xtidx Dios. ²Gunabdiidx Pabl lojreni:

—Che huililajztu xtidx Dios, ¿la biädlałz Sprit Dxan xten Dios nen lastootu, ä?

Rájpmi lojreni:

—Nicla gajd diajgnu jiejn la yu' te Sprit Dxan xten Dios.

³Rájpmi lojreni:

—¿Xho birobnistu, pues?

Rájpmi lojreni:

—Birobnisnu si'cni baluu Juan tiobnis bejn.

⁴Dxejcti rájpmi lojreni:

—Guliiica bastiobnis Juan che basiejch lajz rebejn xtojłreni. Rájpmi Juan lo rebejn: “Colchalilajz xtidx bejn ni siäd detzä.” Bejn ni basät'ni najc Jesucrist —rájpmi Pabl.

⁵Che biejn diajgreni rextidx Pabl birobnisreni te gacbee rebejn najcneni xpejn Jesucrist. ⁶Che batzuub Pabl naani yejcreni, biu' Sprit Dxan xten Dios nen lastooreni.

Dxejc gusloj caniireni garen-garen didxsaj. Guslojza caniireni diidx ni badee Dios lojreni. ⁷Si'c tzubitio'p dade' gusajc si'c.

⁸Si'c choṅ bäii, guixe-guixee gunii Pabl rextidx Dios, basule'ni xcuent xcälrnibee Dios loj rebejn neṅ xquidoo rexpejn Israel. Dini nidxejb guniini loj rebejn.

⁹Dxejc guyu' reni gucnajd, dirureni nililajz xtidx Dios. Che gusloj caniyajreni xtidx Dios lo rebejn, biunejz Pabl ro'c sanäni rexpejn ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni.

¹⁰Tiop ijz bejn Pabl si'c, ni'c guiraa rebejn ni rbäjz Asia biejn diajgreni xtidx Dios. Rexpejn Israel sigajc reben griegw biejn diajgreni xtidx Dios. ¹¹Gucnäy Dios Pabl bejn ni xhidajl dzunro, remilagwr. ¹²Ni'cni biääd bejn ca'reni baii, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riacgajc rebejn ni racxhuuga, rīgajcza rebēdxab lastoo renani yu' bēdxab.

¹³Dxejcti guyu' gaii ben Israel nani entis rcansaj, direni cuäüz tejsi guejdx. Najcreni bejn ni rbää bēdxab lastoo rebejn. Bejn redee xhigabcoob, naareni cuääreni bēdxab xcuent laj Jesucrist, ni'cni räjpreni lo renani yu' bēdxab neṅ lastooni:

—Xcuent xcälrnibee Jesucrist nani ruluii Pabl rnibeenu guiriilu neṅ lastoo bejṅga —räjpreni.

¹⁴Guyu' gajdz xi'n Esceva, te ben Israel, nani sajcro lo rebixhojz. Rujn

redee dzuun rbääreni rebēdxab neṅ lastoo rebejn. ¹⁵Che gunii rexi'n Esceva loj bēdxabga si'c, räjp bēdxab ni yu' neṅ lastoo bejṅga lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbeä la'tu.

¹⁶Dxejcti bixa't niguii nani yu' bēdxab neṅ lastooni yejc rexi'n Esceva, gudinduxhnireni, basälta'nireni, batiäjsni xhajbreni. Dxejcti baxunreni biriireni neṅ yu'ga, bidxälguijdxzaren biräsya' xhajbreni. ¹⁷Dxejcti guiraa reben Éfeso, rexpejn Israel sigajc ben griegw, gucbee xho bennäj bēdxab reniguiiga. Bidxebduxh rebejṅga, luxh huä'p xpala'n Jesucrist.

¹⁸Xhidalduxh reni huililajz xtidx Dios biääd lo rexpejn Jesucrist. Cacäjpreni guiraa recos xhet laadi nani rujnreni. ¹⁹Xhidajl reni najc bidxaa biädna reguijtz cadro caj yälṅajn xten rebidxaa. Dxejcti base'creni reguijtzga nez loj guiraa rebejn. Bejnreni cuent lacti meel saj reguijtzga. Sajcreni tiubitzuu miṅ melpla't. ²⁰Xhidalduxh rebejn huililajz xtidx Dios. Batijp Dios lastoo rexpejn ni. Gulä'p guiraareni xpala'n Dios.

²¹Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzani xhigab, naani:

—Che ahua'a Jerusalén, nanabza cha'a guedx Roma.

²²Ni'cni baxhal Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

Bidxechduxh reben Ēfeso

²³Nen redxejga, guyuduxh rebejn yärsia' sa'csi baluui Pabl xtidx Dios. Direni nichagljaz care'ch xtidx Dios.

²⁴Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga.

Demetrio näjza guiraa replateer ni rujn ni'ch xten Diana runduxhrenei gaan meel ro'c. ²⁵Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäänu melro lo dzuun ni riennu.

²⁶Abahuiitu niguiire ni laa Pabl. Abiejnza diajgtu xtiidxni. Räjpni lo rebejn: “Xhet diosdi najc reni racchee con naa bejn.” Guedx Ēfeso näjza guideb nación Asia cagusiejchni lajz bejn, xhidalduxh bejn salilajz xtiidxni.

²⁷Ni'c ries nitloj xtzunnu palga diru bejn sii ni'ch ni riencheenu. Luxh riesza diru bejn jäädgajñ Diana nen xquidoro Diana. Naj reben Asia, näjza guiraa reben guedxliuj randuxh Diana, banäjb ni sajcro, niluxh palga diru rebejn gan Diana, pet sinitlojni —räjpni.

²⁸Che biejn diajg replateer xtiidxni, bidxe'chduxhrenei, guredxa'reni räjpreni:

—Sacduxh Diana xtios reben Ēfeso.

²⁹Guideb guejdx guyu' bieje. Dxejcti ruxunreni bidxagsa'reni lo yuj cadro rajc rexjuntreni.

Gunaazreni Gayo näjza Aristarco, ben Macedonia ni rinajl Pabl.

³⁰Rlajz Pabl niu'ni cadro bidxagsa' rebejn, niluxh di rexpejn Jesucrist nusaanni. ³¹Gaii guxhtis ni rnibee Asia, sa'csi najcreni xamijgw Pabl, baxhal'reni diidx lo Pabl, räjpreni:

—Na'c chäälü cadro nadxagsa' rebejnğa —räjpreni.

³²Lo rebejn ni re'ga, yu' reni rbedxa' tej diidx, sgaiireni rbedxa' garenca diidx. Te bieiduxh cayajc. Xhidalduxh rebejnğa nicla gan xhicuent bidxagsa'reni. ³³Dxejcti gulää rexpejn Israel te dade' ni laa Alejandro lo reben xhidaalga, te guiniini lo rebejn. Dxejcti basääbni naani lo rebejn te gac dxi rebejn. Rlajz Alejandro guiniini xcuent rexpejn Israel loj guiraa rebejn, te di guidxe'chrenei lo rexpejn Israel. ³⁴Niluxh che gucbee rebejn najc Alejandro ben Israel, tiop or guredxaduxhrenei, räjpreni:

—Sacduxh Diana xtios reben Ēfeso.

³⁵Dxejcti biääd secretaar xten guejdxga lo rebejn, gunibeeni guc dxi rebejn, te räjpni lojreni:

—Colcuadiajg, la'tu ben Ēfeso, caguidxäjñ te ben guedxliuj ni di gacbee reben guedx Ēfeso rajnpac Diana, nani xhaguibaali bitejb lo guedxliuj. ³⁶Sa'csi rediidxre najc gulii, nungäjñ cuedxitu, na'c guntu recos gujdxre. ³⁷¿Xhicuent gunaaztu reniguii ni siädñätu ree? Direni gac gubaan ni rbajn recos guidoo, dizareni niniyaj xtiosnu. ³⁸Naj palga rlajz Demetrio näjza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni.

³⁹Niluxh palga yu' xhi stee, nanab gac te junt xte rebenguejdx si'c ni caj lo xleiiinu. ⁴⁰Ries jii xquejnu lo gubier, naareni bidojpnü te guidxagdilnu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiunejz.

⁴¹Che gunii secretaar si'c, bire'ch rebejn, biunejzreni ro'c.

Huihuisac Pabl rexpejn Jesucrist ni yu' Macedonia näjza Grecia

20 Che bire'ch rebejn, gurejdx Pabl rexpejn Jesucrist biääd lojni, te balijdxnireni. Badeedni xtixtios lojreni. Sä'tini nez reguedx Macedonia. ²Guiraa reguejdxga cadro gudejdni, balijdxni rexpejn Jesucrist, basule'runi xtidx Dios lojreni. Dxejc sääni reguedx Grecia. ³Che bidzujñni Grecia, bia'nni ro'c chon bäii. Dxejcti niu' Pabl nen barcw te nijni reguejdx Siria. Niluxh che biejn diajgni cabäz-xhiga'tz rexpejn Israelni te guiniaazrenini, gunaazni nezyuj, gubi'ni nez Macedonia. ⁴Huinäni Sópater, xi'n Pirios, te ben guedx Berea; näj Aristarco näjza Secondo, ben guedx Tesalónica; näj Gayo, ben guedx Derbe; näj Timoteu; näj Tíquico näjza Trófimo, ben Asia. ⁵Guiraa redee gunijd loonu, huiläjzreni nuure guedx Troas. ⁶Guedx Filipos bidxaag Pabl narä, Lucas. Ro'c gudejdnu lanij xten rexpejn Israel che rajwreni yäxttiil ni di saguij. Biriitinu guejdxga, biu'nu nen barcw te sonnu nez guedx Troas. Gaii dxej gusaanu nen barcw, dxejc bidzunnu guedx Troas. Ro'c bia'nnu gajdz dxej.

Baluu Pabl xhidalduxh xtidx Dios lo rexpejn Jesucrist guedx Troas

⁷Che gojl dumingw, primer dxej xman, bidxagsa'nu te bidaunu yäxttiil si'c gudaunäj Jesucrist rexpejn pacni galoo che gajdni

guet. Abejn Pabl xhigab guira yääl guiriini guejdxga. Che biu' guxhijñ, gusloj cagusuleduxh Pabl xtidx Dios, huinuuni si'cti garolyäälli. ⁸Yu' cadro bidxagsa'nu najc jiaa yejc stiop yu'. Xhidalduxh balgandeel cagusanij ro'c. ⁹Sobga' te bi'n ni laa Eutico ro' te bentaan. Lañ ni cagusuleduxh Pabl xtidx Dios lo rebejn, gunaaz bacañ bi'nga, gudiejsni, bitejbni lo yuj desde yu' ni riojn pis. Che huiläsrenini, agujtni. ¹⁰Dxejcti biäjt Pabl lo yuj cadro bitejb bi'nga. Bazuxhijb Pabl cadro naga' bi'nga, gudääznini. Dxejcti räjp Pabl lojreni:

—Na'c chutu yärsia'. Agubansacni. Baspajn Diosni.

¹¹Dxejcti huäpsac Pabl lo yujiaaga. Ro'c bidaunu yäxttiil si'c gudaunäj Jesucrist rexpejn pacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzni. ¹²Xhetliidiru rajcdi bi'nga nani gubansac, nani guläs Pabl. Bibalazduxhrenei, huisa'nrenini rolizjni.

Biu'nu nen barcw, bionnu guedx Mileto

¹³Gunijdnu lo Pabl. Biu'nu nen barcw, sonnu guedx Asón, te ro'c guidxaagnu Pabl, sa'csi abejn Pabl xhigab ni'ni jiini guejdxga, ro'cli jiu'ni nen barcw. ¹⁴Che bidxaag Pabl nuunu guedx Asón, biu'ni nen barcw, sonnu lo nisdoo te bidzunnu guedx Mitilene. ¹⁵Nen barcw biriinu ro'c. Che bara yääl, gudejdnu yuj ni re' lo nisdoo ni laa Quío. Che bara stee yääl, bidzunnu guedx Samos. Guedx Trogilio basilaaznu. Che bara stee yääl,

bidzunu guedx Mileto. ¹⁶Di rlajz Pabl jiu'nu guedx Éfeso, diza rlajzni chunu Asía xchej, sa'csi riojb lajzni guidzunu guedx Jerusalén te ro'c tedni redxe lanij ni laa Pentecostés.

**Guedx Mileto guninäj Pabl
reni rnibee xpejn Jesucrist
ni yu' guedx Éfeso**

¹⁷Che guyu'nu guedx Mileto, baxhal Pabl diidx lo rexpejn Jesucrist ni yu' guedx Éfeso, gurejdxni reni rnibee. ¹⁸Che bidzujnreni lo guejdxga, räjp Pabl lojreni:

—Lagajc la'tu najntu xho nabanä nez lojtu, dxejli ni bidzunä, nabannää Dios. ¹⁹La'tu najntu xho runä xtzuun Jesucrist guixe-guixee, guideb xcälñadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlajz rexpejn Israel nugu't narä, gudedä trabajwduxh. ²⁰La'tu najntu xho baluiä lojtu guirali rextidx Dios ni najc huen par la'tu. Che nadxagsa'tu baluiä xtidx Dios lojtu, näjza rolijz cade tejtü huiluiä xtidx Dios lojtu. ²¹Basule'ä xtidx Dios lo rexpejn Israel näjza lo rebenzijt ni di gac xpejn Israel. Röpä lojreni nanab gusiechlajzreni, gusa'nreni xtojlneni, nanab chalilajzreni xtidx Jesucrist te gudzucaj Dios xtojlneni. ²²Naj cadedä te laad guejdx xtentu, sia'ä guedx Jerusalén, sa'csi caguxhal Sprit Dxan xten Dios narä cha'ä guedx Jerusalén. Dina ganä xhi sacä ro'c. ²³Niluxh nanä cade tej reguejdx cadro rdedä rni Sprit Dxan xten Dios loä sidedä trabajwduxh, siäuä nen latzguiib guedx Jerusalén. ²⁴Niluxh dina

guidxebä, dizana chanälazduxhä xcälñabanätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojlneni palga chalilajzreni xtidx Dios xcuent Jesucrist —räjp Pabl.

²⁵Räjpzani:

—Naj agucbeä dirutu fisac loä, la'tu nani basule'ä xcälñibee Dios lojtu. ²⁶Rniliäpac lojtu, xhet dojldi rapä palga yu' te bejn ni di chalilajz xtidx Dios, ni di Dios gudzucaj xtojlni. ²⁷Xhetliidi biäädxd di loj rextidx Dios ni basule'ä lojtu. Dina nucua'tzä nicla tej xtiidxni xcuent xho rlajz Dios guibanu. ²⁸Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dxan xten Dios abaniidx dzuunga guntu, ni'cni abixe' xtejn Jesucrist lo cruzj te gac gudzucaj Dios xtojlneni. ²⁹Anancheä che rutdiru narä, siääd bejn nani rlajz chalilajztu ste'ca diidx, na'c chalilajztu niclaza jiutu rebejnga. Ruscueetisreni la'tu. Sutie'chreni la'tu lo sa'tu si'c rutie'ch cuyo't rexiil. ³⁰Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajlneni redee ni rusguee. ³¹Colhuii te di guscueereni la'tu. Di jiäl-lajztu choñ ijz, dxej yääl basule'ä xtidx Dios, ronäli balidxätu, sa'csi sanälazätu.

³²Räjpza Pabl:

—Asia'are, rusa'nätu ladznaa Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios bensa'c, nani

najc xpejn̄ni. ³³Dina niniabä meel, niclaza xhabä che baluiä xtidx Jesucrist lojtu. ³⁴Anajntu lagajc narä benä dzuun con naä te bio' xhi gudaunää rexamigwä. ³⁵Si'c benä te filojtu xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn̄ queela xcaxlia'nu xhi cos” —räjpn̄i.

³⁶Che gulujx gunii Pabl rediidxga, bazuxhibnäjn̄i rebejn̄ga, guredx-gunabni lo Dios. ³⁷Dxejcti ronduxh guiraareni gudääzreni guejn̄ Pabl, bachagro'renini. ³⁸Guc-huinuxh lajzreni dxejc sa'csi räjp̄ Pabl dirureni fisac lojni. Dxejcti huisa'nrenini lo barcw.

Huij Pabl guedx Jerusalén

21 Che basa'ntinu rexpejn̄ Jesucrist ro'c, biu'nu nejn̄ barcw, sionnu te lii nejz lo yuj ni laa Cos, ni tre' lo nisdoo. Che bara yääl, bidzunnu lo xyuj Rodas ni tre'za lo nisdoo. Ro'c biriinu sionnu nejn̄ barcw nez guedx Pátara. ²Che bidzunnu ro'c guejdxga, bidxälnu te barcw ni sää nez reguedx Fenicia. Dxejc biu'nu nejn̄ barcwga te chonnu ro'c. ³Bahuiinu lo yuj Chipre ni tre' lo nisdoo, xladbäjcwnu tre' yujga, bideednu te laad. Siontinu nez Siria, ro'c bidzunnu guedx Tiro cadro gule'creni cargw ni nuu barcwga. ⁴Ro'c bidxälnu rexpejn̄ Jesucrist. Biannänureni gajdz dxej. Baluii Sprit Dxa xten Diosreni te guniireni lo Pabl, räjp̄reni:

—Na'c chäälü guedx Jerusalén.

⁵Che baza' gajdz dxej, biunejznu guejdxga. Dxejc guzaj reniguii,

regunaa, näjza rexi'nreni biriinu guejdxga. Ro' nisdoo bazuxhibnu te guredx-gunabnu lo Dios.

⁶Che abazadiidxnu sa'nu, nuure biu'nu nejn̄ barcw, biädla laareni gubisacreni rolizreni.

⁷Biriitinu guedx Tiro. Che bidzunnu ro' guedx Tolemada, gulujx xpiajnu biäjt̄nu nejn̄ barcw. Dxejc biohuiu rexpejn̄ Jesucrist ni yu' guejdxga, biannänureni tejtis yääl. ⁸Che bara yääl, biriinu guejdxga, sonnu guedx Cesarea. Che bidzunnu guejdxga, bionnu roliz Felipe, te dade' ni rusule' xtidx Dios lo bejn̄. Felipe gujc tej lo gajdz niguii nani gudis xhi gudajw rexpejn̄ Jesucrist nani xhet rajpdi guedx Jerusalén. Rolizni huijia'nnu. ⁹Yu' tajp̄ xinxapxteb Felipe. Dios badeed diidx guiniireni lo bejn̄. ¹⁰Xhidajl̄ dxej guläjn̄zu roliz Felipe. La'l̄ ni dxunnu ro'c, bidzuj̄n̄ te niguii ni laa Agabo, biriini nez Judea. Ruzanij Dios xcäriejn̄ni te guiniini xtidx Dios.

¹¹Che bidzuj̄n̄ni loonu, cua' Agabo xsindoor Pabl, baliibni lagajc reni'ni näjza renaani, najni loonu:

—Anaj Sprit Dxa xten Dios:

“Scree suliib rexpejn̄ Israel ni yu' guedx Jerusalén niguii ni najc xtenni sindoorre te gutedrenini ladz̄naa rebenz̄ijt̄.”

¹²Che biejn̄ diaagnu rediidxga, nuure näjza reben̄ ro'c, gunabduxhnu lo Pabl na'c chääni guedx Jerusalén. ¹³Dxejc naj Pabl loonu:

—¿Xhicuent roontu? ¿Xhicuent runhuiintu lazä? Xhet najcdi jäüü nejn̄ latz̄guiib, xhet najcdi palga nungälä guetä guedx Jerusalén xcuent Jesucrist —räjp̄ Pabl.

¹⁴Che naaddi Pabl gusiechlajzni, xhetru guniidinu lojni. Räjptisnu lojni:

—Sugac nani rļajztis Dios.

¹⁵Che gudejd redxejga, bilucheenu rexhixtennu, biriinu guejdxga, sontinu guedx Jerusalén.

¹⁶Gaii rexpejn Jesucrist ni najc beņ Cesarea huisa'n nuure guedx Jerusalén. Ro'c huinäreni nuure roliz te dade' ni laa Mnasón, beņ Chipre, yuj ni tre' lo nisdoo. Laani galooli huililajzni xtidx Dios. Huijia'nnu rolizni, ro'c gulääznu.

Huihui Pabl Jacoob

¹⁷Che bidzūnnu guedx Jerusalén, bibalazduxh rexpejn Jesucrist sa'csi siopnu ro'c. ¹⁸Che bara yääl huinänu Pabl lo Jacoob näjza lo renani rnibee guidoo xten rexpejn Jesucrist. ¹⁹Dxejc gudääz Pablreni, bijni diidx xcuent tebgaj redzuun nani badeed Dios bejnni che guyunäjni rebenzijt nani di gac xpejn Israel, te biejn diajgreni xtidx Dios. ²⁰Che biejn diajgreni xtidx Pabl, gulä'preni xpala'n Dios, räjpzareni lo Pabl:

—Guejblu, sa'nu, anajnlu lacti xhidalduxh xpejn Israel yu' nani rililajz xtidx Jesucrist luxh rapdaduxhrenei leii xten toMoisés. ²¹Abiejn diajg rebejnre xcuentlu. Abiejn diajgreni garenca ruluiilu guiraa rexpejn Israel nani rbäjz neņ reguejdx xten rebenzijt, rulijdxlureni na'c gusäl'reni bee rexi'nreni, na'cza chazanäjrrureni rexcostumbrnu. ²²¿Xhini'c jiennu? Siejn diajgreni abidzujnlu ree, dxejc suchagsa'reni te jιάdreni lojlu. ²³Naj gunlu nani guiniinu lojlu. Yu'

tajp resa'nu ree nani basa'nreni diidx lo Dios. ²⁴Huinäreni, näjza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quixlu guiraa ni banijtreni, te che abasa'tu guiraa ni nanab gac sajc guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgreni xcuentlu. Te gacbeerenei laaca rusooblu xleii toMoisés. ²⁵Biädla rebenzijt nani huililajz xtidx Jesucrist, xhet najcđi, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääł nani gurerejn, na'c guesnäjtu nani di gac chäältu.

Gunaaz rexpejn Israel Pabl

²⁶Che bara yääl, huinä Pabl guidap niguiiga, bejnreni si'c caj lo xleii toMoisés, biu'reni neņ xquidoo rexpejn Israel te huiye'tzreni lo bixhojz neņ guidoo xhi dxej jιάdnä tejpgareni te man te ju't rebixhojz remanga lo Dios.

²⁷Si'c nanab gunreni gajdz dxej. Che ameer guiza' redxejga, bahuii rexpejn Israel ni siädä Asia lo Pabl neņ guidoroga. Gunaazreni Pabl, dxejcti gusloj cayujnreni bieje, ²⁸guredxa'reni räjpreni:

—iColtaa xpejn Israel! iColtaa te gacnäjtū nuure! iBahuilaa! Niguiire najc nani rniyaj rexpejn Israel cadrotis rijni. Rulijdxni bejn te di chazanäjrrureni xleii toMoisés, riye'tzni lo bejn xhet sajđi xquidoronure. Colhuilaa xho siädnäni ree beņ griegw, benzijt ni di gac xpejn Israel, te gundxuudxni xquidoronu —rājpreni.

²⁹Si'c caniireni sa'csi te huält bahuiireni sanä Pabl Trófirmos lo nezyuj. Trófirmos najc te benzijzt ni siääd guedx Éfeso. Naj cayujnreni xhigab laa niguiiga ni siädnä Pabl neñ xquidoro rexpejn Israel.

³⁰Guideb guejdxga guyu' yärsia', bire' benguijhuj, bixa'treni yejc Pabl, gunaazrenini, gudobxhajxhreni Pabl, gulägajc renini neñ guidoroga. Biägajc repuertro xten guidoro.

³¹Lal ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh neñ guejdxre.

³²Guredxgajc comandant resoldaad näjza gaii capitán, ruxunreni bidzujnreni cadre tre' rebejn. Che bahuii rebejn lo comandant näjza resoldaad, guläjz caguijnreni Pabl. ³³Dxejcti gubig comandant lo Pabl, gunibeeni baliib resoldaad naa Pabl con tiop cadenguiib. Dxejcti gunabdiidxn lo Pabl, räjpni:

—¿Chu luj? ¿Xhini'c bejnlu?

³⁴Lo reben xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeeni xhicient cayajc biey sa'csi cabedxa' guiraa rebejn. Dxejc gunibeeni chanä resoldaad Pabl cadre rbäjzreni. ³⁵Che bidzunäj resoldaad Pabl ro' scaleer ni caj ro'c, biireni Pabl te bejnreni gan biunäjreni Pabl, sa'csi nialazduxh rebejn rlažzreni nugu'treni Pabl.

³⁶Siädnajl guiraa rebejn Pabl, rbedxa'reni:

—Colgugu'tni.

³⁷Che agojl jiu' Pabl neñ yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—iAn rniilu xtidxsä! ³⁸An dilu gac niguii ni siääd nación Egipto, nani gudilnä j gubier, nani huinä lo reyubijdz tajp mil niguii nani rugu't bejn.

³⁹Dxejc räjp Pabl lojni:

—Narä nacä te ben Israel, te ben Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.

⁴⁰Dxejc cuäjb comandant guinii Pabl lo rebejn. Lal ni suga'ni lo scaleer basäab Pabl naani lo rebejn te gucdxireni. Che aguredxi rebejn, gusloj Pabl canii lojreni didxsaj hebreo, räjpni:

22 —Guejbtu bengool, guejbtu resa'ä, näjza la'tu dade'. Gucuadiajgtu rextidxä —räjpni.

²Che biejn diajgreni caniini didx hebreo, dxidujru guzuj rebejn. Räjp Pabl lojreni:

³—Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijtz. Baluisa'cni narä guiragajc releii xten retoxtadgooloonu. Guideb xtipä basobä ni gunibee Dios. Gucä si'cpac ni najctu naj. ⁴Dxejcti bidxechduxhä loj renani huililajz xtidx Jesucrist, bagu'täzaren. Balibä xhidajl bejn, niguii näjza gunaa, con cadenguiib. Basäuäreni neñ latzguiib. ⁵Bixhojz ni sajcrü näjza guiraa rebengool ni

sajcru neṅ xquidootu, sajc guinii xhini'c benä. Laareni baniidxreni guijt̄z loä. Ni'c huinää lo rexp̄ejṅ Israel ni yu' guedx Damasco, cadro hua'a te niniazä rebejṅ nani huililajz xtid̄x Jesucrist. Benä xhigab jiadnääreni guedx Jerusalén te jiaureni neṅ latzguiib, te gusacsíreni rebejṅga.

Gunii Pabl xho huililajzni xtid̄x Jesucrist

(Hch. 9:1-19; 26:12-18)

⁶Räjpzani:

—Dxejc hua'a guedx Damasco. Laidxejti ameer guidzunä guejdxga, chela bazanij te balro guideb gabi narä. Xhaguibaali siääd bajlga.

⁷Biabroä lo yuj, dxejc biejn diagä te se' ni canii loä, najni: “Saulo, Saulo, ðxhicuent rusacsílu narä näjza rexp̄enä?” najni. ⁸Dxejcti räpä lojni: “ðChuluj, Dad?” Najni loä: “Narä nacä Jesucrist ni siääd Nasare't, nani çagusacsíduxhlu.”

⁹Rebejṅ ni sanää bahuiloj bajlga, bidxejbreni, niluxh di diajgreni niejn xse' nani gunii loä. ¹⁰Räpä lojni: “Dad, ðxhini'c gunä?” Dxejcti najni loä: “Huistie, huij guedx Damasco. Ro'c sini te dade' lojlu guiraa ni guinibeä gunlu.”

¹¹Bastujxh bajlga loä, diru loä nien, ni'cni gunaaz resa'ä nää, sontinu guedx Damasco.

¹²Räjp Pabl:

—Guejdxga guläjz te niguii ni laa Ananías. Rusoobni guiraa releii xten toMoisés. Guiraa rexp̄ejṅ Israel rni nadalajz lo dade'ga. Biääd Ananías loä. ¹³Cuä'ä guzujni najni loä: “iSaulo, betzä, bahuisac!” Lagajc dxejc biajc loä, bahuiä

lojni. ¹⁴Naj Ananías loä: “Xtios retoxtadgoldoonu agulelu. Gule Dios luj te jiejn diajglu rediidx ni rlanjzni gunlu, te filojlu Jesucrist, Xindxan Dios, te jiejnza diajglu rextiidxpac Jesucrist. ¹⁵Loj guiraa bejṅ susule'lu guiraa ni bahuiilu näjza nani biejn diajglu. ¹⁶ðXhicuent sojbtislu ro'c? Basquejn, huistie te tiobnislu. Huililajz xtid̄x Jesucrist, gurejdx lo Dios te gudzucajni rextoj̄llu.”

Gunii Pabl xhicuent baluiini xtid̄x Dios lo rebenzjyt

¹⁷Che gubi'ä guedx Jerusalén, biu'ä neṅ guidoro xten rexp̄ejṅ Israel te guredx-gunabä lo Dios. Laḷ ni cabedx-canabä lo Dios, astoo gunixcalä, ¹⁸dxejc bahuiä lo Jesucrist. Najni loä: “Basquejn, birii guedx Jerusalén sa'csi di rebejṅ chalilajz xtid̄xä ni gusule'lu lojreni.” ¹⁹Narä räpäza lojni: “Dad, anajnreni xho biu'ä guiraa reguidoo, gunazä guiraa rebejṅ nani huililajz xtiidxlu, gudinduxhäreni, basäuäreni neṅ latzguiib. ²⁰Che bacuaareni guij yejc Esteban nani gunii xtiidxlu, ro'c guzuä, cuäbä bejnreni si'c. Go'pä xhajib xten renani bagu't Esteban laḷ ni bacuaareni guij.” ²¹Dxejcti naj Jesucrist loä: “Huij. Suxhalä luj zitduxh. Chäälü lo guiraa rebenzjyt ni di gac xpejṅ Israel.”

Bia'n Pabl neṅ rolizro xten resoldaad

²²Bacuadiajg guiraa rebejṅ laḷ ni gunii Pabl rediidxga, dxejcti guredxa'reni, räjpreni:

—Colgu't niguiiga. Di nunyäjḷ guibajṅruni.

²³Sanuutis cabedxa'reni.

Gulääreni xcamangwreni, cacuaazareni yuyol̄ jiaa. ²⁴Dxejcti gunibee comandant lo resoldaad, räjpni:

—Colchanä Pabl neṅ yuro xtenu. Ro'c colquiin Pabl te guiniini didxgulii, te gacbeenu xhicuent rbedxaduxh rebejn lojni.

²⁵Sanätireni Pabl. Entis baliibreni ni', naa Pabl con duguijd te niguijnrenini che gunabdiidx Pabl lo capitán, räjpni:

—¿La rajc rguijntu te beṅ roman che gajdntu gacbee xhi dojl̄ bejn̄ni, ä? Et si'cti caj lo xleilu.

²⁶Che biejn diajg capitán xtiidxni, bidxejbni, huijni lo comandant, räjpni lojni:

—Colnati xhi gunnäjlu dade're, sa'csi najcni beṅ roman.

²⁷Biädguxun̄ comandant lo Pabl, räjpni:

—¿La gulii najclu beṅ roman, ä? Räjp Pabl lojni:

—Guliini.

²⁸Dxejcti räjp comandant:

—Narä badedä xhiroob meel te nacä beṅ roman.

Dxejcti räjp Pabl lojni:

—Narä che goläli nacä beṅ roman.

²⁹Che biejn diajg resoldaad nani niguijn Pabl si'c, baslagajcreni reduguijd ni naliib ni', naani. Che biejnza diajg comandant najc Pabl beṅ roman, bidxejbni sa'csi gunibeeni biliib Pabl.

Basule' Pabl diidx xcuentni lo rebixhojz nani rnibee rexpejn̄ Israel

³⁰Che bara yääl, rlajz comandant gacbeeni xhicuent rlajz rexpejn̄ Israel ju't Pabl. Ni'c gunibeeni jiäd

rebixhojz ni sajrcu näjza reguxhtis xten guidoro. Dxejcti biädñani Pabl, bazujnini nez loj guiraa rebejn̄ ni bire' ro'c.

23 Rdxelodzu'tz Pabl lo rebejn̄ ni tre' ro'c laṅ ni räjpni lojreni:

—Narä gusule'ä tiop diidx lo guejbtu, beṅ Israel, sa'ä. Guideb ni nabanä ruzobä xtidx Dios. Di lastoä guidxejb nez lo Dios —räjp Pabl.

²Che biejn diajg Ananías, bixhojz ni sajrcu, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

³Räjp Pabl lo Ananías:

—Sigajcza ca'p Dios ro'lu, benguijdx. Ro'c sobga'lu te gunlu yälguxhtis si'cni caj lo leii. ¿Xhicuent rujnlu nani rnii leiiga di nungäj̄l̄ gun bejn̄? ¿Xhicuent gunibeelu guda'preni ro'ä? —räjp Pabl.

⁴Reni suga' cuä' Pabl räjp lo Pabl:

—¿La dilu gacbee laa bixhojz ni sajrcu xten Dios? Na'c guiniyajluni.

⁵Dxejcti räjp Pabl lojreni:

—Rexamigwä, dina niacbeä caniä lo bixhojz ni sajrcu, sa'csi nanä agunii Dios: “Na'c guiniyajlu reni rnibee xpejn̄lu.” Si'c caj lo guijt̄z ni bacuaa reni gunii xtidx Dios.

⁶Gucbee Pabl tiop cuaa najc reni tre' ro'c. Yu' reni najc beṅ saducee, yu'za reni najc beṅ farisee. Dxejguredxa' Pabl räjpni lojreni:

—Sa'ä, narä nacä te beṅ farisee, xi'nza te beṅ farisee narä. Rililazä sibansac bejn̄ lo rebengut, ni'c cabe'creni xquej̄ä ree.

⁷Entis guiniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala'

resaducee. ⁸Di lajz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten bejn. Niluxh referisee rililajz guiraa rediidxga.

⁹Guyu' te bieiro. Dxejcti huisulii gatii farisee nani najn leii, gusloj caniduxhrenei, räjpreni:

—Di niguiire gac benguijdx. Palga gunii te angl xten Dios o te togool lojni, alga Dios tiñäjnu, dxejc sidxechnäj Diosnu.

¹⁰Che gusloj cabedxaduxhrenei lo sa'reni, bidxejb comandant, andi ju'treni Pabl, caxha'treni yejcni. Dxejcti gunibeeni biäj't resoldaad cadre suga' Pabl. Guideb xtijpreni gulääreni Pabl galäii rebejnga huinäsaacrenini neñ yuro xtenreni.

¹¹Che biu' guxhijn, baluiloj Jesucrist lo Pabl, guzujni cuä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

Rexpejn Israel bejn xhigab nugu'treni Pabl

¹²Che bara yääl, bachagsa' gatii xpejn Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidunnu nis che guigu'tlinu Pabl —räjpreni.

¹³Si'cti tiuu niguii bia'n diidxga.

¹⁴Bidzujñreni lo rebixhojz näjza rebengool, räjpreni lojreni:

—Abia'nnu diidx, xhet guidaudinu, xhetza guidundinu palga dinu guigutxgaa Pabl —räjpreni—. ¹⁵Naj la'tu näjza guiraa rebengool ni rnibee rexpejn Israel, colguxhal diidx lo comandant te guixee

jiädnäni Pabl lojtu. Colyejn si'c ni rlanjtu jiejnru diajgtu diidx xcuent Pabl. Che jiädnä comandant Pabl ree, nuure sugu'tnuni lo nezyuj che gajdni guidzujñ ree —räjp reniguiiga.

¹⁶Niluxh biejn diajg xi'n bisiajn Pabl cabäzXHiga'tz reniguiiga te ju'treni Pabl, huijni royuro xten resoldaad. Che bidzujñni, biu'ni räjpni lo Pabl rediidx ni biejn diajgni. ¹⁷Dxejcti gurejdx Pabl te capitán, räjpni lojni:

—Huinälaa bi'nre lo comandant te gäbni te diidx lojni.

¹⁸Huinäti capitán bi'nga lo comandant, räjpni lo comandant: —Pabl, nani niäu neñ yuro xten resoldaad, gunab loä jiädnälaä bi'nre lo guejblu te guiniini te diidx lo guejblu —räjpni.

¹⁹Dxejc gunaaaz comandant naa bi'nre, huinäni te laad cadre rut jiejni diajgni xtiidxreni, dxejc räjpni lojni:

—¿Xhini'c rlanjtu guiniilu loä?

²⁰Dxejc bazejcn diidx, räjpni loj comandant:

—Abia'n te cuaa xpejn Israel diidx siniabreni lo guejblu jiädnä guejblu Pabl ro jusgaad guixee. Sujnsireni si'c ni rlanj jiejnru diajgreni diidx xcuent Pabl. ²¹Na'c chalilajz guejblu xtiidxreni. Tiu niguii sibäzXHiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxgaa Pabl. Naj cabäjtisreni guxhal guejblu diidx sinä guejblu Pabl ro jusgaad.

²²Che biejn diajg comandant diidxga, basaanni sii bi'nga rolizni, räpxgaani lojni:

—Rut lojdi pac gäblu guniilu diidre loä.

Huij Pabl lo Pels ni najc gubernadoor

²³Dxejcti gurejdx comandant tiop capitán, räjpni lojreni:

—Colgutoj p tiop gayuu soldaad, chää guedx Cesarea näjza gayonbitzoo soldaad ni bijb cabaii, näjza tiop gayuu soldaad ni ca' spaad. Rcagaa guxhijñ guiriireni ree. ²⁴Colquiil tiop cabaii cuib Pabl te xhet gacdi Pabl cheni chanätuni lo gubernador Pels —räjpni.

²⁵Dxejcti bejn comandant te guijtza chanäreni lo gubernadoor.

²⁶Loj guijtza rni scree:

“Gubernador Pels, nani sacduxh. Narä, Claudio Lisias, ruxhalä xtixtios lo guejblu. ²⁷Rediidre rucuaä lo guejblu. Gunaaz rexpejñ Israel niguiire, luxh paru dina nidzunga'cä con resoladaad, nugu'trenini. Che guceä najcni beñ roman, guläänuni ro'c. ²⁸Rlazä niacbeä xhi quej rbe'creni, ni'c huanääni lo junt xten rexpejñ Israel ni rnibee guidoro. ²⁹Dxejc guceä requej ni rbe'creni najc ganax xcuent leii xtenreni, niluxh xhet bejndini te nungäjñ guetni, niclazä nanab jäüni neñ latzguuib. ³⁰Che baxhalreni diidre loä cabäzxhiga'tz rexpejñ Israelni te ju'treni dade're, baxhalga'cäni lo guejblu. Agunibeäza jädle'c rexpejñ Israelre xquejreni lo guejblu. Ni'ctis rniä lo guejblu”, si'c caj lo guijtza ni bejn comandant.

³¹Che biu' guxhijñ, huixii resoladaad Pabl sanärenini guedx Antípatris si'cni gunibee comandant gunreni. ³²Che bara

yääl, gubi' resoladaad nani guzaj ni'reni. Resoladaad ni bijb cabaii guzanäj Pabl guedx Cesarea.

³³Che bidzujñ redee Cesarea, badeedreni xquijtza comandant lo gubernadoor, huinäzarenini Pabl lojni te biemeenini. ³⁴Che gulujx biñi guijtza, gunabdiidre lo Pabl:

—¿Caro siäädlu?

Che guceeni siäädlu Pabl Cilicia, ³⁵räjpni lo Pabl:

—Guidzujñsi rexpejñ Israel ni cadxechnäj luj, sucuadiaggacä xtiidre —räjp gubernadoor.

Gunibeeni ga'p resoladaadni neñ yuro xten Herodes.

Gunii Pabl xtiidre lo Pels

24 Gudejdti gaii dxej, dxejc bidzujñ Ananías, bixhojz ni sajrcu, näjza gaii rebengool xten guidoro, näjza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor. ²Che biädäreni Pabl, gusloj Tértulo cabe'c xquej Pabl lo gubernadoor. Räjpni lo gubernadoor:

—Xquixtioste guejblu dxiduxh nabañnu. Cayacnäduxh guejblu laadxnu con redzunsacduxh ni cayujñ guejblu. ³Xquixtiosduxh guejblu, gubernadoor Pels, xcuent guiraa redzunsac'c ni rujñ guejblu guira nejz. ⁴Luxh na'cru gusieednu guejblu, gucuadiaglaa guejblu tiop diidre. ⁵Agucebeenu xho najc niguiire. Benguidxduxhni. Cadrotis rijñi rujñni biey lo rexpejñ Israel. Laani rnibee te cuaa ni laa nasaren, nalajznu rebejñ nani rililajz xtidre Jesucrist ni biäd guedx Nasare't. ⁶Rlazlini nuxhiñni xquidoronu,

ni'c gunaaznuni. Niennu te junt te lagajc nuure niennu yälguxhtisni si'cni caj lo xquijtznu. ⁷ Niluxh bidzujñ comandant Lisias näjza resoldaad. Diptis badzucajreni niguiiga ladzñaanu. ⁸ Laani gunibeeni lo guejblu jiaäd reni rbe'c xquejni. Naj lagajc guejblu sajc guiniabdiidx lojni te gacbee guejblu guliü guiraa requej nani rbe'cnu xcuentni —räjp Tértulo.

⁹ Dxejcti guiraa rexpejn Israel ni suga' ro'c räjp guliica xtidx Tértulo. ¹⁰ Dxejcti bejn gubernadoor seen lo Pabl te guiniini. Baze'c Pabl diidx, räjpni lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujñ guejblu yälguxhtis nacióñ Israelre —räjp Pabl—. ¹¹ Gutzbitio'p dxejtis bidzunä guedx Jerusalén te saganä Dios. Najñ rebejn xhi dxej biu'ä Jerusalén, guyasi guniidxreni diidx. ¹² Nicla tej dina nichagdilä bejn nenñ guidoro. Nicla tej dina niunä bieje nenñ reguidobäz, nicla ro nezyuj. ¹³ Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu guliü najc xtiidxreni. ¹⁴ Rniliäpac lo guejblu: Rañä Xtios retoxtadgoldoonu. Jesucrist baluii xho gansa'cnu Dios. Rililazä rextiidxni. Xhidalduxh rexpejn Israel rniyaj xho basule' Jesucrist gan bejn Dios. Ruzobä guiraali releii xten toMoisés. Rililazä guiraa rextidx Dios ni bacuaa reni gunii xtidx Dios. ¹⁵ Rililazä xtidx Dios si'c rililazza rebejnre xtidx Dios. Si'c ni najnreni, si'cza nanä sidzujñ te dxej che guibansac rebengut,

rebenguijdx sigajc rebensa'c.

¹⁶ Ni'cni racbeä laaca nabanä guiraa dxej, di lastoä guidxejb, nicla nez loj bejn niclaza nez loj Dios, sa'csi rut rajcdi guiliäs dixhii xcuentä.

¹⁷ Räjp Pabl:

—Agujc xchej yu'ä zijt, lajdx garenca bejn, naj gubinää meel ni baxhal rebenñ nejzga te gudedäni lo rebejn ni xhet rajpdi. Biädnääza gojn xtenä gudedäni lo Dios.

¹⁸ Ni'c sanaä guidoro. Ro'c bidxäjñ rexpejn Israel ni siääd Asia narä. Agucnayaä si'c ni rnibee xleiinu. Xhet benxhidajldi suganää, xhetza bieje ydi cayunä. ¹⁹ ¿Con rebejn ga naj? Te cue'creni quej lo guejblu palga yu' xhini'c rdxechnäjreni narä. ²⁰ O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —räjp Pabl—. ²¹ Tejtis diidx guniä che suga'ä galäiireni, guredxa'a räpä lojreni: sa'csi rililazä sibansac guiraa rebejn lo rebengut, ni'c biädnätu narä lo rebejnre —si'c guniä lojreni.

²² Che biejn diajg Pels xtidx Pabl näjza sa'csi najne'ni xcuent diidx nani baluii Jesucrist, basoobni stee dxej guidxagsac sa'reni räjpni lojreni:

—Che jiaädli comandant Lisias dxejc gunä yälguxhtis —räjp Pels.

²³ Dxejcti gule Pels te capitán ni rnibee te gayuu resoldaad ga'p Pabl. Niluxh räjpni lojni gusaanni gun Pabl nani rlanjtsisni gunni. Na'cza gudxojnñi jiaäd reexamigwni te fiireni lojni.

²⁴ Che gudejd balti dxej, gubi' Pels, biädnäni chäälni Drusila.

Drusila najc beṇ Israel. Dxejc gurejdx Pels Pabl te gusule'ru Pabl xtidx Jesucrist. ²⁵Gunii Pabl xho nanab guibaṇsa'c beṇ nez loj Dios si'c ni gunibee Dios guibajṇ beṇ. Nanabza gacbee beṇ na'c gun beṇ cos guijdx, sa'csi sidzujṇ dxej gac Dios juejz loj guiraa rebejṇ te fiini xhi bejnreni. Racsesli Pels tant bidxejbni biejn diajgni diidxga. Räjṇni lo Pabl:

—Huij ṇaj. Sibedxsacälu che latä stee —räjṇ Pels.

²⁶Naa Pels sudeed Pabl meel lojṇi te guslaanini, ni'c masru guet-guejt gurejdxnini te guninäjnini. ²⁷Si'c gudejd tiop ijz. Dxejc birii Pels gubernadoor. Dxejcti biu' Porcio Festo, gujcnı gubernadorcoob. Niluxh Pels rlajz chanälajz rexpejṇ Israelni, ni'c basa'nni niäusijc Pabl.

Gunii Pabl xtiidxni lo Festo

25 Che biu' Festo gujcnı gubernadorcoob xten reguejdxga, bia'nni guedx Cesarea choṇ dxej. Dxejc biriini ro'c sääni guedx Jerusalén. ²Che bidzujṇni guejdxga, rebixhojz nani rnibee näjza reniguii ni sajcrı lo rexpejṇ Israel biääd lo Festo. Gusloj cabe'creni xquej Pabl lojṇi. Gunabduxhreni lo Festo ³sa'csi rlajzreni gunni te huen laareni, guinibeeni jädnäreni Pabl guedx Jerusalén. Si'c gunabreni, sa'csi abenxgaareni xhigab cuäzxhiga'tzreni te ju'treni Pabl lo nezyuj.

⁴Dxejcti räjṇ Festo lojreni:
—Suniaü Pabl guedx Cesarea.
Di gaclaa guibi'ä guedx Cesarea.
⁵Suchää reniguii ni sajcrı lo sa'tu

guedx Cesarea, te ro'c cue'creni xquej Pabl loä, don la yu' xhi dzunguijdx bejṇni —räjṇni.

⁶Che gudejd si'cti tzuu dxej, gubi' Festo guedx Cesarea. Che bara yääl, gurejṇi lo yagxhil xten gubernadoor, gunibeeni biääd Pabl lojṇi. ⁷Che bidzujṇ Pabl lojṇi, biääd rexpejṇ Israel nani biääd guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di niajcdi nuluiireni guliipac xtiidxreni.

⁸Dxejcti räjṇ Pabl lojreni:
—Nicla tej latsiaj dina niunä, dina niunä latsiaj loj leii xtennu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

⁹Dxejcti Festo, sa'csi rlajzni guiliäsni xpala'nni loj rexpejṇ Israel, räjṇni lo Pabl:

—¿La sisiajlu guedx Jerusalén te cue'c rexpejṇ Israel xquejlu ro'c nezloä, ä?

¹⁰Dxejcti räjṇ Pabl lojṇi:
—ṇaj suga'a loj guejblu, ni gule reii César. Guejblu rnibee guiraa reguejdxre. Ree nungäjḷ cue'creni xquejä lo guejblu, xhet guedx Jerusaléendi. Ananchee guejblu xhet latsiajdi benä lo rexpejṇ Israel. ¹¹Palga nacä te benguijdx, o palga yu' xhi latsiaj benä te nungäjḷ guetä, xho dina xcäbä guetä. Palga xhet latsiajdi benä nani canii rexpejṇ Israel benä, dxejc rutliidi sajz guteed narä ladznaareni. Suchale'creni xquejä lo César nani najc reii xten reben roman —räjṇ Pabl.

¹²Che guninäj Festo reguxhtis xten xquidoro rexpejṇ Israel, räjṇni lo Pabl:

—Luj gunablu chäälu loj reii César. Mbaj. Sijlu lo reii César —räjp Festo.

**Huixiireni Pabl huinärenini
lo reii Agripa**

¹³Che gudejd balti dxej, bidzujn reii Agripa näjza chäälni Berenice guedx Cesarea. Biädhuiireni gubernadoor Festo. ¹⁴Che guyu'reni ro'c xchej, bij Festo diidx lo Agripa xcuent Pabl. Räjpp Festo lojni:

—Ree niäusijc te niguii ni laa Pabl ni basa'n Pels. ¹⁵Che guyu'ä guedx Jerusalén, rebixhojz ni rnibee näjza rebengool xten rexpejn Israel gule'c xquejni loä. Rlajzreni guinibeä guetni. ¹⁶Räpä lojreni: “Di leii xten naciön roman gusaan guet te bejn palga di bejn jiädxgaa te guiniireni nez lojpacni xhi bejn niguiiga, te guzejca niguiiga diidx xcuent requej, te guiniini la guliireni.”

¹⁷Ni'cni che biääd rexpejn Israelga lo guejdxre, che bara yääl guregacä lo yagxhil xten gubernadoor. Dxejc gunibeä huixiireni Pabl guzuj nez loä. ¹⁸Benä xhigab pet yu' xhi cosro bejn. Luxh che gusloj cabe'creni xquejni, gubegacä xhet latsiarodi bejn Pabl. ¹⁹Alga cadiinäjrenini xcuent xleiireni, xcostumbreni. Guniizareni xcuent te niguii ni laa Jesucrist. Agujtni, niluxh canii Pabl gubansacni lo rebengut. ²⁰Guxii nanä xcuent sa' diidxre, ni'cni gunabdidxä lo Pabl top sicäjbni chanääni guedx Jerusalén te ro'c cue'c rexpejn Israel xquejni. ²¹Dxejc che gunii Pabl lojpac reii César chale'c rexpejn Israel xquejni, ni'c gunibeä jiäusijcni laj ni gac guxhaläni lo César —räjp Festo.

²²Dxejcti räjpp Agripa lo Festo:

—Narä rlazäza jiejn diagä xtidx niguiiga —räjp Agripa.

Dxejcti räjpp Festo lojni:

—Guixee gucuaadijglu xtiidxni —räjppni.

²³Che bara yääl, biääd Agripa näjza Berenice, luxh sucheduxhreni. Näjza recapitán ni sajrcu näjza rebejn ni sajrcu lo guejdxga biu'reni nen yuro xten Festo. Dxejc gunibee Festo biääd Pabl. ²⁴Dxejcti räjpp Festo lo guiraa reni re' nen yuro: —Reii Agripa näjza guiraa rebejn ni tre' ree, colcuadijg. Colhuii lo niguiire. Reni rnibee xpejn Israel guedx Jerusalén näjza guejdxre agule'c xquejni loä, canabduxhreni guetni. ²⁵Niluxh narä rchaloä xhet bejndini te nungäjil guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni. ²⁶Naj dina ganä xhini'c gucuaä lo guijtz te guxhaläni lo César ni rnibee narä. Ni'c biädnää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijtz ni chää lo César. ²⁷Narä runä xhigab di nungäjil guxhalä niguiire ni niäu latzguiib lo César palga di gacdi gusule'ä xhi quej xcuentni cabe'c rexpejn Israel loä.

Gunii Pabl rextiidxni lo reii Agripa

26 Dxejcti räjpp Agripa lo Pabl: —Gunilaa xtiidxlu loonu.

Dxejcti guläs Pabl naani, gusloj cagusule'ni diidx lojreni. Räjppni:

²—Reii Agripa, rbalazduxhä sa'csi sajc gusule'ä diidx lo guejblu, sa'csi naj suze'cä diidx xcuent guiraa

requej ni gule'c rexpejn Israel.
³Sa'csi guejblu nanduxh xcuent guiraa releii xten rexpejn Israel. Najnza guejblu xhicuent rdxagdiļ sa'reni. Ni'c rniabduxhā na'c jieed guejblu gucuadiaglaa guejblu guiraa rextidxā.

⁴Rājpa Pabl:

—Guiraa rexpejn Israel nanchee xho nacā che gucāli biuux guedx Jerusalén. Galooli najc guedx Jerusalén ladxā.
⁵Galooliza numbeereni narā, malaii guicājpreni gucā te farisee nani bazobduxhru xleiinu si'cni rililajznu. ⁶Naj suga'a ree, rlajzreni jīāuā sa'csi rililazā diidx nani bia'n Dios con retoxtagdoolu.
⁷Guitzubitiop cuaa rexpejn Israel huililajz siliās Dios guiraa rebengut te guibansacreni. Ni'cni bazuxhijbreni lo Dios dxej-yāāl. Naj rnilii lo guejblu rei Agripa, sa'csi rililazā siliās Dios guiraa rebengut te guibansacreni, ni'cni rlajzreni gusāureni narā. ⁸Palga abejn Dios xhigab guiliāsni guiraa rebengut te guibansacreni, xhicuent di lajztu chalii xtidx Dios?

⁹Rājpa Pabl:

—Narā benāza xhigab galoo nanabpac guidxe'chā loj rexpejn Jesucrist ni siāād Nazare't, ni'c batedāreni trabajwduxh basāuāreni nen latzguuib. ¹⁰Guiraa recosre benāza guedx Jerusalén. Baniidx rebixhojz ni rnibee guijtż loā te basāuā rexpejn Jesucrist nen latzguuib. Che biāureni nen latzguuib, narā gule'cā xquejreni te gujtreni. ¹¹Balti huālt basacsiduxhāreni lagajc nen guidobāz te niniyajreni Jesucrist.

Luxh basacsiduxhāreni, hua'a guideb nez reguedxziļt te ro'c huisacsīā rexpejn Jesucrist.

(Hch. 9:1-19; 22:6-16)

¹²Rājpa Pabl:

—Ni'c sa'a nez guedx Damasco, ca'a guijtż ni baniidx rebixhojz ni rnibee. ¹³Rnilii lo guejblu, rei, si'cti läidxej, bahuiā te bajl ni siāād xhaguibaali. Rsanijruni loj gubijdx. Basanijni guideb gabi cadro suga'a nājza reni sanāā. ¹⁴Che biabrloonu lo yuj, biejn diagā xse' te ni canii loā con didx hebreo: “Saulo, Saulo, xhicuent rusacsīlu narā nājza rexpenā? Che rusacsīlu narā, lagajc luj rdejdlu trabajw, si'c te gon ni rucuanī yejc garu'ch.” ¹⁵Dxejcti rāpā lojni: “xChu luj Dad?” Dxejc najni loā: “Narā nacā Jesucrist nani cagusacsīduxhlu. ¹⁶Huistie, gusulii. Narā baluiloā lojlu sa'csi rlazā gaclu te xpenā. Aguleālu te gusule'lu lo rebejn guiraa ni bahuiilu nadxej, nājza guiraa recos ni churu guluiā lojlu. ¹⁷Naj suxhalālu loj rexpejn Israel nājza lo rebenzijt nani di gac xpejn Israel. Che gusacsī rexpejn Israel nājza rebenzijt luj, sacnāduxhālu, te di ju'treni luj. ¹⁸Gacnāā lastooreni te che jiejn diajgreni xtidxā, chalilajzrenini, diru xcāriejnreni gac nayāāl, sianij xcāriejnreni. Dxejc dirureni gusoob xtidx Bendxab ni rnibee rebendxab, sa'csi susoobreni xtidx Dios. Che chalilajzreni rextidxā, sudzucaj Dios xtojreni. Dxejcti suchaag Diosreni loj renani anajc bennaya sa'csi basoobreni xtidx Dios, huililajzreni xtidxā.”

¹⁹Räjpza Pabl:

—Ni'cni rniliä lo guejblu, reii Agripa, cayunä si'cni naj Jesucrist loä gunä che baluilojni loä. ²⁰Gunixgää xtiidxni lo reben Damasco. Röpä lojreni: “Colgusiechlajz, colgusoob xtidx Dios. Colyujn dzunsa'c te gacbee rebejn abasiechlajztu, arusoobtu xtidx Dios.” Si'cza guniä lo reben Jerusalén, näjza lo rebejn ni yu' reguedx Judea, näjza lo rebenzijt ni di gac xpejn Israel. ²¹Sa'csi benä si'c, gunaaz rexpejn Israel narä nen guidoro, rlanjreni nugu'treni narä. ²²Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guijtz nani bacuaa toMoisés näjza guiraa reniguii nani gunii xtidx Dios. Laareni galooli guniireni xcuent xhini'c gac naj. ²³Najreni sidejd Crist trabajwduxh, sugu'trenini. Niluxh sa'csi ganiddoo laani guibansacni lo rebengut, ganiddooza laani suluiini loj rexpejn Israel näjza loj guiraa rebenzijt guliipac xtidx Dios, sibansac bejn lo rebengut, si'c ni guniini galooli.

Di Agripa nililajz xtidx Jesucrist

²⁴La_l ni canii Pabl rediidxga lojreni, dip gunii Festo, räjpni lo Pabl:

—Pabl, yejclu cayajc. Pet sa'csi nanduxhlu guijtz ni'c cayajc yejclu.

²⁵Dxejcti räjp Pabl lojni:

—Rniliä lo guejblu dad gubernador Festo, xhet rajcdi yecä. Ganax didxlii caniä. ²⁶Ree suga' reii Agripa. Laani nancheeni

guiraa rediidxre, ni'c guyasi caniä rediidxre lojni, dizana guidxebä sa'csi anajnni gulli guiraa ni gujc, sa'csi xhet xhiga'tzdi gujcreni.

²⁷Guejblu reii Agripa, äla rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjp Pabl.

²⁸Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen Dios.

²⁹Räjp Pabl lojni:

—Xhet najcdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiajg xtidxä te gactu si'c nacä, niluxh xhet näjdi resa' cadenre —räjp Pabl.

³⁰Dxejcti huisu Agripa, Festo, Berenice, näjza rebejn ni sobganäjreni. ³¹Che gubigreni stelaad, räjpreni lo sa'reni:

—Niguiire xhet bejndini te guetni, xhetza bejndini te jäuni.

³²Dxejcti räjp Agripa lo Festo:

—Paru dini niniab chääni lo César, sajc nuslaanuni.

Birii Pabl säa nez guedx Roma

27 Basoobtireni dxej ni niu'nu nen barcw te chonnu Italia. Dxejc bateedreni Pabl näjza sgaii bejn nani niäuzä lo capitän ni laa Julio. Rnibee Julio te gayuu soldaad, najcreni te cuaa ni laa Augusto. ²Näjza te dade' ni laa Aristarco guzaj, siäädni guedx Tesalónica xten Macedonia. Biu'nu nen barcw ro' guedx Cesarea. Barcwga siääd guedx Adramitio. Biriitinu, najc xhigab teednu nez

reguejdx nani yu' ro' nisdoo lo reyuj xten Asia. ³Che bara yääl guläz barcw ro' guedx Sidón. Huenduxh gujc Julio con Pabl, basaanni bihuii Pabl reexamigwni ni yu' guejdxga te bahuiireni Pabl, badeedreni xhi rquiinni. ⁴Che säasac barcw lo nisdoo, bideednu stelaad Chipre, yuj ni tre' lo nisdoo, sa'csi säáb te beduxh, ni'c naga' Chipre xladbäjgwnu, te guxiiru rda' bej loonu. ⁵Che sonnu neñ barcw, bideednu xnisdoo reguedx Cilicia näjza xnisdoo reguedx Panfilia, te bidzunnu ro' guedx Mira xten Licia. ⁶Ro'c bidxäjl capitán xten resoldaad stee barcw ni siääd guedx Alejandría. Agojl cháä barcwga Italia. Bateedtini guiraanu lo barcwga. ⁷Balti dxej cháigaj sonnu lo nisdoo. Trabajwduxh bidzunnu lo nisdoo ro' guedx Gnido, sa'csi entis cabi' beduxh nez cadro sonnu. Ni'c trabajwduxh bideednu xladbäjgw yuj Creta ni tre' lo nisdoo xladbeenu. Gudejdnü guedx Salmón. ⁸Dxejcti cháiduxh sonnu neñ barcw lo nisdoo nez cuä' yu Creta; si'ctis gujc bidzunnu te lajt ro' nisdoo ni laa Buenos Puertos cadro guxii säáb bej. Gajxh ro'c tre' guedx Lasea. ⁹Agujc balti dxej cayaclaanu, luxh agudejdza dxej ni rucua'n rexpejn Israel, guxii riäädx chaa ijz. Rebäire di bejn cháä neñ barcw sa'csi yuduxh riesgw lo nisdoo, ni'c balijdx Pabl rebejn, ¹⁰räjpni lojreni: —Rexamigwä, runxgaä bis guejbtu, palga chonnu neñ barcw chanuunu xnejznu, sajc te liädxduxh. Sinitloj cargw, sibijxh barcw, luxh silo' xhidajl bejn, —räjpni.

¹¹Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuaan xten barcw. ¹²Luxh sa'csi lajtga dini gajc huen tedreni rebäii nalduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajl, rajpreni. ¹³Ni'c che gusloj cabi' te bebáz nez lad sur, naareni pet xhet najcdi guiriinu lo nisdoo con barcw. Dxejc basläareni barcw, sontinu ro' nisdoo gajxh cuä' Creta. ¹⁴Niluxh di niacלאa gusloj te nisguipeduxh birii nez redajn xten Creta. ¹⁵Gunaaz bejga barcw, diru gacdi gusajrenini. Basa'ntireni sanä bejga barcw cadrotis rlajzni. ¹⁶Siädgobiuj barcw te canuu. Che bidzunnu stelaad te yuje' ni tre' lo nisdoo ni laa Claudia, guxiiru cabi' beduxhga. Dxejcli bejnreni gaan guläsreni canuu neñ barcw. ¹⁷Che basälnu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibilni. Cadxejbreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni rniaaz bej te rusajni barcw, gudixhreni lajdga neñ barcw. Sanäti beduxhga barcw cadrotis rlajzni. ¹⁸Che bara yääl caguscuä' beduxh barcw lo nisdoo. Sas basälreni che'n cargw lo nisdoo te bicharu barcw. ¹⁹Ni riojn dxej, lagajc laareni basälreni lo nisdoo guiraa xtrast barcw. ²⁰Che agujc balti dxej niäü lo gubijdx, diza rebale' nien xhaguibaa sa'csi laltis cayajb nisguipeduxhga, biennu xhigab guiraanu sejtnu. ²¹Xchero

rut rlanjdi gau. Dxejc gusuj Pabl galäi rebejn räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di liäädxre niajc, dizanu nidejd trabajwduxhre. ²²Niluxh colcuedxdi lastootu. Niclatej bejn ni siääd lo barcw di guet. Barcwtis sinitloj. ²³Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuä'ä, ²⁴najni loä: “Na'c guidxejbli Pabl. Nanabpac chäälü lo reii César. iBahuilaa! Abasalajz Dioslu reni siädnälu; nicla tej reni yu' nen barcwre di guet”, najni loä. ²⁵Ni'cni caniä lo guejbtu, na'c guidxejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä. ²⁶Niluxh yu' cadro chalaj barcw lo yujxh nen nisdoo gajxh lo te yuje' ni tre' nen nisdoo —räjp Pabl.

²⁷Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujn barcw gajxh lo yuj, ²⁸ni'c bastejbreni te guiib lo duu xhajn nisdoo, te barexhreni ro'c, dxejc gucbeereni najc nisdoo jäät si'cti galbitzubixho'p metr. Che guzaj barcw stelabäze', bastebsacreni guiib con duu xajn nisdoo, dxejc gucbeereni ro'c najc nisdoo jäät si'cti galbigajdz metr. ²⁹Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni nen yujxh te ruscuääzreni barcw, te jia'nni tejsi lajt. Dxejc rlanjreni malai jianijga lo guedxliuj. ³⁰Dxejcti gulät remos

canuu lo nisdoo cayujnsireni si'cni chastejbreni stee guench guiib lo nisdoo, niluxh rlanjreni guxunreni guidon la sajc guidzujnreni ro' nisdoo. ³¹Dxejcti räjp Pabl lo capitán näjza lo resoldaad:

—Palga di redee jia'n nen barcw, di gacdi guslaatu xcäl nabajntu —räjpni.

³²Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga. ³³Che gusloj cayanij, gunibee Pabl, räjpni lojreni: —Nadxej rajc tiop xman gajdtu gues, gajdzatu gau. ³⁴Naj coltajw te gac guixoobtu lo nisdoo. Na'c guntu xhigab guettu, nicla tej xquidxejcti di nitloj.

³⁵Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dxejc gula'nini, gusloj cayajwnini. ³⁶Dxejc bibaa-lajzreni, näjza laareni gusloj cayajwreni. ³⁷Nuunu najcnu tiop gayuu gayonbitzubixho'p bejn ni yu' nen barcwga. ³⁸Che agujc gudajwreni, basälreni triuu lo nisdoo te bicharu barcw.

³⁹Che bianisac, direni niembee yujga, niluxh bahuiireni cadro rdzujn te gueubäz ro' nisdoo cadro yu' xhiroob yujxh ro' nisdoo. Rlanjreni nusiureni barcw ro'c. ⁴⁰Dxejcti baslaareni guidap guench guiib ni naaz barcw, bia'nreni guideb caden nen nisdoo, baxheczareni yajg ni ruzaj barcw, guläszareni ladro nez delant barcw te balanaa bej barcw. Badzuräreni barcw sääreni nez ro' nisdoo. ⁴¹Sas biu'reni te lajt cadro rdxagsa' tiop cuaa nis. Ro'c huilaj yejc barcw nen yujxh nen nisdoo, digacdiru guiniibni. Dxejcti gusloj cabijl dejt barcw sa'csi sanuutis caguijn nisdoo

detz barcw. ⁴²Dxejcti rlajz resoldaad nugu't repres te di guixoobreni lo nis guxunreni. ⁴³Niluxh di rlajz capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujnreni lo yujxh. ⁴⁴Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujn guiragajc rebejn lo yujxh ro' nisdoo. Nadaanreni bidzujnreni lo yujxhga.

**Bidzujn Pabl lo yuj ni laa
Malta ni re' lo nisdoo**

28 Che bidzujn nu lo yuj ni tre' lo nisdoo, biembeenu yujga najc ni laa Malta. ²Gucnäj rebejn ro'c nuure, gule'creni guiboo bahuiireni nuure sa'csi cayacnalduxh, cayajbza nisguj. ³Ca' Pabl te däaz yajg, sale'cnini lo guiboo, chela biriyäl te bäl nialajz nen yajgga. Saa gudauya'ni naa Pabl. ⁴Che bahuii reben Malta li najl bäl nialajzga cayauya' naa Pabl, gusloj cayäjbreni lo sa'reni:

—Pet rugu'tni bejn ni'c mase bejn ni gaan lo nisdoo siguijxni xtojlni, sejtni naj.

⁵Gubijb Pabl naani dxejcti bitejb bälga lo guiboo. Xhet gujcdi naa Pabl. ⁶Dxejc reben ro'c cabäjz fiireni la sisiäguj naa Pabl o laa sejtni. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

⁷Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolijzni chon dxej. Huenduxh gujc dade'ga, baniidxni guiraa ni biquiinnu.

⁸Naga' xtad Publio cayacxhuuni, yu'ni xliaa, cayajczani yobrejn. Huihui Pabl ni. Guredx-gunab Pabl lo Dios, dxejc batzuub Pabl naani yejcti, basiacgajcni. ⁹Che gucbee rebenguejdxga abasajcni ben racxhuuga, bidzunäjreni ben racxhuu lo Pabl, basajc Pabl guiraaeni. ¹⁰Ni'c banidx-xliaareni xhidalduxh xhicos, luxh che biriinu ro'c, baniidxreni guiralii recos ni biquiinnu nen barcw.

Bidzujn Pabl guedx Roma

¹¹Aguj chon bäii yu'nu ro'c che biu'nu nen te barcw ni siäd Alejandría. Lagajc ro'c bateed barcwga rebäinajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus. ¹²Biriinu Malta sonnu nen barcw nez guedx Siracusa. Ro'c bia'nnu chon dxej. ¹³Dxejcti biusacnu nen barcw, sonnu lo nisdoo cheni bidzunlinu guejdx ni laa Regio. Che bara yääl, gubi' te bej birii lad sur. Biusacnu nen barcw. Bara yääl bidzunnu guedx Puteoli. ¹⁴Ro'c bidxaagnu gaii xpejn Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma. ¹⁵Che gucbee rexpejn Jesucrist ni yu' guedx Roma siopsaanu nez Roma, biädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtios lo Dios. ¹⁶Che biu'nu guedx Roma, bateed capitán repres ladznaa comandant, niluxh basaanni cualaa Pabl te yu' cadro cuääzni. Tejtis soldaad biannäj Pabl.

Baluu Pabl xtidx Dios lo reben Roma

¹⁷Che gudejd choñ dxej, gurejdx Pabl reni rnibee lo rexpejn Israel. Che bidxaag sa'reni cadro yu' Pabl, räjpni lojreni:

—Guejbtu reexamigwä, resa'ä, xhetliidi nani xhet laadi benä lo rexpejn Israel, dizana nibälazä xleii toMoisés. Niluxh basäureni narä neñ latzguiib guedx Jerusalén, dxejcti bateedreni narä ladznaa reroman. ¹⁸Che biejn diajgreni xtidxä, rlaiz reguxhtis roman nuslaa narä sa'csi xhet benädi te nugu'treni narä. ¹⁹Niluxh naaddi rexpejn Israel guslaareni narä, gunabätis lojpac reii César jiädle'creni quej ni cabe'creni xcuentä. Niluxh narä xhet xquejdi rexpejn Israel cue'cä. ²⁰Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn Israel sibansac rebengut, ni'c nalibä cadenre.

²¹Dxejcti räjpreni lojni:

—Nicla tej guijtz gajd reguxhtis xten reguedx Judea guxhañ loonu xcuentlu, gajdza rexpejn nu ni bidzujñ ree jiädsan diidx xhet laadi bejnlu. ²²Rlaiznu jiejn diajgnu xtiidxlu, don xhi naalu, sa'csi racbeenu xhidajl lajt rniyajreni redidxcoob xten Jesucrist —räjpreni.

²³Guletireni te dxej guidxagsa'reni. Che bidzujñ dxejga, bidxagsa' xhidalduxh bejn neñ yu' cadro rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näjza diidx ni bacuaa reniguii

nani gunii xtidx Dios basule'ni Jesús najc Crist nani galooli cabäjz reben Israel jiääd. ²⁴Yu' reni huililajz xtidx Pabl, yu'za reni di nililajz xtiidxni. ²⁵Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dxañ xten Dios rediidxre guniini, räjpni lo rextadgoldoonu:

²⁶Huij, gunii lo rebejnre, scree gojz lojreni:

Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

²⁷Agucnajd lastoo rebejnre sa'csi di rlaizreni chalilajzreni xtidxä. Direni cuadiajg xtidxä sa'csi di rlaizreni jiejn diajgreni diidx ni guliipac.

Rusäuzareni balojreni te di fiireni, te di lajzreni chalii.

Ni'cni direni gusiechlajzreni te gusaan gunreni dojl te gudzucay Dios xtojlni.

²⁸Räjp Pabl lojreni:

—Colgacbee. Najli sisiule' xtidx Dios lo rebenzijt ni di gac xpejn Israel te gusiejch lajzreni, te gudzucay Dios xtojlni. Rniliápac lojtu, sililajzreni rextidx Dios.

²⁹Che gulujx gunii Pabl rediidxga lojreni, ensilaareni gusloj cadxagdijl sa'reni lañ ni sääreni.

³⁰Tiop iiz guläjz Pabl guejdxga neñ yu' ni cualaani. Biuni guiralii rebejn ni biääd rolijzni. ³¹Lo guiraa rebejnnga basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojndi guniini.

Guijtz Nani Bacuaa Pabl Lo Rebeņ Roman

Rucuaa Pabl lo rebeņ guidoo neņ guedx Roma

1 Narä, Pabl, nacä te xmos Jesucrist, laani gule narä te gusule'ä xtidx Dios loj rebeņ.

²Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guiitz xten reprofetga.

³Rediidx ni rusule'ä najc xcuent Jesucrist, Xi'n Dios, ni najc xagdoo toreei David xcuent tiejxhni.

⁴Xcuent Xsprit Dxaan Dad Jesucrist, najcni Xi'npac Dios. Badeed Dios yäl̄rnibee lojni, ni'cni gubansacni lo rebeņgut. ⁵Laani gucnäjni narä, guleni narä te gusule'ä xtiidxni te guzobdiajgtu, te chalilajz rebeņ ni rej guideb guedxliuj xtiidxni. ⁶Luxh nadxaagtu loj rebeņ ni guleni te chalilajzreni xtiidxni.

⁷Ruxhalä guiitzre lojtu ni yu' guedx Roma, guiraatu ni sanälajz Dios ni bibeetu gactu bendxan. Gacnäj Dios ni najc Xtadnu näjza Dad Jesucrist la'tu, guscuedxireni lajztu.

Rlajz Pabl chää guedx Roma

⁸Ganidtoo rudedä xquixtios loj Dios con laj Jesucrist xcuent

guiraatu, sa'csi guideb guedxliuj ruju beņ diidx xcuent xcäl̄rililajztu.

⁹Lagajc Dios anajn xho rniabä guet-guejt xcuent la'tu lojni. Narä runä xtzuum Dios guideb lastoä, rusule'ä diidx xcuent Xi'nni Jesucrist.

¹⁰Sanuutis canabä lojni, top sajc jädhuiä lojtu si'cni rlazä gunä agujc xchejli. ¹¹Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzrutu lo xtiidxni. ¹²Nalajznu, te gustioobnu lajz sa'nu xcäl̄rililajz xtidx Dios xten sa'nu.

¹³Rebetzä rlazä gacbeetu balti huält benä xhigab jädhuiä lojtu, luxh gajd gacdi jialä. Rlazä jädhuiä lojtu te chalilajz xhidajlru beņ xtidx Dios sigajcni salilajzreni guiralajt cadro hua'a loj rebeņ ni di gac xpeņ Israel. ¹⁴Nungäjlpac gusule'ä xtidx Dios loj rebeņ nani rnii garen-garen didxsaj, sigajc loj rebeņ griegw, loj renani nayääl, sigajc loj rebeņ najn. ¹⁵Rbaali lazä suga'a naj, te gusule' xtidx Dios näjza lojtu ni yu' guedx Roma.

Xcäl̄rnibee xtidx Dios

¹⁶Sa'csi dina guituiä xcuent xtidx Dios, sa'csi najcni yäl̄rnibee xten

Dios te guslaani lo dojl chutis bejn nani rlanj chalilajz xtiidxni, ganidtoo reni najc rexpejn Israel, dxejcti najza rebejn ni di gac xpen Israel. ¹⁷Sa'csi xtidx Dios rusule' xho nanab chalilajz te bejn te gacni te bensa'c nez lo Dios sa'csi huililajzni xtiidxni. Lo xtidx Dios caj scree: "Palga rililajz te bejn xtidx Dios, najcni te bennaya nez lo Dios, nabannajni Dios xcuent xcärlililajzni."

Rextojl bejn

¹⁸Xcälrde'ch Dios nani yu' xhaguibaa siajbni yejc rebejn nani gun dojl, nani rlanj gun cosguijdx, nani di gusaan guisheed sabejnreni didxgulii. ¹⁹Sa'csi anancheereni nani sajc gan bejn xcuent Dios, ni'cni najnreni rajpreni dojl, sa'csi ruluipac Dios na'c gunreni dojl. ²⁰Cheni birixtiejli guedxliuj, recos nani di gacdi fii bejn xcuent Dios, si'c xcälrnibeeni ni najc par tejpas, si'c xtujx xtenni, huenliisi ruzenreni sa'csi ruluilojreni recos ni ruzen nani benchee Dios. Guiraa reni'c ruluiloj najcni Gueb Dios ni rajp yälrnibee par tejpas, ni'c di gacdi guiniireni loj Dios direni niembee xhini'c rlanj Dios gunreni. ²¹Ni'cni, mase biembeereni Dios, direni niliä'p xpala'nni te ganreni Gueb Dios, dizareni nudeed xquixtios lojni. Alga gualajz gujcreni, bicäy xcariejnreni, naareni hueen najc gunreni si'ctis ni jiajb yejcreni, si'cni rsia' lajzreni nen lastooreni. ²²Caniireni nanduxhreni, per direni gan, nayäälreni. ²³Gulälazreni xcälrdimbicha' Dios ni najc tejsi

par tejpas, te bazuxhijbreni nez loj rebanäjb ni benchee naareni, ni najc guiraa ni rujn lojni si'c rujn lo te niguii ni rnitloj, najza guiraa ni najc si'c reman ni rutajt, najza guiraa ni najc si'c reman ni yu' tajp ni'ni, najza ni najc si'c rebäjl.

²⁴Ni'cni gulälaz Diosreni, basaanni gunreni si'ctis ni rlanjreni. Bejnreni dojl con resa'reni.

²⁵Sa'csi ahuililajzreni didx-xhii lacuaa nililajzreni xtidxlii Dios, ruzuxhijbzaareni nez loj recos ni benchee Dios, lacuaa guzuxhijbreni loj Dios nani benchee guiraa rexhicos, Dios nacle' par tejpas. Sugacni si'c.

²⁶Ni'cni gulälaz Diosreni, subia'nreni lo xcällatsiajreni, lo yälxtujy xtenreni. Diru regunaa guesnäjä niguii, lagajc sagunaareni resnäjäreni. ²⁷Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

²⁸Luxh sa'csi di rlanjreni jiuareni Dios, basaanti Dios suyu' cosguijdxctis xcäriejnreni, te chanuutisreni lo xcällatsiajreni, rujnreni recos ni xhet laadi.

²⁹Guidxareni dojl, najza cosguijdx, näj yälruguilajz xhixten sa'reni; rugu'treni bejn, rujnreni yälrsiäblajz, rucuanäjreni resa'reni, rusgueereni sa'reni, rdxechnäjäreni sa'reni, rniizareni didxxhii.

³⁰Rniyaj sa'reni, rdxe'chreni lo Dios, gualajzreni, dipacreni guitujy, rliä'preni lagajc xpala'nreni, entis latsiacoo rbäxtiejreni, gualajzreni lo xcuzajnreni, ³¹nadduxhreni, xheti xcäriejnreni, xhet sajcdi

xtiidxreni ni ria'nreni lo sabejnreni, direni chanälajz sa'reni si'cni nungäjĵ gacni, dizareni gulasajz sa'reni. ³²Luxh mase agucebereni gun Dios yäl̄guxhtis lojreni, najnzareni nungäjĵ guetpac renani rujn recosre, nicla jiureni, rujnreni guiraa recosguijdxre, luxh rbaali lajzreni richunäjreni rebejn ni rujnza recosguijdxga.

**Dios rujn yäl̄guxhtis
con didxguliipac**

2 Ni'cni, ¿canejz chäätu, la'tu benguedxliuj? Chutis luj ni rgubeelu sabejnlu, lagajc si'c cubeezareni luj, lagajc xcuent ni'c sajclu yäl̄guxhtis, sa'csi luj rgubeelu sabejnlu, lagajcza luj rujnlu lagajc dojlga. ²Nancheenu sujn Dios yäl̄guxhtissa'c loj renani rujn sa' dojlga. ³Ben̄ guedxliuj ni rgubee loj renani rujn dojl, luxh sigajcza rujnlu, ¿la rujnlu xhigab sidedcaj gun Dios yäl̄guxhtis lojlu xcuent xtojllu, ä? ⁴O ¿la rbälazlu ni rujn Dios, najcni huenduxh, lacti guroob najc xcäl̄rulasajzni, rapduxhzani pasens? ¿La dilu gan dee najc ni gacnäjl̄u gusiechlajzlu te guibicajlu lo dojl, ä? ⁵Luxh sa'csi nadduxhlu, di lastoolu guigoodz te gusiechlajzlu, cagutajllu yäl̄guxhtis ni gaclu che guidzujn dxej ni gun Dios yäl̄guxhtis loj reben̄ guedxliuj, ⁶siguijx Dios loj tejgatu xcuent dzuun nani bejn tejgatu. ⁷Loj rebejn̄ nani rlaajtisreni guibansa'c, ni gusoob xtiidxni, sudeed Dios yäl̄nabajn̄ par tejpas sa'csi gudiilreni xhaniduj näjza go'preni xpala'nreni loj Dios, rlaizreni guibajn̄reni loj

Dios par tejpas. ⁸Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini, alga rusoobreni reyällatsiaj, redidxguijdx. ⁹Guiraa reben̄ guedxliuj ni rujn dojl̄ sidejd trabajwduxh näjza sac-huin lastooreni; ganid rexp̄en̄ Israel, dxejcti näjza reben̄ griegw. ¹⁰Loj guiraa rebejn̄ nani rujn cos-hueen, sudeed Dios xhaniduj, näjza bala'n̄, näjza yäl̄rbecdxi lastooreni, ganid rexp̄en̄ Israel, dxejcti näjza reben̄ griegw.

¹¹Sa'csi tebloj najc guiraasi rebejn̄ nez loj Dios. ¹²Guiraa rebejn̄ nani bejn̄ dojl, luxh direni niembee xleii Dios, sinitlojreni sin leiiga; guiraa reni biembee xleii Dios, lagajc con leiiga sujn Dios yäl̄guxhtisreni xcuent xtojreni. ¹³Xhet ganaxdi renani rucuadajgtis xleii Moisés najc ben̄naya nez loj Dios; rebejn̄ ni rusoobpac rexleii toMoisés, reni'c najc ben̄naya loj Dios. ¹⁴Yu' xhidat bejn̄ ni di gumbee xleii toMoisés, dizareni gac rexp̄en̄ Israel, rujnreni recos ni caj lo leii. Najnreni xhini'c najc cos sa'c. Ni'cni lagajc xcäriejnreni najc si'c leii par laareni. ¹⁵Recossa'c ni rujnreni ruluiloj nezyusa'c ni yu' lastooreni. Xcäriejnreni ruluiloj xhini'c loj guiraa nani rujnreni najc cos sa'c, xhini'c najc dojl. ¹⁶Guiraa recosre saj̄c che guidzujn̄ dxej ni gun Dios yäl̄guxhtis guiraa rexhigabxhiga'tz ni yu' lastoo rebejn̄. Jesucrist gac juejz lojreni, dxej̄c sisiojb guiraa rediidx ni cagusule'ä lojtu.

Rexp̄en̄ Israel näj xleii toMoisés

¹⁷Luj ni laalu xp̄en̄ Israel, ni rniilu sanäpaclu xleii toMoisés,

rniduxhlu najclu xpen Dios, ¹⁸rniilu nancheezalu xhini'c rlajz Dios gunlu, anajnzalu xhini'c najc hueenru sa'csi bisiedsa'cpaclu leii. ¹⁹Rchalolu sajz guluiilu nezyusa'c lo rebejn nani najc si'c lotiä'p, sajz guzanijlu xcäriejn reni nacäyj xcäriejnreni. ²⁰Rchalolu najclu mastr lo renani nayääl, najczalu mastr lo rebiiuux, sa'csi nansa'clu leii, luxh lojni caj guiraa yäl'najn näjza guiraa didxguliipac. ²¹Ni'cni rniä lojlu, luj ni caguseed xtee bejn, ðxhicuent dilu guseed lagajc luj? Luj ni rusule'lu diidx na'c cuan bejn, ðxhicuent rbajnluj? ²²Luj nani rniilu na'c guesnäjni te ni di gac chääl'ni, ðla resnäjluj nani di gac chäällu, ä? Rdx'e'chlu xcuent rebanäjb, ðxhicuent rbääl'ni xhicos nen xquidoo rebanäjb, ä? ²³Luj rlajzlu chä'p xpala'nlu sa'csi najnluj leii, ðla rusanxtujyluj Dios sa'csi dilu gusoob xtidx leiiga, ä? ²⁴Bahuii xho rebejn nani di gac xpen Israel rniyajreni Dios sa'csi la'tu ditu gusoob xtiidxni, rujntu dojl, sigajc ni caj lo xtidx Dios.

²⁵Palga la'tu chutu bee si'cni caj lo leiiga, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl. ²⁶Ni'cni palga te bejn ni di chu beega, luxh rusoobni guiraliipac xtidx leiiga, ðla di gacdi guchaagni cuent najcni si'c te nani yu' beega, ä? ²⁷Bejn nani di chu beega, luxh rililajzni guiraliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl. ²⁸Sa'csi xhet

guiraadi rebejn ni yu' beega najc rexpejn Israel, luxh di beega ni ru' bejn gun gusoobpac bejn xtidx leiiga. ²⁹Najcpac te xpen Israel nani najcni nen lastooni, nani yu' bee lastooni, rusoobpacni xtidx Dios xcuent Sprit xtenni, dini gunni sa'csi najctisni costumbr. Dios ni siliä'p xpala'n'ni, xhet bejndi.

3 ðXhini'c sacnäy te bejn najcni te rexpen Israel, ä? O ðxhi sajz chuni beega? ²iEmpac sacduxhni! Ganidtoo, sa'csi loj rexpen Israel badeed Dios xtiidxni. ³Mase yu' renani di nililajz diidxga, ðla ni'cni xhet sajcdi diidx ni bia'n Dios loj rexpejnni, ä? ⁴iXho gacni si'c! Diostis najc guliipac, guiralii bejn rusguee. Scree caj lo xtidx Dios:

Lagajc xtiidxlu suluii laaca rujnluj,

te che gaclu yälguxhtis, nicla tej xtojlluj di guidxäjl.

⁵Palga xcäällatsiajnu ruluiiru najc Dios huenduxh, ðxhini'c guiniinu dxejc? Palga gun Dios yälguxhtis nurnu, dxejc tednu trabajwduxh, ðla rujnni latsiaj loonu, ä? (Caniä si'c te ben guedxliuj naj.) ⁶iXho gacni si'c! Paru najcni si'c, ðxho mood gun Dios yälguxhtis loj rebejn guedxliuj?

⁷Paru redidx-xhii ni rniä riliä'pru xpala'n Dios näjza xtidxliini, ðxhicuent gunni yälguxhtis narä si'c te bendojl? ⁸Yu'za bejn ni canii didx-xhii, najreni cayäjpnu lo rebejn: "Colyjejn cosguijdx te guiluilojni recoshuen." Per rebejn ni canii si'c sidzujn dxej gacreni yälguxhtis.

Guiraanu najcnu bendojl

⁹ðDxejca'? ðLa najcnu benhuenduxhru lojreni, ä? Dini gac;

tebloj abile'cnu yälquij xten rexpén
Israel con rebejn ni di gac xpen
Israel, sa'csi guiraareni yu'reni lo
dojl. ¹⁰Si'cni caj lo guijt:

Ruti te beñsa'c, nicla tejni.

¹¹Ruti te bejn ni racbee,
ruti chu tej nani rguuil Dios.

¹²Guiragajcreni abirii lo xnejz
Dios,
teblojsi xhet sajcdireni.
Ruti chu tej ni rujn cossa'c, nicla
tejni.

¹³Ro'reni rii ganax didxguijdx,
najcni si'c te baa ni naxal,
rusgueerene con lujdxreni,
didxlotsiaj rii ro'reni najcni si'c
beneñ ni yu' ro' te bälñialajz.

¹⁴Ro'reni entis cague,
entis canii didxrdxe'ch lo
sa'reni.

¹⁵Ni'reni ruxunli saxhe' xtiejn
sa'reni.

¹⁶Cadrotis rijreni rujnreni latsiaj,
ruteedreni sa'reni trabajw.

¹⁷Direni gumbee nezyuj ni
ruscuedcxilajz.

¹⁸Niclaza guidxeloren Dios.

¹⁹Racbeenu najc rediidx nani caj
lo xleii Dios par rebejn ni rnibee
leii lojreni, te jiäuu ro' guiralii
rebejn, te guiraa reben guedxliuj
gacbeerene yu' xtojlneni nez loj
Dios. ²⁰Sa'csi mase gusoob bejn
guira'ti diidx ni caj lo leii, di leiiga
gudzucaj xtojlneni bejnnga, sa'csi leiiga
najc nani guluii dojl ni yu' nen
lastooni.

**Ruslaa Dios lo dojl xcuent
yälrililajz xtiidxni**

²¹Naj ruluii Dios stee mood
guibicaj xtojlnu, nani di gac mood
ni caj lo xleii toMoisés. Luxh galooli

gusloj canii Dios xcuent nezyujre,
cajni lo reguijtz xten leii näjza lo
reguijtz ni bejn rebejn nani gunii
xtidix Dios galoo. ²²Stee mood
najc scree: Chutis ni chalilajz
xtidix Jesucrist, sajc naya lastooni
nez loj Dios; si'c sajc garaliiza
nani salilajz, sa'csi tebloj najcnu
nez lojni. ²³Sa'csi guiralii rebejn
guedxliuj abanijt lo Dios, direni
guiga' guidzujnreni lo xnezyuj
Dios. ²⁴Niluxh balaslajz Dios nuunu,
banidxxlia'ni loonu yälñabannaya
nez loj Dios sa'csi Jesucristis gudijx
yälguixhtis xten dojl che baxhe'ni
xtiejnni lo cruzj te badzucajni
xtojlnu. ²⁵Baxhañ Dios xi'nni,
Jesucrist, te cuajni lo cruzj nez loj
rebejn te si'c gudijxni guiraa rextojlni
chutis bejn ni rililajz xtidix Dios
xcuent xtiejn Jesucrist. Si'c bejn
Dios te guluiini xho guibannaya
bejn lojni. Galoo gojptis Dios
pasens rebejn, dini niujn yälguixhtis
rextojlneni, ²⁶sa'csi acanajn Dios
guc gunni yälguixhtis redojlga, te
si'c guiluiini xcälñayani nez loj
guiraa rebejn, te Diospac gunnaya
nez lojni chutis ni rililajz xtidix
Jesucrist.

²⁷Ni'cni ¿con yälñaro? ¿Con
yälbindaan? ¿Xhet sajcdini! ¿Xhi
leii rudzucaj xtojlnu? ¿La leii najc
ni rnii jiennu dzunsa'c, ä? ¿Dini
gac si'c! Yu' tejtis leii ni rudzucaj
dojl, nani rnii chalilajztis bejn xtidix
Jesucrist. ²⁸Dxejc sajc guiniä lojtu
chutis bejn sajc gac naya nez loj
Dios sa'csi rililajzni xtidix Jesucrist,
xhet sa'csi rujnni redzunsa'c ni caj
lo leii.

²⁹¿La najc Dios Xtiooztis rexpén
Israel, ä? ¿La dini gac näjza Dios

xten rebejn ni di gac xpen Israel? iXho dini gac! Najcni Dios xten guiroc cuaa bejn. ³⁰Ruti chu stee Dios, tejtis Dios yu'. Ruslaani lo dojl rebejn ni guyu' bee sa'csi huililajzreni xtiidxni, sigajcza ruslaani lo dojl rebejn ni xhet beedi guyu' sa'csi huililajzaren i xtiidxni. ³¹¿La rudzucajnu leii sa'csi rililajznu, ä? Ajndi. iXho gacni si'c! Alga basoobnu xtidx leiiga che huililajznu xtidx Jesucrist.

Xcälrlililajz toAbram

4 ¿Xhini'c sajc guiniinu xcuent toxtadgooloonu, Abram?

²Paru niajc toAbram bennaya nez loj Dios por redzuun ni bejn, pet sajc guibalazduxhni, per xhet nez lojdi Dios. ³¿Xhini'c caj lo xtidx Dios? Caj rediidxre:

Huililajz toAbram xtidx Dios, ni'c bahaag Dios cuent najcni te bennaya nez lojni.

⁴Meel nani rca' te bejn ni rujn te dzuun, meelga najc ni riäjil xca'ni, xhet raxlia'dinini. ⁵Luxh nani rililajztis xtidx Dios ni ruslaa bejn lo dojl, lacuaa naani yu' xhi dzuun sajc gunni te guibicaj xtojlni, bejnga najc te bennaya nez loj Dios, sa'csi huililajzni xtiidxni.

⁶Sigajcza naj toDavid, chicbaa bejn nani ruchaag Dios cuent najcni te bennaya luxh di niqiuin niujnni redzuun ni caj lo leii. Räjpnj:

⁷Chicbaa renani abaslaa Dios lo xtojlni, renani abiäuu loj xtojlni.

⁸Chicbaa bejn nani diru Dios gun cuent xtojlni.

⁹¿La sajc guiniini chicbaa rebejntis nani guyu' bee, ä? ¿La et

näjdiza renani di niu' bee, ä? Sa'csi rniinu: “ToAbram gujc te bennaya nez loj Dios sa'csi huililajzni xtidx Dios.” ¹⁰Guc bidxaag cuent najcni te bennaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee. ¹¹Dxejcti guyu'ni bee si'c te seen xten yäl'naya sa'csi huililajzni xtidx Dios che gajdlini chu bee te gacni xtad guiraa renani rililajz laj ni xhet beedi yu'reni, te näjza laareni guidxaag cuent najceni bennaya nez loj Dios, ¹²te gaczani xtad guiraa renani yu' bee ni huililajzta xtidx Dios si'c huililajz toAbram cheni gajdni chu bee.

Diidx ni bia'n Dios rsiojb xcuent yälrlililajz

¹³Bia'n Dios diidx loj toAbram näjza loj rexagdooni, xca'ni guedxliujre si'c yäl'nasa'c xtenni. Xhet sa'csi gusoobni xtidx leii xca'nini, sica'nini sa'csi najc toAbram te bennaya nez loj Dios sa'csi huililajzni xtidx Dios. ¹⁴Sa'csi paru renani rusoob xtidx leiiga najc nani xca' yäl'nasa'cga, xlia'si chalilajz bejn xtidx Jesucrist, luxh xhetza sajcdi diidx nani bia'n Dios loj toAbram. ¹⁵Che yu' te leii, luxh yu' chu di gusoobni, dxejc rdxe'ch Dios loj bejn. Cadro xheti leii, xhetiza xtojlni.

¹⁶Ni'cni balaslajz Dios nuunu, te sudzu'tz diidx ni bia'nni loj toAbram, te guiraa rexagdooni ni rililajz sica' yäl'nasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtad guiraanu nani chalilajz xtidx

Dios. ¹⁷Si'cza caj lo xtidx Dios, caj rediidxre: “Abenā gaclu xtad xhidäl renación.” Si'c bia'n Dios diidx loj toAbram, Gueb Dios nani gudeed yäl_nabaj_n loj rebengut, nani rnii xcuent recos nani gajd gac ascanu ala najcni.

¹⁸Anajn toAbram naganduxh soob diidx ni bia'n Dios con laani, luxh laani empac huililajzni, ni'c guj_nni xtad xhidajl nación, te gusojb xtidx Dios ni guniini che räjpni: “Scree gac xhidajl rexagdoolu.”

¹⁹Di toAbram nunijt xcäl_rirililajzni, mase ayu'ni tegayuu ijz, najnni anajcni bengool, luxh sigajcza Sara abengool diru xi'nreni chu. ²⁰Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n Dios, badeedni xquixtios lojni. ²¹Anajnni rajp Dios yäl_rribee te gunni guiralii nani bia'n diidx gunni. ²²Ni'c bachaag Dios cuent najcni te be_nnaya nez lojni sa'csi huililajzni xtidx Dios.

²³Xhet xtebtisdi xcuent toAbram cuaj rediidxre: “Bidxaag cuent najcni te be_nnaya nez loj Dios sa'csi huililajzni xtidx Dios”,

²⁴näjza xcuentnu cuajni, sa'csi che chalilaaznu xtiidx nani baspa_nsac Xtad Jesucrist loj rebengut, sidxaag cuent najcnu be_nnaya nez loj Dios.

²⁵Bacuaareni Jesucrist lo crujz te gudijxni rextoj_nnu nez loj Dios, luxh gubansacni lo rebengut, te gac gacnu be_nnaya nez loj Dios.

**Xhi rsiajc be_nn che najczeni
be_nnaya nez loj Dios**

5 Ni'cni che rililajznu xtidx Dios rudzucaj Jesucrist

xtoj_nnu rajcnu be_nnaya nez loj Dios, ni'cni ruscuecdxini lajznu.

²Sa'csi gujt Jesucrist, sa'csi gubansacni lo rebengut xcuent nuurnu, che rililajznu xtidx Dios xcuent Jesucrist, rulaslajz Dios nuurnu, ni'cni rbalajznu, rajpnu yäl_nabaj_n, su'pacnu lo xcäl_rrdimbicha' Dios. ³Luxh xhet ni'ctis, sajcza guibalaaznu che tednu trabajw, sa'csi najnnu trabajwga suj_n jia'pnu pasens.

⁴Luxh che rajpnu pasens rajcnu te benguyaj_rlu; che anajczanu benguyaj_r, rililazsa'crunu. ⁵Luxh yäl_rirililazsa'cnu dini gusanxtujy, sa'csi yäl_sanälajz ni rajp Dios ruchaj lastoonu sa'csi ne_n lastoonu rbäjz Xsprit Dxan xten Dios ni baniidxni loonu.

⁶La_l ni xhetliidi sajcdi jiennu lagajc xcuentnu te guibicaj xtoj_nnu, che basa' dxej biääd Jesucrist te gujt_nni lo crujz xcuent rebendoj_l.

⁷Guliipacni, naganduxh guidxäl_nni te be_nn ni xcäjb guet lacuaa te be_nn ni laaca rujnni. Per sidxäjl te be_nn ni xcäjb guet lacuaa te be_nsa'c. ⁸Luxh Dios baluiloj xcäl_rinälajzni xcuent nuurnu sa'csi la_l ni yugajcnu lo dojl, gujt Jesucrist lo crujz xcuentnu.

⁹Aticaxh naj ni najcnu be_nnaya nez loj Dios sa'csi baxhe'ni xtejjnni te gubicaj xtoj_nnu, naj sidedcaj gacnu xcäl_guxhtis Dios. ¹⁰Palga la_l ni rdxe'chnu lo Dios, basiäj_lni lajzni xcuentnu sa'csi gujt Xi'nni lo crujz, naj ni abiäj_l lajzni, susläani nuure lo dojl sa'csi gubansac Xi'nni loj rebengut. ¹¹Luxh xhet ni'ctis, sibalaznäjn_nu Dios xcuent Dad Jesucrist, sa'csi xcuentni ara'pnu yäl_rbedxi lajzni nez loj Dios.

Adán con Dad Jesucrist

¹²Ni'cni, xcuent tejtis niguii biu' dojl lo guedxliuj, luxh xcuent dojl biäädza yälgujt, gudejdti yälgujt loj guiraa rebejn, sa'csi guiraa rebejn bejnreni dojl. ¹³Cheni gajd xleii toMoisés chu lo guedxliujre, alabejn rebejn dojl, per di niajcdi nucuaquijni rebejn sa'csi xheti leii. ¹⁴Luxh empac gujt rebejn nen redxey ni gubajñ toAdán hasta redxey ni gubajñ toMoisés, mase direni niujñ lagajc dojl nani bejn toAdán; luxh rululioj yu' chu stee bejn nungäjñ jiääd.

¹⁵Luxh nani runidx-xlia' Dios dini gac si'c najc xtojñ toAdán. Dini gac si'c sa'csi palga xcuent dojl ni bejn toAdán, gujt xhidalduxh bejn, cuantimaaz ñaj sunidx-xlia' Dios yälñabajñ par tejpas loonu por xcälñulaslajz Dios, nägajc por xcälñulaslajz Dad nani laa Jesucrist. ¹⁶Luxh nani runidx-xlia' Dios loonu dini gac si'c yälrunijñ ni biääd loonu xcuent dojl ni bejn toAdán; sa'csi xcuent tejtis dojlga biääd yälgujxhtis xten Dios, sa'csi guiraliiza rebejn guedxliujre yu' lo dojl, per xcuent nani banidx-xlia' Dios, nalajznu, gujt Xi'nni Jesucrist lo crujz, ni'c gujc sa'csi yuduxhtej dojl, te xcuent ni bejn Jesucrist sajç gac bejn bennaya nez loj Dios. ¹⁷Palga xcuent dojl ni bejn tejsi bejnğa gunibee yälgujt lo guiraa bejn, cuantimaaz lo yälñabajñ par tejpas sinibee guiraa reni rca' xcälñulaslajz Jesucrist näjza renani rcaxlia' lojni yälracnaya nez loj Dios.

¹⁸Ni'cni sigajc ni biääd yälgujxhtis lo guiraa reben guedxliuj xcuent

dojl ni bejn tejsi niguii, sigajcza sa'csi basoob stee niguii xtidx Dios, xhidald bejn gujc bennaya nez loj Dios, cua'reni yälñabajñ par tejpas. ¹⁹Nalajznu sigajc ni banijñ xhidalduxh bejn nez loj Dios xcuent tej niguii ni di nusooob xtidx Dios, sigajcza xhidalduxh bejn sajç bennaya nez loj Dios xcuent tej niguii ni basoob xtiidx Dios. ²⁰Ni'cni badeed Dios xleii toMoisés, te guzenru dojl. Niluxh cadro guyuduxh dojl, ro'c nanabza chuduxhru xcälñulaslazduxh Dios, ²¹te sigajc ni gunibee dojl guyu' yälgujt, sigajcza guinibeeru xcälñulaslajz Dios te jia'cnu bennaya nez loj Dios, te xca'nu yälñabajñ par tejpas xcuent Xi'nni, Dad Jesucrist.

Agujtnu lo dojl per nabannäjnu Jesucrist

6 ¿Xhini'c guiniinu, ñaj? ¿La sajç guidxunrunu lo dojl te tioobru xcälñulaslajz Dios, ä? ²iGurniälojtu gacni si'c! Nuurnu najcnu si'c te bengut lo dojl sa'csi rililajznu xtidx Dios; ¿xhoxh gac guibajñrunu lo dojl? ³¿La ditu gan, che gurobnisnu con laj Jesucrist, najcni si'c ni näjza nuurnu gujtnu si'c ni gujt Jesucrist? ⁴Sa'csi che gurobnisnu bigatznäjnuni si'c lo yälgujt, te sigajcni huäjs Jesucrist lo yälgujt xcuent xcälñnibee Dios, sigajcza näj nuurnu sajç guidxunnu lo te yälñabanncoob.

⁵Sa'csi palga gujcnu tejsi con laani lo xcälgujtni che birobnisnu, sigajcza sajçnu tejsi con laani lo yälñabannsac lo rebengut. ⁶Ni'cni xcärienbiejwnu cuaj lo crujz con

laani, te badzucajni rextojlnu, te di gacdiru guinibee dojll loonu. ⁷Sa'csi nani agujt, di gacdiru guinibee dojll lojni. ⁸Palga nuurnu agujtnu con Jesucrist, rililaaznu sibansaczanu con laani. ⁹Sa'csi naddonpacnu gubansac Jesucrist loj rebengut, ni'c diruni guet, diru yälgujt ga'p yälrnibee lojni. ¹⁰Che gujt Jesucrist, gujtni xcuent dojll, luxh diru gacdi guinibee dojll laani par tejpas; naj ni gubansacni, nabajnni nez loj Dios. ¹¹Ni'cni la'tu colguchaag cuent najctu si'c te bengut lo dojll, luxh nez loj Dios, colguchaag cuent nabannäjtu Jesucrist.

¹²Ni'cni na'c gusaantu guinibee dojll tiejxhtu te guntu si'ctis ni rlajz tiejxhtu. ¹³Na'cruza gusaantu jiajb guideb lagaa tiejxhtu lo dojll te guntu cosguijdx. Maazru hueen colgudeed tiejxhtu lo Dios si'c te bejn nani gubansac lo rebengut, näjza colgudeed guideb lagaa tiejxhtu te guntu recoshueen si'c ni rlajz Dios guntu. ¹⁴Sa'csi diru dojll guinibee lojtu, sa'csi dirutu chu loj xleii toMoisés, sa'csi yu'tu lo xcälru^lulaslajz Dios.

La'tu najc si'c remos

¹⁵¿Xho gacni naj? ¿La sajc jienrunu dojll naj ni dirunu chu lo leii sa'csi yu'nu lo xcälru^lulaslajz Dios, ä? iXho gacni si'c! ¹⁶La'tu nansa'ctu palga yu'tu si'c te mos loj te lamte te gusobdiajgtu xtiidxni, najcpactu xmos bejn nani rusoobtu xtiidxni. Ni'cni, palga gusoobtu xtidx dojll, ni'c najc xlamtu, ni'c siädnä yälgujt lojtu. Palga gusoobtu xtidx Dios, ni'c najc xlamtu. Dxejc sajctu bennaya nez loj Dios. ¹⁷Xquixtios

lo Dios, galoo gujctu xmos dojll, per naj guideb lastootu basobdiajgtu xtidxcoob Dios, huililajztu xtiidxni ni basule'nu lojtu. ¹⁸Luxh agulaatu lo dojll, biädjiajctu xmos Dios lo dzunsa'c. ¹⁹Narä cagusule'ä diidx con sa' didx guyasire sa'csi gajdtu gacbesa'c xho najc xnezyuj Dios. Che gujctu xmos dojll, guideb lagaatu bejntu dojll, bejntu latsiaj, luxh ni'c satajltis latsiaj ni bejntu. Naj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlru dzunsa'c ni guntu sa'csi najctu bennaya nez loj Dios.

²⁰Sa'csi che gujctu xmos dojll, di rextidx Dios guinibee la'tu. ²¹Naja', ¿xhini'c bejntu gaan che gujctu xmos dojll, bejntu recos ni rtuinäjtu naj? Ni xnezyuj recosga rdzujn loj yälgujttis. ²²Per naj, sa'csi agulaatu lo dojll, abiu'tu najctu xmos Dios, sujntu sajctu bennaya nez loj Dios, luxh xnezyuj recoscoobre rdzujn lo yäl**nabannä**j Dios par tejpas. ²³Xcälrajtx xten dojll najc yälgujt, per nani runidx-xlia' Dios najc xcäl**nabannä**j Dios par tejpas xcuent ni bejn Jesucrist xtadnu.

Yälru^luii ni rudeed yälguchnaa

7 Caniä lojtu ni najn xleii toMoisés. ¿La ditu gan, resa'ä, xleii toMoisés rnibee loj te bejn guideb nabajnni lo guedxlije? ²Najcni si'c te gunaa nani bachnaa te niguii. Nanabpac cuäznäjtni chäälni guideb nabajnni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni. ³Ni'cni, lal ni nabajn chäälni gunaaga, palga cuäznäjt gunaaga ste'ca niguii, cayujnni dojll sirilajjni

gunaguujdx. Palga agujt chääł
gunaaga, agulaani lo leiiga, sajc
guchnaani stee niguii, xhet dojlđi
cayujnni, dizani guirilaj gunaguujdx.

⁴Ni'cni la'tu, rebetzä, sigajcza
agulaatu lo leiiga, sa'csi najcni
si'cni gujctu si'c bengut lo leii
che gujt Jesucrist lo cruju, te
naj sajc jiu'tu lo ste'ca bejn, loj
lagajc Jesucrist nani gubansac loj
rebengut te sajc jiennu redzunsac
ni rlanj Dios jiennu. ⁵Sa'csi lał
ni gubajnnu lo yäl_naban_biejwga,
lagajc rediidx nani rnii leiiga di
gacdi gun bejn, lagajc recosga rlanj
gun tiejxhnu, luxh si'c sozaatisnu
lo xneyzuj yälgujt. ⁶Naj abiriinu
lo leiiga, sa'csi agujtnu lo leiiga
nani gunibee loonu galoo. Naj con
xpriitcoob ni yu' nen lastoonu yu'nu
lo Dios, xhet con xcärienbiejwdi ni
gojpnu che nanab gusoobpacnu leii.

Redojl nani yu' tiexhä

⁷¿Xhixhni'c guiniinu naj? ¿La
dojl najc leii, ä? iXho gacni si'c!
Palga dina niembeä xhi caj lo leiiga,
dizana niacbeä cayunä dojl. Dina
niacbeä cayunä dojl che rlazä xca'a
xhixten ste'ca bejn palga dina niolä
lo leii rediidxre: “Na'c chuguij
lajzlu rexhixten bejn.” ⁸Ni'cni lagajc
diidx ni caj lo leiiga bejn guyuguuj
lazä rexhixten bejn sa'csi nancheä
najcni dojl. Paru xheti leii, xhetiza
dojl, agujtni. ⁹Galoo gubanä xhet
leidi nanä, luxh che biääd diidx ni
rnibee leii, gucbeä xhini'c najc dojl,
dxejc banitä lo Dios, si'c ni gutä.
¹⁰Luxh baxhal Dios leiiga loonu
te jiuäni, te xca'ä yäl_nabajn, luxh
alga bazenni benä dojl, banitä nez
loj Dios, gutäti dxejc. ¹¹Con leiiga,

basguee dojl narä, bejnni narä si'c
te bengut nez loj Dios.

¹²Ni'cni, leii najc dxan, näjza
rediidx ni caj lo leiiga najc dxan;
huen najcni, didxguluii najcni.
¹³¿Dxejca'? ¿La nani najc te
coshueen huinä narä lo yälgujt, ä?
iXho gacni si'c! Dojl najc ni huinä
narä lo yälgujt. Te si'c xcuent leiiga
ni nasa'c, jienlojni dojlpac najc dojl
sa'csi bagu'tni narä con te coshueen,
te lagajc rediidx ni caj lo leiiga
jienloj lacti latsiaj najc dojl.

¹⁴Sa'csi nadonnu leiiga najc
xtidx Dios, luxh narä nacä te ben
guedxliujre, nacä xmospac dojl.
¹⁵Sa'csi dina gacbeä xhini'c runä.
Dina gunä recos nani rlazä gunä,
alga cayunä latsiaj nani dipacna
rlazä gunä. ¹⁶Naj palga narä runä
latsiaj nani dipacna rlazä gunä,
lagajcza ni'c ruluii hueenca najc leii.
¹⁷Naj, diruni gac narä ni cayujn
latsiaj, sa'csi yu' dojl nen lastoä,
ni'c ni cayujn runä latsiaj. ¹⁸Sa'csi
narä nanä nen lastoä, nalajznu lo
tiexhä, xhetliidi cossa'cđi yu'; sa'csi
rlazä gunä cossa'c, per dina gacđipä
te gunäpac recossa'cga. ¹⁹Sa'csi
dina gunä redzunsac nani rlazä
gunä, alga latsiaj nani diru rlazä
gunä, ni'c runä. ²⁰Ni'cni palga runä
latsiaj nani diru rlazä gunä, xhet
narädi runäni, dojl ni yu' tiexhä,
ni'c ni cayujn runä latsiaj.

²¹Ni'cni narä, nani rlazä gunä
redzunsac, rdxälä leiire: yu'pa dojl
tiexhä. ²²Sa'csi nen lastoä, rlazäpac
gusobä diidx xten xleii Dios. ²³Luxh
ruhüiä garenca leii yu' guideb
lagaa tiexhä, ruchagdijlni leii ni yu'
xcärienä, ruteedzani narä ladznaa
xleii dojl nani yu' guideb lagaa tiexhä.

²⁴iProobza narä! ¿Chuni'c guslaa tiexhä ni nungäjl guet xcuent dojl?
²⁵iXquixtios loj Dios sa'csi Dad Jesucrist sajc guslaa nuurnu lo dojl! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlaiz gusoob xtiidx dojl, chuni lo xleii dojl.

Yäl**na**bajñ ni najc xcuent Sprit Dxan xten Dios

8 Ni'cni naj rut rajc*di* rbe'c xcälquij renani ahuililajz xtidx Jesucrist, renani diru jiu gunreni latsiaj ni rlaiz gun tiejxh*re*ni, alga riurureni rujn*re*ni ni rnibee Sprit Dxan xten Dios ni rbäjz neñ lastooreni. ²Sa'csi leii xten Sprit Dxan xten Dios ni rudeed yäl**na**bajñ xcuent Jesucrist, abaslaani narä lo yäl**rn**ibee xten xleii dojl näjza yälguj*t*. ³Sa'csi nani di niaj*cdi* niujn leibiejw, sa'csi dini niaj*c* nadip lo rebenguedxliuj te gacreni beñnaya nez loj Dios, ni'c bejn Dios che baxhañni Xi'nni Jesucrist, si'c te beñ guedxliuj*re* xcuent dojl, te bejn*ni* yälguxhtis lo dojl ni rnibee tiejxh bejñ. ⁴Te si'c gac xcälguxhtis xten leibiejw lo tiejxh nuurnu, renani dirunu gusoob nani rlaiz gun tiejxhnu, sa'csi naj rbajñnu si'c ni rnibee Sprit Dxan xten Dios ni yu' neñ lastoonu.

⁵Sa'csi renani rusoobtis nani rlaiz gun tiejxh*re*ni, rujntisreni xhigab xcuent redojlga, luxh renani rusoob xtidx Sprit Dxan xten Dios rujntisreni xhigab xcuent nani rlaiz Dios gunreni. ⁶Sa'csi renani yu'tis yejcreni nani rlaiz gun tiejxh*re*ni, sejtreni, sinijtreni; luxh renani yu'tis yejcreni nani

rni*i* Sprit Dxan Dios, reni'c sibe*cd*xi lajzreni, sica'reni yäl**na**bajñ lo Dios par tejpas. ⁷Te xcäriej*ñ* nani riutis ni rlaiz gun tiejxh bejñ rdxe'ch Dios loj*ni* sa'csi dini gusoob xleii Dios, luxh ni*cl*a gac gunnini. ⁸Renani nabajñtis te gunreni latsiaj ni rlaiz gun tiejxh*re*ni di Dios guibalaznäjreni.

⁹Luxh la'tu dirutu gun si'ctis ni rlaiz gun tiejxhtu, ni'cni rujntu si'c ni rlaiz Sprit Dxan xten Dios guntu, palga rbäjz*ni* neñ lastootu. Palga yu' chu tejt*u* ni di Sprit Dxan cuääz neñ lastooni, di ni'c gac xpejñni. ¹⁰Palga rbäjz Jesucrist neñ lastootu, agujt tiejxhtu xcuent dojl, xprittu nabajñ sa'csi anajct*u* beñnaya nez loj Dios. ¹¹Luxh palga neñ lastootu rbäjz Sprit xten nani baspañsac Jesucrist lo rebengut, lagajc nani baspañsac Jesucrist lo rebengut suspañsac tiexhnu ni nabajñ lo guedxliuj*re* xcuent Xpriti nani yu' neñ lastoonu.

¹²Ni'cni rebetzä, najcnu bejñ ni cuaj di'n, xhet loj*di* tiexhnu te jienu si'c ni rlaiz gun tiexhnu. ¹³Sa'csi palga cayujntu si'c ni rlaiztis gun tiejxhtu, sejt*pac*tu. Palga nabajñtu xcuent Sprit Dxan xten Dios ni rbäjz neñ lastootu, sibälaztu latsiaj ni rlaiz gun tiejxhtu, sibaññajtu Dios par tejpas.

¹⁴Sa'csi guiraa renani ruluii Sprit Dxan xten Dios guiraa reni'c najc rexi'n Dios. ¹⁵Naj ditu nica' te sprit xten te mos te chusactu lo yälrdxej*b*, alga cua'tu sprit xten ni najc si'c te bisiäj*b* ni cua' bejñ si'c xi'npacni, naj najcnu xi'nni, ni'cni sajc gäbnu loj*ni*: “Guejblu, Xtadä.” ¹⁶Sa'csi lagajc Sprit Dxan xten Dios

rului loj xpřitnu, najcpacnu xi'n Dios. ¹⁷Luxh palga najcnu rexi'nni, sica'zanu yäl'nasa'c lo Dios, tejsi yäl'nasa'c con Dad Jesucrist, palga guliini tednu lagajc trabajw ni gudejdni xcuent xtiidxni, te tejsiza siliä'p xpala'nnu con laani.

¹⁸Sa'csi narä runä xhigab retrabajw ni cadejdnu nen redxejre, digacdi gun tebloonureni con yälrdimbicha' nani churu guihuiinu.

¹⁹Sa'csi guiraa recos nani benchee Dios lo guedxliujre, cabäzreni, yuduxhreni gaan fiireni dxej che gululoj Dios chuni'c najc rexi'nni.

²⁰Guiraa recos ni gulecxtiej Dios lo guedxliujre, xlia'si gujcreni, xhet sa'csi si'c rlaizdi recosga, per sa'csi si'c bejn Dios, ni cabäzjtis

²¹guslaapacni guiraa recos ni bencheeni lo guedxliujre lo xcäl'rnibee yälgujt, yäl'rnitloj, te dxejc sajc jiu'ni lo yäl'rbedxi xten xcälrdimbicha' xten rexi'n Dios.

²²Guiraa recos ni gulecxtiej Dios lo guedxliujre entis roonreni, guira dxej rdejreni trabajw, si'c rdejdt te gunaa trabajw che rajl xi'nni. ²³Luxh xhet nani tre'tis lo guedxliujdi, näjza nuunu ni yu' Sprit Dxan xten Dios nen lastoonu, roonzanu cabäaznu dxej cheni xca' Dios nuure si'c rexi'nni, cheni guscoobzani tiexhnu.

²⁴Sa'csi xcäl'rillilaaaznu ni rbäaznu, ni'c bejn gulaanu luxh yäl'rbäz ni guyasi rien, di ni'c gac yäl'rbäz, sa'csi ÷chu laa ni cuääz xcuent te cos ni ala bahuini? ²⁵Palga cabäaznu xcuent te cos ni gajdnu guihuii, rbaali laaznu, rsiudzu'tznu rbäznu guihuiinu gacni.

²⁶Sigajcza racnäj Sprit Dxan xten Dios nuure cadro xheti yälrutijp

laaznu sa'csi nicla guidonnu xho mood riälj guiniab bejn lo Dios. Luxh lagajc Sprit Dxan ni yu' lastoonu rniabni lo Dios xcuent nuure con yäl'rbedxnen nani nicla gajd bejn gäb con diidx xho najcni.

²⁷Dios, nani rula'tz lastoonu, nanchee xhini'c rniab Sprit Dxan xtenni xcuent nuurnu, sa'csi rniabni si'cpac ni rlaiz Dios guiniabnu xcuent rexejnpac Dios.

Siennu gaanpac loj guira'ti

²⁸Nadoncheenu guira'ti ni rsiajc rebejn ni sanälajz Dios, reni agule Dios te gunreni xtzuumni rsiajcrenini te gun Dios gac recosga par xcäl'nasa'creni. ²⁹Sa'csi renani biembee Dios galooli, reni'c gule Dios cheni gajdli guirixtiej guedxliujre, te gacreni si'c ni najc Xi'nni; te gacza Xi'nni ganid loj guiraa ni najc famil xten Dios.

³⁰Renani guleni galooli, reni'c gurejdxni; renani gurejdxni, bejnzani najcreni ben'naya nez loj Dios; renani bejnini najcreni ben'naya nez loj Dios, gulä'pzani xpala'nreni.

³¹÷Xhixhni'c guiniinu xcuent dee? Palga yu' Dios xlaadnu, ÷chuxh ni'c najc ni gun gaan loonu? ³²Dios nani di nudxojn Xi'nni, nani cuäjb cuaj Xi'nni lo crujz te gujtni, te gudijxni xcuent xtojlnu, ÷xho dini guniidx loonu xcuent Xi'nni guira'ti nani rquiinnu, ä? ³³÷Chuni'c sajc cue'c xhi xcälquij reni agule Dios nez lo Dios, ä? Ni lagajc Dios najc nani rnii najcnu ben'naya nez lojni. ³⁴÷Chuni'c najc nani cue'c xhi xcälquijnu nez lo Dios? Jesucrist najc nani gujt por nuure, luxh et

ni'ctis. Laani gubansaczani loj rebengujt, luxh naj sobga'ni xladbee Dios cadro rnibeeni; laazani cabejdx canabni lo Dios xcuentnu.

³⁵ ¿Chuni'c sajc gudzucaj nuurnu lo yälsanälajz xten Jesucrist: trabajw, o yälxliajs, o yälrusacsí, o yälrliaan, o yälxhabääl, o yälrdxejb, o te spaad, ä? Nicla tejni. ³⁶Si'c ni caj lo guijtz ni caj xtidx Dios:

Xcuentlu, sa'csi najcnu xpejnlu caye'tnu guixe-guixee.

Ruchaagreni cuent najcnu si'c xiil ni aguro' te ju't bejnni.

³⁷Luxh loj guiraa recosre, sujnpacnu gaan xcuent nani sanälajz nuure, sa'csi sacnäjpacni nuure. ³⁸Sa'csi anancheä nicla yälgujt, nicla yäl nabajn, nicla rexangl Dios, niclaza renani rnibee, nicla recos ni yu' naj, niclaza recos nani churu gac, niclaza yälmilaagwr, ³⁹nicla jiaroduxh, niclaza jiajtpac, niclaza xhitis cos ni guc-chee, nicla tej redee di gacdi gudzucaj nuurnu lo xcälsanälajz Dios, yälsanälajz ni rajpza Dad, Jesucrist.

Dios agule reben Israel

9 Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dxan xten Dios caguluii xcärienä laaca rniä; ²cayac-huinduxh lastoä, sanuutis yälxliajsga. ³Sa'csi narä rlazä malaii sajc lagajc narä nitloä lo Dios te sajc gacnäá resa'ä lo guedxliujre, rexpejn Israel. ⁴Sa'csi laareni najc xagdoo toIsrael, luxh laareni nungäj] gacreni si'c xi'npac Dios. Gubannäj Diosreni. Bia'n Dios didx con laareni. Basa'n Dios

xleii Moisés lojreni. Bazuxhijbreni nez lo Dios nen guidoo. Sica'reni reyäl'nasa'c xten Dios palga jiuureni xtiidxni. ⁵Laareni najc rexagdoo xten toxtadgoldoonu ni gubajn agujc xhero. Jesucrist gujca xagdoo xten toIsrael che gojlni si'c te ben guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

⁶Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebejn ni najc xagdoo toIsrael najc xpejnpac Israel. ⁷Diza guiraa reni najc rexagdoo toAbram gac xi'nguliipacni sa'csi räjp Dios lo toAbram: “Rexagdodoolu nani guigab najc reni gac xagdoo Isaac.” ⁸Ni'cni xhet guiraadi rexagdoo toAbram najc rexi'n Dios, xtebtis renani chalilajz xtiidxni, reni'c najc xi'nni. ⁹Sa'csi bia'n Dios diidx loj toAbram: “Stebijz, lagajc bäiire guibisacä, te dxejc chu te xi'n Sara.”

¹⁰Xhet diidxtisga gunii Dios. Guniizani lo toRebeca, che nuxi'nni cua'ch, xi'n chäälni, toxtadgoolnu Isaac. ¹¹Ni'cni ansde gaal rexi'nni, ansde niujnreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni, ¹²ni'c räjp Dios lo toRebeca: “Xingangaloolu gac xmos xinhuinlu.” ¹³Si'cza caj lo guijtz rediidxre: “Sanälazä Jacob, niluxh bidxehnää Esaú.”

¹⁴¿Xhini'c guiniinu naj? ¿Xhet laadi rujn Dios, ä? ¡Xho gacni si'c! ¹⁵Sa'csi räjp Dios loj toMoisés: “Sulaslazä chutis bejn nani rlazä gulaslazä, sacnäá chutis bejn

nani rlazä gacnäá.” ¹⁶Ni'cni dini gac xcuent ni rlazj rebejn gac, dizani gac xcuent nani rujn rebejn. Rajctisni si'c rlazj Dios nani rulaslazj bejn. ¹⁷Ni'cni caj lo guijtz xten Dios che gunii Dios xcuent Faraón: “Narä benä gujclu reii xten Egipto te guluiloj xcälrnibeä, te guiliä'p bejn xpala'nä guideb guedxliujre.” ¹⁸Rulaslazjni rebejn nani rlazjtisni, runnadipzani lastoo bejn nani rlazjtisni.

¹⁹Naj la'tu siniitu loä: “¿Xhicuent rucuaquijni bejn? ¿Chuni'c sajc sudzu'tz nez loj nani rlazjni gac, ä?” ²⁰¿Chuxh luj, bejn guedxliuj, te jjeinäjlu Dios? Xhixh säjb te gues loj nani bencheeni: “¿Xhicuent bejnlu narä scree?” ²¹Gurniälojlu. Bejn nani runchee guejs, ðla di gacdi gunni si'ctisni rlazjni con bajnga, ä? ¿La di gacdi guncheeni te guessa'c nägajcza te guesyuj ni xhet sirbdi con lagajc bajnga?

²²¿Xhiru najc, palga Dios rlazjni guluilojni xho rujnni yälguxhtis, näjza rlazjni guluilojni xcälrnibeeni, gopnäjni pasens renani nungäjl gac yälguxhtis, te nitlojzareni, ä? ²³Bejnni si'c te guluilojni lacti sajc xcälrndimbicha'ni loj renani galooli guleni chú lojni lo xcälrndimbicha'ni. ²⁴Lagajc nuurnu najcnu reni aguleni; xhet xtebtis loj rexpən Israel guleni nuurnu, näjza loj rebejn ni di gac rexpən Israel guleni nuurnu. ²⁵Cajza lo guijtz ni bacuaa Oseas:

Renani di gac xpenä, reni'c cuälää “xpenä”.

Luxh nani dina ninälazä, sinälazäni.

²⁶Dxejcti lagajc cadro räjpreni lojreni:

“Ditu gac rexpənä”,

lagajc ro'c säjpreni lojreni:

“La'tu najctu xi'n Dios ni nabajn par tejpas.”

²⁷Cajza lo guijtz ni bacuaa Isaías: “Mase najc xhidajl rexpən Israel si'c najc yujxh ni tre' ro' nisdoo, guxii gac reni laa lo dojl. ²⁸Sa'csi susoobpac Dad, Dios xtiidxni xcuent xcälguxhtis reben guedxliuj, luxh siojbza gunnini.” ²⁹Guniiza Isaías, xcuent nani churu gac, bacuaani:

Palga di Dios ni yu' xhaguibaa nusa'n gaii xagdoob reben tiemp,

nijacnu si'c gujc Sodoma näjza Gomorra, reguejdx ni gunitloj.

Xtidx Dios näj rexpən Israel

³⁰¿Xhini'c sajc guiniinu naj?

Rebejn nani di gac xpen Israel, direni niguiil xho gacreni bejnaya nez loj Dios, niluxh agujcreni bejnaya nez loj Dios sa'csi huililajzreni xtidx Jesucrist. ³¹Luxh rexpən Israel, mase sanuutisreni lo xleii Moisés ni ruluui xho gac bejn bejnaya nez loj Dios, banijtreni, direni niujn gaan nusoobreni guideb leiiga.

³²¿Xhicuent gujcn si'c? Sa'csi direni nililajz xtidx Dios, alga rlazjreni guntisreni dzuun xten leii, naareni si'c gacreni bejnaya nez lo Dios. Ni'cni gulaj ni'reni lo guij ni rutienta' bejn, nalajznu direni nililajz xtidx Dios xcuent Jesucrist. ³³Si'cza bacuaa Isaías, räjpni:

Aguleä te bejn lo guedx Sión ni gac si'c te guij cadro rtiäjl ni' bejn,

te guij ni rusälta' bejn.

Chutis tej nani chalilajz xtiidxni, dini jianxtujy.

10 Rebetzä, rlazduxhä chalilajz rexpənä xtidx Dios. Rniabduxhä lo Dios te guslaanireni lo xtojlneni. ²Narä rniäpac nancheä ruzuxhijb rexpən Israel lo Dios, niluxh direni gumbesa'c xhini'c rlazj Dios gunreni. ³Sa'csi direni niacbee xcuent xho rajc te bejn te bennaya nez loj Dios, ni'c rlazjreni gunreni dzuun si'c ni caj lo leii te gacreni bennaya nez loj Dios, ni'cza direni nusoob xtidx Dios te gacreni bennaya nez lojni. ⁴Abasoob Jesucrist xtidx Leii, ni'cni che chalilajz bejn xtidx Jesucrist, anajcreni bennaya nez loj Dios.

⁵ToMoisés bacuaa rediidxre: “Chutis ni rlazj gac bennaya nez loj Dios sa'csi rusoobni xtidx leii, nanab gusobsa'cpacni diidxga guideb nabajnni lo guedxliujre.” ⁶Xcälnayareni nez loj Dios sa'csi rililajzreni xtidx Jesucrist, rni scree: “Na'c guiniitu nen lastootu, çchuni'c chä'p xhaguibaa?” nalajznu, te jiadnäsacni Jesucrist loj guedxliuj. ⁷Na'cza gäbni: “çChuni'c jiajt gabijl?” (nalajznu te chaxiini Jesucrist loj rebengut). ⁸çXhini'c rniini naj? Rniini: “Diidxga suga' gajxh ro'tu, nen lastootu.” Nalajznu, diidx xcuent yärrililaaz nani cagusule'nu lojtu. ⁹Rniinu lojtu, palga guiniitu con ro'tu, Jesucrist najc Dad loonu, palga chalilajztu baspansac Dios Jesucrist loj rebengut, suslaani la'tu lo dojl. ¹⁰Sa'csi con lastooni rililajz biniet xtiidxni, ni'c rajcni bennaya nez loj Dios; luxh che rcäjpza biniet con ro'ni, Jesucrist rnibee loonu, ruslaa Diosni lo dojl.

¹¹Sa'csi rni xtidx Dios scree: “Chutis ni rililajz xtidx Dad

Jesucrist, dini jianxtuju.” ¹²Sa'csi guiraa rebejn najc tebloj nez lojni, rexpelj Israel sigajc rebenzajt, sa'csi lagajc laani najcni Dad lo guiraareni, rulaslazduxhni guiraa renani rbedx-rniab lojni. ¹³Lo xtidx Dios caj rediidxre: “Chutis ni rbedx-rniab lo Dad, siliaani lo xtojlni palga rililajzni xtidx Dios.” ¹⁴çXho gac guiniabreni lo Dad, palga direni chalilajz xtiidxni? çXho gacza chalilajzreni xtiidxni, palga gajd diajgreni jiejn xtiidxni? çLuxh xho jiejn diajgreni xtiidxni palga rut rusule'di diidxga lojreni, ä? ¹⁵Luxh çxhoza gusule'reni diidxga palga rut guxhaldireni? Si'cni caj lo guiytz: “Chipza saru najc ni' renani riädnä diidx xcuent cossa'c, yälrbecdxi lajz rebejn.”

¹⁶Xhet guiraadireni rusoob xtiidxni, sa'csi guniiza tolsaías: “Dad, çchuni'c chalilajz xtiidxnu?”

¹⁷Rililajz bejn xtidx Dios che rucuadiajgreni diidxga; rucuadiajgzareni che yu' chu rusule' xtidx Jesucrist.

¹⁸Naj arniä: Gajdpac diajgreni jiejn xtiidxni, o çla babiejn diajgreni, ä? Pues abiejn diajgreni, sa'csi lo xtidx Dios caj scree:

Abire'ch xse'reni guideb guedxliuj,
abidzujnza rextiidxreni lo guiraa reguejdx ni tre' lo guedxliujre.

¹⁹Rniäza: Dipac rexpən Israel niacbee, o çla gucbeereni, ä? Galooli gunii toMoisés rediidxre: Sunä gudxoju xcuent rebejn ni di gac te guejdx, con te guejdx nani di gacbee suche'chä la'tu.

²⁰Diza toIsaías nidxejb guniini rediidxre:

Renani di niguuil narä, bidxäjł narä,
baluiloäza loj renani di niniabdiidx narä.

²¹Guniiza toIsaías xcuent rexpen Israel:

Desde galooli, dxej-yääl basgää nää lo rebejnğa te niureni xtidxä,
luxh najcreni bejn ni di gusoob diidx, rutzu'reni didxnaj.

Rexpen Israel nani gułaa lo dojl

11 Arniä: ¿La agulälaz Dios rexpen Israel, ä? iXho gacni si'c! Ni lagajc narä nacä te xpen Israel, te xagdoo toAbram, nadxagä lo resa' toBenjamín. ²Di Dios nibälaz rexpejn ni, xpen Israel nani guleni galooli che gajdli guirixtiej guedxliuj. O ¿la dilu gacbee xhi caj lo xtidx Dios cadro rnii xcuent Elías, xho gunabduxh Elías didxnaj lo Dios xcuent rexpen Israel, ä? Räjpnı scree: ³“Dad, abagu'treni guiraa reniguii nani gunii xtiidxlu, abatzujłreni rexquidoolu, xtebtis narä bia'nä, luxh naj rłajzreni ju'treni narä.” ⁴Luxh, ¿xhini'c räjpnı Dios lojni? Räjpnı: “Abalučea gajdz mił bejn nani gajd guzuxhijb nez loj Baal.” ⁵Si'cza naj, abia'n te chinae' rexpen Israel nani agule Dios xcuent xcälřulasłajzni. ⁶Dxejc palga rušłaani nuure lo dojl xcuent xcälřulasłajzni diruni gac sa'csi yu' xhi dzuun bienu te nušłaani nuure lo dojl. Paru si'c najcni diru xcälřulasłajz Dios gac yälřulasłajz. ⁷¿Dxejca'? Di rexpen Israel nidxäl nani caguuilreni, luxh rebejn nani

agule Dios, ni'c bidxäl ni, luxh ste cuaareni, aguyalajzreni. ⁸Gujcni si'c caj lo xtidx Dios:

Bascäjy Dios xcäriejnreni, näjza balojni di jien,
lo dxe najli di diajgreni jiejn.

⁹Guniiza toDavid, scree caj lo xtidx Dios:

Sugun xmex lanijreni jıajbreni, te gac guiga'reni,
sugacni si'c guij ni rulani' bejn,
te gacreni yälřuxhtis.

¹⁰Suguscäjy Dios balojreni te na'c fisa'creni,
sujie't dejtzreni, sutedreni trabajwduxh par tejpas.

Yälřušłaa lo dojl xten bejn ni di gac xpen Israel

¹¹Naj rniabdidxä: ¿La biajb rexpen Israel te gunijtreni par tejpas, ä? iXho gacni si'c! Sa'csi biajb rexpejn Israel, ni'cni gojl biääd yälřušłaa lo dojl lo bejn ni di gac xpen Israel, te si'c guisiäblajz lajz rexpen Israel laareni lo dojl. ¹²Palga xcuent dojl ni bejn xpen Israel gojp reben guedxliuj xcälřnasa'c Dios, palga xcuent yälřrunijt xten rexpen Israel guyu' xcälřnasa'c Dios par rebejn ni di gac xpen Israel, aticaxh chu xcälřnasa'creni che gusoob xpen Israel xtidx Dios.

¹³Naj caniä lojtu ni najc bejn ni di gac xpejn Israel. Gule Dios narä te gusule'ä xtiidxni lojtu, ni'cni caläpä xpala'n xtzunä, ¹⁴te don xho gunä te guisiäblajz reben ladxä ni najc xpen Israel, te si'c chalilajzreni xtidx Jesucrist. ¹⁵Palga gulecdxireni lajz reben guedxliuj con Dios sa'csi gulälaz rexpen

Israel xtidx Jesucrist, aticaxh che chalilajz rexpən Israel rextidx Jesucrist, sibānsac renani najc si'c bengut. ¹⁶Palga tla' cojb najc hueen, guideb cojbga najc hueen. Sigajcza najc te yajg; palga xlobaani najc hueen, guidebni najc hueen.

¹⁷Rexpən Israel najcreni si'c te yajg oliib; palga gutiuugreni te naa yajgga, dxejc ro'c guquidreni naa ste'ca yajg te guibajḡni con xtiejn yajg oliibga. ¹⁸Ni'cni, na'c gactu guyalajz lo reḡnaapac yajgga. Colgusnaj lajztu, xhet la'ditu ni rudeed yālnabajḡ lo xlobaa yajgga, lobaaga ni runiidx yālnabajḡ lojtu.

¹⁹Dxejc colguinii: “Batiuugreni naapac yajgre, te gujc biguidä cuä' yajgga.” ²⁰Guliipacni, biru' naapac yajgga sa'csi direni nililajz xtidx Dios luxh la'tu biguidtu cuä' yajgga sa'csi huililajztu xtiidxni. Na'c gactu guyalajz, colguidxejb, ²¹sa'csi palga di Dios nutedbia reḡnaa yajgga, diza Dios gutedbia la'tu. ²²Bahuii ilacti hueen najc Dios! Luxh lacti niälajzzani; con renani banijḡ najcni niälajz, luxh lacti rulasajz Dios la'tu palga chanuu jitu xtiidxni. Palga ditu jiu xtiidxni, näjza la'tu sudzucaj Dios. ²³Luxh sigajcza reni bidin, palga di chanuu cuälazreni xtiidxni sajc suquidsac Diosreni lo yajgga. ²⁴Luxh la'tu najctu benzijḡ, najctu si'c naa te yagoliib ni xtebca gulejn neḡ dajḡ. Luxh batiuugni la'tu te baquiidni la'tu lo te yagoliib ni najc yagsa'c ni rcaduxh oliib lojni, mase xhet si'cti najc olibguijxhga, iaticaxh rexpən Israel ni banijḡ najc si'c naapac xten yagolibsa'cga ni bidin, palga chalilajzpacreni xtidx Dios,

suquidsac Diosreni loj yajg ni najc xtenpacreni!

Che laapac rexpən Israel lo dojl

²⁵Rebetzä, rlazä gacbeetu xcuent te diidx nagajḡ, te di naatu nanduxhtu. Dee najc didx nagajḡga: yu' rexpejḡ Israel ni guc najd lastooreni te direni nililajz xtidx Dios, hasta guisa' redxey ni chalilajz rebenzijḡ xtidx Dios. ²⁶Dxejcti siḡiaapac guiraa rexpən Israel lo dojl che chalilajzreni xtidx Dios, sa'csi si'c caj lo xtidx Dios, cadro caj rediidxre:

Nani ruslaa sajc beḡ guedx Siön, luxh sudzucajni xtojḡ renani najc xagdoos toJacoob.

²⁷Dee najc diidx ni bia'nä con laareni, che gudzucä xtojḡreni.

²⁸Naj, najcreni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtadgoldooreni. ²⁹Sa'csi rut rajcḡ rudzucaj nicla yālnasa'c ni rudeed Dios, niclaza yārbejdx xten Dios. ³⁰La'tu galoo ditu nusoob xitdx Dios. Naj rulasajz Dios la'tu sa'csi gulälaz rexpən Israel xtiidxni. ³¹Sigajcza naj direni gusoob xtidx Dios, niluxh si'c najcni te gulasajz Diosreni sa'csi balasajzzani la'tu. ³²Dios basaan biejḡ guiraanu lo dojl, te si'c sajc gulasajz Dios guiraanu.

³³iLacti guroob najc yālnasa'c xten xcälḡnajḡ, xcälḡracbee xten Dios! Nicla tej bejḡ guedxliuj di gacbee guiraa rexcälḡguxhtisni, rudliidiza najḡ rexnezyujni. ³⁴Si'c caj lo guijz: “¿Chuni'c gucbee xcäriejḡ Dios?”

čChuni'cza abaluiini? Rutliidi. ³⁵O čchuni'c badedxгаа te xhi cos lojni, te quixsacnini lojni, ä? Rutliidi.”
³⁶Sa'csi loj Dios siääd guira'ti, luxh laani bencheeni guira'ti par lagajcza laani. Suguiliä'pnu xpala'nni par tejpas. Sugacni si'c.

Yäl nabajñ rliä'p xpala'n Dios

12 Ni'cni rulidxä la'tu rebetzä, sa'csi rulaslajz Dios nuure, colgudeed xcäl nabajñtu lo Dios te gac guibansa'ctu si'cni rlanj Dios. Dee najc yälrajñpac Dios si'c ni nungäjļ gantu Dios. ²Na'c rujntu lagajc xhigab ni rujñ reben guedxliuj, colguscoob rexhigabtu te guidxaapac xmoodtu te si'c guluii Dios xhini'c rlanjni guntu, nalajznu xhini'c najc hueen, xhini'c rdxagljajz Dios, xhini'cza najc laapac.

³Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Colyejn xhigabsa'c, te laaca gac xhigabtu, si'cni baniidx Dios lo tejgatu xho chalilajztu xtiidxni.
⁴Sa'csi sigajc najc tiejxhnu, yu' xhidäl la'ni, luxh tejgareni rujñ xtzuum-xtzuumreni, ⁵sigajcza nuure nani rililajz xtidx Jesucrist, najcnu xhidajļ, najcnu si'c tejsi tiejxh lo Jesucrist, mase tejganu rujñ xtzun-xtzuumnu, tejsi najcnu.

⁶Luxh sa'csi tejganu rajpnu garen-garen dzuun xcuent yäl rulaslajz ni baniidx Dios loonu, sujiennu rextzuumnu screeza: nani rajc rnii xtidx Jesucrist, suguiniinini, si'c ni najc xcäl rililajzni; ⁷nani rajc racnäjä sa'ni, sugacnäjäni; nani rajc ruluui xtidx Dios, suguluuiini; ⁸nani

rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo sa'ni, suguinibeeni con yäl nadolajz; nani rajc rulaslajz resa'ni, sugulaslajzni con yäl rbalajz.

Xho nanab guibanu lo xnezyuj Dios

⁹Colchanälajzpac resa'tu, na'c gunsitu si'cni rinälajztureni. Colcuälaz redzunguijdx, colyejntis redzunsä'c. ¹⁰Colchanälajz resa'tu si'c rinälajz bejn rebejtzni. Colguiliä'p xpala'nreni.

¹¹Colyejn dzunsä'c, na'c cuedxitu. Colyejn xtzuum Jesucrist con guideb xtiijtu, guideb xcäriejntu.

¹²Colguibalajz sa'csi ahuililajztu xtiidxni. Colcuedxni lajztu che tedtu trabajw. Colcuedx-colnabtis lo Dios guideb nabajntu.

¹³Colgacnäjä rebejn nani rililajz xtidx Dios; sacru colnii loj ni riädhuiitu.

¹⁴Colguinii didxsa'c xcuent renani rusacsí la'tu, na'c gudzubdetureni.

¹⁵Colguibalaznäjä renani rbalajz, colyonnäjä renani roon.

¹⁶Colyejn tejtis xhigab con resa'tu, na'c gactu gualajz, colguchaag loj reben nadolajz. Na'c guchalotu najctu bennanduxh.

¹⁷Na'c gudzu'tu dzunguijdx loj renani rujñ dzunguijdx lojtu. Colyejn recossa'c nez loj guirasi bejn. ¹⁸Cadrotis sajñni, dxitis colguibannäjä guiraa rebejn.

¹⁹Rebetzä, na'c guntu xhigab lagajc la'tu gudeedtu xten renani rujñ dojl lojtu, sa'csi lagajc Dios gun yäl guxhtis lojreni, ni'cni caj lo xquijtzni scree: “Narä gunä

yälguxhtis, narä quixä lojreni si'c naj Dad, Dios.”²⁰ Näjza: “Palga calaan nani rdxe'ch lojtu, colgudeed xhi gauni, palga cayojlni, colgudeedza xhi yäni, te si'c jianxtiujni.”²¹ Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

13 Guiraatu nanab jiutu xtidx renani rnibee lojtu. Sa'csi xheti te yälrnibee nani di Dios nudeed, luxh guiraa reyälrnibee ni yu' lo guedxliujre, lagajc Dios gule'creni.² Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yälguxhtis lojreni.³ Renani rnibee di guchejb renani riu xtiidxreni, ruchejbreni renani najc beñ guijdx ni di jiu xtiidxreni. Palga di rlajztu guidxejbtu reguxhtis, bejntis dzunsa'c, dxejcti guiliä'preni xpala'ntu sa'csi rujntu dzunsa'c.⁴ Reguxhtis rujnreni lojtu xtzuum Dios te guibansa'ctu. Palga guntu dzunguijdx, colguidxejb, xhet xlia'di ca'ni spaad, sa'csi najcreni nani rujn xtzuum Dios te gunreni yälguxhtis, te quixpac renani rujn dojl.⁵ Ni'cni nanab jiutu rextiidxreni, xhet ganaxtis sa'csi rujnreni yälguxhtis lojtu, näjza te ga'ptu te xcäriejsa'c, te xcäriennaya.⁶ Ni'cni colquijx lojreni nani riäjł xca'reni sa'csi renani rnibee najc xmos Dios, luxh ni'cpac najc xtzuumreni.

⁷ Colgudeed lo guiraa bejn nani riäjł xca'reni. Colquix loj renani nazääbtu; colquijx impuest loj ni riäjł xca'ni; colchanälajz renani riäjł

chanälajztu; colguiliä'p xpala'n renani riäjł chä'p xpala'reni.⁸ Na'c xcajlu di'n loj nicla tej bejn, di'ntis xten yälrinälajz sa'ni, sa'csi nani rinälajz xpisinni, bejnga abasoob xleii Dios.⁹ Sa'csi lo xleii Dios caj scree: “Na'c guesnäjlū bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu.” Luxh palga yu' xhi stee leii rsa'ni con leii ni rni: “Chanälajzlu resa'lu si'c sanälajzlu lagajc luj.”¹⁰ Nani rajp yälsanälajz, dini gun latsiaj lo resa'ni. Ni'cni yälsanälajz rusooob releii ni caj lo xtidx Dios.

¹¹ Colyejn guiraa redee, sa'csi anajntu xho najc redxej ni nabajnnu naj, anajntu alagojl or guibajnnu lo bacał sa'csi abidzungajxhru dxej che laanu nen dojl lo dxej che huililajznu.¹² Aguxhinduxh, asiädgajxh bianij. Ni'cni cuääz jienu redzuun guijdx ni rajc lo xcäy, te jientisnu redzunsa'c ni rajc rdxee, lo bianij.¹³ Guibansa'cnu si'c riäjł guibajn rebejn rdxee, na'c guibanu lo yälrä', niclaza lo yälbiejy, na'c guidiesnäjnū bejn ni di gac chäällnu, na'c ga'pnu rebis, na'c guidxagdiłnu resa'nu, na'c chuguij lajznu xhixten resa'nu.¹⁴ Ni'cni colca' xcälrnibee Jesucrist te na'c guntu redojl ni rlajz gun tiejxhtu.

Na'c guiniyajtu rebejztu

14 Colni didxdoos lo rebejn nani di gumbesa'c xtidx Dios, na'c tilnäjtūreni.² Sa'csi yu' reni rililajz nani sajc gaureni guira'ti xhi cos, niluxh nani gajd sutijp lo yärlililajz, ganaxtis

berduur rajwni. ³Nani rajw guira'ti, na'c guidxechnäjni nani di gau guira'ti; luxh nani di gau guira'ti, na'cza guiniyajni nani rajw sa'csi Dios aguleza bejn̄ga. ⁴¿Chuxh luj te guiniyajlu lo xmos te bejn̄, ä? Sugäb lagajc xlamni lojni la laaca rujnni o la xhet laadi rujnni. Luxh sujnni laaca sa'csi Dad Jesucrist sujn sutijp lastooni.

⁵Tej bejn̄ naa sajcrú tej dxej lo stee dxej, dxejc ste'ca bejn̄ rchalo guiraa redxej najc tebloj. Xhet najcđi, tejga bejn̄ sugunpac lagajc xhigabni. ⁶Nani rapda te dxej, rujnnini te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

⁷Sa'csi nicla tejnu dinu guibajn̄ xcuentcanu, nicla tejzanu dinu guet xcuentcanu. ⁸Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, laltis najcnu rexp̄n̄ Dad, Jesucrist. ⁹Ni'cni gujt Jesucrist, ni'cni gubansaczani, te sajc gacni Dad xten reb̄ngut, nájza Dad xten rebejn̄ nani nabajn̄.

¹⁰Dxejc luj, ¿xhicuent cubeelu bejtzlu, ä? O ¿xhicuent rdxe'chlu rhuiilu lojni, ä? Ni guiragajcnu tednu nez loj Jesucrist cadro cueni te gunni yäl̄guxhtis loonu. ¹¹Sa'csi scree caj lo xtidx Dios:

Si'ctis ni nabañä, rniliäpac lojtu, räjp Dad Dios,

guiraa reben̄ guedxliuj
suzuxhijbreni loä,
luxh guiragajc ro'reni sicäjp
narä nacä Dad Dios.

¹²Ni'cni guiraanu, tejganu sudeednu cuent loj Dios xcuent nani biennu.

Na'c guzäl̄lu bejtzlu

¹³Ni'cni na'cru cubeenu sa'nu. Maazru hueen jiennu xhigab nen̄ lastoonu xhetliidi jiennu ni gun jiajb resa'nu lo dojl̄. ¹⁴Narä nanä, racbeäpac guira'ti najc hueen. Jesucrist Xtadnu baluii narä si'c. Luxh palga yu' chu tej ni rchalo dini gac hueen, par laatisni dini gac hueen. ¹⁵Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezyuj yäl̄sanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni. ¹⁶Ni'cni na'c gusaanlu guiniyajreni nani najc te cos hueen par luj. ¹⁷Sa'csi xcäl̄rnibee Dios dini gac xcuent yäl̄rajw, niclaza xcuent yäl̄rä'; xcäl̄rnibee Dios najc xcuent te yäl̄nabañnya nez loj Dios, nájza yäl̄rbedxilajz con yäl̄rbalajz xcuent Sprit Dxan xten Dios. ¹⁸Sa'csi nani rujn si'c lo xtzuun Jesucrist, bejn̄ga rchaglajz Dios, luxh reben̄ guedxliuj rniiza didxa'c xcuent sa' bejn̄ga.

¹⁹Ni'cni chanuutis guidiilnu recos nani rujn chu yäl̄rbedxilajz, nájza nani rujn racnäjnu resa'nu te tioobruren̄ loj xnezyuj Dios. ²⁰Na'c guntu nit xtzuun Dios xcuent ni rajwtu. Guliicani guira'ti ni rajw bejn̄ najc naya, niluxh palga gautu te cos nani gun jiajb bejtzlu nen̄ dojl̄, ni'c najc xhet laadi. ²¹Hueen najc na'c gautu bääl, na'cza yätu bin, na'cza guntu jiajb sa'lu nen̄

dojl. ²²Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni.

²³Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yärlililajz, sa'csi xhitis ni di gac xcuent yärlililajz, lagajc ni'c najc dojl.

Huinälajz sa'lu

15 Nuurnu ni agusutijpnu lo yärlililajz nanab gacnäjnu resa'nu nani gajd chalilazsa'c. Di gacdi guibantisnu xcuentcanu. ²Tejganu nanab chonälaaznu resa'nu lo xcäl nabansa'cni te gacnäjnu chalilajzrueni. ³Sa'csi nicla Jesucrist dini nibajn xcuentcani, luxh si'cni caj loj xtidx Dios: “Redidxyaj ni guniyajreni lojlu biabreni yecä.” ⁴Guiraa rediidx ni cuaj lo guijtze galooli, cuajreni te guluiireni nuurnu te ga'pnu yälsutijp näjza yälrustioblajz te gacza guibääznu lo xtidx Dios. ⁵Dios rusutijp lajznu, Dios rutioob lastoonu. Rniabä loj Diosga gacnäjni guntu tejtis xhigab xten Jesucrist con resa'tu. ⁶Te dxejcti tejtis gac xse'tu guiliä'ptu xpala'n Dios, Xtid Jesucrist.

Gusule' xtidx Dios loj rebenzijt

⁷Ni'cni colca' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios. ⁸Sa'csi narä rniä lojtu, biäd Jesucrist te gujcti si'c te mos loj rexpen Israel te baluiini xcuent didxgulii xten Dios te gusojb rediidx nani bia'n Dios

loj retoxtadgoldoonu, ⁹näjza par rebenzijt, te guliä'preni xpala'n Dios sa'csi baluilojnu xcäl rulaslajz Dios lojreni, si'c ni caj lo xtidx Dios:

Ni'cni siliä'pä xpala'nlu nez loj rebenzijt,
soläza dij lojlu.

¹⁰Dxejcti stee lajt rniini:

La'tu benzijt, colguibalaznäj
rexpenä rexpejn Israel.

¹¹Stee lajt caza:

Guiraatu, rebenzijt, colguiliä'p
xpala'n Dad,
suguliä'pza guiralii rebejn
xpala'nni.

¹²Stee huält guniiza Isaías scree:

Siricaj te xagdo toIsaí,
näjza te ni chäs te guinibeeni loj
rebenzijt,
laani cabäjz rebenzijt.

¹³Naj rniabä lo Dios ni rudeed yärbäzljajz, te laani gacnäj guibalajztu, cuedcxilajztu, sa'csi salilajztu, te tioobru yärbäzljajz ni rajptu sa'csi Sprit Dxi xten Dios yu' nen lastootu, luxh laani rajpni yälrnibee.

¹⁴Luxh xcuent la'tu rebetzä, anancheä nabansa'ctu nasinduxhtu, arajcza rulijdxtu sa'tu, ¹⁵luxh loj guijtze bacuaä gaii didxnaj xcuent tiop-choñ cos, te gusnä lajztu. Runä si'c xcuent yälrulaslajz ni baniidx Dios loä ¹⁶te gacä xpen Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujcteni bennaya sa'csi rbäjz Sprit Dxi nen lastooreni.

¹⁷Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios. ¹⁸Sa'csi

dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzijt diidx, huililajzreni xtiidxni sa'csi bejn diajgreni xtiidxni, bahuiizareni rextzuunni, ¹⁹con yälmilaagwr xten redzunro, resenro, ni gujc con xcälrnibee Sprit Dxfan xten Dios. Ni'cni lo guedx Jerusalénli, näjza guideb gabi ro'c, lo guedx Ilírico, guiraa nejzga abasule'a xtidx Jesucrist. ²⁰Si'cza guyu'a ganduxh gusule'a xtidx Dios xhet cadro ahuisule'direni xtidx Jesucrist, alga ganax cadro gajdreni gumbee Jesucrist, te na'c gunä dzuun cadro gusloj cayujn ste'ca bejn dzuun. ²¹Te gacni si'cni caj lo guijtz:

Renani rutliidi bij diidx
 xcuentni, suhuiipacreni lojni,
 luxh renani gajdpac diajgreni
 jiejn xtiidxni, sacbecheereni
 xtiidxni.

Rujn Pabl xhigab chääni guedx Roma

²²Ni'cni balti huält badxojn Dios narä jiädhuiä lojtu. ²³Luxh naj sa'csi abaluxä xtzunä guideb nezree, näjza sa'csi agujc balti ijz rlazduxhä jiädhuiä lojtu, ²⁴naj che cha'a España siädhuiäpac lojtu. Che tedä, jiädhuiäpac contu te ganid guibalaznää la'tu, dxejcti gacnäjtü narä te cha'a España. ²⁵Naj sia'a guedx Jerusalén te chanäää xcoobr rexpejn Dios ni yu' ree loj rebejn ro'c. ²⁶Sa'csi rebejn Macedonia näjza reben Acaya rlanjpacreni guxhalreni te coobr loj rebenproob ni yu' lo reni huililajz xtidx Dios nen guedx Jerusalén. ²⁷Bejnreni xhigab hueen gunreni

si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhal xtidx Jesucrist lojreni, naj laaca rujnreni cayacnäjreni reben Jerusalén con xhixtenreni. ²⁸Ni'cni che chasa'nä meel lojreni dxejc tedä lajdxtu, jiädhuiä contu, dxejc cha'a España. ²⁹Luxh ananä che jiälä lojtu, li guidxa lastoä xcälnasa'c xtidx Jesucrist guidzunä lojtu.

³⁰Rebetzä, rniabduxhä lojtu xcuent xtidx Dad Jesucrist näjza xcuent xcälrinälajz Sprit Dxfan xten Dios, colguidxagsa'tu, te colgacnäj colcuedx-guiniabtu lo Dios xcuentä. ³¹Colnab lo Dios te guslaani narä loj reben Judea nani di gusoob xtiidxni te saru gun reben dxan ni yu' Jerusalén te xca'reni ni chanäää lojreni. ³²Te cabaa lazä guidzunä lojtu, sa'csi rlanjpac Dios jiälä lojtu, te la'ni yu'a lojtu siälyuä, susilazäza con la'tu. ³³Dios ni rbecdxilajz bejn gacnäj guiraatu. Sugacni si'c.

Ruxhalni xtixtios lojreni

16 Colgacnäj bisiajnnu Febe. Nane're bejn dzunduxh nen guideo ni tre' Cencrea. ²Colca'ni xcuent Dad, Jesucrist, si'cni riäjł gun bejn gacnäj renani rililajzpac xtidx Dios. Colyacnäjni lo xhitis nani guiquiinni, sa'csi laani gucnäduxhni xhidal rebejn, nägajcza narä gucnäjni. ³Ruxhalä xtixtios lo Priscila näjza lo Aquila, ni racnäjä narä lo xtzuum Jesucrist. ⁴Laareni nicäjpreni niejtreni xcuentä, ni'c rudedä xquixtios lojreni, luxh xhet narätis, näjza guiraa rebejn ni yu'

lo rexquidoo rebenzijt. ⁵Ruxhalä xtixtios loj resa'ä ni rdxagsa'reni rolizj Priscila näjza Aquila. Ruxhalä xtixtios loj Epeneto, ni sanälazduxhä, ni gujc benganid ni huililajz xtidx Jesucrist nen̄ guedx Acaya. ⁶Ruxhalä xtixtios lo Marii nani benduxh dzuun lojtu. ⁷Ruxhalä xtixtios loj reben̄ ladxä ni laa Andrónico näjza Junias; laareni guyunäj närä nen̄ latzguuib, najcreni ben̄ro loj reapost. Ganid laareni huililajz xtidx Jesucrist, dxejcti huililazä.

⁸Ruxhalä xtixtios loj Amplias, ni sanälazä xcuent Jesucrist. ⁹Ruxhalä xtixtios loj Urbano, ni runnäj nuurnu xtzuum Jesucrist. Ruxhaläza xtixtios loj Estaquis, ni sanälazä. ¹⁰Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' rolizj Aristóbulo. ¹¹Ruxhaläza xtixtios lo Herodión ben̄ ladxä, näjza loj resa' Narciso nani ahuililajz xtidx Jesucrist. ¹²Ruxhaläza xtixtios loj nan Trifena näjza nan Trifosa, guiro'preni cayujn xtzuum Jesucrist. Ruxhaläza xtixtios loj nan Pérsida, sanälazäni, abenduxhni xtzun Jesucrist.

¹³Ruxhaläza xtixtios lo Rufo nani agule Dios, näjza lo xnanni, sa'csi gujcti si'c xnanäza. ¹⁴Ruxhaläza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni. ¹⁵Ruxhaläza xtixtios loj Filólogo, näjza lo Julia, näjza lo Nereo con bisiajn̄ni, näjza lo Olimpas näjza guiraa rexpen̄ Dios nani yunäjreni ro'c.

¹⁶Colye'tz xchan loj resa'tu. Guiraa rexquidoo Jesucrist ruxhal̄ xtixtios lojtu.

¹⁷Rebetzä, rniabduxhä lojtu ga'ptu cuidaad xcuent renani rujn bieju te guilia' sa' bejn̄, nani rlajz guntu guiraloj nani najc garenca loj yäl̄ruluii ni bisieedtu, col̄guibicaj lojreni, ¹⁸sa'csi sa' rebejn̄ga direni gun xtzuum Jesucrist. Laareni rlajztsireni gunreni si'c rlajz tiejxhrene; rniireni didxdoo, diidx ni rgudxguel diajg bejn̄ te rusgueerene lastoo rebejn̄ nani di susin̄. ¹⁹Guiranejz abire'ch diidx xcuent xho rusobsacpactu xtidx Jesucrist, ni'cni rbaa lazä, ni'cni rlazä gactu nasin̄duxh xcuent recoshueen, luxh si'c báz xhet ganditu xcuent recosguijdx. ²⁰Luxh Dios nani ruscuecdxilajz bejn̄ sioj̄b guta'cwni ben̄dxab xhan ni'tu. Gacnäjä Dad Jesucrist la'tu.

²¹Timoteu nani racnäjä narä lo dzuun, ruxhal̄ xtixtios lojtu. Lucio, Jasón, näjza Sosípater, ben̄ ladxä, ruxhal̄za xtixtios lojtu.

²²Najrä Tercio, ni cagucuaä guijtzre xcuent Pabl, ruxhaläza xtixtios lojtu xcuent Jesucrist.

²³Ruxhal̄za Gayo xtixtios lojtu. Rbääznu rolizjni, luxh rudeedzani rolizjni guidxagsa' reben̄ guidoo. Ruxhal̄za Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

²⁴Gacnäjä Dad Jesucrist la'tu. Sugacni si'c.

Rediidx lult xten Pabl

²⁵Col̄guiliä'p xpala'n nani saje gusudzu'tz la'tu loj xtiidxni nani basule'ä, näjza loj xtidx Jesucrist xcuent rexhigab ni naga'tz galooli, ²⁶naj abaluiloj rediidxga lojtu; näjza xcuent ni bacuaa reprofet

galooli; si'c najc diidx ni bia'n
 Gueb Dios ni nabajñ par tejpas loj
 rexpeljñni, agusule'ni loj guiraa
 reben guedxliuj, te gusoobreni
 diidx sa'csi rililajzreni xtiidxni,

²⁷colguiliä'p xpala'n ni najc tejtis
 Dios ni nanduxh. Suguiliä'pnu
 xpala'n Dios xcuent Jesucrist.
 Guiliä'pnu xpala'n Dios par tejpas.
 Sugacni si'c.

Guijtz Ganid Ni Bacuaa Pabl Lo Guidoo Xten Guedx Corinto

**Bacuaa Pabl te guijtz lo
guidoo xten guedx Corinto**

1 Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu guijtzre lojtu ²ni ahuililajz xtidx Dios, ni yu' neñ guidoo xten guedx Corinto. La'tu agule Jesucrist, abasiani lastootu sa'csi ahuililajz xtiidxni. La'tu näjza guiraa rebejñ ni ahuililajz rextidx Jesucrist loj guideb guedxliuj, najctu xpejñ Dios, ni najc Dad xten guiraanu. ³Rniabnu lo Dios ni najc xtdadnu näjza lo Dad Jesucrist, gacnäjreni la'tu, guscuecdxireni lajztu.

**Abaniidx Dios xhidajl
dzunsa'c xcuent Jesucrist**

⁴Rudedätis xquixtios lo Dios xcuentu, xcuent yäl_rulaslajz xten Dios ni cua'tu xcuent Jesucrist, ⁵te xcuentni acua'zatu guiraa dzunsa'c, te gusule'tu xtiidxni, näjza te gacbesa'ctu xtiidxni; ⁶sigajcza con xcäl_nabansa'ctu baluiitu huililajz_pactu xtidx Dios xcuent Crist. ⁷Ni'cni xhetliidi cayääd_xditu

loj redzunsa'c ni runiidx Dios, la_l ni ganduxh yu'tu cabäjztu guibisac Jesucrist lo guedxliuj. ⁸Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu. ⁹Rusoobpac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtennu, te sanäj_tuni.

Rlia' sa'reni neñ guidoo

¹⁰Rulidxä la'tu, rebetzä, xcuent Xtdad Jesucristnu, colyejñ tejsi xhigab te na'c la' sa'tu, saru guibannäjtu sa'tu, colyejñ tejsi xhigab, colga'p tejsi xcäriejñ. ¹¹Sa'csi agucebeä xcuenttu, betzä ni huililajz xtidx Dios. Tej resa' Cloé biädsä'n diidx loä xcuenttu, yu' yäl_rdi_jl lojtu. ¹²Rlazä guiniä scree lojtu sa'csi yu'reni rnii: “Narä nacä te rexpejñ Pabl”, näjza: “Narä nacä te rexpejñ Apolos”; näjza: “Narä nacä te rexpejñ Pedr”, yu'zareni rnii: “Narä nacä xpejñ Crist.” ¹³¿La rujntu xhigab nala' sa' Crist, ä? ¿La cuaj Pabl lo crujz xcuent xtojltu, ä? o ¿La gurobnistu con laj Pabl, ä? ¹⁴Rudedä xquixtios lo Dios dina nutiobnisä nicla tejt_u, xtebtis

Crispo näjza Gayo, ¹⁵te rut naadi con laä batiobnisäreni. ¹⁶Abanaj lazä batiobnisä resa' Estéfanas. Di lazä guinaj la yu' chu stee bationnisä. ¹⁷Di Crist nuxhaḷ narä te gutiobnisä. Baxhaḷni narä te gusule'ä rextiidxni xcuent xho gun bejn te laareni lo dojl, xhet con didxnanduxhdi, te di gudzucaä loj dzunroduxh ni bejn Jesucrist che gujtni lo cruzj.

**Crist najc xcälmilaagwr
näjza xcälnajn Dios**

¹⁸Rediidx ni rniinu xcuent Jesucrist xcuent xho gujtni lo cruzj te guslaani rebejn lo dojl najcni te diidx ni xhet sajcdi lo rebejn ni canijt sa'csi direni chalilajz xtiidxni. Luxh loj rebejn ni ruslaa Dios lo dojl najc rediidxga xcälmilaagwr Dios. ¹⁹Scree caj loj rexquijtz Dios:

Narä sutzulä yäl_{ni}nasin xten reben_nnajn,
sudzucaäza xcäl_nnadxällajz,
xhigab rebejn ni
nadxällazduxh.

²⁰¿Con bejn ni nanduxh? ¿Con bejn ni rucuaa, ni najc maestr? ¿Con bejn ni ruchagduxh diidx xcuent recos guedxliujre, ä? ¿La et abejndi Dios najc guiraa yäl_{ni}nasin xten guedxliuj si'c nayällajz nez loj Dios, ä? ²¹Ni'cni loj xcäl_{ni}nasin Dios, di rebejn guedxliuj niembee Dios con xcäl_{ni}nasin guedxliujre, ni'c bichag_lajz Dios con yäl_{ni}rusule' diidx ni rniireni nayällajz, con ni'c baslaani lo dojl rebejn ni huililajz xtiidxni xcuent Crist.

²²Rexpejn Israel r_lajzpacreni fiireni remilaagwr; rebejn griegw rguuil yäl_nanduxh. ²³Niluxh

nuurnu rusule'nu diidx xcuent xho cuaj Jesucrist lo cruzj, niluxh loj rexpejn Israel najc diidxre si'c te guiro ni chalani' bejn, luxh loj rebenzijt xhet sajcdi rediidxre. ²⁴Niluxh loj rebejn ni gule Dios chalilajz rediidxre, rexpejn Israel sigajc loj rebenzijt, rediidxre najczani yäl_{ni}milaagwr najczani yäl_{ni}nasin xten Dios. ²⁵Sa'csi xcäl_{ni}nayäl xten Dios si'c rchalo rebejn ni'c najc nasin_{du}xhru loj xcäl_{ni}nasin xten reben guedxliuj; luxh xcäl_{ni}rniaj xten Dios sacduxhruni loj guiraa xcäl_nnadaan reben guedxliuj. ²⁶Col_huii la'tu, betzä ni ahuililajz xtidx Dios, xho gule Dios la'tu, colyejn xhigab guxiitu najctu ben_n nasin loj reben guedxliuj, guxiiza rajptu yäl_{ni}rnibee, guxiizatu najctu bejn ni agojl guiga'tu ben_sa'c. ²⁷Niluxh agule Dios rebejn ni xhet nanduxhdi te gusanxtujyni rebejn ni nanduxh, aguleza Dios rebejn ni guxii rnibee te gusanxtujyni rebejn ni rnibeduxh. ²⁸Agule Dios rebejn ni di guiga' ben_{ro}, näjza rebejn ni rut riudi, reni rut najcdi, te gusanxtujyni rebejn nani najc guiraa reni'c. ²⁹Te nicla tej bejn digacdi guiliä'p lagajc xpala'nni nez loj Dios. ³⁰Lagajc Dios abachaag la'tu loj Dad Jesucrist; baxhaḷzani Jesucrist loonu te basanijni xcäriejnnu te ga'pnu yäl_{ni}nasin xten Dios, te guiba_nsa'cnu nez loj Dios, te gacnaya lastoonu, näjza te quiixni rextoj_lnu. ³¹Si'c bejn Dios te soob xtiidxni cadre caj scree:

Ni rlanj guinii didxro,
suguiliä'pni xpala'n dzuun ni
bejn Jesucrist.

Rediidx xcuent Crist ni cuaj lo crujuz

2 Ni'cni cheni biädsule'ä xtidxlii
Dios lojtu, rebetzä, dina
niädniä didxnajn lojtu, niclaza
didxnagajn, xhet si'cti basule'ä
xtidx Dios xcuent Crist. ²Cheni
guyu'ä lojtu, benä xhigab dina
niädniä xhi stee diidx lojtu,
biädsule'ätis diidx xcuent Dad
Jesucrist, ni cuaj lo crujuz. ³Bidzunä
lojtu guideb rdxagä, guideb racditä
sa'csi cadxebduxhä. ⁴Cheni basule'ä
diidx lojtu, dina niniä didxro xten
yäl^unasin xten guedxliuj, alga guniä
xtiidx yäl^unasin xten Sprit D^xan
xten Dios näjza xcäl^rrnibee Dios,
⁵te di gac xcäl^rlililajztu xcuent
yäl^unasin xten guedxliujre, te gac
xcäl^rlililajztu xcuent yäl^rnibee xten
Dios.

**Rumbee bejn Dios xcuent ni
ruluui Sprit D^xan xten Dios**

⁶Rniizanu lo sa'nu ni aguyajl lo
xtidx Dios rediidx xten yäl^unasin
xten Dios, per te yäl^unasin ni di gac
xcäl^unasin di guedxliuj, niclaza xten
reni rnibee lo guedxliujre, sa'csi
sidzujn dxej sinitlojreni. ⁷Niluxh
che rniinu yäl^unasin xten Dios,
rniinu diidx ni rut racbextebdi,
xcuent xho gac guidzunu
cadro yu' Dios xhaguibaa. Cheni
gajdli gac guedxliuj, rapcheeni
yäl^unasinxhiga'tz xtenni. Baluiinini
loonu te guibannäänuni lo
xcäl^rdimbicha' xtenni. ⁸Nicla
tej reni rnibee lo guedxliujre
gajd gacbee recosre niluxh paru

niacbeerenini, direni nucuaa
lo crujuz Dad Jesucrist nani rajp
xcäl^rdimbichaduxh. ⁹Najcni si'cni
caj lo rextidx Dios cadro rnii:

Recos ni gajdpac baloj bejn fii,
nani gajdpacza diajg bejn jiejn;
nani gajdpacza jiu' lo xhigab
bejn, guiraa recosga
abaluchee Dios par rebejn ni
chanälajzni.

¹⁰Niluxh abaluu Diosreni loonu con
Sprit D^xan xten Dios, sa'csi laani
basule'nireni loonu. Sprit D^xan
xten Dios racbesa'c guiraa rehxigab,
näjza recos xhiga'tz xten Dios.

¹¹Loj reben guedxliuj ¿chuni'c
racbee rehxigab ni rujn bejn?
Lagajc sprit xten bejn ni yu'
nenni racbee xhi xhigab cayujnni.
Sigajcza rut racbeedi rehxigab
xten Dios; Sprit D^xantis xten Dios
racbeeni. ¹²Luxh nuurnu dinu
nica' yäl^unajn xten guedxliuj, alga
cua'nu Sprit D^xan ni siääd lo Dios
te gacbeenu rehxicos ni abasalajz
Dios loonu. ¹³Nuurnu rniizanu
xcuent recosga, xhet diidxdi ni
ruluui xcäl^unajn guedxliujre, diidxtis
ni baluu Sprit D^xan xten Dios loonu.
Si'c ruluuiinu rediidxga loj rebejn
ni rbäjz Sprit D^xan xten Dios nen
lastooreni.

¹⁴Niluxh reni di chalilajz xtidx
Dios, direni gacbee rehxigab xten
Sprit D^xan xten Dios, sa'csi laareni
xhigabyäältis rchaloreni xcäl^unasin
Dios. Di gacdiza gabeereni
rehxigabga, sa'csi Sprit D^xan xten
Diostis rajc ruluui lo bejn rehxigab
xtenni. ¹⁵Rebejn ni ahuililajz
xtidx Dios, rula'tzreni guira'ti ni
ruluui Sprit D^xan xten Dios lojreni.
Luxh rebejn ni ahuililajz rutliidi

rula'tzdireni. ¹⁶Sa'csi scree caj lo xtidx Dios: "¿Chuni'c agucbee xho najc xhigab xten Dios te gac guluuini Gueb Dios, ä?" Nicla tej bejn. Niluxh nuurnu rajpnu lo xcäriejnnu xhigab xten Crist, nalajznu racbeenu rextiidxni.

Reni rujn dzuun lo Dios

3 Rebetzä, di niajedi niniä redidxnagajn lojtu si'c ni rniä loj rebejn ni rajp yäl¹nasin xten Sprit Dxan xten Dios, basule'ä ganaxtis didx guyasi lojtu, sa'csi najctu beñ guedxliuj o biuxbäz ni guxii racbeeni xcuent Crist. ²Basule'ä ganax didxguyasi lojtu si'c rudeed bejn le'ch lo te biuxbäz lacuaa gauni bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi gacbeetuni, ³sa'csi nabansijctu si'c nabajn reben guedxliuj lahtis runemiidtu, rdxechlajztu lo sa'tu, ðla ditu gacbee nacsijctu si'c beñ guedxliuj, ä? ¿La lahtis nabajntu si'c nabajn reben guedxliuj ni di gumbee xtidx Dios, ä? ⁴Sa'csi cheni rnii tejni: "Narä nacä te xpejn Pabl", dxejcti steeni rnii: "Narä nacä te xpejn Apolos", ðla xhet cayujnditu sigajctis ni rujn rebejn guedxliuj, ä? ⁵¿Chuni'c najc Pabl? ¿Chuni'c najc Apolos? Nuurnu najctisnu xmos Dios ni basule' xtidx Dios lojtu te huililajztu, luxh cade tejnu riennu dzuun ni runiidx Dios jiennu. ⁶Ganid basule'ä xtidx Dios lojtu, dxejc biääd Apolos te gucnäjzani gucbeerutu xtidx Dios, niluxh lagajc Dios najc ni cagusanij xcäriejntu te gacbesa'ctu xtiidxni. ⁷Ni'cni nicla

ni rusulexgaa diidx, niclaza nani racnäj racbeeru bejn rediidxga xhet sajcdireni; Diostis sajc nani rusanij xcäriejn rebejn. ⁸Nuurnu najcnu si'c rexmos ni rujn dzuun lo yuj. Tejsi najc nani rbe'c binij näjza nani rga' nis, niluxh Dios rguijx tejanu dzuun nani riennu. ⁹Nuurnu najcnu si'c remos ni runnäj Dios dzuun. La'tu najctu si'c yuj cadro cayajc xtzun Dios, si'c te yu' ni cayunchee Dios. ¹⁰Narä nacä si'c te mastr albañil. Baniidx Dios dzuun loä, gucnäjni narä te casuä reguij lo yujre, te naj ste'ca bejn quixh basuu yejcti. Niluxh tejga ni chanuu gun dzuun lojga, suga'pni cuidaad xho guiliäsni padeerga. ¹¹Sa'csi di gacdi gusujreni garenca cimient loj nani najc-xгаа, ni najc Jesucrist. ¹²Naj palga guiliäs bejn te padeer yejc cimientga con oor, con pla't, con guij ni sacduxh, o con baräjd, guixhtriuu, o balag biquii, ¹³sidzujn dxej sien xho najc dzuun ni bejn tejga bejn. Sa'csi siääd fis guiboo ni guluiloj dzuunga, sa'csi lagajc guibooga guluiloj dzuunga, xho najcni. ¹⁴Palga yu' reni bejn te yusa'c yejc cimientga, luxh dini chec lo guibooga, sudeed Dios lo bejnga ni riäjl xca'ni sa'csi bejnii yusa'c. ¹⁵Niluxh palga chec ni bejnii yejc cimientga xhet xca' dini, xcäl¹nabajntisni di nit, luxh xtzuunni sejc.

¹⁶¿La ditu gan la'tu najctu xquidoo Dios, luxh nen lastootu rbäjz Sprit Dxan xten Dios, ä? ¹⁷Palga yu' chu gutiexhät xquidoo Dios, sunitloj Diosni par tejpas, sa'csi xquidoo Dios najc dxan, luxh la'tu najctu guidooga.

¹⁸Nicla tejtü na'c gusgueetu lagajc la'tu. Palga yu' chu rujn xhigab nanduxhni xcuent yäl¹nasin² xten guedxliujre, nanabpac gacni si'c te bejn³ ni xhet najndi te xca'ni yäl¹nasin² xten Dios te guliipac gacni te beñ⁴najn, te beñ⁵ nasin⁶. ¹⁹Sa'csi yäl¹nasin² xten guedxliuj xhet sajcdi nez loj Dios. Lo rexquijtz Dios caj scree: “Dios rujn rga' reni rajp yäl¹nasin² xten guedxliuj lagajc xcuent xcäl¹rusgueereni ni rujn lagajc xcäl¹nadxäl¹ajzreni.” ²⁰Ste'ca lajt caj scree: “Nanchee Dios xho najc xhigab ni rujn rebejn⁷ ni rajp xcäl¹nasin² guedxliujre, luxh xhetliidi sajcdi nez loj Dios.” ²¹Ni'cni na'c guiliä'p bejn⁸ xpala'n te bejn⁹ guedxliuj. Sa'csi loj tejgatu abaniidix Dios guira'ti rexhicos najc xtengatu, ²²palga najcni Pabl, o Apolos, o Pedr, o guedxliuj, o yäl¹gabajn², o yäl¹gujt, o recos ni yu' naj, o recos ni churu gac, guiraareni najc xtentu. ²³La'tu najctu xten Crist, luxh Crist najc Xi'n Dios.

Xtzuun reapost

4 Ni'cni la'tu nanab fiitu loonu si'c rexmos Dad Jesucrist ni rajp rexhigabxhiga'tz xten Dios te gusule'nureni lojtu. ²Mbaj pues, te bejn³ ni cahuii te dzuun nanab gusoobreni diidix, gunreni te dzunsa'c. ³Niluxh guxii runä xhigab gula'tztu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios. ⁴Entis rbedxi xcärienä, per xhet xcuent ni'cdi sajc guiniä xheti xtolä, Dad Jesucrist najc nani rula'tz narä, rhuilojni xho nacä. ⁵Ni'cni la'tu na'c

gucuaquijtu bejn⁶ che gajd guidzujn dxej; colcuäjz jääd Jesucrist dxej laani sibääni lo bianij guiralii ni naga'tz lo nacäy, luxh sululiojzani xhi xhigab yu' neñ⁷ lastoo teja rebejn⁸, dxej lo tejganu sudeed Dios ni nungäj⁹l xca'nu.

⁶Rebetzä, xcäl¹nasä'ctu caniä rediidxre lojtu. Caniä xcuent Apolos näjza narä, si'c te yäl¹ruluii te fiitu xho riennu te na'cza guntu recos ni xhet caj di lo rexquijtz Dios, te na'cza guiliä'ptu xpala'n tejtü lo resa'tu, la¹ ni cabälaztu steeni. ⁷Sa'csi çchuni'c rniij najclu bensa'cru lo ste'ca bejn⁸?, o çxhini'c rajplu ni di Dios nuniidix lojlu? Luxh palga cuaxlia'luni, çxhicuent lagajc luj rliä'plu xpala'ntu, lascanu rut baniidixdi lojlu recos ni rajplu?

⁸Rujntu xhigab rajptu xhidajl cos, naatu najctu ricwduxh, rchalotu najctu reii, dirutu guiquiin nuurnu. Malaii gulii najcpactu reii te näjzanu guinibenäjnu la'tu. ⁹Niluxh runä xhigab gule Dios reapost si'c rebejn¹⁰ ni xhet sajcdi. Najcnu si'c rebejn¹¹ ni gunibeereni guet. Nez loj reben¹² guedxliuj näjza nez loj rexangl Dios najcnu si'c reben¹³ ni rdedlojtis bejn¹⁴ lojreni. ¹⁰Nuurnu najcnu beñ¹⁵nayääl xcuent Crist, niluxh la'tu rchalotu racbeduxhtu rextidix Crist. Nuurnu najcnu bejn¹⁶ ni xhet nadipdi, niluxh la'tu najc bendanduxh. Rliä'p rebejn¹⁷ xpala'ntu, ni'c rbälazreni nuurnu. ¹¹Cadeednu trabajwduxh naj, rliaannu, riojlno, xho rniaj xhajbnu, rdil¹⁸näj rebejn¹⁹ nuurnu, luxh xheti roliznu. ¹²Rdxaagnu riennu dzuun lagajc naanu te guidxälnu xhi guidaunu. Che rguereni loonu,

rniabnu lo Dios xcuentreni. Che rusacsí rebejn nuurnu, rientisnu huant. ¹³Che rniyajreni nuurnu, rulidxnäänureni didxdoo. Rujnreni xhigab najcnu si'c guijxh xten guedxliujre, ruhuiireni loonu si'cni xhet sajdínu.

¹⁴Dina gucuuää rediidxre te gusanxtuiyātu. Rucuaää rediidxre te gulidxātu si'c rexi'nä ni sanälazä.

¹⁵Palga ga'ptu tzuu miĵ bejn ni guluiitu rediidx xten Crist, ruti stee xtadtu; narä gucä xtadtu, ganid narä basule'ä rextidx Dios lojtu.

¹⁶Ni'cni rulidxä la'tu, colyejn si'cni ruhuiitu runä.

¹⁷Ni'cni baxhalä Timoteu lojtu, najcni si'c xi'nä ni sanälazä, ni rusoob diidx xcuent Crist. Laani susnajni lajztu xho mood nabanä lo yäl'nabajn xten Jesucrist, sigajcni ruluiä nen reguidoo guiraasi lajt. ¹⁸Yu'tu ni acayajc gualajz, naatu pet dina guibisacä lojtu. ¹⁹Cabäzä jädhuiātu, palga si'c rrajz Dios, dxejc sacbeä chuni'c najc rebejn ni cayajc gualajz, fiä xhipacni rujnreni, xhet xtiidxtisreni gacbeä. ²⁰Sa'csi xcälrnibee Dios xhet ganaxtis xcuent diidx najcni, näjza dzuun ni rujnreni ruluiioj xcälrnibee Sprit Dxan xten Dios ni rajpreni. ²¹¿Xho rrajzzatu guidzunä lojtu, ä? ¿La sidzunä si'c te dad ni ca' te baar te quinātu o la guidzunää yälrinälajz näjza yäl'nadolajz te gulidxātu, ä?

Xho nanab gunnäjtu te bejn ni rujn falt lo sa'ni

5 Agucbeä yu' tejtú ni ahuililajz xtidx Dios, cua'ni si'c chääl'ni te gunaa ni gujc chääl xtadni. Dee

najc te dolduxh nani nicla reni di chalilajz xtidx Dios direni gun.

²Luxh la'tu gujctú gualajz lacuaa niac-huin lastootú; te bejn nani bejn dojlga, riäjĵ nibäätuni nez lojtu.

³Mase ruti narä ro'c, lastoä suganäj la'tu. Alabenä xhigab xhini'c jiennäjnu bejnğa ni bejn dolduxhğa, sigajc ni niunä paru suga'ä ro'c. ⁴Con laj Dad Jesucrist, che abidxagsa'tu, luxh alastoä suganäj la'tu, con xcälrnibee Dad Jesucrist, ⁵abenä xhigab guteednu bejnğa ladznaa bendxab te ted tiejxhni trabajw, niluxh sprit xtenni laani nen dxej ni jäd'sac Dad Jesucrist lo guedxliujre.

⁶Di guchaag guiliä'ptu xpala'ntu xcuent dzuun ni rujntu. ¿La ditu gan te dojl najc si'c tudxe'n cojb ni ruslaj, rusaguijni cojb cadro ru'chni, ä? ⁷Colgudzucay cobyujxhğa, te guibajntu te yäl'nabannayacoob si'c te cobyä, sa'ni racchee yätxtiil ni xheti levaduur yejcní par lanij xten pascw. Arajptu yäl'nabannaya sa'csi agujt Jesucrist sigajc gujt te xile' lo lanij pascw te badzucajni rextojĵnu. ⁸Si'c nanab jiennu lanij xten pascw con yätxtiil ni xheti levaduur yejcní, nalajznu con yäl'guliipac nen lastoonu, xhet yätxtiildi ni yu' cobyujxhğa yejcní, nalajznu na'c gunlu latsiaj.

⁹Lo stee guijtz abacuaä lojtu, na'c guchaagtu reben ni runnäj cosguijdx bejn ni di gac chäälreni. ¹⁰Niluxh xhet caniädi xcuent reben guedxliuj ni rujn cosguijdx con bejn ni di gac chäälreni, niclaza xcuentdi rebejn ni rchaglaztej meel, niclaza rebejn ni najc gubaan, niclaza rebejn ni riu

rebanäjb. Paru si'c gacni, nanab jiunejztu guedxliujre. ¹¹ Niluxh narä bacuaä guijtzga lojtu te na'c guchagsa'tu te bejn nani rnii ahuililajzni xtidx Dios, luxh rujnruni cosguijdx con bejn ni di gac chäälni, o rchaglaztejni meel, o riuni rebanäjb, o rniyaj sa'ni, o rsiojzni, o rusgueeni bejn te rca'ni xhi xtenni. Rniäza lojtu, nicla gaunäjtu sa' bejnga. ^{12,13} Sa'csi narä di gacdi gunä yälguxhtis loj rebejn ni gajd chalilajz xtidx Dios. Gunti Dios yälguxhtis lojreni. La'tu nungäjlguntu yälguxhtis loj rebejn ni ahuililajz xtidx Dios. Ni'cni colgudzucaj bendojlga lojtu.

Na'c chäätu loj rebendojl te gunreni yälguxhtis lojtu

6 Palga tejtü ni ahuililajz xtidx Dios rlanj cue'c xquej stee sa'tu, ðhxicuent chale'ctu xquejni loj rebendojl te gunreni yälguxhtis lojtu? ðhxicuent ditu guiniab yälguxhtis loj rebejn ni ahuililajz xtidx Dios, ä? ² ðLa ditu gan, rebejn ni ahuililajz xtidx Dios sujn yälguxhtis lo reben guedxliuj, ä? Palga la'tu sujntu yälguxhtis lo reben guedxliuj, ðla di gacdi guntu yälguxhtis lo sa'tu lo recosbäz lacuaa chäätu loj rebendojl te gunreni xcälguxhtisreni lojtu, ä? ³ ðLa ditu gan sienzanu yälguxhtis lo rexangl Dios, ä? iAticaxh jiennu yälguxhtis loj recos bäze' xten sa'nu lo yälnabajnre! ⁴ Palga la'tu cadijnäj sa'tu xcuent recos xten guedxliujre, ðxho mood chäälu loj rebendojl ni rut najcdi loj xquidootu, te naareni lojtu xhini'c guntu, ä? ⁵ Rniä reidiidxga lojtu te guitujytu. ðLa

ruti nicla tej bennasin loj guiraatu ni sajc gun yälguxhtis lo resa'tu, ä? ⁶ ðXhxicuent rile'c te bejn ni rililajz xtidx Dios xquej bejtzni ni rililajzza, luxh rijreni nez loj reguxhtis ni di chalilajz xtidx Dios?

⁷ Mbaj naj, guliipacni alabanijttu sa'csi yu' yälrđilnäj sa'tu; colgutijp lajztu rebejn ni rujn dojl lojtu. Maazru huen colgusaan sucua'reni xhixtentu. ⁸ Per dee, alga lagajc la'tu runnijttu loj lagajc resa'tu, luxh rca'tu xhixten lagajc resa'tu.

⁹ O ðla ditu gan reben dojl dipacreni jiu' lo xcälrnibee Dios, ä? Na'c gusaantu gusgueereni la'tu; nicla te resa' dee di jiu' lo xcälrnibee Dios: guiraa reni richagtoo regunaa; guiraa reni rajn rebanäjb; reni resnäj bejn ni di gac chäälni; reniguii ni rungunaa; reni najc biräax; ¹⁰ reni najc gubaan; reni rsiäblajz xhixten bejn; reni rsiojz; reni rniyaj; reni rusguee bejn te rca'reni xmeel bejn. Nicla tej sa' redee di jiu' lo xcälrnibee Dios. ¹¹ Yu'zatu ni gujc si'c galoo, niluxh naj abasia Dios lastootu, naj anajctu bennaya nez loj Dios sa'csi abiällajz Dios xtojltu xcuent Jesucrist, näjza xcuent Sprit Dxan xtenni. La'tu anajctu rexpejnni.

Tiejxhnu najc xquidoo Dios

¹² Guliini sajc gunä xhitis ni rlazä gunä, niluxh xhet guiraadini najc hueen par narä. Narä sajc gunä si'ctis ni rlazä, niluxh dina gusanä guinibee nicla tej xhi cos narä. ¹³ Guliini najc yälräjw par xque'ni, luxh xque'ni najc par yälräjw, niluxh sidzujn dxej sunitloj Dios guiro'preni. Per tiejxhnu di gac

par jiennu cosguijdx con bejn ni di gac chäälnu. Tiejxhnu najc par Dios, luxh Dios najcza par tiejxhnu.

¹⁴Luxh naj lagajc Dios guläs Dad Jesucrist lo rebengut, siliäsazani nuurnu con xcälrnibeduxhni.

¹⁵¿La ditu gan teygatu najc si'c te la' tiejxh Crist sa'csi ahuililajztu rextiidxni, ä? Palga tiejxhnu najc xten Crist, ¿la sajc gudeednuni loj te gunadxab, ä? iGurniälojlu jiennu si'c! ¹⁶¿La ditu gan cheni guchaagni te gunadxab rajcni tejtis tiejxh con laani, ä? Loj rexquijtz Dios caj: “Guiron'preni sajc si'c tejtis bejn.”

¹⁷Niluxh nani rudeed lastooni lo Dios anajczani tejtis con laani sa'csi rbäjz Sprit Dxan xten Dios nen lastooni.

¹⁸Colguibicaj lo dojl ni rujn bejn con nani di gac chäälni. Xhitis stee dojl ni rujn bejn najcni lo jiaa tiejxhni, niluxh dojl ni runnäjni bejn ni di gac chäälni najc dojl lagajc nen tiejxhni. ¹⁹O ¿la ditu gacbee tiejxhtu najc xquidoo Sprit Dxan ni abaniidx Dios te cuääzni nen lastoonu, ä? Ni'cni di gacdi guinibeetu lagajc la'tu. ²⁰Agudijx Jesucrist xtojlnu con xtiejnni lo crujz, ni'cni nanab jiennu dzunsa'c nani guiliä'p xpala'n Dios con tiejxhnu näjza Xpritnu.

Yälrulijdx xcuent yälruchnaa

7 Naj gudzu'ä diidx lojtu xcuent ni gunabdiidxtu cheni bacuaatu guijtz loä. Guliini hueen najcni na'c guchnaa te niguii. ²Niluxh sa'csi yu' xhidajl reni richunäj chutis gunaa, suga'p tejsa reniguii chäälpacni; sigajcza suga'p tejsa regunaa chäälpacni.

³Nanab niguii guchaagni chäälni che rlajz chäälni, sigajcza gunaa nanab guchaagni chäälni che ni si'c rlajz chäälni. ⁴Di gunaa guinibee lagajc tiejxhni, sa'csi chäälni rnibee tiejxhni. Sigajcza di niguii guinibee lagajc tiejxhni, sa'csi chäälni rnibee tiejxhni. ⁵Na'c gusuni' tejtü lo chäälni. Maazru hueen coljia'n diidx na'c guchagsa'tu te xcheje' te cuedx-guiniabtu lo Dios. Che luux cuedx-guiniabtu lo Dios, guchagsacsa'tu te na'c guquij bendxabtu chunäjtu ste'ca bejn.

⁶Rniä rediidxre lojtu te ni rlajz guchnaa sajc guchnaani, niluxh dina guiniä lojtu, nanabpac guchnaatu. ⁷Narä rlazä maläii sajc gac guiraa bejn si'c ni nacä. Dios abadeed loj tejsa bejn xho mood guibajnni. Yu'reni sajc guibajn tej mood, yu'zareni sajc guibajn garenca mood.

⁸Loj reben xteb näjza loj regunabiuud rniä, hueen najc na'c guchnaareni, gacreni si'c narä.

⁹Niluxh palga di gacdi cue'cdxi lajzreni, suguchnaareni. Maazru huen guchnaareni te na'c guntisreni xhigab rlajzreni guchaagreni te niguii o te gunaa.

¹⁰Loj rebejn ni abachnaa, rniä rediidx ni basa'n Dad Jesucrist loonu: “Na'c guro'n gunaa chäälni.”

¹¹Niluxh palga guro'n te gunaa chäälni, na'c guchnasacni, o maazru hueen gusiäjlni diidx guibisacni lo chäälni. Sigajcza te niguii na'c guro'nni chäälni.

¹²Naj rediidx ni guiniä najc xhigab xtenä, xhet diidxdi ni basa'n Jesucrist loonu. Scree rulidxä la'tu. Palga yu' te niguii

ni rililajz xtidx Dios, luxh chäälni di chalilajz xtidx Dios, luxh rlajz gunaaga cuäznäjni niguiiga, na'c guro'n niguiigani. ¹³Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlajzni cuäznäjni gunaaga, na'c guro'n gunaaga chäälni. ¹⁴Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabannäj sa'reni, hueen najc yälruhnaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabannäjsa'reni, hueen najc yälruhnaaga nez loj Dios. Palga dini gac si'c, di Dios gunle' rexi'nreni, per naj abenle' Dios rexi'nreni. ¹⁵Palga chäälni te gunaa o chäälni te niguii ni di chalilajz xtidx Dios luxh rlajzni guilia' sa'ni con chäälni ni ahuuilajz xtidx Dios, sujiizani. Nani rililajz xtidx Dios diruni ga'p por cuäznäjni chäälni ni di chalilajz xtidx Dios, niluxh gurejdx Dios nuurnu te cuecdixni lajznu. ¹⁶Sa'csi ðxho najnlu, gunaa, la suslaa Dios chäällu lo dojl xcuentlu, ä? O ðxho najnlu, niguii, la suslaa Dios chäällu lo dojl xcuentlu, ä?

¹⁷Si'ctis ni baniidx Jesucrist lo tejganu, si'ctis ni gule Dios tejganu, si'c suguibajnnu. Si'cza rulidxä gunrenini nen guiraa reguidoo. ¹⁸Palga tej niguii rililajz xtidx Dios, luxh yu'ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni. ¹⁹Xhet najcdi la yu'ni bee o xhet beedi yu'ni. Tejtis ni

nanab gunni, gusoobni rediidx ni gunibee Dios. ²⁰Tejgani jia'n si'cni najcni cheni gurejdx Diosni. ²¹Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcuent ni'c. Palga sajc gudzu'lu meel lo xlamlu, badzu'zani te gaclu te bejn ni rut rnibeedi. ²²Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bejn ni rut rnibeedi che rililajzni xtidx Dios, anajcni mos ni guzii Dios, najcni xmos Dios. ²³Guzii Cristtu con xtiejnni, ni'c na'c gusaantu guinibee bejn la'tu te gac guntu xtzun Dios. ²⁴Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bejn ni rut rnibeedi.

²⁵Redxa'p ni gajd guchnaa, di Jesucrist ninibee xhini'c nanab gunreni. Gule Dios narä te gusule'ä xtiidxni. Naj gulidxäreni sa'csi nanä xtidx Dios, luxh racnäjzani narä. ²⁶Runä xhigab hueen najc palga di reniguii guchnaa sa'csi siääd yälraganduxh lo guedxliujre. ²⁷¿La alabachnaalu, ä? Na'c guro'nlu chäällu. ¿La alabaro'nlu chäällu, ä? Na'c chaxiilu chäällu. ²⁸Palga guchnaalu, xhet dojl di rujnlu. Palga guchnaa te dxa'p, dizani gun dojl. Niluxh reni ruchnaa sidejdreni trabajw lo yäl nabajjre. Ni'cni rniä na'c guchnaatu sa'csi di rlazä tedtu trabajw.

²⁹Rebetzä, rlazä guiniä lojtu rediidxre: Guxiiru dxej guibajnnu lo guedxliujre, ni'cni reni abachnaa na'c gunreni xhigab xtentis

yälruhnaa, te gac gunreni xtzuum Dios. ³⁰Luxh reni cayoon, nanab gunreni si'cni xhet cayoondireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni; ³¹näjza reni rujn recos lo guedxliujre, nanab gunreni si'cni dini gunni, sa'csi recos ni rhuiinu lo guedxliujre, alacanitlojreni.

³²Narä rlazä na'c chutu yärsia'. Rebejn ni gajd guchnaa, riureni rextzuun Dios, näjza xho guspaareni lajz Dios. ³³Renani abachnaa riureni recos guedxliujre te guspaani lajz chäälni, ³⁴tiop najc xhigabni xcuent recos nani gunni. Sigajcza najc te gunaa ni abachnaa con tejni gajd guchnaa. Sa'csi te gunaa ni gajd guchnaa riuni rextzuun Dios te gacreni gunadxan nez loj Dios con tiejxhreni näjza con lastooreni. Niluxh regunaa ni abachnaa riureni recos guedxliujre, näjza xho guspaani lajz chäälneni.

³⁵Rniä rediidxre par xcäl'nasa'ctu, xhet gudxonädi la'tu, te gunrutu redzunsac, te chanälazsa'ctu Dios.

³⁶Palga yu' chu te niguii lojtu ni rujn xhigab, maazru hueen guchnaa xindxa'pni sa'csi acayajcni gunagool, dini gun dojl, sajc gudeednini guchnaani. ³⁷Palga steeni dini gun xhigab si'c nanab gunni, sajc gunni si'ctis ni rlanjzi palga abejnpacni xhigab nen lastooni di xindxa'pni guchnaa, hueenza najc si'c. ³⁸Ni'cni nani rudeed xinda'pni guchnaa, hueen rujnni, sigajcza nani dini gudeed xindxa'pni guchnaa, laacaza rujnni.

³⁹Te gunaa ni abachnaa, rajpni por guibannäjni chäälni guideb

nabajn chäälni. Palga guet chäälni, jianxtebni stehuält, dxejc sajc guchnaani chutis niguii ni rlanjzi, palga najcni tej ni ahuililajz xtidx Dios. ⁴⁰Narä rchaloä maazru guibaa lajzni palga dini guchnaa. Si'c najc xhigab ni runä, luxh riliipac lazä cayacnäj Sprit Dxan xten Dios narä.

Yälrajw ni ruzujreni lo rebanäjb

8 Rniä lojtu xcuent reyälrajw ni ruzujreni lo rebanäjb. Guliini guiraanu rajpnu yäl'najn xcuent recosga. Niluxh yäl'najn rujn rajc bejn guyalajz. Luxh yäl'rinälajz sa'ni, ni'c rujn racnäjnu resa'nu. ²Palga yu' chuni'c rujn xhigab nanduxhni, rusgueeni lastooni sa'csi cayäädxru gacbeeni si'c ni nanab gacbeeni. ³Palga yu' chu sanälajz Dios, Dios anumbee bejnga.

⁴Ni'cni, xcuent reyälrajw ni risujreni loj rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios. ⁵Masque yu' reni rniireni najc “dios” xhaguibaa o loj guedxliuj, luxh yu'za xhidajl “dios” näjza xhidajl lam ni rnibee, ⁶per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabajnnu. Rajpnu tejtis Dad ni rnibee loonu, ni'c najc Jesucrist. Xcuent xcäl'rnibeeni guc-chee guiraa recos loj guedxliuj, luxh nuurnu nabajnnu xcuent Jesucrist.

⁷Niluxh xhet guira'ti bejn najn yu' tejtis Dios. Yu' rebejn ni ahuililajz xtidx Dios abia'reni rajnreni rebanäjb, luxh rajwzareneni reyälrajw lascanu guzujni loj banäjb sa'csi nacäjyru xcäriejnreni, ni'cni et

laadi ria'n lastooreni, rxhınza xcäriejnreni. ⁸Xhet xcuent xhi rdaudinu sajc guibansa'crunu lo xnejz Dios. Xhet najcdi palga guidaunu o palga dinu guidau. ⁹Colnatiro xhi rujntu te na'c guntu jiajb te bejn lo dojl nani gajd chalilazsa'c xtidx Dios. ¹⁰Palga te bejn ni gajd chalilazsa'c xtidx Dios fiini cayajwlu reyälrajw ni guzuj lo rebanäjb, luxh luj najclu te bejnajn, sa'csi dee gajd gacbesa'c rextidx Dios, äla di lajzni gac nadip te näjza laani chatajwni yälrajw ni guzuj lo rebanäjb? ¹¹Niluxh luj, xhet dojldi cayujnlu, per bejtzlu ni gajd chalilazsa'c xtidx Dios, sixijjni, luxh najcni bejtzlu sa'csi näjza par laani gujt Dad Jesucrist lo cruju. ¹²Si'cza che rujnlu dojl lo bejtzlu, runnajlu lajzreni sa'csi gajd xcäriejnreni jiansa'c, luxh si'c cayujnzalu dojl lagajc lo Crist. ¹³Ni'cni, palga narä runä riabsac betzä lo dojl xcuent ni rauä, hueenru dirunä gauä yälrajw ni gun jiajb betzä lo dojl stehuält.

Xhi sajc gun te apost

9 äLa dina gacä te bejn ni rut lojdi yu'ä? äLa xhet apostdi narä? Ni abahuiä lo Dad Jesucrist, abasule'ä rextiidxni lojtu, ni'c huililajztu xtiidxni. La'tu najctu xtzunä ni runä lo Dios. ²Yu' reni di gumbeeni narä si'c te apost, niluxh la'tu abiembesa'ctu narä sa'csi ahuililajztu rextidx Jesucrist ni abasule'ä lojtu. Ni'c ruluiloj guliipac nacä te apost.

³Diidx ni rniä scree loj reni di chalilajz nacä apost najc scree: ⁴äLa di riäjł xca'ä guiraa ni runiidxtu

gauä näjza ni runiidxtu yä'ä? ⁵äLa digacdiza gapä te chälä ni ahuililajz xtidx Dios dxejc chanääzani sigajc rujn guiraa reapost, näjza rebetzhuin xten Dad Jesucrist näjza Pedr? ⁶O äla xtebtis Bernabé näjza narä di gacdi cuääz jiennu dzuun te guidaunu lał rusule'nu xtidx Dios? ⁷äChuni'c rajc soldaad luxh lagajc laani siini xhi gauni? O ächuni'c rusuj yaguub luxh dini gau ninejxh ni rcaj lojga, ä? O ächuni'c rajp gaii dxib, luxh dini yä le'ch ni rudeedreni, ä? ⁸Na'c guntu xhigab lagajc xcuentä caniä rediidxre lojtu, sa'csi näj loj xleii toMoisés caj diidx xcuent recosre. ⁹Loj reguijtz xten xleii toMoisés caj rediidxre: “Na'c gusällu guijxh ro' gon che cayo'tni yejc triuu.” äLa guniitis Dios rediidxre sa'csi riuni regon, ä? ¹⁰iDini gac! Xcäl'nasa'cnu guniini rediidxga, sa'csi bejn ni rujn dzuun lo niaa näjza nani rusia triuu riäjł gunlojni xca'ni te yäl'nasa'c ni rajc lo xniaani. ¹¹La'tu najctu si'c te yuj cadro gule'cnu binij sa'csi basule'nu rextidx Dios lojtu, äla rujntu xhigab dzunro najc gacnäjtu nuurnu tudxene', ä? ¹²Palga racnäjtu ste'ca bejn ni ruluuitu, nungäjłru gacnäjtu nuurnu.

Niluxh gajdnu guinii si'c lojtu sa'csi di rlaajzđinu guidxoönnu chalilazsa'ctu rextidx Dios, ni'c chotipnu lajznu guiraa retrabajw ni cadeednu. ¹³La'tu najntu reni rujn dzuun nen guidoro rajwreni rebääl ni risa'nreni lo Dios, sigajcza reni rujn dzuun lo dxan cadro risa'nreni xpääl reguidxaa lo Dios, näjza laareni rajwreni rebäälga. ¹⁴Si'cza gunibee Dad Jesucrist loj

reni gusule' xtidx Dios, xca'reni xhi gaureni lagajc loj reni rililajz xtiidxni. ¹⁵Niluxh gajdpacna gunä si'c, xhetza cacal'ädi. Dizana gucuaä rediidxre lojtu naj te guniidxtu xhi xca'a. Hueenru guetä te na'c gudzucaj te bejn yälrbalajz ni rapä xcuent dzuun ni runä lo Dios.

¹⁶Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios. ¹⁷Palga gunä dzuunre sa'csi rdxaglazäpac gunäni yu' xhi guniidx Dios loä. Mase runäni con yälrigaan, empac Dios agule narä te gusule'ä xtiidxni. ¹⁸¿Xhini'c najc xcuent ni xca'ä, ä? Che gusule'ä xtidx Dios lo chutis bejn, ligaj gusule'äni, te di gusule'ä xtiidxni te guniidx rebejn xhi guniidxreni xcuent xtzunä, mase si'c riäjl gunreni.

¹⁹Rut xmosdi nacä, luxh lagajc narä benä xhigab gacä si'c te mos te gunä gaan chalilajz xhidajl bejn xtidx Dios. ²⁰Cheni yu'ä loj rexpejn Israel, runä si'cni rujnreni te gunä gaan chalilajzreni rextidx Dios. Che rlazäza guiniä loj reni nabajn loj xleii toMoisés, dxejc runä si'c rujnreni te gunä gaan chalilajzreni rextidx Dios, niluxh diruna guibanä lo leiiga. ²¹Stee lajt cadro rlazä gunä gaan reni di guibajn lo xleii toMoisés, runä si'c rujnzareni, mase empac nabanä lo xleii Dios sa'csi rusobä diidxni basa'n Crist. ²²Cheni yu'ä loj reni guxii rililajz xtidx Dios, racäza si'c ni najcreni te gunä gaan chalilazsa'creni. Narä runä sigajc rujnreni, te si'c gunä gaan chalilajz xhidajlreni xtidx Dios. ²³Runä

guira'ti xcuent xtidx Dios ni rusläa bejn lo dojl, te xca'zanu, narä näjza rebejn ni ahuililajz xtidxä, yäl'nabajn par tejpas.

²⁴Anajntu che ru' te lanij, che ruxun reniguii, guiraareni ruxun, niluxh tejtis ni rca' ni ruzalajzreni. Colguxunza nez lo Dios te gunzatu gaan. ²⁵Guiraa reni rlanj guxun rapdareni tiejxhrene te ga'p tiejxhrene yäl'nadip, yäl'nadaan. Luxh laareni ruxunreni si'c te gunreni gaan te cos ni di gaclaa agunitlojni. Niluxh nuurnu ruxunnu te guniidx Dios loonu nani dipac nitloj. ²⁶Narä dina guxunä si'cni dina ganä caro cha'ä, dizana gucuaä si'c te bejn ni rucuanäj te balaa, o cayäztsisni lo bej. ²⁷Niluxh narä runä rajc tiexhä si'c xmosä te na'c gunni si'ctis ni rlanjni, te gunni nani rlanj Dios te di cheni abasule'ä xtidx Dios loj xhidajl bejn, gusanxtujy tiexhä narä.

Yäl'rulijdx lo xcuent rebanäjb

10 Rebetzä, di rlazä jiallajztu ni gusajc retoxtadgoldoonu. Gusajreni xpalaa te za gudejdzareni galäii nisdoo ni laa Nisdo Xniaa. ²Gudejdreni xpalaa te za näjza gudejdreni galäii nisdoo; ni'c najc si'c te yäl'robnis sa'csi sanajlreni toMoisés. ³Sigajcza guiraareni gudajw tejtis yäl'rajw ni baxhal Dios xhaguibaali. ⁴Guiraazareni gu' nis ni badeed Dios, Dios bejn birii nisga cuä' te guilaj. Luxh Xpriet Crist gusanäjreni cadrotis sääreni nez lo reyubidzroga. Luxh con xcäl'rnibeeni birii nis loj guilajga, Crist najc si'c guilaj ni huinäreni. ⁵Dios bidxehnäj xhidajlreni, ni'c xhidajlreni gujt nez lo reyubidzga.

⁶Guiraa rediidxga najc te yäl_rulijdx loonu, te na'c guichagajaznu jiennu lagajc redojl ni bejn rextotadgoldoonu. ⁷Na'cza gañtu rebanäjb si'c ni bejn baltireni; acaj lo rexquijtz Dios xcuentreni: “Rebejn ni guyaa lajz gurejreni te gu'reni, gudajwreni, dxejctiru huisureni te gusloj caguijtreni.” ⁸Na'c chunäjnu stee bejn di gac chäältu si'c bejnreni, ni'cni gujt galbichon mil'reni tejtis dxej. ⁹Na'cza guche'chnu Dios con rextojl nu si'c bejn balti rebejn ga, ni'cni gujtreni sa'csi gudauya' bäl'reni. ¹⁰Na'cza chamojmtu xcuent ni rujn Dios si'c ni bejn rebejn ga xcuent ni bejn Dios, ni'cni baxhal Dios angl xten yäl_gujt bagu't xhidajlreni.

¹¹Guiraa redee gusajc rextotadgoldoonu te rulijdxni nuurnu, cuajzaren lo guijtz te guluii rediidxga nuurnu xho riäj jiennu, nuurnu ni nabajnnu nen redxej naj. ¹²Ni'cni chutis ni rujn xhigab nabansa'cni nez loj Dios, sudzu'tzni te di jiabsacni. ¹³Xheti te trabajw ni cadejdtu nani gajd ted chutis bejn. Niluxh di Dios cuälaztu, dini gusaan tedrutu dzunduxh nani digacdi guntu huant, suniidx Dios yäl_nadip yäl_nadaan lojtu te che tedtu trabajw sidxältu xho guibicajtu lo dzunduxhga, te gutiplajztu.

¹⁴Ni'cni rniä lojtu, rebetzä nani sanälazä, colbicaj lo yäl_rajñ xten rebanäjb. ¹⁵Rniä lojtu si'c lo te ben nasin, te bennajn: colgulatzsa'c rextidxä don la laaca najczeni. ¹⁶Che rdaunu xchej xten Dad Jesucrist najcni te seen nabannänu

Jesucrist. Che rdunnu nen co'p, rnaalajznu gudijx Dad Jesucrist xtiejnni xcuent xtojlnu lo crujz. Che rdaunu yätxtiil, sälojni anajcnu tejtis xcuent tiejxhni ni badeedni cuaj lo crujz xcuentnu. ¹⁷Sa'csi yu' tejtis yätxtiil, mase najcnu xhidajl, najcnu si'c tejsi tiejxh sa'csi tejsi yätxtiil rdaunu che rauxchejnu xchej xten Dad Jesucrist.

¹⁸iBahuii xho rujn rexpejn Israel! Rajwreni xpääl reguidxaa ni rile'creni lo Dios lo dxan nen guidoo, ni'c najczeni tejsi con guiraa rebejn nani rujn sigajc rujnreni. ¹⁹¿Xhixhni'c rlazä guiniä, naj? ¿La caniä yu' xhi sajc gojn nani gule'c bejn lo banäjb, ä? O ¿la yu' xhi sajc banäjbga, ä? ²⁰Xhet sajcdireni. Narä caniä lojtu dee: Recos nani rbe'c rebenzijt lo rebanäjb, lo reben dxab cabe'crenini, et lojdi Dios. Luxh narä dina rlazä gactu tejsi con rebejn nani rbe'c lo reben dxab, te di chachunäjzatu reben dxab. ²¹Sa'csi digacdi yätu co'p ni rusnaj laaznu ni bejn Dad Jesucrist lo crujz nägajcza co'p nani rudeedreni lo reben dxab. Digacdiza guidaunu xchej xten Dad Jesucrist nägajcza xchej ni rudeedreni lo reben dxab. ²²O ¿la rlaznu guche'chnu Dad Jesucrist, ä? ¿Xhixh maazru nadipnu lojni, ä? iGurniä lojtu!

Colyejn guira'ti te chä'p xpala'n Dios

²³Guliicani, sajc jiennu xhitis ni rlaznu jiennu, niluxh xhet guira'ti ni rlaznu jiennu najc hueen par nuurnu. Guira'ti najc laaca, niluxh yu' reni di gacnä j gustioobnu lo xcäl_rililajz Dios. ²⁴Na'c guntu

xhigab quiiltistu lagajc xcäl'nasa'ctu; maazru hueen quiilzatu xcäl'nasa'c xpisintu. ²⁵Coltajw xhitis bääl ni rdo' lo guii, na'c guiniabdiidxtu caro siäädni te di gacnaj xcäriejntu. ²⁶Lo xtidx Dios caj rediidxre: "Sa'csi guideb guedxliuj näjza guiraa ni tre' lo guedxliuj najc xten Dios."

²⁷Palga jiadgajñ te bejn ni di chalilajz xtidx Dios luj jiadtaunäjlni luxh acuäjblu chäälü, huijza, gudajw xhitis ni cue'cni nez lojlu, na'c guiniabdiidxlu te di gacnaj xcäriejnlu.

²⁸Palga yu' chu naa lojlu: "Dee najc bääl ni bile'cnu lo rebanäjñ", na'c gauluni, didi gunni gunijt dade'ga ni gunii si'c lojlu te di gacnajza xcäriejn chutis. ²⁹Dina guiniä xcäriejnlu, didi gunnajni xcäriejn stee dade'ga; mbaj naj, çhicient riäjñ gula'tzreni narä sa'csi rajc runä guira'ti porsi racnaj xcäriejn ste'ca bejn, ä? ³⁰Palga rudedä xquixtios lo Dios nani runiidx xhi rauä, çhicient rniyajreni narä ni rauä, luxh abadedä xquixtios lo Dios?

³¹Ni'cni palga gautu, o palga yätu o xhitis ni rujntu, colyujñ guira'ti te chä'p xpala'n Dios. ³²Na'c guche'chtu nicla rexpejn Israel niclaza rebenzajt, niclaza rexpejn xquidoo Dios.

³³Sigajcza runä narä, runä guira'ti ni ruspaalajz rebejn, dina quilä xcäl'nasa'cätis, alga rguillä xcäl'nasa'c xhidalduxh bejn, te laareni lo dojl sa'csi ahuililajzreni xtidx Dios.

11 Colyejn si'cni runä narä, sigajcza narä runä si'cni rujn Jesucrist.

**Xho riäjñ gun regunaa
nen xquidoo Dios**

²Rliä'pä xpala'ntu sa'csi lo guira'ti rnaj lajztu narä, rnajza lajztu

rediidx nani baluiä lojtu, sudzu'tztu rusoobtu rediidx sigajcni baluiäreni lojtu. ³Narä rlazä gacbeepactu Jesucrist najc nani rnibee lo niguii, dxejctiru niguii rnibee gunaa si'c rnibee Dios Jesucrist. ⁴Chutis te niguii ni yu' xhumbreel yejçni lañni cabedx-canabni lo Dios o lañni caguluiini xtidx Dios, laani rusanxtujyeni yejçni. ⁵Palga yu' te gunaa ni dini gusäu xpäiini yejçni che cabedx-canabni loj Dios o che caniini xtidx Dios, rusanxtujyeni yejçni sa'csi najcni sigajc najc te gunaa ni abigaj yejçni. ⁶Palga di te gunaa gusäu xpäiini yejçni suguigaj yejçni. Palga najcni te xtujy guigaj yejçni, sugusäuni xpäiini yejçni. ⁷Di guchaag gusäu te niguii yejçni sa'csi najceni si'c xtuxh Dios, näjza xcäl'rdimbicha' Dios. Niluxh regunaa najc si'c xcäl'rdimbicha' niguii. ⁸Sa'csi di niguii nirixtiej cuä' gunaa; gunaa najc ni birixtiej cuä' niguii. ⁹Xhetza xcuent gunaadi guc-chee niguii; gunaa najc ni guc-chee xcuent niguii. ¹⁰Ni'cni nanab jäü yejç gunaa nen guidoo si'c te seen lo rexangl Dios yu' chu rnibeereni. ¹¹Niluxh nez lo Dios nicla niguii niclaza gunaa digacdi guiban xtebreni. ¹²Sigajc galoo birixtiej gunaa cuä' niguii, sigajcza naj gunaa najc nani ruu báz; luxh Diostis najc nani runchee guira'ti rebejn.

¹³Colyejn lagajc xhigabtu naj, çla laaca najcni cuedx-guiniab te gunaa lo Dios lañ ni xhet niäudi yejçni, ä? ¹⁴Loj reben guedxliuj guiraa reniguii rgaj yejçreni, sa'csi najcni te xtujy guigaduxh xquidxejçreni. ¹⁵Niluxh regunaa hueen najc rga'

xquidxejcreni te rusäuni yejci.

¹⁶Palga yu' chu tildiidx xcuent rediidx nani caniä lojtu, nanab gacbeeni si'ctis riennu, si'ctisza rujnreni nen guiraa rexquidoo Dios.

Xho ruxhijreni xchej Dad Jesucrist

¹⁷Rediidxre ni cagucuaä lojtu, direni guiliä'p xpala'ntu, sa'csi che rdxagsa'tu nen xquidoo Dios, lacuaa laaca cuetu, xhet laadi rujntu. ¹⁸Rnixgaä dee: Abiejn diagä che re'tu lo xquidoo Dios, rlia'tu lo sa'tu rajctu tiop cuaa; luxh riliica lazä rediidxre. ¹⁹Pet naatu nanab guntu si'c te gacbeetu chureni'c sanälajzpac Dios, chureni'c sajcu lo xtzuun Dios. ²⁰Ni'cni che rdxagsa'tu, dini gac te cuetu lo xmex xchej Dad Jesucrist, ²¹sa'csi che agule'creni xchej lo mex, tejga bejn rlanj xcaxgaa xhi gauni, dxejc yu' reni agudxadoo xque'reni, agusojzareneni, lajni yu' stee cuaa bejn calaan, gajdreni gau. ²²¿Xho mood? ¿La xheti roliztu cadro gac gautu, yätu, ä? O ¿la rbälazlu xquidoo Dios, ni'c rusanxtujylu rebejn ni xhet räjpdi, ä? ¿Xhini'c guiniä lojtu naj? ¿La naatu guiliä'pä xpala'ntu xcuent nani rujntu, ä? iGurniälojtu guiliä'pä xpala'ntu!

Xchej Dad Jesucrist

(Mt. 26:26-29; Mr. 14:22-25; Lc.22 :14-20)

²³Balulioj Dad Jesucrist löä lagajc nani baluiä lojtu xcuent xho bejnni guxhijn che gudaunäjni rexpejnni te xchej xten pascw, guxhijn ni gudo'ni. Cua'ni yätxtiil, ²⁴dxejc che abadeedni xquixtios lo Dios, gula'ni yätxtiilga, räjpni lojreni: “Colgajw, dee najc tiexhä ni gudedä

guet xcuenttu. Scree guntu te guinalajztu narä.” ²⁵Si'cza bennäjni co'p che gulujx gudajwreni, räjpni lojreni: “Ni yu' nen co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejn ni aguleni. Scree guntu te guinalajztu narä.” ²⁶Che gautu yätxtiilga, che yätu nen co'pga, ruluilosactu xhi bejn Jesucrist che gudijxni xcuent rextojlnu lo crujz; si'cza colyujn dxejli ni guibisacni lo guedxliujre.

Xho riäjł gac xchej Dad Jesucrist

²⁷Ni'cni rniä lojtu, chutis tejtü ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujnni dojl, najcni si'cni lagajc laani bagu't Jesucrist, baxhe'zani xtiejnni. ²⁸Niluxh sugula'tz tejgatu lagajc lastooni don la yu' xhi dojl bejnni, dxejti sajc gauni yätxtiil, yäni co'p xten xchej Dad Jesucrist, sa'csi abaxhobdojlni. ²⁹Chutis bejn ni gau, ni yä xchej Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujnni jiajb xcälnej Dios yejci. ³⁰Ni'cni lacti resa'tu racxhuu, xhet nadaanreni, luxh yu'zareneni agujt. ³¹Ni'cni nanab fiinu xho najcnu, guiniabnu lo Dios gudzucajni rextojlnu te didi tednu trabajw. ³²Niluxh che rdejdnü trabajw, rdejdnüni te na'c tednu trabajwduxh si'c ted reben guedxliuj che gacreni yälguختis xten Dios. ³³Ni'cni rniä lojtu, rebetzä, che guire'tu te gautu xchej, colcuäjz

resa'tu. ³⁴Palga yu' chu tejtu ni calaan, sugauni lagajc rolizjni, te di gun Dios yälguxhtis lojtu. Guiraa rexhistee cos, che jiälä ro'c fiä don xho gacsac'ni.

Dzuun ni rudeed Sprit Dxan xten Dios lo tejga ni rililajz

12 Rebetzä, rlazä gacbeetu xcuent dzuun ni rudeed Sprit Dxan xten Dios lo tejganu.

²La'tu najntu che gajdntu chalilajz xtidx Dios, rajntu chutis banäjb ni di gacbee, ni naatis bejn gantu.

³Ni'cni rlazä gacbeetu naj, nicla tejtu ni yu' Xsprit Dxan Dios nen lastooni sajc guinii: "Xhet sajcdi Jesucrist." Luxh rut rajcdi rni: "Jesucrist najc Dadbid baxhuaannu", palga di Xprit Dxan Dios cuääz nen lastooni.

⁴Mbaj naj. Yu' xhidajl dzuun ni rudeed Dios loj rebejn ni huililajz xtiidxni, niluxh tejsi najc Xsprit Dxan Dios ni rujn dzuunga nen lastoo guiragajcnu. ⁵Yu'za balti cuaa dzuun nani riennu, niluxh tejsi najc Xtabdid baxhuaannu. ⁶Yu' xhidajl mood rajc dzuun, niluxh tejsi Dios rujn dzuunga lastoo guirali bejn. ⁷Tejga bejn ruluiloj garen-garen xtzuum Sprit Dxan xten Dios, niluxh guira'ti redzuunga najc te gacnäjreni guiraanu. ⁸Lo tej bejn rudeed Sprit Dxan yäl_{ni}nasin, lo steeni rudeed lagajc Sprit Dxanga yäl_{ni}najn. ⁹Lagajcza Sprit Dxanga rudeedzani yäl_{ni}rililajzro lo tejni, dxejc lo steeni rudeedza lagajc Sprit Dxanga yäl_{ni}rnibee te rusiajcnj yäl_{ni}racxhuu. ¹⁰Loj stee bejn rudeedzani yäl_{ni}rnibee te gunni milagawr, loj stee bejn rudeedni

yäl_{ni}riembee te sajc guinixgaani xcuent recos ni churu gac; lo steeni rudeedni yäl_{ni}nasin te gumbeeni chu najc Sprit guliipac, näjza chu najc sprit ni rusguee. Lo stee bejn rudeedzani guiniini garen-garen redidxsaj; loj stee bejn rudeedzani yäl_{ni}racbee te rajc rniini loonu xhini'c gunii bejn ni rniij garen-garen redidxsaj. ¹¹Niluxh tejsi najc Sprit nani rujn guiraa redzuunre, racnäjni rujn tejganu xtzuumni si'ctis ni rlanjzni.

Guiraanu najcnu te la' tejsi tiejxh

¹²Sigajc ni najc tiejxhnu tejsi, mase yu' xhidajl la' xtenni, teygareni te la' tejsi tiejxh, sigajcza najc rebejn nani huililajz xtidx Jesucrist. ¹³Guiraanu, mase najcnu rexpejn Israel o ben griegw, mase najcnu mos o mastr, gurobnisnu con laj Sprit Dxan che huililajznu xtidx Dios, te gujcnu si'c tejsi tiejxh, luxh tejsi Sprit Dxan xten Dios biädälajz nen lastoonu.

¹⁴Sa'csi tiejxhnu dini gac tejsi la', najcni balti la'. ¹⁵Paru naa ni'nu: "Sa'csi dina gacä te naa, ni'cni dina gacä te la' tiejxhre." ¿Xhixh porsj ni'c dini gac tla' tiejxhga, ä? iGurniälojlu! ¹⁶Palga diajgnu naa: "Dina gacä te baloj, ni'cni dina gacä te la' tiejxhre." ¿Xhixh porsj ni'c dini gac tla' tiejxhga, ä? iGurniälojlu! ¹⁷Palga guideb tiejxhni niajc te baloj, ¿xhi cojn niejn diajgni? Palga guideb tiejxhni niajc te diajgni, ¿xhi cojn chuxhi'ni? ¹⁸Mbaj naj, ni'c basoob Dios guiraa rela' te guc-chee tiejxhnu si'ctis ni rlanjzni gacni. ¹⁹Paru niajc guidebni si'c tejtis la'ni, ¿xho niajcpacni

te tiejxhni dxejc? ²⁰Niluxh naj ensilaani yu' xhidajl la' te najcni tejsi tiejxhni.

²¹Te balojnu di gac gäbni lo naanu: “Dina guiquinälu”, niclaza bitiuwejcni di gac gäbni lo ni'ni: “Dina guiquinälu.” ²²Chucala lapacreni rquuinru nani ruzen lascanu xhet sajcdireni. ²³Luxh retla'ga nani rchalonu guxii sajcreni, reni'c maazru saj. Luxh reni rtuinäanu, niguii sigajc gunaa, reni'c riapdarunu. ²⁴Biätla sgaii la' tiejxhnu nani rlui saruru, reni'c di guiquiin gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru saj. ²⁵Bejn ni si'c te di chu yälrđijl lo retla' tiejxhnu, te guiraa retla'ga gacnäy sa'reni. ²⁶Ni'cni che et laadi yu' te la' tiejxhnu guidebni ru' et laadi. Sigajcza che guiliä'pnu xpala'n te la' tiejxhnu, guideb tiejxhnu rbalajz.

²⁷Ni'cni guiraanu najcnu si'c tiejxh Jesucrist. Tejganu najc te la' tiejxhni. ²⁸Luxh abadeed Dios yälrnibee lo tejganu lo xquidooni te gunnu xtzuum-xtzuumni. Ganidtoo guleni reapost; ni rojpga guleni rebejn ni rni xtidx Dios; ni riojnga, guleni rebejn ni ruseed; dxejcti guleni reni rujn remilagwr, reni rusiajc benracxhuu, reni racnäy, reni rni garen-garen redidxsaj. ²⁹Et guiraadi rexpejn Jesucrist najc apost. Et guiraadizareni rniireni xtidx Dios. Et guiraadireni rajc ruseed. Et guiraadizareni rajc rujn remilagwr. ³⁰Et guiraadireni rajc rusiajc rebenracxhuu. Etza guiraadireni rajc rni garen-garen didxsaj, et guiraadireni rajc rni

xhi säloj redidxsajga. ³¹Nanab guideb lastootu rlanjtu guniidx Dios reyälrnibee ni najc maazru hueen lojtu. Niluxh narä guluiä lojtu te nezyuj ni najc hueenru loj guiraareni.

Yälsanälajz

13 Palga guiniä guiralaj xtidxsaj rebejn, o xtidx rexangl Dios, luxh dina chanälazä rebejn, rubejtis xtidxä si'c te tamboor o te platii. ²Palga saj guiniä xtidx Dios xcuent recos ni churu gac, luxh racbesa'cä guiraa recos xhiga'tz xten Dios, näjza guiralii yälnasin xten guedxliujre, palga rapä yälrililazduxh te gac gäpä lo redajnre, “colguibicaj”, luxh rbicajreni, niluxh xhet sanälazädi rebejn, rut nacädi. ³Palga gudedä guiraa rexhixtenä nani rapä te gau rebejn ni xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuunga.

⁴Rebejn ni rajp yälsanälajz cabäjzreni, najczareni beñsa'c, direni säblajz xhi xten sa'reni, direni guschä'p lagajc xpala'nreni, direni gac guyalajz. ⁵Direni gun recos ni di guchaag, dini quiil xcälnasa'ctisni, dini guidex'ch, dini jiu redojl ni rujn bejn lojni. ⁶Nani rajp yälsanälajz dini guibalajz che rujn stee bejn dojl, alga rbaa lajzni che laaca rujn bejn. ⁷Nani rajp yälsanälajz rujn huant xhitis cos, rililajzni hueen xcuent xhitis cos, sanuutis cabäjzni, rajc rdejndi xhitis trabajw.

⁸Yälsanälajz dipacni nitloj. ¿La rniireni xtidx Dios xcuent recos

ni churu gac, ä? Sidzujn dxej sibäjz rediidxga. ¿La rajc rni bejn garen-garen redidxsaj, ä? Sidzujn dxej siacdxi redidxsajga. ¿La yu' yälñajn? Sidzujn dxej sinitlojpacni. ⁹Sa'csi naj guxilii racbeenu, guxilii xtidx Dios xcuent recos ni churu gac rajc rniinu, ¹⁰niluxh che jiädsac Jesucrist ni rajp guiralii yälñajn, sinitloj xcälñandxucnu.

¹¹Che gucä biuux, guniä si'c biuux, benäza xhigab si'c biuux, niluxh che bidzunä lo yälñengol, gunitloj rexhigab biuux ni benä galoo. ¹²Sa'csi naj rhuinu si'c loj te guihuajn ni nacäy, luxh che guibanñänu Dios xhaguibaa, suhuisa'cnu si'cni ruhuii bejn che suga'ni loj sa'ni cahuiinini. Naj racbeenu re'cti rec, niluxh dxej sacbesa'cnu si'cpacni numbee Dios nuure. ¹³Niluxh naj ria'n yälñirilajz näjza yälñäzajz, näjza yälñälajz. Lo guidxon redee, sajcrü yälñälajz.

Renani rni rediidx

14 Ganiddoo colquuil yälñälajz, colñabza lo Dios te guniidxrüni xhi stee dzuun, niluxh colyejnru te xca'tu yälñribesa'c te gusule'tu xtidx Dios. ²Che rni te bejn garenca diidx ni di rebejn gacbee, rniini lo Diostis, et lojdi rebejn, sa'csi rut racbeedi xtiidxni, mase caniiini cosro, cosxhiga'tz nani rulüi Sprit Dxa xten Dios guiniini. ³Niluxh bejn ni rusule' xtidx Dios, rustioobni xcälñirilajz bejn ni rulijdxni, ruspaani lajz nani rac-huin lajz. ⁴Che rni te bejn garenca didxsaj ni rut racbeedi, lastootisni rustioobni,

niluxh bejn nani rusule' xtidx Dios xcuent recos ni churu gac, laani rustioobni lastoo guiraa rebenguidoo.

⁵Narä rlazä maläi rajc rni guiraatu garen-garen diidx, niluxh hueenru gac gusule'tu xtidx Dios. Maazru saj nani rajc rusule' xtidx Dios loj nani rni garenca diidx palga di gacdi gusule'ni lo rebejn xhini'c caniiini. ⁶Mbay naj betzä, che jiälä lojtu, palga guiniä garenca diidx lojtu, ¿xhi gacñajni la'tu? Hueenru guiniliä xcuent te cos ni abaluiloj Dios loä, o xcuent te yälñajn, o xcuent te xtidx Dios, o xcuent te yälñruluii.

⁷Ni ruhuiinu xho najcza reinstument ni rol bejn si'c te bizej, o te harp; palga di bejn golsa'creni, ¿xho jienu gacbeenu xhi dij cayolreni, ä? ⁸Sigajcza lo guerr, palga direni go cornet dippac, ¿xho gacbeereni agojl chatijlreni, ä? ⁹Sigajcza la'tu, palga ditu guinisa'c didxsaj nani racbee bejn, ¿xho gunreni gacbeereni xhini'c caniiilu, ä? Xlia'si guiniilu, lo bejtis sää xtiidxlu. ¹⁰Yu' xhidalduxh didxsaj lo guedxliuj, luxh xheti tejni nani xheti xnejz. ¹¹Niluxh palga dina gacbeä didxsaj ni rniireni loä, nacä si'c te benzijt loj nani canii loä, sigajcza saj nani caninäj narä. ¹²Ni'cni la'tu ni rlaiztu xca'tu yälñribee xten Sprit Dxa te guntu xhi redzuun, colguejs, colñab lojni xhidajl dzuun te gacñajtu tioobru xcälñirilajz rexpen guidoo.

¹³Ni'cni palga yu' te bejn ni rni garenca didxsaj, suguiniabni loj Dios yälñribee te gac gusule'ni diidx ni rniini lo rebejn. ¹⁴Palga

cuedx-guiniabä lo Dios con te didxsaj ni dina gacbeä, lastoätis ni calä'p xpala'n Dios, niluxh xcärienä xhet cayacbeedini. ¹⁵¿Xho ricajni dxejc? Siniab xspritä näjza xcärienä lo Dios; sol xspritä näjza xcärienä dij. ¹⁶Palga dini gac si'c, xsprittislu calä'p xpala'n Dios con ste'ca didxsaj, niluxh bejn nani cacuadiajg di gacdi gacnäjnili guiliä'pni xpala'n Dios, sa'csi dini gacbee xhini'c rniilu. ¹⁷Hueencaza calä'plu xpala'n Dios, per stee bejnga dini tioob loj yälirililajz. ¹⁸Rudedä xquixtios lo Dios maazru rajc rniä garen-garen diidx loj guiragajctu. ¹⁹Niluxh nen guidoo maazru rlazä guiniä con xcärienä gaiitis diidx nani gacbeetu, nani guluii la'tu, loj tzuu mi diidx nani guiniä con xspritä ni ditu gacbee.

²⁰Rebetzä, na'c rujntu xhigab si'cni rujn rebiuux, xcuenttis cosguijdx nanab gacnayatu si'c biuxbäz, per colyejn xhigab si'c te bengool. ²¹Scree caj lo xleii toMoisés: “Mase guiniä lo rebejn con garenca diidx näjza xtidx benzijt, nicla si'c direni gucuadiajg xtidxä”, naj Dad baxhuaannu. ²²Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yälrusule' xtidx Dios xcuent recos ni churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios. ²³Palga re'tu nen guidoo dxejcti caniiitu garen-garen diidx ni rut racbeedi, dxejc guidzujn tej ni di gan xtidx Dios, siniini guiraatu rajc yejctu. ²⁴Palga re'tu nen

guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniiitu, sacbeeni yu' xtojlni, ²⁵sienloj rexhigab xhiga'tz ni yu' nen lastooni, dxejcti siabrojni suzuxhijbni lo Dios, siniabni lo Dios, siniizani guliipacni suga' Dios galäiitu.

Colyejn guira'ti xnez-xnejzni

²⁶¿Xho ricajni naj, betzä? Che guire'tu nen guidoo suxca' tejgatu tebgaj te salm, te xtidx Dios ni guluiini, te diidx ni baluiloj Dios lojni, te diidx con garenca diidx, nägajcza te ni gusule' xhi säloj diidxga. Colyejn guiraa ni rujntu te tioob xcälirililajz renani ahuililajz xtidx Dios. ²⁷Palga yu' renani rnii con garenca diidx, suguinii tio'p-chon bejn, niluxh tebgajreni, dxejcti sugusule' steeni xhi säloj ni rnii tebgareni. ²⁸Palga rut rajcdi gusule' rediidxga, na'c guiniireni con garenca diidx nen guidoo, suguinixtebreni lo Dios. ²⁹Si'cza renani rusule' diidx ni rudeed Dios lojreni, suguinii tio'p-chon bejn, niluxh tebgajreni, te cuadiajg stiop xchonreni donnu la laaca caniireni. ³⁰Palga guluiiloj Dios te cos loj te bejn ni sobga' cacuadiajg, sucuedxisijcni, dxejcru suguinii. ³¹Sa'csi guiraatu sajc gusule'tu tebgajtu didx ni baniidx Dios lojtu te gac guisiedtu, te tioob lastoo guiraatu lo yälirililajz. ³²Rudeed Sprit Dxa xten Dios yäl'najn loj reni rusule' diidx ni rudeed Dios lojreni te acanajnreni che riäjl guiniireni o che riäjl cuedxireni, ³³sa'csi Dios najc te Dios ni rujn

guira'ti xnejz-xnejzni, dini gun biegy, niluxh rbecdxini lastoo bejn neñ guiraa reguidoo xten rebejn ni ahuililajzpac xtiidxni. ³⁴Sucuedxi regunaa neñ reguidoo, sa'csi di gacdi gusule' te gunaa xtidx Dios. Nanab gunreni si'c caj lo leii gunreni, gucuadiajgreni xtidx Dios ni rusule' reniguii lojreni.

³⁵Palga rlajzreni gabeerureni, suguniabdiidxreni loj chäälni che guibi'reni rolizreni, sa'csi sianxtujy gunaaga palga guiniini neñ guidoo.

³⁶Colgacbee et la'ditu guläxtiejditu rextidx Dios, luxh etza xtebtis lojtu biäädni. ³⁷Palga yu' tejtü ni rchalo rajc rniini diidx ni rudeed Dios lojni, o palga rchalonu abadeed Xpirt Dxan xten Dios te dzunro lojni, sugacbeepacni dee: guiraa rediidx ni cagucuaä lojtu, rucuaäni sa'csi si'c gunibee Jesucrist gucuaäni. ³⁸Palga yu' chu tejtü ni di chailajz rapä xcälrnibee Jesucrist, rutza jiu di xtiidxni.

³⁹Ni'cni, rebetzä, colyejnru te gusule'tu diidx ni runiidx Dios lojtu, na'c gudxojuu renani rniiza garenca didxsaj. ⁴⁰Luxh guira'ti nani rujntu, colyensa'cni, xnejz-xnejzni.

Gubansac Jesucrist lo rebengut

15 Naj rniä lojtu betzä, colgusnaj lajztu xtidx Dios ni basule'ä lojtu, nani huililajztu, loj nani sutijptu, ²näjza colgusnaj lajztu diidx xcuent ni badzucaj Dios xtojltu che huililajztu, palga sanuu sutijptu lojni, te di xlia'si huililajztu diidxga.

³Lojtu ganiddoo basule'ä rediidx ni sajcrü ni bisiedä, basule'ä

xho gujt Jesucrist lo cruzj, bixe' xtiejnni te badzucajni rextojlnu, sigajc ni caj lo xtidx Dios gac.

⁴Basule'äza xho biga'tzni, dxejc ni rion dxej guläs Diosni, gubansacni si'cni caj lo xtidx Dios gacni.

⁵Cheni gubansacni, baluilojni lo Pedr, dxejtiru loj guitzubito'p rexpejn pacni, ⁶dxejcti baluilojni lo gabixh gaii gayuu bejn ni tre' tejsi lajt. Xhidajlreni nabansijc, niluxh yu'za reni agujt. ⁷Dxejcti baluilojni lo Jacob, dxejtiru loj guiraa reapost.

⁸Dxejcti lultpac baluilojzani loä, luxh alagudejd rululojni lo rexpejn dxejc. ⁹Narä guxiiru sacä loj guiraa reapost, niclaza nungäj'l cuälajreni narä apost sa'csi basacsä rexpejn xquidoo Dios. ¹⁰Balaslazduxh Dios narä, ni'c narä nacä si'c ni nacä naj. Luxh et xlia'di balaslajzni narä. Narä benäru dzuun loj guiraareni, niluxh xhet narädi ni benä dzuun, sa'csi xcälrulaslajz Dios cayacnä j narä. ¹¹¿Xhiru najcni palga naräni o palga laareni? Empac cagusule'nu xtidx Dios, luxh la'tu salilajztu xtiidxni.

Xho guibansac rebengut

¹²Mbaj naj, palga nuurnu cagusule'nu diidx xcuent ni gubansac Crist loj rebengut, ¿xhicuent yu'tu ni rni, xheti yälrbansac loj rebengut? ¹³Palga xheti yälrbansac lo rebengut, dxejc nicla Crist di nibansac lo rebengut. ¹⁴Luxh palga di Crist nibansac loj rebengut, ixlia'si najc diidx nani basule'nu! iXlia'siza najc xcälrililajztu! ¹⁵Luxh et

ni'ctis. Abiga'nu sa'csi rusgueenu rniinu baspañsac Dios Jesucrist loj rebengut, luxh dini nuspañsacni loj rebengut, palga guliini di bejn guibañsac loj rebengut. ¹⁶Niluxh palga di rebengut chäs, niclaza Crist di nibansa'c lo rebengut. ¹⁷Luxh palga di Jesucrist nibañsac loj rebengut, xhet sajcdi xcälirililajztu, sanuutistu loj xtojltu. ¹⁸Sigajcza agunijt rebengut nani huililajz xtidx Jesucrist. ¹⁹Palga naj ni nabajntisnu loj guedxliujre cabääznu Jesucrist, lo guiraa rebenguedxliuj nuurnu najcnu rebejn ni riäjł jiaduxhrej guiraa reni ruhuii loonu.

²⁰iPer dini gac si'c! Guliipacni gubañsac Jesucrist loj rebengut. Laani guc ganiddoo loj guiraa rebengut ni gubañsac, luxh laani dini niejt par tejpas. ²¹Sigajcni biääd yälgujt loonu xcuent tejtis niguii, sigajcza biääd yälrbañsac lo rebengut loonu xcuent tejtis niguii. ²²Sigajc xcuent te niguii ni laa Adán biääd yälgujt, sigajcza xcuent Jesucrist biääd yälrbañsac loj rebengut. ²³Tejganu xcuent-xcuentnu; Jesucrist gujc ganiddoo, dxejcti guiraa reni najc rexpejñni che jiädsacni lo guedxliujre, guiraareni suspañsacni. ²⁴Che agujc ni'c, dxejcti siääd dxe lult che gudedsacni yälrnibee lo Dios Xtadni, che abadzujłni guiraa reyälrnibee, guiraa reyälguxhtis, guiraa reyälmilagwr. ²⁵Nungäjłpac guinibee Jesucrist cheni gunli Dios gaan loj guiraa reni rdxe'ch lojni, quixhnireni detz ni'ni. ²⁶Lulł ni rdxe'ch lojni ni gunitlojni najc yälgujt. ²⁷Lo xquijtz Dios caj:

“Agudixhni guira'ti detz ni'ni te guinibeenireni.” Che rniini si'c huenliisi gacbee bejn di gacdi guinibee Jesucrist Dios, sa'csi Dios badeed lojni xhini'c guinibeeni. ²⁸Che acanibee Jesucrist guiraali recos, dxejcti sudeedni guideb yälrnibee loj Xtadni Dios, te xtebtis Dios guinibee guira'tipac.

²⁹Palga rujntu xhigab di bejn guibañsac loj rebengut, čxhi gun rebejn nani robnis xcuent rebengut? Palga di bejn guibañsac lo rebengut, čxhicuent rutiobnisreni la'tu xcuent rebengut?

³⁰čXhicuentza rdxunnu lo casionduhx guira'ti or? ³¹Rniliäpac lojtu, rebetzä, caläpä xpala'ntu xcuent Jesucrist Xtadnu ni cayun xtzunni lojtu. Ni'cni guniä lojtu, guira dxej rguilireni narä te ju'treni narä. ³²Palga benä xhigab si'c te niguii guedxliuj che bacuanää reniguii ni najc si'c man nialajz lo guedx Éfeso, čxhi gaan benä? Palga di bejn guibañsac loj rebengut, do'o jien si'c ni caj lo guijtz: “Do'o guidau, do'o guidun, sa'csi guixee empac sejtnu.”

³³Na'c gusaantu gusgueereni la'tu, palga sachaaglu lo benguijdx näjza luj sajclu benguijdx. ³⁴Basanič xcäriejñlu si'cni nanab gunlu. Bascuääz dojl ni rujñlu sa'csi yu' balti bejn ni dipac gumbee Dios. Te guitujytu ni'c rniä diidxre lojtu.

Xho guibañsac rebengut

³⁵Naj yu' reni rniabdiidx: “čXho rbañsac bejn loj rebengut? čXhoza gac tiejxhrenei?” ³⁶iChip nayäällu! Che rbe'clu te binij, di gäjł guiliejñ palga di xhobga guet, nalajznu, palga dini

guedchduu. ³⁷Luxh che rbe'clu, dilu cue'c gäjlgä si'cni rläjzlu gacni, alga rbe'clu xhob o triuu o ste'ca binij, ³⁸niluxh Dios rujn rliejnni, rustioobni gäjlgä, lo tejga gäjlgä rudeedni xpalajni o tiejxhni, si'ctis ni rläjzni. ³⁹Xhet guiraadi retiejxhrene najc tebloj. Yu' bääł xten bejn, yu'za bääł xten reguidxaa, yu'za bääł xten reman xhaguibaa, yu'za bääł xten rebäjlgä. ⁴⁰Sigajcza yu' tiejxh rebajlgä xhaguibaa, tiejxh rexten guedxliujre. Niluxh yälrdimbicha' xten rebajlgä xhaguibaa najc tej, dxejc yälrdimbicha' guedxliuj najc ste'ca. ⁴¹Bicha' xte gubijdx najc garen lo xten bäii, sigajcza xpicha' rebal xhaguibaa najc garen-garenza lo sa'reni. ⁴²Sigajcza yälrbansac loj rebengut; che guet bejn rga'tz tiejxhni luxh rujdxni, rnitlojni. Luxh che guibansacni loj rebengut, garenca gac tiejxhni, diruni gudx, anabajnni par tejpas. ⁴³Che rga'tzni, rujn bejn xhigab xhetru gacnäjdä tiejxhga, niluxh che guibansacni, lacti sacru, lacti sajcz tiejxhga. Che rga'tzni, xhetru sajcdi gunni, luxh che guibansacni, anadipduxhni. ⁴⁴Che rga'tz tiejxhnu, najcni xten guedxliujre, luxh che chäsni najcni te tiexhcoob ni runiidx Dios. Ni'cni yu' te tiejxhni ni siääd lo guedxliuj, yu'za te tiejxhni ni siääd xhaguibaa.

⁴⁵Si'cza caj lo xtidx Dios: "Nigui galooga ni laa Adán, bejn Dios gujcnä te bejn nabajngä." Niluxh Adán ni biääd lult, Jesucrist najc Sprit ni runiidx yäl'nabancöob loonu. ⁴⁶Ganid najc yäl'nabajngä xten guedxliujre, dxejctiru yu' te yäl'nabancöob xhaguibaali. ⁴⁷Sigajcza niguii galooga najc bejn guedxliujre, niluxh ni rojp niguii ni biääd najc bejn xhaguibaali. ⁴⁸Benchee Dios Adán con yuj, najcni bejn guedxliuj. Xhaguibaali

biääd Jesucrist, najcni bejn xhaguibaa.

⁴⁹Sigajcni najcnu si'c bejn guedxliujre, sigajcza sajcznu sigajcz najc bejn ni yu' xhaguibaa.

⁵⁰Naj guiniä rediidxre lojtu betzä, di gac ted tiejxhnu ni najc bääł näjza rejn xhaguibaa cadro yu' Dios. Tiejxhnure nani sinitloj di gacdiza xca'ni stee tiejxh ni najc par tejpas. ⁵¹iColhuui! Rläzäza gacbeetu te didx-xhiga'tz; xhet guiraadinu guet, niluxh sidxaa guiraa retiejxhnu ⁵²tera't bälzule', si'c cheni rdinya' guzii, che jieł lult trompe't, dxejc sibansac rebengut, säjsreäni guideb tiexhcoobreni ni najc par tejpas. Luxh näjza tiejxhnu sidxaa. ⁵³Sa'csi tiejxhnu ni najc xten guedxliuj nanab guidxaani te ga'pnu tiejxhnu ni najc xten xhaguibaa, sa'csi tiejxhnu ni najc xten guedxliuj rejtni, niluxh tiejxhnu ni najc xten xhaguibaa di gacdi guetni, najcni par tejpas. ⁵⁴Niluxh che tiejxhnu ni najc xten guedxliuj abidxaa te ga'pnu tiejxhnu ni najc xten xhaguibaa, näjza che tiejxhnu ni sajcz guet abidxaa te ga'pnu tiejxhnu ni di gacdi guet, ni najc par tejpas, dxejc sisiojb xtidx Dios ni caj scree: "Yälgujt agunitloj sa'csi bejn Jesucrist gaan lojni.

⁵⁵Yälgujt, ¿xho gac gunlu gaan naj, ä? Yälgujt, ¿Con xcäl'nayanlu naj, ä?"

⁵⁶Xcäl'nayan xten yälgujt najc dojl. Xcäl'rnibee dojl najc leii. ⁵⁷Niluxh rdeednu xquixtios lo Dios, nani runiidx te yäl'rnibee loonu te jiennu gaan lo yälgujt xcuent Dad Jesucrist.

⁵⁸Ni'cni rebetzä ni sanälazduxhä, colchanuutis, colsudzu'tz lo xtidx Dios, na'c guidxajgtu guntu xtzuunni, sa'csi anancheetu xhet xlia'di najc dzuun ni runiidx Dios riennu.

Meel ni guire' par rexpejn Dios

16 Xcuent meel nani guire' par rebejtznu, colyejnii sigajcni räpä gun reben rexquidoo Galacia. ²Casob dumingw, nalajznu ganid dxej xmaan, tejpgatu colcuää te meel yejc nani rujntu gaan nen te xmaan, colcucheeni, te na'c gutie'tu meel che jialä. ³Te che guidzunä, guxhalä meelga, näjza tiop-chon guijtz chanä chutis bejn ni cuetu chasa'nni guedx Jerusalén. ⁴Palga laaca cha'aza, sajczä chänäreni narä.

Xhigab ni bejn Pabl chääni bias

⁵Guidzunä lojtu che agudedä reguedx Macedonia, sa'csi sidedä nejzga galoo ni jialä ro'c. ⁶Dxejcti pet siannää la'tu, pet saclää, sidedä guiraa rebäi najl ro'c, te gacnäjtu narä che cha'a cadrotis cha'a. ⁷Sa'csi di rlazä jiahdhuiätu te ladejtzsi, rlazä jiannää la'tu xchejpac, palga gusaan Dad Jesucrist gunä si'c. ⁸Niluxh sia'nä guedx Éfeso, te ro'c tedä lanij ni rusnaj lajz bejn che biääd Sprit Dxan xten Dios. ⁹Sa'csi ro'c yu' xhidajl bejn nani rlazj guisieed xtidx Dios, niluxh ro'c yu'za xhidajl reni rdxe'ch löä.

¹⁰Palga guidzujn Timoteu lojtu, saru colhuiini, te na'c chuni yärsia' la_l ni yunäjni la'tu, sa'csi cayujnni xtzuum Dios sigajc runä narä. ¹¹Na'c gusaantu chu tej ni cuälazni, colcuedxii lajzni, dxejc colgusunejzni, te jiahdhuiini narä ree, sa'csi ree cabääznu laani con rebejtznu.

¹²Niluxh xcuent bejtznu Apolos, räpäza lojni niäädpacni lojtu con rebejtznu, niluxh di rlazjpacni niäädni naj. Per siäädcani dxejtis ni gac jiaädni.

Rextixtios lult ni ruxhalni

¹³Colsusin, colsudzu'tz lo yärlirilajz xten Dios, colyejn dzuun si'c niguii, colyajc benädan. ¹⁴Xhitis ni rujntu colyejnii con yärlinälajz.

¹⁵La'tu rebetzä, anajntu xcuent rexfamil Estéfanas, nani ganid huililajz xtidx Dios nez reguedx Acaya, najntu xho racnäduxhreni rebejtznu nani huililajz xtidx Dios ro'c. Naj rniabduxhä lojtu, ¹⁶colgusoob xtidx rebejnga, näjza xtidx guiraa rebejn ni racnäj rexpejn Dios, ni rujnza xtzuum Dios. ¹⁷Rbalazä bidzujn Estéfanas, näjza Fortunato, näjza Acaico, sa'csi laareni bejnreni par narä nani di niajcdi niujntu sa'csi rutitu. ¹⁸Gulecdxireni lazä näjza lajztu, ni'cni, icoljju sa' rebejnga!

¹⁹Reben xquidoo Dios nez reguedx Asia ruxhal xtxitios lojtu. Aquila näjza chäälni Priscila näjza rebejn ni re' rolizjreni ruxhalzarenii xtxitios lojtu. ²⁰Guiraa rebejtznu ruxhal xtxitios lojtu. Colguinii tejpgatu lo sa'tu: "Xchan, gacnäj Dios la'tu."

²¹Narä Pabl, ruxhalä xtxitios lojtu, lagajc narä benä reletrrre.

²²Palga yu' chu tejtü ni di chanälajz Dad Jesucrist, sunitlojni. iDad Jesucrist, guda!

²³Gacnäj xcäl_rulaslajz Jesucrist guiraa. ²⁴Yärlinälajz ni rapä xcuent Jesucrist suchunäjni la'tu. Sugacni si'c.

Stee Guijtz Ni Bacuaa Pabl Lo Guidoo Xten Guedx Corinto

Ni rojp guijtz ni bacuaa Pabl lo
guidoo xten guedx Corinto

1 Narä Pabl nacä apost xten
Jesucrist sa'csi si'c rlanj Dios
te gusule'ä xtiidxni. Narä näjza
Timoteu, ni najc bejtznu lo xtidx
Dios, rucuaanu guijsre lojtu
rexpejn xquidoo Dios ni yu' guedx
Corinto, näjza loj guiraa rexpejn
Dios ni rbäjz nez guiraa reguedx
Acaya. ²Rniabnu lo Dios ni najc
Xtadnu näjza lo Dad Jesucrist,
gacnäjreni la'tu, guscuedxireni
lajztu.

Trabajw ni gudejd Pabl

³Guiliä'pnu xpala'n Dios
Xtad Jesucrist, nani rulaslajz
nuurnu, nani rustoolajz nuunu.
⁴Che rdejdnu trabajw, rbecdxini
laaznu te rajcza rbecdxinu lajz
renani cadejd trabajw con lagajc
yälrbecdxilajz ni baniidx Dios loonu.
⁵Sigajc ni rdedduxhnu trabajwduxh
ni gudejd Jesucrist sa'csi rusule'nu
xtiidxni, sigajcza rbecdxiduxh
Jesucrist laaznu. ⁶Palga rdeednu
trabajw, najcni te gustolajz la'tu, te
laatu lo dojl. Palga ruscuedxni Dios
lajznu, si'c rujnni te cuedxilajztu

te guntu huant che tedtu lagajc
trabajw ni cadejdzanu. ⁷Rinudzu'tz
yälrunloj ni rajpnu xcuent la'tu,
sa'csi nadonnu palga rdejdtu lagajc
trabajw ni cadejdnun, suscuedxni
Dios lajztu sigajcni ruscuedxini
laaznu.

⁸Rebetzä, rlazä gacbeepactu lacti
trabajwduxh bideednu nez reguedx
Asia, tudxe'nsi dinu nien huant,
sa'csi gudedcaj trabajwga, acasislinu.
Trabajwduxhtejni, benä xhigab sujnni
gaan, sugu'tni nuurnu. ⁹Gulicanu,
alabiennu xhigab sejtpacnu. Niluxh
dee gusajcnu te bisieednu na'c
chaliilajznu lagajc nuurnu, alga
chaliilajznu Dios nani ruspañsac
rebengut. ¹⁰Sa'csi Dios baslaa nuure
lo yälgujtgä, luxh sinuutis guslaani
nuurnu lo yälgujt. Salilazduxhnu
Diosre suslaaruni nuurnu, ¹¹sa'csi
cayacnäjtu nuurnu, cabedx-canabtu
lo Dios xcuentnu. Dxejcti palga
xhidajl bejn cabedx-canab lo Dios
xcuentnu, xhidajlzareni sudeed
xquixtios lo Dios xcuentnu xcuent
xcälrulaslajz Dios ni baniidxni loonu.

Xhicuent di Pabl nij guedx Corinto

¹²Dee najc nani ruspa laaznu:
rbedxni xcäriejnnu, ni'c ruluii loonu

laaca nabaj_{nnu}, con yäl_nadolajz riennu si'cni rnibee Dios; xhet sa'csi rajpnu xcäl_nnaj_n reben_n guedxliujdi, alga sa'csi racnä_j Dios nuure.

Si'cpac nabaj_{nnu} lo guedxliujre, luxh maazru che yu'nu lojtu.

¹³Cacuaanu lojtu rediidx ni saj_c go_{ltu}, ni saj_c gacbeetu, luxh cabäzä sacbesa'ctu guiragajc rediidx ni gucuaä, ¹⁴lagajc si'cni agucbeetu mase gaii xtiidxnu, cabäzä guibaa lajztu xcuent nuurnu, sigajcni guibaa lajznu xcuent la'tu nen_n dxej ni jiiäd Dad Jesucrist.

¹⁵Ni'cni ganiddoo benä xhigab niädhuia la'tu te nibalajztu tio'p huält. ¹⁶Nalajznu, benä xhigab nidedä ro'c che sa'a reguedx Macedonia, dxejcti stehuält cheni guibi'ä Macedonia, niädhuisacä la'tu ro'c te niacnäjt_n narä te nia'a Judea. ¹⁷¿Xhaa dina niunsa'cä xhigab che benä xhigabre? ¿La rchalotu runä xhigabä si'c te ben_n guedxliuj nani runtiop lajzni, nani tejsi diidx rniini “sia'ä” nägajcza “dina cha'a”, ä? ¹⁸Dios guluii lojtu guliica rniä lojtu, dinu guinii tejsi diidx “sia'ä” nägajc “dina cha'a”. ¹⁹Xi'n Dios, Jesucrist nani bisule'nu lojtu narä näjza Silvan, näjza Timoteu dini guntio'p lajzni, dini guinii tejsi diidx “sunäni” näj “dina gunäni”, niluxh laani guiraa xtiidxni najc “sunäpacni”. ²⁰Si'cza guiraa rediidx ni bia'n Dios loonu xcuent Jesucrist najcreni “sunäpacni”; näjza xcuent laani najcreni “sugacni si'c” par nuurnu, te chä'p xpala'n Dios xcuent nuurnu. ²¹Dios cagusudzu'tzza nuure näjza la'tu lo xtidx Jesucrist, agulezani nuurnu te jiennu xtzuunni.

²²Abacuaazani xseenni loonu, ni'cni baniidxni Sprit D_{xan} xtenni te cuääz_{ni} nen_n lastoonu.

²³Rbedxä loj Dios gacbeeni xhi yu' lastoä, guliipacni te diruna gutalä xcäl_nnajtu, ni'c dina niälsacä guedx Corinto. ²⁴Di r_lajznu guinibeenu xho chalilajztu, alga r_lajznu gacnäänutu lo dzuun te guibaa lajztu; guliipac agusudzu'tztu lo xcäl_ririlajztu.

2 Niluxh lagajc xcuent xcäl_nnasa'cä benä xhigab dina jiidhuisacä la'tu che cayac-huin lazä. ²Sa'csi palga narä siädyenä gac-huin lajztu, ¿chuni'c gun guibaa lazä? La'tistu, nani benä gac-huin lajzni. ³Ni'cni lagajc xcuent ni'c bacuaä lojtu, te che jiiälä lojtu, di rebejn_n gunhuin lazä nani riäj_l guspaa lazä. Luxh nancheä palga narä guibaa lazä, nägajc la'tu sibaaza lajztu. ⁴Che bacuaä guijtzga lojtu, lacti xhigabduxh benä, binduxhä; xhet te gac-huindi lajztu, alga te gacbeetu yäl_nsanälazduxh ni sanälazä la'tu.

Yäl_rusiäj_l lajz ni yu' par nani bejn falt

⁵Palga yu' chu tej ni cayuj_n cayac-huin lazä, xhet xtebtis lazä cayunhuinni näjza lajztu cayunhuinni guxii diidx guiniä sa'csi di r_lazä guntu xhigabduxh. ⁶Alabasacsiduxh xhidaj_l bejn dade'ga, na'cru gusacsituni naj. ⁷Naj colsiäj_l lajztu xcuent xtoj_lni, col_cuecdxi lajzni didi gac-huinduxhtej lajzni. ⁸Ni'cni rniabä lojtu, col_chanälajz bejn_re si'c ni huinä_lajztuni galoo. ⁹Bacuaxgääza lojtu te gacbeä laa susoobtu xtidxä.

¹⁰Naj renani jiäjł lajztu xtojłni, nāj narä siäjł lazäni. Sigajcza narä, nani basiäjł lazä, palga yu' xhi basiäjł lazä, benäni xcuent xcälınasa'ctu, nez loj Jesucrist, ¹¹te di gun bendxab gaan nuure, sa'csi anajnnu xho najc latsiaj ni rujn bendxab.

Guyu' Pabl yärsia' che bidzujñni guedx Troas

¹²Che bidzunä guedx Troas, te gusule'ä xtidx Jesucrist, bejn Dad Jesucrist rutliidi badxoindi narä, ¹³niluxh guyuduxhä yärsia' sa'csi dina nidxälä Tito, bejtznu. Ni'cni basadidxgacäreni, sa'āti nez reguedx Macedonia.

Jesucrist rujn riennu gaan

¹⁴Xquixtios lo Dios nani con Jesucrist racnäj nuurnu te dipacnu gunijt, empac rujntisnu gaan, luxh con nuurnu guiraa nejz ruluilojñi xhi saru najc gumbeepac bejn xtidx Dios. ¹⁵Sa'csi najczanu si'c te guxh xten yalnejh xten Jesucrist lo Dios nez loj renani chalilajz xtidx Dios nājza nez loj rebejn nani canijt sa'csi naadireni chalilajzreni xtiidxni. ¹⁶Loj reni di chalilajz xtiidxni, najcnu si'c te guxh ni rugu't, loj renani rililajz xtiidxni, najcnu si'c guxh xten yalnejh ni rudeed yälınabañcoob. ¿Chu laa ni racbee sa' recosga? ¹⁷Sa'csi dinu gac si'c najc xhidajł bejn nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälaazpacnu Jesucrist luxh si'c ni gunibee Dios, si'c rusule'nu, rusule'nu diidx con xcälracnäj Jesucrist nez loj Dios ni cahuii xhini'c riennu.

Diidx nacoob ni basa'n Dios loonu

3 Che rniinu rediidxga, ðla rchalotu canisacnu didxsa'c lagajc xcuentnu, ä? Yu'reni ca' guijt ni rnii najcreni beñsa'c. ¿La rlajzzatu guiluiinu lojtu sa' guijtza, o guiniabnu guntu sa' guijtza xca'nu, ä? ²La'tu najc si'c xquijtznun ni rnii xho najcnu. Lastoopacnu acuajtu. Guiraa rebejn rajc rhuii xho huililajztu xtidx Dios sa'csi basule'nu xtiidxni lojtu. ³Huenliisi rluiiloj najctu si'c xquijt Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guij cuaj diidxga, Sprit Dxan xten Dios ni nabajn bacuaa rextidx Diosga, bacuaanireni lastootu.

⁴Nadoncheenu redee, ni'cni xcuent Crist dinu guidxejb nez loj Dios. ⁵Di gacdi jien xtebnu xhitis dzuun ni riennu, riennuni sa'csi laa Dios ni racnäj nuurnu. ⁶Laani runiidx yälınadaan loonu. Nuurnu najcnu mos xten xtidxcoobni ni bia'nni con nuurnu. Luxh didxcoobga dini gac si'c xleii toMoisés ni bacuaareni lo guij, sa'csi xleii biädñä dojl, dxejg gujtnu. Niluxh didxcoobga ni rusule'nu biädñä Sprit Dxan xten Diosni, luxh runiidxni yälınabañcoob loonu. ⁷Leii baluii yu' xtojł bejn, riäjł guetreni. Xhidajł seen guyu' che bacuaa Dios rediidxga lo guij. Luxh di niajcdi nuhuii rexpejn Israel loj Moisés, bidxejbreni sa'csi rdimbicha' lojni, luxh sanuu cayuii yälrdimbicha'ga. ⁸Palga si'c gujc che biädñä leii, aticaxh naj su'ru xcälrdimbicha' xleii Sprit Dxan

xten Dios, ni najc redidxcoob nani abasule'nu. ⁹Palga xleii toMoisés ni baluiloj yälguj̄t xcuent dojl̄ biädnä yälrdimbicha', aticaxh naj yu' xcälrdimbicha' xtidxcoob Dios ni rudzucaj dojl̄. ¹⁰Naj dirunu fii xcälrdimbicha' xleii toMoisés sa'csi xtidxcoob Dios rdimbicha'ru par tejpas. ¹¹Palga yälrdimbicha' nani biuii bianisesduxhni tera't, stee yälrdimbicha're ni najc par tejpas sidimbichasesduxhni.

¹²Luxh ni'c runiidx yälrbeedxi lajznu, dipacnu guidxejb che rusule'nu xtidxcoob Dios. ¹³Dinu gac si'c toMoisés, ni basäu tla' lajd lojni te di fii repxej̄n Israel cayuii yälrdimbicha' ni guyu' lojni. ¹⁴Niluxh bicäjy xcäriejnreni; lo dxej najli che riel̄ xleii toMoisés, najcni si'cni yu' xhi lajd rusäuu lastooreni, rudxojn gacbeereni, te di chalilajzreni, xtidx Jesucristtis rajc rudzucaj lajdga. ¹⁵Lo dxe najli che rolj̄reni xleii toMoisés, najcni si'cni ruscäjy te lajd xcäriejnreni. ¹⁶Lo xtidx Dios rnii scree: “Niluxh che gusiechlajz te bejn̄, gudzuréni nez loj Dad, sibicaj lajdga”, nalajznu sacbeeni xtidx Dios. ¹⁷Dad Jesucrist najc Sprit luxh cadro yu' Sprit xten Dios badzucaj Diosni lo xleii toMoisés. ¹⁸Niluxh nuure dinu gusäu lajd lojnu, didi guscäjyni xcäriejnnu. Nuure najcnu si'c te guihuajn cadro rdimbicha' xtuxh Dad Jesucrist, luxh chäi-chäi cadxaanu cayajcnu si'c najcni näjza caca'nu xcälrdimbicha' Jesucrist, sa'csi si'c cayujn Sprit Dxaan xtenni.

4 Ni'cni sa'csi agule Dios nuure te gusule'nu xtiidxni, sa'csi balaslajzzani nuure, dipacnu

jiäxhan. ²Ni'cni rbälaznu recos ni rajc xhiga'tz, sa'csi rusanxtujyreni. Dizanu gusguee, dizanu guchaa xtidx Dios, niluxh rniinuni si'cpacni najcni, te si'c ruhuii guiraa bejn̄ rsiaapacnu lo xnezyuj Dios. ³Niluxh palga yu' chu dipac gacbee rextidx Dios nani rusule'nu, najctisreni rebejn̄ nani ala canitloj par tejpas, ⁴sa'csi abascäjy bendxab ni rnibee guedxliujre xcäriejnreni, si'cni rujnni lo rebejn̄ nani di chalilajz xtidx Jesucrist, te na'c fiireni xcälrdimbicha' xtidx Dios ni rnii xcuent xhanij xten Jesucrist, ni najc xtujxh Dios. ⁵Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcuent Jesucrist. ⁶Che benchee Dios guedxliuj, guniini: “Lo xcäjy suguirii te bajl ni gusanij.” Lagajc Diosga abasanij lastoonu te baniidxni bajl ni najc yälriembee xcälrdimbicha' Dios nez loj Jesucrist.

Xho guiban̄nu con yälrlilajz

⁷Nuurnu najcnu si'c te guesyuj, xhet sajcdinu, niluxh guidxanu te yälnasacduxh, ni najc xtidx Dios xcuent Jesucrist, te guiluiloj xcäl'nasa'c xten xcälrnibee Dios lacuaa xhisi te yäl'nadipbäz xtenu. ⁸Rdeednu trabajw guira nejz, niluxh dinu gunijt yälrunloj. Mase di jien̄ xho jienu, dinu chu yärsia'. ⁹Rusacsíreni nuure, niluxh di Dios cuälaznu, rguijn̄reni nuure, dizareni ju't nuure. ¹⁰Cadrotis rionnu rusacsíreni nuure si'c basacsíreni Jesucrist, te si'c nen̄ tiejxhnu gululojzani yäl'nabansac

loj rebengut xten Jesucrist.

¹¹Cadrotis rionnu rlanjzeni ju'treni nuure sa'csi rusule'nu xtidx Jesucrist te si'cza neñ tiejxhnu guluilojzani xcäl'nabajñ Jesucrist loj reben guedxliujre. ¹²Ni'cni rujñ yälgujt dzuun loonu, per yäl'nabajñ cayujñ dzuun lojtu.

¹³Sa'csi rajpnu lagajc xsprit xten yäl'rilihajzga, sigajc ni caj lo xtidx Dios: "Huililazä ni'cni basule'ä diidx." Sigajcza nuure, huililaaznu xtidx Dios, ni'cni rusule'nuni. ¹⁴Sa'csi nadonnu lagajc nani baspansac Jesucrist loj rebengut, lagajcza laani gun guibansacnu con Jesucrist te gunni sunäjnu la'tu nez lojni. ¹⁵Rsiacnu guiraa ni rsiacnu te xcuentsi la'tu gudeedru bejn xquixtios lo Dios, te guiliä'pruzareni xpala'nni xcuent yäl'rulaslajz ni sanuutis care'ch lo xhidajl bejn.

¹⁶Ni'cni dinu gunijñ yäl'runloj, per mase tiejxhre acayujxh, guixe-guixee cagustioob Dios spritnu. ¹⁷Retrabajw ni cadeednu lo yäl'nabajñre rdedgajczeni, niluxh rujnreni ga'pnu te yäl'rdimbichaduxh ni gajdnu guidon, ni najc par tejpas. ¹⁸Dinu fiitis renani ruzen lo guedxliujre sa'csi sinitloj reni'c, alga cayenloonu renani di guzen, sa'csi renani di guzen najczeni par tejpas.

5 Arabeenu tiejxhnu najc si'c te yu' xten xaimnu lo guedxliujre, sidzujñ dxej sinitlojni, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas. ²Guliicani, lañi dxunnu neñ tiejxhre, rbedxneñnu rdeednu

trabajw, ni'cni rlanjnu maläii agojl guidxaa tiejxh guedxliujre te xca'nu te tiejxhcoob ni siääd xhaguibaa. ³Te si'c che acua'nuni, diruni gac si'cni suxhabääl xaimnu, sa'csi abicoob tiejxhnu. ⁴Lañi dxunnu neñ tiejxhre rbedxneñnu, rdeednu trabajw, sa'csi di rlaaznu suxhabääl xaimnu, rlanjnu gacwnu tiejxhcoobnu, te tiejxhre nani cayejt, sidebnäjni tiejxhcoob ni siääd xhaguibaa. ⁵Nani benchee nuure parpac dee najc Dios, lagajc nani runiidx Sprit Dxan xtenni loonu si'c te seen sujnpacnini.

⁶Ni'cni dinu guidxeeb, sa'csi nadonnu lañi nabajñnu lo guedxliujre, di gacdi guibajñnu xhaguibaa loj Dadga. ⁷Sa'csi nabajñnu xcuent nani rililajznu, xhet xcuentdi nani rajc rhuuini. ⁸Ni'cni rniä nabajñnu dinu guidxeeb, rchaloonu hueenru guisa'nnu tiejxhnu lo guedxliujnure, te choläznäanu Jesucrist xhaguibaa. ⁹Ni'cni tejtis najc xhigabnu, palga lo guedxliujre o xhaguibaa, rlanjztisnu jiennu renani gun guibaa lajzni. ¹⁰Sa'csi guiraanu riäjñ suunu nez loj yagxhiil cadro gun Jesucrist yäl'guxhtis, te tejganu guica'nu xcuent nani biennu lo guedxliuj, palga dzunsa'cni, o palga dzunguijdxni.

Diidx xcuent yäl'rbecdxi lajzni

¹¹Luxh sa'csi rdxejbnu (nalajznu rucudiaaagnu xtidx) Dad Jesucrist, ruliidxnu rebejn te chalilajzreni xtiidxni. Luxh Dios najñ xho nabajñnu; maläii näjza lo xcäriejntu gululoj xho nabajñnu. ¹²Dinu guiliä'p lagajc xpala'nnu lojtu

stehuält, rniinu rediidxga lojtu te guibalajztu xcuentnu, te ga'ptu xhi diidx gusejctu lo rebejn ni rchagljaztis ruhuu xho rien bejn, direni gacbee xhi yu' neñ lastooreni. ¹³Palga najcnu si'c bejn ni rajc yejcreni, si'c najcnu par Dios, palga najcnu si'c bejn ni nasa'c xcäriejnnu, najcnuni par la'tu. ¹⁴Sa'csi sanälazduxh Jesucrist nuure, ni'c rusoobtisnu xtiidxni, sa'csi nancheenu gujt tejtis par guiraanu, ni'c najcni si'cni agujt guiraanu nez loj Dios. ¹⁵Luxh Jesucrist gujt xcuent guiraa rebejn, te renani rililajz xtiidxni, na'cru guibajñreni xcuenttis laareni, alga guibajñpacreni xcuenttis Jesucrist nani gujt, nani gubansac xcuent laareni. ¹⁶Ni'cni nuure dinu fii lo bejn si'cni najcreni lo guedxliujre. Galoo biembeenu Jesucrist si'cni gujcní che gubajñni lo guedxliuj, niluxh naj et si'cti riembeenuni. ¹⁷Ni'cni chutis bejn, palga rililajzni xtidx Jesucrist, sujnnini te beñcoob, diruni guichagljaz gunruni nani rajc lo guedxliuj, alga guichagljazni gunni xtzun Dios.

¹⁸Guiraa dee siäd lo Dios, nani basiäjñ lajzni xcuent Jesucrist, dxejcti baniidxni loonu rediidx xcuent xcälrusiäjñ lajzni te gusule'nu rediidxga, ¹⁹nalajznu, nanab gusule'nu diidxre: Dios guyunäj Jesucrist, cagusiäjñ lajzni con reben guedxliuj, te xca'nireni, sa'csi diruni gudzuub xtojñ reni ahuililajz xtiidxni lo xcuentreni. Dxejg gule Dios nuure te gusule'nu rediidxpacre lo rebejn. ²⁰Ni'cni sio'pnu te guiniinu xtidx Jesucrist, najcni ascanu lagajc Dios

canabduxh lojtu che rniabduxhnu lojtu, colgusiäjñ lajztu, colyajc tejsi con Dios. ²¹Di Jesucrist niujn nicla tej dojl, niluxh sa'csi sanälajz Dios nuunu, xcuentnu bejn Dios gujc Jesucrist si'c te beñdojl che gule'cni guiraa rextojñ guedxliuj yejc Jesucrist che cuajni lo crujz. Si'c gujcní te sajc ga'pnu xcälñaya, xcälñasa'c Dios xcuent Jesucrist.

6 Ni'cni rniabnu lojtu, jia'cnu tejsi lo xtzun Dios, na'c cuälaztu xcälracnäj Dios; palga guntu si'c, xlia'si cua'tuni. ²Sa'csi loj xtidx Dios caj scree:

Dxej nani riäjñ gunäni,
bacuadiagä xtiidxtu,
dxej che gubicaj xtojñtu gucnäã
la'tu.

iColjiejn! Naj najc te tiempsa'c,
coljiejnza, naj najc dxej ni
guibicaj xtojñtu.

³Na'c jiennu nicla tej ni gun guidxe'ch lajz bejn, didi guiniireni xhet laadi najc xcälrusule'nu.

⁴Niluxh lo guira'ti dzuun ni riennu, guluilojnu lo rebejn najcnu xmos Dios; gacnu nadolajz; jiennu huant che rusacsireni nuure; che rdejndu trabajw; che di jien xho jiennu; ⁵che rguijnreni nuure; che rusäureni nuure neñ latzguuib; che rdejndu lo bieiduxh; che rdajl xtzuunnu; che re'ch bacal yääl; che rucua'nnu; ⁶guluilojza najcnu xmos Dios xcuent xcälñabansa'cnu lo Dios; näjza xcälñansa'c xtidx Diosnu; näjza yälrajc nadolajz; sa'csi laaca riennu lo sa'nu; näjza sa'csi rbäjz Sprit Dxan xten Dios neñ lastoonu; näjza xcuent yälñinalajzpac bejn; ⁷näjza xcuent didxguliipac; näjza lo

xcäl̄rnibeduxh Dios; ca'zanu si'c te madxed xcäl̄naya Dios, ca'nuni guropnaanu, ladbee, näjza ladbäjgw.

⁸Ruluilojzanu najcnu xmos Dios palga chä'p xpala'nnu, o palgaza jianxtujynu; palga guiniireni didxsa'c xcuentnu, o palgaza guiniyajreni nuunu; palga naareni najcnu benrusguee, mase najcnu bejn̄ ni rnii didxlii. ⁹Palga rut rlajzdi gumbee nuunu, o palga guira'ti bejn̄ numbee nuunu; acayejtnu, niluxh bahuii, anu anabajn̄; rusaan Dios rguijn̄reni nuure, niluxh dinu guet; ¹⁰najcnu si'c bejn̄ ni yu' xliajs, niluxh rbalaznu; najcnu si'c bejn̄ ni xhet rajpdi, luxh riennu gapduxh bejn̄; najcnu si'c bejn̄ ni xhet rajpdi, niluxh rajpnu guiraloj.

¹¹Lojtu, bejn̄ Corinto, aguniliinu lojtu guiragajc rediidx ni yu' nen̄ lastoonu. ¹²Xhetliidi diidxd̄i bacua'tznu lojtu, niluxh pet cacuat̄z lajztu diidx ni nanab guiniitu loonu. ¹³Naj narä rulidxä la'tu si'c rulijdx te Dad rexi'n̄ni: iCol̄guinii loonu rediidx ni yu' nen̄ lastootu!

Najcnu si'c xquidoo Dios ni nabajn̄

¹⁴Na'c guchaagtu lo rebejn̄ nani di chalilajz xtidx Dios, sa'csi di gacdi gunteblojtu dzuun sa'csi tejni rlajz gun dzunsa'c, steeni rlajz gunni dzunguijdx, êxho gac sanäj bajl xcäȳj, ä? ¹⁵O êxho gac sanäj Jesucrist bendxab ni laa Satanás, ä? O êxho gac sanäj te bejn̄ nani rililajz xtidx Dios te bejn̄ ni di chalilajz xtidx Dios, ä? ¹⁶Êxhixh tebloj najc xquidoo Dios con rebanäj̄b, ä? Ni nuunu najcnu xquidoo Dios ni nabajn̄, lagajc si'cni gunii Dios galoo:

Cuäzä nen̄ lastooreni, sisanääz̄areni.

Narä sacä Xtiosreni, laareni sajcreni rexp̄enä.

¹⁷Ni'cni col̄rii galäiireni, col̄guibicaj lojreni, te laad col̄cuääz, si'c naj Dios:

Te gac xca'ätu, na'c fal̄tu recosdxuudx.

¹⁸Dxejc la'tu sajctu rexinganä, rexindxa'pä, luxh narä gacä xtadtu, si'c naj Gueb Dios ni rajp guiralii yäl̄rnibee.

7 Ni'cni, la'tu ni sanälazä, sa'csi abia'n Dios diidxre loonu, do'o guisia xcäriejn̄nu, lastoonu näjza tiejxhnu, do'o cuäcay guiraa rexhigabguijdx, guiraa redojl̄, te gac sanu lo rexnezyudxan Dios con xcäl̄rdxejb Dios.

Xho basiejch lajz reben̄ Corinto

²iCol̄chanälajz nuunu nen̄ lastootu! Xhet latsiajdi biennu lojtu. Rut baxhīndinu. Rutza basgueddinu.

³Dina guiniä rediidxre te cue'cä xquejtu; ni aguniä lojtu galooli, la'tu yu'tu nen̄ lastoonu palga tejsi guetnu, o palga tejsi guibajr̄runu.

⁴La'tu nadip lazä, rniduxhä didxsa'c xcuenttu lo bejn̄, rbedxi lastoä, rbalazduxhä loj guiraa retrabajw ni cadeednu.

⁵Ni'cni che guyu'nu reguedx Macedonia, di niajcdi nusilajznu sa'csi guiralaj̄t cadejdnu trabajw, xcuent yäl̄rdijl̄ ni guyu' guideb gabinu, xcuentza yäl̄rdxejb ni guyu' lastoonu. ⁶Niluxh Dios ni racnäy rebejn̄ ni rac-huin lajzreni, gucnäj nuure, sa'csi che bidzuj̄n Tito guredxi lastoä. ⁷Luxh xhet

sa'csi bidzujntis Tito, näjza sa'csi gulecdxitu lastoo Tito, näjza sa'csi biädnäni diidx xho yu'tu, xho rlanjtu fiitu narä, xho yu' xliajs lastootu xcuent xtojltu, xho rlazduxhtu guntu si'cni guniä lojtu, ni'cni bibalasdughäru.

⁸Acananä guc-huin lajztu che biłtu guijtz ni bacuaä lojtu, niluxh di lazä niac-huin mase che baxhaläni guc-huin lazä, sa'csi naj nanä mase bejn guijtzga guc-huin lajztu, xhet xchejdi guc-huin lajztu. ⁹Niluxh naj rbalazä, et sa'csi guc-huindi lajztu, alga sa'csi guc-huin lajztu te basiejch lajztu xcuent xtojltu, sa'csi guc-huin lajztu si'cni rlanj Dios, te di yu' xhi gunijttu xcuent nuunu.

¹⁰Sa'csi yälrac-huin ni ruxhal Dios loonu rujn rusiejch lajznu, te ruslaa Dios nuurnu lo dojl ni'cni rbaalazä che bejnni si'c. Niluxh yälrac-huin xten guedxliuj dini gun gusiejch lajz rebejn rextojlreni, alga rujnni nitloj bejn tejpas. ¹¹La'tu bejntu huant xliajs ni baxhal Dios si'cni rchaglaz Dios gac. Naj icolhuui gan! iLacti xhi cossa'c bejnni par la'tu! Bejnni bahuisa'cpactu xhini'c gujc, te gac gusulegajctu xcuentni; dxejc bejnni bidxe'chtu, näjza bejnni bidxejbtu, ni'cni basaantu dojlga, dxejcti bejnni rlanjzfactu nuhuuitu loä, bejnzani guyu'tu yärsia' xcuentä, bejnzani rlanjztu guntu yälguhxtis bejn nani bejn dojlga. Guiraa redee balulioj et la'ditu bejn dojl. ¹²Ni'cni, che bacuaä guijtzga, dina nucuaäni loj bejn ni bejn dojlga, niluxh bacuaä guijtzga lojtu te guilulioj xcälrsia'tu ni rajptu xcuent narä nez loj Dios. ¹³Ni'cni aguredxi xcärienä.

Naj aguredxi xcärienä, bibalazduxhäru xcuent xcälrbalajz Tito, sa'csi bicoob, bisilajz xpritni xcuent guiraa. ¹⁴Sa'csi palga yu' xhi didxsa'c ni räpä lojni xcuenttu, ditu nusanxtujy narä nez lojni. Niluxh sigajcni guniinu ganax didxgulii, sigajcza najc guiraa redidxsa'c xcuenttu ni guniä loj Tito, guliipacni. ¹⁵Ni'cni maazru sanälajzni la'tu, che rnaj lajzni xho basoohtu diidx, xho bejntu cua'tuni che bidzujnnu, racejslitu cadxejbtu. ¹⁶Naj rbaalazä sa'csi loj guira'ti la'tu nadip lazä.

Saru rudeedreni meel

8 Naj bejtznu, rlanjznu guiniinu lojtu xho badeed Dios xcälrulaslazjni lo reben Macedonia ni huililajz xtidx Dios. ²Mase gudedduxhreni trabajw, bibalajzreni, mase xhetliidi gojpreni, badeedreni meel si'c te bejn ni rajp. ³Narä caniliä lojtu, badeedreni xmeelreni si'cni gojpreni, luxh badeedruren i loj ni naa bejn sajc gudeedreni. ⁴Gunabduxhzaren i loonu guisaannu gudeedreni xmeelreni te gacnäjreni rexpenn Dios. ⁵Niluxh direni niujn si'cni biennu xhigab gunreni. Ganiddoo badeedreni lagajc laaren i loj Dad Jesucrist, näjza loonu si'cni rnibee Dios gac. ⁶Sa'csi batie' rexpenn Macedonia meel, ni'c naj räpä loj Tito chanuupacni gutie'ni meel lojtu si'cni gunii Tito lojtu galoo. ⁷Rujntu xhidajl dzunsa'c. Rililazsa'ctu xtidx Dios; rnisa'ctu xtidx Dios; rajptu yälnajn; rchaglazzfactu guntu dzuun; rinälajztu nuunu, ni'cni na'c gusaantu tedcaj gunzatu dzunsa'cre, nalajznu, gudeedtu meel.

⁸Dina guiniä lojtu colyujnpacni; narä rlazätis gacbeetu xho rbaalajz reni rudeed meel te guluiloj don la gullii sanälajzpaczatu rexpejn Dios. ⁹Sa'csi la'tu anumbecheetu rulaslajz Dad Jesucrist, te mase najcni ri'cw, rajpni guiraa xhixten Dios, xcuentu gujcnii si'c te bejn ni xhet rajpdi, te xcuentni ga'ptu guiraa rexhixten Dios xhaguibaa.

¹⁰Narä siniä lojtu xhi xhigab runä, par lagajc xcäl'nasa'ctu. Gudebijzli ganiid la'tu guslojtu bejntu dzunsa'cre, luxh rbaali lajztu rrajzfactu guntuni. ¹¹Naj colchanuu, colguluux dzuunga si'cni guslojtu cayujntuni. Naj te luux dzuunga colgudeed si'cni rajptu. ¹²Sa'csi palga rrajzduxh te bejn gudeed lo Dios, laaca najc gudeedni si'ctis ni rajppacni. Di Dios guiniab gudeed bejn nani dini ga'p. ¹³Dina guiniä gudeedtejtü te tedtu trabajw te gapduxh stee bejn, alga te gacteblojtistu. ¹⁴Nani rajprulu naj ni'c colgudeed te gusalojtu ni cayäädxreni, te stee dxej nani rajpreni laareni sajc suniidxzareni te gusalojreni nani cayäädxtu te si'c gacni tebloj. ¹⁵Sa'csi lo xtidx Dios caj scree: "Te bejn nani batopduxh yäl'nasa'c, xhet bia'ndiru, dxejcti nani guxii batojp yäl'nasa'c, xhet biäädxdi."

Tito näjza rexcompaneierni

¹⁶Xquixtios lo Dios nani rudeed lo Tito lagajc yärsia' ni rapä narä par la'tu. ¹⁷Sa'csi cuäjbnii gunni nani gunabä lojni gunni. Luxh sa'csi rlazduxhpacni gunni xtzuun Dios, naj lagajc laani bejnii xhigab jädhuiini lojtu te luux dzuunre.

¹⁸Caguxhalnu xtee bejtznu chanä Tito. Guiraa rebejn guidoo rnii didxsa'c hueen xcuent bejnre sa'csi laaca rusule'ni xtidx Dios. ¹⁹Ni'ctis aguleza reben guidooni te chunäjni narä te gacnäjni narä lo xtzuun Dios nani cayennu te guiliä'pni xpala'n Gueb Dad Jesucrist, te guluilojza lacti rrajzpacni jiennu xtzuunni. ²⁰Ni'cni rlazä jiapdaduxhnu te di chu tej ni guiniyaju nuure xcuent melrore ni chosa'nnu lo rexpejn Dios. ²¹Sa'csi narä riuduxhä runä nani najc laaca, et ganax nez lojdi Jesucrist, näjza loj rebejn.

²²Con guiro'p redee, caguxhalzanu stee bejtznu, nani agujc balti huält bihuiinu xho rujnni, te bahuiipacnu rrajzpacni gunsä'cni xhidajl dzuun, luxh naj rrajzruni gunsä'cni redzuunga sa'csi nadip lajzni la'tu. ²³Palga yu' chu guiniabdiidx xcuent Tito, coljejtz lojni laani najc nani cayunnäj narä dzuun lojtu. Dxejcti xcuent stio'p bejtznu, laareni najcreni xquixhajg reguidoo, rliä'pzareni xpala'n Jesucrist. ²⁴Ni'c na'c guidxejbtu che yu'tu lo rebejn reguidoo guluiipactu loj rebejnğa xho sanälajztu, näjza redzuun ni rujntu ni'c rniinu ganax didxsa'c xcuenttu.

Meel par rebejtznu

9 Ni'cni dina gucuäaru lojtu xcuent dzuunre, nalajznu, yälracnäj rexpejn Dios, ²sa'csi anancheä rrajzfactu guntuni, luxh xcuentpac ni'c agulä'pä xpala'ntu loj reben Macedonia, räpä lojreni la'tu, reben Acaya, gudebijzli batie'tu meel, luxh sa'csi bejntu

si'c, xhidajlza reben Macedonia biniib te badeedzareni meel. ³Ni'cni abaxhalä rebejtznu lojtu, te di xlia'si gulä'pä xpala'ntu xcuent dzuunre, te acabäzlitu gudeedtu xmeeltu, sigajc ni agunixgää lojtu. ⁴Didi che jiadnäá reben Macedonia jiophuuiu la'tu, xhet rajpditu, dxejc jianxtuyä narä, näjza la'tu. ⁵Ni'cni benä xhigab, nanabpac jiadxgaa rebejtznu, jiadhuiireni la'tu, te fiireni don xho gac xcuent meelro ni galooli bia'n diidx gudeedtu, te abatiexgaatu nani gusalajztu sa'csi rlajzpacktu gudeedtuni, xhet sa'csi rniinu riäjlpac gudeedtuni.

⁶Rniliä lojtu, nani guxii rbe'c, guxiiza yälNASA'c guiliäsni, niluxh nani rbe'c xhidajl binij, xhidajlza yälNASA'c guiliäsni. ⁷Tejgatu colhuui don lacti sajc gudeedni, dxejc si'c sugudeedni si'cti ni rlajzni, na'c gun tiopdi lajzni, etza sa'csi riäjlpac gudeednini, sa'csi Dios sanälajz bejn ni rbaali lajzni rudeedni meel lojni. ⁸Luxh Dios sajc guniidxru xcälracnäjni lojlu, te si'c guixee guixee sajplu xhidajl guiraloj rehxixtenlu, te ga'plu xhitis ni rquuinlu loj guira'ti xtzunsa'clu.

⁹Sa'csi lo xtidx Dios caj scree:
Abadeduxhni loj reben ni xhet rajpdi luxh
redzunsa'c ni rujnni, najcreni par tejpas.

¹⁰Dios nani rudeed binij ni rbe'c nani rujn dzuun loniaa, laani suniidxzani yätxtiil te guidaunu, lagajc Diosga suniidx, sutajlza binij cue'ctu, lagajc laani sustioobnini te gacduxh yälNASA'c xten xtzunsa'ctu. ¹¹Te si'c ga'ptu lacti yälNASA'c te gac gudeedzatu

xhiroob. Luxh xcuent xtzuunnu, meel ni ruxhaltu loj rexpejn Dios sujn gudedduxhrene xquixtios lo Dios. ¹²Sa'csi che racnäjtu rebejtznu, dinu guideed ganaxtis ni rquuinrene, rujnzanu rudeedruene xquixtios lo Dios. ¹³Che racnäjtu sa'tu si'c, ruluilojtu lacti rusoohtu xtidx Dios si'cni ahuililajztuni, ni'cni siliä'preni xpala'n Dios xcuent xcälracnäjtu, nalajznu xcuent meel ni badeedtu lojrene, näjza loj guiraareni. ¹⁴Dxejcti laareni sibedx-siniabzareni lo Dios xcuenttu, sinälazduxhrene la'tu sa'csi runidxduxh Dios xcälracnäjni lojtu. ¹⁵iXquixtiosi Dios sa'csi baniidxni yälNASA'cduxhjtej loonu!

Yälrnibee ni rajp Pabl sa'csi najcni apost

10 Lagajc narä, Pabl, rniabduxhä lojtu, con guiraa didxdoo, guiraa didxsa'c xten Crist, (narä ni nac beñnadolajz che biälä lojtu, niluxh che suga'a zijt lojtu, dxejc nacä beññialajz). ²Narä canabä lojtu, colguibañsa'c te che jiadhuiä lojtu, dina gacä nialajz dizana guiniä redidxnaj ni abenä xhigab guiniä loj gaii bejn nani rnii nabañä si'c te benguedxliuj. ³Gullicani najcnu benguedxliuj, niluxh dinu gucuanäj sa'nu guuib nani rca' beñ guedxliuj che rcuaareni. ⁴Sa'csi reguuib ni rca'nu te guidiläsa'nu direni gac sa' guuib ni rca' beñ guedxliuj. Nuunu rucuaanu con xcälrnibee Dios te riennu gaan loj guiraa rexcälrnibee guedxliujre. ⁵Ni'cni cagutzujlñu guiraa rehxigabguijdxrene, näjza nani rchaloreni najc xhigabro nani

rlajzreni guiniyajreni yälrumbee Dios, luxh caca'nu guiralii rexhigabnu cagutednureni ladzṇaa Jesucrist te gusoobnu rextidx Jesucrist. ⁶Cabääztisnu te gunnu yälguختis loj chutis bejn ni dini gusoob xtidx Dios, che abasoob guiragajctu xtidx Dios.

⁷La'tu cahuiitu redzuun ni rien. Palga yu' chu tejtu ni rchaloni najcni xpejn Crist, sugunsa'cni xhigab, fiini xho najc lastooni, dxejcti sugacbeepacni sigajcni ahuililajzni xtidx Jesucrist, sigajcza nuure ahuililajzzanuni. ⁸Sa'csi mase guiliä'pärü xpala'nä xcuent yälrnibee ni rapä, ni baniidx Dios te gustiobä xcälrlililajztu, et te guxhiädi la'tu, niela si'c dina guituiä. ⁹Dina rlazä guchalotu rlazä guchebä la'tu con rexquitzä. ¹⁰Sa'csi rniireni: "Lo rexquijztzni caj didxnagajn, didxnialajz, niluxh che suga'ni laapacni, xheti xcäl'siudzu'tzni, luxh xho rniaj diidx ni rniini." ¹¹Luxh ni rii si'c, sugacbeepacni dee: si'cni najcnu con rextiidxnu che rucuaanu lojtu che yu'nu zijt, sigajcza najcnu che suganäjpacnu la'tu.

¹²Dinu gun xhigab najcnu tebloj loj rebejn ni runnaro lagajc laareni. Niluxh reni'c rchaloreni si'c sa'csi ruhuiireni xho najcreni cuä' stee lagajc sa'reni. Che rujnreni si'c, nayääl xcäriejnreni. ¹³Nuure dinu gunnarotej lagajc nuurnu, niluxh riennu si'cni nungäj] jiennu, xcuent yälrnibee ni baniidx Dios loonu te jiennu dzuun cadro yu'litu. ¹⁴Ni'cni dinu nidedcaj xcälrnibeenu che bio'pnu lojtu, sa'csi baniidx Dios yälrnibee loonu ganiddoo nuunu

gusule'nu xtidx Jesucrist lojtu.

¹⁵Dinu niennaro lagajc nuurnu xcuent xtzuum ste'ca bejn, ascanu lagajc nuunu biennuni. Cabääznu tioobru xcälrlililajztu, te gac jienrunu dzuun lojtu, si'ctis gal jiennuni. ¹⁶Te gacza gusule'nu xtidx Jesucrist ste'ca lajt ni ria'n zijtru lo guejdx cadro yu'tu, na'cza gunnaronu lagajc nuunu xcuent dzuun ni bejn ste'ca bejn.

¹⁷Sa'csi nani rlajz gacnaro, suguiliä'pni xpala'n Dad Jesucrist. ¹⁸Sa'csi et nani rliä'p lagajc xpala'ndini ni ria'n hueen nez loj Dios, niluxh bejn ni rliä'p Jesucrist xpala'nni, ni'cni rbalaznäj Dios.

Pabl näjza rebejn ni rniisi najcreni apost

11 Maläii chanunäsijctu narä la] ni guiniä gaii didxnayäle', niluxh asanunäjtu narä. ²Randzu'ä la'tu con yälrandzu' ni baniidx Dios, sa'csi abia'n diidx gutedä la'tu ladzṇaa Jesucrist te xca'ni la'tu. Rlazä gactu bennaya chäätu lojni, si'c te dxa'p che ruchṇaani te bi'n, rut bahua]dini. ³Niluxh rdxebä didi gusguee bendxab la'tu si'c ni basguee bäl Eva con xcäl'nadxällajzni. Didi gunni guichaa xhigabtu, guibicajtu lo xtidx Jesucrist luxh ṇaj laaca rajnpactu Jesucrist, guideb lastootu. ⁴Sa'csi la'tu cagutipduxh lajztu che riädni ste'ca bejn lojtu xtidx stee Jesús nani digac nani bisule'nu lojtu; o che naareni xca'tu stee sprit ni digac nani acua'tu; o che naareni chalilajztu ste'ca diidx nani najc garenca lo xtidx Dios ni ahuililajztu. ⁵Narä runä xhigab dina gacä bejn ni guxiiru sajc loj guiraa reapost.

⁶Mase di gacdi guinisa'cä, xhet yälñajndiza cayädxä; niluxh ni'c huenliisi rluiloj guiraa rediidx ni abaluaä lojtu, guiraa redzuun ni abenä ro'c.

⁷O ðla benä te dojl guyu'ä lojtu si'c te beñ nadolajz, te gactu beñroru, sa'csi xhetliidi cua'ädi xcuent ni basule'ä xtidx Dios lojtu? ⁸Cua'ä meel ni baniidx garenca guidoo loä che guyu'ä lojtu, te benä xtzun Dios lojtu. ⁹Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzuuntu. Sa'csi che biääd rebejtznu ni siääd Macedonia, baniidxreni guiraa ni biquinä. Loj guiraa redee dina nutalä xtzuuntu, luxh si'c sinuu gunä. ¹⁰Guideb didxlii xten Jesucrist ni yu' nen lastoä, rniliaä rut sajedi gudzucaj xcuent xho yuä lojtu, ni'cni care'ch didxroga lo guiraa reguedx Acaya. ¹¹ðXhicuent rniä si'c? ðLaa sa'csi dina chanälazä la'tu, ä? iXho gacni si'c! iDios anajn lacti sanälazä la'tu! ¹²Niluxh nani rungacä, lagajc ni'c sinuu gunä, te gudxonä renani rlajz gacnaro, renani rlajz naa rebejn najczeni si'cpac najcnu, niluxh direni gac. ¹³Direni gac apost, laareni rusgueereni, rujnsireni si'c ni najczeni apost xten Jesucrist, luxh rut najcdireni. ¹⁴Luxh xho dini gac si'c, ni lagajc bendxab ni laa Satanäs ruluiloj si'c te xangl Dios ni rdimbicha' te rusgueeni bejn. ¹⁵Ni'cni na'c guidxelojtu palga näjza rexmos bendxab riääd, rujnsireni si'c bejn ni rujn dzunsa'c, niluxh sinitlojreni par tejpas xcuent ni rujnreni.

Rdejd Pabl trabajw sa'csi najcni te apost

¹⁶Rnisacä lojtu, na'c guntu xhigab yecä cayajc, niluxh palga si'c rujntu

xhigab, colgusaanza guiniä si'c te ni rajc yejcnite guniäza didxro lagajc xcuentä. ¹⁷Diidx ni rniä dina guiniäni xcuent xcälrnibee Dios, alga rniäni si'c te ni rajc yejcnite, lala redidxro ni rniä xcuent lagajc narä. ¹⁸Sa'csi lacti bejn yu' ni rniä didxro xcuent redzuun ni rujnreni lo guedxliujre, sigajcza siniä didxro xcuent lagajc narä. ¹⁹Ni la'tu, sa'csi nasinduxhtu, sanunäjtu rebejn ni rajc yejcreni. ²⁰La'tu sanunäjtu chutis ni rnibee lojtu si'c te lam, o rusguee la'tu te rbajnreni xhi xtentu, o rujnni runxlia'tu xtzuunni o rliä'preni lagajc xpala'reni, o rga'preni lojtu. ²¹Mase rtuiyä guniäni, dipac nijecdi niniä diidx lojtu te niacä si'c najc rebejnga. Niluxh loj xhitis nani runnaroreni, (canisicä si'c te beñnayääl) narä sajcru gunnaröä.

²²ðLa najczeni xpejn hebreos? Sigajcza narä. ðLa najczeni xpejn Israel? Sigajcza narä. ðLa najczeni xajg toAbram? Sigajcza narä. ²³ðLa najczeni xmos Jesucrist? Narä nacäruni lojreni. Naj rniä si'c te bejn ni rajc yejcnite. Abenäru dzuun lojreni, agudijnrurenite narä loj ni gudijnrenite laareni, abasäururenite narä nen latzguiib, nicla gac guigab bal huält gudijnrenite narä; baltiza huält ameer nietä. ²⁴Gaii huält gudijn rexpejn Israel narä, tejga huält batiäjlrenite duguijd detzä galbitzubigaa huält. ²⁵Chon huält bahuajcwrenite narä garo't; stee huält bacuaareni guij yecä; chon huält biäaz barcw cadre sa'ä loj nisdoo; teb dxej, teb yääl guyu'ä lo nisdoo. ²⁶Huaduxhä biaj, lacti bixun riesgw xcuentä lo gueuu, xcuent

regubaan, xcuent rebenladxä, xcuentza rebenzijt. Bixunza riesgw nen reguedxro, näjza nez lo reyubijdz, näjza lo nisdoo, näjza xcuent rebejn ni rusguee, rniisireni najcreni bejtznu lo xtidx Jesucrist. ²⁷Abenduxhä dzuun, agudedduxhä trabajw, balti yääl dina niesä, balti huält gulanä, biojä, balti huält xheti xhi niauä; agudedäza yälñalduxh; guyu' huält xhetiza xhabä.

²⁸Luxh xhet loj redeetis rdedä trabajw; guixe-guixee di lastoä cuedxi xcuent yärsia' ni ru'ä xcuent reben guidoo ni huililajz xtidx Dios. ²⁹Che rdxajg tejtu, näjza narä rdxagä. Palga tejtu riabj lo dojl, narä ruduxhä yärsia' xcuentni. ³⁰Palga nanab gunnaröä lagajc narä, sunäni xcuent reidiix nani rululoj xcälrdxagä. ³¹Dios ni najc Xtað Jesucrist, nani riäjñ guiliä'p xpala'nni par tejpas, ananchee dina gusgueä la'tu. ³²Che guyu'ä guedx Damasco, gubernadoor nani guyu' ro'c, najcni xpejn reii Aretas, gunibee gojp rexcuxhtisni guejdxga te niniaazreni narä te nisäureni narä nen latzguuib. ³³Niluxh basiäjtreni narä nen te dximro nez ro' te padeer ni rdejd gabi guejdxga, te si'c gulaä ladzñaareni.

Dios baluuloj lo bacal

12 Mase riäjñ guiniäni, xhet gunädi gaan guiniä didxro lagajc xcuentä ni'cni rlazä chanuu diidx, guiniä xcuent rebacal näjza xcuent nani baluuloj Dios loä.

²Numbeä te niguii ni ahuililajz xtidx Jesucrist. Gutzudaj ijz huijni guibaa ni riojnga, dina ganä laa guideb tiejxhni huijni, o la ganax

xspritni huij, Diostis najn. ³Diostis najn la guideb tiejxhni, o ganax xpritni, niluxh nanä xho huij niguiiga, ⁴guläs Diosni cadro yu'pac Dios, luxh ro'c biejn diajgni didx-xhiga'tz, didxroduxhtej, nani di gacdi guinii beñ guedxliuj. ⁵Xcuent sa' niguiiga sajç guiniä didxro, didxsa'c, niluxh xcuent lagajc narä, di gacdi guiniäni; siniätis diidx ni rululoj xcälrdxagä. ⁶Mase rlazä guiniä didxro, didxsa'c xcuent lagajc narä, dini gac didxnayääl, sa'csi guliicazani. Niluxh dina guiniäni te di guntu xhigab nacä beñroru loj ni rhuiitu runä o nani riejn diajgtu rniä.

⁷Baluuloj Dios xhidalduxh cosroduxh loä, niluxh te na'c gacä beñnaro, basaan Dios gusloj guyuguijdx tiexhä, si'c te guejch huääz tiexhä, ni baxhañ beñdxab xten Satanäs te gusacsñi narä te di gacä te beñnaro. ⁸Chon huält agunabä lo Jesucrist xcuent ni'c, te guibicajni. ⁹Niluxh laani najni loä: “Yälracnäj ni gunidxä salduxh luj, sa'csi ruzença'cru xcälmilagwrä che xheti yälrutiplajz te bejn.” Ni'cni hueenru guiniä didxro sa'csi xhet yälrutiplazädi rapä, te guzen xcälrnibee Jesucrist lastoä. ¹⁰Ni'cni rbedxilazä xheti xcälrutiplazä, rbedxizalazä rniyajreni narä, näjza che caquinä guiraloj, näjza che rdedä trabajw xcuent Jesucrist, sa'csi che xheti xcälrutiplazä, dxejc runiidx Dios yälñadip, yälñadaan loä.

Yu' Pabl yärsia' xcuent guidoo ni yu' Corinto

¹¹Agucä si'c te beñnayääl, lagajc la'tu bejntu nacä si'c. La'tu riäjñ

niniitu didxro, didxsa'c xcuentä, sa'csi gajdpac biädxädi, nadxagä loj reapost ni sajrcu mase rut nacädi.

¹²Redzuun ni benä laḷ ni guyu'ä lojtu, benäni si'c te ni najcpac apost, huinuutis benäni guideb nadolajz näjza reseen, näjza remilagwr.

¹³¿Xhi benä lojtu te naatu runä xhigab guxiiru sajctu loj guiraa reguidoo? Nani benätis najc dee: dina nutalä xtuuntu, nalajznu dina niniabä niacnäjtu narä si'c gucnäj narä reguidoo ni yu' garenca lajt. iColsiäjḷ lajztu narä dojlre!

¹⁴Naj cayunä xhigab jiädhuiätu, naj gacni choḅ huält siälä. Di quilä xhixtentu, alga lagajc la'tu rguilä. Di rlazä gutalä xtuuntu. Di riäjḷ cuchee rebieuux meel par xcuzajnreni. Reguzajn ni riäjḷ cuchee meel par rexi'nreni. ¹⁵Xhet najcädi gunitä guiraa nani rapä, näjza lagajc narä sujiuxä, te laa xaimtu lo dojl. Palga chanälazäru la'tu, ɫa guxiiru chanälajztu narä, ä?

¹⁶Niluxh mase si'c najcni, di narä nutalä xtuuntu. Empac yu'reni canii basgueä la'tu sa'csi nadxällazä. ¹⁷¿Xhixh naatu cua'ä xhi xtentu sa'csi baxhalä rebejznu lojtu, ä? ¹⁸Che baxhalä Tito, räpä lojni chanäani stee bejznu te jiädhuiireni la'tu. ¿Xhixh cua'ni xhi xtentu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

¹⁹Lalni cayoltu guiraa rediidxre, cayujntu xhigab canabnu jäjḷ lajztu, niluxh xhet si'cdini. Caniinu rediidxre nez loj Dios, caniizanu con xcälracnäj Jesucrist te si'c tiobrutu lo xtidx Dios, rebetzä

nani rinälazä. ²⁰Sa'csi rdxebä andi che jiädhuiätu fiä ditu gac si'cni rlazä gactu, dxejctiru la'tu suhuiizatu dizana gacä si'cni rlazztu gacä. Rdxebä andi yu'tu ni cadijḷ, ni ruguij lajzni xhixten sa'ni, ni cadxe'ch lo sa'ni, ni cala' lo sa'ni, ni caniyaj sa'ni, ni cagutajḷ diidx lo sa'ni; ni cayunnaro lagajc laani, ni cayujnza bieje. ²¹Rdxebä andi che jiädhuiätu stehuält, gusanxtujy Dios narä xcuenttu. Rdxebäza sonduxhä xcuent xhidajltu nani abanijt, bejntu dojl galoo, luxh gajdttu gusiechljajztu xcuent xtojltu. Yu'tu ni di guibanḅnaya, resnäjtu bejḅ ni di gac chäältu, yu'za balti dojl rujntu.

Lult yäl'rulijdx xten Pabl

13 Naj gac choḅ huält siädhuiä la'tu. Guira'ti quej nanab cue'creni con xtidx tio'p o choḅ bejḅ ni najnpac xhi dojl bejn tejegani. ²Mase ruti narä ro'c, arnixgää lojtu lagajc diidx ni guniä che guyu'ä lojtu ni barojp biälä lojtu, luxh rniä loj renani abejn dojl, näjza loj guiraatu, palga jäälsacä, diruna gulaslazätu nicla tejtḅ, ³sa'csi rlazztu fiipactu la guli runiidx Jesucrist yäl'rnibee loä te guniä xtiidxni. Luxh Jesucrist dini guisisni xcuenttu, niluxh laani rustioobruni xtiidxni neḅ lastootu. ⁴Guliicani che cuajni lo crujz, gucni si'c te bejḅ nani casis, niluxh naj nabajḅni sa'csi rapduxhni xcäl'rnibee Dios. Näjza nuure rsia'cnu si'c te bejḅ nani casisnäjä laani niluxh nabannäjnu laani xcuent xcäl'rnibee Dios ni baniidxza Dios xcuenttu.

⁵Colninäj lastootu lagajc la'tu, colhuiu la guliipac ahuililajztu xtidx Dios; colhuisa'c xho najc lastootu. ¿La ditu gacbee rbäjz Jesucrist nen lastootu, ä? Palga rutini, rusqueetu lastootu, ditu nililajztu xtidx Dios. ⁶Narä rlazä gacbeetu, dinu nusguee lastoonu, ahuililajzpacnu xtidx Dios. ⁷Rniabä loj Dios na'c guntu cosguijdx, xhet te guiniidi bejn didxsa'c xcuentnu, alga te la'tu guntu recossa'c, mase guiniireni et laadi cayunä narä. ⁸Sa'csi xhetliidi rajcdi riennu te nitloj didxgulii, xcälrnibeenu najc te gusule'nu didxlii. ⁹Ni'cni rbaa lajznu che casisnu, niluxh la'tu nadip, nadaantu; rbejdx-rniabzanu lo

Dios guiza' xcälrlilajztu lo xtidx Dios. ¹⁰Rucuaä reguijtzre lojtu che gajdna jiälä, te che jiälä na'c tilnäätu si'cpacni nungäjil tilnäätu xcuent yälrnibee ni baniidx Dad Jesucrist loä, te gac tioobrutu lo xtidx Dios, xhet te nitditu.

¹¹Ni'cni rbejtznu, colguibalajz, colhuiu guisa' xcälrlilajztu, colcuedcxi lajztu, colyennäj sa'tu tejsi xhigab, dxitis gubajñ. Dios xten yälrinälajz näjza yälrbeedcxi lajz chunäj la'tu. ¹²Colnii: “Xchan” lo resa'tu. ¹³Guiraa rebejtznu nani ahuililajz ruxhañ xtixtios lojtu.

¹⁴Yälracnäjäj xten Dad Jesucrist, näjza yälrinälajz xten Dios, näjza yälracnäjäj xten Sprit Dxan chu nen lastootu. Sugacni si'c.

Te Guijtz Lo Reben Gálatas

**Pabl rucuaa guijtz loj reben
guidoo nez región Galicia**

1 Narä, Pabl, nacä apost xten Jesucrist. Xhet rebejn_{di} baxha_l narä, xhetza bejn_{di} gule narä. Lagajc Jesucrist näjza X_{tad}ni Dios ni yu' xhaguibaa, nani guläs Jesucrist loj rebengut, laareni agulereni narä. ²Narä, näjza guiraa resa'nu nani yunäj narä, rucuaanu guijtzre lo reben guidoo ni yu' nez reguedx Galicia. ³Xca' guejbtu xcäl_rracnä_j Dios con xcäl_rbedxilajz xten Dios x_{tad}nu näjza xten Dad Jesucrist. ⁴Lagajc laani cuäjbni gujtni te guslaani nuure lo dojl_l xten guedxliuj guijdxre, si'cni gunibee X_{tad}nu, Gueb-Dios. ⁵Chä'p xpala'n Dios par tejpas. Sugacni si'c.

**Xhetdi xhi stee didxcoob
ni sajc guslaa nuure**

⁶Rdxeloduxhä lacti riojb cabälaztu Dios ni gurejdx la'tu con xcäl_rrinälajz Crist, luxh naj cagusoobtu ste'ca diidx. ⁷Xhetdi stee diidx ni sajc guslaa nuure lo dojl. Yu'reni rlajz gusiejchreni lajztu con ste'ca diidx, rlajzreni guchaareni xtidx Jesucrist. ⁸Niluxh palga jääd chu jäädliui lojtu ste'ca

diidx ni ruslaa bejn lo dojl, niluxh di diidxga gac si'c najc diidx nani abaluiinu lojtu, bejn_{ga} agubibdeni, chutis najcnu, mase naräni, mase te xangl Dios ni jääd xhaguibaali. ⁹Si'c ni guniä lojtu, si'c rnisacä lojtu naj: Pal yu' chu jäädliui lojtu ste'ca diidx ni ruslaa bejn lo dojl, luxh di diidxga gac si'c najc diidx nani abaluiinu lojtu, bejn_{ga} agubibdeni. ¹⁰¿Xhi naatu? ¿La rlazä guinisa'c bejn xcuentä o la rlazä guinisa'c Dios xcuentä, ä? ¿La rlazä guspaä lajz bejn, ä? Paru rlazä guspaä lajz bejn, digacdi gacä xmos Jesucrist.

Xtzun Pabl

¹¹Colyacbee sa'a, diidx ni ruslaa bejn lo dojl nani abasule'a lojtu di diidxga gac xhigab bejn guedxliuj. ¹²Xhet lojdi bejn guedxliujdi cua'äni, rutza baluiidini loä, niluxh lagajc Jesucrist baniidx xtiidxni loä.

¹³Anajntu xho gucä, xho gubanä galoo che rusobätis rexleii toMoisés. Dxejc basacsíduxhä reben guidoo ni huililajz xtidx Jesucrist, si'c benä te rlazä nitlojreni. ¹⁴Loj reni rusoob xleii toMoisés narä cagusobäru xtiidxni, nanduxhäru loj guiraareni. Loj rebejn nani sadxagä ladxä, maazru sanälazä

xcostumbr retoxtadgoldoä. ¹⁵Dios gule narä, guleni narä cheni nuuli xnanä narä, gurejdxni narä sa'csi sanälajzni narä. ¹⁶Dxejc bibalajz Dios baluilojni Xi'nni Jesucrist loä te guiniä xtiidxni xcuent xho ruslaani bejn lo dojl loj reni di gac xpejn Israel. Che gujc si'c rut lojdi huiye'tzä. ¹⁷Niclaza nia'ä guedx Jerusalén loj reni ganid gujc apost loä. Alga hua'a nez reguedx Arabia, dxejcti gubisacä guedx Damasco.

¹⁸Che agudejd si'cti choñ ijz, dxejcru hua'a guedx Jerusalén te biembeä Pedr, dxejc biannääni tzun-gubijdx. ¹⁹Niluxh dina nuhuiä loj chu stee apost ro'c. Lojtis Jacoob, betzhuin Jesucrist bahuiä. ²⁰Rniliä nez lo Dios, dina guiniä didx-xhii, rediidx ni cacuaä najc guliipac.

²¹Dxejcti hua'a reguejdx xten Siria näjza Cilicia. ²²Resa'nu ni yu' neñ xquidoo Crist guideb nez reguedx Judea, direni gumbee narä. ²³Riejntis diajgreni: “Bejn nani basacsídxh nuure agujc xchej, abejnga caguluiini xcuent lagajc xcärlililajz nani galoo rlanjzi nunitlojni.” ²⁴Dxejc rliä'preni xpala'n Dios sa'csi huililazäza xtiidxni.

Bidxaag Pabl loj reapost

2 Che agudejd tzudaj ijz, dxejcru hua'a guedx Jerusalén con Bernabé, näjza Tito huinänu. ²Gunii Dios loä, gunibeeni cha'a ro'c te gusule'ä xho huililajz rebejn ni di gac xpejn Israel xtidx xcuent Jesucrist ni ruslaa lo dojl. Niluxh lojtis reni rnibee guidoo basule'ä diidx, te di xlia'si benä dzuun, o te di xlia'si

gunäru dzuun. ³Sanää Tito, te beñ griegw ni di gac xpejn Israel. Nicla lojni direni niäjb chuni bee si'c caj lo leii xten Moisés. ⁴Niluxh gaii bejn ni rujnsi si'cni najcreni sa'nu, bidxaagreni loonu te gula'tzreni xho rajnnu Dios. Rdxechreni sa'csi nuunu, rexpejn Jesucrist, dinu jienru si'c ni bejn retoxtadgoldoonu. Laareni rlanjzreni guxhiidreni nurnu, rlanjzreni gusoobnu rextiidxreni. ⁵Dipacnu nicäjb nucuadijgnu xtiidxreni, sa'csi rlaaznu chanuu chalilajztu xtidx Jesucrist nani ruslaa bejn lo dojl.

⁶Niluxh reni sajz, nalajznu reni rnibee reben guidoo ro'c, xhet te didxcoobdi guniireni loä. (Luxh par narä xhet najcdi mase bensajczeni, sa'csi Dios runtebloj guiraa bejn.) ⁷Luxh bahuiireni abaniidx Dios xtidx Jesucrist loä, luxh rusule'äni loj rebenzijt te guibicaj xtojlni, sigajcni rusule' Pedr xtidx Jesucrist loj rexpen Israel nani rujnpac si'c ni caj lo leii. ⁸Lagajc Dios nani badeed bejn Pedr dzuun xte apost loj rexpen Israel, lagajcza Diosre baniidx gunä dzuun, te gacä apost loj rebenzijt nani di gac xpejn Israel.

⁹Ni'cni Jacoob, Pedr, näjza Juan nani najc benroru neñ guidoo xten Jesucrist, gucbeereni laa Dios ni cayacnäj narä. Dxejc baniidxreni naareni loä näj lo Bernabé si'c te seen rbalajzreni, te chonnu guiro'pnu loj rebenzijt. Niluxh laareni chanuureni gusule'reni loj rexpen Israel. ¹⁰Gunabtisreni loonu gacnäjnu rebejn ni xhet rajpdi, luxh ni'cza rlazä gunä.

**Pabl gudilnäj Pedr lo
guedx Antioquía**

¹¹Che biääd Pedr lo guedx Antioquía, gudilnäáni, sa'csi abejnni dojl xhet laadi cayujnni. ¹²Galoo gudaunäjni rebenzajt, luxh che bidzujn gaii xpejn Israel ni baxhal Jacob, dxejcti gubicajni lo rebenzajt, diruni niaunäjreni sa'csi bidxejbni rexpejn Israel ni ru' bee ni bidzujn ro'c. ¹³Dxejcti sigajcza bejn guiraa rexpejn Israel ni nadxaag Pedr, gujcreni sigajc Pedr, runtio'p lajzreni, naareni gusgueereni. Näjli Bernabé bejn si'c. ¹⁴Luxh che bahuiä direni gun si'cpacni najc xtidx Jesucrist, dxejcti räpä loj Pedr nez loj guiraa rebenzajt: "Palga luj najclu te xpejn Israel, luxh nabajnu lo si'c rebenzajt ni digac xpejn Israel, xhet si'c di ni caj loj leii, ðxhicuent rlaizlu guinibeelu guibajn rebenzajt si'c rexpejn Israel nani rusooob xleii toMoisés?"

**Nungäjł chalilajz rexpejn
Israel, sigajc guiraa bejn,
te guibicaj xtojłreni**

¹⁵Nuure najcnu rexpejn Israel cheni gojllinu; dinu gac bendojł si'c najc rebenzajt. ¹⁶Anadonnu rut chu tejtı bejn sajc guibicaj xtojłni che gunni si'cni caj lo leii, sa'csi nanab chalilajznu xtidx Jesucrist. Ni'cni biolilaaznu xtidx Jesucrist te jia xtojłnu sa'csi rililajznu, xhet sa'csi riennu si'cni caj loj leii. Di gacdi jia xtojł bejn xcuent yälrusooob xleii toMoisés.

¹⁷Palga lał ni rlaiznu jia xtojłnu xcuent xcälrililajz xtidx Jesucrist,

ruhuiinu cayenrunu dojl, la sajc guiniinu: Jesucrist ruluui rienrunu dojl, ää? iXho gacni si'c! ¹⁸Palga rlaizä gunsacä redzuun nani abaro'nä, lagajc narä rapä dojl nacä bejn dojl. ¹⁹Niluxh xcuent leii, anacä si'c bengut: digacdiru guinibee leii narä sa'csi naj nabanä lo xnejz Dios. Luxh lagajc leii bejn nacä si'c bengut che gucbeä di gacdi gusobä guiraa ni caj lo leiiga. ²⁰Najcni si'cni gutnää Crist lo cruzj. Naj xhet narädi ni nabanä, laa Crist ni nabajn nen lastoä. Yäl nabajn ni nabanä naj lo guedxliujre nabanä sa'csi rililazä xtidx Xi'n Dios nani rinälajz narä luxh gujtni te gudijxni xtołä. ²¹Dina cuälazä xcälrulaslazj Dios. Paru sajc gudzucaj leii xtojł bejn te gacreni benmaya nez loj Dios, dxejcti xlia'si gujt Jesucrist.

Yälrililajz rusia dojl

3 iChipsa nayäältu bejn Galacia! ðChu bascäyjtı te di cuadiajgtı xtidx Jesucrist? Ni nez lojpacıtu bisule'nu diidx xho cuaj Jesucrist lo cruzj. ²Tejtı diidx rlaizä guiniitu loä. ðLa cua'tu Sprit Dxan xten Dios sa'csi bejntı si'cni caj lo leii, ä? o ðla sa'csi huililajztı diidx ni biejn diajgtı? ³Chipsa nayäältu. Acua'tu Sprit Dxan xten Dios dxejcti naj rlaiztu guntu ni riajbıtis yejctı guntu. ⁴ðLa xlia'si gudejdtı trabajw? Chugan la gulli xlia'sini. ⁵Che runiidx Dios Sprit Dxan xtenni lojtu, che rujnni milaagwr nez lojtu, ðxho rujnnini? Dini gunni sa'csi rujntı si'cni caj lo leii, rujnnini sa'csi rililajztı xtiidxni ni riejn diajgtı.

⁶Huililajz toxtadgoldoonu Abram xtidx Dios, ni'cni cua' Diosni si'c

te bejn nani naya lastooni. ⁷Ni'cni colyacbee dee: renani rililajz xtiidx Dios najc xi'n toAbram. ⁸Galooli najn Dios xcuent yárlililajz susia Dios lastoo rebenzajt, ni'c rájpní lo Abram: “Guiralii reben guedxliuj sacle' xcuentlu.” Diidxre cuaj lo guijtzt ni gujc galooli, cadro caj xtidx Dios. ⁹Ni'cni reni rililajz naj agucnáj Diosreni sigajc gucnájni toAbram nani huililajz.

¹⁰Guiraa reni rlajz guibajñreni gunreni si'cni caj lo leii, agubibdereni sa'csi scree caj lo leii: “Guiraa reni digunpac si'cni caj lo reguijtz xten leii, sucuibdereni.”

¹¹Niluxh huenliisi rien rut nayadi nez loj Dios xcuent leii, sa'csi dee najc xtidx Dios: palga rililajz te bejn xtidx Dios, najcni te bennaya nez lo Dios, nabannájni Dios xcuent xcárlililajzni. ¹²Leii dini naa chalilajz bejn te xca'ni yálnabajn. Scree caj lo leii: “Nani gunpac si'cni caj loj reguijtz xten leii, ni'c nanab guibajn lojpac leiiga.”

¹³Jesucrist badzucaj nuure loj yárlribde xten leii. Laani gubibdeni xcuentnu sa'csi xtidx Dios naj: “Anabibde te bejn ni najl loj te yajg.” ¹⁴Scree gusajc Jesucrist te gusojb diidx ni rájp Dios loj toAbram, sacnájni guiraa rebenzajt; najza te guiraanu ni chalilajznu xtidx Jesucrist xca'nu Sprit Dxan xten Dios.

Leii naj diidx ni bia'n Dios loj toAbram

¹⁵Betzä, naj gusä'tä te diidx xcuent ben guedxliuj. Cheni rujn bejn te guijtzt te jia'n diidx lo stee bejn, mase bejntis najczeni, che

abacuaani lajni lo guijtztga, rut sajcdi gudzucaj guijtztga. Rutza sajcdi gucuaaru diidx lojni che anajcni. ¹⁶Luxh anajnnu badeed Dios xtiidxni loj toAbram najza loj xagdooni. Dini ninii “rexagdooni” si'c loj xhidajlreni, guniini lo tejtis xagdooni, luxh laani najc Jesucrist. ¹⁷Diidx ni rlazä guiniä najc scree: Diidx nani bia'npac Dios loj toAbram gunii Diosni che cayäädx tajp gayuu galbitzúu ijz gudeedni leii lo Moisés te laani gudeednini loj rexpejn Israel. Niluxh di leiiga nuchaa diidx ni bia'n Dios loj toAbram, lajtis sajcdi. ¹⁸Paru naquiin leii te xca' bejn erens, dxejc xhet erensdi cua' Abram lo Dios. Niluxh basa'n Dios erens lojpac Abram sa'csi bia'nni diidx lojni galooli.

¹⁹¿Xhicuent badeed Dios leii loj Moisés? Badeed Dios leii sa'csi benduxh rexpejn Israel dojl, te gacbeereni xho najc xtojlni, laj ni jiaäd nani najc xagdoon toAbram. Sa'csi bia'n Dios diidx con laani sigajc con toAbram. Rexangl Dios badeed leii loj toMoisés, te laani gujc si'c te bejn ni rusiäjln diidx. ²⁰Te ni rusiäjln diidx xhet par tejtis bejndi najcni, niluxh Dios tejtis najc.

Xcuent leii

²¹¿La garenca najc xleii Moisés lo diidx ni basa'n Dios loj toAbram, ä? iXho gacni si'c! Paru nica'nu te leii ni rajc rudeed yálnabajn, dxejc sii xcuent leiiga nica' bejn yálnabannaya. ²²Niluxh loj reguijtz xten Dios caj diidx ni rnii: Guiraa bejn niäuu nen dojl, te reni chalilajz xtidx Dios si'c huililajz

toAbram, reni'c xca' xcälirililajz diidx xcuent Jesucrist si'cni bia'n Dios diidx loj toAbram.

²³Che gajd xcälirililajz xcuent Jesucrist jiäd, dxejc basäuu leii nuure neñ dojl, cabäjztisnu guiricaj xcälirililajz xcuent xtidx Dios.

²⁴Ni'cni anajc leii si'c xmastrnu te guluiini nuure nezyuj nez lo Dad Jesucrist te gusiani xtojlnu con yälirililajz xtiidxni. ²⁵Niluxh naj sa'csi arajpnu yälirililajz xcuent xtiidxni, dirunu guiquiin te mastr, nalajznu leii.

²⁶Guiraatu najctu xi'n Dios xcuent yälirililajz xtidx Jesucrist, ²⁷sa'csi guiraatu ni gurobnistu loj xtidx Jesucrist, najctu rexpejn Jesucrist. ²⁸Naj rutiru rexpen Israel niclaza rebenzijt, niclaza mos, niclaza bejntis, niclaza niguii, niclaza gunaa, sa'csi guiraanu najcnu tebloj nez lo Jesucrist. ²⁹Palga najcnu xpejn Jesucrist, dxejc guliipac najcnu xi'n toAbram, dxejc sica'nu yäl_nasa'c ni abia'n diidx gudeed Dios loj Abram.

4 Mbaj naj. Nani xca' yäl_nasa'c, che najcni biuux, najcni sigajc te mos, mase xtenti gac guiraa xhixten xtadni. ²Yu' chu te bejn ruhuiini, yu'za chu rnibee xhixtenti cheni agurooblina, cheni guidzujn dxej xca'ni ni gudeed xtadni. ³Sigajcza nuure che gucnu si'c biuux guyu'nu gucnu mos loj releii, rnibeeni xhini'c digacdi jiennu lo guedxliuj. ⁴Niluxh che bisa' dxej ni basoob Dios, baxhal Dios Xi'npacni. Xi'n te gunaa gojlni, loj rexpejn Israelza biädjiäjlni, basoobni leii xten toMoisés. ⁵Si'c gujc te xcasacni reni rusoobpac

leii, te xca'ni nuure gacnu si'c te xpisiäjbn.

⁶Luxh sa'csi anajctu xi'nni, ni'c baxhal Dios Sprit xten Xi'nni te cuääzni neñ lastoonu. Laani rniini lo Dios xcuentnu: “Guejblu, Xtadnu.”

⁷Ni'c dirunu gac mos, sa'csi anajcnu xi'nni. Luxh palga najcnu xi'nni, suniidxza Dios yäl_nasa'c loonu xcuent Dad Jesucrist.

Rulijdxni na'c gacsac bejn mos

⁸Che gajdte gumbee Dios najctu mos xten rebanäjbn ni rajntu si'c Dios luxh dipacreni gac Dios.

⁹Luxh naj anumbeetu Dios o naj anumbee Dios la'tu, xho chachusactu loj redzuun ni guyu'tu galoo che gujctu mos xten rebanäjbn. ¹⁰Cayutistu redxej, rebäii, retiemp, reijz. ¹¹Naj rdxebä andi xlia'si gudedä trabajw baluiätu.

¹²Rniabduxhä lojtu betzä, colyajc si'c narä, sa'csi narä ahuililazä xtidx Jesucrist sigajc la'tu. Xhetza xhi dzunguijdxdi bejntu loä che guyu'ä lojtu. ¹³La'tu anajntu galoo che basule'ä diidx xcuent Jesucrist lojtu, benäni sa'csi racxhuu tiexhä. ¹⁴Dizatu nuzel' niclaza nibälajztu narä xcuent yäl_racxhuu ni rajc tiexhä, alga si'c te xangl Dios, si'c lagajc Jesucrist cua'tu narä. ¹⁵¿Con yäl_rbalajz xtenti ni gojptu dxejc? Niluxh rniä lojtu, paru niajc nibäätu balojtu, nuniidxtuni loä dxejc, si'c niujntu. ¹⁶Naj äla rdxe'chtu loä sa'csi cania didxlii lojtu, ä?

¹⁷Naj yu' gaii bejn nani rujnsi si'cni sanäreni leii rujnsireni si'cni rinälajzreni la'tu. Niluxh rljazreni gudzucajreni la'tu te gusaantu

xtidxä, te chanajltu laareni, te jiutu xtiidxreni. ¹⁸Laaca chanälajz bejn sa'ni, niluxh na'c gusgweeni, na'cza che suganääsi la'tu chanälajztu narä. ¹⁹Rexi'nä, xcuent la'tu cadedä trabajwduxh si'c te gunaa ni rajl xpäzni, luxh sinuu sidedä trabajw cheni arbäjzpacli Jesucrist nen lastootu. ²⁰Maläii gac jiälä lojtu lagajc naj te gac guiniä xhi stee diidx. Niluxh naj zijt yu'ä, dina gacbeä xhi xhigab gunä xcuenttu.

Diidx xcuent Agar näj Sara

²¹Colguinii loä, la'tu ni rlazj gun si'cni caj lo leii, äla ditu gacbee, la di diajgtu jiejn xhini'c caj lo leii, ä? ²²iColjiejn! Scree caj loj leii: guyu' tio'p xi'n toAbram. Tejni najc xi'n gunaa ni najc xmos Sara. Steeni najc xi'n chäälpacni. ²³Niluxh xi'n xmosni gojl sa'csi lagajc laani bejnxi xhigab si'c chu xi'nni. Luxh xi'n chäälpacni gojl sa'csi si'c bia'n Dios diidx loj Abram. ²⁴Diidx xcuent regunaare najc si'c diidx ni ruluui. Regunaare najc si'c tio'p diidx ni bia'n Dios. Agar najc mos, mosga najc si'c diidx ni bia'n Dios con Moisés lo dan Sinaí. Rexi'n mosga guyu' te gacreni mos lo leii. ²⁵Agar najc si'c dan Sinaí nez lo reguejdx xten Arabia. Luxh guedx Jerusalén najc si'c dan Sinaí, sa'csi naj ro'c najc cadre re' rexpen Israel con rexi'nreni, sanäreni leii. ²⁶Niluxh di guedx Jerusalén ni yu' guibaa gac si'c mos, luxh nuurnu najcnu xi'nni. ²⁷Scree caj loj xtidx Dios:

Bibalajz, luj gunaa ni gajd xi'nlu chu,
guredxa', bibalajz,

luj ni gajdlu ted trabajw ni rdejg gunaa che rajl xi'nni.

Sa'csi su'ru xi'n gunaa nani gulälajz chäälni quela xi'n gunaa ni gudiesnäjä chääl stee gunaaga.

²⁸Mbaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram. ²⁹Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijlni xi'n chäälpac Abram nani gojl xcuent diidx ni bia'n Dios loj Abram. Sigajcza najcni naj. ³⁰ÄXhi caj lo reguijtz? “Barilaagw gunamos näj xi'nni, te di xca' xi'n gunamos yälNASA'c xtenlu si'c ni xca' xi'n gunaa nani najc chäälpacnu.” ³¹Naj nuure, betzä, dinu gac si'c xi'n gunamos te chunu lo leii. Nuurnu najcnu si'c xi'n gunaa nani najc chäälpac toAbram.

Colguzutijp lajztu lo yälirilajz xtidx Dios

5 Colgusutijp lajztu lo xtidx Dios nani baniidx Jesucrist loonu sa'csi guliipac gulää Jesucrist nuure ladzṇaa leii, badzucajni xtojlnu che huililajznu xtiidxni, ni'cni na'cru gusiejch lajztu te gacsactu mos ladzṇaa leii.

²Narä Pabl rniä lojtu, palga la'tu chutu bee si'cni caj lo leii, dxejc xlia'si chälilajztu xtidx Jesucrist. ³Rniäza stehuält, guiraa bejn nani rlazjpac chu bee, nanab gunni si'cpac ni caj lo leii. ⁴Palga rlazjtu guntu redzuun ni caj lo leii te guibicaj xtojltu, dxejc agubicajtu lo Jesucrist, agubicajzatu lo xcälracnäjä Dios. ⁵Niluxh nuure xcuentpac Sprit Dxan xten Dios rililajznu

gudijx Jesucrist xtojlnu lo crujuz, cayenloonu jiádsacni te guniidxni yälbansa'c par tejpas loonu. ⁶Sa'csi loj reni rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani sajcnajc chalilajz bejn xtidx Dios. Yälirililajzga rujn guibansa'cnu te chonälajznu resa'nu.

⁷La'tu laaca sasajtu. ¿Chu badxojn gusoobtu xtidxlii Dios? ⁸Xhet Diosdi ni guletu badxojnditu. ⁹Anajntu tudxe'nsi cobgulaj rusaguijni yätxtiil; si'c te cobgulajga najc te niguii ni caguluiitu xtidx leii. ¹⁰Rialilazä xtidx Dad Jesucrist, ni'c nadiplazä la'tu; ananá ditu chalilajz stee diidx. Niluxh bejn ni cagusgueetu susacsí Diosni, chutis najcni.

¹¹Narä rebetzä, paru narä caguluiä chutu bee, si'c ruluii rexpejn Israel, ¿xhi xcuent rusacsí rexpejn Israel narä? Paru si'c caguluiä, dirutu chalilajz gudijx Jesucrist xtojlnu lo crujuz. Luxh si'cpacza rlanjreni. ¹²Rebejn nani cagusgueetu caniireni chutu bee, imalaiiza gutiuugreni tejpas lagajc tiejxhrene!

¹³La'tu rebetzä, agurejdx Diostu loj xtiidxni te chalilajztu Jesucrist ni rusläa bejn lo dojl. Colhuixgaa na'c xca'tistu rediidxga dxejcti guntu si'ctis ni rlanj tiejxhtu, si'ctis ni riabza yejctu. Colgacnäj sa'tu con yälrinälajz, tejni sigajc steeni. ¹⁴Sa'csi guiraa diidx ni caj lo leii con tejtis diidxre rsiojbn: “Chanälajztu sa'tu sigajc rinälajztu lagajc la'tu.” ¹⁵Palga rdijltu, rauya'tu sa'tu, rajwtu sa'tu, icolnatiro! Andi lagajc la'tu gunijttu sa'tu.

Nani rchaglajz rebejn näj yäl nabajz ni ruedeed xtidx Dios

¹⁶Rniä lojtu, colguibajz si'c ruluii xtidx Dios näjza Sprit Dxa xtenni, te si'c na'c guibajntu si'ctis ni rlanj tiejxhtu, si'c ni najctis xhigabtu.

¹⁷Sa'csi ni najc xhigab xten bejn rdxe'ch loj xhigab Sprit Dxa xten Dios. Sigajcza xhigab xten Dios dini gac tebloj con xhigab xte bejn. Rudxojntu loj sa'tu, ni'cni digacdi guntu dzuun ni rlanjtu guntu.

¹⁸Luxh palga cagulijdx Sprit Dxa la'tu, dxejc dirutu quiquiin guntu si'c ni caj lo leii.

¹⁹Guyasi jiembee bejn xhireni'c najc redzuun ni rujn rebejn nani di gumbee xtidx Dios. Dee najc redzuunga: yälrusguee chääl bejn, yälrusguee chääl sa'reni, yälrusguee sa'ni che ruchaag sa' te dxa'p con te bi'n loj redolguijdx, guiraa redolguijdx ni rujn niguii con gunaa, ²⁰yälrajz rebanäjb, yälbidxaa ni rujn daan bejn, yälrdexchlajz loj sa'ni, yälrchagdijl sa'ni, yälneyedx lo sa'ni, yälrdexcha', yälriu lagajctis laani, yälrlia' lo sa'ni, yälrchaag lo te cuaa bejn. Najza sa' dzunguijdxre rujnreni: ²¹yälrdxe'ch lajz, yälrugut sa'ni, yälrsiojz, yälrauxha't, näjza guiraa dojl sa' redee. Sigajc ni balidxä la'tu xhi dxejga rulidxä la'tu naj. Nani rujn sa' redojlre direni jiu' loj xcälrnibee Dios xhaguibaa.

²²Niluxh xtzuuun Sprit Dxa xten Dios najc yälrinälajz sa'ni, yälrbalajz lastooni, yälrbedxi lajzni, yälrbecdxi lajz sa'ni, yäl najc bensa'c lo chutis bejn, yäl nagodzlajz, yäl rililajz, ²³yäl nadolajz, yäl rnibee lastooni lo ni rlanj gun tiejxhni. Xheti te leii

ni rudxojn gun bejn sa' redzuunre.

²⁴Niluxh renani ahuililajz xtidx Jesucrist, abatio'nreni guiraa redolguijdx ni rlanj gun tiejxhreni.

²⁵Palga rbäjz Sprit Dxan nen lastoonu, do'o guibajn si'c rnibee Sprit Dxan guibajnnu.

²⁶Na'c guiliä'pnu lagajc xpala'nnu, na'c guidxech lajznu lo sa'nu, na'c gunembiidnu sa'nu.

Colgacnäjä sa'tu

6 Sa'ä, palga chu tejtü ni abiajb nen dojl, lagajc la'tu nani arabeetu xtidx Dios colgulijdx bejnğa, colgacnäjni te guiriini nen dojl. Colni lojni nadolajz, nasinlajztu lagajc la'tu didi che guidon nägajcza la'tu jiajbtu nen dojl. ²Colhuui xhi rquiin resa'tu, colgacnäjreni te si'c gusoobtu guiraa rediidx ni najc leii xten Jesucrist.

³Sa'csi nani rujn xhigab sacduxhni, yu'za chu najcni, niluxh rut najcdini, rusgueeni lagajcsi laani. ⁴Tejgatu colcubee xho najc xtzuuntu te fiitu la laaca najcni, dxejcti sajç guiliä'ptu lagajc xpala'ntu. Dxejc ditu guiquiin chu stee bejn guiliä'p xpala'ntu. ⁵Sa'csi tejga bejn susule'ni diidx lo Dios xhini'c bejnni.

⁶Nani casieed xtidx Dios nanab gacnäjä bejn nani ruluiini, gudeedni tudxe'n xhixtenni loj nani ruluiini.

⁷Na'c gusgueelu lagajc luj. Dios digacdi guigueeni, ni'c guira'ti dzuun ni rujn bejn lagajcza ni'c xca' bejn. ⁸Paru te bejn gun dzuun xcuenttis tiejxhni, dxejc che guidzujn dxej xca'ni yálnasa'c, sinitloj tiejxhni, dizani jiu' loj

xcälrnibee Dios. Palga te bejn gun dzuun xcuent Sprit ni badeed Dios lojni, che gal yálnasa'c, sica'ni yálnabajn par tejpas. ⁹Ni'cni na'c guidxajgnu jiennu dzunsa'c te che guidzujn dxej ni xca'ni yálnasa'c, xca'zanu te yálnasa'cro. ¹⁰Ni'cni nanab lał ni sajçni, gacnäjnu chutis bejn, ganiddoo resa'nu ni ahuililajz.

Yälruilijdx näjza xtixtios

¹¹Colhuilaa lacti reletrduxh cacuaä lojtu con naápac. ¹²Guiraa reni rdxaglaiz gun ni rlanjtis tiejxhni, laa reni'c ni rlanj chutu bee, tedi tedreni trabajw xcuent ni cuaj Jesucrist lo cruzj. ¹³Lagajc reni ru' bee direni gun si'cni çaj lo leii, niluxh rlanjreni chutu bee te guibaa lajzreni sa'csi bejnreni gaan guyu' beega tiejxhtu. ¹⁴Luxh narä dilazä guibaa lo sa' recosga; rbaatis lazä sa'csi gujt Jesucrist, cuajni lo cruzj, te gudijxni rextojlnu. Ni'cni par narä xhetru xhi cos-guijdxdi yu' lo guedxliujre, diruna guichaglazä gunä redolguijdx xten guedxliujre. ¹⁵Che ahuililajz te bejn xtidx Jesucrist, xhetru sajçdi chu bejn bee, xhetza sajçdi na'c chu bejn bee. Nani sajçtis najc gacni si'c te beñcoob lo xtidx Jesucrist. ¹⁶Guiraa renani nabajn si'cni ruluii xtidx Jesucrist sixedxi lajzreni xcuent xcälrulaslaiz Dios. Näjza rexpen Israel nani ahuililajz xtidx Jesucrist sixedxi lajzreni.

¹⁷Na'cru guche'chtu narä sa'csi redib ni yu' tiexhä najc si'c te seen narä anacä te xmos Jesucrist.

¹⁸Rebetzä, gacnäjä Dad Jesucrist guiragajctu con Sprit Dxan xtenni. Sugacni si'c.

Te Guijtz Lo Rebeņ Efesios

Bacuaa Pabl lo rebeņ guidoo neņ guedx Éfeso

1 Narä, Pabl, nacä apost xten Jesucrist sa'csi si'c rlajz Dios. Cacuaä guijtzre loj rebeņ nani huililajz xtiidxni, loj reni rujn si'cpac rniini neņ guedx Éfeso. ²Xca'tu yälracnäj, yälrbedxi lajz xten Xtadnu Dios, näjza xten Dad Jesucrist.

Rusule' Pabl xtidx Jesucrist

³Rliä'pnu xpala'n Dios, Dad näj Xtad Jesucrist. Dios racnäj nuure, xcuent Crist runiidxni guiraa reyälracnäj xca' lastoonu, astoo yu'lanu xhaguibaa. ⁴Laani gule nuure, che gajdlı guirixtiej guedxliujre, te gacnu xpejñni, te guibanñayanu nez lojni con yälrinälajz. ⁵Sigajcza anungäjł xca'ni nuure te gacnu si'c xi'npacni sa'csi abiääd Jesucrist te guslaani nuure neņ dojl, si'c ni gunibee Dios sa'csi balaslajzni nuure. ⁶Gucnäj Dios nuure te guiliä'pnu xpala'n Dios, sa'csi lagajc laani acua'ni nuure, abejñni nuure tejsi con xi'nni ni sanälajzni. ⁷Laani baslaani nuure neņ dojl xcuent xtiejñni, laani badzucajni xtojłnu xcuent

xcälruslaslajzni ⁸nani banidxduxhni loonu. Guideb yälñajn, guideb xcäriejñ ⁹basule'ni loonu xhigab xhiga'tzni xcuent redzuun ni rlajzni gunni, xhigabza ni bejñni galooli. ¹⁰Luxh sidzujñ dxej sisiojbpac xhigab ni bejn Dios. Che guidzujñ dxejga sutojp Dios guiraali, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

¹¹Arajpnu te xcälñasa'c Jesucrist, sa'csi galooli bejn Dios xhigab guniidxni yälñasa'cga. Lagajc Dios benchee guira'ti ni yu', luxh rujnpacni nani abejñni xhigab najc laaca gunni ¹²te guiliä'p bejn xpala'n xcälñibeeni xcuentnu, nani ganiddoo biolilaañnu xtidx Jesucrist. ¹³Näjza la'tu, che biejn diajgtu redidx guliı, rediidx ni ruslaa bejñ lo dojl, dxejc huililajztu xtidx Jesucrist, dxejc gujczatu tejsi con laani. Dxejc cua'tu Sprit Dxan xten Dios, ni'c najc si'c seen ahuililajztu, si'cni bia'n Dios diidx. ¹⁴Baniidx Dios Sprit Dxan xtenni te cuääzñni neņ lastoonu, te ni'c najc seen xca'nu yälñasa'c nani guniidx Dios che abaluuxni xtzuunni, nalajznu guslaani guiraa rexepejñni te guiliä'preni xpala'nni lo xcälñibeeni.

**Rniab Pabl gudeed Dios
yäl'najn loj renani ahuililajz**

¹⁵Ni'cni näjza narä, sa'csi abiejn diagä xho rililajztu xtidx Dad Jesucrist näjza xho sanälajztu guiraa rexpejn Jesucrist, ¹⁶dina gusanä gudedä xquixtios lo Dios xcuent la'tu. Rnaduxh lazä la'tu che rniabä lo Dios. ¹⁷Rniabä lo Xtios Dad Jesucrist, xtdadni ni rnibee xhaguibaa, guniidxni lojtu te yäl'nanduxh, te yäl'ruluiløj recos xhiga'tz te gacbeduxhrutu xcuent Gueb Dios. ¹⁸Rniabäza lo Dios jianij xcäriejntu te gacbeetu xhini'c najc speranz xten yäl'racrejdxtu lo xtiidxni, te gacbeetu lacti saru, lacti sajc yäl'nasa'c ni gudeed Dios lo Jesucrist näjza loj rexpejn, ¹⁹te gacbeezatu lacti gurobduxh najc yäl'rnibee nani rajpni nez loonu nani ahuililajz xtiidxni. Guiraa redee ruluu lacti nadip najc yäl'rnibee xten Dios. ²⁰Lagajc yäl'rnibeere bejn dzuun par Jesucrist. Con yäl'rnibeere baspajn Dios Jesucrist lo rebengut, te gurejni xladbee Dios cadro rnibeeni xhaguibaa. ²¹Maazru sajcn lo chutis gubier, lo chutis yäl'rnibee, lo xhitis yäl'nadip, lo chutis ni rnibee; maazru sajcn lo chutis nani abibee te guinibee, sigajc naj, sigajc nen redxej ni churu jiaäd. ²²Niluxh badeed Dios guira'tini ladznaa Jesucrist, laazani bejn bibee Jesucrist gunibeeni lo guiraa xhixten xquidooi. ²³Reben guidoore najc si'c tiejxh xten Jesucrist, luxh sigajc rudeed Dios guiralii loj Jesucrist, sigajcza rudeed Jesucrist guiralii loj rebejn ni najc xquidooi.

**Rusläa Dios nurnu sa'csi
rinälajzni nurnu**

2 Laani baniidxni yäl'nabajn lojtu che najctu si'c bengut nez loj Dios sa'csi rujntu dojl. ²Galoo gubajntu lo dojl, entis lo xnez guedxliujre guzajtu, biutu xtidx bendxab nani rnibee guedxliujre. Sprit xtenni rujn dzuun nen lastoo rexi'nni nani di gucua diajg xtidx Dios. ³Luxh galoo, näj nuure nadxaagnu lojreni, biennu si'c ni rlanj tiejxhnu. Dxejc biennu si'ctisni rlanj tiejxhnu, si'ctisni biajb xhigabnu. Nungäj'l guidxe'ch Dios loonu, sigajc bidxe'chni loj guiraa reben guedxliuj. ⁴Niluxh balaslajz Dios nuure. Con xcälsanälazduxhni huinärajzni nuure. ⁵Mase anajcnu bengut lo dojl, laani baniidxni yäl'nabajn loonu. Rajpnu yäl'nabajnre con Jesucrist. Sa'csi balaslajzni nuure baslaani nuure nen dojl. ⁶Baspansacni nuure con Jesucrist; sigajcza bejnni cuenäjn Jesucrist xhaguibaa, ⁷te nen redxej ni churu jiaäd, guluiløjni lacti sajc xcäl'nasa'c xten yäl'rulaslajzni, ni'c sanälajzni nuure, najcni huenduxh loonu por Jesucrist. ⁸Sa'csi rulaslajz Dios nuure, ni'c baslaani nuure nen dojl che huililajznu xtiidxni. Luxh et sa'csi yu' xhi biennu; dee najc nani banidx-xlia' Dios loonu. ⁹Xhet xcuent xhi dzunsa'cdi ni biennu, te di chu tejtü gac nayedxlajzdi. ¹⁰Dios najc ni benchee nuure. Sigajcza con Jesucrist bejnni gacnu bejn ni rujn dzunsa'c nani galooli agunibee Dios jienpacnu.

Yäl'rbedxilajz ni rajpnu por Jesucrist

¹¹Ni'c colsnaj lajztu xho gujctu galoo. Ditu niajc rexpejn Israel.

Rniireni la'tu 'benzjijt' sa'csi ditu chu bee si'c ru' rexpejn Israel. Sa'csi lagajc con naareni rusälireni bee. ¹²Dxejc suga'tu ditu gumbee Jesucrist. Zijt yu'tu loj rexpejn Israel, najctu benzjijt. Nicla gumbeetu rediidx ni bia'n Dios loj rexpejn Israel. Ditu niunloj gusläa Dios la'tu lo dojl, dizatu niembee Gueb Dios lo guedxliujre. ¹³Niluxh naj ayu'tu lo Jesucrist, la'tu ni guyu' zijt lo Dios galoo. Naj agubigtu lo Dios sa'csi abia xtojltu con xtiejn Jesucrist. ¹⁴Jesucrist najc ni rbecdxi lajznu. Laani bejn gujc rexpejn Israel tejsi con rebenzjijt. Laani badzucajni redzuun xten leii te gujc rexpejn Israel tejsi con rebenzjijt. ¹⁵Lagajc con tiejxh Jesucrist ni gojl lo cruzj banijtni redzuun xten leii nani bejn bidxe'ch rexpejn Israel lo rebenzjijt. Lagajc laani bejnni bidxagsa'reni te gujcreni tejsi che huililajzreni xtiidxni, gujcreni te beccoob. Dxejc gulecdxini lajznireni. ¹⁶Con yälgujt ni gujtni lo cruzj badzu'ni guiro'preni lo Dios te gujcreni tejsi. Si'c guläjz rdxechnäj sa'reni.

¹⁷Cajza lo guijtjz rediidxre:
Biäädni te basule'ni xho ga'p
rebejn yälrbedxi lajz rebejn
ni suga' zijt lo Dios näjza reni
suga' gajxh lo Dios.

¹⁸Laani bejn sajc jiu' guiro'p cuaa bejn lo Dios con tejsi xhigab, näjza tejsi Sprit. ¹⁹Ni'cni dirutu gac benzjijt, bejn ni rut numbeedi. Anajctu tejsi con rexpejn, najczatu sa' rexpejn Dios. ²⁰La'tu najctu si'c te yuro. La'tu najctu si'c padeer xten yu'ga. Reapost näjza reprofet najc si'c cheni birixtiej

yu'ga. Jesucrist najc si'c guiro ni gusuj squiin yu'ga, guij ni sajcrü, sa'csi Jesucrist rnibee. ²¹Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist. ²²Sigajcza la'tu näjza rexpejn Israel ni huililajz najctu tejsi con Jesucrist. Cagustioobtu guidooga te nenni cuääz Sprit Dxaan xten Dios.

Pabl nungäjł chanä xtidx Dios lo rebenzjijt

3 Ni'cni yu'ä nen latzguiib, narä, Pabl sa'csi cagusule'ä Jesucrist, te jäädnää xtiidxni lojtu, najctu benzjijt. ²Pet abiejn diajgtu lacti hueen najc Dios baniidxni dzuunre loä, jäädnää xtiidxni lojtu. ³Dios baluini xhigab-xhiga'tzni loä (si'cni bacuaä lojtu galoo). ⁴Che gołtu guijtjzga, sacbeetu cati ananä rexhigabxhiga'tz xten Jesucrist. ⁵Xhigab-xhiga'tzre di bejn niembee galoo, niluxh naj Sprit Dxaan xten Dios abaluinini loj reapost näjza loj reprofet. ⁶Dee najc xhigab-xhiga'tzga: por rediidx xcuent Jesucrist ni rusläa bejn nen dojl rujn Dios gac reni najc benzjijt tejsi con reni najc xpen Israel, guidxaag sa'reni, gacreni tejsi bejn. Guiro'preni xca' yälNASA'c si'c bia'n Dios diidx.

⁷Narä nacä te apost xten dzuun ni baniidxni, por xcälrulasajz Dios ni cuaxlia'ä. Dios baniidx dzuunre loä con xcälrnibeduxhni. ⁸Luxh masä guxiiru sacä lo guiraa rexpejn, loä baniidxni xcälracnäjni te lo rebenzjijt gusule'ä xtiidxni, nalajznu redidxcoob xcuent xcälNASA'c Jesucrist, ⁹te gusule'ä lo guiraa

bejn reXHigabxhiga'tz nani bacua'tz Dios lojnu galooli. Dios benchee guiralii ni yu'. ¹⁰Si'c gujc te naj jien guiralii yäl'nanduxh xten Dios. Reni najc xpejn'pacni neñ xquidooni guluui yäl'najnre lo rexangl Dios, loj reni rnibee xhaguibaa. ¹¹Galooli bejn Dios xhigabre par tejpas, ni'cni biääd xtadnu Jesucrist te guzojb xhigab ni bejn Dios. ¹²Con Jesucrist dinu guidxejb guibignu, guiniabnu lo Dios sa'csi ahuililajznu xtiidxni. ¹³Na'c gac-huin lajztu sa'csi cadedä trabajw xcuenttu. Colguibalajz; dee najc xcäl'nasa'ctu.

Xcäl'sanälajz Jesucrist

¹⁴Ni'cni ruzuxhibä nez loj Xtad Dad Jesucrist ¹⁵nani badeed lajni lo guiraa reni yu' xhaguibaa näjza reni yu' lo guedxliuj, ¹⁶rniabä loj Dad xhaguibaa gutijpni lastootu con yäl'rnibee xcuent Sprit Dxaan xtenni, sa'csi yuduxh xcäl'nasa'cni lo xcäl'rdimbicha'ni xhaguibaa. ¹⁷Rniabäza lo Dios te jäädälajz Jesucrist neñ lastootu sa'csi ahuililajztu. Te che agusudzu'tztu, agusutijptu lo yäl'rinälajz ¹⁸dxejc sajc gacbeetu sigajc guiraa reXpejn'pacni lacti gulajg, lactiza siool, lacti jäät, lactiza jiaa najc yäl'sanälajz xten Jesucrist. ¹⁹Te gumbeezatu xcäl'sanälajz Jesucrist ni najc gurobduxhtej, digacdi guichalonuni. Te chaza lastootu, näjza xcäriejntu con guiraa rexäl'nasa'c Dios.

²⁰Dios rnibeduxh. Sajc gunidxduxhruni loj xhitis ni rniabnu lojni, loj recos ni riennu xhigab. Con Sprit Dxaan ni rujn dzuun neñ lastoonu suniidxni

reyäl'nasa'c. ²¹Loj Diosre coldeed xquixtios. Colguiliä'p xpala'nni nen guidoo xcuent Dad Jesucrist guira dxej, par tejpas. Sugacni si'c.

Por Sprit Dxaan nadxaag sa'nu

4 Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäjäl, si'cni bejnzatu xhigab cheni gurejdxni la'tu. ²Colguibajñ con yäl'nalasajz, näjza yäl'nadolajz, colcuedcxi lajztu. Colyujn huant resa'tu con yäl'rinälajz sa'ni. ³Colhuii te guidxaag sa'tu gactu tejsi con Sprit Dxaan ni ruscuedcxilajztu. ⁴Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yäl'runloj ni rajptu xcuent diidx nani gurejdxtu. ⁵Rajptu tejsi Dad, tejsi yäl'rililajz, tejsi yäl'robnis, ⁶tejsi Dios, tejsi Xtad guiraanu nani rnibee guira'ti lo guiraanu. ⁷Lo tejganu abaniidxni dzuun si'ttis bejn Jesucrist xhigab guuniidxni lo tejganu. ⁸Ni'cni caj lo reguijtz:

Che huä'pni xhaguibaa, cadre rnibeeni,
 abejnni gaan loj guiraa yäl'rnibee,
 dxejcti badeedni dzuun lo reXpejn'ni lo guedxliuj.

⁹¿Xhi säloj cadre caj, “huä'pni”? Dee säloj ganid biäjtni maazru jäät lo guedxliuj. ¹⁰Lagajc nani biäjtgä, lagajc laani huä'pni jiaaru lo guiraa reXhaguibaa te sajc guinibeeni guibaa näjza guedxliuj. ¹¹Lagajc laani badeedni xtzuum tejgareni. Yu'reni badeedni gac apost, yu'reni badeedni gac profe't, gaireni

badeedni gusule' xho ruslaa xtiidxni bejn lo dojl, sgaiireni badeedni gac si'c ni ga'p reben guidoo, sgaiireni badeedni guluii rexpejn. ¹²Guiraa redee badeedni te guluiireni rexpejn Jesucrist, te gunreni dzuun te gustajlreni rebejn ni gac xquidoo Jesucrist. ¹³Nungäjł gac dzuunre che guidzujnli dxej ni nadxaag-sa'nu guiraanu loj yälrlililajz, che guidzujnli dxej riembesa'cnu Xi'n Dios, dxej anajcnu benguyajł lo xtiidxni, si'c te ni aguroob loj xcälrnibee Jesucrist. ¹⁴Dirunu gac si'c rebiiux ni tera'tsi rusiejch lajzni, rucuadijgreni xtidx chutis bejn, mase xhitis diidx ruluini. Dxej riabreni lo redidx-xhii xten bejn nani rusguee, nani cabäjztis gusguee bejn. ¹⁵Maazru huen chonuunu loj redidxlii xten Jesucrist con yälrlinälajz te tioobnu lo guiraa recos xten nani rnibee, lagajc Jesucrist. ¹⁶Loj Jesucrist nazdzu'tz guiraa rexpejn, te si'cni nazdzu'tzsa'reni sääreni, najcreni tejsi loj tiejxh Jesucrist, racnäy sa'reni segun xhi dzuun rujn tejpgareni, casieedrueni te cayajc xhidajłru rebejnğa con yälsanälajz.

Te yäl_naba_ncoob con Jesucrist

¹⁷Laa ni'cni rniä rniabäza con laj Dad Jesucrist na'cru guibajntu si'c nabajn rebejn nani di gumbee Dios. Laareni rujn si'ctis ni riab yejcreni. ¹⁸Nayääl xcäriejnreni, direni ga'p xcäl_nabajn Dios sa'csi nadduxh lastooreni. ¹⁹Redee che gucnajd xcäriejnreni gusloj bejnreni guiraloj yälrtujy, guiraa redojl ni di nungäjł gunreni. ²⁰Niluxh la'tu xhet si'cdi bisieedtu loj Jesucrist.

²¹Palga abiejn diajgtu xtiidxni, niluxh abaluiini lojtu didxlii ni siädnä Jesucrist, ²²colgusaan yäl_nabanyujxh ni gojptu: Lo yäl_nabanyujxhğa rujn bejn si'ctis ni rlajzni. Dxejcti si'c runijtni la'tu lo Dios. ²³Colgusiejch lajztu, colgusia xcäriejntu, ²⁴te gactu be_ncoob nani bejn Dios, colchanuu te yäl_nabansa'c, te yäl_nabanya xten xtidxliini.

²⁵Colguuro'n diidx-xhii, colnii didxlii lo resa'tu sa'csi tejsi najcnu guiraanu.

²⁶Che guidxe'chtu, na'c guntu dojl. Na'c gusaantu chu xcälrdxe'chtu guideb dxej che chääzli gubijdx. ²⁷Na'c gusaantu jiu' bendxab nen lastootu.

²⁸Nani rilajn, na'cru cuanni. Laaca gunni dzuun con naani te gunni te dzunsa'c nani gudeed meel lojni te gac gacnäyzani rebejn nani xhet rajpdı.

²⁹Na'c gusaantu guirii nicla tej didxguijdx ro'tu. Colnii ganax didxa'c te gacnäjni guisieed reni rucuadijg xtiidxtu. ³⁰Na'c guntu gac-huin lajz Sprit Dxaan xten Dios. Laani najc te seen xten Dios najctu xpejn Dios, ni'c rbäjzni nen lastootu che guidzujnli dxej ni chäätu lo Dios.

³¹Colguuro'n yäl_naba_ndxuudx xtentu, näy yälrdxe'ch, näy yälrdxagdił sa'ni, näy yälrbedxa', näy yälrgue. Colguibicaj lo guiraa redojlğa, na'c gactu benguijdx.

³²Nungäjł gactu huen loj resa'tu, colgulasajz resa'tu, colsiäjł lajztu con resa'tu ni rujn dojl lojtu si'c rsiäjł Dios lajzni rextojłtu xcuent Dad Jesucrist.

Xho nanab guibajñ rexi'n Dios

5 Colguibajñ si'c nabajñ Dios, sa'csi najctu xi'nni nani sanälajzni. ²Colchasanäj yälsanälajz sigajcni huinälajz Jesucrist nuure cheni badeedni lagajc laani lo Dios, cuajni lo cruju, gujtni. Laani gujcni si'c gojn, gujczani yälrbibyaal ni bidxagajz Dios.

³Nicla gusä'ttu yälrusguee chääl bejn, nicla redoj dxuudx, niclaza yälsanälaztej xhixtentisni. Nicla gusä'ttuni lo sa'tu, sa'csi xhet si'cdi nungäjł gun bejn ni naban-naya. ⁴Sigajcza colcuälaz diidx ni rujn xtujy, näjza didxnajd, näjza didxnaj nani digac laaca. Colgudeedtis xquixtios lo Dios. ⁵La'tu anajntu nicla tej ni rusguee chälbejn, nicla tej bendxuudx, nicla tej ni sanälaztej xhixtentisni, nicla renani rajñ rebanäjb, nicla tej reni'c di xca' yäl'nasa'c loj Jesucrist, dizareni jiu' lo xcäl'rnibee Jesucrist, xcäl'rnibee Dios. ⁶Na'c gusaantu gusguee bejn la'tu con diidx ni xhet sajcdi sa'csi xcuent redzuunga riädä xcäl'rdxe'ch Dios loj rebejn ni di gusoob xtiidxni. ⁷Na'c guntu sigajc rujnreni.

⁸Galoo nacäyjtis xcäriejntu gubajntu, luxh naj abasanij Jesucrist xcäriejntu. Colguibajñ si'c nungäjł guibajñ nani abianij xcäriejnñi. ⁹Sa'csi nani abianij xcäriejnñi rujn dzunsa'c, rniini didxgulii. ¹⁰Colguisieed xhini'c rchagajz Dios. ¹¹Na'c guntu redzundxuudx nani rujn reni nacäy xcäriejnreni, coltilnäy reni rujn sa' dzunguijdxga. ¹²Sa'csi te xtujyli najc jieinu diidx xcuent xtzunreni ni runxhiga'tzreni. ¹³Niluxh guiraa

sa' redzuunre ni rdilnäjn, huenliisi sien xhi najcreni, suzeñni lo xpianij Jesucrist. Sa'csi guira'ti ni ruzeñ najc nianij. ¹⁴Ni'cni caj loj reguijtz, räjp Dios:

Gubajñ, huistie luj ni rejslu.

iHuistie lo dojl, luj ni naga'lu lo dojl si'c bengut,

te gusanij Jesucrist xcäriejnlu!

¹⁵Colhuii, colsin, na'c guibajntu si'c te bejn nani di gacbee, colguibajñ si'c bejn nani yu' xcäriejnñi. ¹⁶Coltedsa'c redxey sa'csi nen redxeyre ganax cosguijdx rujn bejn. ¹⁷Ni'cni na'c guibajntu si'c rebejn nani di gacbee, colyacnasin, te gacbeetu xhini'c najc ni rlajz Dad xhaguibaa guntu. ¹⁸Lacuaa yätu nejp nani runijt bejn, colgapchee Sprit Dxan xten Dios nen lastootu. ¹⁹Colnii loj resa'tu rediidx nani gunii rebejn tiemp gulä'preni xpala'n Dios, colyelza redij xten Dios, con reyälriel colguiliä'p xpala'n Dios nen lastootu. ²⁰Di jiał lajztu gudeedtu xquixtios lo Dios xtdadnu con laj Dad Jesucrist.

Xho guibannäj sa' rexpejn Jesucrist

²¹Sa'csi rajntu Jesucrist, colgusoob xtidx sa'tu.

²²Lojtu, regunaa ni abachnaa, rniä scree: Colgusoob xtidx chäältu si'c rusoobzatu xtidx Dad Jesucrist.

²³Sa'csi niguii rnibee gunaa si'cni rnibee Jesucrist xquidooni, niluxh laazani ruslaani rexpejn guidooni lo redojl, najcreni si'c tiejxhni. ²⁴Ni'cni, sigajc rusoob reben guidooga nani rnibee Jesucrist gunreni, sigajcza nungäjł gusoob regunaa ni abachnaa nani guinibeetis chälreni gunreni.

²⁵Lojtu, reniguii ni abachnaa rniä scree: Colchanälajz chäälту sigajc ni huinäälajz Jesucrist rexpен guidooni, badeedni lagajc tiejxhni loj Dios cheni cuajni lo cruiz por laareni ²⁶te basiani xtojл rexpејn guidooni, te gujcreni te beңcoob, abidiib lastooreni con xtiidxni si'c rdiib te cos con nis ²⁷te che xca'ni rexpен guidooni, najcreni te guidoo ni sajcrу, te guidoo nani xheti xtojлni, te guidoo nani sugadzu'tz, te guidoo xhet xhi riäädxdі, najcni te guidoya, xheti xhi xtojлdini. ²⁸Sigajcza, te niguii nani abachnaa nungäjл chanälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani. ²⁹Ruti chu te beјn ni rbälaz tiejxhni; alga rajpni tiejxhni ruyaanni tiejxhni sigajc rajp Jesucrist rexpен guidooni. ³⁰Najczanu teјsi loj tiejxh Jesucrist, loj xpäälni, loj rextzujtni. ³¹“Ni'cni che guchnaa te niguii rusa'nni xtadni, xnanni, te xca'ni gunaa, te gac guiro'preni si'c teјsi bääl, si'c teјsi beјn.” ³²Dee najc te diidx xhiga'tzduxh; li te “čchuj?” najcni. Niluxh narä rniä xcuent Jesucrist con rexpenguidooni. ³³Niluxh nanabpac chanälajz teјgatu chäälту sigajc sanälajztu tiejxhtu. Dxeјcti gunaa ga'pzani xpala'n chäälni.

6 Lojtu biuux, rniä scree: Colgucuađajg xtidx Jesucrist, colgusoob xtidx xtadtu sa'csi ni'c sajс nez loj Dios. ²Colga'p xpala'n xtadtu, xnantu, sa'csi ni'c najc didx galoo xten leii nani runiidx xhi xca'tu palga gusoobtu diidxga; ³“Te saruduxh guibajntu xchero lo guedxliujre.”

⁴La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yälnaj, colgulijdxreni con xtidx Jesucrist.

⁵La'tu ni najc mos, colgusoob xtidx xlamtu lo guedxliujre, colcuadaјg xtiidxni, xhet xhi steedi xhigabdi guntu neң lastootu. Colyeјn xtzuunni si'cni najc xtzuun Jesucrist. ⁶Colyeјn xtzuunni, niluxh xhet che suga'tisreni, cahuiireni, parsi jiansa'ctu loјreni. Maazru hueen guntu dzuun si'c xmos Jesucrist; colyeјn guira'ti si'cni rujntu xtzuunpactu; si'cni rлаz Dios. ⁷Colyujn xtzuunni guideb lastootu si'c xmos Jesucrist, et si'cdi xmos beң guedxliuj. ⁸Anajntu dzunsa'c ni gun teјgatu, lagajcza xcuent ni'c xca'tu loj Dad Jesucrist, mase najctu mos o mase rutloјdi yu'tu.

⁹Lojtu, relam, rniä scree: Sigajcza colyujn loјreni. Colgusaan yälrusacsі, sa'csi anajntu yu' xlamtu xhaguibaa, luxh tebloј najc guiraa rebeјn nez loјni.

Nani gacw rexpејn Jesucrist lo guerr

¹⁰Didx lult ni rniä, sa'ä, najc scree: Colsutijp lo xcälracnäj Jesucrist, colsudzu'tz lo xcälnadip xcälrnibeeni. ¹¹Colgajcw xhabguiib xten Dios te gac sudzu'tztu lo reyälrusguee xten bendxab. ¹²Sa'csi xhet beң guedxliujtis cadilnäjnu. Cadilnäjzanu reguxhtis xte yälcäјy, näјza reyälrnibee, rebeјn nani rnibee loј reyälcäјyre, näјza rexangl bendxab nani rnibee beј xten guedxliujre. ¹³Ni'cni colca' guideb lad-guiib xten Dios nani runiidxni loonu te gac sudzu'tznu neң dxeј ni guideednu trabajwduxh, te che

agudejdni, lāltis sisiudzu'tznu.
¹⁴Cōlsudzu'tz pues. Xque'tu
 colguliib sindoor-guiib ni najc xtidx
 Jesucrist, colgajcw gamangw-guiib
 ni najc rextzunsac'c xten Dios ni
 rujntu. ¹⁵Cōlcuaa gurach-guiib
 ni'tu (ni'c najc xtidx Jesucrist ni
 ruscuecdxi lajztu). ¹⁶Cōlca' escud-
 guiib ni najc yālrililajz te con
 yālrililajz xtidx Dios di bēndxab
 gun gaan gusguee la'tu con rextidx-
 xhiini. ¹⁷Cōlca' yālruslaa xten
 Dios lo dojl̄ si'c te xhumbrel-guiib
 chu yejctu; colca'za lans xten
 Sprit Dxan xten Dios ni najc xtidx
 Dios. ¹⁸Cōlnab lo Dios guiraa dxej;
 colnab lojni con Sprit Dxan xtenni;
 colsusint̄is; na'c jieedtu guiniabtu
 lo Dios xcuent guiraa xpejn̄ni.
¹⁹Cōlnabza lo Dios por narä te
 guniidx Dios diidx cheni gāl̄ guiniä,
 te na'c guidxebä guiniä che guluiä

didx-xhiga'tz xten yālruslaa bejn̄ lo
 dojl̄. ²⁰Xcuent rediidxga ni yu'ä nen̄
 latzguiib, caduä con caden̄. Ni'cni
 colnab lo Dios te na'c guidxebä
 guiniä rediidxga si'cpacni säbyäj̄l
 guiniäni.

Lult xtixtios

²¹Niluxh te gabeetu xho sasaj
 rextzunä, nägajcza xho yu'ä narä,
 Tíquico, sa'nu ni sanälajznu, ni
 runsa'cza xtzun Dad Jesucrist, siääd
 lojtu te gusule'ni diidx. ²²Laapacni
 ruxhaä lojtu, te gabeetu xho
 yu'nu, te si'c guscuecdxini lajztu.

²³Rniabä yālrbedxilajz par
 resa'nu, näjza yālrililajz con
 yālsanälajz xten Dios Xtdnu
 näjza xten Dad Jesucrist. ²⁴Gacnäj
 Dios guiraa reni di gusguee, reni
 sanälajzpac Dad Jesucrist. Sugacni
 si'c.

Te Guijtz Lo Reben Filipos

Latzguiib yu' Pabl bacuaani loj rebeṅguidoo xten guedx Filipos

1 Pabl nájza Timoteu, nani najc rexmos Jesucrist, rucuaanu guijtzre lo guiraa rexpejn Jesucrist nani rbájz guedx Filipos, loj rebejn nani ruluii xtidx Dios nen reguidoo nájza loj rediaconos. ²Gacnáj Dios la'tu con yälrbedxi-lajz xten Xtadnu nájza xten Dad Jesucrist.

Rniab Pabl lo Dios xcuent rebejn nani rililajz

³Che rnaj lazä la'tu, rudedä xquixtios lo Dios. ⁴Che rniabä lo Dios, rbaa lazä rniabä lo Dios xcuent la'tu, ⁵sa'csi abidxaag sa'nu lo xtidx Jesucrist che guslojli huillilajztu hasta najli. ⁶Anancheä Dios nani gusloj cayunsa'c dzuun nen lastootu, lagajc laani suluxsa'c dzuunga dxejli ni jiaäd Jesucrist. ⁷¿Xhiru xhigab nungäjli gunä? Ni rapä la'tu nen lastoä sa'csi cayacnäjtu narä nen latzguiib luxh rsiudzu'tztu riye'tztu lo bejn, guliï najc rediidx nani rusule'ä xcuent Jesucrist nájza la'tu rusule'tu rediidxga. ⁸Dios nanchee xho rbannäätu, xho sanälazä guiraatu lo xcälsanälajz Jesucrist. ⁹Rniabä

lo Dios te tioobru xcälrinälajztu náj xcälnajntu nágajc churu xcäriejn guiraatu, ¹⁰te cuetu nani najc dzunsa'c te si'c guiban nayatu, te na'c ga'ptu nicla tej dojl cheni jiaäd Jesucrist. ¹¹Te guidxa lastootu yälناسa'c xten te yäl nabansa'c ni runiidx Jesucrist, te guspaa lajztu Dios, guiliä'ptu xpala'nni.

Jesucrist najc xcäl nabaṅä

¹²Rlazä gacheetu betzä: guiraa nani gusacä ni'c cayacnäj guire'chru xtidx Jesucrist. ¹³Ni'c guiraa rebejn, renani yu' jusgaad sigajc renani yu' garenca lajt, anajnreni niäuä latzguiib xcuent Crist. ¹⁴Xhidajlrü resa'nu cheni gucbeereni yu'ä latzguiib, gusudzu'tzru lajzreni, direni nidxejb, guniirureni xtidx Dios. ¹⁵Guliica yu' reni rusule' xtidx Jesucrist sa'csi rdxe'ch lajzreni, rdxe'chzareni loä. Yu'za reni rusule' xtidx Jesucrist sa'csi laaca najc xhigabreni. ¹⁶Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustioobrureni trabajw nani tedä nen latzguiib. ¹⁷Niluxh yu' reni rusule' rediidxga sa'csi sanälajzreni Jesucrist.

Anajnreni yu'a latzguiibre te gusule'äru guliipac najc xtidx Jesucrist. ¹⁸Niluxh ÷xhiru najcni? Palga rujnsireni laaca o palga guluiipac laaca najc xhigabreni rusule'reni xtidx Crist; rbaa lazä sa'csi care'ch xtiidxni niluxh sibaaru lazä. ¹⁹Ananä laaca guiriä loj guiraa recosre sa'csi canabtu lo Dios xcuentä. Luxh xcälracnäj Sprit xten Jesucrist ²⁰rujn runloä, rbäzäza dina jianxtuiä. Ni'cni dina guidxebä guiniä, si'cni runäpac, sigajcza runä naj te gac guiliä'pä xpala'n Jesucrist con tiexhä palga guibanä o palga guetä. ²¹Sa'csi palga guibanä, su'ä lo Jesucrist; luxh palga guetä sunäru gaan. ²²Palga guibanäru lo guedxliujre, sajcru gunä xtzuum Dad Jesucrist, ni'cni dina gacbeä xhinic cueä xca'ä. ²³Nagajn najcni par narä cueä lo guiro'preni. Te lajt runä xhigab: malaii guetä te cha'a cadro yu' Jesucrist sa'csi ni'c najc hueenru par narä. ²⁴Niluxh stee lajt nancheä nungäj] guibanäru lo guedxliujre xcuent la'tu. ²⁵Niluxh narä racbeäpac siannä'äru la'tu, su'äru lojtu te chanuurutu lo xtidx Jesucrist, te guibalajztu lo yälrlililajz, ²⁶te guibalajzrutu xcuentä loj Jesucrist che guibisacä lojtu stehuält.

²⁷Colhuiitis guibajntu si'cpac ni nrii xtidx Jesucrist, te palga jädhuiätu o palga ruti narä, jiejn diägä sugadzu'tztu, rujntu tejsi xhigab, nadxaag sa'tu rujntu tejsi dzuun con yälrlililajz xten xtidx Jesucrist. ²⁸Na'c guidxejbditu renani rdxe'ch lojtu. Laareni huenliisi rusen agunijtreni ni'c

rdxe'chreni, ni'cni la'tu huenliisi rusen agulaatu nen dojl si'c baniidx Dios, ni'cni ditu guidxe'ch. ²⁹Sa'csi lojtu abaniidx Jesucrist chalilajztu xtiidxni. Niluxh xhet ni'ctis; nägajcza tedtu trabajw xcuent laani. ³⁰Cadejdtu lagajc trabajw ni cahuiitu gudedä luxh naj riejn diajgtu cadedsicä trabajwga.

**Xcälinalaslajz näjza
xcälguobduxh Jesucrist**

2 ¿La ruspaä Jesucrist lajztu? ¿La racnäj xcälrinälajztu la'tu? ¿La yu' Sprit Dxan xtenni con la'tu? ¿La yu' xcälisanälajzni näj xcälrulaslajzni lastootu? ²Palga yu'ni, colguspaa lazä, colyejn tejsi xhigab con narä, colga'p lagajc yälisanälajzga, colguidxaag sa'tu, colyejn tejsi xhigab. ³Na'c guntu nicla tej dzuun sa'csi cayutu lagajc la'tu, na'cza guntu dzuun te chä'p xpala'ntu. Colyejn xtzuumtu con yälinalaslajz, colhuii loj sa'tu si'c benroru lojtu. ⁴Na'c jiu chu tejtu lagajctis xhixtenni, coljiu tejgatu xhixten sa'ni.

⁵Colga'p lagajc sa' xhigab nani gojpza Jesucrist ⁶nani mase najcni sigajc Dios, dini niniazdzu'tz xcälrnibee Dios, ⁷alga basa'nni te laad yälrnibee nani rajpni con Xtadni Dios te gujcn mos cheni gojlni lo guedxliujre. Gujcn si'ctis te bejn. ⁸Che gujcn si'ctis ben guedxliuj, gujcn ben nadolajz, ben nasobdiidx. Basoobni xtidx Dios, gujtni lo cruzj, luxh yälrejt lo cruzj najc te yälrtuiduxh. ⁹Ni'cni baspansac Diosni, gule'cni Crist te lajt ni najc jiaaru, badeedza Dios sajcru lajni lo laj guiraa relaj

ni rusä't bejn. ¹⁰Luxh che jiejn diajgreni laj Jesucrist, suzuxhijb guiraa reni yu' xhaguibaa, guiraa reni yu' lo guedxliuj, näjza guiraa reni yu' nez nen yuj. ¹¹Te guiraareni gacbeepac, guiniizareni: "Jesucrist najc Dad", te si'c chä'pduxh xpala'n Xtadnu Dios.

Rexpejn Jesucrist najc si'c bajl ni rusanij lo guedxliuj

¹²Ni'cni, resa'ä ni sanälazä, sigajcni rusoobtu xtidxä cheni suganää la'tu, sigajcza colgusoob xtidxä naj ni yu'ä zijt, colhuii tejgatu xho gac laatu nen dojl, colyajc bejn ni rusoob diidx con yälrdxejb. ¹³Sa'csi Dios najc ni rujn dzuun nen lastootu te rajc rujntu xhigabsa'c, dxejc racnäjzani la'tu te rajc rujntu si'cni rlajzni.

¹⁴Loj guira'ti ni rujntu, na'c gusmojm̄tu, na'cza gun tiop lajztu, ¹⁵te rut gucuaquijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' laj ni tre'tu loj rebenguijdx ni rujn redzunduudx. Nez lojreni gactu si'c te bajl ni rdimbicha' si'c rebalxhaguibaa che nacäjy, ¹⁶sa'csi arapdzu'tztu xtidx yäl̄nabajn ni runiidx Crist nen lastootu te guspaatu lazä dxej cheni jääd Jesucrist, sa'csi xhet xlia'di gujc xtzunä, xhetza xlia'di cayunä dzuun naj. ¹⁷Mase lagajc xtienä guixe' te guiza' te gojn ni xca' Dios xcuent xcäl̄rililajztu, rbaa lazä, sibalaznääza la'tu. ¹⁸Sigajcza colguibaa lajztu, colguibalaznäj narä.

Timoteu con Epafrodito

¹⁹Nez loj Dad Jesucrist cayunöä guxhalgacä Timoteu lojtu te näjza

narä guibaa lazä che agucbeä xho yu'tu nejzga. ²⁰Sa'csi rutru rapädi nani rujn tejsi xhigab, tej ni guliipac gun dzuun, jiupacni la'tu. ²¹Guiraa rebejnre rujntis xtzuncareni, direni jiu gunreni xtzun Jesucrist. ²²Niluxh la'tu anajntu xho rujn Timoteu; si'c racnäj te bi'n xtdni, si'cza racnäjni narä lo xtidx Jesucrist. ²³Ni'cni rlazä guxhaläni te jäädhuini la'tu, fixgaäsi don xho sasaj xcuentä ree. ²⁴Cabäzäza nez lo Dad Jesucrist don la näjza narä saj̄l jäädhuigacätu.

²⁵Niluxh rchaloä nanabpac guxhalä bejtznu Epafrodito ni najc sa'ä loj dzuun, loj retrabajw ni cadejdnu. Lagajc la'tu baxhal̄tuni te jiuni narä, fiini xhini'c rquinä. ²⁶Laani rlazduxhni fiini lojtu, lacti cayu'ni yärsia' sa'csi gucbeetu gucxhuuni. ²⁷Guliica gucxhuuni cuentro, ameer niejtni, niluxh Dios balaslajzni laani, luxh xhet laatisni, balaslajzzani narä te di nidedäru loj yäl̄nahuinlajz ni yu'ä ree. ²⁸Ni'cni rlazä guxhalgacäni te guibalajztu che fisactu lojni, näjza te na'cru gac-huinlazä xcuent la'tu. ²⁹Colca'ni con yäl̄rbalajz si'c bejtztu lo xtidx Dios, sigajcza colyejn reni najc sigajc laani. ³⁰Xcuent xtzun Jesucrist ameer niejtni, dini niu xcäl̄nabajntisni te bejn̄ni redzuun nani di niajcdi niujntu lagajc la'tu xcuentä.

Te yäl̄nabansa'cpac

3 Naj rebetzä, colguibalajz nez lo Dad Jesucrist. Xhet najcdi gucuasacä lagajc rediidx nani abacuaä lojtu, sa'csi sacnäjni la'tu. ²Col̄nati renani najc si'c

bä'cw. Colnatiza rebejn nani rujn dzun gujdx. Colnatiza reni ru' bee tiejxhtisreni luxh xlia'si rujnreni si'c. ³Renani guliipac yu' bee najc nuure nani ahuililajz xtidx Dios, rienzanu xtuunni si'cni rlanjzi sa'csi ayu' Sprit Dxan xtenni nen lastoonu. Rbalaaznu sa'csi najcnu xpejn Dad Jesucrist, xhet xcuentdi redzuun ni rujn tiejxhnu. ⁴Narä sajcza guibalazä xcuent ni rujn tiexhä. Palga yu' chu tej ni rbalajz, narä rbalazäru ⁵sa'csi guyu'ä bee che guyu'ä xhujn gubijdx; narä nacä te rexpejn Israel; narä nacä tej rexpejn toBenjamín, nacä te hebreo, luxh xtadä najc te bejn hebreo; xcuent leii nacä te farisee. ⁶Basobduxhä guiralii rextidx Dios ni caj lo leii ni'cni basacsiduxhä rexpem Jesucrist; xcuent yäl nabansa'c xten leii, xhetliidi xtolä yu'; basobdu'tzä xtidx leii. ⁷Niluxh naj rediidx nani galoo benä xhigab sacduxh, naj xhet sajcdini sa'csi sanälazä Jesucrist. ⁸Niluxh maazru runä: runä xhigab xhet sajcdi guiraa nani rapä, sa'csi maazru sacduxh yälriembe Jesucrist ni najc Dad xtenä. Xcuent Jesucrist gulälazä guira'ti, guira'ti najc si'c guixbiujy nez loä te gunä gaan Jesucrist, ⁹te chu'ä lojni, xhet xcuentdi xcäl nabansa'cä ni najc xcuent leii, alga xcuent yäl nabansa'c ni najc xcuent xcäl rililajz Jesucrist, yäl nabansa'c ni najc xten Dios xcuent yäl rililajz. ¹⁰Ni'cni rlazä gumbeäru Jesucrist loj yäl rnibee ni rajpni sa'csi huistie gubansa'cni sacni loj rebengut, te gumbeäru retrabajwdx ni gudejndi, te ganä xho gunä ni rlanjz

Dios si'c gucbee Jesucrist, bejnzani ni rlanjz Dios che gujtni. ¹¹Te gac guidzunä lo yäl guibansac loj rebengut te xca'ä yäl nabajn par tejpas lo Dios.

¹²Dizana guiniä “abenä gaan” o “anacä bensa'c”, alga sanuätis te gunä gaan yäl nabajn nani cua'ä lo Jesucrist. ¹³La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejd, rusgää naä si'cni guiniazä nani churu gac. ¹⁴Si'cni sanuutis ruxun bejn te gunni gaan xhi guzalajzni, si'cza sanuutis cayunä dzuun nani baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

¹⁵Guiraanu nani ahuililajznu, nanab jiennu lagajc xhigabga, niluxh palga la'tu guntu ste'ca xhigab, rchaloä lagajc Dios suluilojni lojtu xcuent ni et laadi cayujntu.

¹⁶Naj, cadrotis abidzunnu lo nani abiembeenu, sigajcza nanab guibansijcnu, chanuutis gusoobnu rediidxga; nungäjäl guibajnnu loj rediidxre, jiennu tejsi xhigab.

¹⁷Rebetzä, coltanajl narä, colyejn si'c runä narä, colhuiiza rebejn nani nabajn si'c nabanä. ¹⁸Xhidajl huält aguniä lojtu, naj ronäli rnisacä lojtu, yu' xhidajl reni rdxe'ch lojtu, rniyajreni nani bejn Jesucrist che gudijxni xtojlnu lo crujz. ¹⁹Redee che luux xnezuyjreni sinitlojreni, sa'csi xtioozreni najc yäl rausa'c; luxh rbaali lajzreni rujnreni dzun xtujy; luxh riutisreni xcäl nasa'c guedxliujre. ²⁰Niluxh nuure, xhaguibaali najc laadxnu, luxh ro'cli

cabääznu jiaäd nani ruslaanu nen dojl, nalaaznu lagajc Dad Jesucrist. ²¹Laani suchaani tiexhnu ni rajpnu lo guedxliujre, te gac tiexhnu sigajc najc tiejxhni lo xcälrnibeeni. Sujnni dee con yälrnibeduxh ni rajpni te rnibeeni loj guirali'ti, guiraa nejz.

Colguibalajztis xcuent Dad Jesucrist

4 Ni'cni rniä lojtu, rebetzä nani sanälazä, lojtu ni rlazä fisacä, lojtu ni ruspaazä, lojtu ni najc yäl_nasa'c xtenä, col_sudzu'tz loj xtidx Jesucrist.

²Rniabduxhä lo Evodia näjza lo Sintique, rulidxäreni gunreni tejsi xhigab xcuent Dad Jesucrist.

³Sigajcza rniabä lojlu betzä, ni runnäj narä dzuun, gucnäj regunaare ni bennäj narä dzuun, bideednu trabajw xcuent xtidx Jesucrist. Gucnäjza Clemente näjza guiraa reni bennäj narä dzuun; alajreni caj nen reguijtz xten yäl_nabajn par tejpas.

⁴Colguibalaznäjtis Dad Jesucrist; stehuält rniä: colguibalajz.

⁵Sugacbee guiraa rebejn xho najc xcäl_nabajntu lo xtidx Dios. Asiäddzungajxh dxej xten Dad Jesucrist.

⁶Na'c guidxejbtu, col_nabtis lo Dad guira'ti, col_gudeedza xquixtios lojni la_l ni cabedx-canabtu lojni.

⁷Dios guniidx xcäl_rbedxilazduxhni, nicla guntu xhigab lacti najc yäl_rbedxilajzga. Yäl_rbedxilajzga ga'p lastootu näjza xcäriejntu loj Dad Jesucrist.

Colyejn xhigabsa'c

⁸Mbaj naj, deetis guiniä lojtu rebetzä, sa'tis rediidxre gusaantu

chu loj rexhigabtu: guiraa ni najc guliipac; guiraa rediidx ni nanab guiliä'pni xpala'nni, guira'ti nani nacsac; guira'ti nani naya; guira'ti nani najc saru; guira'ti nani rapsa'c xpala'n lajni; näj palga yu' xhi dzuun ni nacsac'pac, o palga yu' xhi te diidx ni sajc guiliä'p xpala'nni, xcuent guiraa reni'c colyejn xhigab. ⁹Nani bisieedtu, nani cua'tu, nani biejn diajgtu, nani bahuiitu benä, ni'c guntu te Dios ni rbedcxilajz, laani jiannäjni la'tu.

Gojn xten refilepenses ni xca' Pabl

¹⁰Rbaduxh lazä nez loj Dad Jesucrist sa'csi banasac lajztu gacnäjtu narä. Guliini; galooli rlaiztu niacnäjtu narä, luxh di niacijdini. ¹¹Dinä guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä. ¹²Sajc guibanä che guxii rapä; sajc guibanä che xhidäl rapä; abisiedä guibanä xhotis: sajc gauduxhä, sajcza guilianä; sajcz gapä xhidajl xhixtenä, sajcz tedä trabajw. ¹³Guira'tini sajcz gunä sa'csi Jesucrist racnäj narä. ¹⁴Niluxh xhet najcdi; laaca dzuun bejntu che bejntu xhigab gacnäjtu narä la_l ni cadedä trabajw.

¹⁵Gacbee guejbtu, dad filipenses, che gusloj caguliä xtidx Jesucrist lojtu, cheni biriä reguedx Macedonia, nicla tej guidoo di niacnäj narä, la'tistu gucnäj narä.

¹⁶Cheni yu'äli guedx Tesalónica, baxhaltu meel loä tej-tio'p huält.

¹⁷Niluxh narä di rlazä xca'ätis xhixtentu ni guniidxtu, nani rlazä najc tioobru xcäl_nasa'ctu nez lo Dios xcuent dzuun ni rujntu

ruxhaltu meel loä. ¹⁸Naj acua'ä guiraa ni baxhaltu, arapä xhidajl, arapduxhä sa'csi acua'ä nani biädnä Epafradito baxhaltu loä, te gojn ni rlianejxh si'c guxhyaal, te dzunsa'c ni rchaglaiz Dios. ¹⁹Dios xtenä guniidx lojtu guiraa nani riäädx xca'tu, si'ctisni rajpni reyäl_nasa'cduxh xhaguibaa con Dad Jesucrist. ²⁰Colguiliä'p xpala'n Dios xtadnu guixe-guixee par tejpas. Si'c gacni.

Lult xtixtios

²¹Coldeed xtixtios lo guiraa rebejn ni abia lastooni nez loj Dad Jesucrist. Rebejtznu ni yu' ree näj narä ruxhalnu xtixtios lojtu. ²²Guiraa rebenree ni abia lastooni nez loj Dad Jesucrist ruxhal xtixtios, niluxh ruxhalru resa' César xtixtios lojtu. ²³Suga'p xcälracnäj Dad Jesucrist lastootu. Sugacni si'c.

Te Guijtz Lo Reben Colosas

Bacuaa Pabl loj reben guidoo ni yu' guedx Colosas

1 Narä, Pabl nacä te apost xten Jesucrist. Dios gule narä. Narä näjza bejtznu Timoteu ²cagucuaanu reguijtzre loj reben Colosas nani nabannaya rujnreni si'cpacni rrajz Dios, näjza reni najc bejtznu lo xtidx Jesucrist. Xca'tu yälracnäjä näjza yälrbexilajz xten Dios xtadnu.

Rniab Pabl gudeed Dios yälrajn xtenni

³Rdeednu xquixtios lo Dios xtad Dad Jesucrist rniabnu lojni xcuenttu guixe-guixee. ⁴Abiejn diajgnu xho rililajztu xtidx Dad Jesucrist, näjza xho sanälajztu rebejn ni ahuililajz xtidx Jesucrist, ⁵sa'csi cabäjztu xca'tu reyälNASA'c ni yuchee xhaguibaa par la'tu. Laa xcuent reni'c ni biejn diajgtu cheni bacuadiajgtu xtidxlii Jesucrist xcuent yälruslaa lo dojl. ⁶Laa rediidxga ni abiääd lojtu sigajc ni bire'chni guideb lo guedxliuj, luxh cayac xhidajlru rebejn ni cayacbee diidxre, asalilajzreni diidxga, sigajc guzajctu la'tu. Cheni biejn diajgtu xtidx Jesucrist, dxejz biembeezatu

guliipac najc xcälruulaslajz Dios.

⁷Sigajcza bisieedtuni lo Epafras, ni sanuutis cayacnäjni nuure lo dzuun. Laani najc te beŋsa'c, yu'ni lojtu cayujnpacni xtzuun Jesucrist lacuaa nuure. ⁸Laani abasule'ni diidx loonu xho sanälajz sa'tu sa'csi nabajñ Sprit Dxaan xten Dios nen lastootu.

⁹Laa ni'cni dxejli nani biejn diajgnu diidxre xcuenttu, di cuääz cabedx-canabnu lo Dios, canabnu gacbeduxhtu xho rrajz Dios guntu, guniidxni guiraa yälrajn näjza gusanijni xcäriejntu ¹⁰te guibajntu si'cni nungäjñ guibajñ bejn ni sanajñ Dad Jesucrist, te guspaatu lajzni lo guiraa redzuun. Chanuuzatu gunrutu guiraa redzunsac näjza jianijru xcäriejntu xcuent yälriembe Dios. ¹¹Tioobrutu loj xcälñadip, xcälñribee Dios te guibaa lajztu gusutiplajztu, cue'cdxilajztu loj xhitis ni sajctu. ¹²Guibalajznu guideednu xquixtios loj xtadnu Dios nani basudzu'tz nuure te xca'nu yälñabajñ par tejpas sigajc guiraa rebejn nani ahuililajz xtiidxni yu'reni lo xpianijni. ¹³Laani abaslaani nuure loj xcälñribee yälñacäjy, abateedni nuure lo xcälñribee xi'nni ni

sanälajzni. ¹⁴Laa xi'nni ni basläa nuure neñ dojl cheni baxhe'ni xtiejn, gujtni lo crujz, dxejc gudijxni rextojlnu.

**Gubisacnu loj Dios xcuent
xcälgujt Jesucrist**

¹⁵Rut rajcdi ruhuii lo Gueb-Dios, niluxh xi'nni najc si'cpac najc Dios; si'cpac rujn lojni. Laani guyu'ni galodoo luxh rnibeeni lo guiralii ni yu' lo guedxliuj. ¹⁶Por laani benchee Dios guiralii ni yu' xhaguibaa ni yu'za lo guedxliuj, renani ruzen sigajc renani di guzen: rereii, näjza reni rnibee loj rexangl Dios, näjza reni rnibee loj rexangl bendxab, nägajcza reyälrnibee xten reguixhajg, sigajczani loj regubier, lo reguxhtis ni rajp yälrnibee, guiraani guc-chee por laani, näjza par laani. ¹⁷Alanabajn Jesucrist galooli, che gajdli guirixtiej guedxliuj. Por laani yu' guira'ti ni yu'. ¹⁸Laani najc nani rnibee guidoo, nalajznu rebejn nani ahuililajz xtiidxni. Laani najc ni guläxtiej guira'ti. Ganiddoo laani huäjs lo rebengut te rnibeeni. Loj guira'ti ni yu' laatisni najc nani sajc guinibee. ¹⁹Sa'csi bidzaglajz Dad Dios ga'p Jesucrist guiralii yälrnibee nani najc xten Dios, ²⁰por lagajcza Jesucrist badzu' Dios guira'ti ni yu', guibi'reni lojni, reni yu' lo guedxliuj sigajc reni yu' xhaguibaa, sa'csi abiäjl-lajzni, aguredxi lajzni sa'csi bixe' xtiejn Jesucrist lo crujz.

²¹Luxh la'tu gujctu si'c benzijt lo Dios sa'csi galoo rdxe'chtu lo Dios neñ lastootu xcuent redzunguijdx nani bejntu. ²²Niluxh naj abiäjl-lajz Dios abadzu' Jesucrist la'tu,

agucnayatu gubi'tu lo Dios xcuent xtiejn Jesucrist ni baxhe'ni lo crujz cheni gujtni. Ni'c bejnne te che suutu nez lojni, xhetiru xtojl'tu, xhet xhi guiniidi Dios lojtu sa'csi anayapactu. ²³Niluxh riäjl chanuu sudzu'tztu, cuedxitu lo yälirililajz. Na'c gusaantu chu gusiejch-lajztu te cuälaztu xtidx Jesucrist nani abiejn diajgtu. Rediidxga abasule'zanu loj guiraa rebejn ni re' lo guedxliujre. Luxh lagajc narä, Pabl rusule'ä diidxga sa'csi parpac ni'c gule Dios narä.

Dzuun guidoo najc xcuent Pabl

²⁴Naj rbalazä cadedä trabajw xcuenttu sa'csi retrabajw ni cadedä lagajc narä cagusa' nani cayäädx lo retrabajw xten Crist xcuent guidoo, nalajznu rebejn ni ahuililajz xtiidxni, ni najc si'c tiejxh Jesucrist. ²⁵Ni'c nacä te bejn ni rusule' diidx neñ guidooga. Dzuunga baniidx Dios gunä par xcäl'nasa'ctu te gusule'äpac guiragajc xtidx Dios, ²⁶te gacbeenu rexhigabxhiga'tz nani najc xhiga'tz galododuxh niluxh naj abaluiini redidx-xhiga'tzre loj rexpejnne. ²⁷Lojreni bejn Dios xhigab guluiini reyäl'nasa'c xten yälrdimbicha' xten redidx-xhiga'tz ni cagusule'ni loj rebenzijt. Yäl'xhiga'tzre säloj Jesucrist rbäjz neñ lastootu ni'c runlojtu chaläjztu lo yälrdimbicha' xten Dios.

²⁸Rusule'nu diidx xcuent Jesucrist, ruliidxnu guiraa rebejn, guideb yäl'najn ruluiinu te guisa' yäl'najn xten guiraa rebejn xcuent Jesucrist che guidzujnreni nez loj Jesucrist. ²⁹Xcuent dzuunre guideb xtipä

runä dzuun con guiraa yäl̄rnibee nani runiidx Jesucrist narä.

2 Rlazä gacbeetu lacti cadedä trabajw xcuentu, näjza xcuent reni yu' guedx Laodicea, näjza xcuent guiraa reni gajd gumbee narä. ²Te tioob lastoo guiraatu sa'csi abidxagsa' lastootu lo yäl̄sanälajz, näjza te ga'ptu guiraa reyäl̄nasa'c ni rajp bejn̄ che racbesa'creni xtidx Dios. Te gumbeezatu guiraa redidx-xhiga'tz xten Dios xtadnu näjza Dad Jesucrist. ³Neñ lastoo Dios näjza lastoo Jesucrist naga'tz guiraa reyäl̄nasa'c xten guiraa reyäl̄najn, guiraa yäl̄numbee. ⁴Dee rniä lojtu te di gusguee chu gusgueetu con rediidx-xhii. ⁵Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu loj yäl̄ririlajz xten Jesucrist.

⁶Ni'cni sigajc ni huililajztu xtidx Jesucrist, sigajcza col̄chasanäj Jesucrist. ⁷Col̄sudzu'tz lo Jesucrist si'c rsiobdzu'tz xlobaa te yajg. Col̄sudzu'tz lo yäl̄ririlajz xten Jesucrist si'c ni abisieedtu. Col̄gudedduxhru xquixtios lo Dios.

Yäl̄nabañcoob ni rudeed Jesucrist

⁸Col̄huii, na'c gusaantu guxhiid bejn̄ xcäl̄ririlajztu con xtiidx̄tisreni näjza rediidx nani xhet sajcdi, si'c najc xtidx reben̄ galoo, näjza si'c najc diidx xcuent xhigab xten reben̄ guedxliuj, di rediidxga gac si'cni rlajz Jesucrist.

⁹Sa'csi guiralii ni najc Dios, lagajc ni'c najc Jesucrist, niluxh yu' tiejxh Jesucrist. ¹⁰Xhet cayäädxd̄i lo yäl̄nabajn̄ xten Dios ni rajptu sa'csi najctu tejsi con Jesucrist. Laani

rnibee guiraa reyäl̄guxhtis, guiraa reyäl̄rnibee ni yu' guira lajt. ¹¹Sa'csi huililajztu Jesucrist aguyutu bee, niluxh xhet beedi nani rusäl̄ bejn̄ con ñaareni, alga xpee Jesucrist, ni najc yäl̄rusia xtoj̄l bejn̄ sa'csi rusaan bejn̄ redzunguijdx, rujnreni tejsi xhigab con Jesucrist. Si'c najc xpee Jesucrist. ¹²Cheni gurobnistu najcni si'cni agujttu ni'c biga'tztu con Jesucrist, najczani si'cni gubansactu con laani sa'csi huililajztu rajp Dios yäl̄rnibee nani gulässac Jesucrist lo rebengut. ¹³Che najctu si'c bengut lo dojl̄, näjza sa'csi di bee niu' tiejxhtu, dxejcli baniidx Dios yäl̄nabajn̄ par tejpas lojtu con Jesucrist, badzucajni guiraa rextoj̄lnu. ¹⁴Dios badzucaj guiraa relei nani basäuu nuure nen̄ dojl̄, badzucajnini lojni, sa'csi bacuaanini lo crujuj, cadro gudijx Jesucrist guiralii rextoj̄lnu. ¹⁵Cheni gujt Jesucrist lo crujuj bejn̄ni gaan loj reyäl̄guxhtis näjza guiraa reyäl̄rnibee xten ben̄dxab näjza rexspritni. Basanxtujynireni nez loj guiraa rebejn̄. Laani bejn̄ni gaanreni cheni cuajni lo crujuj.

Col̄quiiil recos ni najc xten xhaguibaa

¹⁶Nicla tejt̄u na'c cubee sa'ni xcuent reyäl̄rajw näjza reyäl̄rä', niclaza xcuent redxe lanij näjza rexchej rebäicoob, näjza redxej ni rusilajzni. ¹⁷Guiraa redee najc si'csi te balaa xten nani churu jiääd, te guluiireni ni rujn balaaga, nalajznu ni'c najc Jesucrist. ¹⁸Na'c gusaantu gudzucaj bejn̄ xcäl̄nasa'ctu te gunreni gactu nadolajz, te gant̄u reangl. Sa' bejn̄ga richu' loj nani gajdreni fii; rchaloreni najcreni ben̄ro xcuent lagajc

xhigabreni. ¹⁹Laareni direni chanajl Jesucrist nani rnibee, nani rujn roobru tiejxhni, nalajznu rexpejn̄ni, sa'csi lojni rca'reni ni rquiin lastooreni, te ruchaagni sa' tejpgareni si'c nadxaquiid bääł cuä' dzujt lo tiejxh bejn̄, te gacreni tejsi con Dios.

²⁰La'tu agujttu con Jesucrist, abiriitu lo rehxigab xten guedxliujre. Naj ěxhicuent guibajntu sigajctis nabajn̄ rebejn̄ nani di gumbee xtidx Jesucrist, ä? ěXhicuent rusoobtu rediidx ni caj lo releii? Loj releii caj sa' diidxe: ²¹“Di chahuallu dee, di gaulu ni'c, di canlu dec.” ²²Luxh guiraa redee rnitloj che runnäj̄nini dzuun. Luxh guiraa sa' leiiga najc diidxtis nani ruluii bejn̄. ²³Guluiicani sa' releiiga rien̄ asdoo ruluiireni yäl̄nanduxh, luxh che rusoob bejn̄ releiiga rchaloreni rajn̄reni Dios, rchaloreni rac nadolajzreni, rusacsı̄freni lagajc tiejxhreni. Niluxh xlai'si rujn̄reni guiraa redzuunga, sa'csi sanuutis rujn̄reni si'ctisni rlajz tiejxhreni.

3 Palga anabansactu con Jesucrist, col̄quiiil reyäl̄nasa'c ni yu' xhaguibaa cadro sobga' Jesucrist xladbee Dios. ²Col̄yejn̄ xhigab xcuenttis reyäl̄nasa'c ni yu' xhaguibaa, na'c guntu xhigabtis xcuent reni yu' lo guedxliuj. ³La'tu anajctu si'c bengut loj reyäl̄nasa'c ni yu' lo guedxliuj, luxh yäl̄nabajn̄ ni rajptu naj̄, yäl̄nabajn̄ga naga'tz con Dios xcuent Jesucrist. ⁴Che guluiilosac Jesucrist ni najc xcäl̄nabajntu, dxejc näj̄za la'tu suluilojtu con laani lo xcäl̄rdimbicha'ni.

Yäl̄naban̄biejw con yäl̄naban̄coob

⁵Col̄cuäl̄az redzunguijdx xten guedxliuj nani rujntu, yäl̄rusguee

gunaxteb, yäl̄rujn̄ recosdxuudx, recos ni rdxaglazj tiejxhtu, rehxigab-guijdx, yäl̄rsiäb-lajz xhi xten bejn̄, guiraa redee rujn̄ runijt bejn̄ lo Dios sigajc rujn̄ bejn̄ che rajn̄ bejn̄ rebanäj̄b.

⁶Guiraa redzuunga rujn̄ riäd̄ xcäl̄rdxe'ch Dios yejc renani rujn̄ sa' redzuunga. ⁷Näj̄za la'tu bejntu sa' redzunguijdxga galoo cheni guyu'tu lo sa' yäl̄nabajn̄ga. ⁸Niluxh naj̄ näj̄za la'tu colgusaan recosre; nalajznu yäl̄rdxe'ch, yäl̄ruche'ch sa'ni, yäl̄rujn̄ latzsiaj sa'ni, yäl̄rniyaj sa'ni, näj̄za rediidx-dxuudx ni rniitu. ⁹Na'c gusgheetu resa'tu, sa'csi nanab gusaantu nani bejntu cheni guyu'tu loj redzunguijdx. ¹⁰Col̄yajc te beñcoob, ni guixe-guixee cayanijru xcäriejn̄ni, te gumbesa'ctu Dios, te gactu sigajc najc Dios ni benchee benguedxliuj. ¹¹Lo yäl̄naban̄coobre rutiru benzijt, niclaza xpen̄ Israel, rutiza rebejn̄ ni ru' bee, niclaza bejn̄ ni di chu bee; rutiza benzijt, niclaza bejn̄ ni siäd̄ zitduxh; rutiza mos, niclaza bejn̄ nani di chu lo bejn̄, sa'csi che rililajz te bejn̄ xtidx Jesucrist najcni tebloj con guiraa reni rililajz xtidx Jesucrist; guiraareni najc xpejn̄ Jesucrist.

¹²Naj agule Dios la'tu te gactu xpejn̄ni nani gac naya, nani sanäl̄ajzni, col̄guibajn̄ con yäl̄rlulaslazj, na'c guidxe'chtu, col̄yacnadoo con yäl̄nadolajz, col̄niiza nadolajz. ¹³Col̄yujn̄ huant, na'c guidxe'chtu loj sa'tu, palga yu' chu sa'tu rdxe'ch loj sa'ni, col̄gusiäj̄l-lajztu sigajcni basiäj̄l-lajz Dad Jesucrist lojnu xcuent rextojl̄nu. ¹⁴Che abejntu guiraa recosre,

colguiilru yäl̄sanälajz nani rusa' loj guiraa recosre. ¹⁵Xcäl̄rbedxilajz Dios guinibee nen̄ lastootu, sa'csi parpac ni'c gurejdxni la'tu, te gaczatu tejsi con rexepejn̄ Jesucrist. Colgudeed xquixtios loj Dios.

¹⁶Xtidx Jesucrist chuduxh nen̄ lastootu con guiraa yäl̄najn, te guluiitu, te gulijdxtu tejga resa'tu con redij nani gulä'p toDavid xpala'n Dios, näjza redij nani roltu, näjza redij nani rliä'p xpala'n Dios. Redijga gołnu te guideednu xquixtios lo Dios nen̄ lastoonu. ¹⁷Guira'ti nani guntu, sigajc rediidx ni rniitu, sigajcza redzuun ni rujntu, colyejn̄ guiraani con laj Dad Jesucrist, coldeed xquixtios lo Dios xtadnu con laj Jesucrist.

**Xho nanab guibajn̄ te famil̄
ni najc xpejn̄ Jesucrist**

¹⁸Regunaa nani abachnaa, colgusoob xtidx chäältu sa'csi si'c rlajz Dad Jesucrist. ¹⁹Reniguii nani abachnaa, colchanälajz chäältu, na'c guidexchnäjtireni. ²⁰Reni najc biuux, colgusoob xtidx xtadtu loj guira'ti, sa'csi si'c rchagljajz Dad Jesucrist. ²¹Reni najc Dad, na'c guche'chtu rexi'ntu, didi gac-huin lajzreni. ²²Reni najc mos, colgucuadaijg xtidx xlamtu lo guedxliujre loj guira'ti xtzuunni. Na'c gunsa'ctu dzuun che cahuiitisreni si'c rujn renani ruspaa lajz bejntis. Con yäl̄nadolajz colyejn̄ dzuun sa'csi sanälajztu Dios. ²³Guira'ti nani guntu, colyejn̄ni guideb lastootu si'c xtzuun Dios, et si'c xtzuundi rebejntis. ²⁴Anajntu lo Dad Jesucrist sica'tu yäl̄nasa'c ni najc yäl̄nabajn̄ par tejpas, sa'csi

loj Dad Jesucrist rujntu dzuun.

²⁵Niluxh nani rujn recosguijdx, lagajc xcuent recosguijdxga gudeed Dios lojni, sa'csi tebloj rujn Dios guiraa rebenguijdx.

4 Renani najc lam̄, coldeed loj rexmostu nani riäjł xca'reni sa'csi anantu näjza la'tu rajptu xlamtu xhaguibaa.

²Colchanuu colnab lo Dios, colsusin̄ che rniabtu lo Dios. Colgudeed xquixtios lo Dios.

³Colnabza lo Dios con nuure te gacnäj Dios narä gusule'ä xtidx Jesucrist, te gusule'ä redidx-xhiga'tz xten Crist. Xcuent ni'cza yu'ä nen̄ latzguiib. ⁴Colnab lo Dios te guyasi gusule'ä rediidxga si'cni riäjł guiniä.

⁵Colguibansin̄ loj rebejn̄ nani di gumbee xtidx Jesucrist, colgusule'ä diidx cheni riäjł guiniitu lojreni.

⁶Rextiidxtu nanab gacni si'c rchagljajz Dios, saruduxhza gac xtiidxtu te gacbeetu xho riäjł gudzu'tu diidx loj tejgareni.

Lult xtixtios

⁷Tíquico, bejtznu ni sanälajznu, ni runsa'c dzuun, ni najc xmos Dad Jesucrist, laani gusule'ni diidx lojtu xcuent guiraa rextzunä. ⁸Ruxhałäni lojtu te gacbeepactu xho yu'ä, te guspaani lajztu. ⁹Laani jiädñazani Onésimo nani najc te betznu ni sanälajznu. Laani najc tej resa'tu. Laareni gusule'zareni guira'ti nani cadeednu ree.

¹⁰Aristarco, nani yunäj narä nen̄ latzguiib, ruxhałni xtixtios lojtu näjza Marcw, betz prim̄ xten Bernabé (abacuaä lojtu xcuentni, xho guntu, palga jiädhuiini la'tu, sacru colhuiini). ¹¹Näjza Jesús nani

laaza Justo, ruxha_l xtixtios lojtu. Laatisreni najc rexpejn Israel nani cayacnäj loj dzuun xten xcälrnibee Dios. Laareni ruspaazä. ¹²Epafras, ni najc te sa'tu, ruxha_l xtixtios lojtu, luxh rniabduxhni xcuenttu lo Dios te sudzu'tztu guntu guiragajc ni rlajz Dios guntu. ¹³Narä rniliä xho rdzuun Epafras xcuent la'tu, näjza xcuent rebejn ni yu' guedx Laodicea, näjza guedx Hierápolis. ¹⁴Lucas, doctoor ni sanälajznu, näjza Demas ruxha_lzareni xtixtios lojtu.

¹⁵Coldeed xtixtios loj rebejtznu nani yu' guedx Laodicea, näjza

loj Ninfas, näjza lo rebejn nani re' rolijzni. ¹⁶Cheni agulujx biltu guijtzre, colguxha_lni te jielni nejn guidoo xten guedx Laodicea, dxejcti colyelza guijtz nani baxha_lä lo reben guedx Laodicea. ¹⁷Colye'tz loj Arquipo: “Bahuisa'c xtzuum Dad Jesucrist nani cua'lu lojni. Bensa'c dzuunga.”

¹⁸Lagajc narä Pabl rucuaä xtixtiosre con lagajc naä, con lagajc xleträ. Colgusnaj-lajztu narä yu'ä latzguiib. Gacnäj Dios la'tu. Sugacni si'c.

Guijtz Ganid Lo Reben Tesalónica

**Bacuaa Pabl con reexamigwni
lo guidoo guedx Tesalónica**

1 Narä, Pabl, näjza Silvan, näjza Timoteu cacuaanu guijszre lojtu, resa'nu ni yu' guidoo lo guedx Tesalónica, reni yu' lo Dios Xtradnu näjza lo Dad Jesucrist. Guspaa Dios näjza Jesucrist lajztu, guscuedxizareni lajztu.

Xho huililajz ben Tesalónica xtidx Dios

²Guet-guejt rdeednu xquixtios lo Dios xcuent guiraatu, rnaduxhza laaznu la'tu cheni rbejdx rniabnu lo Dios. ³Ruzä'tnu lo Dios xtradnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtu sa'tu ni xhet rajpdi sa'csi rinälajztu Dios; näjza xho rutip lajztu cabäjztu guibi' Dad Jesucrist lo guedxliuj. ⁴Bejtznu, racbeenu sanälajz Dios la'tu, laani aguleni la'tu. ⁵Sa'csi che basule'nu xtidx Dios lojtu, et ganax diidxtis gujcn, niluxh xcäl'rnibee Sprit Dxan xten Dios nen lastootu bejn gucbeepactu diidx ni najc didxlii. Nanchesä'ctu xho gujcnu che guyu'nu lojtu. Si'c baluiinu la'tu te guibansa'ctu.

⁶Sigajcni nabannäjnu Dad Jesucrist sigajcza gusloj cua'tu

xmoodnu, basoobzatu diidx guideb xcäl'rbalajz Sprit Dxan xten Dios ni baniidxni lojtu, mase gudejdtu trabajw. ⁷Si'c gujc te baluiitu loj guiraa reni rililajz nez Macedonia näjza nez Acaya xho nungäj'l gac.

⁸Ni'c abire'ch xtidx Dios, xhet nejzdi Macedonia näjza Acayatis, bire'chza diidx guira nejz. Ro'c najnreni xho sanälajztu Dios, ni'c xhetru nanabti guiniinu lojreni.

⁹Alga lagajc laareni rujyreni diidx xho guyu'nu lojtu; nägajcza xho basaantu gojntu rebanäj'b te rajntu Dios ni nabajnpac ni najc guliipac.

¹⁰Rujyzareni diidx xho cabäjzzatu guibisac Jesucrist lo guedxliuj. Laazani najc Xi'n Dios ni guläs Dios lo rebengut, Jesucrist ni rusläa nuurnu lo xcäl'rdxe'ch Dios ni churu siäd.

Xhi bejn Pabl nen guedx Tesalónica

2 Naj lagajc la'tu najntu, bejtznu, et xlia'di bio'pnu lojtu. ²Et najntu xho gudéreni loonu, basacsíreni nuurnu guedx Filipos. Niluxh mase gudejdn trabajw, gusutijpnu lo Dios, xhet bidxejbtinu basule'nu xtidx Dios lojtu, mase gudejdn trabajwduxh.

³Sa'csi dinu nulijdx la'tu con didx-

xhii, ni claza didx-dxuudx, ni claza diidx ni rusguee. ⁴Sa'csi rsoobnu xtidx Dios basannäjni nuurnu xtiidxni, ni'c rusule'nu xtidx Dios. Dinu guinii diidx te jiansa'cnu lo bejn, rniinu diidx te jiansa'cnu lo Dios ni ruhuii lastoonu. ⁵Anajntu xho basule'nu xtidx Dios. Ni claz te j dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz niennu gaan xhi nica'nu. Dios nanchee xcuent ni riennu. ⁶Dizanu nidiil guiliä'p bejn xpala'nnu, ni claza la'tu, ni claza chu stee bejn, mase nungäjĭ niennu niacbeetu rajpnu yälrnibee sa'csi baxhal Jesucrist nuurnu. ⁷Niluxh guc nadolajznu che guyu'nu lojtu, cuanäjnu la'tu si'c rcanäj te nan rexpäzni. ⁸Sa'csi huinälazduxhnu la'tu, biennu xhigab xhet ganaxdi xtidx Dios guiniidxnu lojtu, näjza lagajc xaimnu guniidxnu te guseednu la'tu xtidx Dios sa'csi sanälazduxhnu la'tu. ⁹Bejtznu, la'tu rnalajztu xho biennu dzuun te biennu gaan xcäl'nabaannu. Biennu dzuun dxej-yääl, te di niednäjt nuurnu laĭ ni basule'nu xtidx Dios lojtu.

¹⁰Lagajc la'tu nancheetu, sigajc nanchee Dios, laaca biennu che guyu'nu lojtu: gujcnu bejn ni randuxh Dios, gujcnu bendxojn, gujcnu beñsa'c. ¹¹Anajntu xho baliidxnu la'tu, xho bascuedxinu lajztu si'c runnä j te dad rexingaanni. ¹²Guiraa dee biennu, te guibansa'ctu si'c nungäjĭ gun reni najc xi'n Dios, lagajc Dios ni gurejdx la'tu te chunäjntuni lo xcälrnibeeni näjza lo xcälrdimbicha'ni.

¹³Ni'cni rdedduxhnu xquixtios lo Dios sa'csi che biejn diajgtu xtidx Dios ni basule'nu lojtu, cua'tuni si'c xtidx Dios xhet si'c xtiidxdi bejn guedxliuj. Niluxh gulii xtidx Diosni, sa'csi rusiani lastoo renani rililajz. ¹⁴Bejtznu, dxejcti bejntu lagajc si'c rujn rebejn xquidoo Dios nen reguedx Judea reni najc xpen Jesucrist; luxh gusajctu lagajc ni gusajczeni, basacsĭ reben lajdxtu la'tu. Sigajcza birinajl rexpenn Israelreni. ¹⁵Rexpen Israel bagu't Dad Jesucrist, si'cza bagu'treni lagajc rexprofe'treni, renani bacuaa xtidx Dios, barilaagwzarenu nuurnu. Direni chanälajz Dios, dizarenu gusaan chanajl rebejn Jesucrist. ¹⁶Che rrajznu gulijdxnu reni digac rexpenn Israel, te näjza laareni laareni lo dojl, direni gusaan, si'ctis cagutajlreni xtojlreni. Niluxh naj abiäädpac yälrdxe'ch xten Dios yejcreni.

Rlajz Pabl nihuisacni ro'c

¹⁷Bejtznu, mase biriinu ro'c, naj dirunu guihuii lojtu, rnalazduxhnu la'tu, batijp lajznu jio'pnu ro'c, rlazduxhnu fisacnu lojtu. ¹⁸Rlajznu nio'pnu, narä, Pabl xhidal huält rlazä niälä, niluxh bendxab di nusaan. ¹⁹¿Xhini'c najc xcälrbääznu, xcälrbalajznu, xcälracnaronu? Lagajc la'tu gactuni che suunu nez loj Jesucrist che jiädsac Dad Jesucrist. ²⁰La'tu najc ni ruspaalajznu ni rliä'pza xpala'nnu nez lo Dios.

3 Dxejc, che dirunu nutijp lajznu, biennu xhigab bianxtabä guedx Atenas. ²Dxejc baxhalä Timoteu, bejtznu nez

loj Jesucrist, te biädhuiini la'tu, sa'csi laani najcni te xpeñ Dios ni runnä j nuurnu dzuun, rniini xtidx Jesucrist, te guscuecdxini lajztu, guzudzu'tzni xcärlililajztu. ³Te nicla tejtü di guidxejb che jiaäd reyälhuin sa'csi la'tu anajntu agule Dios nuurnu ni'c sidejdnu trabajw. ⁴Cheni yusijcnu lojtu, rnixgaanu lojtu sidejdnu trabajw; niluxh si'cni agusojb diidxga naj. ⁵Ni'cni diruna nutiplazä, baxhalä chu jiaädnä diidx xho najc xcärlililajztu, sa'csi cadxebä andi abasguee bendxab la'tu, luxh xlia'si biennu dzuun guyu'nu lojtu.

⁶Naj agubi' Timoteu, biädhuiini la'tu. Biadnäni ganax didxlii xho sanuu rililajztu xtidx Jesucrist, xho rinälajztuni, näjza sanuutis rnalajztu nuurnu, rlanjzatu fiitu loonu, sigajcza nuurnu rlanjznu fiinu lojtu. ⁷Ni'cni, betznu, masä riäädx xhixtenu, masä rdeednu trabajw, rbalajznu sa'csi la'tu sanuutis rililajztu xtidx Dios. ⁸Naj laaca rdxunnu sa'csi racbeenu sudzu'tztu nez loj xtidx Dad Jesucrist. ⁹Xhocha gac guideednu xquixtios lo Dios xcuent guiraatu näj xcuent yälrbalajz ni yu' lastoonu xcuent la'tu nez lo Dios. ¹⁰Dxej-yääl rniabnu lo Dios gusaanni jiophuiinu la'tu te gusa'nu guiraa rediidx ni cayäädx gacbeetu xcuent xcärlililajztu.

¹¹Rniabnu lo Xtdnu Dios, näjza lo Dad Jesucrist, gacnäjreni nuurnu te gac jiophuiinu la'tu. ¹²Rniabzanu lo Dad Jesucrist, gunni gustiobruni lastootu te ga'prutu yärlinälajz loj resa'tu näjza loj guiraa rebejn, si'cni rinälajznu la'tu, ¹³te gunni sudzu'tz

lastootu, na'c ga'ptu dojl nez lo Xtdnu Dios, che jiaäd Jesucrist näjza guiraa rexepejni xhaguibaali.

Guibajnnu si'c rchaglajz Dios

4 Naj, rebejztu, rniabduxhnu lojtu, rulijdxnu la'tu con laj Dad Jesucrist, guibajntu si'cni baluiinu la'tu nungäj] guibajntu te guspaatu lajz Dios, te si'c chanuutis guibansa'ctu nez lo Dios.

²La'tu, anajntu rediidx ni baluiinu lojtu con xcälrnibee Dad Jesucrist. ³Lagajc Dios rlanjz nayatis guibansa'ctu, na'c gun niguii dojl guesnä j gunaa ni di gac chäälni, sigajcza na'c guesnä j gunaa niguii ni di gac chäälni. ⁴Tejgatu gantu xho guibannä jtu chäälntu nayatis näjza xpala'nni. ⁵Xhet si'c ni rujndi regunadxab näjza reniguii, nicla si'c ni rujn rebejn ni di gumbee Dios. ⁶Rut chutejditu gusguee bejztu lo redzunguijdxre, sa'csi Dios susacsí guiraa rebejn ni rujnza redojlre, ni'cni abiniinu lojtu, agunixgaanu diidxre lojtu. ⁷Sa'csi Dios gurejdxni nuurnu te guibajnnu lo yäl nabannaya xtenni, xhet lo yäl nabandxuudxdi. ⁸Ni'cni bejn ni di gucuadiajg rediidxre, dini gac xtiidx te bejn ni dini cuadiajg, xtiidxpac Dios ni dini cuadiajg, Dios nani abaniidx Sprit Dxaan xtenni loonu.

⁹Ditu guiquiin gucuäaru diidx xho chanälajztu resa'tu, sa'csi lagajc Dios abaluiitu xho chanälajztu resa'tu. ¹⁰Luxh rinälajztu guiraa reni rililajz, guiraa reni siääd guideb nez Macedonia. Ni'cni rniabnu lojtu bejztu, chä'pru xcärlinälajztu. ¹¹Colgutijp lajztu,

dxitis colguibajñ, coljiu xtzuuncatu, lagajc naatu colyejn dzuun si'cni agunibeenu guntu. ¹²Te fii rebejn ni di chalilajz laaca nabansa'ctu, nãgajcza te xhet jiããdxdi xhi rquiintu.

**Xho gac che jiãdsac
Jesucrist lo guedxliuj**

¹³Bejtznu, rljaznu gacbeetu xcuent rebengut te di gac-huin lajztu si'c rujn rebejn ni di chalilajz xtidx Dios. ¹⁴Si'c ni rililajznu gujt Jesucrist, dxejc gubansacni, sigajcza rililajznu suspansac Dios guiraa reni nagayejs nen baa, renani huililajz xtidx Jesucrist. Luxh che guibi' Jesucrist, siãdnãnireni.

¹⁵Xcuent xcãlrnibee Jesucrist rniã lojtu, nuurnu ni nabajñnu che jiãdsac Jesucrist, dinu nid loj reni nagayejs nen baa. ¹⁶Sa'csi lagajc Dad Jesucrist siãjt lo guedxliujre, sixedxa'ni, siejnza xse' guixhajg ni rnibee, sixedxa'za trompet xten Dios. Dxejc sibanxgaa reni nagayejs nen baa, reni huililajz xtidx Crist. ¹⁷Dxejc nuure ni nabansijcnu sidxaagnureni nen rebãj te lo bej chachagloonu Dad. Si'c chonnu cholaznãjnuni par tejjpas. ¹⁸Ni'cni rniã lojtu, colcuedxilajz sa'tu con rediidxre.

5 Niluxh xcuent redxejga, reijzga, xhet riquiinditu gucaaãni lojtu, ²sa'csi la'tu anansa'ctu sidzujñ dxej ni jiããd Jesucrist cheni rut cayunlojdini, sigajc che riããd te gubaan yããl. ³Che canii bejn: "laaca dxunnu, dxunsa'cnu", chela gacbeereni acadajdreni trabajw si'c che rdzujñ yãlnayan te gunaa che rajl xi'nni,

luxh digacdi guxunreni lojni.

⁴Niluxh bejtznu, di gac nayããltu te di che xhet cayunlojditu dxej xten Jesucrist, guidzuxhiga'tz dxejga si'c gubaan. ⁵Sa'csi guiraa tu najctu bensa'c nabajntu lo bianij, lo rdxee, dinu gac benguijdx, dinu guibajñ lo yããl, lo yãlrcãjy.

⁶Ni'cni di nungãjl guidiesnu si'c rejs stecuaa bejn, ni'cni nungãjl sunasinnu na'cza jiennu redojl ni rljaz tiejxhnu. ⁷Reni rejs, rejsreni yããl, reni rsiojz, rsiojzreni yããl.

⁸Niluxh nuure nabajñnu lo rdxee, ni'cni nanab na'c jiennu si'c, riãjl xca'nu yãlrililajz nãjza yãlrinãlajz si'c rca' soldaad gamangw guiib ni rajcwni, ni rusãuu lastooni. Riãjlza guilãdzdu'tznu sa'csi yãlruslaa lo dojl najc si'c xhumbrel-guiib ni ru' yejc soldaad ni rusãuu yejcnì.

⁹Sa'csi di Dios nibe nuurnu te chonnu gabijl, alga guleni nuurnu te xca'nu yãlnabajñ ni rudeed xi'nni, Jesucrist. ¹⁰Sa'csi gujt Jesucrist lacuaa nuurnu, te guibannãjnuni masã nabajñnu lo guedxliujre o nagayejsnu nen baa che guibi'ni.

¹¹Ni'cni, colguspaa lajz sa'tu, tejtù sigajcza steetu, sigajcni cayujntu naj.

Rulijdx Pabl resa'ni

¹²Bejtznu, rniabduxhnu lojtu, colhuiduxh reni ruluii xtidx Dios lojtu, sa'csi agule'c Dadreni te guinibeereni, te gulijdxreni la'tu.

¹³Riãjlza chanãlazduxhtureni xcuent dzuun ni rujnreni. Colcuedxi con resa'tu.

¹⁴Rulijdxnu la'tu, bejtznu, colgulijdx reni najc benlatsiaj; colsudzu'tz lajz reni guxii rbalajz

lo xnez Dios; colgacnäj reni di gumbesa'c xtidx Dios, colcuedcxi lajz guiraasi bejn.

¹⁵Colhunii di chu tejtü gunza dolguijdx lo rebejn ni rujn dolguijdx. Laaca guntu ganax dzunsa'c lo sa'tu, sigajcza lo chutis bejn.

¹⁶Colguibalajztis guideb nabajntu. ¹⁷Na'c cuääz guiniitu lo Dios. ¹⁸Mase xhitis rsiajctü, coldeed xquixtios lo Dios, sa'csi si'c rlaiz Dios gun reni rililajz Jesucrist.

¹⁹Di cuälaztu xtidx Sprit Dxañ xten Dios ni rniini nen lastootu. ²⁰Na'c cuälaztu xtidx reni rniitid xtidx Dios xcuent nani churu gac. ²¹Colquiil guiraa rediidx, coljiannäjtis rediidx ni najc

didxsa'c. ²²Colbicaj lo guiralii dolguijdx.

²³Lagajc Dios, Dios ni rbecdxi lajztu, gusiapac lastootu, te cucheeni xaimtu, näj lastootu, näjza tiejxhtu, te na'c guntu dojl ni di riäjil guntu te cuääztu dxej ni guibisac Dad Jesucrist. ²⁴Dad ni gurejdx la'tu rujnza guiraa ni rniini, ni'c sujnzani guiraa redzuunre.

Ruzadiidxnireni

²⁵Bejtznu, colnab lo Dios xcuent nuurnu.

²⁶Colgudeed xtixtios lo rebejtznu ni yu' ro'c.

²⁷Con laj Dad Jesucrist rnibeä, goltu guijszre loj guiraa rebejtznu.

²⁸Gacnäj Dad Jesucrist la'tu. Sugacni si'c.

Guijtz Ni Rojp Lo Reben Tesalónica

Rucuaanu guiitzre lojtu, rexpən Jesucrist ni rbäjz guedx Tesalónica

1 Narä Pabl, näjza Silvan näjza Timoteu, cacuaanu guiitzre lojtu, rebejtznu ni yu' guidoo lo guedx Tesalónica, reni yu' lo Dios Xtadnu näjza lo Dad Jesucrist. ²Gacnäj Dios Xtadnu näj Dad Jesucrist la'tu, guscuecdxizareni lajztu.

Gun Dios yälguxhtis loj rebejdojl che guibi' Jesucrist lo guedxliuj

³Bejtznu, rudeednu xquixtios lo Dios xcuenttu, si'c riäjł jiennuni, sa'csi xcälrlililajztu siädroobru, näjza yälrlinälajz ni rajp tejgatu näjza sa'tu siädroobruni. ⁴Ni'cni rliä'pnu xpala'ntu neñ reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdtu trabajw, rusacsı bejntu. ⁵Dee ruluiipac xcälguxhtis Dios najc laaca, ni'c rniı Dios riäjł jju'tu lo xcälrnibeeni sa'csi cadejdtu trabajw xcuent yälrnibeega.

⁶Sa'csi rujn Dios xhigab riäjłza quix reni bateedtu trabajw xtojłreni, ni'c suteedzani reni'c trabajw. ⁷Niluxh la'tu ni cadejdtu trabajw, sujn Dios gusilaznäjtu

nuure che guluiiloj Jesucrist, siriini xhaguibaa siädnäjni rexanglni ni sajc, ni rnibeduxh. ⁸Lo te balduxh siädäni, dxejc guisloj susacsıduxhni reni di gan Dios, dizareni gusoob xtidx Dad Jesucrist nani rudzucaj dojl. ⁹Guiraareni sidejdreni trabajw, par tejpas agunijtreni, zijt chureni lo Dios, lo yälrdimbicha' xten xcälrnibeeni. ¹⁰Che jlääd Dad guiriini xhaguibaa, dxejga siliä'p rexpejñni xpala'nni, sidxelojza renani huililajz laani näjza la'tu, sa'csi huililajztu diidx ni basule'nu che guyu'nu lojtu.

¹¹Ni'c rniabtisnu lo Dios por la'tu, rniabnu lo Dios guinaj lajznu nabajntu si'c riäjł guibajñ reni guleni. Rniabzanu guiniidx Dios lojtu guntu guiraa redzunsac ni rchagłajz Dios guntu, gacnäjzani la'tu con xcälrnibeeni te guntu redzuun ni rujntu sa'csi rililajztu. ¹²Te chä'p xpala'n laj Dad Jesucrist si'cni nabajntu, te laani guiliä'pzani xpala'ntu, xcuent yälrlinälajz xten Dios näjza Dad Jesucrist.

Bendolduxh

2 Naj, rniabduxhnu lojtu bejtznu, xcuent dxej ni jlääd Jesucrist, dxej ni guidojppzanu lojni, ²na'c

chugajtu yarsia!. Na'cza gusaantu
guchejbreni la'tu con diidx ni ruluui
te bejn ni najc profe't, nicla con diidx
ni rnii stee bejn lojtu, niclaza con
diidx ni naareni lojtu caj loj te guijtz
ni naareni baxhaľnu lojtu, cadro caj
“dxej ni guibi' Jesucrist abidzujn”.

³Na'c gusaantu gusguee bejn la'tu
xcuent rediidxre. Che gajd dxejga
guidzujn, su' bejn ni sibälaz xtidx
Dios, dxejc suluiloj beľlatsiaduxh,
xi'n nani sinitloj par tejpas. ⁴Bejnre
siliä'p lagajc xpala'nni, sidxe'chni lo
guiraa ni sanä laj Dios, näjza xhitis
ni rajn bejn, te cueni neľn xquidoo
Dios, guluilojni si'c lagajc Gueb Dios.

⁵ĽLa di lajztu guisaj cheni
guyusicä lojtu, rniä rediidxre
lojtu, ä? ⁶Naj la'tu anajntu xhini'c
ruscuääzni, te na'c guiricajni ansde
guisa' redxej xtenni. ⁷Te yälxhiga'tz
najc dzunlatsiaj ni alacayajc lo
guedxliuj, cayäädxtis guibicaj
nani caguscüääzni galäiini. ⁸Dxejc
suluiloj beľlatsiaduxhre. Niluxh Dad
Jesucrist, sugu'tnini con bero'ni, che
guibi' Jesucrist lo guedxliuj xpianijni
sujn nitlojni. ⁹Beľlatsiaduxhre najc
si'cpac najc beľdxab. Che guidzujn,ni,
guidzujn,ni si'c te bejn nani rnibee,
sujnni seen, sujnzani milagrw ni
rusguee. ¹⁰Con xcällatsiaj bejnre
susgueeni guiraa renani alagunijt lo
Dios sa'csi direni nicäjb ninälajzreni
didxlii ni nuslaareni neľn dojl. ¹¹Ni'cni
susaan Dios jääd te yäľrusgueduxh
te chalilajzreni didx-xhii. ¹²Te gabijl jii
guiraa renani di nicäjb nililajz didxlii,
alga bidxaglazreni yällatsiaj.

Reni gule Dios guirii neľn dojl

¹³Niluxh nuurnu riäjľ gudeedtisnu
xquixhtios lo Dios por la'tu, bejtznu,

ni sanälajz Dad Jesucrist. Rudeednu
xquixhtios sa'csi galooli gule Dios
la'tu te guslaani la'tu lo dojl, xcuent
Xsprit Dxanni ni rusia lastootu,
näjza redidxlii ni huililajztu.

¹⁴Ni'cni che biejn diajgtu diidx ni
basule'nu lojtu, gurejdx Dios la'tu,
te xca'zatu xcälrdimbicha' Jesucrist.

¹⁵Naj bejtznu, colchanuu,
colsudzu'tz, na'cza jäällajztu rediidx
ni balijdxnu la'tu che guyu'nu ro'c,
näjza rediidx ni bacuaanu lo guijtz ni
baxhaľnu lojtu. ¹⁶Lagajc Dad Jesucrist,
näj Dios Xtadnu, ni sanälajz nuurnu,
ni ruscäjn lajznu par tejpas, ni
baniidx xcälrbääznu racnäjni nuunu,
¹⁷guspaani lajztu, gusudzu'tzni la'tu
lo guiraa redidxs'a'c ni guiniitu näjza
redzuunsa'c ni guntu.

Colnab lo Dios xcuent nuurnu

3 Bejtznu, colnab lo Dios xcuent
nuurnu te chanuu guire'ch xtidx
Dad Jesucrist, te che gusoob bejn
diidxga chä'p xpala'n diidxga, sigajcni
gucjci con la'tu. ²Colnabza lo Dios
xcanäjni nuurnu te di tednu ladznäa
rebeľlatsiaj, rebenguijdx, sa'csi xhet
guiraadi bejn rajp yäľrililajz. ³Dios
rusoob xtiidxni, susudzu'tzni la'tu,
sacnäjzani la'tu te di sactu dolguijdx.
⁴Abascuedxi Dios lastoonu xcuenttu
sa'csi anancheenu cayujntu guira'ti
nani gunibeenu guntu, luxh si'cza
sinuu gusoobtu xtiidxnu. ⁵Canabä lo
Dad Jesucrist guniidxni gacbeerutu
xcäľsanälajz Dios, canabäza
colcuedxi lajztu si'cni bejn Crist che
gudejdni trabajw.

Nanab jiennu dzuun

⁶Bejtznu, con laj Xtad Jesucristnu,
rnibeenu guibicajtu lo chutis te

sa'nu ni ricanzajtis, ni di rlaž gunni dzuun. Guibicajzatu lož reni di guibajñ si'cni baluiinu riäñ guibajñtu. ⁷La'tu anajntu xho riäñ guibajñtu, chanuutu guntu si'cni riennu nuure. Najntu nuurnu dinu nicanzaj che guyu'nu ložtu sa'csi biennu dzuun. ⁸Dizanu nidauxlia' xcu'n chu težtu; guiraani bidiixnu, biennu dzuun dxej-yääl, te di nutaalnu xtzuun chu težtu. ⁹Masä nungäñ niniabnu niacnäžtu nuurnu, dinu niniabni; alga biennu dzuun te baluiinu xho chanuutu. ¹⁰Cheni guyu'nu ložtu, gunibeenu scree guntu: Chutis ni di rlaž gun dzuun di riäñ xca'ni xhi gauni. ¹¹Aguniireni loonu baltitu rcanzajtis, direni gun dzuun, alga rihuiireni xhi cayujñ rebejñ.

¹²Rulijdxnu rebejñre, rnibeenureni con laž Xtad Jesucristnu: cołcuedxi, cołyejñ dzuun te gautu.

¹³Bejtznu, na'c guidxajgtu guntu dzunsa'c. ¹⁴Palga yu' chu težtu di gucuađajg xtiidñxnu ni caj lo guijtzre, cołhuui chuni'cni te na'c guchaagtuni, te guitujyñi. ¹⁵Niluxh na'c gałptuni si'c ni rdxe'ch ložtu, cołguliidñxni si'c bejtzu.

Rusadiidñireni

¹⁶Gueb Dios xten yäłrbedxi, guscueedxi lažztu guixe-guixee, masä xhitis sajctu. Jiannäž Dad Jesucrist guiraatu.

¹⁷Narä, Pabl cacuaä xtixtiosre con naäpac si'c runä lo guiraa rexquitzä, scree rucuaä. ¹⁸Gacnäž Xtad Jesucrist guiragajctu. Sugacni si'c.

Guijtz Ganid Lo Timoteu

Pabl rucuaa te guijtz lo Timoteu

1 Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni rusläa nuurnu lo dojl näjza Dad Jesucrist nani cholääznu. ²Timoteu, luj najclu si'cpac xinganä lo yälirililajz. Xtadnu Dios näjza Xtad Jesucristnu gacnäjl, gulaslajzreni luj, guscuecdxireni lastoolu.

**Pabl rulijdx xcuent reni
ruluii diidx-xhii**

³Che sia'ä reguedx Macedonia, gunibeä jia'nlu guedx Éfeso te gulijdxlu gaii bejn te na'c guluiireni garenca diidx, ⁴te na'c jitejreni rexcuent rebenttemp, te na'cza jiuuduxhrene chu gujc rexpengoldooreni, sa'csi di rediidxre gacnäj guiroobru lastooreni si'c rustioob yälirililajz lastoonu. Naj rnibeä si'c chanuu gulijdxlu rebejn.

⁵Rulijdxnu bejn te ga'preni yälrinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni. ⁶Yu'reni abarön rediidxre, riejtis ro'reni saniduxhrene diidx ni xhet sajcdi.

⁷Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluiireni, räjpreni, 'didxliipac dee'.

⁸Anajnnu leii xten Dios najc sacduxhni, palga jiennu si'cni rniipacni. ⁹Najnnu di leii gac par bensa'c, najcni par reni najc beñlatsiaj ni di jiu leii xten Dios, näjza reni di gusoob diidx; par reben guiidx, näjza rebendojl; par reni di jiu Dios, näjza reni rusguee; par reni rugu't xtadni, xnanni, näjza guiraa reni rugu't bejn; ¹⁰par reni resnäj te gunaa ni digac chäälreni, näjza reni resnäj lagajc saniguiireni; par reni rbajn bejn; reni rnii didx-xhii; reni rnii didx-xhii si'c didxle' parsi rusguee sa'reni; näjza bejn ni rujn xhitis xhi xtee dzuun ni digac dzunsa'c, ¹¹nalajznu sa' redzunsa'c ni rulijdx xtidx Dios-le', diidx ni rusläa lo dojl. Narä biannä diidxre.

**Rudeedni xquixtios lo Dios
sa'csi rulaslajznini**

¹²Rdedä xquixtios lo Dad Jesucrist ni runiidx yälrnibee narä sa'csi najnni nasobdidxä, ni'cni guleni narä gunä xtzuunni. ¹³Luxh

galoo guniyaáni, birinalä xpejn̄ni, basacsíäreni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä. ¹⁴Niluxh lacti guroob gujc yälracnäj xte Xtadnu, guideb yälirililajz, näj yälsanälajz ni rajp Jesucrist.

¹⁵Diidxre najc guliduxh, nanab chalilajz pactuni: Jesucrist biäd lo guedxliujre te gusläani reben̄ dojl̄; lo reben̄ dojl̄ narä nacäru bendod̄duxh. ¹⁶Ni'cni balaslajz Dios narä, mase nacä bendod̄duxh lo guiraareni, te ganid con narä guluini xho rbäjz Jesucrist te chalilajz bejn̄ xtiidxni, te filoj reni churu chalilajz xtiidxni te ga'preni yäl nabaj̄n par tejpas. ¹⁷Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni colguiliä'p xpala'n̄ni, colgaj̄n̄ni guideb guibaj̄ntu näjza par tejpas. Si'c gacni.

¹⁸Xi'nä, Timoteu, dee najc yäl̄rulijdx ni runidxä lojlu te gucuaasa'clu si'c te soldaad ni abisieed, sigajc ni gunii reprofet̄ xcuentlu galoo. ¹⁹Di gunijtlu yäl̄irililajz, bejnza xhigabsa'c, sa'csi yu'reni abar̄o'n̄ xtidx Dios, ni'c abanijtreni yäl̄irililajz. ²⁰Si'c gusajc Himeneo näj Alejandro, luxh abatedäreni ladz̄naa bendx̄ab te guisieedreni na'c guniia'reni Dios.

Ruluini xho guiniabreni lo Dios

2 Rulidxälu ganiddoo cueedxlu, guiniablu lo Dios, gudeedlu xquixtios lo Dios xcuent guiraa rebejn̄. ²Guiniabzalu xcuent rereii näj guiraa reni rnibee lo guedxliujre, te gac guibandxinu, te gac chanuunu xnez Dios, te saru

guibaj̄n̄nu. ³Sa' yäl̄rniabga najc laaca, luxh si'c rdxaglajz Dios ni rusläa nurnu lo dojl̄ guiniabnu lojni. ⁴Dios rlajz laa guiraa bejn̄ lo dojl̄, rlajzani gacbeepacreni xtidxliini. ⁵Yu' tejtis Dios, näjza tejtisza nani rusiäj̄l̄ diidx lo Dios näjza loj reben̄ guedxliuj. Laani najc Jesucrist ni gujca niguii. ⁶Jesucrist gujt lo cruz̄ te gudijxni redojl̄ xten guiraanu ni tre' lo guedxliuj. Dee gujc che gojl̄ dxej ni gule Dios. ⁷Dios gule narä te gacä apost te gusule'ä xtiidxni, yäl̄irililajz näjza didxlii lo reni di gac xpejn̄ Israel. Si'c ni rlajz Jesucrist rniä didxlii, dina guiniä diidx ni rusguee.

⁸Ni'cni rlazä guiraatis lajt guiniab rebejn̄ lo Dios, saru guiliäs naareni, gusaanreni yäl̄rdxe'ch, na'c gunreni bieje. ⁹Si'cza regunaa, saru gacwreni xhajibreni, na'c gacreni gunaroxhi, cuedxireni. Xhet si'c di regunaa ni entis rsiucheduxh con oor o perl o ladsajc, rajc guichniil yej̄cni te guidxeloj bejn̄reni.

¹⁰Masru ruchaag gunreni si'cni rchalglajz Dios, si'c riäj̄l̄ gun guiraa regunaa ni yu' lo Dios. ¹¹Riäj̄l̄ dxitis gucua diajg regunaa xtidx Dios ni rusule' reniguii. ¹²Dina xcäbä gusule' te gunaa diidx lo guiraa rebejn̄, niclaza guinibeeni lo reniguii, dxitis cueni lo rebejn̄ ni cagucua diajg diidx nani cagusule'ni. ¹³Sa'csi ganid benchee Dios Adán, dxejctiru bencheeni Eva. ¹⁴Luxh et Adandi basguee bendx̄ab, bendx̄ab basguee gunaaga, dxejc biajbni nen̄ dojl̄. ¹⁵Niluxh siliaa regunaa, palga jiuren̄i xtzunreni si'c nan, palga chanuu chalilajzreni xtidx Dios, palga chanälajzreni sa'reni,

palga chutisreni lo Dios, gaczareni gunasa'c cuedxireni.

Xho riäjł gac reni rnibee

3 Dee najc didx gulii: palga rłajz te niguii ga'p dzuun xten Dios, gusule'ni xtidx Dios, guinibeeni rebejn, te dzunsa'c najc ni rłajzni gunni. ²Ni'cni, ni rłajz gac nani rnibee, riäjł guibansa'cni te na'c chu xhicient guiniyaj rebejn. Riäjł gacni chääł tejtis gunaa, riäjł susinni, gacni te beńsa'c, cuedxini, te guibansa'cni. Riäjłza di gudxojnni rolizni guidzujn bejn, nągajc riäjł gacni te bejn ni nansa'c te guluiini. ³Na'c gacni te bengu, nicla te ni rdxagdijł bejn, na'cza gacni te nani rsia' lajzni ga'pni xhidajł meel, riäjł cuedxi lajzni, na'c chanalajzni meel. ⁴Riäjł guinibesa'cni rolizni, saru gunni te gusoob rexi'nni xtiidxni. ⁵Sa'csi palga di te bejn gan xho guinibeeni lagajc rolizni, aticaxh gac ga'pni guidoo xten Dios. ⁶Di riäjł guinibee te beńcoob nani entis huililajz, te di guschä'pni xpala'nni sas jıajbni lo lagajc xcälñaj Dios ni bıajb beńdxab. ⁷Luxh riäjłza guinii reni di chalilajz xtidx Dios laaca najcni, te na'c jıanxtujyni, te na'cza jıajbni ladzńaa beńdxab.

Xho riäjł gac reni rcanäj neń guidoo

⁸Si'cza rediaconos riäjł gacreni bejn ni yu' xcäriejnreni, nanab gunreni si'cpac ni rniireni, na'cza soozreni, na'c xca'reni meel ni direni niunsa'c gaan. ⁹Riäjł gapdzu'tzni rediidx nagajn xten yälřililajz, ni'c nanab gac naya lastooreni. ¹⁰Riäjł fixgaatu xho

nabajnreni. Palga nabańsa'czeni, rutza gacdi gucuaquıjdireni, sajc gacreni diacono. ¹¹Regunaa ni rłajz gac diaconas riäjłza chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun. ¹²Riäjł gac rediacono chääł tejtis gunaa. Riäjł guinibesa'cni rexi'nni nąj guiraa reni yu' rolizni. ¹³Sa'csi rediaconos ni runsa'c xtzuunni, sanalajz bejnreni, dizareni guidxejb rsiudzu'tz lastooreni lo xcälřililajz xtidx Jesucrist.

Gurobduxh najc yälxhiga'tz xten Jesucrist

¹⁴Cacuaä diidxre lojlu, niluxh rłazä jıädhugaä la'tu. ¹⁵Luxh palga gacłää, anajnlı xho riäjł guibajn bejn roliz Dios, nalajznu xquıdoo Gueb Dios ni nabajn par tejpas. Guidoore rniasdzu'tz nąza ruluiiru didxlii xten Dios. ¹⁶Rdxeloyaduxh guiralii bejn yälxhiga'tz xten xcälñajn Dios:

Dios biääd lo guedxliuj si'c te benguedxliuj,
 Sprit Dıan xten Dios gunii beńdxanni;
 bahuii rexangl Dios lojni;
 basule'reni xtiidxni lo rebejn ni di gac xpejn Israel;
 guira lajt huililajz bejn xtiidxni;
 huąjsni lo xcälřrdimbicha' Dios xhaguıbaa.

Reni rbicaj lo xnezyuj Dios

4 Aguniipac Sprit Dıan siääd redxej che chu reni guř'n yälřililajz, sucuadijgreni xtidx rebejn ni rusguee nąj xtidx

rebendxab, ²nicla jiureni rniireni didx-xhii ni rusguee, sa'csi xhetiru xcäriejnreni, anajcni si'c najc cadro rudxujy te guiblaa: xhetru racbeedini. ³Suluii rebejnre na'c guchnaa bejn, suluiizareni na'c gau bejn guiraloj, niluxh Dios bejnpac redee te xca' rebejn ni rililajz, ni racbeeza didxlii, te gudeedreni xquixtios lo Dios. ⁴Guiralii reni benchee Dios najc laaca, di riäjł cuälaznu xhi rca'nu che rudeednu xquixtios loj Dios. ⁵Sa'csi xtidx Dios näj yälrbedx-rniab lo Dios runsa'c guira'ti.

Te ni runsa'c xtzuun Jesucrist

⁶Palga susnajlu lajz rebejtznu rediidxre, sajclu te mossa'c xten Jesucrist, luxh si'c sisieedruzalu diidx xten yälrlililajz, näj yälrluisa'c ni sanuulu. ⁷Na'c jiulu ni rni regunaroyeii ni xheti xtzuunni. Bisieed sudzu'tz lastoolu lo xtidx Dios. ⁸Guxii sajc guinibduxh bejn te gusutijpni tiejxhni. Niluxh sacduxhru cucheeni xtidx Dios nen lastooni, sa'csi racnäjni bejn lo yäl nabajñre näjza lo yäl nabajñ ni najc par tejpas. ⁹Dee najc didxlii, riäjł chalilajz guiraatuni. ¹⁰Ni'c riennu dzuun, rdeednu trabajw, sa'csi cabäjznu Gueb Dios ni nabajñ, ni ruslaa bejn lo dojl, ganiddoo renani rililajz xtiidxni.

¹¹Sajplu guinibeelu soob rediidxre, näjza guluiilu rediidxre. ¹²Di gusaanlu cuälazreni luj sa'csi najclu bi'n; riäjł gaclu te ni suu te fii guiraa reni rililazsa'cpac xho rniilu, xho nabajñlu, xho sanälajzlu sa'lu, xho rililajzlu, näjza xho rajplu xhigabsa'c. ¹³Lał ni guidzunä ro'c,

bił xtidx Dios lo rebejn, balijdxreni, baluiiza xtidx Dios lojreni. ¹⁴Di gusaanlu reyälñajñ ni baniidx Dios lojlu cheni basuj rebengool naareni yejclu por xtidx Dios, guniireni diidx xcuent nani churu gac.

¹⁵Guet-guejt basnaj lajzlu rediidxre, biusa'c rediidxre, te gac fii guiraareni xho sanuulu lo xtidx Dios. ¹⁶Gopdzu'tz lagajc luj näjza rediidx ni ruluiilu; guzudzu'tz lo guiraa rediidxre, te si'c laalu lo dojl, te laaza reni rucuaadijag xtiidxlu.

Xho guibañnäjnu reni rililajz

5 Na'c quidxa'lu loj te bengool; guninäjni si'c xtaclu, balijdx rebi'n si'c bejtzlu, ²balijdx renanbengool si'c xnanlu, balijdx redxap steeb si'c rebisiajnlu con rehxigabsa'c.

³Gucnäj rebiuud ni guliipac rquiin chu gacnäjreni te chu xhi gaureni. ⁴Niluxh palga yu' chu biuud yu' xi'nni o xajgni, suguisiedxgaareni guibañ nayareni lo xnez Dios, te quiixreni di'n ni nasäabreni lo xtaclreni, näj xnanreni ni baslaareni, sa'csi ni'c najc laaca, rdxaglaizza Diosni. ⁵Gunaa ni najcpac biuud, abia'n xtebni, ni'c rbäjztisni lo Dios, dxex-yääl rbejdx-rniabni lo Dios. ⁶Niluxh biuud ni nabajñ cadedgustisni najc si'c te ni agujt nen dojl. ⁷Basule' rediidxre lojreni te rut gucuaquijdireni. ⁸Palga yu' chutej ni di gacnäj resa'ni, lagajc reni rbäjz rolizjni, ni'c agulälaz xtidx Dios, benguijdxru najcni lo rebejn nani di chalilajz xtidx Dios.

⁹Di gucuaalu laj rebiuud lo guijtz te gacnäjtuni palga gajdni chu gayojñ ijz. Riäjłza gac biuudga

te gunaa ni gubannäsa'c chäälni.

¹⁰Riäjlza gumbee bejn̄ni xcuent redzunsac'c ni rujnni; palga baslaani rexi'n̄ni, palga badedlaani rolijzn̄i gues beñ zijt, palga gudiibni ni' rexejñ̄ Dios te si'c guzeñ̄ xcäl̄nadolajzn̄i, palga racnäj̄ni reni rdej̄d trabajw, palgaza riuni rujnni guira'ti redzunsac'c.

¹¹Niluxh na'c gucuaalu laj biuud ni yu' guxiiru ijz sa'csi che guichaglajzreni te niguii, siällajzreni diidx ni bia'nreni lo Jesucrist, te rlanj̄ni guchnasacreni.

¹²Dxejc siu'reni neñ̄ dojl̄ sa'csi rbälazreni rediidx ni bia'nreni che galoo bejn̄reni xhigab ninuureni lo xtzuun Dios. ¹³Dxejc sia' lojreni xhet gundireni, rijreni rolijz bejn̄ ricuereñi. Luxh malaii ni'ctis gunreni. Niluxh rliäszareni didxxhii, richu'reni lo xhitis, rniizareni diidx ni di guchaag guiniireni.

¹⁴Ni'cni rlazä rebiuud ni najc dxa'pru guchnaareni stehuält, chu xi'nreni, fisa'creni rolijzreni te na'c guiniyajreni rebejn̄ ni rdxe'ch lojnu.

¹⁵Sa'csi yu' gaii biuud ni alagubicaj lo xnez Dios sanajlreni beñdxab.

¹⁶Pal yu' tej resa'nu ni najc sa'ni te biuud, riäj̄l gacnäj̄nini, na'c gusaanni gutajl̄ni xtzuun guidoo, te si'c guidoo saj̄c gacnäj̄ rebiuud ni rquinpac chu gacnäj̄reni.

¹⁷Rebengool ni rnibesa'c guidoo, riäj̄l chanälajzrutureni näj gudeedrutu guiraa nani rquiniireni, si'c najc reni rusulesa'c xtidx Dios, rulidxsac'reni la'tu con xtidx Dios.

¹⁸Sa'csi lo xtidx Dios caj scree:

“Na'c gusällu guijxh ro' gon che rusiani triuu”; si'cza caj stee diidx: “Riäj̄l gax bejn̄ ni rujn dzuun.”

¹⁹Na'c cucuadiajglu xtidx tej ni rucuaquij te bengool palga ruti tio'p, choñ̄ testiigw. ²⁰Niluxh reni sanuu rujntis dojl̄, riäj̄l gulijdxlureni nez loj rebeñ̄ guidoo, te näjza laareni guidxejbreni. ²¹Nez loj Dios, nez loj Dad Jesucrist, nez lojza reangl ni gule Dios, rulidxduxhäl̄u chanuulu lo rediidxre, na'c jiurulu tej bejn̄ lo sa'ni. Bejn̄ tebloj loj guiraa rebejn̄. ²²Na'c gusiojb lajzlu gusuju lu naalu yejc te bejn̄, te gacni beñ̄ guidoo palga gajd̄ni guisieed guibañsa'cni lo xnez Dios sa'csi lagajc yejcl̄u jiajb rextojl̄ni. Gubicaj lo guiraa dolguijdx.

²³Na'cru yälu ganax nis. Gu'za tudxe'n bin sa'csi racxhuu xque'lu, näjza sa'csi yu'ru rexçäl̄racxhuulu.

²⁴Yu' bejn̄ ruzengajc rextojl̄ni ni'c rajcni castiigw, niluxh yu' bejn̄ ni di xtoj̄l̄ni guzengajc. ²⁵Sigajcsa redzunsac'c ni rujn bejn̄; yu'reni ruzengajc, niluxh mase dini guzengajc, digacdi jianxhiga'tzni, sidzujñ̄ dxej suzeñ̄ni.

6 Reni najc mos riäj̄l cuadiajgreni xtidx xlamreni, te na'c guiniyaj rebejn̄ laj Dios niclaza xtidx Dios ni rusule'nu. ²Palga yu' remos ni najc xlamni te nani rililajz, na'c cuälazreni rextiidxni sa'csi najcni bejtzni lo xcäl̄rililajz Jesucrist. Riäj̄l gusa'cruene xtzuunni, sa'csi najcni sa'ni loj yäl̄rililajz xten Dios, luxh sanälajzarenini. Rediidxre baluii, basule'.

Yäl̄nabañsa'c näjza te lastoo ni rbedxi

³Palga yu' chu ruluii garenca diidx, diidx ni digac didxsac'c, si'c najc xtidx Jesucrist, näjza xhet si'c diidxdi ni

ruluii xho guibaŋsa'c bejn, ⁴bejnğa rlaĵz guiliä'p lagajc xpala'n̄ni, niluxh xhet najndini. Si'c te yälguijdx yu'tis yejcn̄i yälguiniab diidx, yälrdil̄diidx. Luxh redee rujn rdxe'ch laĵzreni, rujnni rdxe'ch bejn lo sa'ni, rujnni rniyaj bejn, rujnzani di bejn guinisa'c lo sa'ni. ⁵Rujnzani rdil̄näj bejn sa'ni. Guiraa redee gun bejn ni aguxhij̄n xcäriejn̄ni, bejn ni diru ga'p didxlii. Rchaloreni sujnreni ganduxh xcuent rediidx ni ruluiireni. Gubicaj lo sa' bejnre. ⁶Niluxh yäl̄nabaŋsa'c näĵza te lastoo ni rebedxi, redee sa'cduxh. ⁷Sa'csi xhet biopnädinu lo guedxliujre, luxh sigajcza xhet sajcdi chonänu che guetnu. ⁸Niluxh palga rajpnu xhi gaunu, xhi gajcw̄nu, con ni'c riäj̄l guibalaaznu. ⁹Niluxh reni rlaĵz ga'p xhidalduxh meel, riäjbreni lo xhigab guijdx, rujnzareni xhidajl dzuun ni xhet sajcdi, ni rujn daan, ni rusiääz bejn lo yäl̄ruxhin̄, lo yäl̄r̄nitloj. ¹⁰Sa'csi yäl̄rinälajz̄ni meel najc xlobaa guiraa redzunguijdx. Yu'za bejn ni rlazduxh ga'pni meel, rusaanreni xcäl̄rililajz Dios, dxejc lagajc laareni rujn rdedduxh̄reni trabajw.

Dzun-huen xten yäl̄rililajz

¹¹Niluxh luj, bejn xten Dios, baxu'n̄ lo guiraa dee, te chanuulu lo xcäl̄xhigabsa'clu näĵza yäl̄nabaŋsa'clu; te chanajllu yäl̄rililajz näĵza yäl̄sanälajz; te chanuulu lo yäl̄r̄becdxi laĵz näĵza yäl̄nadolajz. ¹²Benduxh dzuun xcuent yäl̄rililajz Jesucrist, gunazdu'tz yäl̄nabaj̄n ni najc par teĵpas. Ni'cni gurejdx Dioslu, luxh aguniilu rililajzlu xtidx Dios nez loj xhidajl bejn, te anancheereni.

¹³Naj rulidxälu nez loj Dios ni ruedeed yäl̄nabaj̄n lo guiraa ni yu' lo guedxliujre, näĵza nez loj Jesucrist, ni basule' xtiidx̄ni nez lo Poncio Pila't, ¹⁴rnibeä guzobsa'clu guiraa rediidx ni rniä lojlu, na'c guchaaluni, te na'c guiniyajreni luj naj niclaza cheni jiääd Xtađ Jesucristnu. ¹⁵Sidzuj̄n dxejga nani agunii Dios guidzuj̄nni. Dios ni najc le' sujn scree sa'csi laatisni najc Dios, najcni reīi xten rereīi, rnibeezani reni rnibee. ¹⁶Laatisni dini guet, nabaj̄nni lo bianij cadro rut rajcdi rbig. Nicla te bejn gajd fii lojni, niclaza gac fiireni lojni. Xtebtis laani riäj̄l ga'p rebejn xpala'n̄ni. Laani rajp yäl̄rnibee par teĵpas. Sugacni si'c.

¹⁷Baliĵdx reni rajp xhidajl xhixt̄enni lo guedxliujre, na'c guschä'preni xpala'n̄reni, niclaza chanälajzreni xhixt̄entisreni. Huenru chanälajzreni Dios ni nabaj̄n, ni runiidx loonu guiralii xhixt̄ennu ni rquiinnu te guibalajznu. ¹⁸Baliĵdxreni gunreni dzunsa'c, gundaj̄nreni dzunsa'c, gacnäĵreni reni xhet rajpdi, cuenäsa'creni sa'reni. ¹⁹Si'c ga'preni yäl̄nasa'c ni guzudzu'tzreni che jiääd Jesucrist, te guiniatztu'tzreni yäl̄nabaj̄n par teĵpas.

Ruliĵdxni Timoteu

²⁰Timoteu, cuenäĵ ni rniä lojlu. Na'c ĵiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yäl̄naj̄n'. ²¹Sa'csi yu' reni sanuu yäl̄naj̄nre ni'c banij̄treni lo Dios xcuent yäl̄rililajz. Gacnäĵ Dios luj. Sugacni si'c.

Guijtz Ni Rojp Lo Timoteu

Stee gui¹jtz ni baxha¹ Pabl loj Timoteu

1 Narä Pabl, nacä apost xten Jesucrist. Dios gule narä, xcuent yäl¹nabaj¹n ni gudeed Dios loj reni yunä¹ Jesucrist, si'c ni bia'n diid¹x. ²Cacuaä gui¹jtzre lojlu, Timoteu, xi'nä lo yäl¹rilihajz. Rinälazä luj. Rniabä lo Xtadnu Dios näj lo Dad Jesucrist gacnä¹j luj, gulasajzreni luj, guscuecdxireni lajzlu.

Rusule'ni xcuent Jesucrist

³Rnaj lazälu che rniabä lo Dios dxej-yääl. Dxej¹ rdedä xquixtios por luj lo Dios. Naya xcärienä yu'ä lo Dios, runä xtuunni si'c bejnza rextadgoldoä. ⁴Rnaj lazä xho biinlu, naj rlazä fiä lojlu te guibalazä. ⁵Rnaj lazäza yu'pac yäl¹rilihajz lastoolu si'cni guyu'ni galoo lastoo xma¹mlu Loida dxej¹cru lastoo xnanlu Eunice si'cza yu' yäl¹rilihajzga lastoolu naj.

⁶Ni'cni rniä lojlu naj, si'cni rcanä¹j bejn rodä¹j te di juiini, si'cza cuanädu¹xh reyäl¹naj¹n ni baniid¹x Dios lojlu cheni basuä nää yejclu. ⁷Sa'csi di Dios nuniid¹x te lastoo ni rdxej¹b loonu, baniid¹xni te lastoo

ni rsiutij¹p, baniid¹xni te lastoo ni rinälajz, baniid¹xzani yuduxh xcäriejn¹nu. ⁸Na'c guitujy¹lu guiniilu rediid¹x xten Xtad Jesucristnu, na'cza guituinäj¹lu narä sa'csi yu'ä nen¹ latzg¹uiib xcuent Jesucrist. Näj luj gudej¹d trabajw ni siädä¹ xcuent yäl¹rusule' xtid¹x Dios si'ctis gacnä¹j Dios luj. ⁹Dios ni gulää nurnu nen¹ dojl, gurejdx nurnu te guiba¹nsa'cnu lojtisni. Gurejdxni nuurnu xhet sa'csi biennu dzunsa'c, alga sa'csi si'c r¹lajz¹ni laani, sa'csi balasajz¹ni nuurnu xcuent Jesucrist galooli che gajdli guncheeni guedxliuj. ¹⁰Niluxh cheni biädä Jesucrist ni badzucaj rextoj¹l¹nu lo guedxliujre, baluiloj yäl¹rulasajzga. Jesucrist banitloj yäl¹rnibee xten yäl¹guj¹t. Xtiid¹xni, ni rusule' xho r¹bicaj dojl, baluui yäl¹nabaj¹n, näjza yäl¹nabaj¹n par tejpas.

¹¹Dios gule narä te gacä te ni rusule' xtiid¹xni, te gacäza te apost, näjza te bejn ni rulu¹i loj reni di gac xpejn Israel. ¹²Ni'cni rdedä trabajw xcuent guiraa rediid¹xre. Niluxh dina guituyiä, sa'csi narä nanä chu xtiid¹x huililazä, nancheä laani saj¹ gapdzu'tz¹ni dzuun ni baniid¹xni loä dxej¹li cheni guibi'ni.

¹³Chanuu guluiilu redid¹xsac ni banid¹xä lojlu. Gubaj¹nza lo

yälirililajz näj lo yälšanälajz ni rajpnu sa'csi yu'nu lo Jesucrist.

¹⁴Cuanädzu'tz reyäl'najz ni baniidx Dios lojlu näj Sprit Dxan xtenni ni rbäjz neñ lastoonu.

¹⁵Anajnlü guiraa reni siääd reguedx Asia gulälaz narä; lo redee nadxaag Figelo näj Hermógenes.

¹⁶Dad Jesucrist gacnäj reni yu' roliz Onesíforo sa'csi balti huält biädspaani lazä, dini nitujy sa'csi yu'ä neñ latzguuib. ¹⁷Che bidzujñni guedx Roma, gudiilpacni narä te bidxälni narä. ¹⁸Dad Jesucrist gulaslajz laani che guidzujñ dxej ni guibi' Jesucrist. Luj anajnlü balti dzunsa'c bejnñi che guyu'ni guedx Éfeso.

Te ni runsa'c xtzuum Jesucrist

2 Ni'cni xi'nä, guzutijp sa'csi rulaslajz Jesucrist luj, racnäjnü. ²Rediidx ni abiejn diajglu guniä nez loj xhidal bejn lagajc rediidxga guniini lo rebejn ni rililajzpac, loj rebejn ni saje guluiiza diidxga lo stecuaa bejn.

³Batijp lajzlu tednäjlü narä trabajw si'c te soldadsa'c xten Jesucrist. ⁴Di te soldaad gun dzuun ni bejnñi che gajdñi gac soldaad. Rujñni xtzuum bejn ni guleni gacni soldaad, te si'c guspaani lajz bejnğa. ⁵Sigajcza, ni rguijt digacdi xca'ni yäl'nasa'c palga dini quitsa'c si'c riäjñ quitni. ⁶Bejn ni rujn dzuun loniaa nanab xca'ni xcäl'nasa'cni ganidoo. ⁷Bejn xhigab xcuent ni rniä lojlu, dxejc sujñ Dios gacbeelu guiraani.

⁸Basnaj lajzlu Jesucrist, te xagdo toDavid ni huäjz lo rebengut. Dee najc xtidx Dios ni rudzucaj dojl, si'c

ni rusule'ä lojlu. ⁹Ni'cni cagutipä lazä cadedä trabajw, caduä caden si'c te bejn ni bagu't sabejnñi.

Niluxh digacdi xcaduu xtidx Dios. ¹⁰Ni'cni cadedä trabajwre te gacnää reni agule Dios te näjza reni'c chalilajz xtiidxni te guibajñreni lo bianij xten Jesucrist par tejpas.

¹¹Guliiduxh najc diidxre; palga agujtnu con laani, sibannäjzanu laani.

¹²Palga rdejndu trabajw, sinibenäjzanu laani. Palga dinu guicä'p numbeenuni, dizani guicäjñ numbeeni nuurnu loj Xtadni Dios.

¹³Mase dinu chanuu lo xtiidxni, laani susoobni xtiidxni sa'csi digacdi cuatzlajzni diidx lagajc laani.

Te bejn nani abia xtzuumni

¹⁴Basnaj lajz rebejn xcuent rediidxre, gunibee lojreni nez lo Dad Jesucrist na'c til'diidxreni sa'csi sa' diidxga xhet sajcdini, ruxhñtisni reni riendiajgñi.

¹⁵Batijp lajzlu te guidzujñlu lo Dios si'c te bejn ni runsa'c dzuun, xheti xhicuent guitujylu, sa'csi ruluisa'cpaclu xtidxliitis Dios. ¹⁶Gulälaz yäl'rniyaj näjza xhidalduxh diidx ni xhet sajcdi, sa'csi renani rucua diajg rediidxga ri ajbrureni lo redo_lguijdx. ¹⁷Luxh diidx ni ruluiireni suxhingajcni lastoo bejn si'c rxhin_lajz tiejxh bejn. Ni'c casiajc Himeneo näj Fileto. ¹⁸Abanijtreni lo didxlii. Caniireni ala huäjz bejn lo rebengut. Si'c cagusiejchreni lajz gaii rebejn ni rililajz. ¹⁹Niluxh xtidx Dios rsiudzu'tzni si'c te guij nani

nadipduxh, luxh rajpnu diidxre si'c te seen: “Dad guibaa anumbee guiraa reni najc xpejn̄ni”; nājza “Nanab guibicajreni lo redolguijdx, guiraa reni ahuililajz xtidx Jesucrist.”

²⁰Neñ te yuro, xhet ganaxdi cos or̄ nājza cos plat yu'. Yu'za cos yajg nāj cos bajñ; yu'reni najc parsi te laniro, yu'za reni rquiin guixe-guixee. ²¹Sigajcza te bejn̄ ni rļajz gun dzuunro xten Dios, riājļ guibicajni loj redolguijdx ni xhet sajcdi. Dxejcti Dad Jesucrist sacnājni te gunni redzunro xtenni.

²²Gubicaj lo redzunguijdx ni rujn rebejn̄, huinuu yālnabansa'c, yālrililajz, yālsanālajz, gulecdxiza lajzlu nāj reni rujn xtzuun Dios, naya lastooreni rbedx-rniabreni lo Dios. ²³Na'c jiulu rediidx ni ruluii rebejn̄ guedxliuj. Anajnlu rediidxga rujn rdīlnāj rebejn̄ sa'ni. ²⁴Niluxh te xmos Dad guibaa di riājļ guchaagni reni rdīļ; riājļ gacni beñsa'c loj guiraatis bejn̄. Riājļza guluisa'cni; riājļza gutip lajzni che xhet laadi rujn bejn̄ lojni. ²⁵Guidēb yālnadolajz guluiilu reni rdxe'ch loj rediidx ni ruluiilu. Cuāāzlu gaxājsi gusiejch lajzreni gun Dios gacbeerēni didxgulii, ²⁶te jianij xcāriejnreni te guiriireni ladzñaa bendxab, te gunreni ni rļajztis Dios.

Xho gac rebejn̄ neñ redxelult

3 Nanab gacbeelu neñ redxelult sidzujñ dxej tedtu trabajw. ²Sa'csi su' bejn̄ ni chanālajz lagajctis laani, ni rinālajz xmeeltisni, bejn̄ ni rniyaduxhtis, bejn̄ ni rchaglajz chā'p xpala'ntisni, bejn̄ ni rniyaj Dios; su' bejn̄ ni di

gusoob xtidx xtradreni, su' bejn̄ ni di gudeed xquixtios lo Dios, su' bejn̄ ni najc benguijdx̄tis. ³Neñ redxelultga su'za bejn̄ ni di chanālajz sa'ni, bejn̄ ni di lajzni jiājļ, bejn̄ ni rusgueduxh; bejn̄ ni digacdi guscuāāz dolguijdx ni rujnreni; bejn̄ ni gualazduxh; bejn̄ nani ru'ro'n guira'ti dzunsa'c. ⁴Neñ redxelultga su' bejn̄ ni ruto' sa'reni; bejn̄ ni di guidxejb gunreni ni riajt̄tis yejcreni, bejn̄ ni rchalosi najcreni bensacduxh; bejn̄ ni rchaglajzru gun nani rchaglajz tiejxhreni lacuaa chanālajzreni Dios. ⁵Neñ redxelult su' bejn̄ ni najc si'c benguidoo, ascanu rusoobreni xtidx Dios, niluxh naadireni xca'reni yālnadip nāj yālrnibee xten Jesucrist ni rucha lastoo bejn̄.

Na'c guchaaglu rebejn̄ga, ⁶sa'csi loj sa' bejn̄re yu' reni richu' roliz bejn̄, sasgueerēni regunanayāāl ni rujn dojļ. Regunaare rinuu rujreni ni rļajztis tiejxhreni, rujnreni guiraloj. ⁷Rebejn̄re rsiedduxh didxcoob, niluxh di didxlii xten Jesucrist jiu' yejcreni. ⁸Sigajcni gujç Janes nājza Jambres ni bidxe'ch loj Moisés, sigajcza najc rebejn̄re, cadxechnājreni didxlii xten Jesucrist, najcreni bejn̄ ni aguxhijñ xcāriejnreni, luxh direni gacbee xtidx Dios, direni ga'p yālrililajz. ⁹Niluxh direni chanuu xchej, sa'csi huenliisi suhuii guiraa rebejn̄ najcreni benguijdx. Si'cza gusajc guiro'p reni bidxe'ch loj Moisés.

Pabl rnibee sudzu'tz Timoteu

¹⁰Luj sanuutislu lo nani rusule'ä, nāj xho nabanā, nāj xhicuent runā dzuunre, lo xcālrililazä, lo

xcäl̄nadolazä, lo xcäl̄sanälazä, näjza xho batip lazä. ¹¹Najnl̄u xho basacs̄s̄reni narä gudedäza trabajw ladzn̄aa rebejn̄ nen̄ reguejdx xten Antioquía, guedx Iconio, näjza guedx Listra. Gudedä trabajw niluxh Dios baslaa narä loj guiraa retrabajwga. ¹²Guliduxh guiraa reni r̄lajz chutis loj Jesucrist sidejdpacreni trabajw. ¹³Niluxh rebenguijdx näj reni rusguee, sinuutisreni redol̄guijdx, sinuuru gusgueereni bejn̄, luxh susgueeza bejn̄ laareni.

¹⁴Luj huinuu guzudzu'tz loj ni abisieedlu, nani ahuililajzalu, luj anajnl̄u chuni'c baluini lojlu. ¹⁵Cheni biuuxlilu racbeelu xtidx Dios, ni ruluiilu xho guiriilu nen̄ dojl̄ te xca'lu yäl̄nabajn̄ par tejpas sa'csi rililajzlu xtidx Jesucrist.

¹⁶Guiraa rediidx xten Dios ni caj lo guijtz, lagajc Dios baniidxni te xcajni lo guijtz. Guiralii xtidx Dios najc laaca te guluii nuurnu xhini'c najc didxlii, te gacbeenu xhi najc didx-xhii, te gacbeezanu xho riäj̄l̄ guibansa'cnu.

¹⁷Te susin̄ niguii ni najc xpejn̄ Dios, te gac gunni guiraa redzunsac'c ni riäj̄l̄ gunni.

4 Rulidxälu nez lo Dios näjza nez lo Dad Jesucrist ni jiäd̄d si'c reii te gunni yäl̄guxhtis loj reni nabajn̄ näjza loj reni agujt; rniäza dee lojlu: ²basule' xtidx Dios, gususin̄ lo Dios mase xhitis or. Baluii reben̄ dojl̄, gudil̄näj̄ reni di r̄lajz guzobdiidx xtidx Dios, balidxnäj̄ resa'tu xtidx Dios. ³Sa'csi

sidzujn̄ dxej di rebejn̄ guidxaglazj gucuadiajg yäl̄rluisa'c; alga diidx ni najc lagajc si'c najc xhigabreni r̄lajzreni jiendiajgreni, ni'cni siguiilreni xhidajl̄ bejn̄ ni ruluii te guisieedreni ganax ni r̄lajzreni gucuadiajgreni. ⁴Susäuuren̄i diajgreni te di jiendiajgreni xtidxlii Dios; alga xhitis diidx gucuadiajgreni. ⁵Niluxh luj huinuutis lo xtidx Dios, batiplajz yäl̄huin̄, guniitis xho rudzucaj Dios rextojl̄reni, bensac'c xtzunlu.

⁶Sa'csi narä suga'a ree te ju'treni narä, asiäddzungajxh dxej ni guetä. ⁷Agulujx bacuaa'c si'c te soldaad ni huicuaa'c lo guer̄, agulujx xnezyuä, gopdzutzä yäl̄rililajz. ⁸Naj cabäza xca'a yäl̄nasa'c ni guniidx Dad xhaguibaa, suniidxni yäl̄nabansa'c. Dad najc juejz ni runsa'c yäl̄guxhtis. Niluxh xhet loätis guniidxni ya'nabansa'c. Sudeednini loj guiraa rebejn̄ ni catiplajz cabäjzreni dxej cheni guibisac Jesucrist.

Rediidx ni räjpni lojtis Timoteu

⁹Basaaga lajzlu jiädhuigajlu narä; ¹⁰sa'csi abasa'n Demas narä. Sanälajzruni redzuun xten guedxliujre, naj sääni guedx Tesalónica. Baxhalä Cresent sää lo reguejdx ni re' nez Galacia. Baxhalä Tito sää guedx Dalmacia. ¹¹Xtebtis Lucas suganäj narä. Gudiil Marcw te jiäd̄näluni sa'csi sajc gacnäjni narä lo xtzun Dios. ¹²Tiquico baxhalä sää guedx Éfeso. ¹³Cheni jiäd̄dlu, jiäd̄nälulu ca'p ni basa'nä guedx Troas roliz Carpo, näj rexlibrä; di jiäl̄za lajzlu rexquitzä. ¹⁴Alejandro, ni najc gubetzguiib, basacs̄s̄duxhni narä.

Dios quiixni sigajcni bejn̄ni. ¹⁵Luj bahuii te di gunni xhi gunni luj sa'csi rdexhd̄uxhni lo xtid̄x Dios ni rusule'nu.

¹⁶Galoo che bazecä diid̄x lo reguxhtis, rut gucnäjd̄i narä; guiraareni gulälazreni narä. Rniabä lo Dios na'c guchagcuentni nani bejn̄reni. ¹⁷Niluxh Dad ni yu' xhaguibaa gucnäj narä, baniid̄xni yälnadip te gujc guniä guiraa xtid̄x Dios te biejn diajg reni digac xpeñ Israel xtid̄x Dios. Luxh gucnäj Dios narä guläani narä ladzñaareni, si'c ro' te beedz. ¹⁸Suslaani narä loj guiraa redolgujdx, saptzu'tzni narä, sigucheezani narä te chunääni

lo xcälr̄nibeeni xhaguibaa. Lojni coldeed xquixtios, colgand̄uxhni par tejpas. Sugacni si'c.

Rudeedni xtixtios lo rexamigwni

¹⁹Badeed xtixtios lo Prisca näjza lo Aquila näjza loj resa' Onesíforo. ²⁰Erasto bia'n gued̄x Corinto, niluxh basa'nä Trófimo gued̄x Mileto sa'csi cayacxhuuni. ²¹Jiädgajlu ansde guisloj rebäinaj̄l. Eubulo, Pudente, Lino, Claudia, näjza guiraa rebejtznu ni yu' lo Jesucrist ree, ruxhal̄reni xtixtios lojlu.

²²Dad Jesucrist chunäj xaimlu. Dios gacnäj guiraatu. Sugacni si'c.

Te Guijtz Lo Tito

Bacuaa Pabl lo Tito

1 Narä Pabl, nacä xmos Dios, apost xten Jesucrist, te gacnäá guiroobru xcälirililajz reni agule Dios, te gacbeezareni didxlii ni rusia xcälñabajñnu. ²Cayunlojzanu yälñabajñ par tejpas nani Dios, ni digacdi guinii didx-xhii, bia'nni diidx guniidxni cheni gajdli guedxliuj guirixtiej. ³Niluxh che bidzujñ dxej ni agulexгаа Dios, laani baluiini xtiidxni. Si'cza baniidxni xtiidxni loä te gusule'äni si'c gunibee Xtiosnu ni rusläa nurnu nen dojl. ⁴Cacuaä guijtzre lojlu, Tito, xi'nä lo yälirililajz ni ria'pnu xcuent Jesucrist. Rniabä lo Dios Xtradnu näj lo Dad Jesucrist ni rbää nuurnu nen dojl, gacnäjäreni luj, gulaslajzreni luj, guscuecdxizareni lajzlu.

Dzuun ni rujn Tito guedx Creta

⁵Che basa'nälu lo yuj ni tre' lo nisdoo, ni laa Creta, basa'nälu te guluuxlu dzuun ni di niajldi nuluxä ro'c, näjza te cuelu rebengool loj reguidoo nen tejga reguejdx si'cni gunibeä gunlu. ⁶Gule bengool ni nabansa'c, te na'c guiniyaj bejnreni, nanab gacni chääl tejtis

gunaa, riäjla chalilajz rexi'nni, na'c guibajñreni si'ctisni rlajz tiejxhrene, jiureni xtidx xtradreni. ⁷Niguii ni rnibee guidoo rcanäj rexhixten Dios, ni'cni riäjla ga'pni te yälñabanya. Na'c gacni te bennajd, na'c gacni te bennadxecha', na'c gacni bengü, na'c gacni te bejn ni rdxagdijl bejn, na'cza xca'ni meel ni dini niunsa'c gaan. ⁸Nanab gacni te bejn ni rudedlaa rolizjni jia'n ben biooz, riäjla chanälajzni dzunsa'c, gac nasinni, chu xcäriejñni; guibansa'cni nez lo Dios, sigajcza nez lo rebejn, guibannayani nez lo Dios, na'c gunni nani rlajztis tiejxhni. ⁹Riäjla chanuutisni lo didxlii ni bisieedni te gac gulidxnäjzani bejn xtidx Dios, te guzejcni diidx lo rebejn ni rniyaj xtidx Dios.

¹⁰Yu' xhidajl benguijdx, bejn ni rnii diidx ni xhet sajcdi, näjza xhidajl bejn ni rnii didx-xhii ni rusguee. Näjza lo rexpen Israel ni riuduxh leii yu' sa' bejnre. ¹¹Sa' redee ni nanab jäü ro'ni, sa'csi rusgueerene xhidallo sa'reni, ruluiireni ni di riäjla guluiireni te gunreni gaan meel.

¹²Te niguii ni siääd lagajc lajdxreni guniini xcuent lagajc

reben lajdxni: "Rebejn ni najc cretenses rniduxhreni didx-xhii, niälajzzareni. Rlajzreni gausa'creni niluxh di rlajzreni gunreni dzuun." ¹³Niluxh guliini, ni'cni gudilnäjreni, te chalilazsa'creni xtidx Jesucrist, ¹⁴te na'cruza gucuadijgreni rediidx ni rdxällajz rexpən Israel, niclaza rediidx ni rnibee bejn ni gulälaz didxlii.

¹⁵Loj renani rujn xhigabya, guira'ti najc naya, niluxh loj reni di chalilajz, ni xhet nayadi najc xhigabreni, guira'ti nacdxuudx, xcäriejnliireni nacdxuudx. ¹⁶Naj rujnsireni si'cni numbeerreni Dios, niluxh ni rujnreni huenliisi ruzen direni nililajz, najc'reni benguijdx, direni jiu xtidx Dios, digacdi gunreni nicla tej dzunsa'c.

Rulijdx Pabl Tito guluisa'cni rebejn

2 Niluxh luj guniitis rediidx ni ruluisa'c. ²Baluu rebengool gac beña, bejn ni yu' xcäriejnni, bejn ni rumbee xhini'c najc dzunsa'c, xhini'c najc dzunguijdx, bejn ni rajpza yälirililajz, yälsanälajz, näjza ni rbecdxi lajzni. ³Sigajcza, regunagool, nanab guibajnreni si'c te ni yusa'c lo Dios, na'c guiniireni diidx ni di riäjł guluiireni, na'cza soozreni. Riäjł guluiireni redidxxa'c ⁴te guluiireni regunaa dxa'p chu xcäriejnreni, chanälajzreni chäälreni näj rexi'nreni. ⁵Gacreni nasin, guibanayareni, xcanäsa'creni rolizreni, gacreni bensa'c gusoobreni xtidx chäälreni, te rut guiniyajdi xtidx Dios.

⁶Sigajcza gojz lo rebi'n riäjł chu xcäriejnreni. ⁷Luj guzuj te fiireni

xho riäjł gun bejn dzunsa'c. Che guluiilureni, saru baluu guiraa reni riäjł guluiilu. ⁸Didxxa'c gunii te rut gacdi guiniyaj diidxga, te si'c guitujy chutis ni rlajz guidxe'ch lojtu te xhet xhi didxguijdxdi gac guiniireni xcuentlu.

⁹Balijdx remos te gusoobreni xtidx xlamreni, te gunsa'creni dzuun, na'c guzejc'reni diidx lo rexlamreni. ¹⁰Na'c cuanreni alga guibansa'creni te guluii xcäl'nabajnreni lacti sacduxh xtidx Dios ni basläa nuurnu nen dojl.

¹¹Sa'csi abiääd xcälracnäj Dios, abiädnäni yärusläa nen dojl lo guiraa rebejn. ¹²La xcälracnäj Dios ni ruluii nuurnu gusa'nnu redzunguijdx, näjza dzuun xten guedxliujre te guibansa'cnu, te chonälajznu Dios lo guedxliujre. ¹³Ruluiizani nuurnu cuääznu guidzujn dxej ni soob xtiidxni ni basa'nni loonu xcuent dxej che jääd Gueb Dios näj Xtdad Jesucristnu ni rusläa nuurnu lo dojl. ¹⁴Laani gujtni te gusläani nuurnu lo guiraa redołguijdx, te basiani nuurnu te gacnu xpejnni, gaczanu te bejn ni rdxagljaz rujn dzunsa'c.

¹⁵Diidxre gunii, balijdx, basule' si'c te bennajn. Di gusaanlu cuälazreni luj.

Ni riäjł gun reni rililajz

3 Basnaj lajz rebejn gusoobreni xtiidx rebejn ni rnibee näjza reguxhtis, gusoobreni xtiidxreni, xcäjbzareni gunreni xhitis dzunsa'c. ²Na'c guiniyajreni bejn, cuedxireni, gaczareni bensa'c, saru gac nadolajzreni loj chutis bejn.

³Sa'csi galoo sigajcza xheti xcäriejnnu, dizanu gusoob xtidx

Dios; basguee bejn nuurnu, yu'tisnu lo guiraasi dolguijdx näjza lo ni rchagljztis rujn tiejxhnu, nabajntisnu lo dolguijdx, rudxonlajznu, rdxe'ch bejn loonu, rdxe'chzanu lo sa'nu. ⁴Niluxh che baluiloj xcäl_rulaslajz näjza xcäl_rinälajz Dios ni rusläa nuurnu näjza reben_guedxliuj lo dojl, ⁵dxejc basläa Dios nuurnu lo dojl, xhet sa'csi yu'di xhi dzunsa'c biennu, alga sa'csi balaslajzni nuurnu. Basläa Dios nuurnu lo dojl sa'csi bidiib lastoonu, te biäjt xtoj_lnu te najcnu bencoob, sa'csi bascoobza Xsprit Dxan xten Dios xcäriejnnu. ⁶Baniidx Dios cuääzpac Xsprit Dxanni nen lastoonu xcuent ni bejn Jesucrist ni basläa nuurnu, ⁷te sa'csi rujn Dios cuent najcnu bensac sa'csi abadzucajni xtoj_lnu, naj sica'nu xcäl_nasa'cnu ni cabääznu, nalaaznu yäl_nabajn par tejpas.

⁸Dee ni najc guliipac, ni'cni rlazä chanuutislu guiniilu rediidxre loj rebejn, te rebejn ni rililajz xtidx Dios gunduxhrene ganax dzunsa'c. Rediidxre najc laaca, sacduxhrene loonu. ⁹Naj basaan rediidx ni najc

xlia'si, rediidx ni gunii reben_galoo, yäl_rdiidix xcuent xleii toMoisés sa'csi guiraa rebiejyga xhet sajcdini, xhetza huendi rujnrene.

¹⁰Palga yu' te bejn ni gun la' sa' reben_guidoo, gunii lojni tej o tio'p huält. Palga dini jiejn, colcuääni lojtu. ¹¹Sa'csi anajntu sa' bejnga abaro'nni, agulälazni didxlii, lagajc xtoj_lni sujn nitni.

Diidx ni bacuaani lojts Tito

¹²Che guxhalä Artemas o Tíquico lojlu, gudahuiipac narä lo guedx Nicópolis. Ro'c abenä xhigab tedä rebäinajl. ¹³Gucnäduh licenciaad Zenas näjza Apolos, badeed guiraa ni rquiinrene te chanuureni xpiajrene, te xhet jiaäxdireni. ¹⁴Suguisieedza resa'nu gunrene dzunsa'c te gacnäjrene che guiquiinnureni, te na'c guibaj_nrene xlia'si.

Ruxhalni xtixtios

¹⁵Guiraa reni yunäj narä ruxhal xtixtios lojlu. Badeedza xtixtios loj resa'nu lo yäl_rililajz. Dios gacnäj guiraatu. Sugacni si'c.

Te Guijtz Lo Filemón

Rucuaa Pabl guijtz lo Filemón

¹Narä, Pabl, yu'ä nen latzguiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtzre lojlu, Filemón, ni sanälazduxhnu sa'csi najclu sa'nu lo xtzun Dios. ²Rucuaazanu guijtzre lo Apia, bisiajnnu lo yälirililajz, näj lo Arquipo ni racnäj nuurnu lo dzuunre, näjza loj rebenguidoo ni rchagsa' rolizjzlu. ³Dios Xtadnu näj Dad Jesucrist gacnäj la'tu, guscuedxireni lajztu.

Xcälſanälajz näj xcälirililajz Filemón

⁴Rudedä xquixtios lo Dios xcuent luj che rniä lo Dios. ⁵Abiejn diagä xcuent yälrinälajz näj yälirililajz ni rajplu lo Dad Jesucrist, näjza reni yu' lo Dios. ⁶Rniabä lo Dios tioobru xcälirililajzlu laſ ni rusule'luni, te gacbesa'creni xcuent guiraa reyälſnasa'c ni rajplu, ni runiidx Dad Jesucrist lojlu. ⁷Lacti rbalazduxhä, rbedxi lazä sa'csi sanälajzlu resa'nu näjza sa'csi luj, betzä, agulecdxilu lastoo reni rililajz.

Pabl rniabni lo Filemón xcasacni Onésimo

⁸Mase rapä xcälſrniabee Jesucrist sajc guiniä gunlu xhitis ni riäjſ

gunlu, ⁹rniabä lojlu gunlu te dzunsa'c sa'csi narä nacä Pabl ni rinälajzlu, nacä bengool, yu'ä latzguiib xcuent Dad Jesucrist. ¹⁰Canabä xcuent Onésimo ni najc si'c xi'nä, sa'csi huililajzni xtidx Dios ni basule'ä lojni naj ni yu'ä latzguiib.

¹¹Galoo, dini niajc bensa'c lojlu, niluxh naj sacnäduxhni guiro'pnu. ¹²Ruxhalsacäni lojlu, te xcasacluni stehuält si'c ni najräni xca'lui, sa'csi siädnäni lojlu ascanu lagajc lastoä. ¹³Narä rlazä niannäjni narä xcuentlu, te niacnäjni narä naj ni yu'ä latzguiib sa'csi basule'ä xtidx Dios. ¹⁴Niluxh di rlazä niunä si'c palga luj dilu xcäjb gacni si'c. Dina guinia gacnäjpaculu narä si'c gojn. Narä rlazä gunluni sa'csi rlajzpaculu gacni si'c. ¹⁵Pet gubicaj Onésimo lojlu tio'p-choſ dxejsi. Niluxh naj xca'luni te chuni lojlu par tejpas. ¹⁶Naj xhetru si'cdi te mos chuni lojlu. Naj sajcruni loj te mos. Naj najcni si'c te betzbiidlu ni sanälajzlu. Narä sanälazduxhäni, niluxh luj riäjſ chanälajzruluni, xhet si'c chutis te bejn, alga si'c te bejtzlu lo Dad Jesucrist.

¹⁷Naj palga rumbeelu narä si'c te sa'lu, cua'ni sigajc narä. ¹⁸Palga

yu' xhi bejnni lojlu o palga yu' xhi nazääbni lojlu, basa'nni lo xcuentä.

¹⁹Lagajc narä, Pabl abacuaä guijtzre con ñää con xleträ, narä siguixäni. (Te na'c guiniä nazääbzalu lagajc luj loä.) ²⁰Betzä, benlaa hueenre narä si'c te ni sanälajz Dios te guspaalu lazä nez loj Dad Jesucrist.

²¹Bacuaä guijtzre lojlu sa'csi nancheä susooblu xtidxä, sujnzalu maazdi loj ni rniabä lojlu. ²²Sigajcza basuchee te lajt cadre jia'nä, sa'csi cabäzä gudzu'

Dios ni gunabtu lojni, gusaan Dios jiädhuiä la'tu.

Ruxhałni xtixtios lojni

²³Epafra ruxhał xtixtios lojlu. Laani yunäjni narä latzguiib, sa'csi guniizani xtidx Jesucrist.

²⁴Marcw, Aristarco, Demas, näj Lucas, ni racnäj narä lo dzuunre, ruxhałzareni xtixtios lojlu.

²⁵Dad Jesucrist gacnäj la'tu. Sugacni si'c.

Te Guijtz Nani Biäd Loj Reben Hebre

Agunii Xi'n Dios xtidx Xtadni

1 Nen redxe galoo garen-garen mood guninäj Dios retoxtadgoldoonu. Xhidajlza huält guniini por reniguii ni bacuaa xtiidxni. ²Nen redxejre aguniini loonu por Xi'nni, lojzani badeed Dios yälrnibee guncheeni guedxliujre, badeedzani guira'ti lojni. ³Laani najc xtuxh xten xcälrdimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtojlnu, gurejni xladbee Gueb Dios xhaguibaa te canibeeni.

Sacduxhru Xi'n Dios loj rexangl Dios

⁴Ro'c gurej Xi'n Dios sa'csi sajcruni loj reangl xten Dios, sa'csi acua'ni yälrnibee si'c te bejn ni riannäj xhixten Xtadni. Lajzani sajcru lo relaj rexangl Dios. ⁵Sa'csi Dios di niäjb loj nicla tej rexangl ni:

Luj najclu Xi'nä. Narä guleälu te guinibeelu.

Dizani niäjb xcuent nicla tej rexangl ni:

Narä gacä xtadni, laani gacni xi'nä.

⁶Niluxh che biädnäni Xi'n xtebni lo guedxliuj, guniini:

Guiraa rexangl xten Dios,
iColgan Xi'nä!

⁷Che gunii Dios xcuent rexangl ni räjpni:

Rujnni ruxhuj rexangl ni si'c bej,
rujnni rbebajl rexmosni.

⁸Niluxh xcuent Xi'nni guniini:

Luj najc Dios.
Nabajnlu par tejpas;
xcälrnibeelu par tejpas najc te
yälrnibesa'c.

⁹Ahuinälaizlu xhigabsa'c, dipaclu nichaglaiz xhigabguijdx, ni'cni Dios ni najc Xtioslu, baniidxru yälrbalajz lojlu quela loj resa'lu.

¹⁰Rniizani:

Luj, Dad, che guslojli bencheelu guira'ti,
bencheelu cad soob guedxliuj,
naazalu bencheelu reguibaa.

¹¹Laareni sinitlojreni, niluxh luj nabajnlu par tejpas.

Guiraareni siujx si'c riujx te lajd.

¹²Suse'tlureni si'c riet' te la' lajd,
sidxaareni si'c rdxaa te lajd.
Niluxh luj dilu guidxaa.

Lałgajctis nabajnlu, di rexijzlu ted.

¹³¿Gucxha räjp Dios lo te xangl ni scree, ä? Räjpni:

Gurej xladbeä te guinibeelu
dxejli cheni gudzugä guiraa
ni rdxe'ch lojlu ladz ni'lu.

¹⁴Guiraa rexangl Dios najc sprit, ruxhaḷ Diosreni te chayacnäjreni rebejn ni xca' yäl'nabajn par tejpas.

Na'c gusaanni diidx ni ruslaani lo dojl

2 Ni'cni nanab jiunu xtidx Dios ni abiejn diajgnu, te na'c guibicajnu lo xnezyujni. ²Anajntu aguzojb diidx ni gunii rexangl Dios neḅ redxe galoo. Luxh reni di nusoob diidxga bejnreni dojl, dxejc bateed Diosreni trabajw. ³¿Xho gac guibicaj xcäl'naj Dios yejenu palga dinu jiu rextidx Dios xcuent yäl'ruslaa lo dojl, ä? Ni Dad, Jesucrist basa'n diidxga lo rexpejn'pacni, dxejc laareni basule'reni rediidxre loonu. ⁴Niluxh Dios baluui najc diidxga guliipac sa'csi bejnnei reseen, näjza yäl'rdxeloduxh, näjza xhidajl remilagrw. Badeedzani Sprit Dxaan xtenni loj renani ahuuilajlaj xtiidxni te gun tejpgareni garen-garen xtzunreni si'ctis ni rläjz Dios gunreni.

Nani guläxtiej yäl'ruslaa bejn lo dojl

⁵Di Dios gudeed yäl'rnibee lo rexangl'ni te guinibeereni guedxliucoob ni cagusä'tnu naj. ⁶Guyu' tej ni bacuaa xtidx Dios lo guijt, räjpni:

¿Chu najc niguii, te guinalajz Dios laani?

¿Chu najc xi'n niguii te jiädhuiizaluni?

⁷Nagabsi dxej guxiiru sajcn'i lo reangl xhaguibaa, dxejcti badesaclu xcäl'nasa'cni, badesaclu xpala'n'ni, badeedzalu yäl'rnibee lojni te guinibeeni guira'ti ni bencheelu.

⁸Badeedlu guinibeeni guiralii ni yu' lo guedxliuj.

Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh naj ruhuiinu gajdni guinibee guiralii ni'c. ⁹Alga rhuinu Jesucrist, ni bejn Dios guxiiru sajcn'i lo reangl xten Dios che guyu'ni lo guedxliuj balsi dxej. Che baluux Jesucrist xtzunni lo guedxliuj, badeed Dios yäl'rdimbicha' näjza xpala'n'ni lojni. Sa'csi sanälajz Dios nuurnu basaanni gudejd Xi'n'ni trabajwduxh, gujtni lacuaa niejtnu.

¹⁰Dios benchee guiralii ni yu' lo guedxliujre, najli rnibeeza Dios guira'ti. Luxh Diosre rläjz chanäni xhidajl xi'n'ni xhaguibaa, ni'cni baxhaḷ Dios xi'n'pacni Jesucrist te guläxtiejni yäl'ruslaa bejn lo dojl che gudejdni trabajwduxh lo cruzj. ¹¹Sa'csi Jesucrist, ni rujn chasanäj bejn te yäl'nabanya, näjza reni risanäj yäl'nabanya, tejtis najc xtdareni. Ni'cni di Xi'n Dios guitujy guiniini lojreni: "betzä". ¹²Scree caj lo xtidx Dios:

Chasule'ä lo rebetzä xho najclu, siliä'päza xpala'nlu lojreni.

¹³Räjpzani:

Sibäzä gacnä j Dios narä.

Ste lajt guiniini:

Bahuii loä näjza rexi'nä ni baniidx Dios loä.

¹⁴Te famiḷ najc tejsi bääl, tejsiza rejn; ni'cni che biäd Jesucrist lo guedxliuj guyu' tiejxhni näj xtejn'ni si'c benguedxliuj, gujtzani te gujc bejn'ni gunijt nani rnibee yäl'gujt, nalajznu, bendxab. ¹⁵Te si'c baslaani guiraa reni rdxejb yäl'gujt, najcreni si'c reni yu'tis loj xlamni

guideb nabajñreni, lacti rdxejbreni yälgujt. ¹⁶Guliini dini niääd te gacnäjni reangl xten Dios, biäädni te gacnäjni guiralii rexajg toAbram. ¹⁷Ni'cni gujçni si'çpac te bejtznu, te gac gacni te bixhojz xten Dios ni rulaslajz, te bixhozsa'cza xten Dios, si'cni rlajz Dios gacni te guslaani rebejn lo dojl. ¹⁸Sa'csi lagajc laani gudejđni trabajw, luxh baquiiłza beñdxabni niujñni dojl, ni'c naj sajç gacnäjni renani ruquiił beñdxab gun dojl.

Jesucrist sajçru loj Moisés

3 Ni'cni bejtznu, reni anabansa'c, sa'csi najçtu reni gurejdx Dios gac xi'nni, colyembee Jesucrist ni baxhal Dios loonu. Laani najç bixhojz ni sajçru, rusule'zani xtidx Dios xcuent nani ahuililajznu. ²Laani huinuutis guyu'ni lo Dios ni guleni te gunni dzuunre. Sigajc ni bensa'c toMoisés xtzuum Dios che guyu'ni loj rexpejn Israel, sigajcza bensa'c Jesucrist dzuun che biäädni lo guedxliuj. ³Sigajc ni yu'ru xpala'n dad lo xpala'n rexi'nni, sigajcza yu'ru xpala'n Jesucrist lo xpala'n toMoisés. ⁴Yu' xtdad guiraa refamil lo guedxliuj, niluxh gule'c Dios guiralii bejn, bencheezani guedxliuj. ⁵Basoob Moisés diidx si'c te mos, cuanäjni rexpem Dios si'cni gunibee Dios gunni, te baluini xho gac redzuun ni gajđ gac dxejç, luxh naj agujç redzuunga. ⁶Niluxh Jesucrist basoob diidx si'c xi'npac Dios. Cuanäjni xfamil Dios. Nurnu najçnu xfamil Dios palga chanuutis sudzu'tznu lo xtiidxni, palga guibalajztisnu, palga gutiplajznu dxejli ni guibi' Jesucrist.

Yälrusilajz xten rexpejn Dios

⁷Ni'cni, si'çpac rnii Sprit Dxan xten Dios:
 Naj, palga jiendiajçtu xse'ni,
⁸na'c gun-najçtu lastootu si'c bejn rebejn ni bidxechnäj Dios che cuansajreni lo reyubijdz.
⁹Ro'c bidxechnäj retoxtdagoldootu Dios sa'csi direni nililajz Dios siädnäreni, niluxh bahuiireni redzunduxh ni bejn Dios nez lojreni tiuu ijz.
¹⁰Ni'cni lał ni cadxe'ch Dios loj rebejnğa, bejn Dios xhigab: Sujiannäjreni xhigabguijdxreni, dina gusanä jiu'reni xcälrusilazä.
¹¹Ni'cni bidxe'ch Dios lojreni, bejn Dios te xhigabduxh, di rebejnğa jiu' te gusilaznäjni.
¹²Bejtznu, colnatiro andi chu tejtü rujn xhigabguijdx, rlajz guibicaj lo Dios, ni nabajñ par tejpas, sa'csi dini chalilajz xtiidxni.
¹³Ni'cni colgulijdx resa'tu guixeguixee, laga najçni nadxej; te di chu tejtü gacnajđ lastooni xcuent reyälrusguee xten redojl. ¹⁴Sa'csi palga chanuunu sudzu'tznu lo xtidx Dios ni huililajznu che biembeenuni, dxejç yu' xhi rajpnu con Jesucrist.
¹⁵Si'c çaj lo guijtç:
 Nadxej, palga jiendiajçtu xse' Dios,
 na'c gunnajçtu lastootu si'c bejn rebejn ni bidxechnäj Dios lo reyubijdz.
¹⁶¿Chu reni'cni bidxechnäj Dios che biendiajçreni xtiidxni? ¿La et laadi guiraa rebejn ni gulää Moisés guedx Egipto, ä? ¹⁷¿Chuxh loj bidxe'ch Dios tiuu ijz lo reyubijdz, ä? ¿La et laadi

reni biajb lo dojl, dxejc gujtreni, huijiajbreni nez loj reyubijdz, ä? ¹⁸¿Chu loj räjpni dipacreni jiu' lo xcälrusilajzni? Loj reni di nusoob xtiidxni. ¹⁹Ni'c ruhuiinu di niajcdi niu'reni lo yälrusilajz sa'csi direni nililajz xtidx Dios.

4 Ni'cni palga bia'n diidx siu'pacnu lo yälrusilajz con Dios, nanab jia'pnu lagajc nuure didi yu' chu tejnu di gun gaan jiu' lo yälrusilajzga. ²Sa'csi nuure abiejn diaagzanu diidx ni rusia dojl, sigajc biejn diajg rebejnga; niluxh xlia'si biejn diajgreni diidxga sa'csi bacuadiajgrenini niluxh direni nililajzni. ³Luxh nuure ni ahuililaaznu siu'nu lo yälrusilajzga; caj lo guijtz gunii Dios rediidxre: Ni'cni bidxe'chä lojreni, benä te xhigabduxh, di rebejnga jiu' te gusilaznäjreni narä.

Mase abaluuxni xtzuunni cheni birixtiejli guedxliuj. ⁴Sa'csi loj stee guijtz caj diidx ni guniini xcuent dxej ni rusilajz bejn:

Xho'p dxej bejn Dios xtzuunni, dxejcti basilajzni tebdxej.

Xhet bejndini dxejga.

⁵Stehuält guniini:

Di rebejnga jiu' te gusilaznäjreni narä.

⁶Niluxh yu' reni gajd jiu' loj yälrusilajzga, luxh reni biejn diajgni diidx ni rusia dojl di niu' sa'csi direni nusoob xtiidxni. ⁷Ni'cni basoob Dios ste dxej gac “nadxej”. Gudejd xhidajl ijz che gunisac Dios xcuent yälrusilajz. Badeed Dios gunii toDavid rediidxre:

Nadxej, palga jierendajgtu xse'ni, na'c gunnajdttu lastootu.

⁸Paru nudeed Josué yälrusilajzga loj rexpen Israel, diru Dios ninisac xcuent stee dxejre. ⁹Naj ria'nza te yälrusilajz par rexpejn Dios, ¹⁰sa'csi nani riu' lo xcälrusilaznäj Dios, rusilajzani lo xtzuunni sigajc basilajz Dios lo xtzuunni. ¹¹Nanab chanuu gusoobnu xtiidxni te jiu'nu lo yälrusilajzga, te di chu tejnu ni gacnajd lajzni si'c ni gucnajd lajz renani di nililajz.

¹²Sa'csi nasesduxh xtidx Dios, yuduxhza xcälrnibee xtidx Dios. Najcni si'c te guchiil ni caduxh ro'ni, rääzni nez nen redzujt näj yojb. Sigajcza xtidx Dios rääz nez cadro rlia' sa' xsprit näjza xaim bejn. Ruluiiza xtidx Dios rexhigab ni yu' lastoo bejn, näjza redzuun ni rlanj lastoo bejn gun. ¹³Xheti xhi bencheedi Dios ni naga'tz nez lojni. Guiralii guyasi ruhuii Dios. Sajpnu gudeednu cuent lo Dios.

Bixhojz ni sajcru najc Jesucrist

¹⁴Jesucrist, Xi'n Dios, najc xpixhojzpacnu ni sajcru, nani abiu' loj Dios. Ni'cni nanab chanuu sudzu'tznu chalilaaznu xtidx Dios. ¹⁵Xpixhojznu ni sajcru sajcgulasajzni nuure te di jiajbnu lo dojl, sa'csi laani sigajcza gudejndi trabajw, baquuil bendxabni te niujnni dojl, niluxh dini niujn dojl. ¹⁶Riäjlpac na'c guidxeebnu cuedx-guiniabnu lo Xtiosnu ni sanälajz nuure. Na'cza guitujynu, te gulasajzni nuure, guideb xcälracnäjni gacnäjzani nuure.

5 Galooli guiraa rebixhojz ni sajcru nabee lo rebejn. Bixhojz ni sajcru rniab lo Dios xcuent rebejn. Luxh lojni rudeed rebejn

regon näjza reguidxaa ni gudeedni lo Dios te jiäu lo xtojłreni nez lo Dios. ²Rdejdza bixhojz trabajw sigajc beṅguedxliuj, ni'c sajc ga'pni yälṅadolajz loj rebejṅ nani nayääl näjza reni abanijł lo Dios. ³Niluxh sa'csi näjza laani rujni dojl, nanab gudeedni guidxaa lo Dios te jiäu lo rextojłni sigajc rudeedni guidxaa lo Dios te riäu lo xtojł rebejṅ.

⁴Rut sajcdi gac bixhojz xcuentceni.

Dios najc ni rbejdxni te gacni bixhojz, dxejc rudeedni xpala'nni lojni si'c badeednini lo Aarón.

⁵Si'cza di Jesucrist najc bixhojz ni sajcru xcuentceni. Dios najc nani gulälajni gacni bixhojz ni sajcru, räjpni lojni:

Luj najclu Xi'nä, narä guleälu nadxej te guinibeelu.

⁶Scree cajza lo xtidx Dios stee lajt:

Luj najclu bixhojz par tejpas sigajc gujc te niguii ni laa Melquisedec.

⁷Cheni gubajṅ Jesucrist lo guedxliujre, gurejdx-gunabzani lo Dios, guredxa'ni biinzani lo Dios nani sajc nudzucajni lo yälgujt; Dios bacuadiajg xtiidxni sa'csi huinälajz Jesucrist Dios. ⁸Ni'cni Jesucrist mase najcni Xi'n Dios bisieedni basoobni diidx luxh näj ni'c gudejdni trabajw. ⁹Che bidzujṅ dxej baluuxni guiraa redzuun ni rłajz Dios gunni, laani gujcni nani rudeed laa bejṅ nani rusoob xtiidxni lo dojl par tejpas ¹⁰sa'csi Dios gulälajni bixhojz ni sajcru, gujcni bixhojz sigajc gujc Melquisedec.

Rxhṅuriezgw gusa'nni xcälřililajzni

¹¹Rłajznu guiniinu xhidalduxhru diidx xcuent Melquisedec, niluxh

naganduxh gusule'nuni lojtu sa'csi nadyejctu, ditu gacbee. ¹²Agujc xchej huililajztu rediidx xcuent Jesucrist. Ariäjł gusule'tu rediidxre ṅaj, niluxh alga rquindirutu chu gusule' rediidxre lojtu stehuält, luxh rediidxre najc rediidx guyasi xten Dios. Agucsactu si'c báz. Rłajztu yäsactu le'ch lacuaa gautu yäjł, bääl; nalajznu, redidxnagajṅ xten Dios. ¹³Reni najc si'c báz, rä' le'chtis, direni gumbesa'c redidxsa'c xten Dios. ¹⁴Niluxh rebenṅ guyajł rajw yäjł. Sigajcza redidxnagajṅ xten Dios najc par rebejṅ ni aguyajł lo xtidx Dios, renani ayu' xcäriejṅni, arumbeereni nani najc dzunsa'c, nani najcza dzunguijdx.

6 Nanab guisieedrunu xtidx Dios te churu xcäriejṅnu. Na'c guisieedtisnu didx-guyasi xcuent Jesucrist. Na'c guluiitisnu diidx xcuent yälřusiechlajz, xcuent redzuun ni rujṅ rejł bejṅ, näj yälřililajz xtidx Dios. ²Na'c guluiitisnu xcuent yälřrobnis, näj yälřrudzubṅaa yejc bejṅ, näj xcuent yälřrbajṅsac rebengut, näj xcuent yälřguxhtis par tejpas. ³Alga do'o guisieedru xtidx Dios te churu xcäriejṅnu, palga si'c guniidx Dios jṅnu.

⁴Yu' bejṅ ni abianij xcäriejṅni, ni acua' reyälṅnasa'c ni rudeed Dios, ni rbäjz Sprit Dxan xten Dios nen lastooreni, ⁵luxh bidxagłajzreni xtidx Dios näj yälřrnibee xten Dios ni churu jiäd. ⁶Palga laareni guibisacreni lo sa' yälřnabajṅ ni gojpreni galoo, diru gacdi guidxaa xmodreni stehuält, sa'csi dxejc sajcdi si'c ni lagajc laareni gucusacreni Xi'n Dios lo cruju,

nalajznu susanxtujyreni Jesucrist nez loj rebejn. ⁷Bejn guedxliuj ni biejn diajgni najc si'c najc yuj ni rä' nis che riajtis niscuij. Palga yujga gudeed yálnasa'c loj reni rujn dzuun lojni, sunle' Dios yujga. ⁸Niluxh palga gudeed yujga ganax yaguejch näjza cuaan ni xhet sajcdi, xlia'sini, sujn rebejn gac nadeni te checni.

Diidx ni rusudzu'tz lastoonu

⁹Mase rniinu scree lojtu, anajnnu huililajztu xtidx Jesucrist näjza xtiidxni ni ruslaa lo dojl. ¹⁰Sa'csi Dios najc ni rujn yälguxhtissa'c, diza lajzni jääl ni rujntu la'tu näj yälsanälajz ni rajptu par laani che racnäjtu rebejznu lo yärlililajz, luxh guixe-guixee si'c rujntu. ¹¹Najrlajznu tejgatu chanuu ga'p lagajc yärlbalajzre dxe lultli, te gac guiraa ni cabäjztu. ¹²Rlajznu na'c gactu bejn ni rbedxitis, alga guntu sigajc bejn reben galoo, gopdzu'tzreni yärlililajz ni batipduxh lajzreni, guläjzreni te cua'reni reyäl'nasa'c ni bia'n diidx gudeed Dios lojreni.

¹³Luxh che bia'n Dios diidx loj toxtadgoldoonu Abram, guniini por lagajc laani sa'csi ruti stee ni sajcru lojni. ¹⁴Scree gunii Dios: "Guliä sacnäá luj, sunidxäza xhidajl xi'nlu." ¹⁵Cheni aguläjz Abram xchej, gusojb diidx, cua'ni nani gunii Dios lojni. ¹⁶Sa'csi cheni rniliipac bejn te diidx, rniireni diidxga por laj ste'ca bejn ni sajcru lojreni, sas che rusä'treni laj bejnğa xhetru yu'di xhi gunreni bieje. ¹⁷Rlajz Dios gacbeepac rexagdo toAbram sisiojbpac diidx ni bia'nni che guniini loj Abram galooli.

Sisiojbpac xtiidxni, sa'csi guniini diidx con lagajc lajni che bia'nni diidxga. ¹⁸Ni'cni naj yu' tiop diidx ni digacdi guichaa sa'csi digacdi gunii Dios didx-xhii, rusoobpacni xtiidxni, rudeedzani yärlbedxilajz loj renani gubig-guxun lojni, loj reni sanuu loj yärlililajz xtiidxni nani abaniidxni loonu por lagajc lajni. ¹⁹Laa ni'cni cabääznu ni rusudzu'tz lajznu si'c duu-guieb con ancl ni rniazdu'tz te barcw. Si'c rusudzu'tzni lastoonu te jionnu cadro yu'ni detz ladró. ²⁰Lagajc ro'c biu' Jesucrist xcuent nuure, te galooli baxhalni xnez Dios loonu, te gujcn bixhojzro par tejpas si'c gujczä bixhojz nani laa Melquisedec.

Jesucrist najc bixhojzro si'c najc Melquisedec

7 Galoo che guj Melquisedec reii xten guedx Salem, gujcn bixhojzro xten Gueb Dios. Che gubi' Abram che gulujx guer cadro bagu'tni rereii ni bidxe'ch lojni, huichagloj Melquisedecni, sas gunabni lo Dios te gacnäjru Dios Abram. ²Dxejcti bejn Abram tzuu cuaa guiraa ni bejnni gaan, te badeedni tej cuaani loj Melquisedec. Laj Melquisedec säloj "reii ni runsa'c yälguxhtis", dxejctiru reii xten guedx Salem sälojzani "reii xten yärlbedxilajz". ³Baluiilajz lojreni, niluxh dinu gan chu najc xtadni, niclaza chu najc xnanni, niclaza chu najc resa'ni. Dizanu gan guc gojlni niclaza guc gujtni. Gujcn si'c najc Xi'n Dios. Najctiszani bixhojzro par tejpas.

⁴Naj colhuii, lacti te beńsa'c, te beńro najc Melquisedec. Lojni

badeed toxtadgoldoonu Abram teĵa ni sajcru lo teĵa tzuu ni beĵni gaan. Luxh Abram najc beĵni ni sajcru lo rexpeĵni. ⁵Leii xten Moisés, rnibee xca' rebixhoĵz ni najc xfamil Leví te cuaa lo sa'reni si'c ni badeed toAbram loĵ Melquisedec, mase najcreni rexagdoō Abram. ⁶Niluxh di Melquisedec gac xfamil Leví. Niluxh badeed Abram te cuaa xhixtēni loĵ Melquisedec. Dxeĵcti benle'ni Abram ni biannāĵ xtidx Dios. ⁷Naj rut sajcdi guinii garenca, sa'csi nani sajcru runle' yeĵc nani guxiiru saj. ⁸Naj rebixhoĵz ni rca' teĵa lo tzuu ni rajpreni, najc beĵni ni rej. Niluxh rnii xtidx Dios xcuent Melquisedec ni cua' te cuaani galooli: najcni si'c te bixhoĵz nani nabajni par teĵpas. ⁹Ni'cni saj. guiniinu xcuent Leví nani rca' te cuaa, lagajc laani agudijx te cuaaga che badeed Abram teĵa yeĵc tzuuga lo Melquisedec. ¹⁰Sa'csi mase gajd xi'n toAbram chu che huichagloĵ Melquisedecni, batijpni lastooni sa'csi abia'n diidx sudeed Dios xajgni. Ni'cni che agudijxni te cuaaga najcni si'cni suganājni rexajgni.

¹¹Rexpeĵni Israel cua' leii che guĵc bixhoĵz relevitas, reni najc rexi'n toAarón. Paru ni ajc niujnreni nibansa'c rebeĵni ni huisanāj leiiga, dirureni niqiiin niāād stee bixhoĵz ni di gac si'c Aarón, alga si'c najc bixhoĵz Melquisedec najcni. ¹²Sa'csi cheni rdxaa te cuaa bixhoĵz nanab nājza leiiga guidxaa. ¹³Niluxh rnii xtidx Dios, Dad Jesucrist najc beĵni xten garenca famil. Luxh nicla teĵ bixhoĵz gajd gac beĵni xten familga. ¹⁴Huenliisi najnnu najc

Dad Jesucrist te beĵni xten xfamil toJudá, niluxh di Moisés ninii gac te rexpeĵni Judá bixhoĵz.

¹⁵Luxh huenliisi najc ni rniinu, sa'csi abiricaj ste bixhoĵz ni najc sigajc guĵc Melquisedec. ¹⁶Luxh dini ni ajc bixhoĵz si'c rnii releii ni guyu' dxeĵc. Laani guĵcni bixhoĵz xcuent yālrnibee ni najc par teĵpas, ni rut gacdi gutzujl. ¹⁷Scree najc diidx ni gunii Dios xcuentni:

Luj najclu bixhoĵz par teĵpas
si'c guĵc te niguii ni laa
Melquisedec.

¹⁸Dxeĵcti gunij. leii sa'csi xlia'si guĵcni, di ni ajcni niujn beĵni si'cni rniini. ¹⁹Di xleii toMoisés niujn gaan nibansa'c beĵni. Naj lacuaa leiiga rajpnu te xcālirililazsa'c; ni'c rujn rbignu lo Dios.

²⁰Dios beĵni gacni bixhoĵz con xtidxliini, ni guniini con lagajc lajni. ²¹Stecuaa rebixhoĵz guĵcreni bixhoĵz niluxh et con didxliidire, con laj te benro, niluxh bixhoĵzre guĵc bixhoĵz con didxlii, con laj nani rāj.:

Agunilii Dios diidx con lagajc
lajni,
niluxh dini gusiech lajni,
rāj.:

“Luj najclu te bixhoĵzro par
teĵpas,

lagajc si'c guĵc Melquisedec.”

²²Ni'cni, Jesucrist najc ni rujn rile' rediidxre, luxh diidxre sajcruni loĵ xleii Moisés. ²³Guyu' xhidalduxh stecuaa rebixhoĵz, sa'csi rejtreni, digacdi chanuureni gaceni bixhoĵz. ²⁴Niluxh Jesucrist rajpni yālnabajni par teĵpas, naj najczani bixhoĵz par teĵpas. ²⁵Ni'c rajcza ruslaani beĵni lo doĵl par teĵpas. Ruslaani guiraa

renani rbig lo Dios por laani, sa'csi anabajnni par tejpas te canabni lo Dios xcuent laareni.

²⁶Jesucrist najc bixhojzro nani rquiinnu. Laani najc dxan, dini niujn dojl, agubicajni lo reben-dojl, huäjszani jiaaru xhaguibaa. ²⁷Dini gac si'c stecuaa rebixhojz ni nanab ju't man guixe-guixee te guze'c bixhojzroni lo Dios te ganid jiaa lagajc xtojlni. Dxejcti sajc guibi'ni guze'cnini lo Dios xcuent xtojlni rebejn. Niluxh Jesucrist tejtis huält gudejndi trabajw, bejnnini cheni cuajni lo crujz, baxhe'ni xtiejnni xcuent nuure, gujtni. Si'c gudijxni xtojlnu par tejpas. ²⁸Leii xten Moisés rusaan gac bixhojzro te bejn nani rejt, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabaṅsa'c par tejpas.

Jesucrist najc nani rusiäjl diidx

8 Diidx ni sajcru loj rediidx ni caniinu najc scree: bixhojz ni najc xpixhojzronu agurej xladbee Dios lo xcälrdimbicha'ni xhaguibaa. ²Neṅ yu' ni najc dxan, neṅ guidoo ni benchee Dios yu' bixhojzre, xhet nendi guidoo ni runchee reben lo guedxliuj. ³Guiraa rebixhojz rajc rudeedreni gojn lo Dios, rajcza ju'treni guidxaa te gusejcreni lo Dios xcuent xtojlni, ni'cni nanab ga'p Jesucrist xhi gudeedni lo Dios. ⁴Paru suga'ni lo guedxliujre, nicla bixhojz dini ni ajc, sa'csi yu' bixhojz ni rudeed regojn si'c ni rnibee xleii Moisés. ⁵Niluxh redzuun ni rujn rebixhojzga najc si'c te balaa xten guira'ti ni yu' xhaguibaa. Najnnu najcreni balaa sa'csi balijdx Dios

Moisés cheni agojl gunni xquidoo Dios, räjp Dios lojni: “Bahuii te gunlu guira'ti si'cpac ni baluiä lojlu lo dan Sinaí.” ⁶Niluxh xpixhojznu Jesucrist rujn dzuun ni sajcru, sa'csi najcni nani suga' galäii xnezyuj Dios loj reben guedxliuj, gusule'ni diidx ni gunii Dios cheni bejnni xhigabcoob, basa'nni didxcoob loj reben guedxliuj. Luxh didxcoobre sacduxhruni.

⁷Paru ni ajc nusiejch leii ni badeed Dios galooli lo Moisés lajz rebejn, di ni quii niujn Dios ste xhigabcoob. ⁸Niluxh bahuii Dios xhet cayunsa'c di reben guedxliuj, dxejc räjpni:

Naj rniliä sidzujn redxej che gunä stee xhigab,
jia'n stee diidx loj rexpejn Israel
näjza loj rexpejn Judá te
xca'reni didxcoob.

⁹Xhet si'c di xhigab ni benä che bia'nä diidx loj retoxtadgoldooreni neṅ redxej ni gunazä ṅaareni te gulääreni lajdx reben Egipto. Laareni direni nusoob xtidxä ni'c basa'näreni, diruna niuäreni.

Si'c gunii Dad, Gueb Dios.

¹⁰Niluxh diidx nani runä xhigab rlazä jia'n diidx loj rexpejn Israel neṅ redxejre gac scree, räjp Dad:

Sunä chu rexleä lo xcäriejnreni, sucuaäza xtidxä neṅ lastooreni.

Dxejcti narä gacä Xtiosreni, laareni gac rexpenä.

¹¹Rut chu tejdi guluui sa'ni, nicla bejtzni, nicla chu stee bejn gäbreni, “colyembee Dad”,

sa'csi alanumbee guiraareni
narä, rebäz sigajc rebengool.

¹²Narä sulaslazäreni susiaä
redzundxuudx ni bejnreni,
diru lazä guizaj rextojlreni,
nicla latzsiaj ni bejnreni.

¹³Che bia'n Dios didxcoob, diidx
nani bia'nni galoo agujcni didx-
biejw, luxh nani anajc didx-biejw,
xhetru sajcdini.

Xquidoo guedxliujre näjza guidoo xhaguibaa

9 Laaca naj. Diidx ni bia'n galoo
badeed leii xho gunreni che
rajnreni Dios, näjza xho gac guidoo
lo guidxliujre. ²Guc-chee guidoo
dxejcti gojl te ladro galäiini te
gucjni tio'p yu'. Yu' ni najc ganid
laani yudxan. Ro'c suga' candilieer,
näjza mex cadro naga' yätxtiil ni
aguc le' ³Ni rojp yu'ga najc dejtz
ladro, ro'c najc yudxanduxh. ⁴Ro'c
suga' te guuib cadro ru' yaal. Najcni
ganax oor. Ro'c yu'za te guijn ni
laa “arco de pacto”, najcwni ganax
oor, sigajc dejtzni, sigajcza nenñi.
Nennga yu' te bo't ganax oor. Nen
bo'tga, yu' yätxtiil ni laa mana.
Lagajcza nenñ guijnga yu' bar xten
toAarón nani biga', guyu' bid lojni,
näjza guij cadro bacuaa Dios xleii
toMoisés. ⁵Yejc guijnga caj tio'p
figur oor ni najc si'c xangl Dios.
Laareni rujn racbee bejn suga'
Dios ro'c. Lagajc redee rusäuu con
rexhigareni cadro ruxhe' bixhojzro
xtiejn guidxaa xcuent xtojł rebejn.
Ro'cti di gacdiru guiniirunu
xcuentreni naj.

⁶Che gulujx gusucheereni, riu'
rebixhojz si'csi si'c nenñ guidoo, nenñ
yudxan te rajnreni Dios si'c gunibee

Dios. ⁷Niluxh nenñ stee yu'ga ni
laa yudxanduxh, ro'c rajc riu'
bixhojzrotis. Xtebtisni riu'ni, luxh
tejtis huält nenñ teb ijz, te chanäni
xtiejn reguidxaa ni gudeedni te
jia xtojłni näjza te jia xtojł rebejn
ni najc xpejn Israel. ⁸Luxh guiraa
reni'c ruluii Sprit Dxan xten Dios
loonu, gajd yudxanduxh guxal che
sugasijc yu' ganid, yu' ni laa dxan,
cadro sanuu rajnreni Dios. ⁹Guiraa
ni gujc galoo najc si'c te balaa,
baluini xho gacni naj. Regon näjza
reman ni rudeedreni lo Dios direni
nusansa'c xcäriejn reni rudeed
gojn lo Dios, sa'csi xtiejn reman
rusäutisni lo xtojł rebejn. ¹⁰Dee
najc ganaxtis xhi rajwni, ni rä'ni,
con yälrobnis, o xhi stee dzuun ni
rujn bejn te ria ganaxtis tiejxhreni
che guidzujnli dxej cheni guchaa
Dios guira'ti.

¹¹Niluxh abiääd Jesucrist, naj
laani najc bixhojzro xcuent
redidxcoob ni sajcru naj. Nacoob
guidoro cadro biu' bixhojzre,
nasa'cruni naj. Xhet con naadi
bejn guc-cheeni. Dizani gac guidoo
guedxliujre. ¹²Abiu' Jesucrist
cadro najcpac yu' ni laa dxanduxh,
niluxh xhet xtiejndi redxib, regon;
ganax lagajc xtiejnñi ca'ni biu'ni
yudxanduxh tejtis huält, te si'c
baslaani nuure lo dojl par tejpas.
¹³Reni basia xtojł bejn galoo najc
redee: xtiejn regon näjza redxib, näj
cobdäj xten reguidxaa ni rejc nenñ
guidodxanga; bastiojbni guiro'preni
yejc reni yu' xtojłni. ¹⁴Palga basia
redee xtojł bejn, aticaxh xtiejn
Jesucrist sajc gusia dojl, sa'csi
rajpni yälñabajn par tejpas. Lagajc
laani badeedni xtiejnñi lo Dios.

Niluxh najcni renya sa'csi dini niujn dojl, rusiazani xcäriejnno xcuent retzuun ni xhet sajcdi, te chunu loj Dios ni nabajn par tejpas.

¹⁵Ni'cni Jesucrist najc nani suga' galäii: nez lo Dios näjza nez loj reben guedxliuj xcuent didxcoob. Yälgujt xten Jesucrist najc te gudzucajni xtojl reben näjza xtojl renani bejn si'cni caj lo leii, te xca' guiraa reni agurejdx Dios yäl nabajn par tejpas, si'c bia'n diidx galooli.

¹⁶Didxcoobre najc si'c che rlajz tej bejn guinibee xho guidis xhixtenni che agojl guetni, nanab gucuaa bejnga lo te guijtz xho guidisni, dxejcti gucuaani lajni. Niluxh xhet sajcdi guijtzga che gajd bejnga guet.

¹⁷Xhet sajcdi guijtzga che nabansijc nani bejn. Sajcni che agujt bejnga.

¹⁸Ni'cni che bia'n Dios diidx loj rexpejn Israel galoo, gujt te man te bixe' rejn. ¹⁹Che guluix gunii Moisés rediidx si'c ni caj lo leii loj guiraa rexpejn Israel, bagu'tni rebiser, redxib, cua'ni rejnga näjza nis, bahuajdxni guid-xiil xnäa näjza te la' yajg balagbäz, hysopo, dxejcti bastiojbni rejn yejc guijtz cadre caj leii, näjza yejc rebejn.

²⁰Dxejc guniini lojreni: "Rejnre najc seen sile'pac diidx ni abaxhaḷ Dios lojtu."

²¹Sigajcza bastiojb Moisés rejn guidoo näj guiraa renani rquiin rebixhojz che rajnreni Dios. ²²Leii xten Moisés rnibee jia guirali con rejn, palga di rejn guixe', di xtojl bejn jia.

Xtiejn Jesucrist rudzucaj dojl

²³Ni'cni biquiinpac gujt remanre, bixe' xtiejn ni te basiani reni najc

xpalaa reni yu' xhaguibaa, niluxh reni yu' xhaguibaa rquiin guixe' xtiejn te ni sajcrü. ²⁴Di Jesucrist niu' neḷ guidoo ni benchee rebejn, ni najc xpalaa guidoopac xten Dios xhaguibaa. Laani biu'ni lagajc xhaguibaa, te laani suga'ni nez lojpac Dios te caniini xcuent nuure loj Dios. ²⁵Bixhojzro xten xpen Israel biu' neḷ yu' ni laa dxanduxh tejtis huält neḷ teb ijz, ca'ni xtiejn reguidxaa. Niluxh Crist biu' xquidoopac Dios xhaguibaa tejtis huält par tejpas, luxh ca'ni lagajc xtiejn. Di guiquiin jiu'runi balti huält. ²⁶Palga nanab gunni si'cni rujn rebixhojz, sajpnä por niejtni te chinaduxh huält cheli birixtiej guedxliuj. Luxh naj, cheni bidzujn dxej, baluiloj Jesucrist tejtis huält, lagajc laani badeedzani xtiejn ni lo Dios cheni gujtni, cuajni lo cruzj te si'c badzucajni par tejpas xtojl rebejn. ²⁷Guiraa bejn nanabpac guetreni tejtis huält, dxejctiru sidejdreni yälguxhtis xten Dios. ²⁸Sigajcza tejtis huält badeed Jesucrist xtiejn ni bixe' lo cruzj te badzucajni xtojl xhidalduxh bejn. Luxh loj renani cabäjzni suluiilojni stehuält, xhet te gudzucajdiruni dojl, alga te gusa'ni xcälrusläa renani cabäjzni.

10 Sa'csi leii xten toMoisés najctis si'c te balaa xten nani siäd naj. Niluxh dini gac si'cpac redidxcoobga. Ni'cni leii, con xtiejn reguidxaa ni rxe' cazob ijz digacdi gusa'cni rebejn nani guibig lo Dios, sa'csi di xtiejn man gudzucajpac rextojlreni. ²Paru najc nibicajpac xtojl reni rudeed xtiejn guidxaa, aguläjz rudeedreni

xtiejn guidxaa, sa'csi che gubicaj xtoj_lreni, diru xcäriejnreni gumbee dojl. ³Niluxh yälrejt man näj yäl_rrudeedreni rejn casob ijz rusnajtisreni lajzreni xcuent dojl. ⁴Sa'csi digacdi gudzucajpac regon näjza xtiejn redxib xtoj_l bejn.

⁵Ni'cni che biääd Jesucrist lo guedxliuj räjpni lo Dios:
Di r_lajzlu xtiejn guidxaa niclaza regon niluxh abejnlu gacä nigui-guedxliuj.

⁶Dilu nichaglajz yälrejc xten guidxaa niclaza yäl_rrudeed rejn, niclaza gojn ni rudeed rebejn te gusiani xtoj_lreni.

⁷Dxejc räpä: “Narä basiälä te gunä si'cni r_lajzlu Dad, Dios, (si'cni caj nen reguijtz xcuent ni sacä).”

⁸Che gulujx gunii Jesucrist diidxga: “Di r_lajzlu, dizalu guidxag_lajz xcäl_rrejt guidxaa näjza regon niclaza xcäl_rrejc guidxaa, niclaza yäl_rrudeed rejn xcuent xtoj_l bejn si'cni caj lo leii gun bejn.”

⁹Dxejcti räjpni: “Narä siälä, te gunä si'cpac ni r_lajzlu, Dad Dios.” Dxejc badzucaj Jesucrist nani gujc galoo, te guläxtiejni didxcoob ni bia'n Dios loonu naj. ¹⁰Abasia Dios lastoonu sa'csi bejn Jesucrist si'c r_lajz Dios cheni baxhe'ni xtiejnni lo cru_z tejtis huält par tejpas.

¹¹Guiraa rexpixhojz Israel rujnreni dzuun guixe-guixee te rudeedreni lagajctis guidxaa, näjza xtiejn reman, guiraa si'ctis ni caj lo leii, niluxh reni'c digacdi gudzucaj dojl. ¹²Niluxh Jesucrist tejtis huält baxhe' xtiejnni lo cru_z te badzucajni xtoj_l rebejn par tejpas. Naj agurejni xladbee Dios cadro

rnibeeni. ¹³Ro'c cabä_zjzni guiraa ni rdxe'ch lojni te cuereni ladzni'ni.

¹⁴Ni'cni tejtis huält cuajni lo cru_z te basiani par tejpas guiraa renani ahuililajz xtiidxni. ¹⁵Sigajcza rni Sprit Dxan xten Dios loonu; najni:

¹⁶Diidx nani jiannääreni nen redxejre gac scree,
naj Dad Dios: sucuaä rextidxä lo xcäriejnreni,
susäläza xtidxä nen lastooreni.

Dxejcti räjpni:

¹⁷Diru lazä guizaj rextoj_lreni nicla rextol_guijdxreni.

¹⁸Ni'cni, cheni abia xtoj_l bejn, diru quiquiin gudeedreni guidxaa te jia rextoj_lreni.

Nanab guibignu lo Dios

¹⁹Ni'cni resa'nu, na'c guidxejbtu, saj_c jiu'nu yudxanduxh cadro bixe' xtiejn Dad Jesucrist nani abadeedni lo Dios. ²⁰Naj yu' te nezyuj, nezsiucoob, nezyuj xten xcäl_nnabancoobnu ni baxhalni che badzucajni ladroga. Ni'c säloj cheni biu'ni nen yudxanduxh, badeedni lagajc xtiejnni lo Dios.

²¹Jesucrist najc xpixhojzronu nani rnibee rexp_ejn Dios. ²²Ni'cni do'o guibigrunu lo Dios guideb lastosa'cnu, na'c guidxejbdinu, na'cza guitujydinu. Con yäl_rrililajzpac abia lastoonu xcuent rexp_higabgujdx, abidiibza tiejxhnu lo nis-ya. ²³Do'o chanuu sudzu'tznu lo xtiidxni nani huililajznu, na'c guchaanu xhigabnu sa'csi susoob Dios diidx ni bia'nni loonu. ²⁴Naj do'o guihuii xho jiennu te gacnä sa'nu te si'c chonälajznu sa'nu nägajcza te jiennu ganax dzunsa'c. ²⁵Na'c jiennu si'c rujn rebejn nani

diru jiääd che rdxagsa'nu. Nanab guiliidxnu resa'nu sa'csi naj asiäddzungajxh dxej ni guibi' Dad Jesucrist.

²⁶Palga chanuu jienrunu dojl, niluxh abiejn diajgnu xtidx Jesucrist, diru gacdi guibicaj xtojlnu dxejc. ²⁷Dxejcsii guidxeebtisnu guilääznu yälguxhtisduhx xten Dios näj guiboo ni guze'c renani rdx'e'ch loj Dios. ²⁸Cheni guyu' chu tej ni di niujn si'c caj lo xleii Moisés, niluxh bidxaag xtidx tio'p o choñ ni nancheepac, räjpreni dini nusoo leii, gujt bejnga, rut balaslajzdini. ²⁹Maazru yälrusacsíduhx nanab ted renani ruläj yejc Xi'n Dios cheni direni gusobdiajg xtiidxni. Alga ruo'nreni xtiejn ni baxhe'ni lo cruzj te basianini. Rusanxtujyzani Sprit Dxan xten Dios nani badeed didxcoob lojni. ³⁰Anancheenu gunii Dios: “Narä susquixä bejn; loä siguijx bejn”, räjp Dios. Stehuält guniini: “Dad sujn yälguxhtis rexejñni.” ³¹iCosduhx gac bejn ni jiajb ladznaa Dios nani nabajn par tejpas!

³²Niluxh colsnaj lajztu xho gujctu galoo; cheni entis cua'tu xtidx Dios, xho batip lajztu, gudejdtu trabajw sa'csi cua'tu xtidx Dios.

³³Guyu' resa'tu gudéreni lojni, yu' reni basacsí la'tu nez loj rebejn. Guyu'za huält astoo gudejdzatu trabajw sa'csi cahuiitu rebejn nani basacsíreni, cadejdzareni trabajw.

³⁴La'tu banaj lajztu renani yu' latzguiib, guideb yärlbalajz batip lajztu che cua'reni guiraa xhixtentu, sa'csi gucbeetu xhaguibaa rajptu reyäl'nasa'c ni sajcru, niluxh

yu'ni par tejpas. ³⁵Na'c gunijttu xcälirililajz xtidx Jesucrist, sa'csi yärlirililajzga gun xca'tu yäl'nabajn par tejpas. ³⁶La'tu nanab cuedxitu te che abejntu ni rlajz Dios, dxejc xca'tu nani aguniini guniidxni.

³⁷Sa'csi xtidx Dios ni bia'n rñii:

Asiäddzungajxhpac dxej ni jiäädni,

asiäddzungajxhpac dxej ni jiääd nani siääd, dipacni gaclaa.

³⁸Renani nabañsa'c sibañnäj

yärlirililajz,

niluxh palga yu' chutej ni

guidxejb chalilajz,

dini'c gun guibaa lazá.

³⁹Niluxh nuure dinu gac si'c reni rusaan yärlirililajz te nitreni loj dojl. Nuure najcnu renani rililajz xtidx Jesucrist te laa xaimnu par tejpas.

Yärlirililajz

11 ¿Xhini'c najc yärlirililajz? Yärlirililajz säloj cabääznu sajcpac tejni gajd gac, yu'pacza ni mase dinu fiini, najcni si'cni abahuiinuni. ²Dios huinälajz retoxtadgoldoonu sa'csi huililajzreni xtiidxni.

³Sa'csi rililajznu, najnnu benchee Dios reguedxliuj, bencheeni guibaa, bencheezani guiraa nani rhuiinu. Con xtiidxtisni bencheeni nani dinu guihuii.

⁴Gojpa toAbel yärlirililajz badzubyaalni rexquidxaani lo Dios. Yärlbijbyaal xtenni sajcru loj yärlbibyaal xten toCaín. Ni'cni gunii Dios najc toAbel bensa'c. Naj mase agujt Abel, sanuutis racbeenu xcuent yärlirililajz ni gojpní.

⁵Sigajcza gojp Enoc yärlirililajz, ni'c sinä Dios Enoc xhaguibaa,

guideb nabajñni, te na'c niejtni. Diru rebejn nidxälni sa'csi asinä Diosni xhaguibaa. Luxh räjp Dios xcuentni che gajd Dios jinäni, gubansa'cni, baspaani lajz Dios. ⁶Rut chu tejdi sajz guspaa lajz Dios palga dini chalilajz, sa'csi che guibigni lojni, nanab chalilajzni yu' Dios, chalilajzani sudeed Dios xcälñasa'cni loj renani rguilni, nalajznu renani rlajz gumbeepac Dios.

⁷Gojpa toNoé yälirililajz. Che räjp Dios lojni siajbpac nisguij ni gajdreni fii, huililajzni. Bejnni si'c ni räjp Dios. Bidxejbni sa'csi najni rusob Dios xtiidxni, ni'c bencheeni te canuduxh te di niejt rexi'nni. Sa'csi gojpni yälirililajzga, bejnni gubibde rebejn guedxliuj, gunijtreni sa'csi direni nililajz xtiidxni. Dxejcti cua'ni yälñabansa'c ni siääd xcuent yälirililajz.

⁸Sa'csi gojp toAbram yälirililajz, basoobni xtidx Dios che gurejdx Diosni, biriini lajdxni te huijni cadro gudeed Dios yuj lojni te cuääzni ro'c. Biriini lajdxni, mase dini gan caro chääni. ⁹Gojp toAbram yälirililajz, ni'c huiläjzni si'c benzijt loj reyuj ni räjp Dios gudeedni lojreni. Ro'c guläjzreni si'c lajdx benzijt. Guläjzni nen reyuguijd, sigajcza bejn toIsaac näjza toJacoob, sa'csi näjza lojreni räjp Dios gudeedni yujga. ¹⁰Niluxh toAbram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

¹¹Sigajcza gojp toSara yälirililajz te mase anajcni bengool niluxh agudejd chu xi'nni, cua'ni yälñibee xten Dios te gujcnä nan,

guyu' te xi'nni, sa'csi huililajzni susoob Dios xtiidxni. ¹²Ni'cni mase siäddzungajxh dxej ni guet toAbram, guyu' xhidalduxh xajgni. Si'c rebalxhaguibaa näj si'c reguibäzlule' xten yujxh ni tre' ro' nisdoo, si'c najcreni xhidalduxh, nicla gac guigabreni.

¹³Guiraa rebejnre gujt, direni nica' yuj nani räjp Dios gudeedni lojreni; niluxh sa'csi rajpreni yälirililajz, bahuiireni lo yujga zitro, ni'c bibalajzreni, sa'csi anajreni najcreni benzijt, cansajsireni lo guedxliuj. ¹⁴Reni rnii si'c, rniliireni caguilsijcreni cadro gac lajdxreni. ¹⁵Paru niujnreni xhigab lajdxreni najc guejdx cadro biriireni, pet niajc nibisacreni ro'c. ¹⁶Niluxh laareni rlajzreni te lajdxreni ni sajcrü, nalajznu lajdx Dios xhaguibaa, ni'c rguilireni. Ni'cni di Dios guitujy gäbreni najcni Dios xtenreni, luxh alabencheeni guejdx cadro cuääzreni xhaguibaa.

¹⁷Gojpa toAbram yälirililajz ni'cni cheni bateed Diosni preeb, räjpni loj Abram gudeedni Isaac lojni lacuaa gudeedni xhiil, cuäjbni gugu'tni xi'nni lacuaa xhiil, luxh Dios ni najc tejtis aräjp lojni galooli: ¹⁸“Isaac guniidx chu xhidajl xajglu, xagdoolu.” ¹⁹Sa'csi nanchee toAbram rajp Dios yälñibee te guspajñni rebengut. Luxh si'cza cuasacni xi'nni, ascanu loj rebengut cuasacni xi'nni.

²⁰Näjza toIsaac gojp yälirililajz benle'ni toJacoob näjza toEsaü, räjpni xhini'c gun tejgareni.

²¹Gojpa toJacoob yälirililajz, che agojl guetni, benle'ni guiro'p rexi'n toJosé. Dxejcti huistieni guzucajni

yejc baston xtenni te si'c gojnni Dios. ²²ToJosé gojp yälirililajz. Che agojl guetni, räjpni sirii rexpejn Israel lajdx Egipto, gunibeezani xho gunnäjäreni xtzujtnei.

²³Gojp rexuczajzn Moisés yälirililajz, ni'c cheni gojl Moisés, bacua'tzrenini chon bäii, sa'csi bahuiireni bäzdaanni. Direni niu xtidx reii ni gunibeeni, räjpni ju'treni bäz niguii. ²⁴ToMoisés gojp yälirililajz, ni'cni che aguroobni di rlanjni nirilajni xi'n xindxa'p reii xten Egipto. ²⁵Bejnne xhigab tednäjni trabajw rexpejn Dios lacuaa niujnni redzuun ni rchagljaz rujn reben Egipto, sa'csi najc reni'c dojl, luxh tera'tsi ruspaareni lajz bejn. ²⁶Par laani maazru sajc tedni lagajc trabajw ni gudejd Jesucrist lacuaa ni ajpni reyäl'nasa'c xten Egipto sa'csi laani cabäzjtisni reyäl'nasa'c nani churu gudeed Dios lojni. ²⁷Gojp toMoisés yälirililajz biriini lajdx reEgipto, dini nidxejb yälrdxe'ch xten reii, huinuutis gusudzu'tzni si'cni najc xhigabni, ruhuiini loj nani di guzen, nalajznu Dios.

²⁸Gojp Moisés yälirililajz bejnne lanij xten pascw. Gunibeeni baroobreni rejn ro' xpuert rexpejn Israel te che ted angl xten yälgujt nicla te xingan galoo xten rexpejn Israel di guet. ²⁹Gojp rexpejn Israel yälirililajz gudejdreni galäii nisdoo ni laa nisdoxniaa luxh asdoo loj yubijdz rsiajreni si'c gudejdreni. Niluxh che rlanj rebejn Egipto nidejd, gubi' nis, dxejc gulo'reni nen nis.

³⁰Xcuent yälirililajz gurebän paderguij xten guedx Jericó, cheni

basa' gajdz dxej caded huält rexpejn Israel guejdxga. ³¹ToRahab, te gunaguijdx, gojpszani yälirililajz ni'c dini niejt che gujt renani di nuzobdiidx, sa'csi laani bacua'tzni gaii bejn nani sagula'tz xho najc guejdxga.

³²¿Xhiruxh guiniä? Di galädi guiniä xcuent toGedeón, xcuent toBarac, xcuent toSansón, xcuent toJefté, xcuent toDavid, xcuent toSamuel, näjza xcuent retoprofe't.

³³Guiraareni gojp yälirililajz ni'c bejnreni gaan xhidajl reguejdx, bensa'creni yälguxhtis, cua'reni xcälracnäj Dios ni bia'n diidx xca'reni, basäureni ro' rebeedz.

³⁴Guyu'reni nen te balduxh luxh xhet gujcdireni, gojl baxunreni te di niejtreni con espaad. Reni gujc benrdxajg, guzutzu'tzreni gujcreni nadipduxh, gujcreni benduxh lo guer, barilaagwreni resoldaad xten reni rdxe'ch lojreni. ³⁵Guyu' regunaa ni cuasac rextogoolreni, gubansacreni lo rebengut.

Sgaiireni gujt xcuent yälrusacsí lacuaa nicäjbreni nusiech lajzreni te nusläa bejnreni sa'csi rlanjreni xca'reni stee yäl'nabajzn ni sajcru. ³⁶Sgaiireni gudejd trabajw guniyaj bejnreni, gudinnäj bejnreni chiir, cuaduuzareni caden, guyu'zaren i latzguiib. ³⁷Guyu'za reni gujt che bacuaa bejn guij yejcreni o che gujcreni tio'p la' con sier. Guyu'za reni basacsí bejn te guro'nreni yälirililajz. Guyu'za reni gujt con spaad. Guyu' reni cuanzaj nezree nezrec, gojtreni guid-xiil näjza guid-dxib, sa'csi xhet rajpdireni luxh entis rdejdreni trabajw rusacsí bejnreni. ³⁸Sa' rebejnnga

di nungäjĭl rebenĭ guedxliuj niääd rebejnĭga lojreni. Cuanzaj rebejnĭga nez lo reyubijdz cad xhet yu'di xhi gaureni nicla nis te yäreni; cuanzajreni nez neĭ redajn, nez neĭ rebiliää näj nez neĭ guedduxh ni yu' neĭ yuj. ³⁹Guiraa rebejnĭga gojp yälrlililajz, luxh ni'cni huä'p xpala'nreni, niluxh direni nica' ni bia'n diidx gudeed Dios lojreni, ⁴⁰sa'csi bejn Dios xhigab gunni te dzunsa'c lojreni. Bejn Dios xhigab guniidxni yäl'nasa'c loonu, naj tejsi guica'nu con laareni nani bia'n diidx guniidx Dios.

Guihuitisnu lo Jesucrist

12 Ni'c najcni si'cni suga'nu galäii guiraa rebejnre luxh cahuiireni xcälrlililaaznu. Ni'c do'o guisa'n te laad guiraa reni rusäu lo xnejznu, näjza redojl ni ruxhiid nuure lo xcäl'nabajĭnu, te di jieednu chosaanu nez lo nezyuj ni sasanäänu nez cadro chonnu. ²Do'o guihuidzu'tz nez loj Dad Jesucrist nani guläxtiej, nani guluuxza xcälrlililajznu. Jesucrist gudejd trabajw lo crujz, dini nitujy gujtni lo sa' yälgujtgga, sa'csi najnni cheni agudejdni trabajw, sica'ni yälrbalajz; naj agurejni xladbee Dios cadro rnibeeni.

³Colyujn xhigab la'tu xho gudejd Jesucrist ladzĭnaa rebenĭ dojl, te na'c guidxajgtu, na'cza jieedtu laĭ ni cabäjtuni. ⁴La'tu gajd xtiejntu guixe' lo yälrucuanäj dojl. ⁵¿La abiäl lajztu xho balijdx Dios la'tu si'c xi'nni, ä? Scree caj xtiidxni lo reguijtz; räjpni:

Xinä, na'c cuälazlu xcäl'naj Dad niclaza jieedlu che til'najni luj.

⁶Sa'csi si'c runnaj Dad renani sanälajzni, rujnni riaa guiraa renani rca'ni si'c xi'nni.

⁷Palga gatijp lajzlu lo xcäl'naj Dios, sica'ni luj si'c xi'nni, sa'csi ¿chu dad di gunnaj xi'nni? ⁸Niluxh palga di Dios gunnaj la'tu si'cni runnajni guiraa rexi'nni, ditu gac xi'npacni, najctu xi'n redoĭguijdx. ⁹Anajntu cheni gucnu biuux lo guedxliujre, bennaj xtadnu nuure te rsoobnu xtiidxni, te runsa'czanu si'cni rĭajzni. ¿Xhicuent dinu cuadiajg xtidx xtadnu ni yu' xhaguibaa te si'c jia'pnu yäl'nabajĭ, ä? ¹⁰Xtadnu lo guedxliujre bennajreni nuure tio'p-chonĭ dxej, te gac gusoobnu xtiidxni. Niluxh si'c runnaj Dios nuure te jia'pnu te yäl'nabanya, te gac nayazanu sigajc najcni laani. ¹¹Guliini xhet xhi yäl'najdi ni rchalonu najc laaca che rsiajcnuni, racnaj tiejxhnu niluxh ria'nnu et laadi. Niluxh guiraa renani agudejd loj yäl'najga rusoob xtiidxni, rca'reni te yäl'nabanya ni rbecdxilajzreni.

Riez guze'ni xtidx Dios

¹²Ni'cni col'sudzu'tz reñaatu ni abadxajg, col'sudzu'tz yecxhijbtu ni abadxajg, ¹³te col'quiiĭl nezyuj xten xtidx Jesucrist te sudzu'tz ni'tu. Na'c guibicajtu lo xnezyujni.

¹⁴Col'quiiĭl xho cuedxinäjtu guiraa rebejn. Colchanä te yäl'nabanya, sa'csi renani di guibanyadi, digacdi fiireni loj Dad Jesucrist. ¹⁵Col'huisa'c te di gunijt chutejtu lo xcälracnäj Dios, col'natiro gac chu tejtü si'c te cuanlaa ni rujn daan, sa'csi sa' bejnĭga suxhinnĭ guiraa

renani ahuililajz. ¹⁶Nicla tejtú na'c ga'p stee gunaa te laad, nungäjł cuäznäjni chäältisni. Na'cza gactu bejn ni di jiu xtidx Dios, si'c gujc toEsaú cheni bato'ni xcälñasa'cni ni najc xtenni sa'csi najcni xingan galoo xtadni. Bato'nini te cua'ni yälrajwtis. ¹⁷Anajntu, cheni rlajzni niunle' xtadnini te nica'ni ni najc xten xingangalooni, dini nica'ni mase guc-huin lajzni, binduxhni. Dxejcti diru niajcdi nica'nini.

¹⁸Colñatiro, sa'csi la'tu di'tu nibig lo te dajn cadro rajc rsiaj bejn, te dajn ni galoo cayecduxh guiboo, cadro nacäjy, nacäiiboo, cayajcza bedonduxh. ¹⁹Diza diajgtu niejn xse' trompet, xse' Dios si'c biendiajg rexepejn Israel agujc xchero. Luxh che biejn diajgteni rediidxga, direni nutiplajz, gunabduxhrenei na'cru guiniini lojreni. ²⁰(Sa'csi direni nutiplajz diidx ni caniini, räjpni: “Palga ted te mantis guläj xhuj dajnga, colju'tni con guij.”) ²¹Te yälñadxebduxh najc nani guzen ro'c, lagajc toMoisés räjp: “Cayacditä yälrdxejb.”

²²Niluxh la'tu agubigtu lo dajn xten Sión, cad najc lajdx Dios ni nabajñpac, nalajznu guedx Jerusalén ni yu' xhaguibaa cadro yu' xhidalduxh xangl Dios, ²³cadro re' reni calä'p xpala'n Dios. Ro'c re'za reni najc xi'n Dios, renani acaj lajni xhaguibaa. Agubigzatu lo Diospac, ni najc Juejz xten guiraanu, näjza loj respit xten rebejn nani abasia Dios te anajcreni beñnasa'c. ²⁴Agubigzanu loj Jesucrist nani suga' galäii nez loj Dios näj beñguedxliuj xcuent didxcoob ni bia'n Dios, näjza lo

xtiejn Jesucrist ni badeedni lo Dios xcuent nuure. Jesucrist rniab jääjł lajz Dios, luxh ni'c sajcrú loj nani rniab xtejn toAbel. Xtejn toAbel rniab quix nani bagu'tni.

²⁵Ni'c colñatiro te di cuälaztu nani canii lojtu rextiidxni. Palga di rebejn nidedbia sa'csi gulälaz nani baluii bejn ni siääd guedxliujre, ÷xho jiennu tedbianu palga guilälaznu nani ruluii nani siääd xhaguibaali? ²⁶Xse' Dios basniib guedxliuj galooli, niluxh ñaj rnisacni: “Ste huält susnibä xhet ganaxdi guedxliuj, susnibä näjza xhaguibaa.” ²⁷Che gunii “ste huält”, ni'c säloj guibicaj renani benchee Dios ni rac rniib, te jia'n renani digacdi guiniib. ²⁸Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonäläaznuni guideb yälrdxejb näjza yälñadolajz, ²⁹sa'csi Xtiosnu najc si'c te balduxh ni ruse'c, ni runitlojza.

Xho guspaa bejn lajz Dios

13 Colchanuu lo yälñinalajz sa'ni. ²Di gusaantu gudeedu rolijztu guidzujñ biooz, sa'csi loj reni bejn si'c, yu'reni badeed rolijzreni bidzujñ xangl Dios rolijzreni, niluxh direni niacbee chu najcreni.

³Colñaj lajztu reni yu' nen latzguiib, ascanu la la'tu ni yunäreni latzguiib. Colñajza lajztu renani basacsí bejn, ascanu la la'tu ni cagusacsíreni sa'csi näjza la'tu najctu beñguedxliuj si'c najcreni.

⁴Colga'p xpala'n yälğuchnaa te guiban-nayatu con chäältu sa'csi

sujn Dios yälguختis rebejn ni resnä j chääl bejn näjza reni rusguee rebenختeb.

⁵Na'c chanälajztu meel, colguibalaznä j ni rajptu, sa'csi Dios agunii: “Dipacna gusanälu, dizana cuälazälu.” ⁶Ni'c dinu guidxeeb guiniinu:

Dad ni yu' xhaguibaa najc ni rcanäj narä;
dina guidxebä xhitis ni gunnä j bejn narä.

⁷Colsnaj lajztu renani baluui guibansa'ctu, ni basule'za xtidx Dios lojtu; colhuii xho nabajñreni te sigajcza colchanä xcälirililajzreni.

⁸Sigajc gujc Jesucrist nai, sigajcza najcni nadxej, sigajcza sajcn i par tejpas. ⁹Na'c gusaantu gusiejchreni lajztu xcuent ste'ca yälrului ni digac si'c najc xtidx Jesucrist. Sacduxh sudzu'tz lastoonu lo yälracnä j ni ruluii xtidx Dios, xhet lojdi yälrajwtis. Xhet sajcdi rebejn nani rujntis xhigab xcuent yälrajw.

¹⁰Nuurnu rajpnu garenca piään, ro'c digacdi xca' rebixhojz xhi gaureni si'c ni cua'reni nen guidoguijd galoo. ¹¹Sa'csi xpixhojzro xpejn Israel rinä xtiejn reman nen yu' ni laa dxanduxh te biäu lo dojl xten rebejn, niluxh rize'creni xpääl remanga te laad, dejtz guejdxga.

¹²Si'cza gujt Jesucrist te laad, dejtz guejdx, te basiani xtoj l rebejn xcuent lagajc xtiejn i. ¹³Naj colcho' chonnu loj Jesucrist te laad dejtz guejdx te guideednu trabajw näjza yälxtujuj si'cni gudejd Jesucrist.

¹⁴Sa'csi lo guedxliujre dxunlaasinu, niluxh caguuilnu laadxnu ni chu jiädru, te ro'c guidxunnu par tejpas.

¹⁵Guideb xcälracnä j Jesucrist do'o

guideedtisnu xquixtios lo Dios si'c te gojn ni gudeednu lojni, guiliä'pnu xpala'n i nä j jielnu redij. ¹⁶Na'cza jiälajztu guntu huen, gacnä j sa'tu, sa'csi reni'cni najc redzuun ni rdxagla jz Dios.

¹⁷Colcuadiajg xtidx reni rnibee la'tu, sa'csi laareni rcanäjreni lastoonu, si'cza laareni sudeedreni cuent lo Dios. Colyujn guibalajzreni gunreni xtzunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

¹⁸Colnab lo Dios xcuent nuunu, sa'csi racbeenu naya xcäriejnnu, rlaaznu laaca jienu guira'ti dzuun. ¹⁹Rniä lojtu, guiniabrutu loj Dios, te gun Dios jiojb guibi'ä jialä lojtu.

Te didxle' nä j lult xtixtios

²⁰Dios xten yälrbexilajz ni baspajñ Dad Jesucrist lo rebengut, Jesucrist najc baxtorduxh xten rexiil xcuent rejn ni bejn gusojb didxcoob xtenni ni najc par tejpas.

²¹Dios gun gactu bensa'c, bendxojn loj xhitis te guntu ni rla jzni, nä j gunni loj guiraa nuure si'c ni rla jzni xcuent Jesucrist. iColspaa lajz Jesucrist par tejpas! iSugacni si'c!

²²Resa'nu, rniabä lojtu, colcuedx i lajztu, colcuadiajg rediidx ni rulijdxre, sa'csi rioj bga cacuaä te labäz guijtze lojtu.

²³Colyacbee abirii bejtznu Timoteu latzguuib. Palga guidzungenajni ree, siädnaän i jiädhuiä la'tu.

²⁴Colgudeed xtixtios loj guiraa renani ruluii la'tu nä j loj guiraa rebejtznu ni rililajz. Reben Italia ruxhal xtixtios lojtu.

²⁵Gacnä j Dios guiraatu. Sugacni si'c.

Guijtz Nani Bacuaa Santiaag

Santiaag rucuaa guijtz loj renani nare'ch lo guedxliuj

1 Narä Santiaag, xmos Dios näjza xten Dad Jesucrist, ruxhalä xtixtios loj guitzubitio'p cuaa rexpejn Israel ni nare'ch lo guedxliujre.

Yälnejn nani runiidx Dios loonu

²Rebetzä lo xtidx Dios, colguibalazduxhtis che rsiajctu recos nani ruquiiltu cuälaztu xnezyuj Dios, ³sa'csi che rsiajctu reni'c, rsiajctureni te don la guliipac ahuililajztu xtidx Dios, dxejc rsieedrutu yälrbecdxilajz. ⁴Dxejcti yälrbecdxilajz sajc gunni xtzuunni nen lastootu, te gactu bens'a'c, bejn ni aguyajl lo xtidx Dios, nani xhet cayäädxd xcälnejn.

⁵Palga yu' tejtü ni cayääd xcälnejn, suguiniabnini lo Dios, sa'csi Dios rudeedduxhni yälnejn loj guira'ti bejn, luxh dini guinii didxlaa lojni. Palga guiniab bejn, sudeedza Diosni. ⁶Niluxh che guiniabni, suchalilajzpacni, na'c guntio'p lajzni, sa'csi bejn ni runtio'p lajzni najc si'c bäj ni sanä bej, nezree-nezre'c sääbni. ⁷Nani

najc si'c, na'c gunni xhigab yu' xhi xca'ni lo Dad Jesucrist. ⁸Sa'csi nani runtio'p lajzni, lo guiraa ni rujnni nadxej rujnni tej xhigab, guixee rujnni xte'ca xhigab, di gacdi chanuuni tejsi xhigab.

⁹Te sa'nu ni najc nadolajz, suguibalajzni sa'csi najcni benro sa'csi guläs Diosni, ¹⁰sigajcza bejznu ni yu' xhixtenni, suguibalajzni sa'csi abaluii Dios lojni najcni bejn ni xhet sajcdini, sa'csi nägajc laani sinitlojni si'c rnitloj reguii ni yu' lo cuaan ni yu' loniaa. ¹¹Sa'csi che rliejn gubijdz näjza te belaa, li rgoj recuaanga, li riuii reguii ni caj lojni, dxejc rtejbreni, dxejcti agunijt xcälsacruni. Si'cza sinitloj te bejn ni yuduxh xhixtenni laj ni yu'ni lo xnezyujni.

Xhi xca'ni che tedni trabajw

¹²Chicbaa niguii ni rsiudzu'tz laj ni cadejdni trabajw, sa'csi che agunii Dios didxsa'c xcuent nani bejn sica'ni coron xten yälnejn par tejpas ni bia'n Dios diidx gudeedni loj rebejn ni sanälajz Dios. ¹³Che gunijt tejtü, rujntu dojl, na'c gäbtu: "Dios bejn banitä", sa'csi di gacdi quiquiiil Dios te gunni

cosguijdx, digacdi gunijt Dios, luxh sigajcza di gacdi gun Dios gunijt te bejn, gunni dojl. ¹⁴Niluxh tejgatu runijt che rcäy xäriejntu sa'csi riabj yejctu guntu cosguijdx. ¹⁵Che riabj yejctu guntu cosguijdx, runijttu rujntu dojl, luxh dojl che abejntuni, riädnäni yälgujt.

¹⁶Sa'ä ni sanälazä, na'c gusaantu gusgueereni la'tu. ¹⁷Guiraa recoshueen, guiraa recossa'c xhaguibaali siädreni loonu; Dios ruxhalreni, lagajc Dios ni benchee rebajl xhaguibaa, Dios nani di guchaa, sigajctis najcni. ¹⁸Lagajc xcuentni bejn Dios gacnu xpejnni sa'csi huililajznu xtidxliipacni, te gacnu reben galoo loj rexpejnni.

Xho nanab jiennu

¹⁹Acanajntu recosre, sa'ä ni sanälazä. Niluxh tejgatu nanab gusquejnni te gucua diajgni, per gaclaani te guiniini, gaclaazani te guidxe'chni, ²⁰sa'csi xcälr dx'e'ch bejn dini gun xcäl'nasa'c Dios. ²¹Ni'cni colcuälaz guiraa recosguijdx, guiraa recoslatsiaj ni ria'n. Guideb yäl'nadolajz colchalilajz xtidx Dios ni basule'nu, ni yu'pac lastootu, sa'csi ni'c najc ni sajc gusläa xaimtu lo dojl.

²²Niluxh baluui lo guira'ti bejn najctu bejn ni rusoobpactu xtidx Dios, xhet bejn di ni rucua diajgtis xtiidxni, ni rusgueeni lagajc laani.

²³Sa'csi palga najc te bejn te nani rucua diajgtis xtidx Dios, niluxh dini gusoob diidxga, najcni si'c te bejn ni ruhuii lojni loj te guihuajn.

²⁴Sa'csi che ruhuii xho najcni, sägajcni, riallazgajcni xho najcni.

²⁵Niluxh nani ruhuidzu'tz lo

leisa'c, nalajznu lei nani rusläa bejn, luxh rusobpacni leiiga, nani lacuaa jiallajzni nani riejn diajgni, rujnpacni ni caj lo leiiga, bejn ga najc ni saj p yälrbalajzpac lo xhitis ni rujnni.

²⁶Palga yu' tejt u ni rujn xhigab najcni te bejn ni randuxh Dios, niluxh di gacdi gusäuni ro'ni, guiraloj rniini, bejn ga rusguee lagajc laani, luxh xhet sajcdi yälrajn Dios xtenni. ²⁷Yälrajn Dios ni najc guliipac, ni xhet nu'chdi lojni najc scree: chahuini rebisiäjb, näjza regunaa ni agujt chääl ni che yu' xhi rquineni, näjza na'c säblajztu guntu nani rujn reben guedxliuj ni di chalilajz xtidx Dios.

Nanab tebloj jiennänu guira'ti bejn

2 Resa'ä, la'tu ahuililajztu xtidx Dad Jesucrist ni rajp guiraa yälrdimbicha', ni'c di gacdi guntu xhigab sajcr u tej bejn lo sabejn ni. ²Palga guidzujn te bejn xquidootu yu' niloor naani, najcwni ladsa'c, dxejcti jiu'za te bejn nani xhet rajpdi, najcwni ladyujxh, ladbeed, ³dxejcti la'tu jiuurutu nani najcw ladsa'cga, naatu: “Ree gurej lo yagxhilsa'cre”, dxejcti gäblu lo bejn ni xhet rajpdi: “Rec gusulii o gurej lo yujre”, ⁴äla xhet rujnditu xhigab garenca najc tej bejn lo sa'ni, ä? Luxh dxejc acayajct u si'c juejz ni rujn xhigab guijdx.

⁵iColgucua diajg, betzä ni sanälazä! Agule Dios bejn nani xhet rajpdi lo guedxliujre te ga'preni yälirililazduxh, te lo xcäl'nibee Dios xca'reni xcäl'nasa'c ni bia'n diidx gudeed Dios loj renani sanälajzni.

⁶Niluxh la'tu agulälaztu rebejn

nani xhet rajpdi. ¿Xhixh xhet laadi rebejn ni rajp ni rusacsítu, li rgobxhaxhreni la'tu, rinäreni la'tu loj reguxhtis, ä? ⁷ ¿La xhet laadi rebejn ni rajp ni rniyaj loj Dios ni sacduxh? La'tu abirilajtu rexi'n Dios.

⁸Palga guliitu cagusoobtu leii xten xreinu Dios, si'cni caj lo xquijtZ Dios scree: “Colchanälajz sa'tu sigajc rinälajztu lagajc la'tu”, laaca rujntu. ⁹Niluxh palga rinälajzrutu tej cuaa bejn lo stee cuaa bejn, cayujntu dojl, luxh xleii Dios rnii najctu ben dojl, bejn ni rbälaz leii. ¹⁰Palga yu' te bejn ni rusoo guiraa ni caj lo xleii Moisés, niluxh runijtni lo tejtis diidx ni caj lo leii, abanijtpacni, najcni si'cni dini nusoob nicla tej diidx lo guideb leiiga. ¹¹Sa'csi lagajc Dios ni gunii: “Na'c guesnäjlü bejn ni di gac chäällu”, lagajc laani guniizani: “Na'c ju'tlu.” Palga dilu guesnäjlü bejn ni di gac chäällu, niluxh rugu'tlu te bejn, abanijtlu xcuent guiralii releii. ¹²La'tu colguinii, colguibajñ si'c rebejn ni gun Dios yälguxhtis con xtiidxni ni rusläa bejn lo dojl. ¹³Sa'csi renani di gulaslajz bejn, che gun Dios yälguxhtisreni, dizani gulaslajz laareni. Sajcru yäl'rulaslajz lo yälguxhtis.

Yäl'rililajz näj dzuun ni rujñ bejn

¹⁴Resa'ä, ¿xhi sajç palga guinii te bejn: “Ahuililazä xtidx Dios”, niluxh dini gun dzuun ni riäjñ gunni, ä? Sa' yäl'rililajzre, ¿la susläanini lo dojl, ä? ¹⁵Palga yu' te bejtnu o te bisiajnnu ni dini ga'p xhajbni, luxh xhetiza xhi gauni, xhi yäni, ¹⁶luxh gäb tejtü lojni: “Sucuedxi lajzlu jiilu, suguidxa' lajzlu, suguidxaj xque'lu”,

niluxh dini gudeed nani caquiinni, ¿xhi sajç rediidx ni räjpni lojni, ä? ¹⁷Sigajcza yäl'rililajz nani di guquiil bejn gunreni xtzüun Dios najc si'c te ni agujt, sa'csi dini guquiil bejn gunreni dzuun.

¹⁸Yu'za reni naa: “Luj rajplu yäl'rililajz, narä runä xtzüun Dios; baluii narä xcäl'rililajzlu xhet näjdi xtzüun Dios, dxejcti narä suluiä xcäl'rililazä xcuent rextzüun Dios ni runä.” ¹⁹La'tu rililajztu yu' tejtis Dios. Laaca rujñlu, niluxh näjza rebendxab rililajz yu' tejtis Dios, raccijtlireni, rdxebduxhrenini. ²⁰¿La di rlajztu gacbeetu, bennayäl? ¿La ditu gan, yäl'rililajz ni di guichagnäj xtzüun Dios najc te yäl'rililazgut? ²¹Dios badzucaj xtojñ toxtadgoldoonu Abram sa'csi bejn ni si'c gunibee Dios gunni, che badzuubni xingaanni Isa'c lo piään, nugu'tnini nez lo Dios. ²²Colhuui xho tejsi junt sadxaag xcäl'rililajz toAbram dzuun ni bejn ni, dxejcti sa'csi bejn ni nani gunibee Dios gunni, bejn Dios gujç xcäl'rililajz ni sa' yäl'rililajz nani rlajz Dios ga'p rexpejn ni. ²³Dxejcti huile' xtidx Dios cadre caj scree: “Abram huililajz ni räjp Dios lojni, ni'cni badzucaj Dios xtojñ ni, cua' Dios Abram si'c te bennaya.” Birilajzani “xamiigw Dios.”

²⁴Ni'cni ruhuiitu rca' Dios te bejn si'c bennaya nez lojni xcuent xtzüun Dios ni rujñzani, xhet ganaxtis xcuent xcäl'rililajz bejn ga. ²⁵Sigajcza gusajc toRahab, ni gujç te gunadxab. Dios badzucajza xtojñ ni, bejn Dios xhigab najcni te bennaya sa'csi bejn ni xtzüun Dios che badeedni rolizni bacua'tzloj

tio'p xpejn Israel ni gujc guixhajg ni sagula'tz guejdxga, dxejc gucnäjnireni te siireni ste'ca nez yuj. ²⁶Sigajc ni di gacdi guibajn tiejxh bejn palga xheti sprit, sigajcza di gacdi guibajn yälirilajz palga dini gun dzuun ni rnibee Dios gunni.

Rediidx nani rnii luudxnu

3 Resa'ä, na'c gac xhidajltu bejn ni ruluii xtidx Dios, sa'csi anajnnu rac yälguختisroru rebejn nani ruluii xtiidxni. ²Sa'csi guiragajcnu riennu xhidajl cuaa dojl. Palga yu' te bejn ni di gunijt lo diidx ni rniini, laani najcni te beŋsa'c, rajcza rnibeeni guideb tiejxhni. ³Palga rusälnu guiib ni ru' ro' cabaii te chääni cadro rlajznu jiini, rnibeezanu guideb xtiejxhni. ⁴Colhuii rebarcwro, mase siolduxhrene, luxh rebeduxh rulanaareni, niluxh capitán ni rusaj barcw lo nisdoo, te guibbáz ni caj xhajn barcw nen nis, con ni'ctis rinänini cadrotis rlajzni. ⁵Sigajcza najc luudxnu, najcni te labáz tiejxhnu, luxh colhuii lacti didxro rniini. Najcni si'c te balbáz ni rajc ruze'c guiragajc reyajg ni yu' dajn. ⁶Luxh luudxnu najc si'c te bajl. Rnii luudxnu guiraa redidxdxuudx ni rnii reben guedxliujre nani rdxe'ch lo Dios. Lo guiraa rela' ni najc tiejxhnu, laa luudxnu ni rundxuudx guideb tiejxhnu. Luudxnu ralguij con xquiboo gabijl. ⁷Rebejn sajc gusiadooreni guiraloj guidxaa, guiraa mane', guiraa bäl, guiraa man lo nisdoo, abasiacdo bejnreni, ⁸per nicla tej bejn di gacdi gusiacdo lujdxni. Dini cuedxi, guidxani cosguijdx, najcni si'c te

bäl ni rauya'ni rugu'tni te bejn. ⁹Lagajc luudxnu rliä'pnu xpala'n Dios Xtadnu, lagajc laani rniyajnu sabejnnu ni benchee Dios sigajc najcni. ¹⁰Tejsi ro'nu rnile' lo Dios nägajcza rgue lo bejn. Rebetzá, ixhet si'cdi nungäjldi gacni! ¹¹¿La rbää bejn nisnejxh näjza nisrop lo tejsi bisie, ä? ¹²Betzä, ¿la caxajsi sajc xcaj aceitun loj te yagiigw, ä? ¿O la sajc xcaj iigw lo te yaguub, ä? Sigajcza digacdi guirii nisnejxh näjza nisrop lo tejsi bisie.

Yälnajn ni siääd xhaguibaa

¹³¿Chuni'c lo guiraatu yu' xcäriejnni, nanduxhni, ä? Suguluiini xho najcni xcuent xcäl'nabansa'cni, sugunni xtzuunni guideb yäl'nadolajz ni rudeed xcäriejnni. ¹⁴Niluxh palga yu' yälrdxe'ch lo sa'lu ni runnanlaa lastoolu, näjza rujnlu guira'ti parsi xcäl'nasa'c lagajc luj, na'c gaclu guyalajz, sa'csi ni'c najc si'c ni caniilu didxrusguee xcuent xtidxlii Dios. ¹⁵Sa'csi sa' yäl'najnre, xhet xhaguibaadi siäädni, alga najcni yäl'najn xten guedxliujre, xten reben guedxliuj, xtenza reben dxab. ¹⁶Sa'csi cadro yu' yälrdxe'ch lo sa'ni, näj cadro rujn bejn guira'ti parsi xcäl'nasa'c lagajc laani, ro'c yu' biey, yu' guiraloj latsiaj. ¹⁷Niluxh yäl'najn ni ruxhał Dios, ganiddoo najcni naya, dxejcti rulecdxini xcäriejn bejn, dxejc rujnni rajc bejn nadolajz lo sa'reni, rujnzani saru runnäj bejn sa'reni, rulazlajz bejn sa'reni, rujnzareni guiraloj dzunsa'c, runle'pacreni xtiidxreni, direni guinii tej diidx laaga cayujnreni garenca dzuun. ¹⁸Renani rguuil

yälrbexi, yälrbexi rbe'creni te xca'reni te yäl'nabannaya nez loj Dios si'c xcäl'nasa'creni.

Ni nabannäj guedxliuj

4 ¿Casiäd rebiejy, reyälrdxe'ch lo sa'ni ni casiajctu? ¿La direni jääd xcuent lagajc xhigab ni yu' lastootu, ä? Lagajc rehxigabga rujn biey neñ lastootu, ruscäjyreni xcäriejntu. ²La'tu rlaiztu ga'ptu nani ditu ga'p, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdiñäjtu sa'tu. Ditu ga'p nani rlaiztu sa'csi ditu guiniabni loj Dios. ³Rniabtuni, niluxh dini guniidxnini sa'csi xhet laadi najc xhigabtu gunabtuni, alga gunabtuni sa'csi rlaiztu gunijttuni si'cni rlaiztu. ⁴¡Aii! Bejn ni di gandzu' Diostis. ¿La ditu gan bejn nani rlaiz gun redzuun ni rujn reben guedxliuj, bejnga rdxe'chreni lo Dios, ä? Ni'cni palga yu' chu tejtü ni rlaiz chanuu lo ni rajc lo guedxliujre, bejnga rdxe'ch lo Dios. ⁵O ðla rchalotu xlia'si caj lo xtidx Dios rediidxre: “Sprit ni baxhał Dios te cuääzni neñ lastoonu, randzu'ni nuurnu sa'csi rlaizni guinibeeni nuurnu”? ⁶Niluxh runiidxru Dios xcäl'racnäjni loonu. Ni'cni rni xtiidxni scree: “Dios rdxechnäj renani runnaro lagajc laareni, niluxh rudeedruni xcäl'racnäjni lo rebennadolajz.” ⁷Coljiu'pac lo xnezyuj Dios. Colšudzu'tzpac te di guntu ni rlaiz bendxab, te guxunni lojtu. ⁸Colguibigru lo Dios te guibigzani lojtu. Bendojl, colquiiib naatu, nalajznu na'cru guntu latsiaj; colgusia lastootu,

la'tu ni runtio'p laiztu. ⁹Sugacnaj laiztu, suchuti xliajs, colyonduxh. Colguchaa xcäl'ruxijstu, colca' yälhuin, colguchaa xcäl'rbalajztu, colca' yälroon. ¹⁰Colyajc si'c bejn ni xhetliidi sajz nez loj Dad Jesucrist, te laani guiliäsni la'tu gunni la'tu benro.

Na'c guiniyajtu sa'tu

¹¹Rebetzä, na'c guiniyajtu resa'tu. Sa'csi renani rniyaj sa'ni o rujnni yäl'guxhtis sa'ni, reni'c rniyaj xleii Dios, rujnreni yäl'guxhtis xleii Dios luxh palga guntu si'c, dirutu gac renani rusoob xtidx Dios, alga najctu juejz xten leii. ¹²Tejtis najc nani runiidx leii loonu, tejtis najc juejz; najcni nani rajc ruslaa bejn lo dojl, nani sajeza gunitloj bejn. La'tu, ¿chuxh najctu te guntu yäl'guxhtis lo sa'tu, ä?

Dinu gan xhi gac guixee

¹³Naj colcuadiajg dee, la'tu ni rniitu, nadxej o guixee chonnu te guejdx nezrec. Ro'c guideednu tebijz te guiziinu, guito'nu te jiennu gaan meel. ¹⁴Luxh niela gantu xho gac xcäl'nabajntu guixee. Xcäl'nabajntu najc si'csi te za nani rienloj tera'tbäz, dxejcti rnitlojni. ¹⁵Hueenru guiniitu scree: “Palga rlaiz Dios sibaannu, te jiennu dee o dec.” ¹⁶Niluxh si'c ni rujntu naj, rajc guyalajztu rniitu didxro; luxh guiraa redidxroga najc dojl. ¹⁷Ni'cni ni najn xho riäjł gunni, palga dini gunt si'c, rujnni dojl.

Rulijdxni rebejn ni yu' xhidajł xhixtenni

5 Colgucua diajg xtidxä, bejn ni yu' xhidajł xhixtentu. Colyoon,

colcuedxa' xcuent recasionduh ni sactu. ²Guiraa rehxixtentu nani rajptu aguxhijñ, luxh rehxajbtu agudajw rebaguuidni. ³Oor nájza pla't xtentu agubibtiejnñi, aguxhijñni. Lagajc dee gun gacbee Dios ditu niujñ ni rrajz Dios guntu, lagajc ni'c gun chectu, nitlojtu. iXlia'si batiedajntu xhixtentu nen redxey lultga! ⁴iColhuii! Ditu niguixsa'c loj reni bejn xtzuntu, ni'cni laareni cayujñreni yälquij lo Dios xcuenttu. Luxh xhadiajgli Dios xten reangl ni yu' xhaguibaa abidzujñ yälquij xtentu ni cabe'c renani batie' xcälñasa'ctu. ⁵Agubansa'cpactu lo guedxliujre, bejntu lanij si'ctis ni rrajztu, abastio'tu lastootu nen redxey xten yälrugut. ⁶Gudiiltu xho bagu'ttu rebensa'c luxh laareni dxiiitit susujreni, xhet bejndireni te na'c nugu'ttureni.

Colcuääz jiadxhii Diostu

⁷Resa'ä, dxitis colcuääz guidzujñ dxej cheni jiaäd Dad Jesucrist. Colhuii xho rujn bejn ni rbe'c binij, dxitis rbäjzñi gac xcäjlni lañ ni rijb nisguigaloo nájza nisguij ni rijb lult. ⁸Si'cza la'tu colcuäzdxñ, colgustioob lastootu sa'csi asiäddzungajxh dxej ni jiaäd Dad Jesucrist. ⁹Resa'ä, na'c chale'ctu xquej sa'tu, didi gun Dios yälguxhtis la'tu, sa'csi asiäddzungajxh dxej che guidzujñ Dios ni najc Juejz. ¹⁰Rebetzbidä, colhuii xho gudejd reniguii nani bacuaa xtidx Dios trabajw galoo, xho guläjzarenì. ¹¹Colhuii xho rniinu chicbaa renani guläzdxñ lo trabajw ni gudejdrenì. Abiejn

diajgzatu xho bejn Job che gudejdni trabajw, anajnzatu xho guzajcni xcuent redzunsac ni bennäsac Diosni, ni ruluiloj xho riaduxh Dios bejn, rapduxhni yälrulasajz.

¹²Rebetzä, che ria'ntu diidx lo te bejn, gunatiro palga gusä'ttu xhaguibaa, o guedxliuj, o xhi steeni. Che naatu: "Mbaj", ni'ctisza colguinii. Che naatu: "Na'c", ni'ctisza colguinii te na'c gun Dios yälguxhtis la'tu.

¹³¿La yu' tejtü ni cadejd trabajw, ä? Suguiniabni lo Dios. ¿La yu' chu tejtü ni cabalajz, ä? Sugoñni dij te guiliä'pni xpala'n Dios. ¹⁴¿La yu' chu tejtü ni cayacxhuu, ä? Sucueedxni rebengool ni rnibee nen guidoo, te guiniabreni lo Dios xcuentni lañ ni cagusälzarenì se't lo cuajni con laj Jesucrist. ¹⁵Luxh palga rililajzpacrenì che canabrenì, siajc benracxhuuga, siliäs Jesucrist bejnğa. Luxh palga bejnñi dojl, sibicaj xtojlni. ¹⁶Ni'cni colguxhobdojl lo sa'tu, colnab lo Dios xcuent sa'tu te jiajctu. Che rniabduxh te ben naya lo Dios, dzunroza rujn Dios. ¹⁷Elías, te bejn ni gunii xtidx Dios agujc xchero, gujca te bejn sigajc najcnu. Gunabdipni loj Dios te na'c jiajb nisguij, luxh di nisguij najb lo guedxliuj chon ijz garol. ¹⁸Dxejc gunabsacni lo Dios, dxejc bixal xhaguibaa, biabsac nisguij, dxejcu gujc reyälñasa'c xtenrenì lo guedxliuj. ¹⁹Rebetzä, palga yu' chu tejtü ni guibicaj lo xtidx Dios, luxh yu' chu gacnä j guibisacni lo xtidx Dios, ²⁰sugacbee bejn nani racnä j guirii bendojl lo xnezyuguijdxni te guibisacni lo Dios, bejnğa agucnä jni te gulaa xaimni lo yälgujt, te gubicajza guiraa xtojlni, mase xhidalduxh najc xtojlni.

Guijtz Ganid Nani Bacuaa Pedr

**Pedr cacuaa guijtz loj reni
rililajz ni nare'ch**

1 Narä Pedr, te apost xten Jesucrist, cacuaä guijtzre loj renani agule Dios gac rexpejn¹ nani rbäjz si'c benzijt lo reguedx Ponto, Galacia, Capadocia, Asia, näjza Bitinia. ²Xtadnu Dios gule la'tu galooli bencheeni niguii, aguleni la'tu par lagajc laani te gun Sprit Dxan xtenu xtuunni nen lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhru³ni la'tu, guscuedxini lastootu lo guiraliiti.

Te yäl⁴nabaj⁵n ni cabäaznu

³Colguiliä'p xpala'n Dios ni najc Xtad Jesucrist, Dios nani xcuent xcäl⁶rulaslazduxhni bejn⁷ni gojpnu te yäl⁸nabancoob sa'csi baspa⁹nsacni Jesucrist loj rebengut. Sa'csi rajpnu yäl¹⁰nabancoob, ni'c nadippac lajznu. ⁴Ni'cni laani suniidxni te yäl¹¹rusalajz ni di nitloj, ni di xh¹²in, ni di jiu¹³i si'c riuii rebalajg. Yäl¹⁴rusalajzga aguluchedzu'tzni xhaguibaa par la'tu, ⁵nani cayapdzu'tz xcäl¹⁵milaagwr xten Dios sa'csi rililajz¹⁶tu xtiidxni, te guluii Dios guira'ti ni rajpni par la'tu, ni

arapcheeni te guluinireni lojtu che luux guedxliujre.

⁶Ni'cni rbalazduxhtu, mase nanab tedtu balti trabajw gaie'si dxej lo guedxliujre, ⁷te guzen xho rililajz⁸tu. Xcäl⁹rililajz¹⁰tu saj¹¹cru lo oor nani rnitloj, niluxh xcäl¹²rililajz¹³tu di nitloj, mase tedni lo guiboo, ni'cni sinii Dios didxsa'c, didxro, siliä'pni xpala'ntu che guibisac Jesucrist lo guedxliujre guideb xcäl¹⁴milaagwrni, näjza xcäl¹⁵rdimbicha'ni.

⁸Mase gajd⁹tu fii lojni, sanälajz¹⁰tuni. Mase ditu fii lojni naj, ahuililajz¹¹tu xtiidxni, rbalazduxhtu guideb yäl¹²rbalajz ni rut rajcdi rusule', sa'ni yu' xhaguibaatis, ⁹sa'csi xcäl¹³rililajz¹⁴tu sus¹⁵laa xaimtu lo dojl, sica'tu yäl¹⁶nabaj¹⁷n par tejpas.

¹⁰Luxh xcuent yäl¹¹rus¹²laa dojlre, rebejn nani gunii xtidx Dios agujc xchero, laareni abasulexgaareni xcuent xcäl¹³racnäj Diosre nani siäd lojtu. Luxh bisiedduxh¹⁴reni, gunabdiidxzareni, ¹¹te r¹²lajzreni gacbeer¹³eni chu bejn o gucpac gac nani cagusä't Sprit xten Crist ni yu' nen lastooreni che gunixgaani xho nungäj¹⁴l ted Jesucrist trabajw, dxej¹⁵cru xcasacni yäl¹⁶rnibee. ¹²Baluii Dios lojreni, di rediidxga soob nen redxej ni nabaj¹⁷reni, alga par la'tu

najc rediidxga. Naj agunii rebejn ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhaļ Dios Sprit Dxan xtenni te cuääzni nen lastooreni. Näjza rexangl Dios ni rbäjz xhaguibaa rļajz gacbeerureni rediidxga.

Xcäl̄nabañnayanu nez loj Dios

¹³Ni'cni, col̄sanij xcäriejntu, col̄gusudzu'tz lastootu, guideb lastootu col̄yenloj yäl̄racnäj xten Dios ni abia'n diidx xca'nu che guibisac Jesucrist lo guedxliuj. ¹⁴Gactu si'c biuux nani rusooob xtidx xtadni. Na'cru xcäjbtu guntu redzunguijdx ni bejntu galoo che gajdtu gumbee Dios. ¹⁵Dios ni gule la'tu najc dxan. Sigajcza la'tu, loj guiralii ni rujntu col̄yajc bendxan. ¹⁶Sa'csi lo xtidx Dios caj scree: “Sajctu bendxan sa'csi narä nacä dxan.”

¹⁷Palga la'tu rniitu “Dad” lo Dios nani tebloj rujn yäl̄guxhtis loj guiraa bejn xcuent dzuun ni bejn̄ni, la'tu riäjļ guidxejbtuni guiraa dxej ni nabansijctu lo guedxliujre. ¹⁸Anajntu di Dios nudeed yäl̄nasa'c ni rnitlojdi, si'c oor näjza pla't, te basļaani la'tu lo recostumbri ni cua'tu lo retoxtadgoldootu. Recostumbri xhet sa'cdireni. Di Dios nudeed oor nicla pla't te basļaani la'tu, ¹⁹badeedni rejn ni sacduxh te basļaani la'tu loj xtojļtu. Rejn si'c xtiejn te xiil ni naya, xhetpac najcdini, xtiejn lagajc Jesucrist. ²⁰Guliipacni che gajdli guirixtiej guedxliujre, gule Dios Jesucrist, niluxh najru, nen redxelult che gajd guedxliujre nitloj,

biädluiloj̄ni par xcäl̄nasa'ctu, ²¹la'tu nani rililajz xtidx Dios xcuent Jesucrist. Luxh Dios baspañsac Jesucrist loj rebengut, badeedni yäl̄rnibee loj̄ni, ni'cni ahuililajztu xtidx Dios, luxh Diostis cayenlojtu naj.

²²Naj sa'csi abasoobtu xtidxliini, te si'c abasiatu lastootu te gac chanälajztu sa'tu, naj guideb lastootu col̄chanälajzpac sa'tu. ²³Sa'csi acua'tu xcäl̄nabañcoobtu xcuent xtidx Dios ni najc par tejpas, et xcuentdi xtidx beñ guedxliuj ni rnitloj. La'tu najctu si'c cuaan ni rliejn lo bejdz ni siääd xhaguibaa, xhet lo bejdzdi ni rnitloj. ²⁴Galooli gunii Dios scree:

Guiraa reben guedxliuj najc si'c recuaan, guiraa xcäl̄nasa'creni najc si'c reguii ni rcaj lo cuaan, recuaan rgoļ, lirtejbza reguii xtenni,

²⁵niluxh xtidx xtad Jesucristnu rsiudzu'tzni tejpas.

Luxh diidxre najc diidx ni basule'reni lojtu.

2 Ni'cni col̄gusaan guiraa redzunguijdx ni yu' lo guedxliuj, na'c gusgueetu sa'tu, na'c guntioo lajztu, na'c chuguij lajztu xhixten sa'tu, na'c guiniyaj sa'tu. ²Si'c riojļ rebäznite' le'ch, si'cza col̄quiiļ xtidx Dios par sprittu. Col̄jiojļ xtidx Dios te gustioobruni la'tu lo yäl̄rusļaa lo dojļ, ³palga agucbeetu lacti hueen najc xcäl̄racnäj Jesucrist.

Crist najc si'c te guij ni nabajñ

⁴Col̄guibig loj Jesucrist ni najc si'c te guij ni nabajñ. Laani suniidx

yäl nabajñ par tejpas loonu. Rebejn badzucaj guijga, niluxh Dios gulenini sa'csi sacduxhni. ⁵Sigajcza tejpgatu najctu si'c guij ni nabajñ, ni'c colgusaan xca' Dios la'tu, reguibajñ, te con la'tu gunchee Dios te yu' cadre cuääz Sprit xtenni, te gactu rexpixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedtu lo Dios guiraa xcäl nasa'ctu con xprixtentu. Dee najc nani rchaglajz Dios. ⁶Sa'csi galooli gunii Dios scree:

Agule'cä te bejn neñ guedx Siön,
nalajznu Jerusalén,
ni gac si'c te guisa'c, te guiro ni
rsiuj squiin te yuro.

Chutis bejn ni chalilajz xtiidxni,
dini jianxtuuj.

⁷Lojtu ni ahuililajz xtiidxni najcni
si'c te guisacduxh, niluxh loj renani
gajd chalilajz xtiidxni, najcni:

Guij ni gulälaz renani
cayunchee yu',
lagajc guijga gujc guijpac ni
baliib squiin xten yu'ga

⁸näjza:

Te guij ni rliaj ni' bejn, ni
ruzälta'reni,
laareni riajbreni sa'csi direni
gusoob xtidx Dios,
luxh agunibexгаа Dios
nitlojreni.

Renani gule Dios

⁹La'tu najctu te cuaa bejn ni
agule Dios, tejpgatu najctu rebixhojz
ni najc si'c rei xten Dios. La'tu
najctu te benñaya, te bensa'c,
rexejñpacni. Aguleni la'tu te
gusule'tu reyäl nasacduxh ni bejn
Dios ni gurejdxte che guyu'tu lo
nezyunacäjy xten guedxliujre te

biu'tu lo nezyuj ni rdimbichasejz
xten Dios. ¹⁰La'tu galoo rut najcditu,
niluxh ñaj najctu rexejñpac Dios.
Galoo gajd Dios gulaslajztu, luxh
ñaj abalaslajz Dios la'tu.

Colguibajñ lo xnezyuj Dios

¹¹Rebetzä ni sanälazä, nabajñtu
lo guedxliujre si'c benzijt, ni
rbäjz te laad, ni'c rniabduxhä
lojtu, na'c guntu recosguijdx xten
guedxliujre, ni rutijl neñ lastoo
bejn te cuälazreni xnezyuj Dios.

¹²Colguibañsa'c la'l ni yu'tu loj
rebenzijt ni di gac xpejn Israel te
palga guiniyajreni la'tu gäbreni
najctu benlatsiaj, che fiireni
redzunsac ni rujntu, siliä'ppacreni
xpala'n Dios che jädsac Jesucrist te
gunni yälguxhtis.

¹³Ni'cni, sa'csi huililajztu xtidx
Jesucrist, colgusoob xtidx guiraa
reni rnibeetu lo guedxliujre, si'c
najc presidentro, ¹⁴regubernadoor
nani ruxhañni te rujnreni
yälguxhtis rebendojl näjza te
guiliä'pni xpala'n rebenñ nani laaca
rujnreni. ¹⁵Sa'csi Dios rlaiz guntu
recoosa'c te cuedcxitu rextidxnayääl
ni rnii reni di rlaiz gumbee didxlii
xcuent Jesucrist.

¹⁶Colguibajñ si'c bejn ni rut
rnibeedi, na'cza guntu latsiaj sa'csi
rut rnibeeditu, colguibajñ si'c
guinibee Dios. ¹⁷Ga'ptu yäl nadolajz
loj guiraasi bejn. Colchanälajz
sa'tu ni rililajz. Colguidxejb Dios,
colguiliä'p xpala'n presidentro.

Gudejd Jesucrist trabajw te baluiini xho jiennu

¹⁸La'tu ni najc mos, guideb
yäl nadolajz colgusobdiajz guiraa

xtidx rexlantu, xhet ganaxdi relamsa'c ni najc nadolajz, nájza relam ni najc benguijdx. ¹⁹Sa'csi rchagljajz ruhuu Dios te bejn palga sa'csi rililajz te bejn xtidx Dios rujn bejn huant che rdejndi trabajw luxh xhet bejndini. ²⁰Palga la'tu rujntu latsiaj ni'cni rusacsni la'tu, xhi guntu gaan palga rujntu huant rdejdtu trabajw? Niluxh palga la'tu rdejdtu trabajw sa'csi rujntu redzunsac, luxh rujntu huant, ni'c najc laaca nez loj Dios. ²¹Te guntu si'c gurejdx Diostu, sa'csi gudejza Jesucrist trabajw xcuentu te guluiini xho guntu che chanuutu lo xnezyujni. ²²Laani dini niujn nicla tej dojl, laani dini nusguee nicla tej bejn con didx-xhii. ²³Che guniyajreni lojni, dini nudzu' yälrniyajga. Che cadejndi trabajw, dini nudzu' diidx niluxh bateedni lagajc laani ladznaa Dios ni rujn yälguxhtissa'c. ²⁴Gudeed Jesucrist trabajw si'c te bendolduxh, bacuaarenini lo cruzj te ro'c gusacsiduxh tiejxhni xcuent xtojlnu, te na'c gunrunu dojl, te guibaṅsa'cnu lo xnezyuj Dios. Gudilgujdxreni tiejxhni te basiajcn la'tu. ²⁵Sa'csi galoo gujctu si'c rexiil ni rut rajpdi, rijreni nezree-nezrec. Niluxh naj agubisactu lo xpaxtoortu nájza nani randzu' xaimtu, Jesucrist.

Xho nanab guibannäjtü chäältu

3 Sigajcza la'tu, regunaa ni abachnaa, colgusoob xtidx chäältu, te mase yu' tejreni ni di chalilajz xtidx Dios, sililajzni xtidx Dios sa'csi fiini xho rujntu mase xhet rniidilu. ²Sa'csi fiini

xho riulu xtiidxni nájza xho rniilu nadolajz lojni, nájza xho nabannäsa'cluni. ³Na'c gusucheetu ganax lo jiaatis, si'c najc guichniil yejctu, nájza biaoor ni rcaj diajgtu, guejntu, naatu, nájza ladsa'c ni najc sacru. ⁴Colgusuchenäj lastootu yälndolajz, yälrbecdxi lajz, nájza yälšanälajz, sa'csi direni nitloj, luxh sacduxhrene nez loj Dios. ⁵Galoo si'cza bejn regunaa ni gujc xpejn Dios ni huililajz xtidx Dios, basuccheereni lastooreni, basoobreni xtidx chäälrni. ⁶Si'c gujc toSara, basobdiajgni xtidx toAbram, guniizani lo toAbram, Dad. Naj najctu si'c laani palga rujntu redzunsac, nájza na'c guidxjbditu. ⁷Sigajcza la'tu, niguii ni abachnaa, colguibannäsa'c chäältu. Colgapdani sa'csi dini gacnadip si'c te niguii; nanab guntu si'c sa'csi nájza lojreni badeed Dios yäl nabajñ par tejpas. Colyejn si'c, te gucuaadijg Dios che cuedxguiniabtu lojni.

Renani rdejd trabajw che laaca rujnreni

⁸Dee najc ni cania loj guiraatu, saru colguibannäj sa'tu. Colgulasajz sa'tu, colchanälajz sa'tu si'c rinälajz te niguii bejtzni. Gactu beṅsa'c, beṅnadolajz. ⁹Na'c gudzu'tu didxguijdx che guiniireni didxguijdx lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacnäjnireni, sa'csi ni'cni gule Dios la'tu, te sica'zatu reyäl nasa'c ni guniidxni lojtu. ¹⁰Sa'csi scree caj lo xtidx Dios:

Nani rchagljajz guibajñni,

luxh rlaŝzani saru tedni redxej
 lo guedxliujre,
 sugudxoŝni guinii ro'ni didxnaj
 nájza didx-xhii.

¹¹ Guibicajni loj redzunguijdx,
 sugunni redzunsac'tis.
 Suquiilni yäl'rbedxi te ni'c
 chanuuni.

¹² Sa'csi ruhuii Dios rebejn ni rujn
 dzunsac',
 rucuaiajgzani xtiidxreni che
 rniabreni lojni.
 Niluxh rudzuréni lojni,
 rbälazzani renani rujn latsiaj.

¹³ ¿Chu laa ni gun latsiaj la'tu,
 palga la'tu rbaali lajztu rujntu
 dzunsac'? ¹⁴ Palga caxäjsi tedtu
 trabajw che guntu redzunsac'.
 iChicbaatu! Na'c guntu xhigab,
 niclaza guidxejbtu xcäl'ruchejbreni.

¹⁵ Colgusaan guinibee Dad Jesucrist
 nen lastootu, gususiñ te gudzu'tu
 diidx loj reni rniabdiidx lojtu
 xhicuent runlojtu guibi' Jesucrist.
 Guideb yäl'nadolajz saru gudzu'tu
 diidx. ¹⁶ Colguibansa'c te cuedxi
 xcäl'riejntu te che guiniyajreni
 la'tu sa'csi nabansa'ctu loj Crist,
 jianxtujy reni rniyaj la'tu. ¹⁷ Sa'csi
 hueenru tedtu trabajw che cayuntu
 te dzunsac', palga si'c rlaŝz Dios,
 lacuaa tedtu trabajw sa'csi cayujntu
 dojl.

¹⁸ Sa'csi sigajcza tejtis gujt
 Jesucrist xcuent rextojñu. Xhetliidi
 xtojñi guyu' nez loj Dios, niluxh
 gudejdni trabajwduxh xcuent
 rebendojl. Bejni si'c te gac
 guibignu lo Dios sa'csi gujt tiejxh
 Jesucrist, luxh guyusac sprit xtenni
 lo tiejxhni te gubansacni. ¹⁹ Che
 gajd xpřitni guibisac lo tiejxhni,
 huij spritni basule'ni diidx loj

resprit ni yu' latzguiib. ²⁰ Respritga
 najc renani di nusoob xtidx Noé che
 basule'ni xtidx Dios lojreni. Gulájz
 Dios rebejnğa guiraa redxej ni
 cayujñ Noé barcwro agujc xchero.
 Baslaa Dios xcäl'nabajn xhujntis
 bejn, xhet gujcdireni gudejdreni lo
 nisguiro ni biajb guideb guedxliujre.

²¹ Che robnisnu naj, rusnaalajznu
 rebejnğa; yäl'robnisga rului loj xho
 ruslaa Diosnu lo dojl. Et sa'csi
 riájt beed lo tiejxhnu nen nisga,
 alga sa'csi dxejc rniabnu lo Dios
 guiniidxni te xcäriensa'c, sa'csi
 sajc xca'nuni xcuent ni gubansac
 Jesucrist lo rebengut. ²² Che birii
 Jesucrist loj rebengut, biu'ni
 xhaguibaa cadre gurejni xladbee
 Dios te ro'c rniweeni loj rexangl
 Dios, nájza loj guiraa resprit ni rajc
 rnibee, ni yu' lo guedxliuj nájza
 xhaguibaa.

Colyejn xtzuun Dios

4 Ni'cni sa'csi agudejd Jesucrist
 trabajw cuajni lo cruŝz
 xcuentnu, sigajcza la'tu riájl
 guntu xhigab sidejdtu trabajw lo
 guedxliujre sa'csi nani agudejd
 trabajw, diruni gun dojl, ²te guideb
 nabajñni lo guedxliuj, guibajñni si'c
 rlaŝz Dios, diruni guibajn te gunni
 redzunguijdx xten guedxliujre.

³ Sa'csi bejntu si'ctis ni rlaŝztu galoo,
 bejntu si'c rujn rebejn ni di gumbee
 Dios, bejntu si'cni rlaŝz tiejxhtu,
 bejntu latsiaj, gusojztu, bejntu
 relaniro, gudedcaj gusojztu, luxh
 bejntu cosxtuiduxh bazuxhijbzatu
 loj rebanäbdxab. ⁴ Dxejcti rebejn
 ni rujn recosga naj, rdxelojreni
 sa'csi dirutu gun ni rlaŝzreni, ni'c
 rniyajreni la'tu. ⁵ Niluxh laareni

suureni nez loj Jesucrist ni agojl gun yälgu^hxhtis loj guiraa rebejn, rebejn ni nabajn näjza renani agujt, te gusule'reni xcuent nani bejnreni. ⁶Ni'cni basule' Jesucrist xtidx Dios loj reni agujt, te mase che gubajⁿreni lo guedxliuj gujcreni yälgu^hxhtis si'ctis ni rajc bejn, dxejc gujtreni, naj sprit xtenreni sinuu guibajⁿ si'c ni rlajz Dios.

⁷Asiäddzungajxh dxej che guibisac Jesucrist lo guedxliujre. Ni'cni ganax laaca col^yejn xhigab, col^gusin xcäriejntu te saru cued^xguiniabtu lo Dios. ⁸Niluxh ni maazru sajc najc yäl^sanälajz resa'tu sa'csi che rinälajztu resa'tu, riallajztu xtoj^l sa'tu. ⁹Saru gurenäj bejn ni rdzujⁿ roliz^lzlu, na'c jiej^ytu. ¹⁰Abaniid^x Dios loj tejgatu te dzuun ni sajc guntu. Dzuunga col^yacnäj resa'tu, te si'c guluiitu lo resa'tu laaca cayunsa'ctu guira'ti nani baniid^x Dios lojtu. ¹¹Palga tejt^u najc xtz^uunni guluiini xtidx Dios, suguiniini ascanu najcni xtiid^xpac Dios. Palga tejt^u najc xtz^uunni gacnäjni sa'ni, sugunnini, guideb yälⁿadip yälⁿadaan ni rudeed Dios lojni, te guira'tis ni rajc sujn guiliä'p xpala'n Dios xcuent Jesucrist. Sa'csi laatisni riäj^l chä'p xpala'nⁿⁱ, laatisni riäj^l guinibeeni tejpas. Sugacni si'c.

Xho nanab tednu trabajw

¹²Rebetzä ni sanälazä, na'c guidxelojtu sa'csi cadej^dtu trabajw ni najc si'c guiboo, ni siäd te gactu preeb. Na'c guntu xhigab xhichani'c casiaj^{ct}u. ¹³Col^guibalajz sa'csi sigajc ni cadej^dtu trabajw sa'ni gudej^d Jesucrist, sigajcza sibalajz^{tu}

che guiluiloj xcäl^rdimbicha' Jesucrist. ¹⁴Palga rniyajreni la'tu sa'csi rililajz^{tu} xtidx Jesucrist, chicbaa la'tu, sa'csi rbäjz Xp^rit Dxan xten Dios guideb xcäl^rdimbicha'ni nen^l lastootu. ¹⁵Gunatiro, andi gusaantu ted tejt^u trabajw sa'csi bagu'ttu bejn, o sa'csi gulajntu xhi xten bejn, o sa'csi bejntu latsiaj, o sa'csi huichu'ni lo xcuent sa'ni ni xhet nungäj^ldi gacbeeni. ¹⁶Palga yu' chu tej tedni trabajw sa'csi rililajzⁿⁱ xtidx Jesucrist, na'c guitujⁿⁱ, alga suguiliä'pⁿⁱ xpala'n Dios xcuent Jesucrist.

¹⁷Abidzujⁿ dxej che ganid rexpejⁿ Dios ted trabajw. Luxh palga ganid nuurnu gacnu yälgu^hxhtis luxh ahuililaaznu xtiid^xni, ixhocha gun rebejn nani di chalilajz xtidx Dios xcuent Jesucrist! ¹⁸Lo xtidx Dios caj scree:

Lacti naganlajz r^liaa rebennaya lo dojl,
 ÷xhocha gunäjⁿⁱ rebejn nani di chalilajz xtidx Dios näjza rebendojl?

¹⁹Ni'cni, guiraatu nani cadej^d trabajw xcuent xtidx Dios si'cni rlajz Dios, col^gudeed xprittu lo Dios ni di gusguee, ni bencheetu, te chanuutis guntu ni riäj^l guntu.

Yäl^rulijdx loj renani ahuililajz xtidx Dios

5 Narä nacä te bengool, bahuiä trabajw ni gudej^d Jesucrist, bahuiäza xcäl^rdimbicha' Jesucrist ni guniid^xni loonu che guibisacni lo guedxliujre. Ni'cni rulid^xä la'tu ni najc rebengool, ²col^gajp renani rililajz xtidx Dios nani rajptu fiipactu xhi rujnreni. Colga'preni

si'c te bejn ni rajp xiil, colyejn
guideb yejc, guideb lajztu. Colyejn
si'c sa'csi si'c rrajz Dios guntu,
na'c gunlojtu meel. Colguibalajz
cayajptu rexpejn Dios. ³Na'c
guinibeetu lojreni si'c rnibee te lam
loj reni rujn xtzuunni, colguluiireni
xho gunreni con xcäl nabansa'clu.

⁴Che guibisac Jesucrist, ni rajp
nuure, laani suniidxni xcuentnu, te
yäl nasacduxh nani dipac nitloj.

⁵Sigajcza la'tu ni najc bi'n,
colgusobdiajg xtidx rebengool.
Guiraatu coljiu xtidx sa'tu, colguluii
sa'tu guideb nadolajz. Sa'csi:

Dios rbälaz rebejn ni runnaro
lagajc laareni,
niluxh racnäjni rebejn ni najc
nadolajz.

⁶Ni'cni guideb yäl nadolajz coljiu
lo Dios sa'csi rajpni yäl rnbidexh,
te guiliä'pni xpala'ntu che gal dxej
ni guibisacni. ⁷Colgudeed guiraa
reyärsia' ni yu' lastootu lo Jesucrist
te guscuecdxini xcäriejntu sa'csi
laani sanälajzni la'tu.

⁸Colgusanij xcäriejntu, colsusin
sa'csi rdxe'ch bendxab lojtu,
cansaxhiga'tzni si'c te beedz
nialajz, caguilni chu guxhinni.

⁹Colsudzu'tz nez lojni, guideb

lastootu colchalilajz xtidx Dios,
sa'csi anajntu sigajcza cayunnäjni
guiraa rebetznu ni nabajn lo
guedxliujre. ¹⁰Che agudejdtu
trabajw tiop-choñ dxej, Dios
nani rajp guiraa yäl racnäj, nani
gurejdx la'tu te näjza la'tu
xca'tu xcalrdimbicha'ni xcuent
lagajc Jesucrist, lagajc laani
sunsac'ni la'tu, bejn ni rsiudzu'tz
lo xtiidxni, bejn ni nadip lajzni,
bejn ni di guidxerb. ¹¹Laani
rajpni yäl rnbidexh par tejpas,
guiliä'pnu xpala'nni par tejpas.
Sugacni si'c.

¹²Siädnä Silvan guijtze lojtu.
Runä xhigab najcni te bejn nani
huililazsa'c xtidx Dios. Abacuaä
bale'si diidxe lojtu te gulidxä
la'tu, te guiniliä lojtu dee najc
xcäl racnäjpac Dios. Colsudzu'tz
xcuent yäl racnäjre.

¹³Rexpejn Dios ni re' lo guedx
Babilonia ruxhal xtiixios lojtu sa'csi
gule Dios la'tu sigajc guleni laareni.
Marcw, ni najc si'c xi'nä, ruxhalza
xtiixios lojtu. ¹⁴Colguiniä "xchan"
lo tejga sa'tu ro'c.

Rniabä lo Dios guscuecdxini
lastoo guiraatu ni rililajz xtidx
Crist.

Guijtz Ni Rojp Ni Bacuaa Pedr

**Pedr rucuaa te guijtz
loj reni ahuililajz**

1 Narä nacä Simón Pedr, ni rujn xtzun Jesucrist, te apost xtenni. Rucuaä guijtzre lojtu nani rililajz xtidx Dios sigajc ni rililajznu, sa'csi bahuü Dios loonu si'c bennaya xcuent Xtiosnu Jesucrist nani basläa nuurnu lo dojl. ²Rniabä lo Dios gacnäduxhruni la'tu, guscuecdxiruni lastootu, te gacbeerutu xtidx Dios näjza Dad Jesucrist.

Xho riäjł gac rexpejn Crist

³Sa'csi xcälrnibee Dios baniidx guira'ti ni rquiinnu te guibaṅsa'cnu, te gacnu bennaya nez lojni, xcuent rililajzpac xtiidxni ni nansa'cnu xcuent Jesucrist nani gurejdx nuure, nani gule nuure te xca'zanu xcälrdimbicha'ni, näjza guiraa xcälṅnansa'cni. ⁴Lagajc xcuent redee baniidxni rextidxliini, rextidxsacduxhni. Palga chalilajznu xtiidxni, sajcnu xpejnṅni, sajcnu beṅsa'c si'c najcni sa'csi abiriinu loj redzunguijdx ni chagłajz rujn rebejn ni ruxhiṅ guedxliujre. ⁵Ni'cni nanab gacbeenu xho nabaṅnu lo guedxliujre. Siroobru

xcälrililajztu sacnäjni la'tu te guibaṅsa'cnu lo Dios; luxh sa'csi nabaṅsa'ctu, siroobru xcälṅnajntu xcuent dzunsa'c näjza dzunguijdx. ⁶Luxh palga guroob xcälṅnajntu xcuent dzunsa'c näjza dzunguijdx sajc guinibeetu tiejxhtu te na'c guntu dzunguijdx. Che guinibeetu tiejxhtu, sibedxi lajztu. Che arajptu yälrbedxilajz, sajctu beṅsa'c, beṅdxan. ⁷Che anajctu beṅsa'c, beṅdxan, sinälajztu resa'tu; che asanälajztu sa'tu, arajptu yälṅsanälajz sa'tu xten Jesucrist.

⁸Palga la'tu rusoohtu guiraa rediidxre, luxh chanuutis caroobreni nen lastootu, ditu guibaṅxlia'; sujnpactu xtzun Dios, luxh rediidxre sacnäjrutu gumbeetu Dad Jesucrist. ⁹Sa'csi renani di ga'p rediidxre, najcni si'c te lotiä'p ni di fii, o te ni di gacdi fii zijt, ni'cni abiälłajzni xho basia Dios rextojłni nani bejnṅni galoo. ¹⁰Ni'cni rniä lojtu rebetzä, colsejs, colguisieed xtidx Dios te gacbeepactu, guluulojzatu lo bejn xho gurejdx, xho gule Dios la'tu, sa'csi lał ni chanuu gucudiajgtu rediidxga, dipactu gunijt lo Dios. ¹¹Palga guibajntu si'c lo guedxliujre, siu'pactu xhaguibaa cadre rnibee Dad Jesucrist par tejpas.

¹²Ni'cni anasuga'a te gusnaä lajztu xcuent rediidxre, mase anajntureni, mase risutzu'tztu yälirililajz xten didxlii ni yu' nen lastootu. ¹³Narä runä xhigab laaca runä che rusnaä lajztu, te gusnibä la'tu, te gusnaä lajztu. Si'cza gunä guideb ni nabaṅa lo guedxliujre. ¹⁴Ananä asiäddzungajxh dxej ni xca' Dios narä, sa'csi abaluii Dad Jesucrist ni'c loä. ¹⁵Ni'cni cayunduxhä dzuun naj, te che guiquiinni sinaj lajztu xtidxä che agu'tä.

Renani bahuii loj yälṅasa'c xten Crist

¹⁶Che basule'nu lojtu xcälṅnibee näj xcälṅrdimbicha' Dad Jesucrist, xcuent ni guibisacpacni, dinu niniitisi, dizanu nusguee la'tu, sa'csi abahuiloonu xcälṅrdimbicha'ni. ¹⁷Sa'csi che badeed Dios xtadnu yälṅnibee, yälṅrdimbicha' lojni, dxejc biejn diajgnu gunii Dios, birii xse'ni nen te za ni gurej xhaguibaa, räjpni: “Dee najc xi'nä ni sanälazä, rbanälazduxhäni.” ¹⁸Lagajc nuure biejn diajgnu xse' Dios che guniini xhaguibaali che guyunäjnu Jesucrist lo dajn ni najc dxan.

¹⁹Ni'cni naj guliiru rediidx ni gunii reprof'e't. Ni'cni sujntu laaca palga gusobdiajglu rediidxga, sa'csi najcreni si'c te bajl ni rusanij te lajt ni nacäy, susanijreni xcäriejntu dxejli ni jääd bajl xhaguibaa. Dxejc lagajc laani susanij lastoonu. ²⁰Niluxh ganiddoo nanab gacbeetu dee: nicla tej bejn sajc guinii laatisi sajc guinii xhi säloj xtidx Dios, ²¹sa'csi nicla tej diidx ni bacuaa reprof'e't dini gac diidx

ni biajbtis yejcreni. Guiraliireni bacuaareni ganaxtis diidx ni badeed Xpirt Dxan Dios lojreni gucuaareni.

Rebejn nani rusguee

(Judas 4-13)

2 Niluxh galoo biricajza te cuaa bejn ni basguee rexpejn Israel, sigajcni siääd stee cuaa bejn ni susguee la'tu. Laareni guluixhiga'tzreni didx-xhii nani rujn rusiejxh lajz bejn xcälṅirililajzreni, sibälazreni lagajc Dad Jesucrist nani gudijx xcuent xtojlreni. Niluxh renani rusguee, siojb nitlojreni par tejpas. ²Xhidajlza bejn sinajlreni lo xcälṅnabanguijdxreni, dxejcti ni'c gun siniyay xhidajl bejn xnezyuj xtidxlii Dios. ³Sa'csi ruguilajzreni xmeeltu, xhixtentu, ni'c siädgusgueerene la'tu te xca'reni xhixtentu. Niluxh xcälṅguxhtisreni nani gun Dios, näjza xcälṅnritlojreni cabäzgjajcreni agujc xchero.

⁴Najcni si'c sa'csi di Dios niällajz rextojl rexanglṅni nani bejn dojl, niluxh baxhaṅnireni gabijl, basäunireni nen reguednacäy cadro cabäjzreni dxej ni gun Dios xcälṅguxhtisni. ⁵Sigajcza rebejn ni guyu' galoo, banitloj Diosreni, basṅaa Dios xcälṅnabajṅ Noétis näjza sgajdzreni, sa'csi basule' Noé xtidx guluii Dios. Luxh baxhaṅni nisguiro te biädnitlojni guiraa rebejn nani di nucuadijg xtidx Dios. ⁶Bejn Dios yälṅuxhtis xten guedx Sodoma näjza guedx Gomorra, base'cni reguejdxga, gujcreni cobdäj. Si'c bejn Dios te gacbee bejn xho runnäj Dios rebejn ni di gusoob xtidx

Dios. ⁷Gulää Dios Lo't ni gujc te beṅsa'c lo reguejdxga, sa'csi guc-huin lajzni xcuent relatsiaj ni bejn rebendojḷga. ⁸Guideb ni guläjs Lo't, te beṅsa'c, lo guejdxga, dxej, yäl guc-huin lastooni xcuent nani bahuini, nani biejn diajgni, xcuenta latsiaj ni bejnreni, sa'csi beṅsa'cni. ⁹Anajn Dios xho racnäjni rebensa'c te rbäänireni lo retrabajw ni cadejdreni, anajnza Dios xho gusacsini rebendojḷ cheni guidzujḷni dxej ni gunni xcälguxhtisreni.

¹⁰Guliduxhni, sujnrü Dios yälguxhtis loj rebejn nani rlajz gun si'ctisni rlajz tiejxhreni, näjza renani rbälaz xcälrnibee Dios. Najczeni bejn ni di guidxejb, rujnreni ni riabtis yejcreni, direni guidxejb guiniyajreni rexangl Dios ni rdimbicha'. ¹¹Niluxh nicla tej rexangl Dios ni rajpru yälrnibee lo rebejnre, direni guiniyaj, cue'creni xquejreni lo Dios.

¹²Luxh, rebejnḡa najc si'c reguidxaa nani xheti xcäriejnreni, cabäjtisreni chu guiniaazreni te guetreni. Rniyajreni luxh direni gan xhini'c rniireni. Niluxh sigajc rnitloj reguidxaa, sigajcza sinitlojreni.

¹³Bejnreni dojl, ni'c sinitlojreni, sidejdreni yälrusacsiduxh xcuent rextojḷreni. Laareni rchaglajzreni guntisreni laniro rdxee. Laareni najczeni si'c te cosdxuudx o si'c te manch ni rcaj lo te ladnol, rbaali lajzreni rusgueereni la'tu laḷ ni cayajc lanij cayaunäjreni la'tu.

¹⁴Digacdi fiireni loj te gunaa, li rsia' lajzreni, direni guidxaj rujnreni dojl, rusgueereni rebejn te gunzarenı dojl, ruluiireni lastooreni te säblajzreni meel, najczeni bejn

nani batzubde Dios, ¹⁵agulälazreni nezyusa'c, abanijtreni, naj sanajlreni xnezyuj Balaam, xi'n Beor, nani huichaglajzru nani rquijx yällatsiaj. ¹⁶Niluxh gudilnäj Diosni xcuent xtojḷni, bejn Dios gunii te mandip si'c xse' bejn, te bascuääzni profet'ga, dini nusaan niujnni nani cayujnni, cayujnni si'c te bejn ni rajc yejcreni.

¹⁷Reben latsiajre najc si'c te bisie cadro xheti nis, najczareni si'c rexcäjy ni sanä bej nezree nezrec che cabi' te bero. Laareni su'reni lo xcäjy par tejpas che gun Dios yälguxhtis.

¹⁸Sa'csi rniduxhreni didxro, niluxh xhet sajcdi rediidxga luxh rniireni huenduxh najc gun bejn ni rlajztis tiejxhreni, con yällatsiaj rusgueereni rebejn nani entis birii loj reni rujn sa' dzunguijdxga. ¹⁹Rusgueereni, rniireni rut gudxojndini palga jädnajlnireni, niluxh lagajc laareni najczeni mos, sa'csi rnibee latsiajreni. Xhitis ni rnibee te bejn, ni'c rusäuni nen latzguiib. ²⁰Sa'csi palga agubicaj te bejn loj redzunguijdx xten guedxliuj sa'csi huililajzreni xtidx Dad Jesucrist nani rusläa rebejn lo guiraa dojl, dxejctiru gubisacni loj xtojḷni, abixhidsacreni lo xtojḷreni, nalajz najczeni si'c che gajdreni gumbee xtidx Dios. ²¹Huenru direni niembee xnezyuj Dios, quela che abiembeereni nezyujga, cuälazreni didx dxan, xtidx Dios ni basule'reni lojreni. ²²Dxejcsii rsiojḷb diidx ni najc scree: "Rbisac te bä'cw loj xcälrdzujbni. Cuch ni entis gojz richusacni lo xpajnni."

Xho gac che guibisac Jesucrist

3 Rebetzä, dee najc ni rojp guijsz ni caguxhalä lojtu; lo

guiro'p guijtze cagusnibä la'tu xcuent reyäl'rulijdx ni gusnaj lajztu. ²Colgusnaj lajztu rediidx ni gunii reprofet' agujc xchero, näjza rediidx ni gunii Dad Jesucrist nani basule' reapost.

³Ganiddoo, colgacbee dee: che asiäddzungajxh redxelult, siääd rebejn ni rgubee rextidx Dios, laareni sujnreni si'ctis ni rlanj tiejxhreni. ⁴Siniabdiidxreni: "¿Xhicuent gajd Jesucrist guibisac si'cni bia'n diidx? Cheni gujtlı rextadgoldoonu, guira'ti sanuutis najcni si'c gujcnı cheni guc-cheeli guedxliujre." ⁵Niluxh che rniireni si'c, rlanjpac jiällajzreni agujc xchero benchee Dios xhaguibaa xcuent xtiidxtisni, näjza guniitis Dios te si'c guc-chee guedxliuj, biriini nen nis, naj tre'ni loj nisga. ⁶Dxejcti gunitloj guira'ti ni yu' lo guedxliujga che biab te nisguiro, gunitlojni. ⁷Niluxh xhaguibaa näjza guedxliuj ni tre' naj, cayajp Diosreni xcuent xtiidxni te checreni che guidzujn dxej ni gunni yälguxhtis, che gunitlojni rebendojl.

⁸Rebetzä, na'c jiällajztu, Jesucrist ruhııı tebdxej si'c te tzugayuu ijz, rhuizani te tzugayuu ijz si'c tebdxej. ⁹Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabäjzni gusiejch lajztu, sa'csi di rlanjzni nitloj nicla tejtı.

¹⁰Niluxh sidzujn dxej che guibisac Jesucrist lo guedxliujre si'c rdzujn te gubaan, rut gacbeedi siäädni. Dxejcti sibicaj xhaguibaa,

gac te bieiduxh, guira'ti sialni lo te guiboduxh, guedxliujre näjza guira'ti ni tre' lojni, guiragajcni sejni.

¹¹Sa'csi sinitloj guiraa redee, ni'c nanab guibanayatu lo guedxliujre, na'c guntu dojl. ¹²Colcuäjz dxejtis ni jääd Dios lo guedxliuj. Dxej sejc xhaguibaa, sinitlojni, luxh guralii ni yu' sialni lo guiboro. ¹³Niluxh abasa'n Dios diidx loonu, ni'cni cayenloonu te guibacoob, te guedxliucoob, cadre gunreni ganaxtis dzunsa'c, xhetiru dojl.

¹⁴Ni'cni rebetzä ni sanälazä, sa'csi cabäaznu guiraa ni gac, colyejn huant te che guibisac Dios, sidxälni la'tu dxitis nabajntu, nabannayatu, xhetiru xtojltu.

¹⁵Colhuıı xhi dzuun bejn Dad Jesucrist ni'c rajpnu yälruslaa lo dojl. Sigajcza bacuaa bejtznu Pabl ni sanälajznu. Bacuaani sa'csi badeed Dios yälnajn lojni.

¹⁶Nen guiraa rexquijtzni bacuaani xcuent rediidxre. Yu' gaiı guijtze ni bacuaani ni najc naganduxh. Luxh bejn ni guxii racbee, ni runtio'p lajzreni, reni'c ruxhiid rextiidxni, sigajc runnäjreni guiraa xtidx Dios, ni'cni sinitlojreni.

¹⁷Ni'cni rebetzä ni sanälazä, sa'csi ananxgaatu rediidxre, colnatıru didi jıajbtu ladzınaa renani gusgueetu, te na'c gunijttı xcälrsıudzu'tztı lo xtidx Dios.

¹⁸Colgustioob xcäriejntı con yälracnäj näjza yälnajn xten Dad Jesucrist nani ruslaa nuure lo dojl. Sugııliä'pnu xpala'n Dad Jesucrist, naj näjza par tejpas. Sugacni si'c.

Guijtz Ganid Ni Bacuaa Juan

Xtidx Dios ni runiidx
yäl¹nabaj¹ par tejpas loonu

1 Galooli che gajd Dios gun guedxliuj, agac nabaj¹ Jesucrist. Niluxh narä bahuiä loj Jesucrist, biejn diagä rediidx ni guniini loä, gunazä naani. Laani najc Diidx ni runiidx yäl¹nabaj¹ par tejpas loonu. ²Baluilojni loonu; reapost bahuiinu lojni. Ni'cni rniä lojtu, nabaj¹ Jesucrist par tejpas. Rniliäpac nabannäj Jesucrist Dios. Baluii Dios Jesucrist loonu. ³Caniä stehuält lojtu, bahuiinu lojni. Biejn diajgnu rediidx ni guniini loonu. Xhigab xtenu najc tejtis con Dios, näjza Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennänu resa'nu. ⁴Cagucuaä rediidxre lojtu te guibalazduxhtu.

Dios najc Bajl

⁵Naj cagusule'ä rediidx nani baluii Jesucrist loonu. Dios najc bajl. Guiraa redzuun ni rujnni, ganax dzunsa'cni. Xhet yäl¹nacäydi yu' lo Dios. ⁶Palga chutis tejnu naa, tejtis najc xhigabnu con Dios, niluxh riennu redzunguixdx, rniinu didx-xhii, runijtnu dinu chasanäj xtidx

Dios. ⁷Palga nabaj¹nnu lo bianij si'cni nabaj¹ Dios lo bianij, tejtis xhigab riennu con resa'nu. Dxejc rusiaza xtiejn Jesucrist Xi'n Dios lastoonu che riennu dojl.

⁸Palga naanu xheti xtoj¹nu, rusgueenu lagajc nuunu, luxh dinu ga'p xtidx Dios nen lastoonu.

⁹Palga guicäjpnu lo Dios guiraa redojl ni cayennu, siällajzni xtoj¹nu, sudzucajni rextoj¹nu, sa'csi laaca rujnni luxh guli najc rextiidxni.

¹⁰Palga guinuunu dinu niujn dojl, rniinu najc Dios si'c te bejn ni rni didx-xhii sa'csi anaj Dios yu' xtoj¹nu, luxh dizanu ga'p xtidx Dios nen lastoonu.

Racnäj Jesucrist nuunu nez loj Dios

2 Guejbtu, resa'ä nani huililajz xtidx Dios, cagucuaä rediidxre lojtu lo guiitz te na'c guntu dojl. Niluxh palga jiennu dojl, racnäj Jesucrist nuunu, rniini xcuentnu lo Dios, sa'csi xheti xtoj¹ni.

²Gujt Jesucrist xcuentnu lo crujz. Gudijxni rextoj¹nu lo crujz. Luxh et rextoj¹tisnu gudijxni. Gudijxni rextoj¹ guiraa rebejn ni re' lo guideb guedxliuj.

³Palga rusoobnu rextidx Dios, huenliisi rluii riembeenu

Dios. ⁴Cheni rni te bejn, “narä rumbeäni”, niluxh dini gusoob rextiidxni, rusgueeni resabejn_{ni}. Di lajzni nilii xtidx Dios. ⁵Palga rusoobnu xtidx Dios, guliipac rinälaaznu Dios, ni'c najnnu nabannäjnnuni. ⁶Cheni rniinu nabannäjnu Jesucrist, nanabpac guibansa'cnu si'c gubaj_n Jesucrist lo guedxliuj.

Redidxcoob

⁷Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni najntu galooli che huililajzlitu rextidx Dios, nalajznu rediidx nani biejn diajgtu galooli. ⁸Niluxh najcza rediidxre didxcoob loonu, sa'csi che huililajznu rextiidxni gusloj dirunu guibaj_n lo yäl_nacäjy. Baluii Jesucrist redidxcoobga loonu. Guliipac najc Dios si'c bajl. Dini guibaj_n lo nacäjy. ⁹Palga chutis tejnu rni, “nabanä lo nianij xten Dios”, niluxh rdxe'chni lo resa'ni, lo yäl_nacäjy yu'ni. ¹⁰Chutis tejnu ni rinälajz sa'ni, nabaj_nni lo bianij xten Dios, ruj_nni dzunsa'c, dizani guichag_lajz gunni dojl. ¹¹Niluxh palga rdxe'chnu lo resa'nu, nabaj_nnu lo yäl_nacäjy sa'csi riennu dojl, sasaanu lo yäl_nacäjy. Nicla gacbeenu canejz chonnu, sa'csi ruscäjy bendxab balojnu.

¹²Cagucuaä rediidxre lo guejbtu, resa'ä ni rililajz, sa'csi abadzucaj Dios rextoj_lnu, sa'csi lo crujz gudijx Jesucrist rextoj_lnu. ¹³Cagucuaä rediidxre lo guejbtu, redad bengool, sa'csi huililajz_tu rextidx Jesucrist, najntu laani nabaj_nni galooli näjza par tejpas. Cagucuaä rediidxre

lojtu, rebi'n sa'csi dirutu jiu xtidx bendxab.

Cagucuaä rediidxre lojtu rexi'nä, sa'csi rumbeetu Dios. ¹⁴Abacuaä rediidxre lo guejbtu, redad bengool, sa'csi numbeetu Jesucrist nani nabaj_n galooli näjza par tejpas. Abacuaä rediidxre lojtu rebi'n, sa'csi sudzu'tztu, sa'csi yuchee xtidx Dios nen lastootu, dirutu jiu xtidx bendxab.

¹⁵Na'c guichag_lajz_tu guntu renani ruj_n rebejn nani di chalilajz xtidx Jesucrist; na'cza chanälaztejt_u xhixtentu ni rajptu lo guedxliuj. Palga rinälaztejt_u rexhixt_{en}ni ni ra'pnu lo guedxliuj, dxejc dinu chanälajz Dios. ¹⁶Reben guedxliuj ni di chalilajz xtidx Dios rchag_lajzreni ruj_nreni redzunguijdxre: ruj_nreni dzunguijdx nani rchag_lajz tiejxh_{ren}i; ruj_nreni dzunguijdx nani rchag_lajz balojreni, näjza lagajc laareni rliä'preni xpala'nreni. Niluxh guiraa reni'c najc dzun guedxliuj, xhet dzuundi ni gunibee Dios gac. ¹⁷Luxh rnitlojpac guedxliuj. Sinitlojza guiraa reni rchag_lajz ruj_n reben guedxliuj ni di chalilajz xtidx Dios. Niluxh palga gusoobtisnu xtidx Xtadnu Dios, sibannäjnnuni par tejpas.

Didx gului näjza didx-xhii

¹⁸Guejbtu resa'ä ni rililajz xtidx Dios, asiäddzungajxh dxej che guluiloj niguii nani rdxe'ch loj Jesucrist. Abiej_n diajgtu siääd niguiiga. Naj yu' xhidaj_l reniguii nani rdxechlajz lo Crist. Ni'c alaracbeenu asiäddzungajxh dxejga che guluiloj niguiiga. ¹⁹Yu' xhidaj_l

rebejn ni rdexchlajz lo Jesucrist. Biriireni lo resa'nu. Direni nililajz xtidx Jesucrist. Palga nililajzreni xtidx Jesucrist si'c huililaaznu nuure xtidx Jesucrist, direni nirii lo resa'nu. Biriireni lo resa'nu, ni'c racbeenu direni gac xpejn Jesucrist.

²⁰Gule Dios Jesucrist. Jesucristre baniidx Sprit Dxan xten Dios loonu te gacbeenu xhini'c najc redidxliipac. ²¹Et sa'csi ditu gan xhi diidx najc didx gullii bacuaä rediidxga lojtu. Sa'csi najntu xhi diidx najc didx guliipac, ni'c bacuaäni, te gutijp lajztu. Palga rucuaä rediidx ni najc gullii, anajntu dina gusgueä la'tu.

²²Chutis ni naa di Jesús gac Crist Xi'n Dios, xhet guliidi rextiidxni. Renani rnii di Jesucrist gac Xi'n Dios rdexchlajzni lo Jesucrist. Di reni'c nililajz xtidx Dios. ²³Chutis reni rnii di Jesucrist gac Xi'n Dios, di reni'c gumbee xtdadnu Dios. Niluxh renani rnii Jesucrist najc Xi'n Dios, huililajzreni xtidx Dios, numbeezareni Dios.

²⁴Colgusoob rediidx ni biejn diajgtu galooli che huililajztu rextidx Dios. Palga rusoobtu rediidxga, nabannäjtü Dios näj xi'nni Jesucrist. ²⁵Abia'n Jesucrist diidx guniidxni yäl_nabanc_oob loonu. Naj ara'pnu yäl_nabajnre, ra'pnuni par tejpas.

²⁶Abacuaä rediidxre lojtu xcent rebejn ni rlajz chalilajztu rediidx ni xhet guliidi. ²⁷Baxha_l Jesucrist Sprit Dxan xten Dios loonu. Rbäjzni ne_n lastoonu. Dinu guiquiin chu stee bejn guluii loonu xhi diidx najc gullii, sa'csi lagajc Sprit Dxan xten Dios ruluui xtiidxni loonu. Naj

ruluuii la'tu guiraa ni najc gullii, dini gusguee la'tu. Colguibannäj Jesucrist; colgusoob xtidx Jesucrist si'cni ruluui Sprit Dxan xten Dios lojtu.

²⁸Naj guejbtu resa'ä, colguibannäj Jesucrist, te che jädsacni lo guedxliuj sisiutzu'tznu nejz lojni, dinu guitujy nejz lojni. ²⁹Anajntu laaca najc Dios. Anajntu renani rusoob xtidx Dios sasanäjreni Dios, ni'c najcreni xi'n Dios.

Rexi'n Dios

3 Bahuii xho huinälazduxh Dios nuure, ni'c anaj Dios nuure najcnu rexi'nni. Luxh gullii najcnu rexi'n Dios. Reben_guedxliuj ni di chalilajz xtidx Dios, direni gumbee nuure, rexi'n Dios, sa'csi dizareni gumbee Dios ni najc xtdadnu. ²Resa'ä ni rinälazä, nuunu riolilaaznu rextidx Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuiinu lojni si'c ni najcni, sa'csi suchaani nuure te gacnu si'c ni najcni laani. ³Che rnaj laaznu sidzujn dxej gac tejganu si'c ni najc Jesucrist, dxejc rbansa'cnu si'c ni gubajn Jesucrist lo guedxliuj.

⁴Di rebejn ni rujn dojl_gusoob leii xten Dios. Che riennu dojl, runijntu lo leii xten Dios. ⁵Racbeenu Jesucrist biäd lo guedxliuj, gujcnii niguii te gujc badzucajni rextojlnu. Laani dini niujn dojl. ⁶Che sasanäjnu Jesucrist, dinu gac benguijdx. Di bejn nani rujn dojl chalilajz xtidx Jesucrist, dizani gumbeeni. ⁷Resa'ä, na'c chalilajztu didx-xhii ni rnii bejn lojtu, che rniireni cayujntu dojl. Rebejn ni

rujn laaca, najczareni si'c najc Jesucrist. ⁸Rebejn nani rujn dojl najc xi'n bendxab. Galodooli rujn bendxab dojl. Ni'cni biääd Jesucrist Xi'n Dios lo guedxliuj te gudzucajni redojl nani rujn bejn xcuent bendxab.

⁹Rebejn nani najc xi'n Dios direni guichagljaz gunreni dojl, sa'csi abachaa Dios xcäriejnreni, sa'csi rbäjz Dios nejn lastooreni. Direni gun dojl, sa'csi najcreni xi'n Dios.

¹⁰Si'c riembeenu rebejn ni najc xi'n Dios, näjza rebejn ni najc rexi'n bendxab. Chutis tejni di gun dzunsa'c, ni dini chanälajz resa'reni, dini gac xi'n Dios.

Nungäjł chanälajznu resa'nu

¹¹Lagajc rediidxre biejn diajgtu galooli che huililajztu rextidx Dios: colchanälajz resa'tu.

¹²Xhet si'cdi toCain nani gujc xi'n bendxab. Bejnni dojl, bagu'tni bejtzni. ¿Xhicuent bagu'tnini? Bagu'tnini sa'csi bejn bejtzni ganax dzunsa'c, luxh toCain bejn dzunguijdx. ¹³Na'c guidxelojtu che guidxechlajz rebejn lojtu.

¹⁴Racbeenu dirunu sa lo xnezyuj yälgujt, sa'csi dinu guidxechlajz loj resa'nu. Rajpnu yäl_nabajn par tejpas sa'csi rionälaaznu resa'nu. Chutis tej ni di chanälajz resa'reni canzaj lo xnezyuj yälgujt, sa'csi rdxechlajzreni lo sa'reni. ¹⁵Chutis ni rdxechlajz lo resa'ni, najcni nejz lo Dios si'c ni abagu'tni te bejn. Najnnu che rugu't te niguii te bejn dini ga'p yäl_nabajn par tejpas. ¹⁶Racbeenu rinälajz Jesucrist nuunu, sa'csi gujtni lacuaa nuunu lo crujz. Sigajcza nungäjł

gacnäjnu resa'nu, mase guetnu lacuaa guetreni. ¹⁷Chutis tejnu ni rajp xhidajł xhixtenni, luxh dini gacnäj nicla tejnu ni xhet rajpdı, di bejnğa chanälajz Dios. ¹⁸Guejbtu resa'ä, na'c chanälaaznu resa'nu con rextiidxtisnu, na'c guiniitistnu rionälaaznu resa'nu. Palga rionälaazpacnu resa'nu, sacnäjnu resa'nu.

Sisutzu'tznu nez loj Dios

^{19,20}Palga rionälaaznu resa'nu, nancheenu najcnu rexi'n Dios. Palga jiajbnu xhigab dinu gac bensa'c, dizanu gac xi'n Dios, nanab jiunu rextiidxtis Dios, na'c jiunu rexhigabnu. Dios najn rexhigabga. Niluxh Dios anaj: renani rinälaaz resa'reni, reni'c najc rexi'nni. ²¹Rniä lo guejbtu nani rinälazä, palga lagajc lastoonu rnii loonu, “cagusooblu xtidx Dios”, sisiutjį lastoonu che rbedx-rniabnu lo Dios. ²²Xhitis ni rniabnu lo Dios, runiidxni loonu sa'csi rusoobnu xtiidxni, riennu redzuun ni ruspaajz Dios. ²³Dee najc rediidx ni gunibee Dios gusoobnu: chalilaaaznu xtidx Dios, diidx ni rnii xho gujt Jesucrist lacuaa nuunu, chonälaazzanu resa'nu si'cni gunibee Dios. ²⁴Palga rusoobnu guiraa nani gunibeeni, nabannäjnni, si'cza nabannäjni nuunu. Nancheenu nabannäj Dios nuunu, sa'csi baniidxni Sprit Dvan xtenni te cuääz nejn lastoonu.

Scree gacbeenu xhi didx najc guliipac

4 Guejbtu renani rinälazä, na'c chalilajztu rextidx chutis bejn

nani naa, “rniä rextidx Dios lojtu”. Ganiddoo colgula'tz rextiidxni te gacbeetu don chu xtidx caniini, sa'csi xhidajl bejn sinii lojtu, “nuunu rniinu rextidx Dios”, niluxh caniisireni si'c. ²Scree gacbeenu xhi diidx najc guliipac. Guiraa rebejn nani guinii “Jesucrist, Xi'n Dios, ni biääd lo guedxliuj si'c niguii”, reni'c cayacnäj Sprit Dxaan xten Dios, reni'c canii xtidx Dios. ³Guiraa rebejn nani di guinii biääd Jesucrist Xi'n Dios si'c niguii, xhet xtidx Diosdi rniireni. Reni'c rdxe'chreni loj Jesucrist. Abiejn diajgtu siääd te niguii ni rdxe'chduh loj Jesucrist, luxh naj abidzujn rextzuun niguiiga lo guedxliuj.

⁴Guejbtu resa'ä, najcnu rexi'n Dios. Naj abiennu gaan lo rebejn ni rdxe'ch lo Jesucrist sa'csi Dios ni rbäjz nen lastoonu abejnni gaan lo bendxab ni nabajn lo guedxliuj. ⁵Rebejn ni rniü xhet guliidi xtidx Dios, rililajztisreni rediidx ni najc xten guedxliuj. Xhidalduxh rebejn ni re' lo guedxliuj riu rediidx ni xhet guliidi. ⁶Nuunu najcnu xi'n Dios. Rebejn nani riembee Dios riu xtiidxnu. Rebejn nani di gac xi'n Dios direni jiu xtiidxnu. Scree gacbeenu chu rebejn rniü didxliipac. Scree gacbeezanu chu rebejn rniü diidx ni xhet guliidi.

Rinäälajz Dios rebejn

⁷Rniä lo guejbtu nani rinälazä, nanab chanälaaznu resa'nu, renani huililajz xtidx Dios, sa'csi Dios racnäj nuunu te chanälaaznu resa'nu. Palga rinälaaznu resa'nu, dxejc najcnu rexi'n Dios, luxh guliü riembeenu Dios. ⁸Palga

chutis tejnu di chanälajz resa'ni, dizani gumbee Dios, sa'csi lagajc Dios racnäj chanälaaznu Dios, racnäjzani chanälaaznu resa'nu. ⁹Abasule' Dios loonu lacti rinälajzni nuunu. Yu' tejtis Xi'n Dios. Abaxha'ni Xi'nni lo guedxliuj te gudijxni rextojlnu lo cruzj te si'c guibannäjnni par tejpas. ¹⁰Si'c racbeenu rinälajzpac Dios nuunu. Galoo dinu ninälajz Dios. Niluxh Dios huinäälajz nuunu, ni'c baxha'ni Xi'nni lo guedxliuj te gudijxni xtojlnu lo cruzj.

¹¹Rniä lo guejbtu nani rinälazä, si'cni rinälajz Dios nuunu, sigajcza rläjzni chanälaaznu resa'nu. ¹²Nicla tej bejn gajd fii lo Dios. Niluxh palga chanälaaznu resa'nu, Dios nabajn nen lastoonu, dxejc guliü rinälaazpacnu Dios. ¹³Nancheenu nabannäjnu Dios, sigajcza nabannäjpac Dios nuunu, sa'csi abaxha'ni Sprit Dxaan xtenni cuääz nen lastoonu. ¹⁴Narä näjza reapost abahuiinu loj Jesucrist. Caniä lojtu abaxha' Xtaadnu Dios Xi'nni lo guedxliuj te guslaani rebejn lo xtojlni. ¹⁵Chutis tejnu ni rniü “Jesucrist najc Xi'n Dios”, nabannäjni Dios, nabannäjza Dios bejnga.

¹⁶Racbeenu, rililaazzanu rinälajz Dios nuure. Guliduxh rinälajz Dios nuunu. Palga rinälaaznu Dios, nabannäjnu Dios, nabannäjza Dios nuunu. ¹⁷Naj sanälaaznu Dios si'cni rläjzni luxh palga chanälaaznni guidebts ni guibajnnu, dinu guidxejb che guidzujn dxejc ni gun Jesucrist yälguxhtis lo guedxliuj. Dinu guidxejb sa'csi guideb nabajnnu lo guedxliuj, nabannäjnu

Dios si'c nabannäj Jesucrist Dios.

¹⁸Palga rinälazsa'cnu Dios, dinu guidxejb, palga rinälajzpacnu di gacdi guidxebnu. Palga guliipacnu rinälaaznu Dios, xhetliidi rdxejbdinu. Nani rdxejb, rdejndi trabajw, gajd bejnga chanälazsa'c Dios.

¹⁹Rinälaaznu Dios sa'csi ganiddoo Dios huinälajz nuunu. ²⁰Palga chutis tejnu naa “rinälazä Dios” niluxh rdxechlajzni lo resa'nu, xhet guliidi xtiidxni. Palga dinu chanälajz sa'nu nani cahuiinu, xhixh sajc chanälaazzanu Dios nani gajdnu fii. ²¹Agunibee Dios, nani rinälajz Dios chanälajzni resa'ni sigajc rinälajzni Dios.

**Riennu gaan lo guiraa
redolguijdx lo guedxliuj**

5 Chutis ni rililajz Jesús najc Crist nani baxhal Dios, ni'c najc Xi'n Dios. Palga rinälaaznu Xtradnu Dios, sigajcza sinälaaznu renani najc Xi'n Dios. ²Palga rinälaaznu Dios, palga rusoobzanu xtiidxni, dxejc najnnu rinälaaznu resa'nu nani najc Xi'n Dios. ³Ni'cni, palga rinälaaznu Dios, susoobnu xtiidxni. Luxh dinu guichalo nagajngusoobnu xtiidxni. ⁴Chutis tejnu ni najc xi'n Dios, riennu gaan lo redojl ni re' lo guedxliuj. Riennu gaan lo redojl lo guedxliujre sa'csi huililaaznu xtidx Jesucrist. ⁵¿Chuni'c cayujngaan lo redojl lo guedxliuj, ä? Renani rililajz najc Jesucrist, Xi'n Dios, reni'c rujngaan lo redojl lo guedxliujre.

**Rediidx ni baluii Dios
loonu xcuent Jesucrist**

⁶Biäd Jesucrist lo guedxliujre. Birobnis Jesucrist, baxhe'zani

xtiejnni lo crujuj. Xhet ganaxdi te guirobnisni biädni, näjza te guxhe'ni xtiejnni lo crujuj che biädni. Sprit Dxi'x xten Dios canii rediidxre. Guliipac rextiidxni. ⁷Yu' choñ ni baluiloj xhaguibaa. Rniireni xcuent Jesucrist tejsi diidx. Tejni najc Dios, steeni najc nani laa Diidx, steeni najc Sprit Dxi'x xten Dios. ⁸Sigajcza yu' choñ ni baluiloj lo guedxliuj. Rniireni xcuent Jesucrist tejsi diidx. Tejni najc Sprit Dxi'x xten Dios. Steeni najc che birobnis Jesucrist, steeni najc che baxhe' Jesucrist xtiejnni lo crujuj che gujtni. ⁹Palga rililaaznu xtidx rebejn ni rbäjz lo guedxliuj, nungäj chalilaazrunu xtidx Dios. Rediidx nani rnii jion reni baluiloj tejsi diidx najcreni con nani rnii Dios xcuent Jesucrist Xi'n Dios. ¹⁰Palga rililaaznu xtidx Jesucrist Xi'n Dios, rnii Dios xcuent Jesucrist neñ lastoonu. Chutis tejnu ni di chalilajz xtidx Dios, rujnni najc Dios si'c tej ni rusguee sa'csi dini chalilajz xtidx Dios ni rniini xcuent Jesucrist. ¹¹Sree najc rediidx ni rnii Dios. Abaniidx Dios loonu yälñabajn par tejpas. Yälñabajnga biädnä Xi'nni, Jesucrist. ¹²Palga nabannäjnu Xi'nni, rajpnu yälñabajn par tejpas. Palga dinu guibannäj Xi'nni, dinu ga'p yälñabajn par tejpas.

Xtixtios con diidx ni rulijdx

¹³Abacuaä rediidxre lojtu ni rililajz rextidx Jesucrist te gacbeepactu rajptu yälñabajn par tejpas.

¹⁴Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu

con Dios che rniabnu lojni. ¹⁵Luxh palga najnnu riu Dios nuunu che rniinu lojni, sigajcza najnnu suniidxni nani rniabnu lojni.

¹⁶Palga tejnu fii tej resa'nu cayujn dojl, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yäl_nabaj_n lojni. Niluxh yu' te do_lroduxh. Chutis te bej_n ni gun dojlga, di Dios gudeed lo bej_nga yäl_nabaj_n par tejpas. Dizana guiniä guiniabtu lo Dios xcuent bej_n ni rujn do_lroga.

¹⁷Guiraa redzunguijdx nani rujn rebej_n najc dojl. Niluxh yu' redojl nani di gun gunijt bej_n lo Dios par tejpas palga jiu bej_n xtidx Dios.

¹⁸Racbeenu guiraanu nani najc xi'n Dios di rlaaznu jiennu dojl. Racnäj Jesucrist nuunu te di be_ndxab gun gaan nuunu, te dizanu gusoob xtidx be_ndxab.

¹⁹Nancheenu nuure najcnu xi'n Dios, niluxh guiraa rebej_n nani riutis rextzun guedxliuj cagusoobreni xtidx be_ndxab.

²⁰Najnnu biääd Jesucrist Xi'n Dios lo guedxliuj. Baluiini nuunu rextidx Dios te jiembeenu Dios, nani najcpac Dios gului. Nabannäjnu Dios ni najc gului, sa'csi nabannäjnu Jesucrist. Laani najc Dios ni najc gului. Caguniidxni loonu yäl_nabaj_n par tejpas. ²¹Resal'ä, na'c guzuxhijbtu lo rebanäjb ni xhet guliidi. Sugacni si'c.

Guijtz Ni Rojp Ni Bacuaa Juan

Diidx gulii näjza yälrinälaaznu resa'nu

¹Narä nacä beṅgool. Cagucuaä guijtzre lojlu nane' nani agule Dios, näjza loj rexi'nlu. Rinälazäpac la'tu luxh xhet xtebädi; näjza guiraa reni rililajz xtidx Dios sanälajztu. ²Nuure rinälaaznu la'tu sa'csi yuchee neṅ lastoonu rediidx nani najc gulii, luxh dilajznu jiaḷ rediidxre. ³Xtadnu Dios, näjza Jesucrist Xi'nni, gacnäḷ nuunu, jiareni nuunu, guscuecdxi lajznu con xcälṅajn didxlii näjza yälrinälaajz.

⁴Bibalazduxhä che gucebeä yu' rexi'nlu ni rusooḷ xtidx Dios si'c gunibee Dios loonu gusoobnuni. ⁵Nane' ni gule Dios, diidx nani rniabä gusoob guejblu ṅaj dini gac didxcoob, niluxh lagajc diidx ni bieḷn diaagṅu galooli, che huililaazlinu xtidx Jesucrist. Lagajc dee najc nani gunibee Dios loonu: nungäḷḷpac chanälaaznu resa'nu. ⁶Sinälaaznu resa'nu palga cagusoobnu xtidx Dios. Dee najc xtidx Dios ni bieḷn diaagṅu galooli, che huililaazlinu xtidx Jesucrist: chanälaaznu resa'nu.

**Rebeḷn ni rniḷ garenca
diidx ni xhet guliidi**

⁷Balti beḷn birii loonu, ṅaj cagusgueereni xhidajḷ beḷn ni re' lo

guedxliuj. Caniireni di Jesucrist najc niguii che biäädni lo guedxliuj. Sa' beḷnre najc beṅrusguee. Sa' beḷnre rdxe'chreni loj Jesucrist. ⁸Coḷga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

⁹Chutis beḷn ni rlaḷz gugu'ch xtiidxpacni lo xtidx Jesucrist, di beḷnga gumbee Dios. Niluxh chutis beḷn ni riu xtidx Jesucrist, rumbeeni Dios, rumbeezani Jesucrist Xi'n Dios. ¹⁰Palga jiaäd te beḷn rolizjtu ni di chasanäḷ xtidx Jesucrist, na'c xcäḷjbtu jiu'ni rolizjtu, na'cza guiniitu lojṅi, “Xchan. Biu'.” ¹¹Sa'csi chutis beḷn ni guiniḷ “xchan” loj te beḷn ni di chasanäḷ xtidx Jesucrist, cayacnäḷzani redzunguijdx ni ruḷn beḷnga.

Rudeedni xtixtios

¹²Xhidalduxhru diidx rlaḷzä guiniä lojtu, niluxh di rlaḷzä gucuaäreni lo guijtz. Cabäzä jiaḷdhuiä lojtu ro'c te guiniä rediidxre lojpactu, te guibaalajztu. ¹³Rexi'n bājḷḷu, nani aguleza Dios, ruxhaḷ xtixtios lojlu. Ni'ctis najc ni rucuaä lojtu. Sugacni si'c.

Guijtz Ni Riojn Ni Bacuaa Juan

Cagucuaani didxsa'c lo Gayo

¹Narä nacä te bengool.

Caguxhalä guijtzre lojlu, dad Gayo. Rinälazduxhälu sa'csi huililajzlu rextidx Dios.

²Sanälazälu, nanä laaca yu' lastoolu loj Dios. Naj rniabä lo Dios gacnäjni luj, guniidxzani yäl'nadaanlu. ³Bibalazduxhä che gubi' gaii resa'nu, guniliireni loä xho huililajzlu xtidx Jesucrist, xho basoobzalu xtidx Jesucrist. ⁴Xheti stee diidx ni ruspaazä läzä si'c rbaa läzä che racbeä rusooob resa'nu redidxlii xten Jesucrist.

⁵Dad Gayo, laaca cayujnlu che racnäjlü renani rililajz xtidx Jesucrist, mase dilu gumbeereni che riäädreni lojlu. ⁶Aräjpreni lo resa'nu ni rdxagsa' ree xho huinäälajzlureni näjza xho gucnäjlureni. Laaca bejnlu gucnäjlü resa'nu, badeedlu xhi biquinreni lo nejz che biriireni rolizjlu. Si'cza nanab jiennu lo guiraa resa'nu, nalajznu rebejn ni rulüi xtidx Dios. ⁷Rulüiireni xtidx Jesucrist sa'csi sanälajzreni Jesucrist. Xhet rca'direni lo rebejn ni di chälilajz xtidx Jesucrist. ⁸Si'cza nanab gacnäjnu rebejn ni rilüi xtidx

Jesucrist nejn garen-garen guejdx, te si'c jiennänu xtzüun Dios guiraa renani rulüi xtidx Dios.

Di Diótrefes niujn redzunsac

⁹Abaxhalä te guijtz lo rexpejn Jesucrist ro'c. Niluxh Diótrefes rläjz guinibeeni lo resa'nu ro'c. Dini jiu xtidxä. ¹⁰Ni'cni che guidzünä ro'c, narä siniä rediidxre lo resa'nu ro'c, che guidxaag sa'nu ro'c. Diótrefes rniyaj narä lo resa'nu ro'c. Dizani jiu resa'nu che rdzujjreni ro'c. Dizani gusaan fiitu resa'nu ni riääd ro'c, mase rläjz chu tejtü fiireni. Luxh rläjzni gudxojnüni guidxagnäjtü rebejn nani ruhüi resa'nu ni rulüi xtidx Jesucrist.

¹¹Sa'ä ni rinälazä, na'c gunlu redzunguijdx, bejn redzunsac. Nani rujn dzunsac ni'c najc Xi'n Dios. Chutis tej ni rujn redzunsac najc xpejn Dios. Chutis tej ni rujn redzunguijdx, di ni'c gumbee Dios.

Rniireni didxsa'c xcuent Demetrio

¹²Guiraa rebejn ganax didxsa'c rniireni xcuent Demetrio, luxh huenliisi rusooobni xtidx Jesucrist. Sigajcza narä rniä didxsa'c xcuentni. Najnlu guliipac rediidx ni rniä.

Rudeedni xtixtios

¹³Rlazä guiniä xhidalduxhru diidx lojlu, niluxh di rlazä gucuää rediidxga lo guijtzre. ¹⁴Runä xhigab

di gaclaa jädhuiä lojlu, dxejcti jjeinu diidx.

¹⁵Gulecdxi lajzlu. Rexamigwlu ruxhalreni xtixtios lojlu. Badeed xtixtios lo tejga rexamigwä ro'c.

Guijtz Ni Bacuaa Judas

Judas cagucuaa loj renani agule Dios

¹Narä nacä Judas, ni rujn xtzuun Jesucrist. Narä nacäza betz Jacob. Cagucuaä guijtzre loj renani agule xtadnu Dios, renani sanälazduxhni, nani cayapcheeni par Jesucrist. ²Rniabä lo Dios, gulaslazduxhruni la'tu, guscuedxiduxhruni lastootu, gacnäjni la'tu, guniidxruni yälsanälajz.

Renani rului yälrusguee

(2 Pedro 2:1-17)

³Rebetzä nani sanälazä, che cayunduxhä xhigab gucuaä lojtu xcuent yälrusläa lo rextojlnu ni rajpnu, benä xhigab riojbru gucuaä te guijtz lojtu te gulidxätu sudzu'tznu, gapdzu'tztu yälirililajz ni basule'reni par tejpas loj rexpejn Dios. ⁴Sa'csi abiuxhiga'tz gaii bejn, renani galooli gunii Dios siädreni, niluxh sinitlojreni. Najczeni bejn ni di chälilajz xtidx Dios, najczeni benguidxduxh, rutzuréreni xcälracnäj Dios, rujnreni xtujy, sanäreni te yäl nabandxuudx. Rbälazzareni xpaxhuaannu nani rnibee loonu, Dad Jesucrist.

⁵Mase anajntu guira'ti rediidxga tejpas, rlazä gusnä läjztu che

gudejd gulää Dad Jesucrist rexpejn Israel lo guedx Egipto, dxejcti bagu'tni renani di nililajz xtiidxni. ⁶Rexangl Dios nani di nucuadijg diidx, ni birii cadro rlazj Dios chureni, reni'c basäu Diosreni cadro nacäiboo te cabäjzreni gun Dios xcälguhtisni lojreni. ⁷Si'c bejnni guedx Sodoma näjza Gomorra näjza reguedxbäz ni tre' gajx ro'c, sa'csi bejnreni dojl, reniguii guyunäjreni niguii birääx, regunaa guyunäjzareni regunabirääx. Dxejg gudejdreni trabawduxh huejcreni nen guiboo par tejpas xcuent xtojlni, ni'c najc te yälrulijdx loonu.

⁸Rebejn ni riu' lojtu naj najc si'c reben galoo ni bejn dojl. Nabajjnreni si'c ni bisieedreni lo guiraa nani rului yälrnixcal, ruxhinreni tiejxhrene, rbälazreni xcälrnibee Dios, rniyajzareni rexangl Dios. ⁹Miguejl ni rnibeeru loj rexangl Dios, che gudididixni bendxab yejc tiejxh toMoisés, dini niniyaj bendxab, alga räjpni: “Sugun Dad Jesucrist yälguhtisni lojlu.” ¹⁰Niluxh rebejnğa rniyajreni nicla ganreni xhini'c rniireni. Niluxh nani racbeepac rebejnğa najc yäl najn nani nicla niqiuin nisieedreni, lala

sa' nani rujnza reguidxaa, ni xheti xcäriejn̄ni, reni'c sujn nitlojn̄reni.

¹¹ ¡Aii! iRiazanureni! Sanajlreni xnezyuj Caín, luxh te gunreni gaan meel ruxhunl̄ireni rujnreni sa' dojl̄ ni bejn Balaam agujc xchero, näjza sa' dojl̄ ni bejn Coré, ni gudiññäj Dios, luxh gunitlojni.

¹² Laareni najcreni te xtuiduxh lo rexchej ni rajc guidoo, direni guidx̄ejb gauxchenäjreni la'tu, sa'csi xque'tisreni riureni. Najcreni si'c te xcäjy ni xhet nisguij siädñäni, nani sanä bej nezree nezrec; najczareni si'c te yagbigool nani di ninejxh xcaj lojni, tio'p huält agujtreni, najcreni si'c te yajg ni abiliäädx.

¹³ Laareni najc si'c nis ni räjs lo nisdoo, che cayajc te bidonduxh, sää, siäädni, carii xtujyreni si'c räjs nis lo nisdoo. Najcreni si'c bale' ni rtejb xhaguibaa, rijreni lo te yälñacäiduxh ni benchee Dios par tejpas.

¹⁴ Xcuentza redee agunixgaaza Enoc ni najc xagdodoo Adán, räjpni: “Bahuii, siädñä Dios xhidalduxh xanglni ¹⁵te gunni yäl̄guxhtis loj guiraa bejn̄ te gusacsíduxhni guiraa rebejn̄ ni di gumbée Dios xcuent redol̄duxh ni bejnreni, xcuentza redidxnaj ni guniyaj rebendōluxhre Dios.” ¹⁶ Rebejn̄re laa reni rmojm̄, runduxhrene quej, rujnreni si'ctis ni rlajz tiejxhrene, rniireni guiraloj didxnaj, rniisireni didxsa'c loj rebejn̄ te gun rebejn̄ga si'c ni rlajzreni gunreni.

**Rulijdxni rebejn̄ nani
ahuililajz xtidx Dios**

¹⁷ La'tu, betzä ni sanälazä, riäj̄l̄ guinaj lajztu rediidx nani

gunii reapost xten Dad Jesucrist, ¹⁸sa'csi guniireni lojtu: “Nen̄ redxelult che guibisac Jesucrist, su' bejn̄ ni suxhizñäjreni rextidx Dios, sujnreni si'ctis guisia' lajzreni.” ¹⁹ Redee najc renani run rlia' rexpejn̄ Dios lo sa'reni; rinuuzareni ni yu' lo guedxliuj, diza Xp̄rit Dxan xten Dios cuääz nen̄ lastooreni.

²⁰ Niluxh la'tu rebetzä nani sanälazä, col̄tioob loj xcäl̄rililajztu ni siääd lo Diostis, col̄nab lo Dios xcuent yäl̄rnibee xten Xp̄rit Dxan xtenni. ²¹ Col̄guibajntis lo yäl̄sanälajz xten Dios, col̄susintis laj̄l̄ ni cayunlojtu yäl̄rulaslajz xten Dad Jesucrist ni guniidx yäl̄ñabajn̄ par tejpas.

²² Col̄gacñäj renani di chalilazsa'c te chalilajzpacreni xtidx Dios. ²³ Col̄yacñäj sgaii te guibicajreni lo dojl̄, gudobxhaxreni, col̄yeyn̄ xhigab lo guiboo cayejcreni. Col̄yacñäj sgaii bejn̄, col̄gulaslajzreni con yäl̄rdx̄ejb, niluxh col̄natiru te di guntu lagajc dojl̄ ni rujnreni. Gulälaz nani rujnreni, nani ruxhin̄reni.

Redidx lult

²⁴ Col̄guiliä'p xpala'n Dios nani racñäj la'tu didi jiajbtu lo dojl̄, nani rujn sajc suutu lo xcäl̄rdimbicha' Dios, nayadujtu, rbaduxh lajztu. ²⁵ Yu' tejtis Dios. Laatiski rajpni yäl̄ñajn̄ te guslaani nuurnu lo dojl̄ xcuent ni bejn̄ xtadnu Jesucrist. Col̄guiliä'p xpala'nni, rajpni guiralii yäl̄rnibee, yäl̄rdimbicha', galooli, näj̄ naj, näjza par tejpas. Sugacni si'c.

Rediidx Nani Bacuaa Juan Xcuent Recos Ni Churu Gac

Baluiloj Jesucrist lo Juan

1 Dee najc rediidx ni badeed Dios loj Jesucrist te guluilojnini loj rexmosni, xcuent recos nani di gaclaa gac. Jesucrist baxhaĵ xangĵni lo Juan, te baluiini guiraa recosga lojni. ²Ni'cni bacuaa Juan lo guijtze guiraa xtidx Dios nani baluii Jesucrist lojni, xcuent guiraa recos nani bahuilojpacni.

³Chicbaa renani roĵ guijtze xcuent recos ni churu gac, renani riuza rediidxga, renani rguchee rediidxga nenĵ lastooni sa'csi siäddzungajxh redxey che soob rediidxga.

Juan cagucuaa guijtza lo gajdz guidoo

⁴Narä nacä Juan. Cagucuaä guijtze loj guigajdz reguidoo ni tre' lo región Asia. Dios guspalaĵ la'tu, guscuedxini lajtzu, lagajc Dios ni sigajc najc nadxey, sigajcza gujcnĵ naiĵ, sigajcza sajcnĵ par teĵpas. Xca'zatu xcälruspalajz näĵ xcälrbedxilajz guigajdz respit ni suga' guideb gabi cadro rnibeeni, ⁵näĵ xcälruspalajz, xcälrbedxilajz Jesucrist nani gunilii diidx ni

badeed Dios lojni, nani ganiddoo gubansac lo rebengut, nani rnibeeza lo guiraa rereii loj guedxliujre. Laani sanälazduxhni nuure, laani rudzucajni xtoĵnu con xtiejnĵni. ⁶Laani bejnĵni gacnu te benro, te guedxro, gaczanu bixhoĵz lo Dios Xtadni. Suchä'p xpala'nni, suga'pni yälrnibee par teĵpas. Sugacni si'c.

⁷iCoĵgacbee! Laani sibisacni lo rexcäĵy, luxh guiragajc rebejnĵ suhüii lojni, nägajc renani gudzujd cuä' xcustiini. Guiraa rebejnĵ guedxliujre soon xcuentni. Si'cti, sugacni si'c.

⁸—Narä nacä ganid, nacäza lult, si'c najc reletr A con Z —rnii Dad Dios—. Nabanä nadxey, sigajcza gubanä naiĵ, sigajcza sibanä par teĵpas, dipacna gacä ste'ca. Rapä yälrnibeduxhru lo chutis.

Bahuiä loj Jesucrist lo xcälrdimbicha'ni

⁹Narä, Juan, bejtztu, näĵza ni cadednäĵtu trabajw xcuent Jesucrist, ni riunäĵzatu cadro rnibee Dios, ni rsiudzutznäĵzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhaĵreni narä

pres sa'csi basule'a xtidx Dios näjza diidx xcuent ni bejn Jesucrist lo guedxliujre. ¹⁰Te dumingw, laḷ ni cayunää Dios, guzacä astoo canixcalä, dina niacbeä caro yu'a, dxejcti nez detzä biejn diagä xse' te ni gunii dipduxh, astoo te trompet, ¹¹najni loä:

—Narä nacä ganiddoo, nacäza lult. Lo te guitzro bacuaa nani fiilu, dxejcti baxhaḷ guijtzga loj guigajdz guidoo ni yu' nez Asia, nen reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

¹²Dxejc gubireä te bahuiä chuni'c canii loä. Che gubireä bahuiä lo gajdz gandilier oor. ¹³Galäii guigajdz recandilieerga, suga' te ni najc Xi'n Dios nani gujc Xi'n Niguii, najcwni te lajd ni rdzujḅ lo ni'lini, lastoozani naliib te cinturon gulajg ni najc ganaxduj oor. ¹⁴Yejcni näjza xquidxejcni najczareni nolbäj si'c xquichlajd xiil, nolbäj si'c yejg. Dxejcru rbebajl lojni. ¹⁵Ni'ni rdimbicha' si'c guiib ni laa bronz che cayejcni lo guiboo. Xse'ni riejn nadipduxh astoo che riäjt nisro nen regueuu. ¹⁶Ladbee ca' naani gajdz balxhaguibaa; ro'ni rii te espaad ni guiro'p laad caj ro'ni; dxejctiru lojni rujn si'c rujn loj gubijdx che cagusanijni guideb lagaa.

¹⁷Che bahuiä lojni, biabrloä nez lojni si'c te bengut. Dxejcti batzuubni naani xladbeeni yecä, dxejc guniini loä, najni:

—Na'c guidxejblu, narä nacä ni gubajḅ galooli, narä nacäza ni guibajḅ lult. ¹⁸Narä nacä ni nabajḅpac; gutä, niluxh naj nabanä par tejpas. Rapä yälrnibee lo

yälgujt näjza lo gabijl. ¹⁹Ni'cni bacuaa recos ni abahuiilu, nani cayajc naj, näjza nani churu gac. ²⁰Dee najc laa yälxhiga'tz xten regajdz balxhaguibaa ni bahuiilu lo naä ladbee näjza regajdz gandilier oor: guigajdz balguibaa sälojni xangl Dios xten reguidoo. Dxejc gajdz gandilieerga sälojni guigajdz reguidooga.

Rediidx nani chää loj rexpejḅ guidoo Éfeso

2 Dxejcti najni loä:
—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa naani ladbee, näjza nani rsiaj galäii guigajdz gandilier oor, rnii rediidxre lojtu: ²Narä numbeä xhi redzuun rujntu, xhi trabajw rdejdtu rujntu dzuunga, näjza xho rsiudzu'tztu. Dizatu guchagsa'tu benlatsiaj; näjza bala'tztu xho rujn rebejḅ nani rniireni najcreni apost ni rnii xtidx Dios, luxh direni gac, luxh la'tu gucbegajctu cagusgueerene bejn. ³Rsiudzu'tztu, rujntu huant xcuent xtidxä, gajdtu guidxajg. ⁴Empac yu' te quej ni rbe'cä xcuenttu: dirutu chanälajz narä si'cni huinälajztu narä ganiddoo. ⁵Ni'cni colguzaa lajztu caro banijttu, colgusiejch lajztu, colyejḅ lagajc redzuun ni bejntu galoo che guslojtu huililajztu xtidxä. Palga ditu gusiechlajztu, sudzucaä xcandilieertu cadre suga'ni. ⁶Laaca rujntu rbälaztu xtzuum rebejḅ ni laa nicolaítas, sa'csi näjza narä rbixlazä xtzuumreni. ⁷Nani yu' diajgni te cuadiajgni diidx, sucuadiajgni diidx ni rnii Sprit Dxan xten Dios loj

reguidoo: loj renani gun gaan lo dojl, gudedä gauni ninejxh ni rcaj lo yajg yäl**na**baj**n**, ni yu' xhaguibaa cadro yu' Dios.”

**Rediidx ni rniini loj rexpejn
guidoo ni yu' Esmirna**

⁸Dxejcti najni loä:

—Bacuaa rediidxre lo xangl Dios xten guidoo ni yu' Esmirna: “Nani najc ganiddoo, nani najcza lult, nani agujt, dxejctiru gubansacni par tejpas, rnii diidxre lojtu: ⁹Narä nanä xho cadejdlu trabajw, nanäza guxilii rajplu, niluxh nez loj Dios yu' xhidajl xhixtenlu. Nanäza yu'reni rniyajlu. Reni rniyajlu rniireni najcreni rexpejn Israel, luxh direni gac. Najcreni xpejn xquidobäz bendxab. ¹⁰Na'c guidxajblu trabajw nani agojl tedlu. Aree bendxab gusäl gaii sa'tu nen latzguiib, te gacbeeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti narä gunidxä te coron xten yäl**na**baj**n**. ¹¹Nani rlanj cuadiajg diidx sucuadiajgni diidx ni rnii Sprit Dxaan xten Dios loj reguidoo: nani gun gaan lo dojl, xhet gundi yäl**guj**t ni rojppa lojni.”

**Rediidx ni rniini lo rexpejn
guidoo ni yu' Pérgamo**

¹²Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: “Nani ca' spaad ni caduxh ro'ni guiro'p laad rnii rediidxre lojtu: ¹³Narä nanä caro rbäjztu, rbäjztu lo guejdx cadro rnibee Bendxab. Rsiudzu'tztu xcuent xtidxä. Laltis rsiudzu'tztu rililajztu xtidxä, mase nen redxej

cheni bagu'treni Antipas, ni gunii diidx xcuenta, nani gusudzutpac nez loä, nani bagu'treni nen guejdx cadro rnibee Bendxab. ¹⁴Niluxh yu' tiop-cho**n** xtojl**tu**. Lojtu nadxaag gaii bejn ni rujn si'c bejn toBalaam agujc xchero. Laani baseedni Balac xho gunni te jiajb rexpejn Israel nen dojl, baseednireni gaureni recos ni gurej lo dxan nez loj rebanäjb, baseedzani rexpejn Israel guesnäjreni chutis gunaa. ¹⁵Sigajcza nadxaag lojtu gaii bejn ni riu rediidx ni rusule' reni laa nicolaifas. ¹⁶Colgusiechxgaa lajztu, te di jialgacä lojtu te gucuanääreni spaad ni yu' ro'ä. ¹⁷Nani rlanj cuadiajg diidx, sucuadiajgni diidx ni rnii Sprit Dxaan xten Dios loj reguidoo: renani gun gaan lo dojl, lojni gudedä yätxtiil ni laa mana ni yuchee-xhiga'tz. Sudedäza lojni te guibäz ni najc nol, lojni caj te lajni ni nacoob, nani rutru racbeedi, xtebtis nani xca'ni.”

**Rediidx nani rniini lo rexpejn
guidoo ni yu' Tiatira**

¹⁸Dxejcti najni loä:

—Bacuaa rediidxre lo xangl Dios xten guidoo ni yu' Tiatira: “Xi'n Dios nani rbebajl balojni, ni rdimbicha' ni'ni si'c bronz, ni'c rnii rediidxre lojtu: ¹⁹Ananä xtuuntu, sanälajztu sa'tu, nanä xho rililajztu xtidxä, xho racnäjtu resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu. ²⁰Niluxh yu' xhicuent rdx'chä lojtu. Rcäjbtu riu'tu loj te gunaa ni laa Jezabel. Laani rniisini najcni te profet, gunaa ni

rni xtidx Dios, rusgueetisni bejn. Luxh xcäl̄ruseedni cagusgueeni rexpənä nani ahuililajz xtidxä, te naj rujnreni cosguijdx, si'c yälresnäj ni di gac chääl̄ni, rajwzareni nani gurej lo dxan xten rebanäj̄b.

²¹Aguläzä xchej te gusiechlajzni, gusaanni gunni dojl̄, luxh naaddini gusiechlajzni xcuent redzunguujdx ni rujnni. ²²Luxh palga laani dini gusaan gunni redzuun nani rujnni, narä siguixäni, gudedä te yälracxhuro. Luxh sutedä trabajwduxh guiraa renani bennäj̄ni dzunguujdx palga direni gusiejch lajzreni, palga direni guchaa xmoodreni. ²³Sugutxhiä, sunitloä rexi'n gunaaga, te si'c gacbee guiraa rebejn̄ ni yu' nen̄ reguidoo narä nacä ni rula'tz rexhigab ni yu' xcäriejnreni, näjza yäl̄rililajz ni yu' nen̄ lastooreni. Te gacbeezareni narä sunidxä lo tejgatu ni riäj̄l̄ xca'tu xcuent redzuun ni rujntu.

²⁴Dxejc loj guiraa reni yu' lo guedx Tiatura, la'tu ni di guirinajl̄ xnezyuj Jezabel, la'tu ni di gumbee nani rniireni najc recosduxh xten bendxab, xhetru rniädi lojtu, dirunä gutalä xtzuuuntu. ²⁵Col̄yapdzu'tz rextidxä nani arajptu dxejli ni guibisacä lojtu. ²⁶Nani gun gaan lo dojl̄, näjza nani cagusoob xtidxä dxe lultli, lojni sudedä yäl̄rnibee te guinibeeni renacion. ²⁷Si'cni baniidx Xtaä yäl̄rnibee loä, sudedä yäl̄rnibee lojni, te guinibeeni guiraa reben̄ guedxliuj, gunnäj̄ni yäl̄guxhtis lojreni te barguubi si'c rujn ni runchee guesbajn̄, rlia'ni guiraa regues nani xhet sajcdi.

²⁸Sunidxäza bale' xhaguibaa ni rii rsildoo (ni säloj guibannäj̄nu Dios).

²⁹Nani rlaiz cuadiajg sucuadiajgni diidx ni rni Sprit Dxan xten Dios loj reguidoo.”

Rediidx nani rniini lo rexejn̄ guidoo ni yu' Sardis

3 Dxejcti najni loä:
—Bacuaa rediidxre lo xangl Dios xten guidoo ni yu' Sardis: “Si'c naj nani rajp guigajdz Sprit xten Dios näj guigajdz rebal xhaguibaa: Narä nanä guiraa redzuun nani rujntu, rni rebejn̄ nabajntu, niluxh narä nanä ascanu agujttu, dirutu gun xtzunä. ²Col̄guibajn̄, col̄gula'tzru nani rapsijctu xcuent rextidxä nani ameer nitloj nen̄ lastootu. Narä ruhuiä ditu niunsa'c dzuun xtenä nez loj Dios. ³Col̄gusnaj lajztu rediidx ni basule'reni lojtu, nani abacuadiajgtu, col̄gusoob rediidxga, col̄gusiech lajztu. Palga ditu guibajn̄, palga ditu guchaa xmoodtu, sidzunä nez lojtu si'c te gubaan, nicla gaantu cor guidzunä lojtu. ⁴Niluxh yu' gaiisi bejn̄ lo guedx Sardis nani naya, nani gajdreni gun dojl̄. Sajcwreni ladnolbäj̄ te sanäreni narä xhaguibaa, sa'csi laareni säbyäj̄lreni. ⁵Nani gun gaan lo dojl̄, ni'c sajc gacwni ladnol, luxh dizana guche'nä lajni loj xlibr cadro caj laj renani sibajn̄näj Dios par tejpas. Sicäpäza nez loj Xtaä näjza nez loj guiraa rexquixhajgni, bejn̄ga najc rexpənä. ⁶Nani rlaiz cuadiajg diidx, sucuadiajgni diidx ni rni Sprit Dxan xten Dios loj reguidoo.”

Rediidx nani rniini lo rexejn̄ guidoo ni yu' Filadelfia

⁷Dxejcti najni loä:

—Bacuaa rediidxre lo xangl Dios xten guidoo yu' Filadelfia: “Nani najc dxan, nani najc guliipac, nani rajp xliäi toDavid (ni säloj guiragajc yälrnibee), nani che ruxhalni, rut rusäuudi, nani che rusäuuni, rut ruxhaldi, laani rniini diidxre lojtu: ⁸Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yälrnibee lojtu te gusule'tu xtidxä, rutliidi sajc gusäuu ro'tu. Mase guxii nadip-nadaantu, atu canii xtidxä, ditu cuatzlajz xtidxä. ⁹Suhuiitu xho gunä rebejn ni yu' lo guidobäz xten beñdxab. Rniisireni najcreni xpejn Israel, luxh direni gac; rusgueerenei bejn. Narä sunäpac jiädzuxhijbreni nez lojtu, sunäza gacbeepacreni sanälazduxhä la'tu. ¹⁰Sa'csi basoobtu xtidxä ni gunibeä sutijptu, na'c jieedtu, ni'cni narä sacnäázatu che guidzujñ dxej tedtu trabajw. Luxh órga ameer guidzujñ lo guideb guedxliuj, luxh sidejd guiraa reben guedxliuj trabajw, te guibee rebeñsa'c lo reben guedxliuj. ¹¹Narä di gaclaa jiälä; gopdzu'tz ni rajptu, te rut gudzucajdi ni gunidxä xca'tu. ¹²Nani gun gaan lo dojl, narä gunäni si'c te pilajr nen xquidoo Xtioozä, nalajznu, sajcnii te bejn nani gac guinibee cadro yu' Dios. Sibajñni ro'c par tejpas, diruni guirii ro'c. Lojni gucuaä laj Dios näjza laj guejdx xten Dios ni najc Jerusaléncoob, nani guirii xhaguibaa cadro yu' Dios; lojni sucuaäza laä ni najcza nacoob sa'csi najcni xpenä. ¹³Nani rlanj cuadiajg diidx, sucuadiajgni ni rni Sprit Dxiän xten Dios loj reguidoo.”

**Rediidx nani rniini lo rexpejn
guidoo ni yu' Laodicea**

¹⁴Dxejcti najni loä:

—Bacuaa rediidxre lo xangl Dios xten guidoo ni yu' Laodicea: “Nani laa Amén (ni säloj sugacni si'c), nani najc testiigw ni rniliipac, ni di cuääz guiniini didxliiga, nani guläxctiejd guedxliujre näj guiralii ni benchee Dios, laani rniini scree: ¹⁵Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. iMaläii guntu tejni o steeni! ¹⁶Ni'cni, sa'csi najctu si'c nistiib, ditu gac si'c nisnajl, niclaza gactu si'c nislää, sibäro'ä la'tu. ¹⁷Sa'csi rniilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najclu ben gubijn, te ben probduxhlu, di lojlu jien, luxh suga'lu xhabäälü nez lo Dios. ¹⁸Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladnol gacwlu, te di guitujyлу suulu xhabäälü; gusiiza unguent loä te chää balojlu, te jien lojlu. ¹⁹Rebejn nani sanälazä, reni'c rulidxä, runäza riareni che et laadi rujnreni. Ni'cni colsäblajz; colgusiejch lajztu. ²⁰Colhüii, ana suga'ä roxlä' lastootu, cagusezä, cabedxa'ä. Palga yu' chu tejtü ni jiejn diajgni xse'ä, guxhalni xpuert lastooni, siu'ä lastooni, te gacnäáni, te guibañsa'czani nez loä. ²¹Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenää Xtadä cadro rnibeeni xhaguibaa. ²²Nani rlanj cuadiajg

diidx, sucuadiajgni diidx ni rnii Sprit Dxan xten Dios loj reguidoo.”

Calä'preni xpala'n Dios xhaguibaa

4 Che gulujx bacuaä rediidxga, guläsä löä, bahuiä astoo naxhal ro puert xhaguibaa.

Dxejru gunii xse' nani biejn diagä ganiddoo, nani riejn si'c xse' te trompet, najni löä:

—Huä'p, gudaä ree, te guluiä lojlu recos ni churu gac che luux gac recosre.

²Lagajc dxejc astoocanu si'cni huij sprit xtenä xhaguibaa. Ro'c bahuiä te yagxhilro cadro rbej nani rnibee xhaguibaa, luxh ro'c sobga' nani rnibeeni. ³Nani sobga' lo yagxhilga, rienni si'c te guisa'c ni rbebalsejs, si'c reguisa'c ni laa jaspe, näj cornalina. Guideb gabi yagxhil cadro rnibeeni dejd te xquitgubijdx ni rbebalsejs si'c guisa'c ni laa esmeralda. ⁴Guideb gabi cadro rnibeeni suga' sgalbitajp yagxhil, loj reyagxhilga sobga' galbitajp rebengool, najcwreni ladnol, yu' coron oor yejc tejpgareni.

⁵Nez lo yagxhilro cadro rnibeeni rii reyärdinya' näjza guzii. Nez loj cadro rnibeeni caya_lguij gajdz bajl ni najc gajdz Sprit Dxan xten Dios. ⁶Nez loj cadro rnibeeni yu' astoocanu te nisdoo ni rien si'c te guihuanro, rdimbichasejsni.

Galäii yagxhilroga näjza guideb gabini suga' tajp man, guideb nez lojreni näjza nez dejtzeni yu' balojni. ⁷Manganidga najc si'c te lion; man ni rojpga najc si'c te gonbäz; man ni riojnga rujn lojni si'c rujn loj te niguii; man ni rdajpga najcni si'c te bisiro

cagutajt xhaguibaa. ⁸Niluxh guidap remanga tejpgareni yu' xho'p xhigareni, guideb gabireni, näj nez nenreni liguidxa balojreni, niluxh direni gusilajz, dxej-yääl caniireni: Dxan, dxan, dxan najc Dad Dios ni rajp yälrnibeduxh, nani yu' galooli, nani yu' naj, nani churu jääd.

⁹Guidap remanga rliä'preni xpala'n Dios, rusuxhijbreni rajnrenini, rdeedzareni xquixtios loj nani rnibee par tejpgas.

¹⁰Dxejc guigalbitap rebengool, suzuxhijbzareni loj nani rbej lo yagxhilro, te ganreni nani nabajn par tejpgas. Sucuaareni xcoronreni nez loj xyagxhilroni, siniireni lojni, säjpreni:

¹¹Dad Dios baxhuaannu, Guejbpacul riäj_l xca' guiraa rebala'n, guiraa reyäl_ruzuxhijb, guiraa reyäl_rnibee, sa'csi Guejblu guläxtiej guira'ti nani yu' naj, yu'reni sa'csi rlajz Guejblu chureni, ni'cni benchee Guejblu guiraareni.

Te gujtz näj te ni najc Xiil xten Dios

5 Dxejru narä Juan bahuiä lo nani sobga' lo yagxhilroga. Naani ladbee ca'ni te libr, najcni si'c te biliu gujtz. Caj diidx nez lojni caj diidx nez dejtzeni, nadxe'ni, caj gajdz seii lojni. ²Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäj_l guxhal gujtzre? ¿Chuni'c riäj_l gutiäjs reseiire?

³Niluxh nicla tej bejn di nidxäj_l ni riäj_l gutiäjs reseiiga te guxhalni

guijtzga; nicla xhaguibaa, nicla lo guedxliujre, nicla xhajiät nez nen guedxliuj. Niclaza nidxäjł chu najc nuhiii lo guijtzga. ⁴Narä ronduxhä sa'csi nicla tej rut riäjłdi gutiäjs reseiiga, niclaza ni riäjł goł guijtzga, niclaza ni riäjł fiitis lo guijtzga.

⁵Dxejcti gunii te bengool loä, najni:

—Na'cru goonlu. Bahuii gan, niguii ni rniireni Lion, xagdoo toJudá, xagdoo toDavid, abejnni gaan lo yälgujł ni'c naj riäjł guxhalni guijtzga, gutiäjszani guigajdz reseiiga.

⁶Dxejc bahuiä nez cadro suga' yagxhilroga naj guidap remanga, naj cadro suga' guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb gajdz xca'chni najza gajdz balojni, ni najc gajdz Sprit xten Dios nani ruxhałni guiraa nez lo guedxliuj. ⁷Laani gubigni, cua'ni guijtzga, guläänini naa ladbee xten nani sobga' lo yagxhilroga canibee. ⁸Che cua'ni guijtzga, guidap remanga najza guigalbitap rebengool bazuxhijbreni nez loj Xiilga. Tejga rebengoolga ca' te arp, ca'zareni taz oor guidxa te ni najc si'c yaal. Yaalga najc guiraa reyälrbejdx, yälrniab xten rexpejł Dios. ⁹Cayolzareni te dicoob ni najc scree:

Guejblu sacduxh,
riäjłpac xca' Guejblu guijtzga,
gutiäjs Guejblu reseiiga, sa'csi
bagu't rebejłnu,
najza xtiejłnu gudijx xcuent bejn
lo Dios.

Gudijxlu xcuent bejn ni najc
garen-garen raz,
ni rniü garen-garen didxsaj,

ni siääd garen-garen guejdx lo garen-garen ladxbejł.

¹⁰Badeedlu gacreni reii najza bixhojz lo Dios.

Laareni sinibeereni reben guedxliuj.

¹¹Che bahuiä, biejn diagä xse' xhidalduxh xangł Dios ni suga' guideb gabi yagxhilro cadro rbejn nani rnibee, najza xse' guidap reman, najza xse' guiraa rebengool. Luxh di gacdi guigab xangł Dios ni tre' ro'c sa'csi xhidalduxhtej najcreni, xhidalduxh miyon najcreni. ¹²Dipduxh najc xse'reni, caniireni scree:

Sacduxh Xiil nani bagu'treni,
ni'c riäjł xca'ni yälrnibeduxh,
yälrapduxh, yälñanduxh,
yälmilagwr.

Riäjłza guiliä'pnu xpala'nni,
guzuxhijbnu lojni ganñuni,
gudeednu xquixtios lojni.

¹³Dxejcti biejn diagä xse' guiragajcreni, guiraa reni benchee Dios ni yu' xhaguibaa, naj guiraa reni yu' loj guedxliujre, najza guiraa reni yu' xhajiät nez nen guedxliuj naj lo nisdoo, biejn diagä caniireni scree:

Loj nani sobga' lo yagxhilro
cadro rnibeeni,
najza loj ni najc Xiil xten Dios,
laatisni sacduxhni,
guiliä'pnu xpala'nni,
guzuxhijbnu nez lojni ganñuni,
gäbzanu rinibeeni par tejpas.

¹⁴Dxejcti guidap remanga rnigajcreni scree:

—Sugacni si'c.

Dxejcti guigalbitap rebengool bazuxhijbreni nez loj nani nabajn par tejpas, gojñrenini.

Guigajdz reseii

6 Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te fiilu.

²Dxejc bahuiä lo te cabai nol. Nani bijb dejtzn ca' te arcw nani rucuaa fle'ch. Badeedreni te coron lojni. Biriini cayujnni gaan te chanuutis gunni gaan.

³Che batiäjsni ni rojp seiiga, biejn diagä gunii ni rojp manga, najni loä:

—Gudaa te fiilu.

⁴Dxejc bahuiä lo te cabai xniaa. Loj nani bijb cabai xniaaga badeedreni yälrnibee gudzucajni yäl'nadoo, yälrbedxilajz, lo guedxliujre, te ju't sa' rebejn. Badeedreni te spadro cua'ni.

⁵Dxejcti che batiäjsni ni riojn seiiga, biejn diagä gunii ni riojn manga, najni loä:

—Gudaa te fiilu.

Dxejc bahuiä lo te cabai yas. Nani bijbni naazni te balans. ⁶Biejn diagä astoo galäii guidap remanga, birii xse' te ni canii scree:

—Tej kil xob xca'lu gunlu dzuun tebdxej; chon kil salbaad xca'lu gunlu dzuun tebdxej. Niluxh na'c guhuallu bin niclaza se't.

⁷Dxejcti che batiäjsni ni rdap seiiga, biejn diagä gunii ni rdajp manga, najni loä:

—Gudaa te fiilu.

⁸Dxejc bahuiä lo te cabai gojtz. Nani bijbni laa yälgujt, luxh dejtzn siädnaalgajc ni rnibee gabijl.

Gula'ni rebejn ni re' lo guedxliujre gujcreni tajp gala', dxejc loj redee badeedreni guinibeereni lo te cuaa rebenguedxliuj te ju'treni rebejn ga con spaad, näj yälrliaan, näj yälracxhuu, näjza remanduxh ni yu' dajn.

⁹Dxejcti che batiäjsni ni rajc gaii seiiga, bahuiä nez ni' xpiändxan Dios, ro'c naga' xaim rebejn nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios. ¹⁰Dipduxh caniiireni, canabreni lo Dios, räjpreni:

—Dad, ni najc Dxaan, ni najc guliipac. ¿Gucli cuääz, gaclaa gun Guejblu yälguختis loj reni bagu't nuure lo guedxliuj te quiixreni ni bejnreni?

¹¹Dxejcti cua'reni te ladnolbäj gojt tejegareni. Dxejc räjpreni lojreni cuäzsiçreni, gusilajzreni, la' ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

¹²Bahuiäza cheni batiäjsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bäii gujc guidebni si'c rejn. ¹³Rebajl ni yu' xhaguibaa bitejbreni lo guedxliujre, si'c rtejb rebetz yagxhejn che rusniib te beduxh yajgga. ¹⁴Dxejcti gunitloj guibaa si'cni rnitloj te guijtz che re'ni, rajcni te bilu. Guiraa redajn näjza reyuj ni re' galäii lo nisdoo biniibreni, bidxaa xlajdreni. ¹⁵Ni'cni guiraa reben guedxliuj, rebejn nani rnibee, näjza rebenro, näjza recapitán, näjza reben rapduxh, näjza reben ni nadiplajzreni, näjza

remos, nájza renani rut lojdi yu'reni, guiragajcreni baxunreni, huicuatzlojreni nen rebiliää nen redajn. ¹⁶Dxejc räjpreni loj redajn, loj regulaj:

—Colguitejb yejenu, colgucua'tz nuure loj nani rbej lo yagxhilro xhaguibaa nájza loj yälguxhtis xten nani najc Xiil xten Dios. ¹⁷Sa'csi abidzujn dxero xten xcälguxhtisni, ÷chuni'c sajc suu nez lojni?

Tegayuu tiubitajp mił rexpejn Israel

7 Dxejcti bahuiä lo tajp xangl Dios ni suga' loj guidajp laad guedxliuj. Caguscuaääzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejc reyajg. ²Bahuiä lo stee xangl Dios, ni siääd nez cadro rliejn gubijdx, ca'ni sei xten Gueb Dios ni nabajn par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, nájza lo nisdoo. ³Räjpni lojreni:

—Guläzsijctero, lał ni guicuaanu te seen lo cuaj reni najc xpejn Dios, te dxejcru sajc guntu daan lo yuj, náj loj nisdoo, náj loj reyajg.

⁴Dxejcti biejn diagä najreni bal bejn guyu' seenga lo cuajreni, basa'reni tegayuu tiubitajp mił bejn ni bibee loj rexpejn Israel. ⁵Loj rexpejn Judá bibee tzubitio'p mił; loj rexpejn Rubén bibee tzubitio'p mił; loj rexpejn Gad bibee tzubitio'p mił; ⁶loj rexpejn Aser bibee tzubitio'p mił; loj rexpejn Neftalí bibee tzubitio'p mił; loj rexpejn Manasés bibee tzubitio'p mił; ⁷loj rexpejn Simeón bibee tzubitio'p mił; loj rexpejn Leví bibee

tzubitio'p mił; loj rexpejn Isacar bibee tzubitio'p mił; ⁸loj rexpejn Zabulón bibee tzubitio'p mił; loj rexpejn José bibee tzubitio'p mił; loj rexpejn Benjamín bibee tzubitio'p mił.

Benguixhuj ni najcw ladnolbäj

⁹Dxejcti bahuiä lo xhidalduxh bejn, benguixhuj, nicla tej bejn digacdi gulabreni. Garen-garen ladx-bejn siäädreni, garen-garen najc lajdxreni, náj raz xtenreni, náj xtiidxreni. Suga'reni nez loj yagxhilro xten ni rnibee, nájza nez lojni ni najc Xiil xten Dios. Najcwreni ladnolbäj, ca'zaren zijn.

¹⁰Dipduxh rniireni, räjpreni:

Dios ni rnibee lo yagxhilro, nájza nani najc Xiilre, baslaareni nuure lo xtojlnu.

¹¹Suga'za guiraa rexangl Dios guideb gabi yagxhilro cadro rnibeeni, nájza guideb gabi rebengool nájza guidap remanga, dxejcti bazuxhijbreni, basajbreni lojreni nez lo Dios, ¹²räjpreni:

Sugacni si'c. Loj Xtiostisnu colye'tz sacduxhni; colguiliä'p xpala'nni; laatisni rajpni yälnajn; lojtisni colgudeed xquixhtios, laatisni colgan, colsuxhijb lojni; laatisni rajpni yälrnibee nájza yälmilagwr. Sugacni si'c par tejpas.

¹³Dxejc gunii te bengool löä, najni:

—Renani najcw reladnolbäjre, ÷chu najczeni? ÷Casiäädreni?

¹⁴Dxejcti räpä lojni:

—Dad, anajn Guejblu. Dxejc najni löä:

—Redee najc renani agudejd yältrabajdwxh, renani abia rextojlreni sa'csi xtiejn Xiil xten Dios agudijx xtojreni. ¹⁵Ni'cni suga'reni nez loj yagxhilro xten Dios dxej-yääl cayujnreni xtuuenni neñ xquidooni. Ni'cni sacnäj nani sobga' lo yagxhilroga guiraa renani suga' nez lojni, sunäjtisni laareni. ¹⁶Dirureni guiliaan, niclaza jiojlreni, diza gubijdx guze'c lojreni, dizareni gacnanlaa. ¹⁷Sa'csi nani najc Xiil xten Dios ni sobga' galäii loj yagxhilro xten Dios, laani cayajpnireni si'c xilbäs, sinänireni cadro yu' nisyä ni rudeed yäl nabajñ par tejpas. Suspijdz Dios nisbee balojreni, dirureni goon par tejpas.

Ni rajc gajdz seiiga

8 Che batiäjsni ni rajc gajdz seiiga, gucdxi xhaguibaa si'cti med or. ²Dxejcti bahuiä loj guigajdz xangl Dios ni suga' nez loj Dios. Lojreni badeedreni gajdz trompe't. ³Dxejctiru biääd stee angl, ca'ni te bacue ni najc ganax oor, bazujnini nez loj piändxan. Badeedreni lojni naclejñ yaal te cachaagnini loj guiraa rextidx xpejñ Dios ni rniireni che rbedx-rniabreni lo Dios, te checni lo piändxan ni najc ganax oor, ni yu' nez loj yagxhilroga. ⁴Dxejcti gujxhga nägajc rextidx rexpejñ Dios, birii ladsnaa xangl Dios ni ca' bacue, huä'preni nez loj Dios. ⁵Dxejcti lagajc anglga cua'ni guiboo ni dzuub lo piändxanga, bachajni bacue, dxejcti baslojnini lo guedxliuj. Dxejc guyu' te guziduxh, bidinyaduxh, gujczä te xuduxh.

Retrompe't

⁶Dxejcti guigajdz rexangl Dios ni ca' guigajdz retrompe't, guzusinreni te guisloj gojreni retrompe'tga.

⁷Che bil trompetganid, guixob näj guiboo nu'chreni rejñ gusloj cayajbreni loj guedxliuj. Dxejcti huejc ni riojñ la' guedxliuj, huejczä ni riojñ la' reyajg näjza guiralii recuaan.

⁸Che bil ni rojñ xangl Dios trompe't ni ca'ni, ascanu yu' chu bacuaani biajb si'c te danro ni cayejc loj nisdoo. Dxejcti gujc ni riojñ la' nisdoo si'c rejñ. ⁹Dxejcti gujt ni riojñ la' rebäjñ näj guiraa reman ni yu' loj nisdoo. Gunitlojza ni riojñ la' rebarew ni sazaj lo nisdoo.

¹⁰Che bil ni riojñ xangl Dios trompe't ni ca'ni, biajb te balro xhaguibaa, cayejcnä si'c te balguejd. Bitejbni loj ni riojñ la' regueeu, näjza cadro rliejñ nis. ¹¹Laj bajlga najc Ajenjo, ni säloj te cos ni nanladuxh. Ni riojñ la' nis gujc nis nanladuxh. Dxejcti gujt xhidalduxh bejñ xcuent nisnänlaaga.

¹²Che bil ni rdajp xangl Dios trompe't ni ca'ni, guxhijñ ni riojñ la' gubijdx, näjza ni riojñ la' bäii, näjza ni riojñ la' rebal xhaguibaa, bicäjyreni. Dxejcti dirureni guzanij ni riojñ la' dxej, näj ni riojñ la' yääl.

¹³Dxejcti bahuiä xhaguibaa, biejn diagä si'c te bisij cagutajt nez galäii xhaguibaa. Biejñ diagä cabedxa'ni, caniini rediidxre:

—iAii! iAii! iAii! Riaduxhä reben guedxliuj che guisloj gol schon rexangl Dios retrompe't ni ca'reni. Sidejd reben guedxliuj trabajdwxhru.

9 Che bil ni rgaii xangl Dios trompe't, bahuiä lo te bal xhaguibaa ni bitejb lo guedxliujli. Bajl xhaguibaaga cua'ni läii ni

ruxhal ro' gabijl. ²Baxhaltini ro' gabijl, dxejc huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej. ³Dxejcti lo gujxhga birii betzsu gusujreni guideb lo guedxliuj. Cua'reni yälrnibee gacreni nialajz si'c nialajz renaxejb. ⁴Cua' remanga yälrnibee na'c gunreni daan loj reguixa', loj recuaan, loj reyagbajñ; rebejñtis nani xhet beedi xten Dios caj lo cuajreni, reni'c gusacs'reni. ⁵Cua'reni yälrnibee na'c ju'tni bejñ, gaii bäii gusacs'reni xcälñayanreni bejñ. Luxh xcälñayanreni najc si'c yälñayan cadro rauya' te naxejb te bejñ. ⁶Neñ redxejga, siguiil rebejñ yälgujt, luxh direni guidxälni. Luxh mase rlajzreni guetreni, sibicaj yälgujt lojreni.

⁷Rebetsure najc si'c recabaii ni suchee te chääreni lo guer. Yejcreni yu' te ni najc si'c te coron oor; luxh lojreni rujn si'c loj rebejñ. ⁸Xquichejcreni si'c najc xquichejc gunaa; reläyjreni najc si'c läjy lion. ⁹Luxh guideb tiejxhreni caj si'c guuib ni rusäudzu'tzreni. Rubeduxh rexhigaareni, si'c rubej che ruxun xhidalduxh cabaii näj xcarreni che agojl chääreni guer. ¹⁰Xhibaanreni najc si'c xhibaan naxejb, xcuchreni yu' yälñayan te gusacs'reni reben guedxliuj gaii bäii. ¹¹Yu'za ni rnibee lojreni, xangl bendxab ni birii gabijl. Xtidx hebreo laani Abadón, xtidx griegw, laani Apolión.

¹²Naj agudejd tej casionroga, naj cayäädx stio'pni.

¹³Che bil ni rxho'p xangl Dios trompe't, biejn diagä te xse' bejn ni lascanu siädni galäii guidajp

reca'ch ni caj loj xpiändxan ni nac-chee ganax oor, ni yu' nez loj Dios. ¹⁴Luxh xse' bejnga canii loj ni najc rxho'p xangl Diosga, ni ca' trompe't:

—Baslaa guidap reangl nani caduu nez rogueuu ni laa Eufrates.

¹⁵Dxejcti baslaani guidap reanglga te ju'treni ni riojn la' ben guedxliuj. Luxh gule Dios reanglga parpac dxejga, bäiiga, ijzga. ¹⁶Biejn diagä bal najc guiraa resoldaad ni rbijb cabaii: najcreni tio'p gayuu miyon.

¹⁷Scree bahuiä lo bacial recabaiiga näjza renani bijb recabaiiga. Lastoo reni bijb recabaii caj te guuib, najcni xnial näj zul näj gojtz. Dxejcru yejc recabaiiga najc si'c yejc te beedz. Ro'reni carii bajl näj gujxh, näj sufr. ¹⁸Ni riojn cuaa bejñ gujt xcuent guichon replaag nani carii ro' recabaii, xcuent bajl näj gujxh, näjza sufr. ¹⁹Recabaii runnäj daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjreni daan.

²⁰Luxh guiraa rebejñ nani di replaagre nugu't, direni nusiejch lajzreni xcuent ni cayujñ naareni, te rajñreni rebendxab, näjza rebanäjb ni nac-chee oor, näjza pla't, näjza latón, näjza guij, näjza yajg. Luxh rebanäjbga di gacdi fiireni, di diajgreni jiejn, di gacdi saren.

²¹Diza rebejnga nusiejch lajzreni xcuent xcälrugut'reni, xcälrujnreni yälbidxaa, xcälresnäjreni bejñ ni di gac chäälni, niclaza xcälgubaanreni.

Te angl ni ca' te guijtz

10 Bahuiä stee xangl Dios ni rajp yälrnibeduxh,

siädjiäjtni xhaguibaa, li yu'ni nen**̄** bāj, yejcn**i** dejt xquitgubijdx, luxh lojni najc si'c gubijdx. Reni'ni najc si'c tio'p pilajr bajl. ²Ca'ni te librbāze', naxhal libre'ga. Bazujni ni'ni ladbee loj nisdoo, bazujni ni'ni ladbājgw lo yuj, ³dxejc guredxaduxh anglga si'c rbedxa' beedz. Dxejcru gunii guigajdz guzii sigajcsa. ⁴Che gulujx gunii guziiga, narā rlazā nucuaā lo guijtz nani guniireni, per biejn diagā xse' tej ni gunii xhaguibaali, najni loā:

—Guluchedzu'tz rediidxga nani gunii reguzii, na'c gucuaaluni.

⁵Angl nani suj ni'ni loj nisdoo nājza loj yuj, gulās naani ladbee nez xhaguibaa. ⁶Guniliini diidx con laj GuebDios ni nabajr par tejpas, ni gulāxtiej xhaguibaa nājza guiraa ni tre' xhaguibaa; ni gulāxtiej guedxliujre nājza guiraa ni tre' lojni; ni gulāxtiej nisdoo nājza guiraa ni tre' nen̄ nisdoo. Rājpn**i**:

—Diru redxeyre gaclaa. ⁷Che guidzujntis dxej ni agojl go**l** ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

⁸Dxejc gunisac xse' nani gunii xhaguibaali, stehuālt biejn diagā caniini loā, najni:

—Huij, te xca'lu libre' ni naxhal ni yu' ladznaa angl ni suj te laad ni'ni loj nisdoo, stelaad ni'ni lo guedxliuj.

⁹Dxejcti hua'ā lo anglga, rāpā lojni:

—Guniidxlu libre'ga.

Laani najni loā:

—Anire, cua'ni, gudajwni. Sun nanlaani xque'lu, niluxh ro'lu sajcn**i** nejxh si'c dzujn.

¹⁰Dxejcti cua'ā libre'ga lo naa anglga, dxejc gudauāni. Ro'ā guyu'ni nejxh si'c dzujn, luxh che gudāmāni, lacti guc nanlaani xque'ā. ¹¹Dxejc najni loā:

—Nanab chasulesaclu xtidx Dios xcuent nani churu gac loj xhidalduxh bejn, nājza guejdx, nājza renani rnii garen-garen xtiidxreni, nājza loj rerei.

Tio'p niguii ni rusule' xtidx Dios

11 Dxejcti baniidxni loā si'c te biquii nani rurejxh. Dxejc guyu' chu naj loā:

—Huisu te charejxhlu xquidoo Dios, nājza piāndxan, balabza balti bejn rusuxhijb nēnga. ²Na'c gutiexhlu gabi lole' guidooga, sa'csi ni'c acua' rebenzijtni te tiubitio'p bāii chalājsreni guedxdxan si'ctis ni rlazzreni. ³Narā sudedā yālrnibee lo tio'p dade' ni guinii diidx xcuentā, luxh guideb najcwreni ladyas, susule'reni xtidxā lojreni te mil tio'pgayuu gayojn dxej.

⁴Guio'preni najc si'c tio'p yag oliib, si'c tio'p gandilieer ni suga' nez lo Dios. ⁵Palga yu' chu bejn rlazj gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riāj**l** guet chutis ni rlazj gun latsiajreni. ⁶Guio'p redade'ga rajp yālrnibee te gusaureni xhaguibaa te na'c jiajb nisguij guideb nen̄ redxey nani cagusule'reni xtidx Dios, rajpzareni yālrnibee te guchaareni nis te gacni rejn, rajpzareni yālrnibee te jiādgusacs**i** xhitis plaag lo guedxliuj, si'ctis huālt ni rlazzreni. ⁷Che luux gusule'reni xtidx Dios, dxejcti ni najc si'c te man nialajz sirii gabijl

te jädchagdijl_{ni} guiro'preni. Sujnni gaanreni, sugu'tnireni. ⁸Dxejcti jia'n guiro'p rebengutga lad caii xten guejdx cadro bacuaareni Dad Jesucrist lo crujuj. Guejdxroga rbälajzareni Sodoma näjza Egipto. ⁹Chon dxej garol guiraa rebejn ni siääd guedxbäz, ni siääd guedxro, ni najc garen-garen raz, ni rnii garen-garen xtidx guiraa rebejn guedxliuj, suhiii loj guiro'p rebengutga, direni gusaan guiga'tzreni nen baa. ¹⁰Guiraa renani nabaj_n lo guedxliujre sibalazduxh_{reni} sa'csi gujtreni. Luxh sa'csi rbalajzduxh_{reni}, suxhalz_{areni} xhi xca' sa'reni; sa'csi guiro'p redade' ni basule' xtidx Dios baxhal trabajwduxh lojreni. ¹¹Che gudejd chon dxej garolga, baspa_nsac Diosreni, dxejcti huitiesacreni. Guiraa reni bahuii lojreni, bidxebduxh_{reni}. ¹²Dxejcti biejn diajg guiro'preni xse' te ni canii dipduxh desde xhaguibaali, räjpni lojreni:

— Colchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahuiireni huä'preni xhaguibaa. ¹³Lagajc orga gujc te xuduxh, gurebä'n tej lo tzuu la' guejdxga, gujt gajdz mil bejn lo xu ni gujc ro'c. Rebejn ni bia'n ro'c bidxebduxh_{reni}, guslojreni calä'preni xpala'n Dios ni yu' xhaguibaa.

¹⁴Si'ctigulujxn_{irojpcasioon},luxhag ojlguidzuj_nnirioj_nga.

Ni rajc gajdz xangl Dios go_l trompe't

¹⁵Che bil ni rajc gajdz xangl Dios trompe't ni ca'ni, dxejcti biejn

xse' reni dipduxh canii xhaguibaa, cayäjpreni:

Xcäl_rnee guedxliuj agudejd ladz_naa Dad Dios näjza Jesucrist;

luxh laani sinibeeni par tejpas.

¹⁶Galbitajp rebengool nani sobga' lo tron xtenreni cadro rnibee Dios, biabrojreni nez loj Dios te calä'preni xpala'n Dios. ¹⁷Räjpreni: Xquixtioste Guejblu Dios, nani rajp yäl_rnibeduxh, nani najclu, nani gujclu, nani churu gac, sa'csi acua'lu xcäl_rnibeduxhlu te agusloj canibeelu.

¹⁸Bidxe'ch reben guedxliuj lojlu, luxh abidzuj_n dxej guidxe'chlu lojreni, gunlu yäl_guxhtis rebengut, te gudeedlu cossa'c loj rexpej_nlu, lo renani gunii xtidx Dios, lo renani huililajz xtiidxlu, lo renani rusuxhijbni nez lojlu; reben_{proob} sigajc reben_{ro}. Abidzuj_nza dxej che cuäcajlu renani bejn daan guedxliujre, te nitlojreni par tejpas.

¹⁹Dxejcti bixal xquidoo Dios ni yu' xhaguibaa, nen guidooga bien te guijn cadro yu' guij cadro caj rediidx ni bia'n Dios loj rexpejn Israel. Dxejcti lacti bidinya', lacti guiniiza reguziro, gujc te xu, dxejcti biajb te guixobroduxh.

Te gunaa näj te ni najc si'c te gutiatzro

12 Dxejcti guyu' te senro xhaguibaa: te gunaa ni najcw si'c gubijdx, ni'ni sojb bäii, yejcti yu' te coron ni nac-chee tzubitio'p balxaguibaa. ²Gunaare

nuxi'nni. Rbedxa'ni sa'csi agusloj cayu' yoob xque'ni te gaal xi'nni, cadejdni trabajwduxh. ³Dxejcti bahuiä stee seen xhaguibaa: te manxniaa ni rujn lojni si'c loj te gutiatzro, manduxhni. Yu' gajdz bitiuvejcnj, sojb tzuu xca'chni. Tejga yejcnj yu' te coron, najcreni gajdz coron. ⁴Dxejcti xhibaanni cagobxajxhni ni riojn la' rebalxhaguibaa, dxejcti bacuaanireni lo guedxliuj. Dxejcti biädsu manroga nez loj gunaaga ni ameer gaal xi'nni, te gauni xi'nni che gaalni. ⁵Dxejcti gojl xi'n gunaaga, najcni te niguii, luxh te bar guiib nungäj̄l guinibenäj̄ni lo guiraa reben guedxliuj. Guläsgajcreni bäzga te sanärenini xhaguibaa cadro rnibee Dios. ⁶Dxejcti baxun gunaaga, siini nez loj reyubijdz cadro yu' te lajt ni basuchee Dios te cuääzni, te ro'c guyaannini te mił tio'p gayuuj gayojn dxej.

⁷Dxejc guyu' guer xhaguibaa, xangl Dios nani laa Miguejl näj resa'ni bacuanäjreni gutiatzro. Gutiatzroga näjza rexanglni gudilduxhreni, ⁸niluxh direni niujn gaan, luxh di nijcdiru nia'n manga näjza resa'ni xhaguibaa. ⁹Dxejcti bacuaareni manroga näjza resa'ni lo guedxliujre. Laani najc ni guje bäl galoroga, ni najc gueb Bendxab, ni laaza Satanäs, ni rusguee guideb guedxliujre.

¹⁰Dxejcti biejn diagä xse' te ni canii dipduxh xhaguibaali, räjpni: —Abidzujn yälruślaa lo dojl, näj yälmilagwr, näj yälrnibero xten Dios, näjza yälrnibee xten Jesucrist, sa'csi agulääreni bejn nani entis

rbe'c xquej rexpejn Dios loj Dios dxej-yääl. ¹¹Laareni gujc bejnreni gaan loj bendxabre, xcuent xtiejn ni najc Xiil xten Dios, näjza sa'csi huililazsa'creni xtidx Dios, dizareni nidxejb mase niejtzareni. ¹²Ni'cni, guiraa la'tu ni yu' xhaguibaa näjza gueb xhaguibaa, colquibalazduxh. Niluxh riaduxhnu renani rbäjz lo guedxliujre, näjza lo nisdoo, sa'csi abiäjt bendxab lo guedxliuj, luxh cadxechduxhni sa'csi anajnni guxii dxej rajpni.

¹³Che gucbee gutiatzroga abacuaarenini lo guedxliuj, birinajlni gunaa nani guyu' xi'ngaanni te gusacsínini. ¹⁴Dxejc badeed Dios lo gunaaga tio'p xhiga xten bisiro, te gac gutajtne nez lo reyubijdz cadro nac-chee cadro cuääzni. Chon ijz garol guyu'ni ro'c, nacuatzlojni lo bälga. ¹⁵Dxejcti ro' gutiatzrore birii nis si'c te gueuu te nuslo'ni gunaaga. ¹⁶Dxejc gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga. ¹⁷Dxejc bidxechduxh gutiatzroga loj gunaaga, ni'c sääni te gucuanäjni sgaii rexi'n gunaaga, renani cagusoob diidx ni gunibee Dios, renani rililajzza xtidx Jesucrist.

Tio'p manduxh

13 Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejga xca'chni yu' te coron. Yu' gajdz bitiuvejcnj cadro caj diidx ni rniyaj Dios. ²Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro.

Gutiatzroga badeed xcälmilaagwrni lojni, näjza tron cadro rbejni, näjza xcälrnibeduxhni. ³Dxejcti bahuiä te yejcti najc ascanu yu' chu batiuugni con madxed, ameer guetni, luxh biajc cadro gurujg yejcti. Ni'cni rdxeloduxh guiralii rebejn guedxliuj, sanajlreni manduxhga. ⁴Bazuxhijbreni gojñreni gutiatzroga sa'csi badeedni xcälrnibeeni lo manduxhga, dxejctiru bazuxhijbreni gojñzaren manroga, räjpreni:

—¿Chu stee najc si'c manrore, ä? ¿Chu laa ni gac guichagdijñni, gucuanäjñni?

⁵Yu' chu badeedza lo manroga diidx dxejcti gusloj caniini guiraloj didx-guyalajz, diidx ni rniyaj Dios. Yu'za chu badeed ga'pni yälñribee tiubitio'p bäii, gunni si'ctis ni rlajzni. ⁶Baxhalni ro'ni, guniyaduxhni Dios, guniyajni laj Dios, näjza xquidoo Dios, nalajznu renani yu' xhaguibaa. ⁷Dxejcti yu' chu basaan bacuanäj manroga rexpejn Dios. Bejn manroga gaan rexpejn Dios, dxejcti gunibee manroga guiraa reguedxbäz, näj guiraa rebejn ni rñii garen-garen xtiidxreni, näjza guiraa reguedxroduxh. ⁸Dxejcti guiraa reben guedxliuj sazuxhijbreni, sagajñreni manroga, guiraa rebejn nani di lajreni nicaj lo libr xten yälñabajñ xten Xiil nani gujt xcuentreni, sa'csi galooli guirixtiej guedxliuj cuaj lo guijtze laj guiraa ni gac xpejn Dios.

⁹Palga yu' chu rlajz cuadiajñni, sugucuadiagsa'cni. ¹⁰Palga yu' chu nungäjñ jiäuu neñ latzguiib, siäupacni. Chutis ni ju't te bejn

con te madxed, con madxedza guetni. Ni'cni renani anumbee Dios, riäjñ gunreni huant, chanuutis chalilazsa'creni xtidx Dios.

¹¹Dxejcti bahuiä loj stee manro, cariini neñ yuj. Sojb tio'p xca'chni si'c xca'ch te xiil, rniini si'c rñii te gutiatz. ¹²Luxh rnibeezani si'cni rnibee manroga lagajc nez loj manroga, rujnzani rusuxhijb reben guedxliuj loj manrogalooga ni gurujg yejcti, luxh biajc yejcti. ¹³Manroga ni birii neñ yuj rujnzani remilagwrro, rujñni rtejb bal-guiboo xhaguibaali, rtejbni lo guedxliuj nez loj rebejn. ¹⁴Rusgueeni rebejn nani nabajñ lo guedxliuj xcuent remilagwrro nani rujñni nez loj manrogalooga. Guinibeeni gun reben guedxliuj te banäjñ si'c najc manroga nani batiuug madxed yejcti, luxh biajca yejcti. ¹⁵Dxejcti man ni rojppa baspajñ banäjñbga te guinii banäjñbga, dxejcti gunibeeni guet guiraa rebejn nani di guzuxhijb lojni te ganrenini. ¹⁶Gunibeezani chu bejn te seen lo cuajni o ñaani ladbee, guiraa rebejn ni xhet rajpdi, guiraa rebejn ni rajp, guiraa reni najc mos, guiraa reni najc lam, guiraa reni najc benro, guiraa reni najcza benbäz. ¹⁷Gunibeezani digacdi sii, digacdiza guto' bejn palga xhet seendi caj ñaani o lo cuajni. Seenga najc laj manga o numbr xten laj manga. ¹⁸Dee rquiin yälñajñ. Renani rajp yälñajñ sugulabreni xseen manga, numbrga najc si'c xnumbr bejn; numbr xten manga najc xho'p gayuu gayonbixho'p.

Dij ni roñ te gayuu tiubitajp mil

14 Che bahuiä stee, bahuiä suga' Xiil xten Dios yejce

dajn ni laa Sión. Sugañjni te gayuu tiubitajp mił bejn nani caj lo cuajreni laj Xiil nāj laj Xtadni. ²Biejn diagā rubej xhaguibaali, rubeduxh, riejnni si'c rubej xhidajl gueuro, nāj te guziro; riejnzani si'cni riejn che cayol xhidajl bejn ni roł arp. ³Cayolreni te dicoob nez loj tron cadro rbej nani rnibee, nājza nez loj guidap reni najc si'c man ni nabajnpac, nājza nez loj rebengool. Rutliidi gujc bisieeddi dijga, xtebtis tegayuu tiubitajp mił bejn nani gułaa lo reben guedxliuj. ⁴Reniguiire najc renani gajd xhin con gunaa; nicla tejreni di niesnāj te gunaa, najcreni ben dxan. Laareni rinajlreni Xiil xten Dios cadrotis sääni. Redee gułaa lo reben guedxliuj si'c te gojn lo Dios nājza lo Xiil xten Dios. Gojnre najc si'c gonganid ni rudeed bejn xten te cose'ch. ⁵Nicla tej didx-xhii di guirii ro'reni, sa'csi xhetliidi xtojłreni, nayareni suga'reni nez loj tron cadro rnibee Dios.

Rediidx nani bazule' jioñ rexangl Dios

⁶Dxejcti bahuiä loj stee xangl Dios, rutajtni nez galäi xhaguibaa, siädñani diidx ni najc par tejpas xten Dios te gusule'nini loj reben guedxliuj, guiraa lo reguedxro, guiraa lo reguedxbäz, loj reben ni najc garen-garen raz, nani rni garen-garen xtiidreni. ⁷Dipduxh guniini, räjpni:

—Colguidxejb Dios, colguiliä'p xpala'n Dios sa'csi abidzujn or gunni yälguhxhtis guiraa rebejn. Colguzuxhijb loj nani benchee xhaguibaa, nājza guedxliuj, nājza nisdoo, nājza cadro rliejn nis.

⁸Dxejcti siädñajl stee angl nani canii:

—Abiajb, abiajb guejdxroga nani laa Babilonia, sa'csi baquiiłni guzojz guiraa reguejdx xten guedxliuj xcuent xcäl-latsiajni, xcuent dojl ni bejnni guideb lagaa; najcni si'c reni rä' nejp.

⁹Dxejc biädñajl ni riojn xangl Dios, dipduxh guniini, Räjpni:

—Palga yu' chu bejn guzuxhijb loj manroga o loj banāj ni najc si'c manroga, o xcäjbn xca'ni xseen manro lo cuajni o lo naani, ¹⁰sidxechduxh Dios lojni, di xcälguhxhtisduxh Dios tedcaj lojni. Sidejpacni trabajwduxh nen balro nājza azufr nez loj rexangl Dios nājza nez loj Xiil xten Dios.

¹¹Luxh gujxh xten reni cayejc sä'p nez lojreni guixe-guixee par tejpas. Digacdi gusilajzreni dxejyäl, renani guzuxhijb, reni gojn manroga nājza reni gojn banāj ni najc si'c manroga, chutisza ni rca' seen xten lajni. ¹²Ni'cni renani huililajz xtidx Dios, reni rusoobza xtidx Dios, ni rinuutis lo xneyzuj Jesucrist, nanab di guidxajgreni.

¹³Biejn diagā xse' te ni caniini loä xhaguibaali:

—Scree bacuaa: “Chicbaa rebejn ni guet najli nani rililajz xtidx Jesucrist.” “Guliini”, naj Sprit Dxaan xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

Yälñasa'c ni rudeed guedxliujre

¹⁴Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguii. Yu' te coron ganaxduj oor yejcn, dxejcti naani

ca'ni te guiboz ni caduxh ro'ni.
¹⁵Dxejcti birii te xangl Dios loj xquidoo Dios, dipduxh caniini loj ni sobga' loj bājga, rājpnī:

—Basāl xquibozlu, batiuug, te batie' yāl̄nasa'c, sa'csi agojl or guire' yāl̄nasa'c, guideb guedxliuj aguyajl̄ni.

¹⁶Dxejcti nani sobga' lo bājga basniibni xquibozni, batiuugni yāl̄nasa'c ni caj lo guedxliujre.

¹⁷Dxejcti stee xangl Dios birii neṅ guidoo ni yu' xhaguibaa, ca'zani te guiboz ni caduxh ro'ni.

¹⁸Dxejcti birii stee xangl Dios nez loj piāndxan xten Dios. Laani rajpni yāl̄rnibee lo balro. Dipduxh guniini, rājpnī loj ni ca' guiboz ni caduxh ro'ni, rājpnī:

—Basāl xquibozlu nez ni' reyaguub, batiuug guiraa reresim̄ uub ni yu' lo guedxliujre, sa'csi aguyajl̄reni.

¹⁹Dxejc batiuug anglga guiraa reresim̄ uub ni yu' lo guedxliujre nalajznu rebenguijdx, basāl̄nireni neṅ tanc cadro gulājreni yejcnī sa'csi rdxechduxh Dios lojreni.

²⁰Dxejcti balājreni yejc reuub nez orii te guejdx. Biriiduxh rejn yejcreni, gutiās rejnga, bidzuj̄n rejnga ro'li recabaii, gujcnī si'c che riu' nisro gueuu, biājtni si'cti choṅ gayuu mil metr guideb gabi cadro balājreni yejc reuub.

**Guigajdz xangl Dios nāj
 lult xcāl̄guxhtis Dios**

15 Dxejcti bahuiā stee senro xhaguibaa, nani bascheloduxh narā. Bahuiā loj gajdz xangl Dios, tejgareni ca' te plaag ni gusacsí reben̄ guedxliuj.

Redeetis najc lult, sa'csi che ted redee ati agulujx yāl̄rdxe'ch xten Dios.

²Dxejcti bahuiā loj tej ni najc si'c te nisdoo ni najc si'c biidr nu'chni bajl. Dxejcti galāii nisdoooga suga' renani bejn gaan loj manroga nājza lo banāj̄b ni najc si'c manroga, ni bejnza gaan di nica'reni seen xten lajni. Ca'reni arp xten Dios.

³Cayol̄reni dij xten toMoisés ni gujc xpej̄n Dios, cayol̄zareni dij xten Xiil xten Dios. Scree najc dijga:

Sacduxh, ruscheloy guiraa redzuun ni rujn Guejblu, Dad Dios, ni rajp guiraa yāl̄rnibee. Rujn Guejblu ganax dzunsa'c, rnii Guejblu ganax didxlii. Guejblu rnibee loj guiralii reguejdx ni yu' lo guedxliuj.

⁴Bahuii, Dad, ĩchu laa ni di guidxejb Guejblu ni di guiliā'p xpala'n Guejblu?

Sa'csi Guejbtislu najc dxan, ni'cni guiraa reguejdx ni yu' guedxliuj siād̄zuxhijbreni, siād̄gaj̄nreni Guejblu, sa'csi abaluiloj guiraa rextzunsa'cpac Guejblu.

⁵Dxejcti bahuiā xhaguibaa, bixal ro' yu' ni najc dxanro neṅ guidoo, cadro yuchee guij cadro caj xleīi toMoisés. ⁶Ro' yudxanroga birii gajdz xangl Dios ni ca' plaag te gusacsíreni reben̄ guedxliuj. Najcwreni te ladl̄in ni najc nolbāj, ni rdimbichaduxh. Dejd si'c te cinturon̄ lastooreni ni najc ganaxduj oor. ⁷Dxejcti yu' tajp reni najc si'c man nabaj̄n ni yu' nez loj Dios xhaguibaa. Tej reni badeed loj tejga reanglga te co'p ni najc ganaxduj oor. Guidxa

tejga rexhijgga xcälguxhtisro Dios nani nabajñ par tejpas. ⁸Gudxaj guidoo ni najc yudxanroruga gujxh ni siääd xcuent xcälmilaagwr, xcälrdimbichaduxh xten Dios. Rut gujcdi biu' neñ yudxanroruga che gulujxli guiraa replaag ni ca' guigajdz reanglga.

Rexhijg ni guidxa xcälguxhtis Dios

16 Dxejcti biejn diagä xse' te ni canii dipduxh xquidoolini, caniini loj guigajdz rexangl Dios, räjpni:

—Colchäj, colchasloj guigajdz rexhijgga lo guedxliuj, colca' rexhijg ni guidxa xcälguxhtis Dios.

²Anglgaloo ni huij, baslojni ni yu' neñ xhijg ni ca'ni lo guedxliuj. Dxejc loj guiraa rebejn nani caj xseen manduxh, reni rusuxhijb, rajñreni banäjb ni najc si'c manroga, birii tiejxhni te guedxyanduxh ni najc si'c cancer.

³Dxejc ni rojp anglga baslojni ni yu' neñ xhijg ni ca'ni loj nisdoo, te bejnni gubixhloj nisdooga gujçni si'c rejn xten te bengut. Dxejcti gujt guiralii reman ni yu' lo nisdoo.

⁴Ni riojn anglga baslojni ni yu' neñ xhijg ni ca'ni loj regueuu näjza cadro rliejn nis. Gubixhlojreni gujçreni rejn. ⁵Dxejcti biejn diagä gunii angl ni rajp yälñibee lo nis räjpni:

—Huenduxh najc Guejblu Dad ni najc naj sigajc gujc Guejblu galoo, dxanduxh najc Guejblu sa'csi cayujñ Guejblu yälguxhtis redzunguijdx.

⁶Sa'csi laareni baxhe'reni rejn, bagu'treni rexpejnlu näjza renani gunii xtiidxlu, luxh naj badeed Guejblu rejn cayä'reni. Si'c pac nungäjñ gacreni.

⁷Dxejcti biejn diagä canii steeni lagajc lo piändxan, räjpni:

—Guliipacni Dad Dios ni rajp guiralii yälñibee, xcälguxhtis Guejblu najc laaca, si'c riäjñ gacni.

⁸Dxejcti ni rdajp anglga cua' xhijg ni ca'ni, baslojni ni yu' neñ xhijgga lo gubijdx, te badeedni lo gubijdx yälñibee guze'cnäjni rebejn guiboo.

⁹Guiraliireni gusloj cayeçreni, lacti nanladuxh, dxejc gusloj caniyajreni Dios ni rajp yälñibee loj recosga. Niluxh direni nusiechlajzreni, niclaza niliä'preni xpala'n Dios.

¹⁰Dxejcti ni rajc rgaii anglga cua' xhijg ni ca'ni baslojni ni yu' neñ xhijgga lo tron cadro rnibee manroduxh. Bicäjy guideb cadro rnibee manduxhga, luxh rebejn rauya'tisreni lujdxreni sa'csi cayajçreni yälñayanduxh.

¹¹Guniyajreni Guejb Dios ni yu' xhaguibaa sa'csi rajçreni yälñayanduxh, xcuentza rexquedxnayanreni. Luxh direni nusiechlajzreni xcuent xtojñreni.

¹²Dxejcti ni rajc xho'p anglga cua'ni xhijgna, baslojni ni yu' neñ xhijgga loj gueuro ni laa Eufrates. Gueuga gubidzlii nisni te guc-chee te nezyuj xten rereii ni jääd nez cadro rliejn gubijdx.

¹³Bahuiäza birii ro' gutiatzro, näjza ro' manro, näjza ro' ni najc profe't ni rusguee, birii chon spritguijdx ni najc si'c bedz, ¹⁴sa'csi najçreni respit xten bendxab, rujñreni milagwr, senro. Rijreni loj guiraa rereii loj guedxliuj te gutie'reni guiraa bejn loj guedxliuj te gac guerroduxh, te gucuanäjreni Gueb Dios ni rajp guiralii yälñibee che guidzujñni lo guedxliuj.

¹⁵“Narä siädxhiga'tzä si'c riääd te gubaan. Chicbaaza renani cabäjz, cagutie'chreni bacal lojni che guibi'ä si'c rujn nani najcw guiraa xhajnbi, te na'c guiga'ni xhabäälni, jianxtujyni che guibi'ä.” ¹⁶Dxejc gutie'reni guiraa rebejnre te lajt ni laa lo didx hebre “Armagedón”.

¹⁷Dxejcti ni najc rgajdz anglga cua'ni xhijgni baslojni ni yu' nen xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rnibee Dios, räjpni:

—Agujcni, agulujxhni.

¹⁸Dxejc guyuduxh yälrdinya' näj guziro. Gujca te xuroduxh lo guedxliuj, te xu sa' ni gajdpac gac. ¹⁹Che gujc xuroga, biräjs guedxroduxhga, gujcti chon la', dxejcti gureb'an guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yälguxhtis guedxga. ²⁰Li gubicaj, gunitloj reyuj ni tre' lo nisdo, gunitlojza redajn. ²¹Xhaguibaali biäjb te guixhobro yejc rebejn; tejsa guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentroduxh gujcti.

Gun Dios yälguxhtis te gunadxab

17 Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadro yu sijn nis. ²Guiraa rerei lo guedxliujre bennäjreni gunaaga dojl, sigajca guiraa reben guedxliuj bennäjreni gunaaga dojl. Gusosnäreni gunaaga bejnreni si'ctis ni rlanjreni.

³Dxejcti huinäni narä si'c lo te bacal nez lo reyubijdz. Bahuiä loj te gunaa, bijbni dejtz te manro ni najc xniaa, luxh guidebni caj diidx ni rniyaj Dios. Gajdz najc bitiuvejcti, sojbza tzuu xca'chni. ⁴Gunaaga najcw te lad moraad con xniaa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxduj oor ni guidxa ganax recosguijdx, recosdxab ni bennäjni reben guedxliuj. ⁵Caj te diidx lo cuajni, luxh rut racbeedi xhi sälojni. Scree rnii diidxga: “Babilonro, xnan regunadxab, xnan recosdxab ni rajc lo guedxliuj.” ⁶Bahuiä agusojz gunadxabga. Agusosnäjni xtiejn rexpejn Dios nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bidxeloduxhä. ⁷Dxejcti gunii anglga loä, najni:

—¿Xhicuent rdxelojlu, ä? Narä siniä xhi säloj gunadxabga, näjsa manroga ni sojb gajdz bitiuvejcti näj tzuu xca'chni. ⁸Manroga ni bahuiilu gubajni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtni par tejpas. Rebejn ni nabajn lo guedxliuj nani di lajreni nicaj lo guijtz xten yäl nabajn xten Dios, guijtz ni guc-chee che birixtiejli guedxliuj, rebejnnga sidxeloduxhreni che fiireni loj manroga nani gubajn galoo, ni gunitloj, niluxh naj agubansacni.

⁹Ree nanab ga'pni yäl najn. Gajdz rebitiujejcti säloj gajdz dajn cadro sobga' gunaaga, ¹⁰sälojzarenii gajdz reii. Agujc gaii reiiga ni cayajb. Tej rereiiga canibee naj. Stee

reiiga churu jiääd. Luxh che jiääd lult reiiga, guxii dxej guinibeeni.

¹¹Manro ni gubajñ galoo, ni agunitoj ñaj, ni'c rac xhujñ reii, najczani tej loj guigajdz rereii, luxh sinitlojni, sejtni par tejpas.

¹²Guidzuu rexca'chni ni bahuiilu säloj tzuu reii. Gajdreni guisloj guinibee ñaj. Laareni näjza manroga xca'reni yälrnibee teb or, nalajznu guxii dxej. ¹³Tejtis xhigab gun rereii, gudeedreni xcälnadipreni, xcälrnibeereni lo manroga. ¹⁴Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rnibee loj guiraa redad, najcni Reii ni rnibee lo guiraa rereii. Luxh renani siädñajni najc reni agurejdxni, reni aguleni, sisiudzu'tznäjreni.

¹⁵Dxejcti najza anglga loä:

—Reni ni bahuiilu cadre sobga' gunadxabga säloj guiraa guejdx, guiraa beñ guedxliuj, guiraa beñ ni rñii garen-garenca xtiidxreni, ni siääd garen-garen reguejdx. ¹⁶Guitzuu reca'chga näjza manroga ni bahuiilu, sidxe'chreni loj gunadxabga, suro'nreni gunadxabga, susa'nreni gunadxabga xhabäälni, sawreni bältiejxhni, suze'creni gunadxabga lo guiboo. ¹⁷Sa'csi abasniib Diosreni te gunreni tejsi xhigab, te gudeedreni xcälrnibeereni lo manroga che guidzujñli dxej ni chale' guira'ti ni gunii Dios gac. ¹⁸Gunadxabga ni bahuiilu säloj guedxro ni rnibee loj guiraa rereii loj guedxliuj.

Xho jiajb guedx Babilonia

18 Dxejcti bahuiä loj stee xangl Dios ni siädyäjt

xhaguibaa. Siädñani yälrnibeduxh, xcälrndimbicha'ni bazanij loj guedxliujre. ²Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, ñaj najcni guejdx cadre rbäjz rebendxab, ro'c rcanzaj guralii cuaa spritdxab, najczani xpitiääz guiraa reman xhaguibaa ni najc mandxab, mandxuudx. ³Sa'csi guiraa reben guedxliuj agusozreni xcuent dojl ni bennäjreni gunadxabga, guiraa rereii loj guedxliuj bejn dojl guläsnäjreni gunadxabga, luxh guiraa reben guedxliuj ni ruto' abejnreni ganduxh, agujcreni ri'cw xcuent recosdxab ni rujn gunabdxabga.

⁴Dxejcti biejn diagä xse' stee nani canii xhaguibaa:

—Colguirii guejdxga rexpänä, te di näj la'tu gunnäjtu gunadxabga dojl, te di tedtu trabawduxh lo replaag xtenni. ⁵Sa'csi yuduxh rextoljni, abidzujñreni xhaguibaali, luxh abanajza lajz Dios rextoljni. ⁶Colgudeed loj gunaaga sigajc ni badeedni lojreni. Colquijx loj gunaaga tio'pli huält lo ni bejnni laani. Nen co'p cadre badeedni gu' bejn (te trabajw ni bateedni bejn), lagajc nenga colyejn te ni najc tio'p huält maazru fuert yä gunadxabga, nalajznu tedni trabajw tio'p huält. ⁷Lacti gulä'p gunaaga xpala'nñi, gubajñni si'ctis ni rlajzni lo guedxliuj. Ñaj colguteed gunaaga trabajw, si'cti mediid ni gulä'pni xpala'nñi; si'cti mediidza ni bibalazñajni mood ni gubajñni, sigajcza gac-huin lastooni sa'csi bejnni xhigab nen lastooni: “Narä sobga'ä ree si'c

te rein, te benroduxh, dina gacä biuud, niclaza gac-huin lazä.”

⁸Ni'cni tejsi dxej siajb yejcnì guiraa replaag xten Dios: yälgujt, yälhuin lajz, näj yälrliaan, luxh seiczani lo balguiboo, sa'csi rnibeduxh Dad Dios ni gun xcälguxhtisni.

⁹Guiraa rereii lo guedxliujre ni bennäj gunaadxabga cosguijdx, reni cuansanäjnini, sonduxhreni, siaduxhreni che fiireni gujxh ni carii cadro cayejcnì. ¹⁰Zijtru sisiujreni sa'csi rdxejbreni replaag xten gunadxabga, dxejc siniizarenì:

—Aii, aii, riaduxhnu guedxrore, Babilonia, guedxdipduxh gujclu, luxh chela gucbeenu, ala bidzujñ yälguxhtis yejclu.

¹¹Rebejn ni ruto' loj guedxliuj sonduxhreni, siarenì guejdxga sa'csi rutru rsiidi xhixtenreni ni ruto'reni. ¹²Laarenì ruto'reni oor, pla't, guiraloj reguisa'c, perl, ladlin, ladmuraad, ladseed, näjza guiraloj baräjd yagdoo, näj guiraloj cos saru, ni nacchee läi elefant, näj cos saru ni nacchee bronz, näj guiib, näj márm, ¹³näjza caneel, guiraloj laj comiid, näjza yalnejxh, näj perfum, näjza yaal, näjza bin, näjza se't oliib, näjza arinsa'c, näjza triuu, näjza gon, näjza rexiil, näjza cabaii, näjza gare't, näjza bejn ni ruto'reni tiejxhreni, xaimreni. Guiraa reni'c ruto'reni. ¹⁴Dxejc guniiza xse' ni canii xhaguibaali, najni:

—Ninexhsa'c ni rlazduxhlu, agunitloj. Guiraa recossa'c, recossaruduxh agubicajreni lojtu, luxh di gacdiru guidxäl bejn reni'c.

¹⁵Reni ruto' guiraloj recosga, nani gujcreni ri'cw xcuent guedxroga, zijtru sisiujreni sa'csi rdxejbreni

trabajw ni cadeed guejdxga, sonduxhreni, sac-huinduxh lajzreni, ¹⁶säjbreni:

—Aii, aii, riaduxhnu guedxrore, naii gojtni ladsacduxh, guiraa ladlin, ladmuraad, ladxniaa, gusucheeni con oor, con guisa'c, con perl, ¹⁷tera'tbäztis baralii recosro ni najc xhixtenni, guxhijnreni.

Guiraa recapitán xte barcw, näjza guiraa remarineer, näjza rebejn ni rij biaj lo rebarcw näjza guiraa reni rujn dzuun lo nisdoo, gusujreni zijt, ¹⁸näjza laarenì cahuiireni cayäjs gujxh guejdxga, cabedxa'reni, caniiireni:

—¿Xhi stee guejdx najc si'c najc guedxrore, ä?

¹⁹Bachajreni yuyol yejcreni sa'csi rac-huin lajzreni, binduxhreni, guredxa'reni:

—iAii! iAii! Riaduxhnu guedxro sa'csi xcuenttis guedxduxhre gujc ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijn guedxrore.

²⁰Guniiza xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yälguxhtis xcuent ni bejnni lojtu.

²¹Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabajwduxh, sinitlojni par tejpas, dirutu fii

lojni. ²²Diru guibi' jiejn cayel nez xladcaiiu reharp, reflaut, retrompe't; diru guibi' chu tej ni gun xhitis dzuun; diruza guibi' chubej molin ni cayot'. ²³Diru guibi' jieñ xcälrdimbicha' te bajl ni cagusanij; diruza guibi' jiejn xse' bi'n näj dxa'p loj te sa' sa'csi rexpejnlu ni ruto' gujcreni beñroduxh lo guedxliuj sa'csi basgueezalu reben guedxliuj xcuent rextzundxablu.

²⁴Neñ guejdxga bidxäjla xtiejn renani guni xtidx Dios, näjza xtiejn rexpejn Dios, näjza xtiejn guiraa reben guedxliuj ni bagu'treni.

19 Che gulujx recosre, biejn diagä lascanu xse' xhidarlo bejn ni canii xhaguibaa, cayäjpreni:

iColguiliä'p xpala'n Dios!
Xtentis Dios, xtenni najc yälrusläa lo dojl,
näj yälrdimbicha', näj yälmilagwr.

²Sa'csi xcälguxhtisni najc ganax laaca,
huentis najcni, sa'csi abejnni yälguxhtis gunadxabga nani caguxhiñ reben guedxliuj xcuent xcälñadxabni.
Abejn Dios yälguxhtisni,
agudijxhni xcuent xtiejn rexpejn Dios ni baxhe' gunadxabga, che bagu'tnireni.

³Guibi' guniizareni:
—iColguiliä'p xpala'n Dios! Gujxh xten gunadxabga sanuutis cayä'p par tejpas.

⁴Guiraa regalbitajp rebengool näjza guidap remanbajnga bazuxhijbreni, biabrlojreni gojnreni Dios ni rbej lo tron cadro rnibeeni, caniiireni:

—Sugacni si'c. iColguiliä'p Xpala'n Dios!

⁵Dxejcti nez lo tron cadro rnibee Dios biejn xse' tej ni canii:

Colgudeed xquixtios lo Dios,
guira'tu ni rujn xtzuum Dios,
guira'tu ni rajntu Dios, rebenro sigajc rebennadolajz.

Sa' xten Xiil xten Dios

⁶Dxejcti biejn diagä ascanu xse' xhidalduxh bejn, riejnni si'c che cayäjt nisro xhidajl gueu, näjza si'c che caguidxaduxh guzii, caniiireni: iColguiliä'p xpala'n Dios!

Sa'csi Gueb Dios, Dad xtenu ni rajp guiralii yälrnibee, ani acanibee.

⁷Guibalajznu, guibalazduxhnu, guiliä'pnu xpala'nni sa'csi abidzujñ dxej guchnaa Xiil xten Dios, aguzucheeza dxa'p.

⁸Abadeedreni ladlin ni najc nuiduxh gacwni.

Ladnolni, luxh rdimbicha'ni sa'csi nayadujni.

Ladnayare säloj redzunsac ni bejn rexpejn Dios.

⁹Najza anglga löä:

—Bacuaa diidxre: “Chicbaa renani bidon jääd lo xsa' Xiil xten Dios.”

Guniizani löä, najni:

—Rediidxre najc didx-guliipac xten Dios.

¹⁰Dxejcti bazuxhibä lojni te ganäni, dxejc laani najni löä:

—Na'c gunlu si'c, sa'csi narä nacä sigajc najclu, nacä te ni rujn xtzuum Dios, näjza bejtzlu ni rusule' xtidx Jesucrist. Bazuxhijb lo Diostis sa'csi Dios rudeed gusule' bejn xcuent Jesucrist, gusule'zaren i xtidx Dios.

Nani bijb te cabainol

¹¹Dxejcti bahuiä bixal xhaguibaa, biricaj te cabainol. Luxh laj nani rbijbni säloj casobsa'cpacni diidx, rniizani ganax didxgulii. Entis laaca rujnni yälguxhtis, entis laaca rucuaani che rujnni guer. ¹²Rebalojni rbebajl, yejcnj yu' xhidalduxh coron, luxh caj te laj lojni nani rutliidi racbee, luxh laatisni racbeeni xhi sälojni. ¹³Najcwni te lajd ni nadiini rejn; lajni najcza Xtidx Dios.

¹⁴Guiraa resoldaad guibaa xten Dios siädnajlni najcwreni ladnol, ladnaya, bijbzareni cabainol.

¹⁵Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo guedxliuj, te guinibeeni guiraa reben guedxliuj ca'ni si'c te barguiib. Sujnzani yälguxhtis lo reni rdexchlajz lo Dios, si'c ruläjreni yec uub che rbääreni bin, si'c sujnz Dios ni rajp guiralii yälrnibee. ¹⁶Lo xhajbni näjza cuä' cujdni caj lajni: "Reii xten rereii, Dad xten redad."

¹⁷Bahuiä loj te angl suga'ni galäii gubijdx, cabedxa'ni caniini loj guiraa reman ni rutajt xhaguibaa, räjpni:

— Coltaa, colguire' ree, te gautu xcheroduxh xten Dios; ¹⁸te gautu xpääl rereii, näjza xpääl recapitán, näjza xpääl rebenro, näjza xpääl recabail, näjza xpääl renani rbijb recabail, näjza xpääl guiraasi bejn, bejn ni rdo' si'c rdo' guidxaa sigajc rebejn ni di gun xtuun bejn, rebenbáz sigajc rebenro.

¹⁹Dxejcti bahuiä loj manro näjza loj rereii guedxliuj, abire'reni te

gucuanäjreni nani rbijb cabainol näjza guiraa resoldaad xtenni.

²⁰Biga' manroga näjza profetxhii ni bejn senro nez loj manroga te basgueeni guiraa renani cua' seen xten manroga, näjza renani bazuxhijb lo banäjb xten manroga. Guiro'p redee bacuaareni guideb nabajñreni nen te bal guiboduxh ni recnäj sufr. ²¹Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälreni.

Te mił ijz

20 Dxejcti bahuiä loj te xangl Dios ni siädjiäjt xhaguibaa, siädnäni liäii ni ruxhal guedro ni laa gabijl. Ca'zani te cadenro.

²Anglre gunaaz gutiatzroga, ni gujc bäl galooli, ni najcza bendxab, ni laaza Satanás. Bacuadaunini te mił ijz. ³Basäl'nini nen gabijl, te ro'c basäunini, bacuaani liäii te na'cru gusgueeni reben guedxliuj lał ni guiza' te mił ijz. Che guiza' reijzga, empac sibi' lasacni bale'si dxej.

⁴Dxejc bahuiä retron cadro rbejreni rnibeereni, bahuiäza loj renani rbej lo retron, cua'reni yälrnibee te gunreni yälguxhtis. Dxejcti bahuiä xaim rebejn nani biru' yejcnj sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhijb loj gutiatz niclaza lo banäjb ni najc si'c manroga, dizareni nica' seen lo cuajreni nicla lo naareni. Gubansacreni loj rebengut, gurenäjreni Jesucrist te laani gunibenäjreni te mił ijz. ⁵Dee najc yälrbansac galoo lo rebengut. Niluxh stecuaa rebengut, direni

guibansac che guisa'li te miĵ ijz.

⁶Chicbaa rebejn nani guibansac ganiddoo, najcreni bendxan ni agubicaĵ xtojĵreni. Ni roĵp yälguĵt di guidzujĵ loĵreni. Laareni sajcreni xpixhoĵz Dios näĵza Jesucrist, sibenäjreni Jesucrist, sinibenäjreni Jesucrist te miĵ ijz.

⁷Che guiza' te miĵ ijzga, suslasacni Satanás nen gabijl. ⁸Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben Gog näĵza reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo. ⁹Huä'preni lo te camp cadro gulagduxh. Gudäjyreni guideb gabig cadro rnibee rexpejn Dios nen guejdx nani sanälajz Dios. Per baxhal Dios bal guiboo xhaguibaali bitejbni, te guyejc guiragajcreni. ¹⁰Dxejc bacuaareni bendxab nani biädgusguee rebejn lo bal guiboo ni cayecnäj sufr, lagajc cadro yu' manro, näĵza profetxhii nani basguee; lo bal guibooga susacsirenini sidejdreni trabawduxh dxej-yäl par teĵpas.

Yälguxhtis ni gujc nez loj tronronol

¹¹Dxejcti bahuiä lo te tronronol näĵza lo nani sobga' loĵni te rujnni yälguxhtis. Nez loĵni gunitloĵli guedxliuj näĵza guibaa, xhetru lajtdi bidxälj par laareni. ¹²Bahuiä lo rebengut, benro sigajc bennadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guiĵtz xten xcäl nabannäj Dios par teĵpas. Dxejcti bejnni yälgutxhtis rebengut xcuent ni bejnreni, xcuentza rediidx

nani caj loj reguiĵtzga. ¹³Guiraneĵz biäd rebengut: nisdoo batzuug rebengut ni yu' loĵni, gabijl näĵza yälguĵt batzuugza rebengut ni yu' loĵreni. Dxejcti bejn Dios yälguxhtis teĵgareni xcuent ni bejnreni.

¹⁴Dxejcti bacuaani yälguĵt näĵza gabijl lo bal guiboo ni najc si'c te nisdoo te ro'c checreni par teĵpas. Dee najc yälguĵt ni roĵp. ¹⁵Guiraa bejn ni di laĵni nidxälj lo xlibr yäl nabajĵ bacuaazani reni'c lo bajlga.

Xhaguibacoob näĵza guedxliucoob

21 Dxejcti bahuiä te xhaguibacoob näĵza te guedxliucoob, sa'csi agunitloĵ guibabiejw, näĵza guedxliubiejw, luxh xhettiruzza nisdoo. ²Narä Juan, bahuiä lo guedx Jerusalencoob, guedxdxan, siädjiäjtni xhaguibaali cadro rnibee Dios. Sucheduxhni si'c rsiuchee te dxa'p nani agoĵl guchnaa. ³Dxejcti biejn diagä te xse' te ni canii dipduxh, ascanu lo tron cadro rnibee Diosli carii se'ga, scree caniini:

—Colhuii, aguzuj xquidoo Dios galäii rebejn, anabannäj Dios rebejn, sajczareni rexpejnni. Sibannäj lagajc Gueb Diosreni. ⁴Sutia Dios guiraa nisbee baloĵreni te na'cru goonreni. Sinitloĵ yälguĵt, xhetru xliajsdi chu, diru bejn goon, dirureni jiajn, sa'csi guiraa redee ni guyu' galoo agunitloĵ.

⁵Dxejcti ni sobga' lo tron cadro rnibeeni guniini, najni loä:

—Bahuii, najrä guscobä guira'ti.

Guniizani loä:

—Bacuaa rediidxre, sa'csi guliipacreni, sajc chalilajz bejn rediidxre.

⁶Dxejcti najzani loä:

—Agujcni. Narä nacä A näjza Z, ni säloj nani rbaxtiej näjza nani ruluux. Lo chutis ni cayojl, sudedxlia'ä nis yäni, nalajznu yäl_nabaj_n par tejpas. ⁷Chutis nani gun gaan lo dojl, sica'zani guiraa dee si'c yäl_nasa'c, luxh narä sacä Xtiosni, laani sacni xi'nä. ⁸Niluxh renani rdexjb, renani di chalilajz xtidxä, reni rdxe'ch loä, reni rugu't sa'reni, reni runnäj gunaa dojl, renani najc bidxaa, renani rusuxhijb lo banäjb, guiraa renani rusguee rniireni didxxhii, guiragajc reni'c sij lo nisdoo ni najc ganax bal guiboo, cadre rejc guiboo näjza sufr par tejpas. Dee ni najc yälgujt ni rojp.

Guejdx Jerusaléncoob

⁹Dxejcti lo guigajdz xangl Dios ni ca' guigajdz xhijg ni guidxa guigajdz reyäl_guxhtis xten Dios, birii tejni, najni loä:

—Gudaa, te guluiä lojlu dxa'p nani guch_naa Xiil xten Dios.

¹⁰Dxejcti bejn_ni gunixcalä, huinäni narä lo te danro ni jiaduxh, ro'c baluini loä te guedxro, te guedxdxan ni laa Jerusalén, luxh xhaguibaali siädjiäjt_ni nez lo Dios. ¹¹Guejdxga rdimbicha' guideb xcäl_rrdimbicha' Dios. Luxh yäl_rrdimbicha'ga najc si'c najc te guisacduxh ni laa jaspe, rdimbicha'zani si'c biidr. ¹²Guideb gabi guejdxga dejd te paderro cadre caj tzubitio'p xport_nroni. Te angl xten Dios suga' ro' tejga port_nga. Loj tejga port_nga, caj laj tej retzubitio'p cuaa xten rexpejn Israel. ¹³Chon port_nga caj nez

cadro rliejn gubijdx, yu'za chon port_nga nez ladbee, yu'za chon port_nga nez ladbä_{jw}, yu'za chon port_nga cadre räaz gubijdx. ¹⁴Yu' tzubitio'p guiro lo cimient xten guejdxga. Lo tejga reguijga caj laj tej retzubitio'p apost xten Xiil xten Dios.

¹⁵Angl ni caninäj narä ca' si'c te biqui ni najc ganaxduj oor te gurejxhni guejdxga, näj reportonga, näjza padeerga. ¹⁶Guejdxga najc cuadraad: sigajc ni sioolni, sigajcza ni gulajgni. Dxejcti cua'ni biqui barejxni guejdxga, barejxni tio'p mil' tio'p gayuu kilómetros tejga laad. Sigajc sioolni, sigajcza gulajgni, sigajcza jiaani. ¹⁷Dxejcti barejxni padeerga, yu'ni gayonbitajp metr segun mediid xten bejn, sa'csi ni'c najc ni cagutiexhnä_{jz}a anglga.

¹⁸Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn. ¹⁹Recimient xten padeerga nac-chee guisa'c. Guiganid najc guijaspe; ni roj_pga najc zafiro; ni rioj_nga najc ágata; ni rdaj_pga najc esmeralda; ²⁰ni rgaigi najc onix; ni rxho'p_{ga} najc cornalina; ni rgajdzga najc crisólito; ni rxhuj_nga najc berilo; ni rgaaga najc topacio; ni rtzuuga najc crisopraso; ni rtzubiteebga najc jacinto; ni rdzubitio'p_{ga} najc amatista. ²¹Guitzubitio'p port_nga najc tzubitio'p perl. Tejga port_nga guc-chee tej perl. Nezyuro ni rdeed galäi guejdxga najc ganaxduj oor, rienni si'c te guihuajn.

²²Dina nuhiä nicla tej guidoo nen guejdxga, sa'csi suga' Gueb Dios ni rajp guiralii yäl_rribeduxh,

näzja Xiil xten Dios. Laani najc xquidoo guejdxga. ²³Guejdxga dini guiquiin gusanij nicla gubijdx niclaza bäii, sa'csi lagajc xcälrdimbicha' Dios näzja Xiil xten Dios ruzanij ro'c. ²⁴Rebejn guedxliuj ni rililajz xtidx Dios sajc sareni lo bianijga, luxh rerei ni siääd lo guedxliujre siädnäzareni xcälrnibeereni, näj xpala'nreni ro'c. ²⁵Di ro' reportanga jiäuu rdxej, luxh ro'c xhettiza yääl. ²⁶Ro'c chanäzareni yäl'nasa'c näj xpala'n reguejdxro ni yu' lo guedxliuj. ²⁷Niluxh di gacdipac jiu' nicla tej cosguijdx ro'c, niclaza te bejn ni rujn cosguijdx näj yäl'rusguee. Ro'c siu' ganaxduj renani caj lajni lo libr xten yäl'nabajn par tejpas nani ca' Xiil xten Dios.

22 Dxejc baluii anglga te gueuro loä, cadro yu' nisya xten yäl'nabajn. Rdimbicha'ni si'c te guihuajn, luxh cariiini lo tron cadro rnibee Dios näzja Xiil xten Dios, ²rdejdn loj nezyujro ni rdejdn galäii guejdxga. Guiro'p laad gueuga sojb reyajg xten yäl'nabajn, lojreni rcaj tzubutio'p cuaa ninejxh nen tebijz, tejga cuaa ni tejga bäii; luxh rebalajg ni rcaj lo reyajgga najc te gusajcni reben guedxliuj. ³Dxejcti ro'c xhettiru yälrdzubde, sa'csi ro'c yu' tron cadro rnibee Dios näzja Xiil xten Dios, ruzuxhijbza rexejnni, rajnreni laareni. ⁴Suhuiireni lojpacni si'cpac ni najcni, sicajza laj Dios lo cuajreni. ⁵Ro'c diru yääl chu. Luxh reni rbäjz ro'c di guiquiin nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjrenini par tejpas.

Siäddzungajxh dxej ni guibisac Jesucrist

⁶Dxejc naj anglga loä:

—Guliipac najc rediidxga, sajcpac chalilajzlureni. Dad Dios lagajc nani basniib lastoo rebejn ni gunii xtiidxni agujc xchero, lagajc laani baxhalni xanglni te baluilojni loj rexejnni guira'ti nani agojl gac.

⁷—Sajngalu gan, siojb jiälä. iChicbaa nani riu rediidx ni caj lo libbre!

⁸Luxh narä, Juan, biejn diagä rediidxre, bahuiäza recosre. Luxh che bahuiä, che biejn diagä bazuxhibä te ganä xangl Dios nani baluii loä guiraa redee. ⁹Luxh laani najni loä:

—Na'c gunlu si'c, sa'csi narä runä xtzuunni sigajc rujnlni, sigajc rujn rebejn ni gunii xtidx Dios agujc xchero, sigajc rujn rebejn ni rusooob rediidx ni caj lo libbre. Bazuxhijb loj Diostis.

¹⁰Dxejc najni loä:

—Na'c gusäuulu guijtzn cadro caj rediidxre xcuent nani churu gac, sa'csi asiäddzungajxh redxej ni chale'reni. ¹¹Luxh laj ni guidzujn dxejga, basaan suchanuu gun dojl renani cayungajc dojl; basaan suchanuu gun dzunguijdx renani cayungajc dzunguijdx. Per renani cayujn dzunsa'c, chanuu gunreni dzunsa'c, nani najcza bennaya, si'cza chanuu gacni bennaya.

¹²Gunajtiro:

—Siojb jiälä, luxh siädnää xhi gunidxä loj tejgatu si'c ni riäjl xca'tu xcuent dzuun ni bejntu. ¹³Narä Jesucrist nacä si'c najcza A näzja Z, ni säloj nani rbäxtiej näzja nani ruluux.

¹⁴Chicbaa renani riu xtidx Dios, najcreni si'c ni rguuib xhajibreni te sajc jiu'reni nez porton xten guejdxga, sajcza gauni ninejxh ni caj lo yajg xten yäl**na**baj**n** par tejpas.

¹⁵Per dejtz guejdxga chajia'n reni najc si'c bä'cw, nalajznu rebidxaa, renani rusguee chälbe**j**n, renani rugu't sa'reni, renani ruzuxhijb lo rebanä**j**b, näjza ni rchaglajz rnii didx-xhii te gusgueeni.

¹⁶Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä ne**n** reguidoo loj rexp**e**nä. Narä nacä te xajg to**r**eii David, nacäza si'c balxhaguibaa nani rdimbidxa' cäjysi che gajd jianij lo guedxliuj.

¹⁷Sprit Dxan xten Dios näjza chääl Xiil canii, najreni:

—Col**t**aa.

Suguiniiza nani riejn diajgreni diidxre, gäbreni:

—Col**t**aa.

Sujiädza chutis ni cayojl, sujiäd**y**äxlia'ni nis yäl**na**baj**n** par tejpas.

¹⁸Sa'csi narä rniliä'ppac lojtu, guiraatu ni riejn diajgtu rediidx ni caj lo guij**t**zre xcuent recos ni churu gac, palga yu' chu tejtu gutajlru diidx ni caj lo guij**t**zre, suteedru Dios be**j**nga replaag yej**c**ni loj ni caj lo guij**t**zre. ¹⁹Palga yu' chu gudzucaj loj rediidx ni caj lo guij**t**zre, sudzucajza Dios nani nica'ni lo yajg xten yäl**na**baj**n** par tejpas, näjza lo guedx Dxan, ni caj xcuentreni lo guij**t**zre.

²⁰Nani cagusule' diidx xcuent guiraa redee guniini, najni:

—Guliipacni sio**j**b jiälä.

Sugacni si'c. Gudaa Dad Jesucrist.

²¹Sujiädä**d** xcäl**r**ac**n**äj Dad Jesucrist lo guiraatu. Sugacni si'c.